


Awajún [Aguaruna]



Aguaruna: Awajún [Aguaruna] (Bible)

Awajún [Aguaruna]

Aguaruna: Awajún [Aguaruna] (Bible)

copyright © 2020 Wycliffe Bible Translators, Inc.

Language: Aguaruna

Translation by: Wycliffe Bible Translators

Contributor: Wycliffe Bible Translators, Inc.

Aguaruna

agr

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Aguaruna

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 21 Feb 2024 from source files dated 29 Jan 2022

83ecbfbd-5af5-5abb-945b-1213bf2b2b18

Contents

Mateo	1
Marcos	69
Lucas	109
Juan	178
Takasbau	229
Romanos	288
1 Corintios	320
2 Corintios	345
Gálatas	361
Efesios	371
Filipenses	381
Colosenses	388
1 Tesalonicenses	394
2 Tesalonicenses	400
1 Timoteo	403
2 Timoteo	411
Tito	416
Filemón	419
Hebreos	421
Santiago	441
1 Pedro	448
2 Pedro	456
1 Juan	461
2 Juan	468
3 Juan	469
Judas	470
Iwainakbau	473
Salmos	501

YAMAJAM CHICHAM MATEO AGAGBAU

Jisukristu muunji aajakú aidau

(Lc. 3.23-38)

¹ Ju ainawai Jisukristu muunji aajakajua nuna daaji agatkamua duka.
Nigka David, Abraham aina nu wegantu aajakuí.

² Abragka uchijiyai Isaac,
Isaaka uchijiyai Jacob,
Jacopa uchijiyai Judá nuigtú yachi aidaushkam.

³ Judá Tamarai akiauwai Faresan, Zarajai.
Faresa uchijiyai Esrom,
Esroma uchijiyai Aram.

⁴ Arama uchijiyai Aminadab,
Aminadapa uchijiyai Naasón,
Naasogka uchijiyai Salmón.

⁵ Salmón Rahapa juki akiauwai Boozan,
Booz Rutan juki akiauwai Obetan,
Obeta uchijiyai Isaí.

⁶ Isaí uchijiyai apu David,
tuja David Uriasa nuwe aajakua nuna jukí Salomogkan akiauwai.

⁷ Salomogka uchijiyai Roboam,
Roboama uchijiyai Abías,
Abiasan uchijiyai Asa.

⁸ Asa uchijiyai Josafat,
Josafata uchijiyai Joram,
Jorama uchijiyai Uzías.

⁹ Uziasa uchijiyai Jotam,
Jotama uchijiyai Acaz,
Acaza uchijiyai Ezequías.

¹⁰ Ezequiasa uchijiyai Manasés,
Manasesa uchijiyai Amón,
Amogka uchijiyai Josías.

¹¹ Josiasa uchijiyai Jeconías nuigtú yachi aidaushkam, ditak aki-
inawajui Babilonianmaya aidau Israel aentsun achig yajuaku aina
nunú tsawan jegatsaig.

¹² Tuja Babilonia yajuakam batsamsag
Jeconías akiauwai Salatielan,
Salatiela uchijiyai Zorobabel.

¹³ Zorobabela uchijiyai Abiud,
Abiuta uchijiyai Eliaquim,
Eliaquima uchijiyai Azor.

¹⁴ Azora uchijiyai Sadoc,
Sadoca uchijiyai Aquim,
Aquima uchijiyai Eliud.

¹⁵ Eliuta uchijiyai Eleazar,
Eleazara uchijiyai Matán,
Matagka uchijiyai Jacob.

¹⁶ Jacopa uchijiyai José, María aishi aajakua nunú; tuja Maríayai akiinawai Jisus, Apajuí awemamu taku Kristu tujakbauwa nu.

¹⁷ Imaan aajakajua nunú Abragkai nagkamsa dekapa Davitai ejemak awai catorce aents, tuja Davitai nagkamsa dekapaja Babilonianmaya aidau Israel aentsun achijá yajuakajua nui ejemash catorce aents awai, aantsag Kristu akiinawai imanui ejemashkam catorce aents awai.

Jisukristu akiinamu
(Lc. 2.1-7)

¹⁸ Jisukristu akiinatnai tibauk aatus aajakuí. José anagbauwai Marían Jisukristu dukují atinun, tujash Maríak eke nematsuk pujay-atak Wakaní Pegkejin ejapjukui. ¹⁹ Nuniktatman José dekaa, nigka aishmag pegkeg asa: Wakenmataik tikichish dekeinatsaig idaisatjai, tiuwai. ²⁰ Aatus José anentaimas kanittaman, Apajuí aentsji nayaimpinmaya kajanum wantintuk: “José David wegantu uchijiyah, utujimtsuk Maríak jukita, ame anagmamua duka. Ni ejapjuka nunak Wakaní Pegkeji egkemtukam ejapjuka”, tiuwai. ²¹ “Nunú uchi akiinkui adaikata Jisus, ni aentsú tudaujin tsagkujug uwemtikatin asamtai.”

²² Ju aatus ejapjukua duka, duwik Apajuí etsegtin tibauwa nu uminbaunum nunikui, duka tawai:

²³ “Ejapjuktinai makichik muntsujut aentsú takashtai, nunik uchigmaktinai uchi aishmagkun, nunú adaikatnaitjume Emanuel”, (nunak: “Apajuik jutijai awai” taku tawai).

²⁴ Nu aatsa tima José shintaag, nayaimpinmaya aents tibaunak imatiksag umiak Maríanak niina jeen jukiuwai. ²⁵ Tujash dutika jukish Josek Maríajaig tsanigchawai, eke uchi iwaiya nu akiintsagkik, nuní pujai uchi akiinamtai adaikauwai Jisus.

2

Yacha aidau kaunkag Jisusan emematiagbau

¹ Herodes Judea nugka apuji wajas pujai, nunú nugkanmag yaakat Belegnum Jisus akiinawai. Nunik akiinamtai yaakat Jerusalegnum tikich nugkanmaya etsá minitaijin batsamin aidau kaunkajui. Nunú aents aidauk yacha yaya aidau dekapawag diisag dekau aajakajui.

² Iman aidau Jerusalén jegawag iniimaidau:

—¿Tuwí pujawa judío aidau apuji atin uchi yamá akiina dusha? Ii nugken etsá jintain pujusá yaya wainkamji, Apu akiintai wantinkatnai timawa nunú. Nunika wainkaja minaji ni ememattasa, —tuidau.

³ Nu tibaun aents aidau etsejiagtai, apu Herodes antuk puyatkau, tuja aantsag ashí aents Jerusalegnumia aidaushkam nuna antukag puyatkaju, nunikag:

—¡Wajukutskaihi! —tusag kuashat pachis chichaidau.

⁴ Nuna aatus apu Herodesak antuk, kuashat anentaimu. Nuniak sacerdote apuji aidau, chicham umiktin agagbaun pachis etsejin aidaujai untsukú, nunik:

—¿Tuwí Apu Kristush akiinatnaita? —tiuwai.

⁵ Tutai dita aiinak:

—Duka yaakat Belén, Judea nugkanum awa nui akiinatnai, juna aatus Apajuí etsegtujakú aidau agaju ainawai:

⁶ ‘Belén, Judea nugkanum awa juuwai yaakat imá piipichik, tujash nui akiinatnai makichik Apu,

tikich apu aidaun nagkaesau Israel* aentsu Apuji atina nu’ tawai, — tuidau.

⁷ Nuna dekaa apu Herodes untsukú nunú yacha kaunkajua nuna, tikich aidauk dekaunatsaig:

—¿Yaya wainkagmesh wajupá dukapea yujagme? —tusa chichastatus.

⁸ Dutika shiig aujus dekajua Belén ishimak:

—Wetajum, nunikjum shiig dekaatajum tuwig pujawa uchi Apu atinush, nunika wainkajum waketkujum minash ujakatajum, wisha wenu uchin ememattajai, —tiuwai.

⁹ Tusá aaja apu akatjam wegaju, nunikmag wainkaju yayan, ditá nugkeen batsamsá wainkamun. Nunik yaya eketbaun nemajuk we wenakua, jegá uchi pujamunum nuna mamikis yaya eketunum jegawajui. ¹⁰ Nu jegan mamikis yaya eketun wainkag shiig anejasaju.

¹¹ Nunikag jegawag jegá waikmá uchin dukujijai pujuttaman wainkaju. Dutika uchin tikishmatug emematuidau. Nuninak ditá kajunjin ujakag uchin anentag waji wakejumain aidaun susaju: Oron, ekematai incienso pegkeja kugkuinun, kugkuin mirranashkam. ¹² Juna dutikawag kintamag kajiittaman Apajuí aentsji nayaimpinmaya: “Herodes pujamunum wakettsuk yajá tikich jintanum wakitkitajum”, tusa ujakú. Tima nunisag yajá tikich jintanum waketjau.

José Maríajai Egipto tupikakbau

¹³ Nunú aents yayan wainak kaunkaju waketjamtai, Josenashkam nayaimpinmaya aents kajanum wantintuk: “José nantaktá, nunikam nuwem uchijai jukim Egipto nugkanum waamak wetá. Apu Herodes suntajin ishiaktatui uchin kajegtí tusa. Awi pujamin tsawan uminkamtai, wakitkita tusan ujaktajame”, tiu. ¹⁴ Tima Joseshkam nantakí nunú kashik uchin dukujijai juki Egipto weuwai. ¹⁵ Nunik nuanuí pujusuí, Herodes jakamtai wakitkitatus. Tuja nuna dita Egipto wegajua duka, Apajuí etsegtin aajakajua nunú agagbaunum: “Mina uchig Egipto nugkanum pujaun untsuktatjai”, tawa nunú imanisag uminkauwai.

Herodes suntaji aidaun uchin kajegtí tusa ishiakbau

¹⁶ Nunú aents atushtanmaya yayan wainak kaunkau aidau, yajá waketjamun Herodes dekaa: Tsanujajeapi, tusa senchi kajekú. Nunik ni suntaji aidaun: Ashí uchi Belegnumia, nuigtú Belén tikiju batsataidaushkam, jimag mijan ajamu nagkamsajum yamá akiinai aidaui kajegtajum, tusa ishiaku. Nunak Herodesak yayan wainak kaunkau aidaun inias, wajupa tsawantak aayi uchi akiinash nuna shiig dekau asa tiuwai. ¹⁷ Juna Herodes dutika uchin kajegkua duka, Apajuí etsegtin Jeremías agagbaunum:

¹⁸ “Antukmajai Ramanum senchi buutuidaun,

* **2:6** “Israel” dekas yama nagkamchaku naamkamujig Jacob aajakuí, hebreo chichamnumag “tsanumin” taku tawai, niina uchijig doce ajujakuí. Untsu “Israel” tawa nunak Apajuí adaikauwai, nunak nayaimpinmaya aentsjai maaniku taku tawai. Niina daajig jimag aajakuí Israel, Jacob, nunin asantai Apajuí chichame apachnum “Israela uchiji aidau” takug nuna uchiji doce aajakajua nuna tawai, “israelita” takushkam Israela uchiji aidaunum akiinkag yujakajua nuna ashí taku “judío” tuuta, Hebreo tuuta awagmawai.

nunak Raquel niina uchijí aidaunum buutak anentaish ichichtumain wajashmae, uchijí aidauk jinawaju asamtai”, tawa nunú imanísag uminkauwai.

José Maríajai Nazaret wakitkimu

¹⁹ Nunik dukap tsawan asa Herodes jakamtai, Apajuí aentsji nayaimpinmaya José Egipto pujuttaman kajanum wantintuk: ²⁰ “José nantaktá, nunikam uchi dukujijai jukim Israel nugkanum wakitkita. Yamaik uchin maatatus wakejibia duka jakae”, tiu. ²¹ Nunú tima Jose-shkam nuween uchijai juki Israel nugkanum wakitkiuwai. ²² Nunik niina nugkeen jegakmá José dekau, Herodesa uchijí Arquelao, apají jakamtai ni apu wajas inamak pujau tabaun, nunik ajankauwai Judeanum wetan. Nunittaman kajanum ujakuí: “Judeanum wetsuk Galilea nugkanum wetá”, tusa. ²³ Tima yajá tikich jintanum we, ni nugkeen yaakat Nazaret pujustatus jegau. Nunú aatus nagkaemaki-uwa duka, Apajuí etsegtin Isaías chichaak: “Kristuk Nazaretnumia” tutai atinai, tiuwa nunú imanísag uminkauwai.

3

Juan Yamijatin uwegshunum chichagkagtukbau

(Mr. 1.2-8; Lc. 3.1-20; Jn. 1.19-28)

¹ Jísus eke Nazaret pujai, Juan Yamijatin chichagkagtú wekagu Judea nugka uwejush wegakunum. ² Nunik chichagkagtak: “Tudau takatak idaikujum Apajuí nemagkatajum, ni aentsnum inamjatnuk tsawantak ashí jegae”, tau. ³ Juan chichagkagtamuk yaunchuk Apajuí etsegtin Isaías agak:

“Makichik aents eemak taa uwegshunum wekagas senchi jiiká chichagkagtak:

‘Apu wekaesatnun jintan shiig iwajug esegak tutupit dakuegajama numamtuk, atumi anentaimish shiig iwajajum umiktajum Apu minitin asamtai’, titinai” tiuwa nunú imanísag uminkauwai.

⁴ Juagkak camello uje najanamun nugkujakuí, akachumtaijish duwap aajakuí, manchin* dapá yumijijai yuujakuí. ⁵ Juan aatus uwegshunum chichagkagtak wekagai Jerusalegnumia aents aida, ashí Judea nugkanum batsamin aidaushkam, namak Jordán uwet batsataidaushkam ni chichagkagtamun antukagtatus kautkajui. ⁶ Nunú chicham etsegbaun antukag ditashkam ashí tudau takataiji aidaun: “Apawah tsagkugtugta”, tusa etsegtumaidau. Nunikmatai nunú aents aidaun Juagshakam Jordagnum yamiau.

⁷ Aatus yamijatak pujai saduceo† aida, fariseo‡ aidaushkam kautkaju, Juan yamigmagti tusag. Nunú imanik kaunkagmatai wainak, Juan chichajak: “¡Atumek iwanchi uchijí asajum aents tsanú yujagme! ¿Wagka yamimagtasagmesh wakegagme? ¿Atumek ayatak yamimamuikis Apajuí suwimak sukagtumaina duka uwemtumainaitai tajumek? ⁸ Dekas tudau takatan idaisaush wajuku amainaita, nunú

* **3:4** “Manchi” Diistá Mr. 1.6. † **3:7** Saduceo aajakajua duka, Moisés chicham umiktajum tibau aajakua nunak betek umijakaju ainawai, nuninayatak nayaimpinmaya aentsuk atsawai tuja iwanchish atsawai nuigtushkam jakau aidaush nantagchatin ainawai tuujakajui. ‡ **3:7** Fariseo aajakajua duka, Moisés chicham umiktajum tibau aajakua nunak betek umijakú ainawai, nuninayatak ditá muunji aajakajua nunú takajakajua nuna imá senchi puyatjus umijakú ainawai.

iwainmamkatajum pegkeg aina nu takaakjum. ⁹ Atumek: Jutiik Abraham wegantu asaja yupichuch uweemain ainaji, tumamigpa. Dekas tajime: Apajuik jujú kaya aina junakeshkam Abrugka uchiji emamainai. ¹⁰ Ashí ajak nejechu aidauk, jachai ajaka tsupija apetiama numamtuk, aents tudaunak taká batsatun Apajuí suwimak susatnuk uminas awai. ¹¹ Wika ayatak yumí yamijatjai tudaujin idayinak etsegtumainakui, tujash mina ukujui dekas minittawai mina nagkaetasu. Nunú yamigmagtatjume Wakaní Pegkejiya nujai, nuigtushkam nigki jiiyai suwimkan sukagtustinuk. Wika niina sapatjinakesh ukuitmaittujai, nigka mina nagkaetasu senchigtin asamtai. ¹² Nigki ashí aents aina nuwiyán akanjattawai, aents trigon ajakbau aidau juuká ijumag, awagti wampujin utsaak nejeen trigo ijumtainum yajumama numamtuk, Apajuí umigkau aidaunak jii ajumaish kajinkashtina nui suwimkan suwak, niina umigkau aidaunak ni pujutaijin yajuaktinai”, tiuwai.

Jisus yamimagbau

(Mr. 1.9-11; Lc. 3.21-22)

¹³ Tikich tsawantai Jisus Galileanmaya jiinki namak Jordagnum weuwai, Juan yamijati tusa. ¹⁴ Nunik jegaamtai Juan yamimainchau dekapeak:

—Wiitag jamah amina yamijata tumainnuk, ¿nuniaig ame minai yamimagtasam minam? —tiu

¹⁵ Tama:

—Ehé, amina yamijati tusan minitjame, mina awetiu ashí pegkejan dutikati timawa nuna imatiksasuk umikta tau asan.

Tutai Juagshakam yamijú. ¹⁶ Dutika yamijam Jisus yuminmaya jiinki nayaim ujanmatai, Wakaní Pegkeji[§] pauma nunin akaiki niini jegattaman wainkauwai. ¹⁷ Nunú nuniaig antuekau nayaimpinmaya chicham: “Juwai dekas mina Uchig anetaiujuk, niini shiig anejai”, tabau.

4

Iwanch Jisusan pegkegchau takamtiksata tibau

(Mr. 1.12-13; Lc. 4.1-13)

¹ Jisus Jordán yamimagmatai Wakaní Pegkeji egkemtujui, dutika juki uwegshunum emauwai, iwanch* Jisusan dekapsata tau asamtai.

² Nunú uwegshunum pujusuí cuarenta tsawai, cuarenta kashi. Imaan tsawantai yujumkan ijagmak pujau asa, Jisuschakam yapajuauwai.

³ Nunitai iwanch chichajak:

—Ame dekas Apajuí Uchijiyaitkumek, ju kaya aina jujú pag emakam yuwakia, —tau.

⁴ Tusá tama Jisus ayaak:

—Apajuí chichame agagbauwa nui: ‘Aentsuk imá yujumkajaigkik pujumaitsui, Apajuí chichamega nujaiskam pujumainai’ tawai, —tiuwai.

§ 3:16 “Apajuí Wakaní” tawa nunak “Wakaní Pegkejin” tau asamtai, “Apajuí Wakaní” takuish “Wakaní Pegkeji” taji. * 4:1 “Iwanch” tawa nunak tuinayatak griego chichamnum “Diablo” tai, hebreo chichamnum “Satanás” tawai. “Diablo” tawa duka “Apajuí nemajin aidau tsanumjin” taku tawai. Tuja “Satanás” tawa nunashkam “Apajuí Shiwaji” taku tawai. Nunin asamtai “Satanás” takuish tuja “Diablo” takuishkam iina chichamenig “iwanch” taji.

⁵ Nuna aatus Jisus timatai nui inagkeaki emauwai yaakat Jerusaletum. Dutika jega Apajuí ememattai jegamkamunum yakí nagkatkamunum iwaká awajus, ⁶ chichajak:

—Ame dekas Apajuí Uchijiyaitkumek tsekem iyaata, agagbau awai: ‘Apajuí ni aentsji nayaimpinmaya aidaun ishitkatnai ni Uchijí aidaun kuitamkatnunak’ tibauwai.

Tau asamtai, ame tsekem iyautaish Apajuí ishiakbau igkumpak achigmaktinme, iyaakum kaya aina au tukumkaim, —tiuwai.

⁷ Tama Jisus ayaak:

—Dushakam agagbau awai: ‘Amina Apujum Apajuiya nu pegkegchaunum dekapsatasamek wakeyipa’, tawai —tiuwai.

⁸ Tusa timatai nuigtú iwanch Jisusan muja tsakajunum iwakuí. Dutika juú inaktamuik ashí nugkanum yaakat aina nuna, nuigtú ashí pegkeg aidaunashkam iwaintukui. ⁹ Dutika ashí inaktus:

—Ashí junak amina amastajame, tikishmatjujam emematjita, —tau.

¹⁰ Tama Jisus ayaak:

—¡Wetá iwanchih!† agagbau awai: ‘Imá amina Apujum Apajuiya duke emematta, nuniakum imá nigki umigkata’ tawai, —tiu.

¹¹ Tusá timatai iwanchik ukukiuwai. Dutikamtai nayaimpinmaya aents kautuawajui kuitamkagtatus.

Jisus Galileanum ni takatji nagkamamu

(Mr. 1.14-15; Lc. 4.14-15)

¹² Tikich tsawantai Judeanmaya apu, Juangkan aents achiká egketainum egkeau, nunikmatai Jisus nuna antuk Galilea nugkanum wakitkiuwai. ¹³ Tujash nigka Nazaretak pujutsuk nagkaemaki, yaakat Capernaum Galilea kuchajin uwetus awa nui weuwai. Nunú nugkanum yaunchuk muun Zabalón, Neftalí aajakajua nuna uchijí wegantu aidau batsatu. ¹⁴ Nuna Jisus nunikua nunak, yaunchuk Apajuí etsegtin Isaías agajua nunú imanisag uminkauwai. Nunú agagbaunmag:

¹⁵ “Zabulogkan nugke kuchá yantamen awa nui batsatutijum antuktajum,

nunisjumek Neftalí nugke etsá akaetainmanini Jordán uwet awa nui batsatutigmeshkam antuktajum,

antsagmek atum Galileanum judiuchu aidaujai pachimdaeja batsatutigmeshkam antuktajum.

¹⁶ Nunú nugka nui batsamin aidautijum pegkegchau takaakjum suwea numamtinum batsatutijum,

uwemat pachisa etsegbau antukjum tsaaptin waintayama numamtuk wajaktinaitjume”, tawai.

¹⁷ Jisus Capernaum jegaa, chichagkagtutan nagkabau. Nuniak: “Tudau takatak idaikujum Apajuí nemagkatajum, ni aentsnum inamjatnuk tsawantak ashí jegae”, tiuwai.

Jisus ni jintintaiji atinun cuatro namaká main aidaun yajuakbau

(Mr. 1.16-20; Lc. 5.1-11)

¹⁸ Tikich tsawantai Jisus Galilea kuchajin wekaekamá Simón, Pedro daagtina nuna, ni yachi Andresjai namakan main asag retan ajuntuinak yujattaman wainkau. ¹⁹ Nunik wainak Jisus chichajak:

† 4:10 Diistá versículo 1.

—Wegajai wi jintintuatjime, namak maatasajum yujagjum anmam-tuk, Apajuí chichame etsegkujum aents aidau minai ikautjin atajum tusan, —tau.

²⁰ Tusá tamawaik, ditá retjinak ukuinak niijai wegajui.

²¹ Nunik Jisus ditajai ijunag machik kuwaesag wekamá, Zebedeo ni uchijí Jacobo, Juan aatus botenum chimpimas retjin apijuinak chimpimatman wainak, nunashkam:

—Wegajai mina jintintaig atajum, —tiuwai.

²² Tama ditashkam:

—Ayú, —tusa apajinak ashí tikich takataiji aidaujai botenum ukuinak, Jisusjai wegajui.

Jisus kuashat aents jintintuamu

(Lc. 6.17-19)

²³ Nunik Jisus ashí Galilea nugkanum wekagas, jega ijuntai aidaunum wayaa jintinkagtau yamajam chichaman Apajuí nuní inapawai tusa, nuniak ashí aents jau aidaunashkam etsagau.

²⁴ Nunú dutika Jisus etsaegkagtamun pachis kuashat etsejuk dapampajaju, dutikamun ashí aents Sirianmayashkam antukaju, nunikag kuashat jaun, iwanch egkentuamun imaanjaun, jata iyashin ipimpin achikam pimpijú wekaemainchaun, ashí tikich jatai jau aidaunashkam ikautkaju, dutikam Jisuschakam etsagaakui.

²⁵ Jisus imatika aents jau aidau etsagamun antuinak, kuashat aents Galileanmaya, Decapolisnumia, Jerusalegnumia, Judeanmaya nuigtú Jordagkan amain batsataidaushkam shimutuidau, Jisus yamajam chicham etsegbaun antukagtatus.

5

Jisus shiig anejasjum pujustajum tibau

(Lc. 6.20-26)

¹ Imatika tuwajam Jisus wainak wakau nainnum, nunik nui ekeem-santai ni jintinbau aidau kautuawaju. ² Nunikmatai Jisus nagkama jintintak tau:

³ “Atum iik nagkamik iina senchijinig pegkeg pujuta duka jumait-suapi tautigmek, shiig anejasjum pujustajum, atumiin Apajuí inamjatin asamtai.

⁴ “Atum wake besemag pujakjum, buutú pujautigmek, shiig anejasjum pujustajum, Apajuí ichichmamtan amasagtin asamtai.

⁵ “Atum kakagchauch aidautigmek, shiig anejasjum pujustajum, atumnak Apajuí ashí ni anagtamauwa nunak amastin asamtai.

⁶ “Atum Apajuinu pegkeg takastasa wakegakjum yapajaku, kitamaku waitmaina imanikjum waitiautigmek, shiig anejasjum pujustajum, atumnak Apajuí yainpaktatjume nu wakegajum nuna takastí tusa.

⁷ “Atum tikich waitiaush wait anentin aidautigmek, shiig anejasjum pujustajum, nunú dutikautigminak Apajuí atumnashkam wait anen-jamjattagme.

⁸ “Atum tsagkugnagjum pegkeg wajasú aidautigmek, shiig anejasjum pujustajum, atumek Apajuí wainkatin asajum.

⁹ “Atum tikich aidaujaish pegkegchau awagdaitash dakitin aidautigmek, shiig anejasjum pujustajum, atumnak Apajuí mina uchijui tujabi-agtin asamtai.

10 "Atum Apajuinu pegkeg takaagmin tikich nuna dakituinak waitkam pujautigmek, shiig aneasjum pujustajum, atumiin Apajuí inam-jatin asantai.

11 "Atum mina dekaskeapi tusajum nemagtuidautigmin pegkegchau chichagtamainak, niimjupas yujainak, atum chichakchamunash wainak tsanumjutpajag shiig pujuschamin awajtamainakuish, shiig aneasjum pujustajum. 12 Dakujustajum nuniakjum shiig aneetajum, atumek nayaimpinmaya waji shiig pegkeg umikbau jukitin asajum, yaunchuk Apajuí etsegtin aidaunashkam atumin waitkagmaina aikasag waitkasu ainawai.

Weega numamtin tsaaptina numamtin ainagme Jisus tibau
(Mr. 9.50; Lc. 14.34-35)

13 "Atumek ju nugka juwig tuke weega numamtin ainagme. Tujash nunú wee,* jea jeatuji megkaekamtaish, ¿itugsaya ataktush jea jeatush emamainaita? Ayatak agaa ajapmaina numamtuk, atumshakam Apajuinu pegkeja nunú takatsuk pegkegchau aidau takaakjumek ayatak bakumattagme, nuniakjum Apajuí suwimkega nunú jukittagme.

14 "Atumek ju nugka juwi batsatana nuna tsaaptinjiyaitjume. Yaakat nainnum auk uumkag amaitsui. 15 Lamparashkam ekemakaik dukuká idaichatiame, dutiktsuk yaki ekentayame jegan tsaaptin emantai, aents aidaush diisá yujastinme tusa. 16 Atumshakam numamtuk, ashí pegkeg aidauk takaakjum iwainaktajum, tikich aents aidaush wainainak ditashkam Apajuí nayaimpinum pujuuwa nuna emematintinme tusajum.

Chicham umiktin agagbauwa nunú pachisa Jisus jintinkagtuamu

17 "Wika jujú nugka juwig Moisés chicham umiktinun agajua nuna esakagtasauk taachuitjai, tuja Apajuí etsegtin aidau agajajua nunakeshkam idaisatajum titasankesh taachuitjai. Wika Moisés, tikich Apajuí etsegtin aidau mina pachitus agaju aina nuna umiktasan tauwaitjai. 18 Nuna tajim nunak dekas tajime: Nugka, nayaim aina nunú megkagainsaigkik chicham umiktinun Moisés agajua duka, makichkish yapajinashtinai, ashí betek imanishag uminkatnai. 19 Tuja jujú chicham umiktin aina juwiyau imanchau diinak, tikichnash dutiksag jintintuk, Apajuí eme anentsá inam achagtinai. Untsu nunú chicham umiktajum tibauwa nuna betek umiak tikichnashkam dutiksag jintintuau aidauk, Apajuí eme anentsá inam agtinai.

20 "Tujash atum fariseo aidau, chicham umiktinun jintinkagtin aidaujai Apajuinu umijuina nuna nagkaesau umigchakjumek, Apajuí inamak achatin ainagme.

21 "Moisés chicham umiktin agagbauwa nuanuig: 'Magkagtuawaipa, ame tikich maakmek suwimak suwam atatme' tawai. 22 Tujash dekas wi tajime: Makichik aentskesh ni yachin tuke aneas kajejauk, suwimak suwam amainai. Nunisag yachin anentainkachu chichajú wekagushkam, apu chichaman epegkin aidau dekajam amainai, tuja yachin kajejak tikima pegkegchaun chichajushkam jii ajumaish kajinkashtina nui pujus waittsatnai.

* 5:13 "Wee jea jeatuji megkaekamtaish" tawa junak Palestinanmaya week nigkish jea jeatujig megkayin ainawai tawai Thomson.

²³ “Ame tikich aentsjai kajegdaikamu ajutjamaig, Apajuí anen-tag susata tibaugmea nu jukim jega Apajuí ememattainum wet-suk, ²⁴ dekatkauk amijai kajegdaikamua nunuwá wejim: Yamaik tsagkugdaijami, tusam epegtuniata. Nunikam agkan wajasam Apajuí ememattasam wegakmesh ni anentag susata tibaush jukim wetá.

Shiwajumjaish shiig chichasá epegkeata Jisus tibau
(Lc. 12.57-59)

²⁵ “Makichik aentskesh: Pegkegchau takagtusume tusa apunum chichaman egketjamantai, niijai apu chichama epegnunum wegakmek, jintaag shiig chichasam epegtuniata, nunikchaminig apu chichaman epegnunum jegaa amin dekatgama, ni jujamki achijatin aidaunum sujupakmatai, achijatin jujamki aents katsek aidau achiká chimpitainum egkepawai. ²⁶ Junak dekas tajime: Amina apu achigmak egkepamtaig kakajus jiinmaitsume, ayatak amina kuichkijum ashí akikmakam, shiig ashimkam jiinmainaitme.

Jisus tsanijinawaigpa tibau

²⁷ “Moisés chicham umiktinun agajua nuanuig: ‘Tsanijinawaigpa’ tawai. ²⁸ Tujash wi dekas tajime: Aents nuwan dutikachainjash tusa wakegas diyaushkam, anentainig tsanijimui.

²⁹ “Nuniau asamtai amina jiiim pegkegchau anentaimtuja diitnum ni-
imtijamkuig, jiiim untsugmia nu ukuinkam ajapmainaitam numamtuk
wajaktá tudau takat idaikum, dekas pegkejai tudau idaisau asá Apajuí
inamtaijin makichik jiiyaik niimsá waimaina numamtuk wajamuk,
nu dutikachmek ashí amina iyashmijai jii ajumaish kajinchaunum
pujusam tuke waitú pujumain asamtai. ³⁰ Tuja uwegmishkam
pegkegchau takamtijamkuig, uwejum untsugmia nu tsupikam ajap-
maina numamtuk tudau takat idaisatajum, dekas pegkejai tudau
idaisau asá, pujut tuke atina nui makichik uwegtin waimaina nu-
mamtuk wajamuk, nunú dutikachaminig ashí iyashim jii ajumaish
kajinchaunum pujus waitmain asamtai.

Jisus nuwak idaimaitsui tibau

(Mt. 19.9; Mr. 10.11-12; Lc. 16.18)

³¹ “Junashkam Jisus jintinkagtak tiuwai: Nuwa idaitan pachis Moisés
agajua duka: ‘Aishmag nuwen idaikug papiin agag, yamaik idaijai,
tusa nuaduí idaimainai’, tawai. ³² Tujash wi tajime: Aishmag nuwen
ekagmakchau aig idaikug, aentsjai tsanijinata tusa awemak itugmaina
numamtuk awagmawai. Nuwa idaisamujai nuwenushkam aantsag
mai ekagmawai.

Atum dutikatin pachisjumek Apajuik adaikaigpajum Jisus tibau

³³ “Nuigtushkam Moisés aents aidau yaunchuk agatjamunum tawa
nu dekagme, duka: ‘Ame Apajuí pachisam dutikatjai tibauk umitskek
idaisaipa’, tawai. ³⁴ Tujash wi tajime: Apajuí daajiya nu adaikajum,
Apajuish dekas waitui wi taja nunú umiktinak, tusagmek tiigpajum.
Tuja nayaimpia aushkam Apajuí pujutai asamtai, au pachisjumshakam
tigpajum. ³⁵ Jujú nugka jushakam pachisjumek tiigpajum, Apa-
juí najamsa eketbau asamtai; Jerusalegshakam pachisam wainkam
chichakaigpa, jujú yaaktanmag Apu ju nugkanmaya aina nuna nagkae-
sau pujusá inamjatin asamtai. ³⁶ Atumi pujutjum pachisjumesh

tiigpajum, atumek intashim puju atí takugmesh, tuja bukusea atí takugmeshkam dutikmainchau asajum. ³⁷ Dekas nunú wainkam tu wekaetsuk, ayatak tutupnik ame dutikmainaitkumek 'ehé' titá, tuja ame dutikmainchawaitkumshakam 'atsá' titá, aaja tutsuk wainka tu wekaebauk pegkegchau asamtai.

Jisus pegkegchaunmag ikdaikaigpajum tibau
(Lc. 6.29-30)

³⁸ "Atumek Moisés yaunchuk agagbauwa duka dekagme, nuanuig: 'Aents jiimin emestugmauig, ameshkam dutiksamek emestugta, tuja daimin akagtamkuishkam, ameshkam dutiksamek niina nai akagkata', tawai. ³⁹ Tujash wi tajime: Duka dutikmaitsui. Amina pegkegchau takagtamkuishkam iikatatasam wakeyipa. Makichik aentskesh yapim yantugmia atú awatamkuishkam, atumesh iikajum awattsuk, juinia yapijuish awatita tusajum ayampatuatajum. ⁴⁰ Makichik aentskesh nugkutaigmin atanjamkitatus utugchatan aputugmauig, awantak pataká nugkutaigmesh† susata. ⁴¹ Aents kijinun amaak: 'Jujú jukim makichik kilómetro kuwagtukta', tujamkuishkam jimag kilometronum ejentuntajum. ⁴² Atsumamun segapainakuishkam sujittsuk susatajum, tuja atumiin wajiigmin tsagkatjukta tujamkuishkam, atsá tusa sujittsuk tsagkatkatajum.

Shiwajum aidau aneetajum Jisus tibau
(Lc. 6.27-36)

⁴³ "Dushakam yaunchuk agagbau chichaak: 'Amejai ijutkamu aneakum, shiwajum aidauk ausaigpajum' timawa duka shiig dekagme. ⁴⁴ Tujash wi tajime: Atumi shiwajum aidaush aneetajum, nuniakjum atumin pegkegchaun chichagtamaidaush pegkegnum chichagkatajum. Dutiksagmek kajegtamaidaush pegkegnum yaigtajum, waitkagmainakuish, dita pachisjum Apajuí aujtustajum, ni esegati tusajum. ⁴⁵ Nunú aajam dutikakmek, ii Apají nayaimpinum puja nuna uchijí atatme. Apajuik ashí aents pegkeg, pegkegchau aina nudaujai etsanak etsanmitkawai, aikasag yuminashkam pegkejan takaidau, pegkegchau takaidaujai yutumtikui. ⁴⁶ Tujash atum aents anempaina nujaig ane-niakjumesh ¿wají imana juwagme? Aents pegkegchau aidaushkam ni aneniamujaig aneeninawai. Nunitsuk atumin kajegtamaidaushkam atumek aneemainaitjume. ⁴⁷ Tuja atum imá atumin pataim aidaujaig shiig anendaisa chichasá pujakjumesh ¿wají imana iwainame? Nunak Apajuin umigchau aidau nunin ainawai. ⁴⁸ Dekas atumek pegkegchau atsugbau atajum, iina Apají nayaimpinum pujú pegkegchau atsugna ibau.

6

Aents atsumau yayamunak tikichik dekamainchau ainawai

¹ "Atum pegkeg takaajum nunú aentsnum iwainmamkata tabaunum dutikawaigpa, kuitamamkatajum. Atum ayatak aentsnumak iwainmamkatasa nuniagtaik, iina Apají Apajuí nayaimpinum pujuwa duka wají shiig pegkeja nunak amaschagtinai.

† 5:40 "Awantak pataká nugkutaí" tawa nunak, judío aidauk tsetsektin ejamakta tabaunum awantak pataká nugkujakú asagmatai tiuwai.

² “Nuniau asamtai atum aents atsumau yayakjumek, tikich aidaush wi dutika takaamun dekaatnume tusagmek jega ijuntainmagkesh, jinta nagkaematainmagkesh etsejú yujaigpajum; nunak aentsú tsanú aidau aents eme anenjús diigsatnume tusag nuní yujau ainawai. Dekas tajime: Nuna nunidauk aents eme anentam aidau asag Apajuí akiamak achagtinai. ³ Jujú aatus asamtai, atum aents atsumak waitiau yayakjumesh, wi aajan yaimjai tusagmek ame shiig chichataigmikesh ujakaigpajum. ⁴ Dekas pachitsuk idaisatajum etsejú yujatsuk, nunak ii Apají Apajuiya nu ii takaamunak wainui, nuaduí atak nayaimpinum akigmak wají shiig pegkeg aidaun sujamsatnai.

Apajuí aujut Jisus jintinkagtuamu
(Lc. 11.2-4)

⁵ “Atum Apajuí aujukgmeshkam, aentsú tsanú aidau, aents waitkatnume tusag jega ijuntainum tuwakbaunum wajaidiag, nuninachkush jintá ashí aents wainainamunum wajantag, senchi chichaká Apajuin aujú yujau aina nunikaigpajum. Dekas tajime, nuna nunidauk aents eme anentam aidau asag, Apajuí akiamak achagtinai. ⁶ Tujash atum Apajuí aujukgmek, ame kanutaigmin wayaam waiti epenim pujusam, tikichish dekainachbaunum amina Apa Apajuiya nu ausata. Aaja tikich dekachbaunum segamash, Apajuik ashí wainainamunum wají shiig pegkeja nuna amastinai.

⁷ “Atum Apajuí aujukgmesh chicham imanchauk awá awagkijum segaigpajum, Apajuin dekaskenum nemagchau aidau imatjamas imá shiig antugtukainta tusag nunak imatin ainawai. ⁸ Atumesh nujai betekak aigpajum, Apajuik dekawai atum atsumamunak eke segatsjuninig. ⁹ Nuniau asamtai atum Apajuí augkugmek aatsajum titajum: ‘Apawah, amek nayaimpinum pujuwaitme.

Pegkegmaitam ibau asamin, ashí tikich aidaush imá aminak emematjabiagtinme.

¹⁰ Amek jutiishkam inajatjata.

Amina aentsjum nayaimpinmaya ame wakegamun umigtamin aina dutiksag nugkanmayashkam umigtukti tusam.

¹¹ Dutiksamek ii yuwatnushkam kashí kashinig sukagtita.

¹² Ii tudaujishkam tsagkugkagtugta,

jutii tikich pegkegchau takagtamaidaush tsagkugnaitag aikasmek.

¹³ Iwanch pegkegchaun takamtiksati tusamek idaikagtutsuk, ayatak yaijatkam agkanmitkagtuata’, tiuwai.

¹⁴ “Atumin tikich pegkegchau takagtamsau tsagkujakjumek, atumshakam iina Apají Apajuí nayaimpinum puja dusha tsagkujam atatjume. ¹⁵ Untsu tikich pegkegchaun takagtamsau tsagkugchataik, Apajuishkam atumi tudaugminash tsagkugtamjashtatui.

Ijagmá pujusá Apajuí aujut Jisus jintinkagtuamu

¹⁶ “Atum yujumak ijagmaka pujusjum Apajuí aujukgmesh, aentsú tsanú aidau: Wi ijagmá Apajuí aujbaunash tikich aidaush waitkatnume, tusag wake besekag ayatak anentaimas yujau aina atumek nunikaigpajum. Dekas tajime: Nuna nunidauk aentsnum iwainimamá yujaidau asag, Apajuí wají shiig pegkeg suwamak achagtinai. ¹⁷ Nuaduí ame yujumak ijagmaka pujusam Apajuí aujukmek wake besekam

wekaetsuk, yapim nijaim, shiig temashmajam, shiig dakunkut wekaesata, ¹⁸ tikich aents aidaush ame yujumak ijagmaka wekaesá Apajuí aujbaugmin dekagmawainum. Ame ijagmaka wekaebaunak Apajuí waipau asa, ame atsumamu segamashkam nigki amastatui.

Nayaimpinum wiyakchameaut

(Lc. 12.33-34)

¹⁹ “Jujú nugka juwi wajiin kabau emesmain, nuniachkush kawanchjumain, kasashkam wayaa kasamain aina juninum wiyakchameatasagmek wakeyigpajum. ²⁰ Dekas nayaimpinum kabaush wajiin emeskamtai megkaemainchau, nuniachkush kawanchjumainchau, kasashkam wayaa kasamainchauwa nui wiyakchameatajum. ²¹ Nunú wiyakchameatin ajutjamaina nuanuig anentaimesajum pujustajum.

Lámpara pachisa augmattsamu

(Lc. 11.33-36)

²² “Atumi jiimek lámpara ekemakam tsaaptin emaama numamtuk atumi iyashminak awagmawai. Jiim pegkeg asantai shiig wainmainaitam imatiksam, ashí pegkeg aina duke anentaimitaik, anentainish tsaaptin ajutjamainai. ²³ Untsu jiim pegkegchauwaitkui wainmainchauwaitam nunisjumek ayatak pegkegchauk anentaimekugmek suwenum pujagme. Aminí tsaaptin awa nu suwe wetaik, nuní nagkaemas pujutjum pegkegchau wemainai.

Inakak jimá apugtinuk amaitsui Jisus tibau

(Lc. 16.13)

²⁴ “Inakak jimag apugtinuk amaitsui. Tikich apujin imá senchi aneak, tikichin dakitmainai. Nuniachkush makichik apujin wakejus umijak, tikichnak dakitau asa umigmaitsui. Numamtuk atumshakam Apajuí umigkata tu, wiyakchameatasa anentaimitu wajamaitisugme.

Apajuí ni uchijí aidaunak kuitamui Jisus tibau

(Lc. 12.22-31)

²⁵ “Junashkam tajime, atumek: ¿Wajina yuwanuk, wajina uwagnuk, wajina nugkugnuk pujustaja? tusagmek uyumá pujuigpajum. Yutái nagkaesauwa duka dekas atumi pujutjumia nuuwai, tuja jaanchin nagkaesauwa duka, atumi iyashmia nuuwai. ²⁶ Atumesh pishak agkajunum nanamaina nunú anentaimesajum diistajum. Ditak ajakmakagkesh juwinatsui, jeganakesh jegamkag yutaijinak ijumainatsui, nuniaunak Apajuí suwawai dita yuwatnunak, dutikam nuna yusag batsatainawai. Tujash atumetjume dekas pishak nagkaesau aidautigmek, iman ainagminish ¿wagkag Apajuish atum atsumamunash amaschagtinme? ²⁷ ¿Atumesh wajupatigmea, tikich esajam aina ibau wisha atajai tusajum senchi anentaimitú pujakjumesh esaumainaitjume?

²⁸ “¿Wagka jaanchish imá puyatjagme? Atumesh yagkug yagkujuina nunú anentaimesajum diistajum. Yagkug aidauk takainatsui, ujuchnash kutamainatsui. ²⁹ Salomón nugkutai pegkejan tikich aents aidau waitus najanamun sumak nugkujá, tikichin nagkaesau iwagmamajakua nuna nagkaesau pegkeg iwajamun yagkujuinawai, Apajuí yagkugmitkamu asag. ³⁰ Yagkug ikamia aidau yamaikik pegkejan yagkujuk, ajuma duwi etsa sukuam kagagtin aidaunakesh, Apajuí

imatikas iwaja ibaush, ¿wagka atumesh minash nigkiap imatikas iwagtumainaita tatsugme, Apajuiyai imatikas kajinas anentaimchau aidauwa? ³¹ Nuaduí atumek: ‘¿Wajinak yuwatja, wajinak uwagtaja, wajinak nugkugtaja?’ tusajum uyumá pujuigpajum. ³² Nunak aents Apajuí nemagchau aidau, nunin aidaun uyumas anentaimtuinak waitú yujau ainawai, tujash atum atsumamunak atumin Apa nayaimpinmayaya nu shiig dekagtamui. ³³ Nuaduí dekatkawk Apajuí pegkegnum inapa nunuwá umigkatajum. Nuniakjumek ashí nunú aina dushakam aan kuashat jukitnaitjume. ³⁴ Atumek tikich tsawantin atinuk, wajuk pujustajaki tusajum emtikajum puyatjú pujuigpajum, imá makichik tsawan tsawamunmayag puyatjusjum anentaimtitajum, Apajuí atum utugchatnum jegataish yaimpaktin asagmatai.

7

Tikichi pujutji pachisjumek augmatigpa tibau
(Lc. 6.37-42)

¹ “Tikichi pujutjig augmatú yujaigpajum, atumnash Apajuí aikasag tujaminum. ² Tuja atum tikich aidau pegkegchaujish augmatú yujataik, Apajuí atumnash nunú aents tajum dutiksag tujamatjume. Atum tikich itujagme dutiksag Apajuí atumnash dutijamattagme. ³ ¿Wagka yatsum imanchau takaish, atum imá pegkegchau takayatkugmesh, auk pegkegchau takaawai tusagmesh augmatú yujagme? ⁴ ¿Itugsamek ame imá pegkegchau takaayatkumesh, yatsum imanchau takau digsamek nunikaipa titagme? Nunú nuniakjumek amina jiimin tsetse muun egketukesh wainkam jiiikí ajaptsuk, yatsumi jiin tsetse piipich egketu wainkam: Jasta jiiigkitjame, tumaina numamtuk wajajume. ⁵ ¡Aentsú tsanú aidauwah! Dekas dekatkawk ame imá pegkegchau takaam nunuwá idaisata, nunikam yatsum imanchau takaidaushkam, idaisata titajum.

⁶ “Tuja Apajuí chichame pegkegma nu ujamaitak antutan dakituinakuig, waitkatsuk idaisatajum, ditak yawá kafen aidau yutai pegkeg suwamaitak iiki esajatta tuwama numamtuk wajaidau asagmatai. Tuja makichik waji pegkeg akik aidauk kuchi batsamtainig ukubait-sugme, kuchi dajag emesjainum tusam. Numamtuk wajainawai aents pegkegchau aidauk chicham pegkeg antutan dakituinak.

Segatajum, egaktajum, untsuktajum Jisus tibau
(Lc. 11.9-13; 6.31)

⁷ “Apajuishkam segatajum, imatjamak amastatjume; egatash egaktajum, egakjumek, igkugtattjume; untsuktajum, imatjamak waitin ujatjamattjume. ⁸ Ashí aents sumauk suwam auwai, egauk igkuinai ni egamujinak, waitinum wajas untsumushkam waiti ujatam auwai. ⁹ ¿Atumesh uchijum yujumkan segapaig, kaya sumainkaitjum? ¹⁰ ¿Dutikachkugmesh uchijum namakan segapaig, dapi sumainkaitjum? ¹¹ Atum pegkegchau ainayatkugmesh, uchigmik pegkeg suu ainagme. Atumkesh nuniagminish, Apajuí nayaimpinum puja dusha ¿wagka atum pegkeg sumamunash amashagti?

¹² “ ‘Atum tikich aidau shiig awajuktinme tusajum wakejin ainajum, nunisjumek tikichish shiig awajkatajum.’ Aatus Moisés chicham

umiktinun agajua nuwish tawai, tuja aantsag Apajuí etsegtin aidau agaju aina nuwishkam tawai.

Jinta menakun pachis Jisus jintinkagtuamu
(Lc. 13.24)

¹³ “Waiti menakua nuní wayatajum. Kuashat aents aidau jinta untujin, waiti wegkajam megkaetanum ekagta nuní imá weenawai. ¹⁴ Tuja machikiuchi aents jinta tsejgkuch, waiti menaku pujut nagkanchaunum ekagta nuní waidauk.

Numik neje diigsajum dekamainaitjume Jisus tibau
(Lc. 6.43-46)

¹⁵ “Atum aidautigmek kuitamamkatajum: ‘Apajuí chichame etsejin ainaji’ tusag, waitan jintinkagtuina nu tsanugmajainum. Ditak aents kasa ishamain ainayatak, aentsun shiig kumpamá ajuma duwi kasajama numamtuk wajainawai. ¹⁶ Nuaduí atumek aents aidauk wainmainaitjume ditá takatji diigsajum. Untukjak munchiinak nejetsame, aantsag uvashkam jagkinmayag juushtayame. Numamtuk aents pegkejak pegkegnak takaawai, tuja aents pegkegchaushkam pegkegchaunak takaawai. ¹⁷ Numamtuk ajakshakam pegkejan nejenuk nunisag pegkegnak nejegame. Tuja ajak pegkegchaun nejenchakam nunisag pegkegchaunak nejegame. ¹⁸ Nuniau asamtai ajak pegkejan nejena duka, pegkegchaunak nejemaitsui, aantsag pegkegchaun nejenchakam, pegkegnak nejemaitsui. ¹⁹ Ashí numi pegkegchau nejen aidauk tsupija apea ajaptayame. ²⁰ Nuaduí atumek aents aidauk wainmainaitjume ditá takatji diigsajum.

Nayaimpinmag ashí wayachagtinai Jisus tibau
(Lc. 13.25-27)

²¹ “Ashí aents mina dekaskenum umigtuinachiatk: ‘Apujuh, Apujuh’, tujutuina duka Apajuí inamak achagtinai. Mina Apag nayaimpinum puja nunú wakegamun umiina nuuwai Apajuí inam agtinuk. ²² Tuja wi tsawan jegaakui nayaimpinmayan minitai, kuashat aents: ‘¡Apujuh, Apujuh! Iishkam kuashat takasuitji amina chichamjum etsegku, nuniaku ame daagmin wakan pegkegchau aidau aentsun egkemtuaush jiijá utsantujakuitji, tuja aents dutikmainchau aidaush kuashat takasuitji’, tujutiagtinai. ²³ Tusag imatjutuinaikuish wi chichagkun: ‘¡Tuwiyants ainajum! wainchauwaitjume. ¡Pegkegchau takau aidauwah, wetajum!’ titinaitjai.

Jega jegabaun pachis Jisus augmattsamu
(Mr. 1.22; Lc. 6.47-49)

²⁴ “Aents mina chichamjun antugtugak, wi tabaun imatiksag umigtuidauk, aents jega jegamtan dekau nugkan initak tai kayanum dekanmitkak ajia jegamama numamtinai. ²⁵ Nunú imatika jegamkamunak yumi yutug dujajakush, dase senchi umpuakush yumputsame, kayanum dekanmitkaka ajia shiig jegamkamu asamtai. ²⁶ Untsu mina chichamjun antuinayatak umigtachuk, aents jega jegamtan dekachu kaamatkanum tauk ajigká jegama numamtuke. ²⁷ Nunú nuninum jegamkamunak yumi yutug dujajua piyujak, dase senchi umpuak yumpuag ajapama numamtinai.”

²⁸ Juna aatus Jisus jintinkagtua ashimkamtai, aents aidauk puy-atjusag antugkajui, ²⁹ wagki aents chichame antugtai aidaun, chicham umiktinun jintinkagtin aidaunash nagkaesau nigka jintinkagtuau asantai.

8

Aents jata lepra achikbaun Jisus etsagagbau

(Mr. 1.40-45; Lc. 5.12-16)

¹ Nuna ashí jintinkagtua ashimak, ni jintintaiji aidaujai nainnumia akaiki wetai, kuashat aents saetus ashinaidau. ² Nuniai aents jata lepra tutai achikam jaak pujau, Jisusan wainak nugká tikishmag pujus segaak:

—Apuh, wakegakmek etsaentumainaitme, —tau.

³ Tama Jisuschakam uwejen antiak:

—Wakegajai, yamaik tsagagta, —tiuwai. Tamawaik leprak megkaekauwai. ⁴ Nunikmatai Jisus chichajak:

—Wetá, tujash makichik aentskesh ujakaipa, tutupit sacerdote pujamunum jegaata, nuniakum Apajuinu atin jukim, Moisés tibauwa dutiksamak ejegata, ditashkam waipakag dekaskeap tsagaje tujamt-inme, —tiu.

Jisus Capernaumnumia capitani inaken etsagagbau

(Lc. 7.1-10; Jn. 4.43-54)

⁵ Nuna tusa ukuak nui jiinki, Jisus Capernaum jegattaman capitán tajuntun:

⁶ —Apujuh, mina inakeg senchi jamae chichigká, nantamaichame, ashí iyashí aidaun najaimak senchi waitmae, nuniak pegajinig tepeme, —tiuwai.

⁷ Tama Jisuschakam:

—Ayú, wi tajuan etsagagtajai, —tiuwai.

⁸ Tusa tutai capitán* chichaak:

—Apuh, wika amea ibaunak, mina jegajuig wayaata tumain deka-peatsjai, nuigtushkam judiuchu asan. Nuniau asantai ayatak juajuig pujusmekesh inakjuk tsagagti tujutta, tusa ame tamak tsagagtatui.

⁹ Tuja wi apu umigbau ajutui, aantsag suntag mina umigtuidau ajutuinaawai, nunú aidaun wi: 'Jiinajum shiyaktajum', tamak jiiinag shimumainai, tuja: 'Waketjatajum', tamashkam waketug kaunmainai, nunisag mina inakeg aidaushkam: 'Ju dutikata', tamak betek umigtuinaawai. Aantsag ame juwi pujusmek: 'Tsagagti', tamak tsagagtatuapita tajai, —tau.

¹⁰ Nuna aatus tutai Jisus anentai jegagchau, nunik nui aents minidaun:

—Dekas tajime, Israel aina juwiyagkesh imatikas minai kajinas anentaimunak wainchaujai. ¹¹ Nunin asantai tajime: Ashí nugkanmaya aents aidau kaunkag, Apajuí inamtaijin Abraham, Isaac, Jacob aina nujai pekaamsag yuwawagtin ainawai. ¹² Nuniai Israel aidau Apajuí inamtain waimain ainayatak, minai kajinas anentaimainachu asag, Apajuí inamtainig wayashtin ainawai, ayatak waitut ajumaish

* **8:8** "capitán" tawa nunak tikich agagbaunmag "centurión" tuinaawai.

nagkankashtin suwea nui utsagkam Apajuiyai kanakag batsamas senchi waituinak nain takegtuinak buutuú batsamiagtinai, —tau.

¹³ Nuna tusa Jisus capitanin chichajak:

—Jeemin wakitkita, ame dekas etsaentujattawapi tiu asamin ame inakjumshakam tsagaje, —tiuwai.

Jisus Pedro tsatsají etsagagbau

(Mr. 1.29-31; Lc. 4.38-39)

¹⁴ Nuna tusa ukuak Jisus Pedro jeen weuwai, nui jegakmá Pedro tsatsají senchi tsuweak pegajin tepettaman wainkau. ¹⁵ Nunik Jisus uwegnum antigkui, dutikam tsuweamunak bichatug pegkeg wajas nantakí yujumkan inajuk, Jisusan ashí ni ijunja yujainamujijai ayugkauwai.

Kuashat aents etsagagbau

(Mr. 1.32-34; Lc. 4.40-41)

¹⁶ Nunú tsawantaik kintamai, kashi ikautkaju kuashat aents wakan pegkegchau egkemtuamu aidaun. Imatika ikautkam Jisuschakam ayatak chichamenig wakan pegkegchau aidaunak jiijá ishiakui. Tuja jau aidaunashkam ashí etsagakui. ¹⁷ Nuna Jisus dutikauwa duka yaunchuk Apajuin etsegtin Isaias juna agajua nunú uminkauwai: “Ni emegkaktinai ashí ii najaimatai aidaunak, dutikak ashí jau aidaunashkam etsagagtinai”, tawai.

Jisusa jintintaiji agtatus wakejukaju aidau

(Lc. 9.57-62)

¹⁸ Jisus kuashat aents tuwajuinam wainak, ni jintintaiji aidaun:

—Umintsatajum amain wegagmi, —tiuwai. ¹⁹ Tusá tijam eke uminainai, chicham umiktinun jintinkagtin jegaantun Jisusan:

—Jintinkagtinuh, wisha ame tuwig wekaetam nuniakminish tuke aminak nemagkiní wajatin atajai tusan wakegajai, —tau.

²⁰ Tutai Jisus chichajak:

—Kujanham aidauk kanutaijig ajuinawai, aantsag pishak aidaushkam pasugkeg ajuinawai, tujash wi Apajuí Uchijiyaitkun Aentsmaga Akiinaunuk jeenchau, tepesá ayamainkesh atsugtaig wainkan wekaejai, —tiu.

²¹ Nuna tutai makichik niina jintintaiji aina nuwiya:

—Apuh, dekatkauk mina jegajuí wenu, apag jakamtai ukusan ukuakun nemagkatjame, —tau.

²² Tutai Jisus chichajak:

—Amek nemagtukta, idaisata aents wakanin jakaujai betekak bat-sata nu, apa jakamtaish ukustin atinme, —tiuwai.

Jisus dase imijkamu

(Mr. 4.35-40; Lc. 8.22-25)

²³ Nuna tusa ukuak Jisus ni jintintaiji aidaujai botenum chimpimjajui kuchá† amain katigkagtatus. ²⁴ Nunik weenai Jisusak kanag egkemsau. Nunika ai nagkamnauwai dase dasentut, nunik dasentai botenum yumik senchi yajanu. Imaniak ishamain wajatai, ²⁵ niina jintintaiji aidau jegantag ishintainak:

—¡Apuh, uwemtikagtugta jakektatji! —tuidau.

† 8:23 Apach chichamnum “mar” tawa nunak tayatak “lago” tuuta awagbau asantai, iina chichamenig “kucha” taji.

26 Tama:

—¿Wagka imanikjumesh ishamagme, aents imanis Apajuiyai kajinas anentaimchau aidauwah?

Tusa nantakí dase imanik dasentatman imijiaku, dutikam kuchashkam miyasuch yaunchuk aajakbauk nunisag we patamsauwai. 27 Nunikmatai nui aents chimpijaidauk puyatjukag ditak pempeentunikiag:

—¿Jusha waji aents asamtaiya dasesh, kuchash ni chichamenash antujuinawa? —tudayinau.

Gadarammaya aents wakan pegkegchau chimpimtuamu Jisus jiijamu (Mr. 5.1-20; Lc. 8.26-39)

28 Nunik dase megkaekamtai we weenakua, kuchá amain Gadarammaya batsamtai nugkeen anumkajui. Nunik jinkamá jimag aents ukumatainum pujuuidau ditan wainak adijkgagtatus minituidaun wainkajui. Duka aentsuk wakan pegkegchau chimpimtugbau asag senchigtin kajen aidau. Iman asamtai makichik aentskesh nunú jintanmag wechatai aajakuí. 29 Nuniau asag Jisus anumak minittaman wainak, senchi untsumkag:

—¡Jisusah, Apajuí Uchijiyah! ¿tsawan jegatsaigkik suwimak sukag-tustasam juwish minam? —tuidau.

30 Nunikag kuchishkam ikaa yuwak batsatu asamtai: 31 —Ju aentsnumia jiijatkmek idaikagtusta au kuchi ijunaina awi utsanawagmi, —tusag segaidau.

32 Tusá tama Jisuschakam:

—Ayú wetajum, —tiuwai.

Tima wakan pegkegchau aidauk aentsnak ukuinak kuchinum ut-sanawajui. Dutikam kuchishkam pisajag betsag tajaekaunum ut-sankamá kuchanum iyagkag jinawajui.

33 Nunikagmatai kuchi kuitamin aidaushkam pisajag yaakat jegawajui. Nunikag: “Kuchi nuní jiname, tuja aents wakan pegkegchau egkemtuamu aidaushkam nunikagmae”, tusag etsejuuidau. 34 Nunú kuchi jinae tusa etsegbaun antukag, ashí yaaktanmaya aidauk Jisusan wainkagtatus wejiajui. Nunik jegajag: Wait aneamam ju ii nugkega juwig pujutsuk yajá weta, tiajui.

9

Jisus aents wekaechau etsagagbau

(Mr. 2.1-12; Lc. 5.17-26)

1 Tusá tima Jisuschakam botenum egkemag ataktú niina yaaktajin katigkuí. 2 Nunik katig pujai, aents wekaechau ayatak tepenun pegaknum pataidiag ejetiaju. Dutika itantagmatai Jisus niini kajinas anentaimaidaun wainu asa, wekaechaun chichajak:

—Uchijuh, amina tudaujum aidauk tsagkugnaje, —tau.

3 Nuna tutai chicham umiktinun jintinkagtin aidauk ditak tudayinak: “Juka Apajuin pegkegchaun chichajak tu wekaewai” tuidau. 4 Tu anentaimaidaun Jisus dekau asa:

—¿Wagka pegkegchaush anentaimjume? 5 ¿Tuwaita imá yupichuch tumainush, tudaujum aidauk tsagkugnaje taja dukaih, atsa nantakim

wetá tumainaitag dukaih? ⁶ Tujash wi Apajuí Uchijiyaitkun Aentsmaga Akiinau asan, ju nugka juwish tudau aidaunash tsagkugkagtu-mainaitag nu dekaatajum, —tusa wekaechaun chichajak:

—Nantakim ainká tepetaijum jukim jeemin wakitkita, —tiuwai.

⁷ Tama nantakug jeen wakitkiuwai. ⁸ Nu jau tsagagmatai tikich aidaushkam wainkag puyatjukajui. Nunikag Apajuin emematuidau:

—Dekas nigka senchigtinapita, iman asampap jujú aentsnash niina senchijinig etsagaje, —tuidau asag.

Jisus Mateon mina jintigtaig atá tibau

(Mr. 2.13-17; Lc. 5.27-32)

⁹ Nuna dutika Jisus wekamá Mateon* wainkauwai, kuichik apunu atinun akikmagtai yajumak ekeemtatman, nunik:

—Mateo, wegajai mina jintintaig aminum.

Tama niishkam: —Ayú, —tusa wajakug Jisusjai weuwai. ¹⁰ Nunik nunú tsawantaik, Jisus niina jintintaiji aidaujui Mateo jeen jegaawag mesanum jegantag pekamsagmatai, tikich apú kuichkiji atinun yajumin kuashat kaunawajushkam ditajai pekamsajui. ¹¹ Nunik yujumkan yuwagtai, fariseo aidau Jisusa jintintaiji aidaun chichajuinak:

—¿Wagka atumi jintinjamnush apú kuichkiji atinun yajumin nuigtú aents pegkegchau aina ibaujaish ijuntujash yuwawa? —tuidau.

¹² Nu tabaun Jisus antuk ayaak:

—Aents jamamtuchu aidauk ampijatnunak atsumtsame, aents jau aidau ampijatnunak atsumame. ¹³ Dekas imá pegkeg wetajum, nunikjum Apajuí chichamega nui: ‘Aents wait anentin atajum tusan wakegajai, anentag kuntin itaajum tsagkugnagtasaa maa apeajum nunak dakitajai’, tawa dusha wajina takua tawa nu shiig aujsa dekaatajum. Wika aents tudaugtuchu aidaunak minitchauwaitjai, wika aents tudaugtin aidau tudaujin idayinak mina nemagtuktinme tusan tauwaitjai.

Ijagmaka pujusá Apajuí aujut iniimsamu

(Mr. 2.18-20; Lc. 5.33-35)

¹⁴ Nuna aatus Jisus tutai, Juagká jintintaiji aidau jegantaju Jisusan, nunik iniidau:

—¿Wagka jutiik, fariseo aidaujaig kuashtá yujumak ijagmaw agmag nuniajinish, amina jintintaijum aidaush ijagmainatsua? —tuidau.

¹⁵ Tama Jisus ayaak:

—¿Nuwena nunú aents ipaamu aidaush wake besemag pekaamainkaih nu, nuwenu ditajai pujaigkish? Anmamtuk mina jintintaig aidaush wi ditajai pujaigkik, yujumkanak ijagmamain ainatsui. Tujash tsawan jegattawai nuwena nunú juwam atata nu, nunikmatai ipaamu aidaush wake besemag dekapenak yujumkanak ijagmakagtatui, —tiuwai.

Jisus jintinkagtak, yamajam jintinkagtamua duka yaunchuk jintinkag-tutai aina nujaig pachimaitisui tibau

(Mr. 2.21-22; Lc. 5.36-39)

¹⁶ Tusa junashkam tiuwai:

“Makichik aentskesh jaanch yamagman tsupikag jaanch mamujunmag adujtuchu ainawai, yamajam asa jaanch mamujun nuní

* 9:9 Jujú papiinum “Mateo” tawa nunak tayatak tikichnumag “Leví” tawai.

nagkaemas ichiimain asamtai. ¹⁷ Antsag vino yajatai duwap apagbau ajutnumag uva yumiji yamá ijugbaunak yajachu ainawai, dutikamak vino kajiak pushutak ipatmain asamtai, nunik vinok ukagag, duwapshakam ichiinak ajapnamainai. Tujash duwap yamagmanmag nunimait sui, vino yamajam asa pushututaish ayatak egkenag wetai nunisag pegkejak amainai.”

Jairo nawanji, tikich nuwa jaujai etsagagbau

(Mr. 5.21-43; Lc. 8.40-56)

¹⁸ Aatus Jisus chichagkagtak pujai, tajiuwai makichik judío aidau apuji, nunik Jisusan tikishmatug chichajak:

—Mina nawantug yamá jakaun ukukjai, tujash apuh ame minim uwegmin antinjukta, dutikamak nawanjuk aneantatui, —tau.

¹⁹ Tama Jisuschakam ni jintintaiji aidaujai wegajui. ²⁰ Nunik wegamunum nuwa doce mijadai numpan senchi puwak jaa pujú, Jisusan wainak ukunum juwatki adijkauwai. Nunik Jisus jaanch pataká nugkuagbaujin† antigkui, ²¹ nigka: “Jisusa jaanchjinakesh, antignuk dekas pegkejap wetatja”, tu anentaimu asa. ²² Dutika antigkam Jisuschakam ayampá diikmá nuwan wainkau, nunik:

—Nawantah, ame kajintsá anentaimam duwi tsagaju asam shiig aneasta, —tiuwai.

Tima nunú tsawanta nuaduik nuwashkam tsagag pegkeg wajasuí. ²³ Nuna dutika ukukí jegauwai apú nawanji jajukbauwa nuna jeen. Nunikmá wainkau nunú nuwauch jakaun ukusagtatus ditá nunitaiji asamtai, pigkuí aidaun umpuinak pampantú batsataidaun.

²⁴ Nuniagtatman Jisus chichajak:

—Atumek jinjatajum, nuwauchik jakache ayatak kanaje, —tiu.

Tutai dushikidau. ²⁵ Tusa aentsun ishiak idayak wayaa, nuwauchin uwegnum achiká inantam, nuwauchishkam nantakiuwai. ²⁶ Nu Jisus dutikamun ashí yaaktanum etsejug dapampajajui.

Jisus jimag aents wainmachu etsagagbau

²⁷ Nuna dutika Jisus jiinki wetatman, jimag aents wainmachu pataetukag, senchi untsumkag:

—¡David wegantu uchijiyah, jutiish wait anenkagtugta! —wajaidau.

²⁸ Nunikag Jisus jegá wayantai, wainmachu aidaushkam utsantuawaju. Nunikagmatai Jisus ditan iniak:

—¿Atumesh minash niimtijumainapi tujutjume? —tau. Tama ditashkam:

—Ehé Apujuh, —tuidau.

²⁹ Tiagtai Jisus ditá jiin antintak:

—Atum kajintsá anentaimjum nunisag uminkati, —tiuwai.

³⁰ Tamawaik niimiajui. Nunikmatai Jisus ditan chichajak:

—Makichik aentskesh ujakaigpa, —tiu.

³¹ Tibau ainayatak jijnjag weenak, ashí aents nuwiya aidaunak ujá jakua wegajui.

Aents chichachun Jisus etsagagbau

³² Nunú wainmachu etsagagbau jinki weenaig, aents wakan pegkegchau egkemtuamu asa chichachun, Jisusan itajuawajui.

³³ Dutikawagmatai wakan pegkegchaun jigkiuwai, dutikam aents

† 9:20 “Awantak pataká nugkuagbauji” tawa duka, diistá Mt. 5.40.

chichachushkam shiig chichakuí. Nunikmatai aents aidauk senchi puyatjukag:

—¡Israel aents aidautik makichkish aika etsagamuk wainchataiyai! —tuidau.

³⁴ Tujash fariseo aidauk:

—Juka wakan pegkegchau aidau apujiya nuna senchijin wakan pegkegchaunak jiyaawai, —tuidau.

Jisus wekaesá chichagkagtukbau

³⁵ Nui juwaki Jisus yaakat aidaunum, nuigtú yaakat yaijuch aidaunmashkam, makí makichik jega ijuntai jegamkamunum, yamajam chichaman Apajuí nuní inapawai tusa jintí jintinkagtakua wegau. Nuniak etsagau ashí jatai jau aidaun, najaibau aidaunashkam.

³⁶ Imatika Jisus etsagautai, tikich aents aidaushkam kuashat minituidau minash etsaentugti tusag. Aents aidau imaniagtai Jisus wait anenmain diyau, uwig kuitamain atsugbau wajukmaina numamtuk wajaidau asgmatai. ³⁷ Nuniak Jisus ni jintintaiji aidaun:

—Dekas tajime: Shiig kuashat aents aidau Apajuí minaish inamjati tusa atsumainawai, tujash ujumchikiuchi yamajam chichama juna etsejuidau, ³⁸ nuaduí Apajuí segatajum tikich ni chichame etsegmain aidaun ishiakti tusajum, —tiuwai.

10

Jisus chicham etsegtugkatajum tusa ishiaktinji doce etegjamu aidau (Mr. 3.13-19; Lc. 6.12-16)

¹ Jisus niina jintintaiji doce aina nuna untsuká ijumag, aents wakan pegkegchau egkemtuamu aidau, jau aidau, najaibau aidaushkam etsagagtajum tusa senchimtika ishiakui.

² Jisus ni chichame etsegtugkatajum tusa ishiaktinji doce aajakajuk ju ainawai: Simón tikich daaji Pedro, Andrés Simogka yachi, tikich Jacobo, yachi Juagjai mai Zebedeo uchijig; ³ Felipe, Bartolomé, Tomás, Mateo apú kuichkiji atinun ijumjukua nu, Jacobo Alfeo uchijí, Lebeo Tadeo tuuta awagmatai, ⁴ Simón niina nugken agkanmitkatatus kuashat aents aidaujai chichajakua nu, Judas Iscariote Jisusan sujukua nunú.

Jisus ni jintintaiji aidaun chichagkagtuktinme tusa ishiakbau (Mr. 6.7-13; Lc. 9.1-6)

⁵ Jisus niina jintintaiji doce aina nuna ishimak tiuwai: “Judiuchu aidau batsatbaunmag wepajum, Samarianmaya aents aidau yaakta-jinish wayawaigpajum. ⁶ Nunitsuk dekas Israel aents aidau uwig megkaejauwa numamtin aidau batsata nui wetajum. ⁷ Nunikjum chichagkagtuktajum, Apajuí ju nugkanum inamjatnuk ashí jegae tusajum. ⁸ Nuniakjum etsagagtajum aents leprayai jau aidau, tikich jatai jaidaushkam aikasjumek etsagakjum, jakau aidaushkam inantajum, dutikakjum wakan pegkegchau egkemtuamush jiiijum etsagaitajum. Nunú dutikakjumesh atumek akigkatajum tiigpajum; atumnak wi mina senchijun amajime, dutikamu asajum wainkajum etsagaitajum.

⁹ “Wegakjumes h kuichkikesh, orokesh, cobrekesh, ¹⁰ waji egkesa jutaigkesh, ushujutaigkesh, sapatkesh, nugkutaish yachiagmek jukig-pajum. Wagki aents taká duka yuwatnujig suwam auwai.

¹¹ “Tuja yaaktanum jegaakjumes h nuniachkugmesh aents yaaktan ukuki batsatbaunum jegakjumshakam, egaktajum yaita aents kajintsa diimainush, nunikjum nuwig pujusjum wegakjum ukuktajum. ¹² Tuja jega wayakjumes h shiig augmamsajum wayatajum. ¹³ Nuniakjum: Apajuí atumnash yaimpakti titajum. Tajumin dita shiig aneas jujabi-agtaik, Apajuí ditanash yaigtatui. Tuja dita atumin dakitjabiagtaik, Apajuishkam ditanak yaigchagtatui.

¹⁴ “Untsu atumin makichik aentskesh jeen awaintamtan dakit-jamainak, chicham etsegbau antutnash dakituinakuig, nunú jegak ukuakjum, nuniachkugmesh yaakat jinkugmekesh daweminia tsetse pegatjam akaketkam ukuktajum. ¹⁵ Dekas tajime: Suwimak sukag-tamu tsawan jegatna duwik, nunú yaaktanmaya aents nunina nunak, Apajuí duwik yaakat Sodomannmaya Gomorranmaya aidaun suwimkan susauwa nuní nagkaemas suwimkan jukiagtinai.

Waitiamu atin Jisus emtika etseggamu

¹⁶ “Wi atumnak uwig ikamyawa batsatbaunum ishimaina numam-tuk aents pegkegchau batsatbaunum ishimjime. Nuaduí atumek shiig kuitamamkajum shiig anentaimsajum yujastajum. Nuniau asajum tikichish pegkegchau awajkaigpajum. ¹⁷ Nuniakjum nu aents aina nujai g kuitamamkatajum, atumnak achigmakag jega ijuntainum apu chichaman dekaawagtatus ijunjamunum ejetamawagtinai. Dutijamawagmatai jega ditá ijuntaiji aidaunum awaintamawag suwimjamawagtinai. ¹⁸ Dutijamainak tikich apu aidaunmash ejetamawag nui jujamkiag, dekas apu nugkanum inamin aidaunmash ejetamawagtinai mina nemagtu idau asagmin. Dutijamawagmatai ditá emtin mina pachittsajum chichaakjum, judiuchu aidau emtinish etsegtugkatin ainagme. ¹⁹ Tuja atumin ejetamawagmataish, wajuk chichaktajaki tusagmek uyumaktin aigpajum. Nuna tujamainakuí chichaktinnak Apajuí tujamtinai. ²⁰ Duka atumek Wakaní Pegkeji ichachtabauwa nu chichaktatjume.

²¹ “Nunú nuniemunum ditá yachiuchijinash maatnume tusag suji-agtinai, aantsag uchigtin aidaushkam uchijinak sujiagtinai, nunisag uchi aidaush apajin maatnume tusag inamiagtinai. ²² Atum mina nemagtin aidautigminak ashí aents aidau kajegtabiagtinai, tujash ni mina nemagtukbautak pujusá nagkanbaunum jegaa nu uwemjatnai. ²³ Tuja makichik yaaktanum pujagmin aintamainakuish, tikich yaaktanum tupikaktajum. Dekas tajime: Israelnunia yaakat aina nui mina chichameg pachisjum ashí etsegtusgminig, wi Aentsmagan Akiinawaitag nunak taatnaitjai.

²⁴ “Jintinbauwa duka jintinkagtinun nagkaesauk amaitsui, tuja inakak apujin nagkaesauhui. ²⁵ Jintinbauwa duka jintinkagtina nuninuk amainai. Aantsag inaka dushakam apujijai betek amainai. Mina Beelzebú* senchijin takaawai tusag augmatjuina nunisag, atumnaku pegké tujamtin ainawai.

* **10:25** “Beelzebú” tawa duka tu chichamkita shiig dekantsui, tujash Iwanchnak taku tawai.

*Dekas ishamaina nu
(Lc. 12.27)*

²⁶ “Nuna tujamainakuish, makichik aentskesh ishamkatin aigpajum, wagki ashí uukbau aidaush wantinkagtinai, aantsag ashí dekaachbau aidaushkam dekaamu agtinai. ²⁷ Nuaduí atumek tikichish antachbaunum wi imá atumnak jintinbau antukujum nunú, ashí aents antuinamunum etsejatajum dekaatnume. ²⁸ Mantamainakuish ishamkaigpajum, wakanminak maumainchau ainawai. Dekas Apajuí ishamkatajum, iyashmijai, wakanmijai suwimkan sujamak jii aju-maish kajinchaunum egkepamaina nunú.

²⁹ “¿Atumek makichik kuichik iman akikchaush juwakjum jimag pishak sujuchuk agmaujum? Nunú aina duka, Apajuí jakati tachamak makichkish jamaitsui. ³⁰ Apajuik atumi intashim wajupa awa nunash shiig dekawai, ³¹ nunin asamtai atumek ishamkaigpajum. Atumek pishak aina nuna nagkaesau ainagme.

*Ishamtsuk Kristu nemagnaitjai tumamainai
(Lc. 12.8-9)*

³² “Nuniau asamtai atum tikich ujaakjum: Wika Kristu nemagnaitjai, tiu aidautigminak, wishakam dutiksanuk mina Apag nayaimpinum puja nunashkam: Ditak mina nemagtin ainawai titinaitjai. ³³ Atum mina nemagtin ainayatkujum tikich aidau emtin: Wika Kristunak nemagchauwaitjai, tujutiu aidautigminak, wishakam aikasnuk mina Apag nayaimpinum puja nunashkam: Ditak minak nemagtuchu ainawai, titinaitjime.

³⁴ “Atumek minak: Shiig agkan anentaimas batsamsatnume tusas ju nugka juwig tauwaitai, tusagmek anentaimjuttisaigpajum. Wika atum shiig agkan anentaimas batsamsatnume tusanuk taachuitjai, wika atum mina nemagtuidau asagmin, tikich mina dakitjuidau utugchatan aputugmasag kajegtamá batsamtin asamtai tauwaitjai. ³⁵ Aatus nuniamunum uchi apajin pempeentuki kajegtinai, nuwashkam ni dukujin kajegtinai, nuwa nemakushkam tsatsajin shiwagmatnai. ³⁶ Aatus shiwagmagamu asamtai atumi pataim aidaujaig pempeentunikjum shiwagmagatnaitjume.

³⁷ “Aantsag mina anenmaina nuní nagkaemas apajin, nuniachkush dukujin imá senchi aneauk, midau amain ainatsui, nunisag mina anenmaina nuní nagkaemas uchijin, nuniachkush nawanjin imá senchi aneashkam midauk amaitsui. ³⁸ Mina nemagtuk waittan dakitaushkam midau amain ainatsui. ³⁹ Tuja ju nugka juwí pujutan imá senchi wakegauk, megkaekatin ainawai, untsu mina nemagtau asa pujutjin uyumatsuk jauk, uwemjatin ainawai.

⁴⁰ “Atumin jujamaina duka mina jujuinawai, tuja mina jujuina dushakam mina awetiuwa nuna juwinawai. ⁴¹ Apajuí etsegtin minaun niina jeen juwaushkam, nu Apajuí etsegtin waji shiig pegkejan jukitna dutiksag niishkam jukitnai. Aantsag aents pegkejan takau minaun juwaushkam, nu aents pegkeg juwamunak waji shiig pegkejan jukitnai. ⁴² Makichik aentskesh mina nemagtin imanchauch aina juna, yumin shikisá suwauk, dekaskenum niishkam waji shiig pegkeg suwam atinai.”

11

Juan Yamijatn ni jintintaiji aidaun chicham dekaatajum tusa ishiakbau

(Lc. 7.18-23)

¹ Jisus ni jintintaiji doce aina nuna ashí jintintua inagnak, nuwiya jiinki yaakat ayamunum chichagkagtuktatus weuwai. ² Nuwi Jisus chichagkagtak wekaebaun Juagshakam aents achiká egketainum egkemas antuku. Nunik ni jintintaiji aidaun jimajan awemauwai, ³ Jisusan: —¿Amekaitam Apajuí uwentikagtinun awematnaitjai tibauwa nunú? ¿Amechuitkuminig tikichnak dakastatag? tusajum iniastajum, —tusa.

⁴ Nunú tusá iniam Jisus ditan ayaak:

“Wetajum, nunikjum atum ashí wainkamu, antukbauwa nu Juan ujaktajum: ⁵ Wainmachush wainmainawai, shutushkam wekagainawai, lepragtin aidaush tsagainawai, empekush antuinawai, jakaush nantainawai, tuja ujunauch aidaunash yamajam chichaman jintinmae tusajum. ⁶ Nuaduí wi takaamujua nuna wainainak dekaskeapi tujutuidauk, shiig aneasagtinai timae tusam ujaktá”, tiu.

Juan pachisa Jisus etsegkamu

(Lc. 7.24-35)

⁷ Nunik waketjamtai, Juangkan pachis aents nui batsatun iniak: “¿Wají wainkatasagmae uwegshunmash wegabiugme? ¿Tagkanan dase umpuau wainkatasagmek wegabiujum? ⁸ Nuniachkugmesh ¿Wají wainkatasagmae wegabiugme? ¿Aents shiig iwajamun nugkujá pujau wainkatasagmek wegabiujum? Atumek dekagme nugkurai iman iwajamun nugkujá iwagmamaidauk apú jeen pujuinawai. ⁹ Tujash ¿wají wainkatasagmae wegabiugme? ¿Apajuí etsegtinuk wainkatasajum wegabiujum? Dekas tajime: Duka Apajuí etsegtin aajakajua nuna nagkaesauwai. ¹⁰ Apajuí etsegtin niina pachis agajua duka: ‘Wi mina chichamjun etsegnun amina emtimin awemajai, ni jintanak umigtamkattawai’, tawai.

¹¹ “Dekas tajime: Ju nugka juwi akiinaidauk Juan Yamijatna nuna nagkaesauk atsawai, tujash Apajuí inamtainig aents dekas iman-chauchia nuuwai Juangkan nagkaesauk.

¹² “Juan Yamijatn Apajuí inamjatnun pachis jintinkagtutai kajejajakú aina nunisag, yamaishkam chichamnak shiig dakituinawai. Nunidau asag tikich aidau Apajuí inamtaijin wayawainum tusag dakituinawai. ¹³ Ashí Apajuí etsegtin agajaju aina nunú chicham umiktin aina dushakam Juan tauwa imanuiya atin etsegkamui. ¹⁴ Niiyai Elías taatnui tibau aajakua duka, nunin asamtai atumek antugkatajum. ¹⁵ Dita antutaiji ajamuk antuktinme”, tiuwai.

Juangkan dekaskeapi tichaju aidau

(Lc. 7.31-35)

¹⁶ “Nuigtush atumnash ¿wajina pachisan takunua antumtik-mainaitjime? ¹⁷ Atumek uchi aidau kuashat aents ayamunum pekaamsag wasugkamainak: ‘Wi nantsematnume tusan flauta tutaya nuna umpuakuish nantsemashmaugme, wake besemjan kantamtai

buuttinme tamash buutchamugme' tusa pempeentuniki untsuniyaja-
jama numamtuk wajagme. ¹⁸ Juan Yamijatna nunú yutai aidau-
nash yuwachu, vinunash umachu asamtai chichagkujum: Wakan
pegkegchau egkemtuamu asa aniawai, tajume. ¹⁹ Tuja wi Apajuí
Uchijiyaitkun Aentsmagan Akiinaun yutainash yuwakun, umutain
umakuish: Ju aentsua juka ayatak wekagas yu wekaewai, umutnash
umú wekaewai, nuniau asa apú kuichkiji atinun yajumin, nuigtú
tudaugtin aina nuna kumpajiyai, tujutjume. Tujash Apajuí umijuidau
wajuk pujuinawa nuna wainainak, Apajuí yachajiya nunak dekamain
ainawai."

Aents pegkegchau idaitan dakitin aidau
(Lc. 10.13-16)

²⁰ Nuna ti idayak, nunú yaaktanun kuashat iwainataish dekaskeapi
tusag tudaujin idayinak Apajuin nemagkachaju asagmatai, najamnun
chichajak: ²¹ "¡Corazignumia aidaunak, aikasnuk Betsaidanmayanash
wait anentuinajai!, ditak mina chichamjun dekaskeapi tujutchaju asag-
matai. Yaakat Sidognum, Tironmash aents batsatina duka, wi atumin
wainchatain iwaintajim imatika ditash iwaintam wainkujag, dita
wake besemag pujaku iwainmamtain jaanchin nugkujag, buukenish
yukuun batsakag, ditá tudaujin wake besemag batsatbaunash, Apajuin
iwaintumain aajakajui. ²² Nuaduí Apajuí suwimak sukagtamú tsawan
jegatna duwik, yaakat Tironmaya aents aidau, Sidognumia aidaujai
suwimkan jukiagtin aina nuní nagkaemasjum atumek suwimkak
jukiagtin ainagme. ²³ Yaakat Capernaum batsamin aidauwah, atum
anentainsagmek: Jutiik jainakuish nayaimpinum juwam agtinaitji,
tajume. Tujash dutikamak agchatnaitjume, atumek tikich aents
pegkegchau aidau jinawaju waitú batsata nui batsamsatnaitjume.
Yaakat Sodomannun batsamajakajua dusha, atum wainchatai iwain-
tajim imatika iwainamun wainainakug, tudau takatan idaisag yamaya
juwish batsaamain ainawai. ²⁴ Tujash atumek Apajuí aents suwimak
suwamu jegatna nunú tsawantinig, Sodomannun aents aidau nagkae-
sajum suwimkak jukiagtinaitjume", tiuwai.

Jisus ni Apají emematbau
(Lc. 10.21-24)

²⁵ Nuna tusa idayak Jisus ni Apají Apajuin emematak: "Apawah,
amek ashí nayaimpinum batsamin aidaun, nugkaya aidaunashkam
Apuji asamin emematjame. Iman asam aents yacha aidauk iwain-
tutsuk, aents imanchauch aidau etegjamujum tikima uchi itugmaina
imatiksam iwaintukum nuaduí. ²⁶ Dekaske Apawah, amek aajam
wakegame."

²⁷ Nuna ti idayak ni jintintaiji aidaun pempeentuki: "Mina Apag
ashí nugkanmayag ame diistá tusa idaitugsauwai, nunin aig wi Apajuí
Uchijiyaitag nunak makichkish dekajuinatsui, imá mina Apajuk shiig
dekajui, aikasag mina Apagnash wainainatsui imá wiki shiig wainjai,
tuja wi iwaintamú aidau Apagnak wainmain ainawai. ²⁸ Atum tu-
daujum idaisatasajum kakanmamkujum, takaaku pimpitia imanikjum
pimpikjum pujautigmek minai minitajum, wi ayamtijatjime. ²⁹ Atum
wi jintinjim jujú unuimagjum imatiksagmek umiakjumek, dekattagme

wi kakagchau, utugchatnash emamkesan depetnaitag nunú, nuniakum wakanmish ayamtikstaggme. ³⁰ Tuja wi atum chicham umiktinun amajim juka, utugchatak atsawai yupichuch umimainaitjume.”

12

Jisusa jintintaiji aidau tsawan ayamtai aig trigo juki yuwawagbau
(Mr. 2.23-28; Lc. 6.1-5)

¹ Tsawan ayamtai tsawaju ai, Jisus jintintaijin saasá aja trigo ajakbaunum utujá wegau, jinta nunú nagkaemaku asamtai. Nuniamunum Jisusa jintintaiji aidau yapajuinak trigon kupik jukiag nejen yuwi yuwinakua ashinaidau. ² Nuniagtatman fariseo aidau wainkag:

—¿Wagka amina jintintaijum aidaush tsawan ayamtai tsawagmataig takantsashti tibauwa nunin aish aikainawa? —tuidau.

³ Tusa tiagtai Jisus ayaak:

—¿Atumek agagbauk ausachuk ainajum, David tsawan ayamtai tsawaju aig niijai yujaamujai yapajuinak, ⁴ jega Apajuí ememattainum wayaa, pag imá sacerdotek yuwati tibau aajakua nuna juki yuwak, aents niijai yujaunash ayugkauwa duka? ⁵ ¿Nuigtush atumek ausachuk ainajum Moisés agagbauwa nuanuí: Sacerdote jega Apajuí ememattainum takau aidauk, tsawan ayamtai tsawaju aigkish ayamainatsui; tujash duka pegkegchawk wegatsui tawa duka? ⁶ Nuniau asamtai tajime, juajuí pujawai makichik aents atum umigmajin jega Apajuí ememattaya nuna nagkaesau. ⁷ Apajuí duwik tibau agagbauwa nuanuí tawai: ‘Apajuí tsagkugtugi tusajum kuntin maajum apeajum nunak dakitajai, dekas tikich aidaunash wait anenjatnume tusan wakegajai’ tawa nunú shiig dekakjumek, tikich aidaush pegkegchaun takaachukek wainkagmek augmatmaitsume. ⁸ Wi Apajuí Uchi-jiyaitkun Aentsmagan Akiinaw asan, tsawan ayamtai tsawagmataish wajukmainaita nunak wikitjai tumainnuk, —tiuwai.

Tsawan ayamtai tsawaju aig aents uwejeé chuwijun Jisus etsagagbau
(Mr. 3.1-6; Lc. 6.6-11)

⁹ Jisus nuna tusa ukukmatai nui juwakiag fariseo aidaujai ijunjag jega ditá ijuntaijin wayawaju. ¹⁰ Nunú jeganum pujau aents uwejen chuwijú. Nuniau asamtai fariseo aidaushkam Jisusan kajejuidau asag, wajintig timatai etsegtuka bakumí tusag:

—¿Tsawan ayamtai tsawaja aish jaush etsagaumainkaih? —tusa iniasaju.

¹¹ Tutai Jisus:

—¿Atum aidautigmesh tsawan ayamtai tsawaja aig, uwigjum waanum egkemá jinkitakamá waitú pujakuish itugmainaitjupa, wejum jimainchaukaitjum? ¹² Tujash aentsui dekas uwijá nagkaesauk, nuaduí tsawan ayamtai tsawaju aigkishkam pegkeg aina duka dutikmainai, —tiu.

¹³ Tusa aents uwejeé chuwijun:

—Uwejum dakuekta, —tiuwai.

Tamawaik uwejen dakuek, tikich kuntujijai betek pegkeg wajasuí. ¹⁴ Jisus nuna dutikamtai fariseo aidau agaa jinjag, Jisusan maatasag chichaman umiidau.

Apajuí etsegtin Jisus pachisa etsechkamu

¹⁵ Tusa chichainamun Jisus dekaa ijunjamunum pujau jinki wetai, kuashat aents aidau saetukajui, imatikam Jisuschakam jau aidau etsyagau. ¹⁶ Dutikakush tikich aidauk nunú etsyentugmae tusagmek ujakaigpa, tau. ¹⁷ Junak tiuwai yaunchuk Apajuin etsegtin Isaiás agagbauwa nuna umiau asa. Nunú Apajuí tibauk tawai:

¹⁸ “Juwai dekas mina chichamjun etsegtugkatnun mina aneetaijun wi etegkauwaitag duka, nuniau asamtai niini shiig anentaibau ajutui.

Niina susatnaitjai mina wakanjun, dutikam ni etsegtatnai chicham pegkeja nuna ashí aents aidanum.

¹⁹ Nigka wainak chicham aidanak jiyantuk wekaechatnai, jintá wariantagkesh antugtuktajum tusag chichagkagtuk wekaechatnai.

²⁰ Niig aents tudaugtinnash tsagkugsukek idaisashinai, ayatak tsagkujug pegkemtiktinai, aikasag aents niina imatikas anentaimtuinachunash nigki dekaskeapi tumamtiktinai.

Aatus ashí pegkegchau aidanak ni pegkejan takaak depetkatnai, ashí aents aidan Apuji atinai.

²¹ Aents judiuchu aidashkam nuna wainainak dekas niimpap iinash uwemtijamjattawa tiagtinai.”

Iwanch Beelzebú daagtinu senchijin Jisusak wakan pegkegchaunak jiyaawai tibau

(Mr. 3.20-27; Lc. 11.14-23; 12.10)

²² Wajumak aents aidau aents wakan pegkegchau egkemtugbau, wainmachu, chichatnash chichachun Jisusan itajuawajui, dutikawagmatai niishkam etsyagajui. Dutika etsyagajam wainmachushkam wainmaku, nuniak chichatnash chichau. ²³ Nuna etsyagagmatai aents aidau wainkag puyatkaju, nunikag: “¿Juchaukaih Apajuí makichik Apu Uwentikagtinun David wegantun awematnaitjai tibauwa nu?” tuidau.

²⁴ Tiagtai fariseo aidau antukag: “Ju aentsuk wakan pegkegchau aidau apuji Beelzebú daagtina nuna senchijin wakan pegkegchau aidanak jiyaawai”, tuidau.

²⁵ Nunú aatsa anentaibaujin Jisus dekau asa: “Makichik nugkanmag batsatiatak pempeentuniki maaní batsatkujag megkaemain ainawai. Tuja makichik yaaktanum batsatu pempeentunisag maaní batsatkushkam megkaemain ainawai. Aantsag makichik jeganum ijunag batsatiatak pempeentuniki maaní batsatkush ditak megkaemain ainawai. ²⁶ Nunisagke iwanchakam, ni senchijin mina sujus aents wakan pegkegchau egkemtuanu aidan jijiati tujutkug, nigki ditambaujaig shiwagmaemainai, nuniak niina senchijinash megkaemain ainawai. ²⁷ Atumek minak: Beelzebú senchijin wakan pegkegchau aentsun egkemtuanu aidan jiyaawai, tujutjume. Mina iwanch ni senchijin sujaish atumi jintintaijum aidanash, ¿ya senchinash suwawa wakan pegkegchau aidan jiktinme tusash? Ditak Apajuí senchijin jiyaawai tujutkugmek, atum wainka dewakjum tu yujagme. ²⁸ Wishakam Wakaní Pegkejijai wakan pegkegchau aidau aentsun egkemtuanu aidan jiyaag nunak, yamaik atumiin Apajuí inamu asamtai jutikajai.

²⁹ “Aents senchigtina nuna jeen wayaa wajijjin yajutkata takug, nuna aentsun jigkajá nuaduú yajutmainai ashí wajijjinak.

³⁰ “Aents wi takaag nujai shiig aneas juwainachuk mina shiwagma-tuinawai, nunisag aents Apajuí chichamen etsegbaunash yainchagtaik kuashat aents uweemainun megkagainawai.

Wakaní Pegkeji pachisa Jisus tibau

(Mr. 3.28-30)

³¹ “Dekas tajime: Apajuik ashí aentsun tudaujinak tsagkug-mainai, niina pachis pegkegchau chichagkau aidaunashkam, tujash Wakaní Pegkejiya nuna pachis pegkegchau chichagkau aidauk tsagkugnagchagtinai. ³² Makichik aentskesh wi Apajuí Uchijiyaitkun Aentsmagan Akiinawaitag junakesh pegkegchau chichagtuku ainak-jash tsagkugnainain ainawai. Tujash Wakaní Pegkejin pegkegchau chichagkau aidauk, yamaya juwish ajumaish tuke tsagkujam achagtinai.

³³ “Ajak pegkejak nejeakush pegkegnak nejeawai, tuja ajak pegkegchauwa dushakam pegkegchaunak nejeawai. Nuaduí numi aidauk ni nejenig dekanui. ³⁴ ¡Iwanchi uchijí aidauwah! ¿Itugsagma pegkejash chichamainaitjume ibau pegkegchau aidautigmesh? Aentsuk ni wajukuna anentaimua, nunak chichaak iwainawai. ³⁵ Aents pegkejak pegkegnumag anentaimu asa, chichaakush pegkegnak chichauwai. Nunisag aents pegkegchau anentaimushkam pegkegchaunak chichawai. ³⁶ Nunin asantai Apajuí suwimak sukag-tamu tsawan jegataik, makí makichkiti ii pegkegchau chichakbaujinak imatiksag iwaintugmaktinai. ³⁷ Pegkeg chichajakutinak suwimkanak amaschatnai, untsu aents pegkegchau chichajakú aidaun suwimkan susatnai.”

Aents pegkegchau aidau Jisusan, wainchatai iwainakia tibau

(Mr. 8.12; Lc. 11.29-32)

³⁸ Juna aatus Jisus timatai wajumak fariseo, tikich chicham umiktinun jintinkagtin aidaujai:

—Jintinkagtinuh, ame makichik wainchatai iwainamu wainkatasa wakegaji, —tiajui.

³⁹ Nuna tiagtai Jisus chichaak:

—Jujú aents pegkegchau aidau Apajuí chichamenash umigchau aina nu, dekas Apajuí Uchijimpashit tusag dekapjustatus wainchatai iwainakta tujutuínawai. Tujash dita tuina nunak iwaintukchat-tajai, ayatak Apajuí etsegtin Jonás wajukauwa nunisnuk ditanak iwaintuktatjai. ⁴⁰ Jonasan nayantsanmaya namak muun kujajui, dutikam nuna ampujin kumpatum tsawan kumpatum kashi pujusuí. Wishakam antsanuk Apajuí Uchijiyaitkun Aentsmagan ju nugka juwi Akiinawaitag nunak, mantuawag ukugsagmatai nugká initken kumpatum tsawan nuigtú kumpatum kashia imaan tepesan nantaktinaitjai. ⁴¹ Ninivenmaya aents aidauk, Jonás Apajuí chichame ujakam, dekaskeapi tusag tudaujin idayinak Apajuin nemagkajui, tujash atumek, wi Apajuí Uchijin dekas Jonasa nagkaesaun juwi pujusá chichagmash antukjum, tudau takat idaikujum Apajuí nemajuinachu asagmin, atak suwimak atina duwik, dita atumnak bakugmagtinai. ⁴² Aantsag nuwa Sabá nugkanmaya aentsun apuji surnumia Salomogkan tajiawai, Apajuí yachamtikamun antujuk dekajuatatus, nunú atumnak bakugmagtinai atak suwimak atina duwik, wi Salomogkan nagkaesaun imatika chichagmash antukchau asagmin.

⁴³ “Wakan pegkegchau jiki ajapamak wegawai aents atsamunum ni pujumainun egaak; nunik wekagas egá egakua ni pujumainun wainkachag; ⁴⁴ ‘Dekas wakitkitjai wi pujujakbaunum’, tusa wakitki tajua diikmá, nunú aentsuk jega japimká shiig iwajamu ukumkimua nunik atatman wainak, ⁴⁵ wakitki siete wakan niina nagkaesau pegkegchau aidaun yajuak egkemtawai. Dutikam aentsuk duwik pegkegchau aajakbaunak, nuní nagkaemas shiig pegkegchau wegawai. Atumshakam jujú aents imatika wakan chimpimtuamu wajuksa numamtuk wajaktatjume.”

Jisusa dukují ni yachi aidaujui kautuamu

(Mr. 3.31-35; Lc. 8.19-21)

⁴⁶ Jisus aatus jintinkagtak pujai niina yachi aida, dukujijai Jisusan ausatatus kautuawag agaag ijunaidau. ⁴⁷ Nuní ijunai tikich aents aida Jisusan:

—Amina duku, yatsum aidaujui aujsatjai tusa kaunawag agaa ijunui, —tusag ujaidau.

⁴⁸ Tusá ujaam Jisus chichaak:

—¿Yaita mina dukug, mina yatsug aidaush?

⁴⁹ Nuna takug ni jintinbau aidaun inakmas:

—Jujú ainawai mina yatsug, mina dukug aidauk, —tiuwai.

⁵⁰ Nuigtush juna tusa idayak:

—Ashí aents Apajú chichamen antukag umijuidaushkam mina yatsug, mina ubag, mina dukug ainawai, —tau.

13

Ajakan ajakbaun pachis Jisus augmattsamu

(Mr. 4.1-9; Lc. 8.4-8)

¹ Nunú tsawantaik Jisus jegá pujau jiinki kuchanum jegaa uwe-tus ekeemsamtaí, ² aents aidaushkam tuwagkaju. Imanikagmatai Jisuschakam botenum egkemá nanamas, aents aidauk kaamatak ijuntsamtaí jintintu. ³ Dutikak ajakan ajakbaun pachis augmataik:

“Ajakan ajakbau, ajakan ajakmatatus weuwai. ⁴ Nunik jegantá ajajin jigkai nagkimam jintá kakekaunak pishak kaketuk amukuí. ⁵ Tikich jigkai kayagnunum nugka imanik atsamunum kakekauwai, nu nunikuk wamkes tsapaidiajui, ⁶ nuniktatman etsa jinaak kagkapé initak akaejachu asamtaí apeká ijinauwai. ⁷ Tuja tikich jigkai kakekajui jagki ayaunum, nunik dushakam tsapaittaman jagki yutuauwai. Dutikamu asa jinauwai. ⁸ Tujash tikich jigkai nugka dekas pegkegnum kakekauwai, nunikajuk makí makichik ajak aidaú cien, tikich sesenta, tikichakam treinta aatus nejekajui”, tiuwai. ⁹ Juna ashí jintinkagtua ashimak: “Dita antutaiji ajamuk antuktinme”, tiuwai.

Jisusa jintintaiji aidaú iniimsamu

(Mr. 4.10-12; Lc. 8.9-10)

¹⁰ Nuna aatus jintinkagtua ashimkamtaí ni jintintaiji aidaú jegaan-tag:

—Apuh, ¿wagka augmatbau pachismesh shiig antukchamnush jintinkagtuaume? —tusa iniidau. ¹¹ Tama Jisus ditan ayaak: “Atumnak Apajú ni aentsnum inamjatnuji dejakachamun wi pachisan etsejag

junash dekamtijamatatus wakejutpagme; tujash tikich aidauk deka-main ainatsui nunap tawá tusajag. ¹² Nuniau asamtai ni mina chichamjun dekaskeapi tusa shiig puyatjus antaunak aan nagkaemasan jintintuattajai, tuja ni mina chichamjun puyatjus antachuk machik antamujish kajimitkam atinai. ¹³ Nuaduí ditanak ayatak augmatbaun pachisan jintinjai, wagki ditak wi waji pegkeg takaamun wainainakushkam wainmachu wajukmaina nuninak, antuinakush nunap tawá tusag dekainatsui wainak antuinawai. Nuaduí ayatak, junak taku tawái tutsuk jintinkagtajai. ¹⁴ Juka ditai uminui yaunchuk Apajuí etsegtin Isaiás timawa nu, duka aatus tiuwai:

‘Chicham etsegbaun kuashat antiagtinai tujash dekaachagtinai, kuashat pegkeg takaamunashkam wainiagtinai nuninakjash dekaskeapi tichagtinai.

¹⁵ Juka aentsuk anentainish dekaskeapi tichamin utugchatan anentaimaidau asag, antuinakushkam wainak antuinawai.

Jiinchakam epetkamua numantin ainawai.

Nuninchau ainakug mina chichamjun antukag pujutjin yapajinakuig, wi ditanak uwentikmainaitjai.’

¹⁶ “Tujash atumek shiig aneastajum, waintash wainu, antutash antajum nuaduí. ¹⁷ Dekas tajime: Kuashat Apajuí etsegtujakajua duka, nuigtú kuashat aents pegkejan takajakú aina dushakam yamai atum wainjum juna wainkagtatus wakegajakú ainawai. Tujash wainkachu ainawai, antutnash yamai atum antajum juna antukagtatus wakegajakú ainawai, nuninakush ditak antukchajui ju chichamnak.

Ajakan ajakbau timag nunak, juna takun timajai tusa Jisus et-segkamu

(Mr. 4.13-20; Lc. 8.11-15)

¹⁸ “Wi ajakan ajakbaun augmattsan timajim nunú shiig antuktajum. ¹⁹ Jintá jigkai kakekaun pishak amukú, timag nunak: Apajuí inama nunú pachisa chicham etsegbaun antakush dekaskeapi tachau asamtai, iwanch chicham antukbaujin kajimitka nuna takun timajai. ²⁰ Ajakan jigkayí kayagnunum kakekaju aidau, timag nunak: Aents Apajuí chichame etsegbaun yamaikik shiig aneas antuku ainayatak, ²¹ waitiak, utugchatan igkuak pachitsuk idayidauk, ajakan kagkapé initak akaejachu asa, etsa sukuam waamak jinuwama numamtuk wajaina nuna takun timajai. ²² Jigkai jagki ayaunum iyaaju, timag nunashkam: Aents Apajuí chichamen antuinayatak, ju nugkaya waji aina nunak imá senchi uyumainak, wiyakchameatasag imá senchi wakejuina nuna takun timajai. Ashí ju nugkanmaya waji aina nunú, chicham pegkeg antukbaunak imanchau emawai. ²³ Untsu jigkai nugka pegkegnum kakekajuk, jinutsuk ashí imanish shiig tsapaidi-aju asag nejetnash imanik nejeawajui, timag nunak: Aents Apajuí chichamen shiig antukag, dekaskeapi tusag, emamkesag utugchat ajuinamash depetuk pujuina nuna takun timajai. Nunú aents aidauk makichik ajak, cien, sesenta, treinta nejeawajua numantin ainawai.”

Trigo ajakbaunum dupa pegkegchau tsapakun Jisus pachis jintinkag-tuamu

²⁴ Junashkam Jisus jintinkagtak augmatus: “Apajuí aentsnum inama duka aents niina ajajin ajak pegkejan ajakmakua nujai betekmantinai.

²⁵ Dutika ajakmak idayinak kajiak batsatai, ditá shiwaji wayaa dupa

pegkegchau aidaun ajatuk ukuak weuwai. ²⁶ Dutikamu trigoshkam tsapakag nejenai, dupa pegkegchau ajaamushkam paan wantinkajui. ²⁷ Nunik dupa pegkegchau tsapakun wainkag, takau aidau wegajui apujin ujaktatus. Nunik jegajag: ‘Apuh, ame ajak pegkeg ajakbauwaitkush, ¿utugsaya dupa pegkegchaush tsapaidiaje?’ ²⁸ Tiagtai: ‘Aunak shiwag aikae’, tama inak aidau: ‘¿Tujash amesh wajinpa dupa pegkegchau aidauk uwegtatjik?’ ²⁹ Tiagtai: ‘Atsa dekas idaisatajum, dupa tegakmajum trigoshkam tegainijum. ³⁰ Nunimain asamtai aantsag trigojai betekak tsakagtí, nunik trigo tsamak uminkamtai ishiaktajai tikich takau aidaun, dutikam dita dupa pegkegchau aidaunak etegkeg uwegag ijumag jigkaktinme apeatnun, tuja dutika trigonak juukag nunú ijumtainum ijumjatnume’,” tiuwai.

Mostaza jigkayí pachisa jintinkagtuamu
(Mr. 4.30-34; Lc. 13.18-19)

³¹ Junashkam Jisus tikich augmatbaun pachis jintinkagtak: “Apajuí aentsnum inama duka, aents mostaza jigkayin niina ajajin ajauwa numamtinai. ³² Mostaza jigkayiya duka tikich jigkai aina nuní piipichi, nuninchitak ajaam tsapaig muuntan tsakaawai, nunik tikich ajak aidau nagkaesau kadaukdaugkin wegawai. Iman wematai nuaduí yakiya pishak aidaushkam nuna kanawen pasugmak petsaama numamtuk, Apajuishkam aents wajumkea nui inabaujin nagkama kuashat emawai”, tiuwai.

Levadura pachisa jintinkagtuamu
(Lc. 13.20-21)

³³ Junashkam Jisus augmatbaun pachis jintinkagtak: “Apajuí aentsnum inama duka nuwa pagkan najanatatus kuashat harinan juki namuká, nuwí levadura piipich ajuntuamuitak ashí jegajug kajiak wampushmitkama numamtinai”, tiuwai.

³⁴ Jisusak aents aidaun jintinkug tuke augmatbaun pachis jintintu-jakuí. Augmatbaun pachis tutsukek jintinkagtujakchauwai. ³⁵ Nunú Jisus aatsa jintinkagtuamua duka, yaunchuk Apajuí etsegtin aidau againak:

“Apajuí nugkan najanaigkish dekaachbaun jintinkagtakug, tuke augmatbaun pachis jintinkagtitnai”, tibauwa nu uminkauwai.

Ajak ajakmakbaunum dupa pegkegchau tsapainu pachisa nuní awai tusa Jisus jintinkagtuamu

³⁶ Nuna Jisus aatus jintinkagtua aents aidaun ukukí jegá wayamtai, ni jintintai aidaushkam jegajuawag:

—Jintinkagtinuh, ame augmatkum dupa pegkegchau ajak ajakmanunum tsapakuí timaum dusha, ¿wají takumea timaume? nunú shiig ujjatkata iish dekami, —tuidau.

³⁷ Tama Jisuschakam ditan ujaak: “Jigkai pegkejan ajakbau timag nunak, wi Aentsmagan Akiinauwaitag nuna wiki tumamkun timajai. ³⁸ Untsu ajan pachisan timag nunak, ashí nugkanmaya aents aidaun takun timajai. Ajakan jigkayí pegkeg timag nunashkam Apajuí uchijí aidaun takun timajai; untsu dupa pegkegchau timag nunak iwanchdau aina nuna takun timajai. ³⁹ Shiwag dupa pegkegchaun ajau timag nunak, iwanchin takun timajai. Ajak juwaamu timag dushakam atak dekas nugka nagkanbaunum aents pegkeg, pegkegchaujai etegnagtina

nuna takun timajai. Untsu ajakan juwidau timag nunak, nayaimpinmaya aents aina nuna takun timajai. ⁴⁰ Nugka nagkantina duwik aents pegkegchau aidauk, dupa tegajá apetiama numamtuk awajam agtinai. ⁴¹ Wi Aentsmagan Akiinawaitag nuna, mina aentsug nayaimpinmaya aidaun ishiaktinaitjai, pegkegchau takau aidaun, tikichin pegkegchaun takamtikin aina nujai Apajuí emtin akanjati tusan. ⁴² Dutika etegkeg pegkegchau takau aidaunak jii tuke kajinchauwa nui chimpawagtinai, dutikam nui batsamsag senchi waitiak nain takegtuinak buutú batsamtin ainawai. ⁴³ Tujash Apajuí wakegamujinak takagsaju aidauk, Apajuí inamtaijin wakag tuke etsajai betek etsantiagtinai. Wi taja nuna, dita antutaiji ajamuk antuktinme.

Oro uukbau pachisa jintinkagtuamu

⁴⁴ “Apajuí aentsnum inama duka oro kajunnum aimkamu nugkanum yutua uukbauwa nujai betekmamtinai. Aents nunú uukbaun wainak nuwig yutua ukuak, shiig aneas wakitki ashí niina waji ajamunak sujuk sumakua numamtinai.

Kaya perla dekas akik pachisa jintinkagtuamu

⁴⁵ “Apajuí aentsnum inama duka, aents waji sujin nayantsanmaya tsuntsu kayaji perla tutai, dekas pegkeg iwajamu akiktanash akikan wainkatatus egá wekaetukmá, ⁴⁶ wainak ukuak, jeen jegaa ashí niina wajiji aidaunak sujug ashimak, nu iman akikan sumakua nujai betekmamtinai.

Red augmattsa tibau

⁴⁷ “Aantsag Apajuí aentsnum inama duka, aents retan ajuntin aidau nayants ajuntut, ashí tikich namak wainchatai aidaujai ijumag yajuma nujai betekmamtinai. ⁴⁸ Namak retnum ashí chimpimkamtai japi japinakua kukag ajuidiag, nui ijuntujag namak yutai aidaun yajumainak, namak wainchatai yutash yuchatai aidaunak ayatak utsauwajame. ⁴⁹ Numamtuk tsawan nugka nagkanbau jegataik, Apajuí nayaimpinmaya aents aidaun ishiaktinai, aents pegkeg pegkegchau aidaujai etejatnume tusa. ⁵⁰ Dutikawajam etegkeg pegkegchau aidau-nak jii tuke kajinchau awa nui utsawagtinai. Dutikam nui batsamsag senchi waituinak nain takegtuinak buutú batsamtin ainawai”, tiuwai.

⁵¹ Nuna pachis ashí jintintua inagnak:

—¿Atumesh wi juna taja dusha shiijak antukujum?

Tusa iniinam dita aimainak:

—Ehé Apujuh, shiig antukji, —tiaju.

⁵² Tiagtai ni chichajak:

—Moisés chicham umiktajum tibauwa nuna jintinkagtin aidau, mina nemagtukag wi Apajuí aentsnum inamjatnun inabaujin etejag juna shiig unuimaidauk, aents jeentin yaunchuk waji ukukbaujin, tikich yamá ikaunmakbaujai ijumjamun jiyama numamtuk wajainawai, —tiu.

Jisus Nazaret pujusbau

(Mr. 6.1-6; Lc. 4.16-30)

⁵³ Jisus nu augmatbaun ashimak aents aidaunak ukuak, ⁵⁴ niina nugkeen Nazaret weuwai. Nunik nui jegaa jega ijuntainum wayaa chicham pegkeg, ditash dekaachbaun jintinkagtau. Imanitai aents aidau puyatjuk diinak:

—¿Jusha tuwí imanikash unuimajuita imatika wainchatain iwaina nunash? ⁵⁵ ¿Jujú carpintero uchijiya duchaukaih, dukujish Mariayajama? ¿Yachi aidaushkam Jacobo, José, Simón, Judas ainajama? ⁵⁶ Ni umayi aidaushkam jutijai ijutkau batsata aniaish, ¿wajuka imatikash dekawa? —tuidau.

⁵⁷ Tusa pampantuinam Jisus chichaak:

—Apajuin etsegtin ni nugken pujus etsegtaik, eme anentsag antugchau ainawai, tujash tikich nugkanum wekagas etsegtaik shiig aneas antujin ainawai, —tiuwai.

⁵⁸ Nuna tusa, nuanuig kuashat wainchatai aidau iwainajag takaschauwai, dekaskeapi tuinachbau asa.

14

Juan Yamijatin maamu

(Mr. 6.14-29; Lc. 9.7-9)

¹ Nunú tsawantai Herodes Galileanmaya apua nu Jisus pachisa chichainamun antuku, ² nunik ni inake aidaun chichajak: “Duka Juan Yamijatin maamua nu nantakiu asa senchigtin wajas imaniawai”, tau.

³ Nunak Herodes Juagkan achiká aents achiká chimpitainum egkeau asa tiuwai. Nunak Herodesak ni yachi Felipe nuwen Herodiasan nuwatuk pujau asa dutikauwai. ⁴ Wagki Juan chichajak: “Herodesah, amek amina yatsumi nuweg nuwatkamek pujumaitsume”, tibau asa,

⁵ Herodes kajejuk maatatun wakejayatak, aents aidau Juagkak dekas Apajuinun etsegtawai tuidau asagmatai, ditá ishamak idaisauwai.

⁶ Dutika Herodes ni akiinamu tsawagmatai ipaamu aidaushkam tuwakuí, imanikbaunum Herodiasa nawanji ejapeen wajantá nantsemak Herodesan shiig awajkauwai. ⁷ Nunik:

—Ashí ame wakegamu segatbaunak utujitsuk amastajame, —tusa anagkuauwai. ⁸ Tima nuwauchishkam dukujin jegantú, nunikmatai ni dukují akatjau, dutikam Herodesan jegantun:

—Jujú platunum Juan Yamijatnun buuké sujustá, —tusa segauwai.

⁹ Nunú tama Herodes wake besekuí, nuniyatak ditajai pekajuidaush antuinamunum: “Dekas amastatjame”, tiu asa yapajimainchau dekapjauwai. Nunik:

¹⁰ —Wejum aents achiká chimpitainum Juan egketa nuna buuké tsupika susatajum, —tiuwai. ¹¹ Timatai Juagkan buuken platunum egkejag itaantajui, dutika nuwauchin susajui. Ni jukí dukujin susauwai. ¹² Dutikawagmatai Juagkan jintintaiji aidau kautuk iyashin jukiag ukusag ukuinak, Jisusan wejiag ujakajui.

Jisus cinco mil aents ayugkamu

(Mr. 6.30-44; Lc. 9.10-17; Jn. 6.1-15)

¹³ Jisus Herodes tabaun dekaa, botenum egkemag nugka agkantunum nigki pujustatus weuwai. Nunittaman aents aidaushkam dekaawag, yaaktan ukuinak kukag shiyakajui. ¹⁴ Jisus botenmaya jinkamá shiig kuashat aents tuwaká ijunun wainkau, dutika wait anenrajui, nunik jau ikaunmamunash etsagaaku. ¹⁵ Nuniamunum etsa akagu asamtai, Jisusa jintintaiji aidau jegaantag:

—Juwig jutiik aents atsamunum batsatji, etsash akaewai, aentsuk ishiakta, yaaktanum jegattak aents batsata nui wegag dita yuwatnun sumaktinme, —tuidau.

¹⁶ Tutai Jisus ayaak:

—Ditak wemain ainatsui, atum dita yuwatnuk susatajum, —tiuwai.

¹⁷ Tama dita aiinak:

—Imaanik atsugtamui ayatak cinco pag, nuigtú jimagchik namak ajutjamui.

¹⁸ Tiagtai Jisus:

—Nunú mina sujustajum, —tusa segauwai. ¹⁹ Nuna ti: Aents aidau yajuakjum chijichi aina nui batsamsatajum titajum, tusa cinco pagkan, nuigtú jimagchik namaka nuna juki, nayaimpinum pagkai see tusa, pagkan puujá ni jintintaiji aidau tinabiu. Dutikam dita aents aidau tinabijui. ²⁰ Dutikawajam ashí shiig yuwawag ejemakajui, nunikagmatai ampinkaanak yajuakag doce chagkinnun aimjajui. ²¹ Nui yuwawajuk cinco mil aishmag tumain aajakuí, nuwash uchi aidau dekapatsuk.

Jisus yumí awanken wekaesá webau

(Mr. 6.45-52; Jn. 6.16-21)

²² Nuna yuwawag nagkanaig niina jintintaiji aidau:

—Atumek botenum chimpimjajum emka kuchá amain katigtajum, —tusa ishimak, Jisusak aents aidau aujus ishiaktatus juwakui. ²³ Aents aidau ashí aujus ukuak, Jisus mujanum wakauwai kanakí Apajin ausatatus. Nunik kiyagmataishkam nigki pujau. ²⁴ Atushat nugkan ukukí boteshkam kuchanum ejapean wegai, dase igku umpuamu asa yumí tajeamunum pachiinak botek ukaetatak wajau. ²⁵ Imaniai kashikmas tsawau taig, Jisus yumí awanken wekagas minau. ²⁶ Nunik wekagas minittaman niina jintintaiji aidau wainkag senchi ishankag untsumainak:

—¡Pasun minawai! —tiaju.

²⁷ Imatiagtai Jisus chichaak:

—¡Witjai ishamjukaigpajum! —tiuwai.

²⁸ Tutai Pedro ayaak:

—Apuh, dekas ametkumek, minash yumí awanken wekaesá juwi tantata tujutia, —tau.

²⁹ Tutai Jisus:

—Takumek minitá, —tiuwai.

Tama Pedroskam botenmaya jiinki, namaká najama yumí awanken wekagas Jisus wajamunum jegantatus wegau. ³⁰ Nunik dase senchi dasantai ishankau, nunikmá yuminum akagak:

—¡Apuh achigkata! —tau.

³¹ Nuna taig Jisus uwegnum achiká chichajak:

—¿Wagka minaig kajintsá anentaimtsukesh utujimsamesh anentaimtugme? —tiuwai.

³² Jisus Pedrojai botenum egkemjagmatai daseg mijakui.

³³ Nunikmatai ni jintintaiji aidau nui botenum chimpujuk Jisusan jegaantag tikishmatug:

—¡Amek dekas Apajuin Uchijiyaitme! —tusa emematuidau.

Jisus Genesaretnumia jau aidau etsagakbau

(Mr. 6.53-56)

³⁴ Imaa imaaninakua katigkag Genesaret nugkanum jegawajui.
³⁵ Nunikmatai Jisusa wainkag ashí nu nugkanmag etsejajui, dutikawag-
matai ashí jau aidaun ni pujamunum ikautkaju. ³⁶ Dutikawajam:

—Idaikagtusta ame pataká nugkuajam nuna nagkattsamujigkesh
antigkagmi, —tusag segaidau. Tuja ashí aents niina jaanchjin antigkuk
pegkeg waigkaju ainawai.

15

Aentsun pegkegchau ebaun Jisus pachis etsegkamu
(Mr. 7.1-23)

¹ Jerusalegnunia fariseo aidau, chicham umiktinun jintinkagtin
aidaujai kaunkaju Jisusan jegantajui, nunikag:

² —¿Wagka amina jintintaijum aidaush iina muunji umiktajum
tibauwa nuna umitskesh ikigmatskesh yuwinawa? —tuidau.

³ Tiagtai Jisus ayaak:

—¿Wagka atumesh atumi muunjum chicham umiktajum timawa
nu umiakjumesh, Apajuí chicham umiktajum timawa nu umitskesh
idaijume? ⁴ Apajuí chichaak: ‘Atumin apa, dukujai eme anentsam
diitajum, dutikakjum yaigtajum; ni apajin, dukujinakesh pegkegchau
chichajuk tsagkugtsuk maatajum’ tiuwai. ⁵ Tujash atumek: Ni apajin,
dukujinakesh: ‘Ashí midau ajuta junak Apajuin anentag anagkuamjai,
nuniku asan yaimaitsugme’ tusa ⁶ tauk, ni apajinak dukujinakesh
yaimaitsui tajume. Nunú aaja tau asajum, Apajuí chichame umiktajum
tujamawa duka imanchauch emajum, atumi muunjumi chichamega
duke wejuinagme. ⁷ ¡Aentsú tsanú aidauwah! Apajuí etsegtin Isaías
atumin pachipasag shiig tiuwai:

⁸ ‘Ju aents aina juka minak dekas ditá anentain eme anenjuinak
adaituinatsui,
ayatak wenin adaituinawai.

⁹ Nuniau asag minak umigtuinatsui,
aents umiktajum tibauwa nuna jintinkagtuinak Apajuinu jintinkagtaji’
tuinawai, —tiuwai.

¹⁰ Juna ti aents aidaun untsuká chichaak:

—Antuktajum, nuniakjum shiig dekaatajum. ¹¹ Wenunum wayá
duka aentsnak pegkegchawk ematsui. Untsu aentsun weninia jiina
nunú aentsnak pegkegchau emawai.

¹² Timatai ni jintintaiji aidau Jisusan jegaantag:

—¿Amesh wainkamkum fariseo aidau ame tame nuna antukag
kajekagma dusha? —tuidau.

¹³ Tama Jisus:

—Ditak mina Apag nayaimpinum puja nudauchu asag, ajak tegai
ajaptayama numamtuk awajam agtinai. ¹⁴ Idaisatajum, ditak wain-
mainatsui, nuninaitak tikich wainmachu aidaun jintan inaktustatus
wakejumaina numamtuk wajainawai. Wainmachua nunú tikich wain-
machu jintan inaktustatus wegakug, waanum mai nuwig iyaumainai.

¹⁵ Tutai Pedro Jisusan:

—Shiig ujabatkata nunú augmatbau pachisam tame dusha waji
takumea tame, —tiu.

¹⁶ Tutai Jisus:

—¿Atumesh nunú dekamainchauk dekapeajum? ¹⁷ ¿Dekatsjumek ashí wenunum wayauk ampugnum nagkaemaki, atsumamunum wegam letrinanum ajapna duka? ¹⁸ Tujash wenunum jiina duka anentainmaya jiinui. Nuniau asa aentsnash pegkegchau emawai. ¹⁹ Anentainmaya jiinui pegkegchau anentaimta dushakam, magk-agtuta nu, tsanijinat, kasamat, tikich dekaskechu aig tsanumjut, pegkegchau chichagkagtut, ²⁰ ju aina juuwai aentsun pegkegchau emauk, tujash ikigmagjum yuwatajum timawa nunú, ikigmatsuk yuwamuk aentsnak pegkegchauk ematsui.

Tikich nugkanmaya nuwa Jisusan dekaskeapi tibau
(Mr. 7.24-30)

²¹ Jisusjai nuwiya jijnag Tiro nugkanum, Sidón nugkanmashkam wegajui. ²² Nui jegai Canaagnumia nuwa Jisusan untsummaikia minis: —¡Apu David wegantu uchijiyah! ¡Wait anenjujia minash! ¡Mina nawanjun wakan pegkegchau egkemtug, senchi waitkagta nu!, —tau.

²³ Tamash Jisusak machikish aikchauwai. Nunitai ni jintintaiji aidau jegaantag:

—Iina ukujin minis untsú untsunkawa minajama, wakitkita tita, —tuidau.

²⁴ Tama Jisus:

—Apajuik minak Israel aents megkaejau aina nuwig awetiuwai.

²⁵ Nuna taig nuwashkam amainag tikishmatug pujus:

—Apuh yainkata, —tau.

²⁶ Tutai Jisus ayaak:

—Uchi pagkan yuwau atankí yawá suwamuk pegkegchawai, —tau.

²⁷ Tutai nuwa ayaak:

—Duka apu dekaske. Tujash yawashkam mesa wapken pujusá tsaisá akakeamun yuwamajama, —tau.

²⁸ Tutai Jisus ayaak:

—Nawantah, shiig senchi minaig kajintsá anentaimam duwi, ame wakejam duka imanisag uminkattawai, —tiu.

Nuna taig wamkes nunú nuwan nawanjishkam pegkeg wajasuí.

Jisus kuashat aents jaidau etsagakbau

²⁹ Jisus nuwiya juwaki Galilea kuchajin jegauwai; nunik nainnum waka nui ekeemsauwai. ³⁰ Nunikmatai kuashat aents aidau tuwagkaju; nuninak shutú, uweje chuwiú, wainmachu, chichachu aidaun, nuigtú kuashat jau aidaunashkam ni eketbaunum ikautuidau. Nunikmatai Jisuschakam etsagaakui. ³¹ Dutikawajam aents chichachu aidaush chichaidau, uweje tsujinkau aidaush pegkeg wegajui, shutú aidaushkam wekagaidau, wainmachu aidaushkam wainmaidau. Nunidaun aents aidauk puyatjukag ijunas dii ijuntuidau. Nunikag: “Israel aentsun Apajuiji dekas imá senchigtinai”, tusag emematuidau.

Jisus cuatro mil aents ayugkamu
(Mr. 8.1-9)

³² Nunikagmatai Jisus ni jintintaiji aidaun untsumá ijumag:

—Jujú aents aina juna wait anentuinajai. Kampatum tsawan wijai batsatainawai, tujash yumainji atsujuinawai. Yujumkam ayugtsukek

ditá jeenig ishimaitsujai, jeen jegatakamag pimpikiag jaka iyaantainum tau asan.

³³ Tutai niina jintintaiji aidau:

—Tujash ¿tuwiyag yutaish jumainaita imajú kuashat aents ayugmai-nush aents atsamunum pujag juniautish? —tuidau.

³⁴ Tiagtai Jisus niina jintintaiji aidaun:

—¿Wajupa pagka ajutjamainawa? —tusa iniau.

Tama dita ujainak:

—Siete pag, nuigtú wajumchik namak ajutjamui, —tiaju.

³⁵ Tiagmatai:

—Aents aidau akanjajum shiig nugká batsagtajum, —tusa idayak ³⁶ pagkan namakjai juki wajan Apajin see ti, nuna puug ni jintintaiji aidaun tinabiu, dutikamtaí dita aents aidaun tinamkajui. ³⁷ Dutikawajam ashí shiig yuwawag shiig ejemakaju, nuigtushkam ampinjau aidaun siete chagkinnum aimjajui. ³⁸ Nui yuwawajuk cuatro mil aents aajakuí, nuwash, uchi aidaush dekapatsuk imá aishmag muun aidauk dekapam. ³⁹ Juna dutika Jisus aents aidaun aujus ukuak, botenum egkemag Magdala nugkanum weuwai.

16

Fariseo saduceo aidaujai, wainchatai iwainakta tusa Jisusan segamú (Mr. 8.11-13; Lc. 12.54-56)

¹ Fariseo aidau, saduceo aidaujai Jisusan Apajuí Uchijimpashit tusag dekapasagtatus jegajuawag:

—Nayaimpinmaya wainchatai iwainkagtukia, —tusag segaidau.

² Tama ni ayaak: “Atumek agkutai nayaim kapantu wajasmatai: ‘Pegkeg tsawan atatui, nayaim kapantu wajasé’ tinu ainagme, ³ untsu kashikmasjum: ‘Yamai tsawan pegkegchau atatui, ikiyamag suwe wajasé’, tajume. ¡Tsanumin aidauwah! Nayaimpi niimé diisjum tsawan wajuku atatua nunú dekauwaitkugmesh, ¿wagka wi wainchatain iwainakan takaag jusha, Apajuí tibauwa nunap jutikawa tusagmesh dekamainchash dekapegme? ⁴ Jujú aents pegkegchau aidau Apajuí chichamenash umigchau aina nu, dekas Apajuí Uchijimpashit tusag dekapjustatus wainchatai iwainakta tujutuínawai. Tujash dita tuina nunak iwaintukchattajai, ayatak Jonás wajukauwa nunisnuk ditanak iwaintuktatjai”, tusa ukuak weuwai.

Fariseo jintinkagtuina duka, levaduraya numamtinai tibau (Mr. 8.14-21)

⁵ Jisusa jintintaiji aidauk kuchá amain weenak pagkan kajimatki jutsuk katigkajui. ⁶ Nunikagmatai Jisus:

—Nijah, fariseo aidau, nuigtú saduceo levaduraji aina nujai kuita-mamkatajum, —tau.

⁷ Tutai niina jintintaiji aidauk pempeentunikiag:

—Junak ii pag takukchag duwi tujamji, ⁸ tusa tabaun Jisus antuk:

—¿Aents imanis kajinas anentaimchau aidauwah, wagka pag pachisjumesh atumek pempeentunikjumesh jiyaniagme? ⁹ ¿Eke dekamainchauk dekapegajum aneetash aneaktsugmek, wi cinco pagkai cinco mil aents ayugkam nuigtú ampinkamtaish, wajupa chagkina aimjabiugme duka? ¹⁰ ¿Nuigtush aneaktsugmek, wi siete pagkai cuatro mil aents ayugkam ampinkamtaish, wajupa chagkina aimjabiugme

duka? ¹¹ ¿Wagka antumainchaush dekapeagme? Wika ditá levaduraji pag pachimtaiya nuna takun tichamjime: ‘Kuitamamkatajum fariseo, saduceo levadurajiya nujai’, timajim nunak.

¹² Nuna Jisus timatai dekawajui levadura pag najanatasa pachimtaiya nuna tatsuapita; fariseo, saduceo jintinkagtutaiji aidaunap tawa tusag.

Pedro, Jisusan amek Kristuitme tibau

(Mr. 8.27-30; Lc. 9.18-22)

¹³ Jisus yaakat Cesarea, Filipo tutaya nuanuí jegaatatus wesa, ni jintintaiji aidaun:

—¿Aents aidaush wi Aentsmagan Akiinawaitag nunash yaayai tujutuinawa? —tusa iniidau.

¹⁴ Tutai dita aiinak:

—Wajumak aents aidau: ‘Juan Yamijatin maamua nunuwai’, tujamainawai, tikich chichaidau: ‘Auk Eliasai’, tujamainai, tikich tuidau: ‘Jeremiastsukaitai, nuniachkush: Apajuí etsegtin aajakú aina dutsukaitai’ tujamainawai, —tuidau.

¹⁵ Tiagtai ditan pempentusag:

—¿Tujash atumesh minash yaayai tujutjume?

¹⁶ Tutai Simón Pedro tutaya nu ayaak:

—Amek Kristuitme, Apajuí tuke pujuwa nuna Uchijiyaitme, —tiu.

¹⁷ Tutai Jisus ayaak:

—Simón, Jonasa uchijiyah amek shiig aneasta, aents tibaukesh tatsume, aminak mina Apag nayaimpinum puja nunú dekamtijamae.

¹⁸ Wishakam amina tajame, yamaik amek Pedro* atatme. Jujú kaya muunta juwi ekenin kaya ekenjá jegamtaya numamtuk mina aentsug aidaunak awajkattajai, nunak jatakesch depetmainchau atinai.

¹⁹ Tuja amina idaitustajame Apajuí juwi inabaujiya nu yawí waiti ujamaina numamtuk awajkatin atá tusan. Dutikamu asam ame ju nugka juwi chicham etsegbaun dekaskeapi tachauk nayaimpinmag tsagkugnagchatnai. Untsu ame chicham etsegbaun dekaskeapi tusa umiauk aantsag nayaimpinmashkam tsagkugnagtinai, —tiuwai.

²⁰ Nuna tusa ni jintintaiji aidaun, mina pachittsagmek, juka Kristu uwentikagtin awemamu taatnai tibauwa nuuwai tusagmek makichik aentskesh ujakaigpajum, tiu.

Jisus ni maam atinji etsegkamu

(Mr. 8.31-33; Lc. 9.22)

²¹ Nuna tusa akatek:

—Jerusalén wegagmi, awi jegaa ai minak apu aidau, sacerdote apuji aidaushkam, ashí chicham umiktinun jintinkagtin aidaujai senchi waitkagsag mantuawagtatui. Nuna dutijuawagmataish, wika kauptum tsawanta juwi nantaktatjai, —tau. ²² Tutai Pedro akanak juki kakaakan chichajak:

—Apujuh, ame waitmainaitam duka nagkaetukchati tumamia. Apa-juishkam aminak dutikam atí tusag tsagkamjamaitsumamah, —tau.

²³ Nu tama Pedron ayampatua chichajak:

* **16:18** “Pedro” tawa nunak griego chichamnumag “kaya” piipichin taku tawai.

—¡Wetá iwanchih, minai tantá wajatsuk! Amek dekatsme Apajuí dutikatjai tabaujiya duka, nuaduí nuna umikai tusam tujutme, aentsú anentaimtaig anentaimam duwi, —tiuwai.

Jisus mina nemagtukta tautigmek atum wakegamuk idaikujum nemagtuktajum tibau

(Mr. 8.34-38; Lc. 9.23-27)

²⁴ Nuna ti Jisus ni jintintaiji aidaun:

—Mina nemagtuktasajum wakegautigmek atum wakegamuk idaikujum nemagtuktajum, nuniakjum senchi waitiakjumes h atsanjatajum. ²⁵ Ashí aents ju nugka juwi pujutan imá senchi wakegak, mina nemagtuk waittan dakitauk uwemjashtin ainawai. Untsu ashí aents mina nemagtuk pujus nunisag jaa nu uwemjatin ainawai. ²⁶ Aents ju nugka juwiya waji aidaun, ashí niinu emakush jaakug niina wakaninak tuké uwemtikmaitsui. Aentsuk ni wakaní uwemtijatasa akikmatmainjig atsawai. ²⁷ Apajuí Uchijiyaitak Aentsmaga Akiinauwa nunú, ni Apaji imanjiya nujai imanisag ni aentsji nayaimpinmaya aidaujai nugkanum taak, makí makichik aentsnak dita takasbaujiya dutiksag akiktinai. ²⁸ Atum juwi ijunjum juwiyatijum wajumak aidautijum eke jatsuk, Apajuí Uchijiyaitak Aentsmaga Akiinauwa nu inabauji wainkatnutigmesh ajume, —tiuwai.

17

Jisus yapajinamu

(Mr. 9.1-13; Lc. 9.28-36)

¹ Seis tsawan asa Jisus, Pedron, Jacobon niina yachi Juagkan aatus juki muja yakí tsakajunum wegajui. ² Nuwi ditash wainainaig Jisusa niimé yapajinauwai. Ni yapig etsajai betek wajasuí, niina jaanchjishkam shiig puju wajasuí. ³ Nuniaig Elías, Moisesjai Jisusan aujuinak ijuntatman wainkajui. ⁴ Nunik Pedro Jisusan chichajak:

—Apujuh, jutiish maigkis juwig batsatagtai, amesh wakegakminig kampakum aak umikagmi, makichik aminu, tikich Moisesdau, nuigtú Eliasdau, —tau.

⁵ Nuna aatus Pedro chichai, yujagkim winchamtin ashí ditajai ijumag ijikuí. Nuniaig yujagminmaya chichaak: “Juuwai dekas mina uchig anetaijuk, juwi shiig aneamug ajutui, nigki antugkujum umigkatajum”, tabaun antukajui.

⁶ Nu tabaun antukag, niina jintintaiji aidau senchi ishamkag tikishmajag tsuntsumawaju. ⁷ Nunikagmatai Jisus ditan tajuntun antiak:

—Ishamkaigpajum wajaitajum, —tau.

⁸ Tama diistakamá imá Jesusak wajattaman wainkajui.

⁹ Nuna nunik Jisus mujanmaya minisá niina jintintaiji aidaun:

—Atum wainkajum nu pachisjumek makichik aentskesh ujakaigpajum, wi Apajuí Uchijiyaitkun Aentsmaga Akiinauwaitag nuna mantuawagmatai nantatsaigkik, —tiu.

¹⁰ Nuna timatai, ni jintintaiji aidau iniidau:

—¿Wagka chicham umiktinun jintinkagtin aidaush, dekatkauk Elíasá taatnai tuinawa?

¹¹ Tusa iniam Jisus ayaak:

—Elías niyá eemak taa tikich takastinun umiktinai tibauwa duka dekaske. ¹² Tujash wi tajime: Eliasak taabi, nunikunak dekaachaju

asag, dita pegkegchau takaamujinak dutiksag inagkeatkigmayi. Nunisag Apajuí Uchijiyaitak Aentsmaga Akiinawuwa dushakam dita waitkam atatuí, —tiuwai.

¹³ Nuna tutai ni jintintaiji aidaushkam dekaawajui, Jisusak Juan Yamijatnunap pachis tawa tusag.

Wakan pegkegchau uchin egkemtuamun Jisus etsagagbau

(Mr. 9.14-29; Lc. 9.37-43)

¹⁴ Nunikag aents tuwakbaunum jegainai, makichik aents tajuntun niina tikishmatug chichajak:

¹⁵ —Apuh, mina uchijush wait anenjutjata, senchi jaakug imaanata wajauwe, nuniau asa kuashtá jinumash patamnuwe nuniak namakash iyainuwe. ¹⁶ Imaniau asamtai amina jintintaijum aidaun itaantamjai etsaentujati tusan, tujash etsagagchagmae, —tau.

¹⁷ Tusa tama Jisus ni jintintaijin chichajak:

—¡Aents pegkegchau minai kajinas anentaimchau aidauwah! ¿Wajupá dukapea atumjai ijunjanush pujumainaitja? ¿Wajupá dukapek dakastajime minak dekaskeapi tujuttinme tusanush? —Nuna ti idayak:

—Juwi itantá, —tiuwai.

¹⁸ Tima uchí juki itanmatai Jisus wakan pegkegchaun jiyaká jiikiuwai, dutikam nu tsawanta duwik uchishkam pegkeg wajasuí. ¹⁹ Jisus nuna dutikamtai niina jintintaiji aidaun agkan niinak:

—¿Wagka jutiish jiiktakamaish tujinkamji? —tuidau.

²⁰ Tiagtai Jisus chichaak:

—Atum imaanisa Apajuyai kajintsá anentaimaujum atsugtamainawai. Dekas tajime: Kajintsá anentaimaujum mostaza jigkayiya nuninchikesh ajutjamainakuig, ju muja jujú chichagkujum: ‘Juig atsuk tikich yantamnum wetá’, tamak nunisag nagkaemamainai. Makichkish tujinmainuk atsugtamainaitjume. ²¹ Tujash ju wania juka, Apajuí aujku yujumak ijagmaka pujachkuik kakajus jiimait sui.

Jisus awentsag ni mantamnatnuji etsegkamu

(Mr. 9.30-32; Lc. 9.43-45)

²² Jisus Galilea wesa ni jintintaiji aidaun chichajak:

—Apajuí Uchijiyaitak Aentsmaga Akiinawuwa nunak, tikich aents aidaunum sujukag idaisagtatuí, ²³ dutikawagmatai maawagtatuí. Tujash kumpatum tsawanta juwi nantaktatuí, —tau.

Tutai ditashkam senchi wake besekajui.

Jega Apajuí ememattainum kuichik akikmaktin tibau

²⁴ Nui juwakiag Jisus ni jintintaiji aidaujai yaakat Capernaum jegawajui. Nui jegawagmatai, jega Apajuí ememattainum kuichik itaamun yajumin aidaun Pedron jegaantang:

—¿Amina jintinjamnuk akikmakchattawak jega Apajuí ememattainum kuichik itaata tibauwa nunak? —tuidau.

²⁵ Tama ni ayaak:

—Ehé akikmaktatuí, —tusa ukuak jegá wayaamtai,

Jisus niina iniak:

—¿Simogka amesh wajuk anentaimtame? ¿Ju nugka juwiya apu aidaush yaá aents aidauna kuichkinash jujuinawa? ¿Ditá uchijish akikmainawak atsa tikich aents aidaunak akikmakta tuina?

²⁶ Tutai Pedro:

—Ikaya aina nuna akikmakta tuinawai, —tau. Tutai:

—Dekaske ditá uchijig akikmainatsui; ²⁷ tujash nunin aig dita shiig juwakchainum tau asá kuchanum weme agsea ajugtá, dutikam dekatkau namak ajuittam nuna weni iwanjam diistá. Nui kuichik egkematui. Nunú kuichik jukim jega Apajuí ememattainum weme midau, aminujai akikmakta, —tiuwai.

18

Yaki dekas imá wagaakush atinaita tiagbau

(Mr. 9.33-37; Lc. 9.46-48)

¹ Nunú tsawantinig ni jintintaiji aidau Jisusa jegaantang:

—¿Yaki Apajuí inamtainish imá wagaakush atinaita? —tusag iniidau.

² Tiagtai Jisus makichik uchin untsuká itan ditá ejapeen awajus, ³ chichaak:

—Dekas tajime: Atum pujutjum yapajiajum uchi aina jumamtin wegachkugmek, Apajuí inamak amain ainatsjume. ⁴ Aents Apajuí inamu dekas wagaaku atinuk, aents pujutjin yapajiau, jujú uchi anentaimaina jumamtuk weena nu imanuk agtinai. ⁵ Makichik aentskesh mina nemagtuidau asag, ju uchua jumamtin aidaun mina daajui juidauk, mina dutijuinawai.

Tikichin pegkegchau emaidau tibau

(Mr. 9.42-48; Lc. 17.1-2)

⁶ “Wajumak mina dekaskeapi tusag nemagtuidau ju uchi piipichia jumamtin aidaun pegkegchaun takamtikaidauk, dekas kaya muun dekeetai aina iman jukí kuntugnum detuais nayantsa kunajin ajugká ajapmain ainatai. ⁷ ¡Wait anentuinajai aents aidaunak, pegkegchau takamtikagtin midiahtin asagmatai! Duka tuké nuniktinai. Tujash wait anentajai ya pegkegchaun aentsú takamtiktinaita nunak.

⁸ “Tuja nuniktin asamtai amina uwejum, nuniachkush dawemkesh tudaun takamtijamkuig, tsupika atushat ajapmaina numamtuk wajaktá, tudau takata nunú idaikum. Dekas pegkejai tudau takat idaisau asá, pujut tuke atina nui uwegtuchu, nuniachkuish shutusá waimaina numamtuk wajamuk, mai uwegtin mai nawentin asá, jii ajumaish kajinchauwa nui ajapeam amaina nu. ⁹ Amina jiiim tudaun takamtijamkuish, makichik jime ukuinkam atushat ajapmaina numamtuk wajaktá, tudau takata nunú idaikum. Dekas pegkejai tudau takat idaisau asam pujut tuke atina nui makichik jiiyaik niimsá waimainaitam numamtuk wajamuk, jimag jiiintin asam jii ajumaish kajinchaunum ajapam waitiaku pujumainaitam nu.

Uwig megkaekau pachis Jisus augmattsamu

(Lc. 15.3-7)

¹⁰ “Mina nemagtuidau ju uchua jumamtin aina nu, wainkajum imanchau anentaimtipajum, Apajuí aentsji nayaimpinum batsataina duka ditanash kuitamaidau asamtai. ¹¹ Wí Apajuí Uchijiyaitkun Aentsmagan Akiinawaitag nunak, aents wakanin megkaejau aidaun uwemtikatan tauwaitjai.

¹² “¿Wajuk anentaimjume? aents cien uwig ajamu makichik megkaek-tukam, noventa y nueve uwija nunak batsaak ¿megkaekauwa nuna

egaak muja aidaunum wemainchaukaih? ¹³ Dekas tajime: Nunikmá igkugkag nuna imá shiig anenmainai, noventa y nueve batsata nuna nagkagas. ¹⁴ Nunisag iina Apají nayaimpinum puja dushakam, wakejutpatsui jujú piipich aina juwiya makichkish megkaekatnume tusag.

Apajuí nemajin aidautish wajuk tsagkugdaimainaita
(Lc. 17.3)

¹⁵ “Amina yatsum pegkegchaun takagtamkuish, imá nigki akankim ausata, dutikakum ni pegkegchau takasbauji pachittsam ujaktá. Ame tama antugtamkuig, duka pegkegchau takaamuji idaitanum ame yatsum yaigkume. ¹⁶ Untsu amina antugtamchakuig, makichik aentskesh dutikachkumesh jimagkesh ipaam ditajai ausatajum, ni pegkegchau takasbauji pachittsajum. ¹⁷ Ditanash antugchakuig, ashí aents Jisusa nemajin aidau ujaktá. Nunashkam antugchakuig, aents Apajuí anentaimtuchu aina nujai idaisatajum. ¹⁸ Dekas tajime: Atum ju nugka juwi aaja yayashmak nayaimpinmashkam tsagkugnagchatnai. Untsu atum ju nugka juwi tsagkujamuk, nayaimpinmashkam aantsag tsagkugnagtinaí. ¹⁹ Junashkam tajime: Atum jimagtigmekesh atuekajum atum anentaimtamujum Apajuí segamak, mina Apag nayaimpinum puja dushakam amastatjume. ²⁰ Jimagchikish nuniachkush kumpatumchikish mina pachitus ijunainakuig, wishakam nuwig ditajaig ijutkau pujuttajai.”

Tikichjai tsagkugdayat

²¹ Nuna tutai Pedro Jisusan jegantun iniak:

—Apuh, amina nemagtamin mina yatsug mina ubag aina nu pegkegchau takagtakuish, ¿wajupá tsagkugmainaitja? ¿Sieteya imania tsagkugmainkaitag?

²² Tama Jisus chichaak:

—Duke tsagkujata tusanuk tatsujame, tuke tsagkugsamké ata tajame, —tiuwai.

²³ “Apajuí aentsnum inama duka, apu niina inake diwibau asa akigkata tusa segauwa nujai betekmamtinaí. ²⁴ Dutika nagkamak, aents diez mil kuichkin diwimkagtaun juki awayawajui. ²⁵ Tuja nunú akikmamañji atsuju asamtai apu chichaak: ‘Dekas juka, niina nuwe, uchijí nuigtú ashí wajijíi aina nujai sujuktajum, dutikam nuní diwik uminkati’, tiuwai. ²⁶ Tusa tama aents diwimkagtaushkam, apun tikishmatug: ‘Wait aneam machik dakagsata, wi amina diwimjam nunak ashí imatixsanuk akiktatjame’, tusa segauwai. ²⁷ Tama apushkam wait anentug, diwibaunak akigkata tutsuk agkan idaisauwai. ²⁸ Dutikam nunú inak jünki wekamá, niina aents cien kuichkin diwimun igkugku, nunik suwenum achik emetua awajus: ‘Waamak ame mina diwimjam nunú akigkata’, tusa segau. ²⁹ Imatikam diwimkagtaushkam tikishmatug pujus: ‘Wait aneam machik dakagsata, wi ashí amina diwimjam nunak imatixsanuk akiktatjame’, tusa segauwai. ³⁰ Imatjamaitak wait anentsuk achiká juki, aents achiká egketainum egkea ukukiuwai, juwi pujus diwijn akikmakti tusa. ³¹ Dutikamun tikich apú inake aidaushkam wainkag wake besemag diisaju, nunikag apujin jegajijag ashí dita wainkamunak imatixsag ujakajui. ³² Dutikam apushkam aentsnum ishitkam juki itantagmatai chichajak: ‘Inak pegkegchauwa,

wika ame segatkuminig wait anenjan ashí ame mina diwimjamuginak akigkaipa tusan idaitusmajame. ³³ Wi dutika idaitusbau asam, ameshkam dutiksamek amina diwimjamush wait anenjam idaitumain wajakume.' ³⁴ Tusa apu kajeká achijatin aidaun: 'Jusha achikjum jukijum egkea ukutajum, niishkam awi pujus ashí mina diwimja nunak akikmakti', tusa inamjauwai." ³⁵ Jisus nuna pachis chichá chichakua inagnak:

—Mina Apag nayaimpinum puja dushakam nunisag atum yatsum tsagkugchataik dutijamawagtinai, —tiuwai.

19

Jisus nuwak idaimaitsui tibau

(Mr. 10.1-12; Lc. 16.18)

¹ Jisus jintinkagtamujin ashimak Galilea pujamunak ukuak, Judea nugkanum jegaa Jordagka amain katigkú. ² Nunikmatai kuashat aents aidau pataetukaju, dutikam jau aidaunashkam nui kuashat etsagakui.

³ Nuniai fariseo aidaushkam Jisusan pegkegchaunum dekapsatasag jegaantag iniinak:

—¿Nuwennush wainkash nuwenash idaimainkaih? —tuidau.

⁴ Tama ni ayaak:

—¿Atumek ausachukaitjum Apajuí yama nagkamchakug aishmagkun nuwajai najanauwai, ⁵ dutika chichajak: 'Aishmag nuwenkug apajin, dukujin ukuak niina nuwejaig pujumainai, nuniau asa nuwejai makichik iyash wegawai' tiuwa duka? ⁶ Nunin asag nuwenawajuk jimaja nuninchauwai, makichik iyashia nunin wegawai. Aatus Apajuí tibau asamtai, aents nuwenawaju aina nunak, makichik aentskesh idaimitkamainchau ainawai, —tiuwai.

⁷ Tutai dita iniinak:

—¿Wagka tujash Moisesash papí idaidaiku najantain umiká nuwanak idaimainai tiuwaita?

⁸ Tiagtai Jisus ayaak:

—Nunak atum chicham umitnumash katsujam asagmin, Moisesak nuwemik idaimainaitjume tujabiuwai, tujash nagkamtinig Apajuik nunak tichauwai. ⁹ Wi dekas tajime: Aishmag nuwe ekagmachunak idayas, tikich nuwajai nuwenkug ekagmawai, nunisag nuwa idaisamujai nuwenushkam ekagmawai, —tiuwai.

¹⁰ Nuna Jisus aatus timatai ni jintintaiji aidau:

—Dekas nu aatsayaitkuig, nuwentash nuwenmaitsujama, —tuidau.

¹¹ Tusa tiagtai ni ayaak:

—Junak ashí aentsuk betekak nunin amain ainatsui, Apajuí nunikti tibau nunimain ainawai. ¹² Aents nuwenmainchau akiinaush ainawai. Tikitchakam tikich aents kagamtikamu asag nuwenmainchaush ainawai. Untsu tikich aents: 'Wika Apajuí takatjin takagkun nuwentsuk wekaesatjai', tauk nuwenmaitsui. Dita nuna antumainuk antuktinme, —tiuwai.

Jisus uchi ikautkamu

(Mr. 10.13-16; Lc. 18.15-17)

¹³ Jisus juna tusa ashimkamtai uchi aidaun ikautkajui achiká Apajuin aujtusti tusag. Imatikiagtai ni jintintaiji aidau nuna jiyaidau. ¹⁴ Tiagtai Jisus chichaak:

—¡Tutsuk idaisatajum, uchi aidauk minai kauntatnume, utugkajum awagkigpajum! Jujú uchi anentaimaina jumamtin aidaunum Apajuik inamjata tawai.

¹⁵ Nuna tusa ti, shiig anentus uchin maki makichik achik ukukmatai tikichnum wegajui.

Datsauch wiyakuch Jisusan iniasbau

(Mr. 10.17-27; Lc. 18.18-27)

¹⁶ Makichik aents Jisusan tajuntun chichajak:

—Jintinkagtin pegkejah, ¿wají pegkegna takamainaitja pujut nagkan-chaun jukitanasush?

¹⁷ Tutai Jisus ayaak:

—¿Wagka Pegkejá tujutme? Makichkish pegkejak atsawai, pegkeja duka makichkiuchi, imá Apajuiya duke. Ame tuke pujutnum way-atasam wakegakmek, Apajuí chichame umiktina nu imatiksamek umiktá.

¹⁸ Tama ni iniak:

—¿Tu ainawa dusha?

Tutai Jisus ayaak:

—Magkagtuawaipa, tsanijinawaipa, kasamkaipa, wainkamek tsanumkagtuajaipa, ¹⁹ amina apa dukujai eme anentsam diiyaakum yaigtá, tuja amijai ijutkamushkam amek anenmamsam aneeta, —tiu.

²⁰ Tama datsauch chichaak:

—Wika nunak datsauch asanuk ashí umikuitjai. ¿Wajina nuigtush umimainaitja? —tau.

²¹ Tutai Jisus ayaak:

—Ame pegkeg atasam wakegakmek, weme ashí amina ajutjamaina duka sujukam, ujunauch aina nu susata. Nu dutikawamin nayaimpinum wajigmik ajutjamtainai. Nu dutika ukuakum mina nemagtukta, —tiuwai.

²² Nu aaja tama wake beseká weuwai, shiig wiyakuch asa.

²³ Nunikmatai Jisus ni jintintaiji aidaun chichajak:

—Dekas tajime: Wiyakuch aidauk kakajus Apajuí minash inatjati tusag idaimamainchau ainawai. ²⁴ Awentsanuk tajime: Camellok aujá jiinish waigkag nagkaemamainai, tujash wiyakuch aidauk Apajuí minai inamjati tusag kakajus idaimamainchau ainawai.

²⁵ Nu tabaun ni jintintaiji aidau antukag senchi puyatkaju nunikag:

—¿Yaki tujash uwemjaush amainaita? —tudayinau.

²⁶ Tiagtai Jisus ditan diis chichajak:

—Aents diismak juka utugchatai, tujash Apajuik ashí dutikmainai, —tiuwai.

Mina nemagtuidauk ditanu ukukbaujin nagkaesau jukiagtinaí tibau

(Mr. 10.28-31; Lc. 18.28-30)

²⁷ Tutai Pedro ayaak:

—Jutii ashí iina ajutjamaidauk ukuinaku ame nemagkamiajim nuutish, ¿wajig ajutjamtainaita?

²⁸ Tutai Jisus ayaak:

—Dekas tajime: Ashí najankamu ataktú yamagmitkamu jegatna nunú tsawantin, wi Apajuí Uchijiyaitkun Aentsmaga Akiinawuwaitag nuna mina senchigjai inamkun ekeemsantai, atum mina nemagtuku aidautigmeshkam doce ekeemtai awa nui ekeemsajum, Israelan uchiji

aidau doce aajakaju aina nunú wegantu inagtin ainagme. ²⁹ Ashí aents mina nemagtuinak jee aidaun, yachi aidaun, umayí aidaun, apajin, dukujin, nuwen, uchijí aidaun, nugke aidaun ukukiaju aidauk, dita ukukbaujin nagkaesau cieгка imaania jukiagtin ainawai, nuigtushkam pujut tuke atina nui pujusagtin ainawai. ³⁰ Tujash kuashat aents dekatkau atatus wakegaina nu ukunum juwakagtinai. Untsu iman atan anentaimtumachu aina nu dekatkauk agtinai.

20

Aents ajanum takastajum tusa ishiakbau pachisa jintinkagtuamu

¹ “Apajuí inama duka, aents uva ajagtin asa, kashikmas aents takastin aidaun egaak jiinkiuwa nujai betekmamtinai. ² Nunik ni ajajin takamain aidaun igkug: ‘Makichik tsawan takagtustajum akiktajime’, tusa ajají uva ajakbaunum awemauwai. ³ Nuna ishiak etsa dukap takuni ai, yaakat wekaekamá tikich aents aidaushkam takatsuk wainak batsatun wainkau, ⁴ nunik: ‘Atumesh wetajum mina ajajuí uva ajakbauwa nui takaakjum, nuniakjumin betek atum takattajum dutiksanuk akiktajime’, tama ditashkam wegajui. ⁵ Dutika ishiak, ataktú jinkiuwai etsa tajiaya ai, nunik takamainun yajuak ishiakui. Ataktushkam dukap etsa tegau ai nunisag we, tikich aents takamainun yajuak nunashkam ishiakui. ⁶ Dutika ataktú etsa shiig akagai yaaktanum weuwai, nunikmá aents wainak takatsuk batsamtatman wainak: ‘¿Wagka atumesh takatskesh etsash akapagme?’ tusa iniau. ⁷ Tusa iniinam: ‘Inak makichik aentskesh, nu takagtusta tusagkesh egapainatsui.’ Tiagtai: ‘Atumshakam dekas mina ajajuí takastajum, nuniakjumin atum takastatjum dutiksanuk akiktajime’, tusa ishiaku. ⁸ Nunik kiyagmatai, ni inake takatá diinun chichajak: ‘Weme ashí takau aidau untsukam ijumjam, takat nagkantanak wajai wayau aidaunum nagkamsam, akia akiakuam yama nagkamchak wayaunum inagnakta’, tiuwai. ⁹ Tusa tima takau aidaun untsuká kaunkamtai, inagnak wayau aidaun makichik tsawan takasbauwa dutiksag akikaju. ¹⁰ Dutikamtai yama nagkamchak wayau aidauk, jutiik aan dukapeap jukittaji tusag anentaimaidau, tujash ditanashkam makichik tsawan takasbaunak dutiksag akikajui. ¹¹ Dutikawajam, kashikmas nagkamas takasú aidauk ajagtinun senchi kajejkajui. ¹² Nunikag: ‘Jujú inagnamunum kaunawag makichik hora* takasagma nuninush, ¿wagka jutii dekas kashikmasa nagkamsa tuke takai takainakua etsa akapag jujai betekash akikume?’ tuidau. ¹³ Imatjuinam ajagtin ayaak: ‘Kumpag aidauh, wika tunatukesh akiatsjime. ¿Wi yama nagkamchakun makichik tsawan takagtustajum dutikawagmin akiktajime, tama ayú tichamkujum? ¹⁴ Juuwai atum takasbaugmin jumainaitjum duka. Pai, ju jukijum wetajum. Juna atumin amaag jutiksanuk inagnamunum takasaju aidaunashkam susatasan wakegajai. ¹⁵ ¿Wi mina kuichkig asamtai, wi wakegamun akikmamainchaukaitag? Wi pegkeg asan wait anenkagtakun ashí betekak akikmakui, kajeakjum tu yujagme’, tiuwai.

¹⁶ “Anmamtuk aents dekatkau atatus wakegaina nu ukunum juwakagtinai; untsu iman atan anentaimtumachu aina nu dekatkau agtinai.

* **20:12** Hora tawa juka tikich aidaunmash ashí jutiksaik ukuaji iina chichamenig tumainchau asamtai.

Kuashat aents untsukbau ainawai, tujash wajumchikeuchi etejamu aidauk.”

Kampatuma juna Jisus ni mantamnatnujin etsegkamu

(Mr. 10.32-34; Lc. 18.31-34)

¹⁷ Jisus niina jintintaiji doce aina nuna Jerusalén wegamunum jintaa ditanak chichajak:

¹⁸ —Yamai Jerusalén jegattag duwi, wi Apajuí Uchijiyaitkun Aentsmaga Akiinawaitag nunak achigkag sacerdote apuji, nuigtú chicham umiktinun jintinkagtin aidaunum ejetiagtatui maatnume tusag. ¹⁹ Dutijuawagmatai dita jujukag judiuchu aidaunum sutjukagtatui, pegkegchaun chichajuinak, dushí dushikinakua, asuttan asut awa awajtuinakua, achijag maatnume tusag, tujash dutijuawagmataish kampatum tsawanta juwi ataktú nantaktatjai, —tiu.

Zebedeo nuwe uchijinun pachis Jisusan segamú

(Mr. 10.35-45)

²⁰ Jisus nuna tusa wetatman Zebedeo nuwe, uchijí aidaujai jegantun tikishmatjau segatatus. ²¹ Dutikam Jisus ayaak:

—¿Wají atsumame? —tau.

Tama:

—Ame Apu wajasam inamjatnaitam duwi mina uchig jimaja ju, makichik amina untsugmia nuní eketjakum, tikichia au menagmia nuní eketjustin atá tajame, —tau.

²² Tutai Jisus ayaak:

—Amek mina segatam duka dekatsme.

Tusa nuwan idayak, nuna uchijin pempentusag:

—¿Atumesh mina waitkajus mantuawagtata dusha imanisjumkek waitmainaitjum? —tuinam

dita chichainak:

—Ehé, iishkam duka waitmainaitji, —tuidau.

²³ Tiagtai Jisus ditan chichajak:

—Dekas tajime: Wi waittsan jakattag imanisjumek waittsatin ainagme; tujash mina untsujuí, tikich mina menajuí ekeemsatin atajum tusanuk tumaitsujime. Nunak mina Apag ya aidau ekeemsatnujinak umigkauwaita nuna ekentsagtinai, —tiuwai.

²⁴ Nunú tabaun diez aina nu antukag, jimaja nuna yachijai senchi kajegkajui. ²⁵ Nuniagtai Jisus ditan untsuká:

—Atumek shiig dekagme, tikich nugka aina nuna apuji aidau judiuchu aina duka, aentsnak ditanua nunin emak inainawai. Untsu nunú apu aina nuna aentsji aidau, aents aina nuna dita wakegamun inau ainawai. ²⁶ Tujash atumek aajagmek dutikdaimain ainatsjume. Nunit-suk atum ainajum anuiyatijum eme anentai atasajum wakegautigmek, tikich aina nu takajin amainaitjume. ²⁷ Atum ainajum anuiya eme anentai atatus wakegawk, ashí tikich aidaun takajin amainai. ²⁸ Wi dekas Apajuí Uchijiyaitkun Aentsmagan Akiinawaitag nunak, atum aidautijum mina takagtustinme tusanuk taachuitjai. Wi dekas atumin takagkun mantamnan kuashat aents aidau pujutin uwemtijata tusan taamjai.

Jisus jimag aents wainmachu etsagagbau

(Mr. 10.46-52; Lc. 18.35-43)

²⁹ Jericonmaya jiinki wegagtai, aents aidau shiig kuashat Jisusan sae-tukajui. ³⁰ Nuniamunum jimag aents wainmachu jintá yantamchijin eketu, Jisu nagkaemawai tuinamun antukag senchi untsumkag:

—¡Apu David wegantu uchijiyah, jutiish wait anenkagtugta! —wajaidau.

³¹ Imatiagtai nui aents ijunaidau jiyaidau, itatkatnume tusag. Tujash ditak nuni senchi untsumkag:

—¡Apu David wegantu uchijiyah, jutiish wait anenkagtugta! —wajaidau.

³² Imatjam Jisus nui wajan untsuk ikaunman iniak:

—¿Utugtukti tusagma wakegagme? —tau.

³³ Tusá iniam dita aainak:

—Apuh, iik wainmaktasa wakegaji, —tuidau.

³⁴ Tiagtai Jisuschakam wait anentug ditá jiin antinkaju, dutikamuik wainmakag, ditashkam Jisusan nemagkaju.

21

Jisus Jerusalén apu wajasá wayamu

(Mr. 11.1-11; Lc. 19.28-40; Jn. 12.12-19)

¹ Jisus ni jintintaiji aidaujai yaakat Betfagé tutainum jegawaju Olivosan mujají najatamunum, Jerusalén tikiju awa nui, nunik ni jintintaijin jimajan awemauwai, ² dutikak:

—Wetajum au yaakat jegattak aents batsata awi, awi jegakmajum wainkattagme makichik burra* jigkam uchijijai wajau. Nunú atia jukim itagtuatajum. ³ Nu juwagmin, makichik aentskesh: ¿Wagka aikagme? tujamkujaish: ‘Apu atsubau asamtai juwajai, ajum awag-tugmaktatui’, tusa ukuktajum, —tiu.

⁴ Jujú junikua duka Apajuí etsegtin agak:

⁵ “Yaakat Siognum batsamin aidauwah, ‘diistajum atumin apujum imanchauch wajasá burro tsakatnum entsamas minitjamui,’” timawa nunú uminkauwai.

⁶ Tiajam ni jintintaiji aidaushkam wegag Jisus tibaunak imatiksag umikaju. ⁷ Dutikawag burran uchijijai jukiag itaantaju, dutikawag awantak nugkuagbaujin jukiag mai tuntupen aйтkagmatai Jisus ekeebiu. ⁸ Nunikmatai kuashat aents asag, Jisus wegamunmanini dita awantak nugkuagbaujin aitug emaidau, tikich aents aidau dukan tsupig jintanmag aitug emaidaush aidau. ⁹ Imatikainak aents eemak weedau, ukunum minidaushkam senchi untsumkag:

—¡Apu David wegantunum akiinau, Apajuí awemam mina jujú emematiagmi, jujuwai iina agkanmitkagmatnuk! ¡Nayaimpin-mayanash nigki agkanmitkattawai! —wajaidau.

¹⁰ Jisus Jerusalegnum wayamtai ashí aents aidauk pampaidau, nuninak:

—¿Jusha ya aentsuita? —tuidau.

¹¹ Tiagtai:

—Juka Jisusai, Apajuí etsegtin Galileanmaya, Nazaret pujuwe nuwui, —tuidau.

* **21:2** “Burra” tawa nunak versión Dios Habla Hoy (DHH) tawai, nuwiya jukimui antumain atí tusa. Tuja tikich versión Reina-Valeranmag (RV) nunak tayatak “asna” tawai.

Jega Apajuí ememattainum aents batsatun Jisus jügbau

(Mr. 11.15-19; Lc. 19.45-48; Jn. 2.13-22)

¹² Jisus jega Apajuí ememattainum wayaa, nui sujak batsatun sumau aidaujai ashí agaa jüjü, dutikak aents kuichki yapajiin aidau mesajinashkam shitaki akaketuk, paumá sujin aidau ekeemtaiji aidaunash dutiksag akaketkau, ¹³ dutika chichaak:

—Apajuí chichame agagbauwa nui: ‘Mina jegajuk Apajuí aujku ijuntaiyai tama atinai’ tawa nuniaig atum kasá batsamtaí emaugme, —tiu.

¹⁴ Nuna tusa ishiak wajai wainmachu, shutú aidaujai jega Apajuí ememattainum utsanawagmatai Jisuschakam etsagakui. ¹⁵ Tujash sacerdote apuji aidau, chicham umiktinun jintinkagtin aidaujai Jisus etsaegkagtamun wainkag, nuigtú uchi aidau jega Apajuí ememattainum batsamas untsumainak: “¡Apu David wegantunum akiinauwa nunú uwentikagtugtatus yamai mina jujú emematiagmi!”, awajuinamun antukag kajekag, ¹⁶ Jisusan chichajuinak:

—¿Antamek jujú imataina dusha?

Tama Jisus ayaak:

—Ehé, antajai. ¿Atumek ausachukaitjum: ‘Uchi tsakat aidau, muntsuaku aidaujai emematjutpainak kantanjutpawagtatuí’ tawa duka?

¹⁷ Nuna tusa ukuak yaakat Betanianum we nui kanajui.

Numi higuera tutai nejenchau Jisus yumigja maamu

(Mr. 11.12-14, 20-26)

¹⁸ Nunik tsawaag kashikmas yaaktanum waketak Jisus yapajau. ¹⁹ Nunikmá higuera jintá yantamchijin wajattaman wainak jegantau, tujash nejeg atsau ayatak dukak wajas atai, chichajak:

—¡Ameke ajumaish tuke nejekchatnaitme! —tamawaik kukajá wajasú. ²⁰ Nunikmatai niina jintintaiji aidauk puyatkag Jisusan iniinak:

—¿Wajukaya higueraish tabauwaikish kukajé? —tuidau.

²¹ Tiagtai Jisus ayaak:

—Dekas tajime: Atum Apajuiyai kajintsá anentaimsajum utujimtach utujimtsuk nuniktatuapi takugmek, imá ju higuera yake jutikmait-sugme, ju muja awa jushakam: ¡Juwi atsuk nayantsanum wajaata! tamak nunimainai. ²² Tuja atum Apajuí aukujum dekas sujustatuapita tusa segakjumek jukittagme, —tiuwai.

Sacerdote apuji aidau Jisusan iniasagbau

(Mr. 11.27-33; Lc. 20.1-8)

²³ Nuna tusa ukuak Jisus jega Apajuí ememattainum wayaa jintinkagtak wajai, sacerdote apuji tikich apu aidaujai tajuntag iniinak:

—¿Aminash ya jintinkagtuata tusash awetamae? ¿Yana chichamenia jusha juniame? —tuidau.

²⁴ Tama Jisus ayaak:

—Wishakam iniastajime, atum nu aigkagminig ujaktajime yana chichamenia jutikaja nuna. ²⁵ ¿Ya awemauwaita Juagnash yamijatjati tusash, Apajuik awemauwait atsa aents aidauk awemauwait? —tau.

Tama ditak pempeentunikiag chichainak: “Juagnak Apajuí awemauwai tajinish, ‘¿Tujash wagka dekaskeapi tichau ainagme tujamtata jama?’ ²⁶ Tuja aents aidau awemauwai tita takuiskam, aents aina nu

ishamaji, Juagkak Apajuí etsegtinai tuidau asagmatai.” ²⁷ Nuna tusag utujimag Jisusan chichajuinak:

—Dekatsji, —tuidau.

Tiagtai ni ayaak:

—Wisha tichattajime yana chichamenia jutikaja nunak, —tiu.

Aents jimag uchigtin pachisa tibau

²⁸ Jisus ditan iniak:

—¿Jusha atumesh wajuk anentaimtagme? Aents uchijí jimag ajujakuí, nunin makichik uchijiya nuna chichajak: ‘Uchuchih, uva ajakbauwa nui weme takastá’, tiuwai. ²⁹ Tama nu uchi chichaak: ‘Wika apawah wemaitsujai’ tiu ayatak awake anentaimag weuwai. ³⁰ Tuja tikich uchijiya nunashkam dutiksag tiuwai. Tama nu ayaak: ‘Ayú apawah, wetajai’, tusa tiu ayatak wechauwai. ³¹ Ju jimag uchi pachisa taji nuanuish, ¿tuuwa apají wakegamunash umigkauwaita? Tuinam dita aimainak:

—Dekatkauwa nuuwai, —tiaju.

Tiagtai Jisus ditan chichajak:

—Dekas tajime: Aents apú kuichkiji atinun yajumin aidau, nuigtú nuwa akiká takatai aina dushakam pujutjin yapajiawag, Apajuí inatjati tusag atumin nagkaetamsau imaninawai. ³² Atumek Juan dekaskea nuna jintinjamaingkish dekaskeapi tichaugme; tujash apú kuichkiji atinun yajumin aidau, nuwa akiká takatai aina dushakam dekaskeapi tusag tudaujinak idaisaje. Atumek nunidau wainiatkugmesh, pujutjum yapajiajum dekaskeapi tichaugme.

Takau pegkegchau aidaun pachis Jisus augmattsamu

(Mr. 12.1-12; Lc. 20.9-18)

³³ “Antuktajum ju augmatbaushkam: Aents ajajin uva ajakuí, dutika tanishig, uva yumiji ijutinnash umik, wajasá diistinnash torre tutain yakí jiikuí. Dutika wajumak aentsun: ‘Atum ju takastajum, dutikakjum minash sujustajum’, tusa susa ukuak, nigka tikich nugkanum atushat weuwai. ³⁴ Dutikau asa uva tsamat uminkau asamtai niina inake aidaun ishiakuí, aents nui takaak batsata nui jegawagmatai, uva neje susam jukiag itagtuatnume tusa. ³⁵ Dutikam inak jegawagmatai ajanum takaina nunú, achikag makichik ayatak suwimawajui, tikichnak maawajui, tikichnashkam aikasag kayai tukuí tukuinakua maawajui. ³⁶ Dutikawagmatai ataktushkam nuní kuashat ni inake aidaun ishitkauwai. Dutikamtai nunashkam dutiksajag maawajui.

³⁷ “Dutikawagmatai inagnamun niina uchuchijin: ‘Mina uchignak ajantusampap diimain ainawa’, tusa awemauwai. ³⁸ Tujash ajanum takaina nu uchi minittaman wainkag ditak pempeentunikiag: ‘Auwai ju aja juna jukitnuk, dekas maa ajapami, dutikaku juka iinu emami’, tuidau. ³⁹ Tusag achiká jukiag ajá ukumtikiag maawajui.

⁴⁰ “Atumesh wajuk anentaimjume, dekas ajagtina nunú minakush, ¿itugmainaita ajanum takaina nunash?”

⁴¹ Tutai dita aiinak:

—Aents pegkegchau aina nunak wait anentsuk kajeg utsaumainai, dutika tikich takau aidaun idaitumainai ajak uminkamtai juwiinakush, midau amaina nunak dutiksag sujin atinme tusa.

⁴² Tiagtai Jisus ditan iniak:

—¿Atumek ausachukaitjum Apajuí chichame agagbauwa nui:

'Aents jegá jegamin aidau kayá ajapawajua nunú, kaya dekas jegá ichichkatin apututia iman wajasé.

Nunak Apajuí dutikau asamtai jutii anentaig ejetumaitsui' tawa duka?

⁴³ "Nuaduí tajime: Apajuí atumin inapa nunak idayak tikich aentsun inagtinai, midau atin aidaunak dutiksag itagtuatnume tau asa. ⁴⁴ Aents nu kaya nui iyauk tsainkatnai, untsu kaya aentsnum iyaakug aentsnak tuke yuku ematnai."

⁴⁵ Nuna tusa augmattai antukag sacerdote apuji aidau, fariseo aidaujai: "Nunak jutiin tujamji", tuidau. ⁴⁶ Nuniau asag achikta tuidau; tujash aents aidaun ishamaidau: Jisusak Apajuí etsegtinai, tuidau asagmatai.

22

Aents nuweenak jistamatnujin pachis Jisus augmattsamu (Lc. 14.15-24)

¹ Jisus ataktú tikich augmatbaun pachis augmatak tau: ² "Apajuí jutii inapa duka apu ni uchiji nuwentai jistamjak yutain umikua nujai betekmantinai. ³ Ishiakui ni inake aidaun aents ipaamu aidau untsuktajum tusa, tujash ipak aidauk nuwenbaunum minitnak dakit-jajui. ⁴ Nu nunikagmatai ataktú tikich inake aidaun awemak: 'Ujaktajum ipak aidau dita yumainnak ashí umikjai, mina bakag aidaun, kuntin uduekbau aidaunashkam maatajum tijai. Ashí uminkae, ipak aidaushkam nuwenbaunum kaunkatnume, tusajum titajum.' ⁵ Timatai timae tusa ujainamash ipaamu aidauk antugtsuk ukuinak, makichik ajajin wegai, tikich wajiin sujak wegajui, ⁶ nuniai tikich aidauk, apú inake aidaun achikag suwi suwimainakua maawajui. ⁷ Dutikamun apu antuk kajeká suntaji aidaun ishitkauwai, dutikam wejiag aents magkagtuau aina nunak kajegká, ashí yaaktajinash apejuk ukugkajui. ⁸ Nuna dutikawagmatai tikich inake aidaun: 'Nuwenbaunum yuwatnuk ashí uminkae, tujash wi duwik ipaamu aidauk taachagtatui. ⁹ Nunin asamtai, yaaktanum jinta dekas nagkaematai aina nui wejum, ashí aents atum wainbauk ipaatajum, nuwenbaunum kaunatnume', tiuwai. ¹⁰ Tiajam inak aidaushkam shiyakag, ashí aents dita wainbaunak ipaawajui, aents pegkeg, pegkegchau aidaujai. Imatikamu asa jeganmag shiig piyakajui.

¹¹ "Imanikmatai apushkam wayau, ipak aidaun diistatus. Nunikmá wainkau makichik aents nuwenbaunum wegaku nugkutainak nugkutsuk wayaa eketun, ¹² nunik: 'Kumpajuh, ¿wajuk amesh juwish wayaume jaanch nuwenbaunum nugkurai nugkutskesh?' Tama duka aentsuk aimsuk eketu. ¹³ Nunittaman apu ni inake yujumkan mesanum pekaidaun chichajak: 'Juka dawenum, ashí uwejjai jigk-agjum jukijum agaa suwea awi ajuitajum, nui pujus senchi waitiak, buutak daik takegtú pujutí', tiuwai. ¹⁴ Kuashat aents untsukbau ainawai, tujash ujumchikiuchi etejamu aidauk."

Roma apujiya nuna kuichkiji pachisa Jisus iniasbau (Mr. 12.13-17; Lc. 20.20-26)

¹⁵ Nuna Jisus timatai fariseo aidaushkam jünjag ijunjaju, makichik aents Jisusan iniasti, tamash wajintig timatai tsanumjugmi tusag chichainak. ¹⁶ Nunikag nui chichaman umikag ditá aentsji aidaun,

Herodesan aentsji aidaujui ishiakajui. Dutikawajam ditashkam Jisusan jegajag:

—Jintinkagtinuh, jutiik dekainaji ame dekaskea duke chichau asam, Apajui jinti dekaskea duke jintinkagtam duka. Amek aentsú niimé diigsam shiig awajkatasamkesh chichatsme. ¹⁷ Nuniau asaamin tajaame, ¿amesh wajuk anentaime, Roma apujiya nuna kuichkiji atinush sumainashit, atsa sumaitsuak? —tuidau.

¹⁸ Tiagtai Jisusak dita pegkegchau anentaibaujinak shiig dekaju asa:

—¿Tsanujatin aidauwah, wagka tsanujá dekapjustasagmesh wakejudgetagme? ¹⁹ Iwaintugkakjua kuichik wajukuwa apush suwagme, —tama makichik kuichkin ejentuntaju.

²⁰ Dutikam nuna wainak:

—¿Yana niimé dakumkaya daajish agagbauwaita? —tusa iniidau.

²¹ Tama dita ainak:

—Anka Roma apuji dakumkamui.

Tiagtai:

—Roma apujinua duka nigki susatajum, Apajuinua dushakam Apajuik susatajum, —tiuwai.

²² Aaja tiajam anentai jegagchaju, nunikag waketuinak ukukiaju.

Jakau nantagtin pachisa iniimsamu

(Mr. 12.18-27; Lc. 20.27-40)

²³ Nunú tsawantaik saduceo aidaushkam Jisusan wejiaju, ditak aents jakau aina duka nantagchatnai tinu asag Jisusan iniinak:

²⁴ —Jintinkagtinuh, Moisés chichaak: ‘Aents nuwan juki uchin akiitsuk jakamtaig, ni yachintin nuwan juki uchin akiimainai, dutika yachi uchijiya nunin emamainai’, tiuwai. ²⁵ Tuja nuniamunum, iina patayí siete yachigbau aayi. Nuanuiya nagkamchak iwai nuwenauwai, nunik dukap pujutsuk uchinash akiitsuk jaak nuwanak yachin ukugkiuwai. ²⁶ Nunikmatai tikich yachi jukishkam uchinak akiitsuk jakauwai, tuja kempatuma nu jukish nunisag jakauwai, nuni nuninakua siete aajakajua duka ashí jinawajui. ²⁷ Nu ashí jinawagmatai pujus nuwashkam jakauwai. ²⁸ Siete aajakajua duka ashí nunak nuwatjaju aina duwish ¿yana nuweg atinaita atak jakau nantainamunmash? —tuidau.

²⁹ Tama Jisus ayaak:

—Atumek Apajui chichamen tawa dusha dekachu, niina senchijiya dushakam wainkachu ainajum nuaduí dewakugme. ³⁰ Atak nantajagtin aina duwik makichkish nuwenachagtinai. Apajui aentsji nayaimpinmaya aina nuninuk agtinai. ³¹ Tujash jakau nantajagtinun pachis Apajui tibau ni chichamen agagbaunum:

³² “ ‘¿Witjai Abraham, Isaac, Jacob aina nuna Apajuijinuk’ tawa duka ausachukaitjum? ¡Apajuik jakau aidaun Apajuijinchui, iwaaku aina nuna Apajuijiyai!”

³³ Nuna aatus Jisus jintinkagtua ashimkamtai, aents aidauk anentai jegagchaju.

Chicham dekas puyatjusa umiktin

(Mr. 12.28-34)

³⁴ Jisus saduceo aidaun itatmitkakbaun antukag, fariseo aidaushkam ijunjaju. ³⁵ Nunikbaunum nuwiya makichik, chicham umiktajum

tibauwa nuna jintinkagtin, wi Jisusan iniastajai wajintig, tusa jegan-tun:

³⁶ —Jintinkagtinuh ¿chicham umiktin aina nuwiya dekas puyatjusa umimainush tuwaita? —tau.

³⁷ Tama Jisus ayaak:

—‘Amina Apujum Apajuiya nu imá senchi aneeta, nuniakum Apa-juinu pegkeg aina duke dekaata, imá niinig anentainsam pujustá’ tawai. ³⁸ Juuwai dekatkau umimainuk, juuwai chicham umiktina nuwiyen nagkaesauk. ³⁹ Untsu tikich jujai betekmamtina duka: ‘Amijai ijutkau aidaushkam amek anenmamsam aneeta’, tawai. ⁴⁰ Ju jimag chicham umiktajum timawa juuwai Moisés nuigtú Apajuí etsegtin aidau jintinkagtujakú aina duka, —tiuwai.

Kristush yaá wegantukita tibau

(Mr. 12.35-37; Lc. 20.41-44)

⁴¹ Fariseo aidau ijunjamutak batsataig Jisus iniasu:

⁴² —¿Atumesh wajuk anentaimjume, Kristush ya wegantuuta?

Tuinam dita aiinak:

—Kristuk David wegantui, —tuidau.

⁴³ Tiagtai:

—Nuniaish ¿wajuk asamtaiya Davitash Wakaní Pegkeji chichamtik-mash Kristunash Apú tawa? ⁴⁴ Tau asa:

‘Apu mina Apujun chichajak: Ekeemsata mina untsujuí, nunikamin wi amina shiwajum aidaunak aminí ikaunmakmatai duwi ame diisminum’, —tiuwai.

⁴⁵ —David, Kristun Apug tujakua nuniaish, ¿wajuk asaya David wegantush amainaita? —tau.

⁴⁶ Nuna tutai aimainchau dekapedau asag, makichik aentskesh iniaschajui. Nui nagkamsag ataktuk iniaschaju.

23

Jisus fariseo aidaun chicham umiktinun jintinkagtin aidaujai pegkegchauji pachisa tibau

(Mr. 12.38-40; Lc. 11.37-54; 20.45-47)

¹ Nunikagmatai Jisus aents aidaun, niina jintintaiji aidaujai ² chichajak: “Chicham umiktinun jintinkagtin aidauk, fariseo aidaujaig Moisés chicham umiktinun jintinkagtujakua nuna jintinkagtuinawai.

³ Nuniau asamtai, ashí dita dutikatajum tujamaina duka imatiksagmek umiktajum, tujash ju umimainai tuinayatak pegkegchau takaina duka atumek takasaigpajum. ⁴ Ditak chicham umiktin kakajus umimain-chauwa ibaunak tikich aents aidaunak, jujú umiktajum awajuinawai, tujash ditakesh umiinatsui. Ditak, iik kijin jumainchauwaitku ti-kich ayanka, machikish yaitsuk idaimaina numamtuk wajainawai.

⁵ Dita takaina nunak, ashí tikich aents aidaush, minak eme anenjús diigtinme tusag aaninawai, nuninak nijayinish sentan wegkagman jukiag, chicham umiktajum tibau aidaun agak, kuntujinish dutiksag jigkamá yujainawai. Aantsag nugkuagbauji weniya nuwish sasamjuk detujag nugkujag yujainawai. ⁶ Jistatin yuwinamunmash, dekas apú ekeemtai shiig iwajamu aina imanun etegkawag ekeemsagtatus wakegainawai. Jega ijuntainum wainakush ekeemtai pegkegnun

ekeemsagtatus wakegainawai. ⁷ Nunidau asag, aents kuashat aya-
munum igkuntuinakush puyatjutus kumpamjuinak: 'Jintinkagtinú'
tujuttinme tusag wakegainawai.

⁸ "Tujash atumek: 'Jintinkagtinú' tujuttinme tusagmek wakeemait-
sugme, ashí atum aidautigmek yatsut asajum, 'yatsujú' tudaimain
ainagme, imá makichki atumí jintinjamnuk. ⁹ Atum aidautigmek ju
nugka juwiyag: 'Apawá' tumainuk atsawai, imá makichik: Apawá
tumainuk Apajuí nayaimpinum puja nunuwai. ¹⁰ 'Jintinkagtinú'
tama atasagmekesh wakejigpajum, Kristua auke: Jintinkagtinú tama
amainuk. ¹¹ Atum ainajum anuiya dekas iman atatus wakegauk
tikichin umigmainai. ¹² Ni nigki eme anenmamuk wainak juwaktinai;
untsu aents eme anenmamchauwa nunú dekas wagaakuk atinai.

¹³ "¡Chicham umiktinun jintinkagtin aidautigminak, fariseo
aidautigmijai wait anentajime, waitjuidau asagmin! Atumek aents
Apajuí nemagkata tuinaig shiig jintinchau asajum, waiti epetmaina
numamtuk awagmajum duwi. Tujash atumkesh uwemainnum
pujatsjume, nuniau asajum tikich aidau uwemjati tusagmesh
idaitsugme. ¹⁴ ¡Atum chicham umiktinun jintinkagtin aidautigminak,
fariseo aidautigmijai wait anentajime, waitjuidau asagmin! Atumek
nuwa waje jee atankijum, aents aidau: Pegkegnap takainawa,
tujuttinme tusajum Apajuí au aujuinakuajum ukú yujau ainagme,
nunin asajum imá senchi suwimak jukitin ainagme.

¹⁵ "¡Chicham umiktinun jintinkagtin aidautigminak, fariseo
aidautigmijai wait anentajime, tsanumin asagmin! Atumek aents
aidau atumi nunitajum jintintuajum atumea nuninuk ematasajum,
kukag yujasjum, nayantsanum wejigmesh egaa yujau ainagme,
dutika unuinagjum atumi nagkaetamas jii ajumaish kajinkashtinum
suwinkan juwak waitmain emá idayin ainagme.

¹⁶ "¡Atumek aents wainmachuitak jintan inakmastatus wajukmaina
numamtuk wajau asagmin wait anentajime! 'Jega Apajuí ememattaiya
nuna adayas aents ni dutikatnujin umiktatjai tauk wainkayai' tajume;
'tujash aents ni dutikatnujin pachis, jega Apajuí emematainum oro
awa nuna adayas tauk dekas imatiksag umimainai', tinu asagmin.
¹⁷ ¡Anentainkachu, wainmachu aidauwah! ¿Dekas imanush tuwaita
orokaih, nuniachkush jega Apajuí ememattai oron pegkeemtika
duchaukaih? ¹⁸ Atumek: 'Altaran adayas ni dutikatnujin umiktatjai
tauk, wainkayai' tajume; 'untsu Apajuí anentag suwamu altarnum
patatun adayas tauk, dekas imatiksag umimainai' tinu ainagme.
¹⁹ ¡Anentainkachu, wainmachu aidauwah! ¿Tuwiya dekas imanush,
Apajuinu atin kuntin anentag itaamua dukaih, atsa altar nunú itaamun
pegkeemtika duchaukaih? ²⁰ Aents ni dutikatnujin pachis altaran
adayas tauk, ashí altarnum patatujaí taku tawai. ²¹ Tuja jega Apajuí
ememattaiya nuna pachis taushkam imá jeganak takug tatsui, Apajuí
nui puja nujai taku tawai. ²² Aantsag aents nayaimpin pachis
taushkam imá nayaimpinakek tutsuk, ashí Apajuí pujamujiya nunash
taku tawai.

²³ "¡Chicham umiktinun jintinkagtin aidautigminak, fariseo
aidautigmijai wait anentajime, waitjuidau asagmin! Atumek ajak

menta, anís,* comino aatsajum puyatjusjum diezmó† wajagme. Ju dutikayatkujum chicham umiktina nuwiya pegkeg takata nuna, wait anenkagtutan, Apajuí umigtan jintinkagta duka umiatsjume. Tujash ju aina jujú umiakjumes, nuigtú tikich umiktin aina dushakam umitskek idaimain ainatsjume. ²⁴ ¡Atumek aents wainmachuitak jintan inakmastatus wajukmaina numamtuk wajagme tikich jintinkujum; atumek uwagtinjumin wiyunch egkemamtai kujajaig tusa jiiki ajapeayatjukum, dekas wenunmash camello waimainchauwa imanun kujamaina numamtuk wajagme!

²⁵ “¡Chicham umiktinun jintinkagtin aidautigminak, fariseo aidautigmijai wait anentajime, tsanumin asagmin! Atumek shikiká umutai, nuigtú plato aina nuna awanke nijamaina numamtuk wajagme. Tujash atumi anentaiminig kasamtaijum, pegkegchau takamtaijum aidau piyak ajutjamainawai. ²⁶ ¡Fariseo wainmachu aidauwah! Dekatkauk shikiká umutai, nuigtú plato aina nuna initkega nuuwá dijagta, dutikam awankeshkam tsuwatichau atatuí.

²⁷ “¡Chicham umiktinun jintinkagtin aidautigminak, fariseo aidautigmijai wait anentajime, waitjuidau asagmin! Aents ukusbau awanke pujuí ukatkamu asa pegkeg wajas au, ujaká diyaam kaujú niina ukunchí aidaujai tsuumain wajas aama imanaitjume. ²⁸ Atumshakam dekaskenmag nunisjumek aents aidau emtinig pegkeja iman iwainmamjume; tujash initkagminig tsanumtaijum, pegkegchaujum aidau piyak ajutjamainawai.

²⁹ “¡Chicham umiktinun jintinkagtin aidautigminak, fariseo aidautigmijai wait anentajime, waitjuidau asagmin! Atumek Apajuí etsegtin aajakú aidau ukusbauji aina nunú iwagjume, dutikakjum aents pegkeg aidau kajegbauwa nunú dakumká najanajum shiig iwajajum ekenjume, ³⁰ dutika chichaakjum: Ii muunji batsamajakua nunú tsawantin jutiish pujujakuitkuik, Apajuí etsegtin aajakú aidauk maawaigpajum tusais ayamjumain ajabiagtai, tajume. ³¹ Ju tau asajum, Apajuí etsegtin aajakú aidau kajegkú aina nuninuk atumesh iwainmamjume. ³² ¡Atumin muunjum nagkamamua duka atumshakam dutiksagmek emajume!

³³ “¡Atumek iwanchi uchijí asajum aents tsanú yujagjum ibautigmes! ¿wajuk uwemtugta tajume, Apajuí suwimkan sujamak jii ajumaish kajinkashtina nui chimpipatta duwish?

³⁴ “Nunin asamtai wi awetittajime Apajuí etsegtuktin aidau, aents yacha aidauwash, jintinkagtuatin aidauwashkam. Tujash atum nunú aina nuwiya achigjum maattagme, dutikakjum tikich aina duka juga atumi ijuntaijum aina nui awayajum asutiattagme, dutikakjum yaaktanum wekaetusjum waitká yujagtin ainagme. ³⁵ Aaja nuniau asagmin, aents pegkeg aidau ju nugka juwi kajegkú ainajum duwi, Abel maamua nui nagkamas, Apajuí etsegtin Zacarías Berequiasa uchijí, juga Apajuí ememattainum pujau, altara ejapeen mau ainajum duwi suwimkak suwam atatjume. ³⁶ Dekas tajime: Nunú suwimkak ashí atum ainajum anutijum jukitnaitjume.

* 23:23 Anís tawa duka Dios Habla Hoy (DHH) tawa nuwiya jukimui. Untsu Reina-Valera takug: Eneldo tawai. † 23:23 “Diezmo” tawa nunak, dieza nuwiya makichik Apajuinu atin akanbauwa nuna tawai.

Jisus Jerusalegnumia aents aidau egaagbau

(Lc. 13.34-35)

³⁷ “¡Jerusalegnumia aidauwah, atumek Apajuí etsegtin aidaush main ainagme, nuigtushkam Apajuí chichagkagtukti tusa awetug-magmataish, kayai tukuí tukuinakuajum main ainagme! ¡Wika shiig kuashat wakeesan, atash uchuchiji aidaun nanapen awayag ijumag kuitamama numamtuk, atumnash ijumjan kuitamkata tamash atumek dakitjamugme! ³⁸ Nuniku asagmin jujú atum batsatjum juka ukumkimu, aents pujugsachbau agkan agtatui. ³⁹ Nunin asamtai tajime: Yamai nagkamsagmek ataktuk waitkashtatjume, nuniautijum wi minakui: ‘Apajuí awemam mina ju emematiagmi!’ tujuttinaitjum duwi waitkatin ainagme.”

24

Jega Apajuí ememattai tsayam atinai tusa Jisus etsegkamu

(Mr. 13.1-2; Lc. 21.5-6)

¹ Jisus jega Apajuí ememattainmaya jiinki wetai, niina jintintaiji aidau amainagkag nu jegamkamun inaktuinak awaantaju. ² Dutikam Jisus chichaak:

—¿Ju ashí imag ekenjá jegamkamua ju wainjumek? Dekas tajime: Makichik kayakesh ekenjamu aina nuwiyag juwakchatnai, ashí tsaikbau atinai, —tau.

Nugka nagkantsaig wantinkagtin aidau pachisa etsegkamu

(Mr. 13.3-23; Lc. 21.7-24; 17.22-24)

³ Jisus Olivosa mujajin waka ekeemsamtai, niina jintintaiji aidau jegaantag niinak iniinak:

—¿Nunash wajutik dutikawagtin ainawa? ame taattaku wajataish, tuja nugka nagkanbau jegattak wajataish waji wantiniagtinaita, nunú ujjatkata, —tuidau.

⁴ Tiagtai Jisus ditan ayaak:

—Kuitamamkatajum, makichkish tsanugmajainum. ⁵ Wagki kuashat aents aidau mina daajun adaimasag midiagtinaia nuninak: ‘Witjai Kristunuk’ tusa kuashat aentsun tsanuagtinaia. ⁶ Maaninawai tuinamu antitnaitjume, nuigtú maaniawagtasa pampandayamushkam, imaniakuish puyatkaigpajum. Duka aatus nagkaemaktinaia tujash nu achatnai nagkanbauk. ⁷ Nugka muunnum batsamin aidaushkam mai imannumiajaig maadiagtinaia, tuja nugka yaignum batsamin aidaushkam, tikich nuninnum batsatujai maadiagtinaia. Jata waamak aentsun nagkaematug ijinbaush atinaia, yapagdash tepeatnai, ugtanash kuashat nugkanum ugtinaia. ⁸ Tujash jujú aina juka waitut yamá nagkannak imanitnai.

⁹ “Ju nuniamunum atumnashkam achigmakag jujamkiag wai waitk-agmainakua mantamawagtinai. Atum mina nemagtin aidautigminak ashí aents aidau kajegtabiagtinaia. ¹⁰ Nu tsawantai kuashat aents minai dekaskeapi tusa anentaimaidaush idaisagtinaia, nuninak kajegdayagtinaia; imanidau asag pempé pempeentunikiag achinidiagtinaia. ¹¹ Kuashat aents Apajuí chichame etsejji tusa tsanumaidaush wantinjatnai, nuninak kuashat aentsun tsanuagtinaia. ¹² Kuashat pegkeghchau aitnai, imaniau asamtai kuashat aents Apajuí aneamujinak mijakagtinaia. ¹³ Tujash ni mina nemagtukbaunak nunisag

pujusá nagkanbaunum jegaa nu uwemjatnai, nunik ajumaish pujut nagkanchauwa nui pujustinai. ¹⁴ Apajuí inamjatin yamajam chicham pachisa etsegbauwa juka, ashí nugkanum etseggamu atinai, ashí aents aidau dekaatnume tabau asamtai. Nunikmatai nagkanbauk atinai.

¹⁵ “Apajuí etsegtin Daniel aajakua nu, Apajuí dakitmainun shiig pegkegchau dutikawagtinun pachis agajui, (nuna aujuk dekaatnume): Jega Apajuí ememattai pegkegma nui aents utsanainak, dita apajim-taiji dakumkamun tikima pegkegchaun awayawagtinai tawa nuna dutikaidau wainkugmek, ¹⁶ atum Judea batsatutigmek mujanum pisagtajum. ¹⁷ Tuja jega jegamká tuntupé paka inagnakbaunum waka pujaushkam akaikig wajiijinak jukiigka. ¹⁸ Aantsag ajanum takaak pujaushkam, pataká nuggugtinnun jukitjai tusag waketyukigka; ¹⁹ ¡Tujash nunú tsawantin nuwa ejamtin, nuigtú uchí amuntsuaku agtina nunak wait anentuinajai! ²⁰ Apajuí ausatajum, atum pisamua nu tsetsek tepeamunum, nuniachkush tsawan ayamtai aigkish ajutamunum. ²¹ Apajuí nugká najanauwa nui nagkamas yamaya juwish imanika waitchatain, atakea duwish imanika waittsashtin tikima senchi waitiamu atinai. ²² Nu imanika waitiamun Apajuí imiitsuk idaitaik, makichik aentskesh uwemainchau ainawai, tujash Apajuí ni aentsji agtinun etegjauwa nuna wait anentau asa, waitut ayatak wegaunak imijkatnai.

²³ “Tuja makichik aentskesh: ‘Juwi Kristu pujawai diistajum’, tachakush: ‘Awi pujume’, awajtamainakuish dekaskeapi tiigpajum. ²⁴ Kuashat aents: ‘Kristuitjai’ tusag tsanumiagtinnai, aantsag: ‘Apajuí chichame etsejin ainaji’ tusag tsanumaidaush agtinai. Nuninak aents dutikmainchau aidaun iwainainak tsanuagtinnai, dutikaidau asag Apajuí etegkamu aidaunash dita tsanuamunak tsanujagtinnai. ²⁵ Junak yaunchkesh timajime. ²⁶ Nu aaja tibau asajum: ‘Kristuk uwegshunum pujawai diistajum’ tujamainakuish wejumek diisaigpajum. Nuna tujamchakjash: ‘Diistajum ju jega tesamua juwi pujawai’ tujamainakuish dekaskeapi tiigpajum. ²⁷ Wi Apajuí Uchijiyaitkun Aentsmaga Akiinawaitag nuna minaknuk, peem etsá minitia nuwiya peeti, etsá akaetaiya atú peemama numamtuk wajaktinaitjai. ²⁸ Tuwí jakau tepettawa nuna chuwagkak tuwakagtinnai.

Apajuí Uchijí Aentsmaga Akiinauwa nu minitnuji tibau

(Mr. 13.24-37; Lc. 21.37)

²⁹ “Nunú waitut nagkaemaig etsag suwe wajastinnai, nantushkam etsanjashtinnai, nayaimpinmaya yaya punjau aidaushkam nugkanum kakeyagtinnai, imanidau asagmatai nayaimpinmaya machikish umush-mainchau aidaush buchitjatnai. ³⁰ Nunú imaniai wi Apajuí Uchijiyaitkun Aentsmaga Akiinawaitag nuna, nayaimpinmayan ashí mina senchigjai tsawan wajasá minamujun waitkag, ashí aents nugkanmaya aidauk ishamjukag buutiagtinnai. ³¹ Wi mina aentsug nayaimpinmaya aidaun ishiaktinaitjai, ashí mina aentsug etejamu aidau nugka nagkatkamunum batsatun, umputai trompetan senchi umpuntug iijumjatnume tusan.

³² “Numi higuera pachisan augmattsan titatjim nu anentaimtus-tajum. Atumek: ‘Higuera duke betenkakuig wamkeap esat nagkam-nattawa’, tusajum dekau ainagme. ³³ Nunisjumek atumshakam, ashí wi tajim nunú imanisag uminag wegau wainkugmek, yamaik Apajuí

Uchijí Aentsmaga Akiinawuwa nu taatnuk ashí jegaegapi titin atajum. ³⁴ Dekas tajime: Wi Jerusalegkan pachisan ashí tajim duka yamai aents batsatina jusha ashí jinuinatsaig uminkatnai. ³⁵ Nayaimpik nugkajaig megkaejatnai, tujash mina chichamjuk umintsukek juwakchatnai.

³⁶ “Tujash wají tsawantinig, wají horatinig taatnaitja nunak makichkish dekainatsui, nayaimpinmaya aents aidaukesh dekainatsui, imá mina Apajuk dekawai.

³⁷ “Wi Apajuí Uchijiyaitkun Aentsmagan Akiinawuwaitag nuna minitakun wajataik, Noé pujai wajukejutú aina numamtuk wajagtinaí.

³⁸ Nunú tsawantaik eke nujag ashí nugkan amuatsaig batsamsag, yutai yuwinak, umutnash umuinak, nuwenainak, nawanjin suju wajaí batsatai, Noé niina arcajin egkemauwai. ³⁹ Nunikmataish pachitsuk tuke imaní batsatainai, nujag ashí nugkan amuak ashí aentsnak tajak utsagkui. Numamtuk aents pachiakats pujuinai, wi Apajuí Uchijiyaitkun Aentsmagan Akiinawuwaitag junak taatnaitjai. ⁴⁰ Junashkam tajime: Jimag aents ikam wegakuk makichik juwaku, tikichik ukuam atinai. ⁴¹ Jimag nuwa shaa dekeenak pujuidaushkam makichik juwaku, tikichik ukuam atinai.

⁴² “Atumek aneaku pujustajum, wají tsawantinig atumí Apugmish minitnaita duka dekachu asajum. ⁴³ Ju anentaimtusjum diistajum, aents jeentin kasa kasagkatasa utuam atinjin dekakug, kanutsuk iwá pujauk, jeenig utuam amaitsui. ⁴⁴ Numamtuk atumshakam aneaku pujustajum. Wi Apajuí Uchijiyaitkun Aentsmagan Akiinawuwaitag nunak tsawan imatika anentaimtachbau ai minitnaitjai.

*Inak pegkegchau, pegkegjai pachisa augmatbau
(Lc. 12.41-48)*

⁴⁵ “¿Yaita inak apuji tibaunak imatiksag umin, shiig anentaimkau asamtai, apuji kajitus niina jeen batsatun yutain diyaku susati tibauwa nuninush? ⁴⁶ Nunú inak apuji inaja ukukbau ashí ni tibaunak betek umiká pujakug, apuji minitaish shiig aneemainai. ⁴⁷ Dekas tajime: Nunú inak imanis umiaunak apujishkam: ‘Ashí mina ajutuina duka ame kuitamjutin atá’, tusa idaitumainai. ⁴⁸ Untsu inak pegkegchau asa: ‘Mina apujuk waamak taashtatui’, tusa anentaimas ⁴⁹ niina apuji inake aidau senchi suwimak, nigka shiig yuwak, nuigtushkam nampen aidaujai umak wekagai, ⁵⁰ apuji tsawan dekachmau ai pachiachmau takamá wainak, ⁵¹ senchi suwimkan susa, tikich aents wait aidaujai betek waittsati tusa idaimainai. Dutikam nui pujus senchi buutak daik takegtú pujumainai.

25

Diez nuwa muntsujut aidau pachis Jisus augmattsamu

¹ “Apajuí aentsnum inama duka, diez nuwa muntsujut lámpara jukiag nuweenun uyuntsagtatus wejiajua nujai betekmamtin atinai. ² Cinco nuwa aina nunú shiig anentaimsag umintsajui; nuninai tikich nuwa cinco aina duka anentaimtugchajui nunak, ³ nunidau asag lamparajin yajamainnak aceitenak jukichaju ainawai. ⁴ Untsu nuwa shiig anentaimas umintsaju aina duka, lamparajin juinakush botellanum aceiten aimak jukiajuí. ⁵ Nuwenatna nu tachatai, dakai dakainakua kaji pujajuinam ashí kajigkajui. ⁶ Nunik kajigkag batsatai aehaet

ai antukajui: ‘¡Nuwenatta duka minawai, jijnajum igkugtajum!’ tusa untsumjamun. ⁷ Tutai nunú nuwauch aidaushkam lamparajin ekemaktasag umiidau. ⁸ Nuniamunum nuwa nuna anentaimtugchaju aidauk, pachiakats pujuidau asag, tikich nuwa shiig anentaimas uminkaju aina nuna: ‘Minash aceitijum machik yajatjuata, jutii lamparajig kajinainawai’, tuidau. ⁹ Tama dita aiinak: ‘Dekas aceite sujutainum wejum sumaktajum, akantunisa jukimak ajutá abuekash-tatui’, tiaju. ¹⁰ Tiajam aceiten sumaktatus weenai, ukunum aents nuwenushkam tau, nunikmatai nuwa umintsag daká batsataidauk, nuwenku jistabaunum utsanawaju, nunikmatai waitin epediuiwai. ¹¹ Nuniku ai nuwa aceiten sumainak wegajushkam kaungag: ‘¡Apu waiti ujatjikia! ¡Apu waiti ujatjikia!’ wajauidau. ¹² Imatjam ni ayaak: ‘Wika atumnak wainchaujime, atumesh yatsu ainajum’,” tiuwai.

¹³ Jisus nuna tusa:

—Nuaduí atumek aneaku batsamtajum. Wi Apajuí Uchijiyaitkun Aentsmagan Akiinaun taatnaitag duka tsawantak, nuigtú horash wajuakeag taatnaitja dushakam dekatsjume, —tiuwai.

*Apu ni inake aidaun kuichik tinamí ukukbau pachisa augmatbau
(Lc. 19.11-27)*

¹⁴ “Apajuí aentsnum inama duka, aents wiyakuch tikich nugkanum wetatak pujus, ni inake aidaun untsuká ikaunman kuichkin tinamkauwa nujai betekmamtinai. ¹⁵ Makichik inaken cinco mil kuichkin susauwai, tikichin dos mil, kempatuma juna mil susauwai. Junak makí makichik dita takamainjin diijus tinamkauwai. Dutika ukuak tikich nugkanum weuwei. ¹⁶ Inak cinco mil kuichkin jukiuk, wajiin sumag sujak nuigtushkam imatiksag cinco mil kuichkin ikaugkauwai. ¹⁷ Tuja dos mil kuichkin jukiushkam, niishkam dutiksag dos mil kuichkin ikaugkauwai. ¹⁸ Untsu inak mil kuichkin jukiuk, nugkan tai yutua idaisauwai ni apuji kuichkijinak.

¹⁹ “Kuashat tsawan nagkaemakiu ai, apushkam ni inake batsabaunum wakitki tauwai. Nunik, wajupak kuichkinash ikaugkaje tusa dekajuawagtatus nagkamau, ²⁰ nuniai deatkau cinco mil kuichik susamua nu, nuigtú cinco mil juki ejentun chichajak: ‘Apuh, cinco mil kuichik sujusmayum nunak juwi itajuajame, nunú kuichkia nuna takamtiksan, nuigtú cinco mil kuichkin ikaugkamua nunashkam itajuajame’, tau. ²¹ Tama apuji chichajak: ‘Ayú, amek inak pegkeg, nuigtush chicham uminaitme. Machik susamuitkum imatikam ikaugkaume, yamaik aan kuashat amastajame. Mina jegajuí wayaata, nunikamin iijai dakujusmi.’ ²² Tusa inagnaig, tikich dos mil kuichkin jukiuiwa nu jegantun chichajak: ‘Apuh, minak dos mil kuichik sujusmayume nunak juwi itajuajame, juna takamtiksan nuigtú dos mil kuichik ikaugkamua nunashkam itajuajame’, tau. ²³ Tama apuji chichajak: ‘Ayú, amek inak pegkeg, nuigtush chicham uminaitme. Machik susamuitkum, imatikam ikaugkaume, yamaik aan kuashat amastajame. Mina jegajuí wayaata, nunikamin iijai dakujusmi’, tiu.

²⁴ “Nuniai tikich mil kuichkin jukiuiwa dushakam jegantun chichajak: ‘Apuh, wika ame waitkagkagtinaitme nuna dekajame. Amek ajak ame ajakmachbau aig juukam yajumnaitme aminuchu aig, ²⁵ nunin asamin amina ishamakun kuichkigminak nugká tain yutuan

idaisabaijai, dutikamun yamai juwi itajuajame, ju jukita', tau. ²⁶ Tutai apuji ayaak: 'Amek inak pegkegchau, dakitme. Wi ajakmachiakun juukan yajumin dekajiatkumesh, ²⁷ ¿wagka kuichik kawegti tusa egketainum takau aidau susachmayume? Dutikauwaitkuminig wi taakun midau kawegkun jumain awajkajai. ²⁸ Aanú kuichik atankijum, diez mil kuichik aja nu susatajum, ²⁹ wagki aents kuashat ajamuk nuní dukap suwam atinai, dutikamu asa nuní kuashat ajitnai; untsu piipich aja duka, nu piipich ajamua duke atantam atinai. ³⁰ Ju inakak atumnatsui, jukijum agaa suwea awi jiktajum, nui pujusá buutak daik takegtú pujutnujiya nuanuí', tiuwai.

Atak nagkanbaunum aents pegkeg, pegkegchau aidaujai akanbau atin

³¹ "Wi Apajuí Uchijiyaitkun Aentsmagan Akiinawwaitag nuna, mina senchigjai nayaimpinmaya aents aidaujai minaknuk, wi ekeemsa in-amjatin tsawan wajas abaunum ekeemsaatnaitjai. ³² Nunikmatai mina emtijui, ashí aents nugkanum batsataidauk tuwakagtinai. Imanikagmatai aents uwijá kuitamin, uwigjin chiwujai akanama numamtuk máki makichik akanjatnaitjai, ³³ midau aidau untsugnum ijumkun, aents pegkegchau aidau nak menanum ijumjatnaitjai. ³⁴ Dutikan wi Apu asan mina untsujuí ijumjamun chichagkun: 'Minitajum atum mina Apag pegkeemtikbau aidautigmek, nunikjum atum pu-justinun Apajuí nugkash najannatsaig umikbauwa nui wayaatajum. ³⁵ Atumek wi yapajakuish ajamjusbaijume, kitabiajai nuniakuish umutaig sujusbaijume, jeenchau wekagaish, atumi jeemin awaintuabiugme. ³⁶ Nugkumain atsugtakuish atum sujusbaijume; jaakun tepakuishkam taajum ijagtusbaijume; achigkagmatai egketaish waitkatasajum tajutbaijume', titinaitjai. ³⁷ Nuna aatsa tai aents pegkejan takasú aidau: 'Apuh, ¿wajutiya ame yapajú wekaeminish ayujabaijame? ¿Wajutiya kitamá wekaeminish umutaish amasbaiji? ³⁸ ¿Wajutiya jeenchau wekaeminish iina jeenish awayabaijame, tuja nugkumain atsugtamuish, wajutiya jaanchish amasbaiji? ³⁹ ¿Iish wajutiya ame achinká pujaminish tajuawabaijame? ¿Wajutiya ame jaakum tepaminish taawabaiji?' tujuttinaitjume. ⁴⁰ Tujutkugmin wi ayaakun: 'Dekas tajime: Ju mina yatsug imanचाuch ainaigkish wait anenjauwaitjum duka, mina dutijuau ainagme.'

⁴¹ "Nuna ti menajin ijunun Apu chichajak: 'Pegkegchau aidauwah, juwi minai ijuntsuk, jii ajumaish kajinchau iwanch ni aentsijjai egkematin umigkamua nuanuí wetajum. ⁴² Atumek wi yapajakuish ajamjuschabiugme, kitamakuish umutaig sujuschabiugme; ⁴³ jeenchau wekaekuishkam pujumainuk sujuschabiugme; nugkutai atsumakuish sujuschabiugme, jaaknush tepebiajai, achinkanush pujubaijai, nuniakuish tajutuagmek ijagtuschabiugme', titinai. ⁴⁴ Tusa tama dita: 'Apuh, ¿iish wajutiya ame yapagkim, kitaajam, jeenchau, jaanchjinchau wekaekuminish, nuigtú jaakum tepaminish, achinkam egketkuminish pachitskesh idaisabiagme?' tiagtinai. ⁴⁵ Tiagtai Apu ayaak: 'Dekas tajime: Atum ju aents imanचाuch aina jujú wait anenjachuitjum duka, mina dutijuau ainagme', titinai. ⁴⁶ Aaja tima nunú aents aidauk suwimak nagkankashatina nui wegagtinai; untsu aents pegkeg aidauk pujut tuke atina nui wayawagtinai', tiuwai.

26

Jisus maami tusa chicham umigkamu

(Mr. 14.1-2; Lc. 22.1-6; Jn. 11.45-57)

¹ Jisus juna chichá chichaakua ashimak ni jintintaiji aidaun chichajak:

² —Jimag tsawan asa Pascua* atata duka dekagme, nuanuí wi Apajuí Uchijiyaitkun Aentsmaga Akiinauwaitag nunak, achijá maatnume tusag sujutkagtatui, —tiuwai. ³ Tuja nunú tsawantinig sacerdote apuji aidaun, chicham umiktinun jintinkagtin aidaushkam, tikich apu aidaujui sumo sacerdote Caifasa jeen agaajin ijunjajui. ⁴ Nunikag chichaman umikajui, Jisus tsanumjuja achiká maami tusag.

⁵ —Tujash jista aigkik dutikachagmi, aents aidaujui pampandayamu ai, —tuidau.

Betanianmaya nuwa Jisusan kugkuinui nijakbau

(Mr. 14.3-9; Jn. 12.1-8)

⁶ Jisus Betanianum Simón lepra achimaku etsagagbau aajakua nuna jeen pujai, ⁷ nuwa tajauwai kaya alabastro tutai botella najanamunum, kugkuin shiig akik wajaknun takusá, nunik Jisus mesanum eketun jegantun nu kugkuinai buuknum ukatjauwai. ⁸ Nunú dutikamun ni jintintaiji aidaun wainkag kajekajui, nunikag:

—¿Wagka wainkash ibaunash ajapeawa? ⁹ Dekas aikatsuk shiig akik sujuka ujunauch aidaun sumainajama, —tuidau.

¹⁰ Tiagatman Jisus antuk ditan chichajak:

—¿Wagka jusha nuwash kajejagme? Mina jutija junak pegkejan aikae, ¹¹ ujunauch aidauk tuke atumjai batsamiagtatui, tujash wika atumjaig pujushtatjai. ¹² Ju nuwa mina iyashjuí kugkuinun ukatjuka junak, mina ukugsagmatai jutijuawagtinun jutijawai. ¹³ Dekas tajime: Yamajam chichama juna etsejuinak ashí nugkanum yujainakush, ju nuwa mina jutija junak tuke pachisag chichatin ainawai, —tiuwai.

Judas Jisusa sujuktatus kuichik jukimu

(Mr. 14.10-11; Lc. 22.3-6)

¹⁴ Nuna timatai doce aina nuwiya, Judas Iscariote daagtin jinki sacerdote apuji aidaujui chichastatus weuwai. ¹⁵ Nunik:

—¿Wají sujumainaitjume, wi Jisusan atumin amaakuish? —tau.

Tutai dita aidaun treinta kuichkin susaju. ¹⁶ Dutika akikbau asa, ni yupichu sujumainjin egatu.

Pascuatin yuwatin umikbau

(Mr. 14.12-25; Lc. 22.7-23; Jn. 13.18-30)

¹⁷ Pag levaduragtuchu† yutai nagkamak tsawaagmatai, ni jintintaiji aidaun Jisusan jegaantag:

—¿Tuwí umiktatji Pascuatin yuwatnush? —tusa iniidau.

¹⁸ Tama ni ayaak:

—Yaakat wetajum, nunikjum atum aents wainjum nunú jegajuajum: 'Jintinkagtin chichaak: Mina tsawanjuk namputchí wajaschae, nuniau

* **26:2** "Pascua" tawa duka judío aidaun uwig aishmag tsakatan maawag yuwinaku jistamtaiji aajakui. Nunak Egipto nugkanum batsamas waitkam batsatun Apajuí ayamjuk jijiá agkanmitkamu asag, nuna anentaimitusag jistamainak dutikajakú ainawai. Diistá Éx. 12.1-28. † **26:17** Levaduranak paangkan inagkatatus harinan namukag ajuntin ainawai, wampushmitkatí tusa.

asamtai niina jeen mina jintintaig aidaujui Pascuan jistamatjai tujamae' titajum, —tiu.

¹⁹ Tiajam Jisusa jintintai aidaushkam ni tibaunak imatiksag, Pascuatin yuwatnunak umikajui.

Jisus inagnaku Pascuatin yuwamu

(Mr. 14.17-21; Lc. 22.14-18)

²⁰ Kiyagmatai Jisus ni jintintaiji doce aina nujai mesanum jegantá ekeemsau. ²¹ Nui yuwamunum Jisus chichaak:

—Dekas tajime: Atum ainajum juwiyag makichik minak sujutkattawai, —tau.

²² Tutai shiig senchi wake besemag dekapjag, makí makichik iniinak: —¿Apuh wichaukaitag? —wajaidau.

²³ Tiagtai Jisus ayaak:

—Wijai nu platonmag uchutua yuwa nu minak sujutkattawai.

²⁴ Wi Apajú Uchijiyaitkun Aentsmaga Akiinawaitag nunak, mina pachittsag agajajua nuna imatiksasuk umiktatjai, tujash jaents mina sujutkatta nuna wait anentajai! Duka dekas akiinmainchaunas akiinawabiataih, —tau.

²⁵ Tutai Judas ni sujuktina nu chichaak:

—Jintinkagtinuh ¿wichaukaitag? —tau.

Tutai ni ayaak:

—Ame tame duka dekaske, —tiuwai.

Jisus, mina anentaimjuttasajum yuwakjumek juní dutikatajum tibau

(Mr. 14.22-25; Lc. 22.7-23; 1 Co. 11.23-26)

²⁶ Yuwinak pekagbaunum, Jisus pagkan juki Apajin see ti, puuká, ni jintintaiji aidaun suwak:

—Ju jukijum yuwatajum, juka mina iyashjua numamtinai.

²⁷ Nuna ti, copanum vino yajaam ekeematman juki, Apajin see tusa jintintaiji aidaun suwak:

—Ju copa[‡] juwiya ashí atum aidautigum uwagtajum. ²⁸ Juka mina numpag ukaejamunum kuashat aents tudaujin tsagkugnajag uwemkagtina nuna, mina Apag yamagman anagtamawajua nunu uminkatnun iwainawai. ²⁹ Dekas tajime: Wika ju uva yumijiya junak yamai nagkamsasuk awenanuk uwagchattajai, atak tsawan uminkui mina Apajú inamtain ataktú atumjai ijunkun uwagtinaitjai.

Jisus Pedron uugtuktatme tusa ujakbau

(Mr. 14.26-31; Lc. 22.31-34; Jn. 13.36-38)

³⁰ Nuna timatai kantamtain kantamawag Olivosan mujajin wegajui.

³¹ Nunikag nui jegantá Jisus chichaak:

—Jujú kashia juwik, ashí atum aidautigmek mina anentaimjuttak kajimatkittagme, agagbauwa nui: 'Uwijá kuitamnun mantuawagtina, dutikawagmatai uwigji aidauk pampagkagtin ainawai' tawa nunisag. ³² Tujash mantuawagmataish ataktú nantakin, atumek wegatsjuminig wiyá emkan Galilea wetatjai —tiuwai.

³³ Tutai Pedro ayaak:

—Ashí tikich aidau kajimatjamainakuish, wika aminak tuke kaji-matkishtinaitjame, —tau.

³⁴ Tutai Jisus chichajak:

‡ 26:27 "Copa" tawa duka yukunta numamtin aajakui.

—Dekas tajame: Jujú kashia juwik, atash eke shinatsaig kampakuma imania: ‘Jisusnak wainchaujai’ tusam uugtuktatme, —tiuwai.

³⁵ Tamashkam Pedro ayaak:

—Amijai apaatuk mantuinaikuish, wika nunak tichattajai, —tau.

Nuna tutai ashí niina jintintaiji aidauk ditashkam dutiksag tiajui.

Jisus Getsemaní pujusá Apajuí ausamu

(Mr. 14.32-42; Lc. 22.39-46)

³⁶ Tiagmatai juwakiag Jisus ni jintintaiji aidaujai ajak ajakbau Getsemaní tutainum jegauwai. Nunik ditan chichajak:

—Juwi atumek ekemamatajum, nuniagmin wi awi wenu Apajuin ausatjai.

³⁷ Tusa wegak Pedron, nuigtú Zebedeo uchijin mai juki wesa, shiig senchi wake besemag dekapeakun, wake besekú. ³⁸ Imaniak Jisus:

—Senchi wake besemag dekapeakun, ane anentaimkawan jamain dekapeakai, atumek juwi batsamsajum wijai betekak iwá batsamtajum, —tiu.

³⁹ Tusa ukuak machik kuwaesag tikishmag nugkan nijayin intaa pujus, Apajuin aujak: “Apawah, nunimainaitkuig tsagkamjukaipa wi waitmainaitag nuwig. Tujash wi wakegamu ahati, ame wakegamu ati”, tiuwai.

⁴⁰ Nuna ti ni jintintaiji batsakbaunum wakitkiu, nunik kajigká batsatun wainak Pedron chichajak:

—¿Atumek wijai betekak makichik horakesh iwamainchauk dekapeakum? ⁴¹ Shintaagum pujusjum Apajuí ausatajum, iwanch pegkegchau takastinme tusa dekapjamsainum. Wakanik dekaskenmag pegkeja nuna wakegawai, tujash iyashik kakakchau ainawai.

⁴² Tusa ukuak ataktú wakitki Apajin aujak:

—Apawah, wi waitmainaitag nunú nunikchati tujutmaichakmek, ame wakegamua duke dutikata, —tau.

⁴³ Nuna tusa ataktú tanta diikmá, ditak kaji senchi mainam kajigkag batsatun wainkauwai. ⁴⁴ Nunik diisá ukuak kampakuma juwi wakitki Apajin aujak, ni tibaujinak dutiksag auju. ⁴⁵ Nunik ni jintintaiji batsakbaun jegantun:

—Wi Apajuí Uchijiyaitkun Aentsmagan Akiinauwaitag nuna, aents tudaugtin aidaunum sujam atatag duka, yamaik horak jegae, kanakjum ayamjatajum. ⁴⁶ Nantagtajum wegagmi, diistajum mina sujutkatin ashí taa mina nu, —tiuwai.

Jisus achiká jukimu

(Mr. 14.43-52; Lc. 22.47-53; Jn. 18.2-11)

⁴⁷ Tusa Jisus eke chichaak wajai, Judas Iscariote doce aina nuwiya, kuashat aentsun espada aidaun, numi aidaunaske takaku aidaujai saasá tajuntauwai. Nunú aidauk sacerdote aidau apuji, nuigtú apu aidau awemamu minidau. ⁴⁸ Judas Jisusan sujuktina nu, nunú aents aidaun chichajak: “Wi kugkuastatag nunú achiktajum, nunak Jisusan dutikattajai”, ⁴⁹ tiu asa Jisusan adijak:

—¡Jintinkagtinuh pujamek! —takug kugkuasu. ⁵⁰ Tutai Jisus ayaak:

—Kumpajuh, ¿wagka miname? —tusa taun kauntuntag Jisusa achikag emetjaju.

51 Nuna dutikiagtai Jisusa jintintaiji aina nuwiya espadajin ukuini juwakug, dekas sumo sacerdote inake kuwishin asankauwai.
52 Dutikamtai Jisus chichajak:

—Espadajum jukim awajata, ashí aents espadayai maanidauk, espadajai maam agtinai. 53 ¿Atumek dekatsjumek, wi mina Apajun segamak yamaya juwik doce mil nayaimpinmaya aents aidaun ishitjumaina duka? 54 Tujash wi mantamnashataish, ¿utusag Apajuí chichamen agagbauwa dusha uminkati? —tiuwai.

55 Nuna tusa nu aents aidaun chichajak:

—¿Wagka kasa achiktasa utugtaya imanikjumes espada, numi aidaun takusjum achigkatasagmesh minitjagme? wi atumin jintinkun kashí kashinig juga Apajuí ememattainum pujuweg nuaduik jutikajum achigchau agmaugme. 56 Tujash ju jutijajum juga, Apajuí etsegint chicham tibau agagbauwa nunú uminu asamtai jutijagme.

Nuna taig, ashí niina jintintai aidauk pisainak ukukiajui.

Jisus apu aidau batsatbaunum ejentamu

(Mr. 14.53-65; Lc. 22.54-55, 63-71; Jn. 18.12-14, 19-24)

57 Jisusan achikag jukiaju aidauk, Caifás sumo sacerdoteya nuna jeen ejegawaju, chicham umiktinun jintinkagtin aidau tikich apu aidaujai ijunag batsatbaunum. 58 Tuja Pedroskam ikaag pataetus wejá wejakua, sumo sacerdote jeen agaajin jegantá, niishkam wayaa achijatin aidaujai ekeemsau, wajuk inagnakagtig tusa diistatus.

59 Sacerdote apuji aidauk, apu chichaman inagdau aidaujai egatuidau, Jisusan tsanumjugag maatnume tusa sujukagtatus. 60 Tujashkam ejechaju kuashat aents tsanumjuinakush, nuninai inagnamunum jimag aents tsanumjugtin taawaju, 61 nunikag:

—Ju aents chichaak: ‘Wika juga Apajuí ememattaiya junak tsaikan, kumpatumchik tsawantai ataktú jegamainaitjai timayi’, —tuidau.

62 Tiagtai sumo sacerdote wajakí iniak:

—¿Wagka machikish aimtsume? ¿Nunash wajinbaugmina jusha imatjupainawa? —tau.

63 Tamashkam Jisusak chichaachu, nunitai sumo sacerdote chichajak:

—Apajuí tuke pujuwa nuna daajin tajame: Ame dekas Kristu, Apajuí Uchijiyaitkumek dekas ujjatkata, —tau.

64 Nu tama Jisus ayaak:

—Ame tujutam duka dekaske, nuigtushkam tajime: Wi Apajuí Uchijiyaitkun Aentsmagan Akiinawaitag nunak, Apajuí ashí senchigtina nuna untujin eketun tsawan uminkamtai, yujagminum pachitkau minamu waitkatnaitjume, —tiuwai.

65 Nuna tutai sumo sacerdote nugkuagbaujin japikí ichigká chichaak: —¡Apajuin pegkegchaun chichagkae! ¿Nuigtush ya etsegtukti tusaya atsumaji? ¡Yamaik atumshakam Apajuí pegkegchau chichagka nu antukugme! 66 ¿Wajuk diyagme atumesh? —tau.

Tutai dita aiinak:

—Dekaske, ayatak mantamnati, —tiajui.

67 Tiagtai yapinum usukinak awatuidau, nuna dutikainai tikich aidau yapinum ijuinak:

68 —Ame dekas Kristuitkumek dekania: ¿Ya ijupime? —awajuidau.

Pedro Jisusnak waintsamjai tusa uukbau

(Mr. 14.66-72; Lc. 22.54-62; Jn. 18.15-25)

⁶⁹ Juna imatikainai Pedro agaa ekeemtatman, apú inake nuwa jegantun chichajak:

—Amesh Jisus Galileanmayaya nujaimpap wekaemume, —tau.

⁷⁰ Tusa tama ashí aents antuinamunum:

—Wika dekatsjai ame tame nunak, —tiuwai.

⁷¹ Nuna tusa ukuak waitinum wetatman, tikich nuwa wainak aents nui ijunun ujaak:

—Jushakam Jisus Nazaretnumiaya nujai wekaenuwejama, —tusa etsetgau.

⁷² Tujash Pedrok ataktushkam uwaak Apajuin adayas:

—¡Wika au aentsnak wainchaujai! —tau.

⁷³ Machik asag aents nui batsatu Pedron jegaantag:

—Dekas ameshkam auna jintintaijiyaitme, chichamjuminchakam dekanme, —tuidau.

⁷⁴ Tama Jisusan pachis pegkegchaun chichajak, Apajuin adayas:

—¡Wika au aentsnak wainchaujai! —tau.

Taig atash shinukuí. ⁷⁵ Nunitai Pedroshkam Jisus chichajak: “Atash eke shinatsaig kampatumá ugtuktinaitme” tibauwa nuna adeaju, nunik senchi wake besemag dekapeg kajegmamak jiinki buutiuwai.

27

Jisus Pilatuwai ejegamu

(Mr. 15.1; Lc. 22.66-71; Jn. 18.28)

¹ Tsawagmatai, ashí sacerdote apuji aidau chichaman inagnau aidaujai, Jisusak dekas mantamnati tusag shiig chichaman umigkajui.

² Dutikawag jigkajá jukiag, Romanmaya apu Poncio Pilato pujamunum ejegawajui.

Judas Iscariote kajemjamu

(Tak. 1.18-19)

³ Judas Jisusan sujukua nunú, Jisusan dekas maawagtatus imatiki-agtai, awake anentaimag sacerdote apuji aidaun tikich apu aina nujai treinta kuichkin awagtak:

⁴ —Wika tudau takasjai, aents pegkejam aig maatajum tusa sujuku asan, —tau.

Tama dita aiinak:

—¿Ish dusha utugkatjiki? Duka aminuajama, —tiaju.

⁵ Tiagtai Judas kuichkin nagkimá, jega Apajuí ememattainum ukuak, we kajemjauwai.

⁶ Dutikamtai sacerdote apuji aidau kuichkin jukiag:

—Ju kuichkia juka anentag Apajuinu atí tusa chimpitia nuwig egkemaitsui, aents mantamnati tusa akikmatkamu asantai, —tuidau.

⁷ Tusag chichasag nunú kuichkia duwik, nugka ichinak najanku batsamtain sumakajui, aents tikich nugkanmaya jaidaun ukustinun.

⁸ Yamaya juwikishkam duka nugka numpeagbau tutayai. ⁹ Nuna pachis Apajuí etsegtin Jeremías agak:

“Jukiaje treinta kuichkin Israel aents aidau imaan akik atí tibaun, ¹⁰ dutikawag sumakaje nugka ichinak najanku batsamtain, Apu dutikawagtinai tujutiuwa dutiksajag”, tibauwa nu nuní uminkauwai.

*Jisus Pilatuwai ejegamu**(Mr. 15.2-15; Lc. 23.2-25; Jn. 18.28-40)*

¹¹ Jisusan jukiag ejega apú emtin awajsaju, dutikawagmatai Pilato:
—¿Amekaitam judío aidau apujim? —tau.

Tama Jisus ayaak:

—Ame tujutam duka dekaske, —tau.

¹² Sacerdote apuji aidau, tikich apu aidaujai tsanumjuinamash, Jisusak aimkag chichakchauwai. ¹³ Nunitai Pilato chichajak:

—¿Amina kuashat imatjutpaina duka antatsmek?

¹⁴ Tamashkam Jisusak makichik chichamnakesh aikchau. Nunitai apuk anentai jegagchau.

¹⁵ Tuja apuk jistatinig aents achikbau aina nuwiyán makichik jüsagké au, aents aidau nu jinkiti tusa mamikiamua nuna.

¹⁶ Nuniámunum Barrabás daagtinchakam shiig pegkegchau achikam egketu. ¹⁷ Aents aidau nú ijuntatman Pilato iniak:

—¿Yana jiiktí tusagma wakegagme, Barrabaskan jiiktatag atsa, Jisus, Kristu daagtina nuna jiiktí tajumek? —tau.

¹⁸ Nunak tuke aneas kajejuinak maatnume tusa sujukajun dekau asa, tiuwai.

¹⁹ Nuna tusa Pilatok chicham epegkatasa ekeemtaijin eketai, niina nuwe aentsun awetak: “Amek aanú aents pegkegma duka niimjusaipa. Wi ishainun kajamjamjai yamai, aanú imatikamunum”, tiu.

²⁰ Tujash sacerdote apuji aidau, tikich apu aidaujai, aents tuwaká ijunun: “Dekas Barrabás jinkiti, nunitai Jisus mantamnati titajum”, tusa akatjajui. ²¹ Tiagtai Pilato ditan iniak:

—¿Ju aents jimaja juiyanash, yana dekas jiiktí tusagma wakegagme? —tau.

Tutai dita aiinak:

—Barrabás jinkiti, —tuidau.

²² Tiagtai Pilato ditan iniak:

—¿Tujash Jisus, Kristu daagtina junash utugkatjaki? —tau.

Tutai ashí pampanjag:

—¿Anka achinjati! —wajaidau.

²³ Tiagtai apu ayaak:

—¿Tujash jusha wají pegkegchauna takase? —tau.

Tutaishkam núni senchi untsumkag:

—¿Anka achinjati! —wajaidau.

²⁴ Tusag machikish itattsuk núni senchi pampaidiagtai, Pilatok:

—Yumi utugtitajum, —tima itaamtai, ditá eemtin ikigmaju, nuniak:

—Wika ju aentsnumag shiig agkantaitjai, juka atumdauwai, —tiu.

²⁵ Nunitai ashí aents pampanjag:

—Jutiiní, tuja ashí ii uchijí aidaunum ju aents mantamnamuk juwakti, —tiaju.

²⁶ Tiagtai Barrabasan jiikiu, dutikak Jisusnak asutia achigtinme tusa sujukui.

*Suntag aidau Jisusan waitkasagbau**(Mr. 15.16-20; Jn. 19.1-3)*

²⁷ Dutikamtai apú suntaji aidau Jisusan jukiag apú pujusá inamtaijin ejegawagmatai, ashí suntag ijuntujaju ni wajamunum. ²⁸ Nunikag

jaanchin awitkag tikich jaanch yamakaitkaun anugjaju. ²⁹ Dutiksag at-sejutain jagkin najatuawag atsemitkakag, numin untsujin achimtikag, niina emtin tikishmatjag dushikinak:

—Jjuuwai judío Apujig! —awajuidau.

³⁰ Imatjuinak usukidau, dutikainak numi atakuamujin jujukiag buuknum awatuidau. ³¹ Dutikainak dushí dushikinakua jaanch yamakaitkau anugjamunak awituk, ni nugkutaijinak anugjag juki emajui achijag maawagtatus.

Jisus achigbau

(*Mr. 15.21-32; Lc. 23.26-43; Jn. 19.16-24*)

³² Jinkamag yaakat Cirenemaya Simón daagtinun wainkag, Jisus achigtin numi yapajia achiamun yanaktí tusag, susajui.

³³ Nunikag Gólgota tutainum jegantajui. (“Gólgota” tawa duka, “buuk sakajua nunin” taku tawai.) ³⁴ Nui ejentag, Jisusan vino chujuau dupa yapaujai pachimjamun uwagti tusag susajui. Nu susam apas dekapas idaisauwai.

³⁵ Jisusan achijagmatai, suntag aidau jaanchjin jukiag: Yana kayajig jinkit, nu jaachnak jukiti tusag, wasugkamaidau. Nuní uminkauwai Apajui etsegtin chichaak:

“Mina jaanchjunak akandaikag jukiaje, kayají jintukbau aidau” timawa nunú. ³⁶ Nunikag pekaamsag dii batsamtuidau. ³⁷ Tuja wajuk asamtaiya achijaje nuna pachisag chaiken: “Jjuuwai Jisus, judío aidau apuji”, tusa agatug anujtukajui.

³⁸ Dutiksag jimag magkagtinun Jisusjai achijag, tikichia nuna untsugnum awajainak, tikichia nunak menajinini awajawajui. ³⁹ Aents aidau duke ayaumas nagkaemainak, buukenak pegajag pegkegchau chichajuinak:

⁴⁰ —Ame: Jega Apajui ememattaiya nunak yumpuan kcompatumchik tsawantaik ataktú jegamainaitjai, tinum nunú dekas Apajui Uchijiyaitkumek, aaní nematsuk akaikim uwemjakia —awajuidau.

⁴¹ Dutiksag sacerdote apuji, chicham umiktinun jintinkagtin aidau, Fariseo aidau, nuigtú tikich apu aidaujai ijunag dushikinak:

⁴² —Tikichnak yajau uwemtikchauwe nuninaitak nigka uwemtsui. Dekas Israel aidaun apujiyaitkug, akaiki wajanmatai dekaskeapi tumainajama. ⁴³ Apajuin kajinas anentaimtime, ni wakegakug yamai ayamjukti, wagki: Wika Apajui Uchijiyaitjai tinuwe nuna dekas wainak tuchauwaitkug, —wajaidau.

⁴⁴ Nunisag magkagtin achijam Jisusjai detaidaushkam pegkegchau chichajuidau.

Jisus jakamu

(*Mr. 15.33-41; Lc. 23.44-49; Jn. 19.28-30*)

⁴⁵ Etsa tutupit wajasú ai nagkamas ashí nugkanum suwe wajas, etsa dukap tegau aishkam imanisag asauwai. ⁴⁶ Imanik abaunum Jisus senchi untsamak: “Elí, Elí, ¿lama sabactani?” tiu. (Nunak: “Mina Apajuijuh, mina Apajuijuh, ¿wagka minash idaitusume?” taku tiuwai.)

⁴⁷ Aents nui ijunaidauk nuna antukag:

—Eliasan untsuawai, —tuidau.

⁴⁸ Tusa taig, ijuna nuwiya makichik tupikaki esponja juki vino chujuaanum ajugká tagkanai aapi Jisusan uwagti tusa iwagkau.

⁴⁹ Dutiktai tikich aidau chichainak:

—Idaisakia, Elías uwemtijatatus minishtimpash, wainkami, —tuidau.

⁵⁰ Tujash Jisusak ataktú senchi untsamak, jakauwai.

⁵¹ Nunikmatai jega Apajuí ememattainum jaanch ejaamuk, yakiin nagkamnas ichiinak jimaituk kanakuí. Nugkashkam senchi ugkauwai, imaniau asamtai kaya aidaushkam punjauwai. ⁵² Imanikmatai ukumatai aidauk ujaniajui, tuja Apajuí nemajin jinawaju aidauk kuashat nantajajui. ⁵³ Ditak ukusbaunmaya jinajui Jisusá nantakiu ai, nunikag Jerusalén utsanawajui, nunikun kuashat aents wainkajui.

⁵⁴ Tuja capitán, tikich niijai ijunas Jisusan diyak ijunaidauk, ugbau imanikmatai, nuigtú kuashat ishamain nagkaemajun wainkag, senchi ishamkag chichainak:

—Dekaskenum juka Apajuí Uchijiyai, —tuidau.

⁵⁵ Nui nuwa aidaushkam ikaa ijunas dii ijuntuidau, Jisusan Galileanum nagkamsag saetusag yaijakú aina nunú. ⁵⁶ Nuanuí María Magdalanmaya, tikich María Jacobo dukují Josenashkam dukujiya nu, nuigtú Zebedeo nuwe aatus wajaidau.

Jisus ukusbau

(Mr. 15.42-47; Lc. 23.50-56; Jn. 19.38-42)

⁵⁷ Kintamai Arimateanmaya José daagtin wiyakuch, niishkam Jisusa jintintaiji asa tauwai. ⁵⁸ Nunik Pilatun wejí, Jisusa iyashin segauwai. Tama Pilatushkam:

—Jisusa iyashí susatajum, —tiuwai. ⁵⁹ José Jisusa iyashin juki, sávana yamagmai pempeag, ⁶⁰ ni ukumasmig tusa kaya muun yamá tai umikbaunum egkea, kaya muuntan akagketuk waajin epeti ukuak weuwai. ⁶¹ Tuja María Magdalanmaya tikich María aatus, Jisus ukusbaunum jeganag eketaidau.

Jisus ukusbaun kuitamkatnume tusa ishitkam

⁶² Ayamtai tsawaju asamtai sacerdote apuji aidau, fariseo aidaujai Pilato jeen jegajuawag:

⁶³ —Apuh, adeagji wait aaya nunú, iwaaku pujus chichaak: ‘Wika jakanush kempatumchik tsawantaik nantaktinaitjai’, tuuyi. ⁶⁴ Nuniau asamtai, awemata aents ukusbauwa nuna kempatum tsawantai kuitamkatin, dutikashmak niina jintintaiji aidau kashi kautuawag iyashin jukiag, aents aidaun ujainak: ‘Jakabia duka nantakne’, tiagtatui. Nuna dita aatus tuinakug yama nagkamchaku waitjuamun nagkaesau waitjuawagtatui, —tuidau.

⁶⁵ Tusa tiagtai Pilato ayaak:

—Anuwai suntag kuitamain aidauk, atum wejum wajuk wakegagme dutiksagmek umiktajum, —tau.

⁶⁶ Timatai wegag Jisus ukusbau kaya aputukbaunak shiig asakug, nui suntag kuitamkatin aidaunashkam batsatkiajui.

28

Jisus nantakbau

(Mr. 16.1-8; Lc. 24.1-12; Jn. 20.1-10)

1 Tsawan ayamtai nagkaemaki tumig tsawagmatai, María Magdalanmaya, tikich Mariájai Jisus ukusbaun diisagtasag wegaju. 2 Nuniamunum Apajúi aentsji nayaimpinmaya akaetai senchi ugkauwai, nunik Jisus ukusbau kaya aputuka ukukbaunak ekek nui ni ekeemsauwai. 3 Nuna niimeg peemjai betek, jaanchjish puju nieve* tutaya iman aajakuí. 4 Imanun wainkag Jisus ukusbaun suntag kuitamak batsatuk ishamkag jaka kakekajui. 5 Nunikaju ai, Apajúi aentsji nayaimpinmaya nuwa aidaun chichajak:

—Ishamkaigpajum, wika dekajai atum Jisusan achijag maawagma nunú egajum nunak. 6 Tujash juwig atsawai, nigka nantakne ni timaya nunisag. Juwi tantajum Apú ukusagma nunú diistajum. 7 Nunikjum waamak wejum: Jakama duka nantakne, tusajum niina jintintaiji aidau ujaktajum. Nigka ditak wenatsaig, niyá eemak Galilea wetatui, awi wainkagtatui. Juna atumin tita tajime, —tiuwai.

8 Nu tima nuwa aidaushkam Jisus ukusbaunum jegantajuk ukuinak, ishamainayatak shiig aneasag nunú chichaman Jisusa jintintai aidaun ujakgtatus tupikaidau. Nunikag eke Jisusa jintintaiji aidaun ujaktagtus weenai, 9 Jisus wantintuk kumpamak: “¡Atumkaitjum!” tau. Tama nuwa aidaushkam, Jisusan jegantag dawenum pagkukag emematuidau. 10 Dutikam ni chichajak:

—Ishamkaigpajum, wejum mina yatsug aidau ujaktajum Galilea minitnume, awi minak waitkagtatui, —tiuwai.

Jisus nantakbaun etsegekainum tusa suntag aidau kuichik akikbau

11 Nunikag nuwa aidauk weenai, ujumak suntag nuna kuitamaidau yaaktanum wegag, sacerdote apuji aidaun dita wainkamunak ashí ujakaju. 12 Tusa újakam wegag apu aidaujai ijunjag chichaman shiig umikaju. Nunikag kuashat kuichkin suntajan susaju. 13 Dutikainak:

—Atumek aajajum etsegekatajum: ‘Jutii kajigká batsatjin ni jintintai aidau kashi kautuawag Jisusa iyashinak jukiagmae titajum.’ 14 Tuja apu dekaamtaishkam jutii tiagtatji, dutikaku atumek ayamjuktatjime, —tiaju.

15 Tiajam ditashkam kuichkin jukiag, dita titajum tusa akatjamunak imatiksag tuidau. Jujú tibauwa nunak yamaikishkam judío aidauk ditiksag tinu ainawai.

Jisus ni jintintaiji aidau akatjamu

(Mr. 16.14-18; Lc. 24.36-49; Jn. 20.19-23)

16 Tuja Jisusa jintintaiji once aina duka Galilea wegajui, Jisus nunú mujanum minitnume tibaunum. 17 Nunikag Jisusan wainkag emematuidau, tujash dita utujimushkam asaju. 18 Nuniagtai Jisus ditan jegantun chichajak:

—Minak, mina Apag: ‘Ashí nayaimpinmaya aidau, ashí nugkanmaya aidaush ame diistá’ tusa idaitugsae, 19 nuniau asamtaí wetajum ashí nugkanum, nunikjum tikich aidaush jintintuatajum, dutikakjum mina Apajú daajin, mina pachittsajum, Wakaní Pegkeji pachisjumshakam yamigtajum, 20 dutikakjum ashí ju umiktajum, atumin tiuwaitjim dushakam jintintuatajum. Wika ashí tsawantai, nugka nagkanbau atina duwish atumjagu take pujutnaitjai.

* 28:3 “Nieve” tawa duka ujuch pujua ibau winchamtin, dukap diimainchau jii emesmain.

Aatus atí.

YAMAJAM CHICHAM MARCOS AGAGBAU

Juan Yamijatin uwegshunum chichagkagtukbau

(Mt. 3.1-12; Lc. 3.1-20; Jn. 1.19-28)

¹ Jisukristu Apajuí uchijiya nu yamajam chicham etsegbauk juní nagkamnauwai. ² Nuna pachis Apajuí etsegtin Isaías agak:

“Wi mina chichamjun etsegnun emtikan awemajai, ni jintanak umigtamkati tusan.

³ Makichik aents eemak taa uwegshunum wekagas senchi jiiká chichaak:

‘Apu wekaesatnun jintan shiig iwajug, esegak tutupit dakuegajama numamtuk,

atumi anentaimish shiig iwajajum umiktajum, Apu minitin asamtai’, titinai” tawa duka juuwai.

⁴ Ju aatsa tibau asamtai Juagshakam uwegshunum aentsun yamiau, nuniak etseju, tudau takatan idayinak yamimag tsagkugnagtinme tusa.

⁵ Nuna antukag ashí yaakat Judea nugkanmaya aidauk, ashí Jerusalegenunia aidaushkam kautuidau. Nunikag ditá tudaujin etsegtumagtai Juagshakam Jordagnum yamiau.

⁶ Juagkak camello uje najanamun nugkujakuí, akachumtaijish duwap aajakuí, manchin dapá yumijijai yuujakuí. ⁷ Juan aents aidaun chichajak: “Mina ukujui minittawai dekas mina nagkaetasu senchigtin. Wika nuna sapatjinakesh pujugsanuk ukuitmaitsujai niiya imanchau asan. ⁸ Wika ayatak yumiik yamiajime, tujash nigka Wakaní Pegkejiya duwi yamimagtatjume”, tau.

Jisus yamimagbau

(Mt. 3.13-17; Lc. 3.21-22)

⁹ Nunú tsawantai yaakat Nazaret Galilea nugkanum awa nuwiya Jisus jiinki, Juan pujamunum jegauwai, nunikmatai namak Jordagnum yamijui. ¹⁰ Dutika yamijam jinkamá Jisus wainkauwai nayaim ujanatman, nuniamunum Wakaní Pegkeji pauma nunin niina mamikis akagunashkam. ¹¹ Nuniai nayaimpinmaya chicham antuekau: “Ametme dekas mina uchig aneetaigmek, duwi aminig shiig anejai” tabau.

Iwanch Jisusan pegkegchau takamtiksata tibau

(Mt. 4.1-11; Lc. 4.1-13)

¹² Juna timatai Wakaní Pegkeji egkemtug uwegshunum emauwai.

¹³ Nui Jisus cuarenta tsawan pujuttaman iwanch tsanujá pegkegchau takamtiksata tiuwai, nuigtushkam kuntin kajen aidau batsatbaunum Jisusak pujau. Dutikamtai Apajuí aentsji nayaimpinmaya kautuawajui kuitamkagtatus.

Jisus Galileanum ni takatji nagkamamu

(Mt. 4.12-17; Lc. 4.14-15)

¹⁴ Juagkan achikag egkeawaju ai, Jisus Galilea yamajam chicham Apajuí inabaujin pachis etse etsegekawa weuwai. ¹⁵ Nuniak: “Apajuí aentsnum inamjatta duka tsawantak namput wajaschae. Tudaujum idaisatajum nuniakjum yamajam chichama ju dekaskeapi titajum”, tiuwai.

Jisus ni jintintajji atinun cuatro namaká main aidaun yajuakbau

(Mt. 4.18-22; Lc. 5.1-11)

¹⁶ Jisus Galilea kuchají yantamen wekaekamá Simogkan, ni yachi Andresjai namakan main asag retan ajuntuinak yujattaman wainkau, ¹⁷ nunik:

—Wegajai wi jintintuatjime, namak maatasajum yujagjum anmam-tuk, Apajuí chichame etsegkujum aents aidau minai ikautjin atajum tusan, —tau.

¹⁸ Tusa tamawaik wamkes ditá retjinak ukuinak nijai wegajui.

¹⁹ Nuwi nagkaemaki imachik kuwaesag wekamá, Zebedeo uchijí Jacobo ni yachi Juagjai, botejin chimpimas retjin apijuinak chimpimatman wainkauwai. ²⁰ Dutika nunashkam:

—Wegajai, mina jintintaig atajum, —tiu. Tama ditashkam apají Zebedeonak, ditajai takau aidaunak botenum ukuinak Jisusjai wegajui.

Aents wakan pegkegchau egkemtugbaun Jisus etsagagbau

(Lc. 4.31-37)

²¹ Nunikag yaakat Capernaumnum jegawaju. Nunik tsawan ayamtai tsawagmatai Jisus jega ijuntainum wayaa jintinkagtau.

²² Nigka jintinkagtuauwai aents chichame antugtai aidaun nagkaesau, chicham umiktin aidaun jintinkagtin aidaujaishkam betekchaun.

²³ Nuniamunum nunú jega ijuntaiya nui, makichik aents wakan pegkegchau egkemtumu eketu senchi untsamak:

²⁴ —¡Jisus Nazaretnumiyah! ¿Wagka amesh jutii pujamunmash miname, ijijatuatasamek minam? Wika dekagme amek dekas pegkegmaitme, Apajuinmaya midau asam, —tiuwai.

²⁵ Tama Jisus wakan pegkegchaun ayaak:

—¡Takamtak itatkata, jinkim wegakum aanú aentsuk ukuktá! —tiu.

²⁶ Tusa tamawaik aentsun waugmitkak nugká ajiajuui, dutika shiig senchi untsamak jinki wegak ukukiuwai. ²⁷ Nunikmatai wainkag puyatkaju. Nunikag ditak pempeentunikiag:

—¿Jusha yaita? ¿Jintiamujish yamagmajama, wajuku asaya chichamesh senchigtinaita wakan pegkegchaunash chichamenig jiyá dusha? —tudayinau.

²⁸ Nunú nunikbaunak ashí Galileanmaya aidauk dekaawajui.

Pedro tsatsají Jisus etsagagbau

(Mt. 8.14-15; Lc. 4.38-39)

²⁹ Nunik jega ijuntainmaya jinki Jacobo, Juan aatus, Simón Pedro, yachi Andresjai pujutain wegajui. ³⁰ Simón Pedro tsatsajig tsuweak pegajin tepau, nuniau asamtai Jisusan:

—Tsuweak tepawai, —tusag ujakaju. ³¹ Tama Jisuschakam jegan-tun uwegnum achik inankiu, dutikamuik tsuweamunak megkaekau. Nunik nantakí yujumkan inajuk, Jisusan ajamsau nijai yujau aidau-nashkam.

Kuashat jau aidau etsagakbau

(Mt. 8.16-17; Lc. 4.40-41)

³² Etsa akaiki kiyaju ai, kuashat aents jau aidaun, wakan pegkegchau aidau egkemtumu aidaunashkam Jisusan ikautkaju. ³³ Tuja aents aidau nui batsatushkam ashí waitinmag tuwakaju. ³⁴ Nunikagmatai Jisus kuashat aents tikich jatai jau aidaun etsagakui, wakan pegkegchau aidaunashkam imatiksag aentsnumian jiijuí. Wakan

pegkegchau aidauk Jisusnak shiig wainu, dutikamu asa chichaktí tusag idaichau.

Jisus Galileanum chichagkagtukbau

(Mt. 4.23-25; Lc. 4.42-44)

³⁵ Nunik tsawak eke suwe aig nantakí, yaaktan ukukí atushat aents atsamunum weu Apajin ausatatus. ³⁶ Nunikmatai Simón ni kumpají aidaujai egaak wegajui; ³⁷ nunik Jisusan wainkag:

—Ashí aents egapainawai, —tuidau.

³⁸ Tusa tama ni chichaak:

—Wemí yaakat tikiju anem aina nui, awishkam chichaman etsegkat-jai, —tau.

³⁹ Nunik Jisusak ashí Galileanum makí makichik yaaktanum jega ijuntai aidaunum wayaa chichagkagtú wekagu, nuniak wakan pegkegchau aidaunashkam jiijá ishimu.

Aents jata lepra achikbau Jisus etsagagbau

(Mt. 8.1-4; Lc. 5.12-16)

⁴⁰ Imaní wekagai aents jata lepra tutai achikbau Jisusan jegantun tikishmatug pujujus:

—Wakegalmek etsaentumainaitme, —tau.

⁴¹ Tama Jisuschakam wait anentug uwejen antiak:

—Wakegajai, yamaik tsagagta, —tiuwai.

⁴² Tusa chichaká ashimaig leprak megkaekauwai, nunik ashí iyashinig pegkeg wajasuí. ⁴³ Nunikmatai Jisus shiig akateg ukuak:

⁴⁴ —Makichik aentskesh ujakaipa, tutupit sacerdote pujamunum jegaata, nuniakum ame tsagaja pegkeg webaujum iwainmamkum, Moisés tibauwa dutiksamak jukim ejegata, ditash waipakag dekaskeap tsagaje tujabiagtinme, —tiuwai.

⁴⁵ Tusa tibauwaitak, wegak ni tsagagbaujin pachis ashí aents aidaun ujá ujakua weuwai. Nuna imatika etsejau asamtai, Jisusak wantinak yaaktanmash waimainchau wajasú asa, uwegshunum wekagu. Nuni-aig kuashat aents aidau niina wainkagtatus minituidau.

2

Jisus aents wekaechau etsagagbau

(Mt. 9.1-8; Lc. 5.17-26)

¹ Nuna dutika wajumchik tsawan pujus Jisus wakitki Capernaum jegauwai; nunikmatai ni pujamujin dekajuawaju. ² Nunikag kuashat aents aidauk jeganmag pimuidiaju, waitinum nagkamnasag tikichish wayachmin awajsaju. Imanikagmatai niishkam Apajuí chichamen etseju. ³ Nuniai cuatro aents aidau, aents wekaechaun jukiag itawaju. ⁴ Dutikawag aents piyaku asamtai, Jisus wajamunum jegamainchau asag, Jisus wajamunum mamikis jegá tuntupen wakag chigkaidiag, wekaechauwa nuna tepetaijin aepsag akakiaju. ⁵ Dutikamtai Jisus niini kajasna anentaimaidaun wainu asa, wekaechaun chichajak:

—Uchijuh, amina tudaujum aidauk tsagkugnaje, —tau.

⁶ Nuna tutai chicham umiktinun jintinkagtin aidau nui pekajaidau ditak anentaimsag: ⁷ “¿Wagka jusha tuush chichawa? ¡Apajuin pegkegchau chichajak tu wekagajama! Imá Apajuikeajama tudaun

tsagkugkagtumainuk”, tuidau. ⁸ Dita aatus anentaimainamujinak Jisus dekau asa:

—¿Wagka aannush anentaimainagme? ⁹ ¿Tuwaita imá yupichuch wekaechauwa ju tumainush, amina tudaujum aidauk tsagkugnaje taja dukaih, atsa nantakim tepetaijum jukim wetá tumainaitag dukaih? ¹⁰ Tujash wi Apajuí Uchijiyaitkun Aentsmaga Akiinau asan, ju nugka juwish tudau aidaunash tsagkugkagtumainaitag nu dekaatajum.

Tusa wekaechaun chichajak:

¹¹ —Amina tajame, nantakim ainká tepetaijum jukim jeemin wak-itkita, —tiuwai.

¹² Tama nantakug ainká tepetaijin juki ashí wainainamunum jinkiu. Nunikmatai puyatjukag Apajuin emematuinak:

—Juna jutikauk duwikish tuke wainkachuitji, —tuidau.

Jisus Levin mina jintintaig atá tibau

(Mt. 9.9-13; Lc. 5.27-32)

¹³ Nuna dutika ukuak ataktú weuwai kuchá tugkitken. Nuishkam aentsuk imatiksag tuwajuidau, dutikam niishkam jintinkagtau. ¹⁴ Nui nagkaemakmá Leví* Alfeo uchijin wainkauwai, kuichik apunu atinun akikmagtai yajumak ekeemtatman. Nunik:

—Wegajai, mina jintintaig aminum, —tiuwai.

Tama Levishkam wajakí Jisusjai weuwai.

¹⁵ Nunik nunú tsawantaik Jisus Leví jeen jegaa mesanum jegantá ekeemsau. Nuwig apú kuichkiji atinun yajumin aidaushkam Jisusa jintintaiji aidaujui ijunag nunú mesanmag jegantag ekeemsajui, kuashat niina saetus yujaidau asag. ¹⁶ Nunittaman chicham umiktinun jintinkagtin aidau, fariseo aidaujui, wainkag Jisusa jintintaiji aidaun chichajuinak:

—¿Wajuk asaya atumin jintinjamnush apú kuichkiji atinun yajumin nuigtú aents pegkegchau aina ibaujaish ijuntug yuwakush, umutnash ijuntusash umawa? —tuidau.

¹⁷ Nu tabaun Jisus antuk ayaak:

—Aents jamamtuchu aidauk ampijatnunak atsumtsame, aents jau aidau ampijatnunak atsumame. Wika aents tudaugtuchu aidaunak minitchauwaitjai, wika aents tudaugtin aidaun minitiuwaitjai.

Ijagmaka pujusá Apajuí aujut iniimsamu

(Mt. 9.14-17; Lc. 5.33-39)

¹⁸ Juagká jintintaiji aidau, fariseo aidaushkam yujumkan ijagmakag Apajuin aujuinak batsataidau, nuninai wajumak Jisusan jegantun iniinak:

—¿Wagka Juan Yamijatna nuna jintintaiji aidauk, fariseo aidaujui yujumkan ijagmainaish, ame jintintaijum aidaush ijagmainatsua? —tuidau.

¹⁹ Tama Jisus ayaak:

—¿Nuwena nunú aents ipaamu aidaush, nu nuwenu ditajai pujaigkish yujumkan ijagmak pekamainkaih? Nuwenu ditajai pujaigkik yujumkanak ijagmamait sui. ²⁰ Tujash tsawan jegattawai nuwena nunú juwam atata nu, nunikmatai ipaamu aidaush wake besemag dekapenak yujumkanak ijagmakagtatui.

*Jisus jintinkagtak yamajam jintinkagtamua duka yaunchuk jintinkag-
agtutai aina nujai g pachiimait sui tibau*

(Mt. 9.16-17)

²¹ Tusa ti junashkam tiuwai: “Makichik aentskesh jaanch yam-
agman tsupikag jaanch mamujunmag adujtuchu ainawai, yamajam
asa jaanch mamujun nuní nagkaemas ichiimain asamtai. ²² Tuja
makichkish uva yumiji yamá ijugbaunak, vino yajatai duwap apagbau
ajutnumag yajachu ainawai, dutikamak vino yamajam asa, kajiak
pushutak ipati ukagag duwapjai ajapnamain asamtai. Duwi uva yumiji
yamá ijugbauk duwap yamajam apagbaunum yajataiyai.”

Jisusa jintintaiji aidau tsawan ayamtai aig trigo juki yuwawagbau

(Mt. 12.1-8; Lc. 6.1-5)

²³ Tsawan ayamtai tsawaju ai, Jisus ni jintintaiji aidaujai trigo
ajakbaunum nagkaebau. Nuniamunum niina jintintaiji aidau trigon
kupig juidau. ²⁴ Nuniagtai fariseo aidau wainkag:

—Nijah ¿wagka amina jintintaijum aidaush, tsawan ayamtai tsawag-
mataig takantsashti tibauwa nunin aish aikainawa? —tuidau.

²⁵ Tusa tiagtai Jisus ayaak:

—¿Atumek agagbauk ausachuk ainajum, David niijai yujaamujai
yapajuinak, ²⁶ Abiatar sumo sacerdote wajas pujai, jega Apajuí
ememattainum wayaa, pag imá sacerdotek yuwati tibauwa nuna juki
yuwak aents niijai yujaunash ayugkauwa duka?

²⁷ Tsawan ayamtaiya duka aents pimpiak ayamjatnume tusa aika-
mui. Aentsuk tsawan ayamtai tsawautai nuna umigkatin atinme
tichamui. ²⁸ Nuniau asamtai, wika Apajuí Uchijiyaitkun Aentsmagan
Akiinau asan, tsawan ayamtai tsawagmataish wajukmainaita nunak
wikitjai tumainnuk, —tiuwai.

3

Tsawan ayamtai tsawaju aig aents uweje chuwijun Jisus etsagagbau

(Mt. 12.9-14; Lc. 6.6-11)

¹ Jisus ataktú jega ijuntainum wayau, nuanuí aents uwejen chuwijú
pujau. ² Nuniau asamtai tsawan ayamtaiya junin aish etsagagchatpash
etsagagmataig etsegtuka bakumí tusag dii ijuntuidau. ³ Nuninaig Jisus
aents uwejen chuwijun chichajak:

—Wajakim ejapeen wajaná, —tiuwai.

⁴ Nuna ti, tikich aidau chichajak:

—¿Tsawan ayamtai aina nuwish pegkeja duka takamainait, atsa
pegkegchawk dutikmainait, tsawan ayamtai tsawaje tusaik, aentsuk
etsagautsuk jakati tusa idaimainait? —tau.

Tamash ditak aimainachu. ⁵ Nuna ti kajeká diisú, aents aidau
dekaskeapi tuinachu asagmatai. Nunik jaun chichajak:

—Uwejum dakuekta, —tiuwai.

Tama niishkam uwejen dakueku, nuniamuik uwejenig pegkeg
wajasuí. ⁶ Jisus nuna dutikamtai fariseo aidau, Herodesan aentsji
aidaujai agaa jijnag, Jisusan maatasag chichaman umikajui.

Kuashat jau aidau Jisus etsagakbau

(Mt. 4.24-25; 12.15-19; Lc. 6.17-19)

⁷ Tujash Jisusak ni jintintaiji aidaujai kuchanum wegajui, nuniai kuashat aents Galileanmaya aidau, Judeanmaya aidaushkam, ⁸ Jerusalegnumiashkam, Idumianmaya aidaush, Jordagka amain batsamin aidaushkam, nuigtú Tiro, Sidón aina nuwi tikiju batsamin aidaush minitaijui, Jisus kuashat iwainaka takaamun antukaju asag wainkagtatus. ⁹ Imanidau asamtai Jisus ni jintintaiji aidaun:

—Bote shiig umisjum inanastajum, aents kuashat kaunainak channuntuawainum, —tiuwai. ¹⁰ Jisus kuashat jaun etsagaku asamtai, aents jau aidauk niina antigkagtatus tuwajuidau.

¹¹ Tuja wakan pegkegchau aentsú egkemtujui aidauk Jisusan wainkag, nuna aentsun tikishmitkajag, senchi jiká:

—Amek Apajuí Uchijiyaitme, —tuidau.

¹² Tujash Jisusak senchi jiyau, dekajuwainum tau asa.

Jisus chicham etsegtugkatajum tusa ishiaktinji doce etegjamu aidau (Mt. 10.1-4; Lc. 6.12-16)

¹³ Nuna dutika Jisus niina nemajus yujaina nuna yajuak mujanum wakauwai. ¹⁴ Dutika nuanuiyan doce tuke niijai ijunja wekaesatin aidaun, nuigtushkam niina chichamen etsegkati tusa ishiaktinji aidau-nash etegjauwai. ¹⁵ Dutikak jau aidau etsagagtinun, nuigtú wakan pegkegchau egkemtugbau aidau jiktinnashkam senchijin susauwai. ¹⁶ Nunú aidauk ju ainawai: Simón, Jisus Pedro atatme timawa nu, ¹⁷ Jacobo ni yachi Juagjai, Zebedeo uchijí aidaun Jisus Boanerges adaikajua nu (nunak ipamta uchijí aidau tusa tawai). ¹⁸ Andrés, Felipe, Bartolomé, Mateo, Tomás, Jacobo Alfeo uchijí, tikich Simón niina nugken agkanmitkatatus kuashat aents aidaujai chichajakua nu. ¹⁹ Judas Iscariote Jisusan sujukua nunú. Dutika adaijam jegá kaunawajui.

Iwanch Beelzebú daagtinun senchijin Jisusak wakan pegkegchaunak jiyawawai tibau

(Mt. 12.22-30; Lc. 11.14-23; 12.10)

²⁰ Nunikmatai ataktushkam aents aidau tuwagkag yujumkash yu-main awajuinachu. ²¹ Nuna antukag Jisusa patayí aidau jukitasag kautuawaju, anentainkachu wajas wekaetsuash tusag.

²² Nuigtushkam chicham umiktinun jintinkagtin aidau Jerusalegnumia kaunawaju, Jisusan chichajuinak: “Juka Beelzebú, wakan pegkegchau aidau apujiya nuna senchijin wakan pegkegchaunak jiyawawai”, tuidau.

²³ Tiagtai Jisus nuna antuk, ditan untsukag augmatbaun pachitus chichajak: “¿Wajukaya mai iwanchkesh jiiinimainaita? ²⁴ Makichik nugkanmag batsatiatak pempeentunikiag maaní batsatkujag megkaem-main ainawai. ²⁵ Tuja tikitchakam aents makichik jeganmag ijunag batsatiatak pempeentunikiag maaní batsatkushkam ditak megkaem-main ainawai. ²⁶ Aantsag iwanchia dushakam pempeentuniki jini-akug, niina senchijinak megkaemmainai.

²⁷ “Aents senchigtina nuna jeen wayaag makichkish wajiijinak yajutmainchau ainawai nuna jigkatskek, untsu nuna jigkajá ashí wajiijinak yajutmain ainawai.

Wakaní Pegkeji pachisa tibau (Mt. 12.31-37)

²⁸ “Dekas tajime: Apajuik ashí aentsun tudaujinak tsagkugmainai, niina ashí pegkegchau pachis chichagkau aidounashkam. ²⁹ Tujash Wakaní Pegkejiya nuna pachis pegkegchaun chichagkau aidauk, atakea duwish tuke tsagkujam achagtinai, nuniau asag nuna tiajuk suwimak ajumaish tuke atina nuna jukiagtinai.”

³⁰ Nunak Jisusak Wakaní Pegkejiya nujai takaunak, iwanchin senchi-jiya nujai takaawai tabau asa tiuwai.

Jisusa dukují ni yachi aidaujai kautuamu

(Mt. 12.46-50; Lc. 8.19-21)

³¹ Nuna tusa inagnaku ai Jisusa yachi aidau dukujijai kautuawaju, nunikag agaag ijuntsag anuí ujatjuktajum tiajui. ³² Tuinam Jisusan tenteawag pekajuidau ujainak:

—Amina duku yatsum aidaujai kautjamak egapainawai, —tuidau.

³³ Tusá ujaam ni chichaak:

—¿Yaita mina dukug, mina yatsug aidash?

³⁴ Nuna tusa nui pekajuidaun ayampatua:

—Jujú ainawai mina dukug, mina yatsug aidauk. ³⁵ Ashí aents Apajuí wakejamun takaina nuuwai mina dukug, mina yatsug, mina ubag aidauk, —tiuwai.

4

Ajakan ajakbau pachisa augmatbau

(Mt. 13.1-9; Lc. 8.4-8)

¹ Nuwiya jiinki Jisus kuchanum jegamtai kuashat aents tuwagkajam, botenum egkemag ataktú jintinkagtau, aents aidauk kaamatak ijuntsamta. ² Nunik augmatbaun pachis kuashat jintinkagtak:

³ “Ju shiig antuktajum: Ajakan ajakbau ajajin ajaka jigkayin nagkimak ukimatus weuwei, butik ajakmau asa. ⁴ Nunik jegantá ajajin jigkai nagkimam jintá kakekaunak yakiya pishak kaketuk amukuí.

⁵ Tikich jigkai kayagnunum nugka imanik atsamunum kakekauwai, nunikuk wamkes tsapaidiajui, ⁶ nuniktatman etsa jinaak, kagkapé initak akaejachu asamtai apeká ijinauwai. ⁷ Tuja tikich jigkai kakekajui jagki ayaunum, nunik tsapaittaman jagki yutuauwai, butikamu asa ajakak nejeachui. ⁸ Tujash tikich jigkai nugka dekas pegkegnun kakekauwai, nunikajuk tsapaidiag muun wajas, makí makichik ajak aidauk treinta, tikich sesenta, tikich cien aatus nejekajui”, tau. ⁹ Nuna ti nuigtushkam: “Dita antutaiji ajamuk antuktinme”, tiuwai.

Jisusa jintintaiji aidau iniimsamu

(Mt. 13.10-17; Lc. 8.9-10)

¹⁰ Nuna jintinkagtua ashimkamtai, tikichik shimuinai ujumak juwakaju aidau ni jintintaiji aidaujai jegantag, augmattsa jintinkagtua-mun pachisag iniidau. ¹¹ Tama Jisus ditan chichajak: “Atumnak Apajuí ni aentsnum inamjatnuji dejakakchamun wi pachisan etsejag junash dekamtijamatatus wakejutpagme. Tujash tikich aidauk dekamain ainatsui, nuna takumpap tawa tusajag, nuaduí augmatbaun pachisan ditanak tajai. ¹² Kuashat iwainajan takaamun wainainakush wain-machu wajukmaina nuninawai, antuinakushkam nunap tawa tusajag dekainatsui, nunidau asagmatai Apajuik ditá tudaujinak tsagkugmain-chauwai.”

Ajakan ajakbau timag nunak juna takun timajai tusa Jisus etseggamu
(Mt. 13.18-23; Lc. 8.11-15)

¹³ Junashkam tiuwai: “¿Atumek jujú augmattsa tabauk dekat-sjemek? ¿Aniautigmesh wajuk dekattajume, wi tikichin augmattsan takuish? ¹⁴ Ajakan ajakbau timag nunak: Apajuí chichamen etsegnun takun timajai. ¹⁵ Jintá jigkai kakekaun pishak amukú timag nunak: Aents Apajuí chichamen etsegbaun antakush dekaskeapi tachau asamtai, iwanch chicham antukbaujin sakapitka nuna takun timajai. ¹⁶ Ajakan jigkayí kayagnunum kakekaju timag nunak: Aents Apajuí chichame etsegbaun yamaikik shiig aneas antukuitak ¹⁷ utugchatan igkuak waitiak, pachitsuk idayidauk; ajakan kagkapé initak akaejachu asa, etsa sukuam waamak jinuwama numamtuk wajaina nuna takun timajai. ¹⁸ Jigkai jagki ayaunum iyaaaju timag nunashkam: Aents Apajuí chichamen antuinayatak, ¹⁹ ju nugkaya wajiin imá senchi puyatjuinak, wiakchameatasag imá senchi anentaimituina nuna takun timajai. Ashí ju nugkanmaya waji wakegamua nunú chicham pegkeg antukbaunak imanchau emawai. ²⁰ Untsu jigkai nugka pegkegnum shiig tsapaidiaju asag nejetnash imanik nejeawajui timag nunak: Aents Apajuí chichamen shiig dekaskeapi tusag, imá Apajuí wakejamunak takaina nuna takun timajai. Nunú aents aidauk, ajak treinta jigkain, sesenta, cien aatus nejekú aina numamtin ainawai.”

Lámpara pachisa augmattsamu

(Lc. 8.16-18)

²¹ Junashkam chichaak: “¿Lámpara ekemakaish, dukukaik dutikachkuish pegaká wakentinig aputayama? ¿Dutiktsuk yakí ekenchataigkama? ²² Anmamtuk ashí uukbau aidaush wantinkagtinai, aantsag ashí dekachbau aidaushkam dekaamu agtinai. ²³ Dita antutajiji ajuinamuk antuktinme.”

²⁴ Junashkam tiuwai: “Atum antajum nunú shiig antukjum umitaik, Apajuishkam aan kuashat dekamtijamattawai. ²⁵ Nuniau asamtai ní mina chichamjun dekaskeapi tusa shiig puyatjus antaunak aan nagkaemasan jintintuattajai, tuja ni mina chichamjun puyatjus antachuk machik antamujish kajimitkam atinai.”

Jigkai tsapaamu pachisa jintinkagtuamu

²⁶ Junashkam Jisus tiuwai: “Apajuí aentsnum inama duka, aents ajaka jigkayin ajauwa nujai betekmamtinai. ²⁷ Nunik ajaa kanak tepaish tuja iwaa pujaishkam kashi tsawai aish jigkaik tsapaawai, nunik tsakawai ajauwa duka wajuk tsakaawa nunak dekatsaig. ²⁸ Nunak nugka nigki tsapapamu asa nuniawai, dekatkauk dupaya nunin tsapai tsakajá pasamjawai, nunik nejek ayatak jigkaik wegawai. ²⁹ Nunik tsamakmatai hozan juki jiiintawai juuktatus, tsawan juumain jegau asamtai.”

Mostaza jigkayí pachisa jintinkagtuamu

(Mt. 13.31-32; Lc. 13.18-19)

³⁰ Junashkam Jisus tiuwai: “Apajuí aentsnum inama dusha ¿wajijai apatkaya imá shiijash antumainaita? ¿Wají augmatbauwa yaijatmainaita Apajuik juní inamui tusa shiig dekamaina dusha? ³¹ Juka mostazan jigkayí nugká ajatiama numamtinke. Ashí nugkanmaya jigkai aina nuwiya imá piipichik mostazan jigkayiya nuuwai.

³² Nuninchitkushkam nugká ajaam tsakaakug kadaukdaugkin wegawai. Iman wajasmatai yakiya pishak aidaushkam nuna wakentí bikintunum pasugmainawai. Numamtuk Apajuishkam aents wajumkea nui inabaujin nagkama kuashat emawai.”

³³ Kuashat augmatbaun pachis jumamtin aidaun jintinkagtujakuí dita yupichu antumainun. ³⁴ Augmatbaun tutsukek jintinkagtujakchauwai, untsu niina jintintaiji aidaunak ashí nuna takun tajai tusa dekamtikajakuí.

Jisus dase imijkamu

(Mt. 8.23-27; Lc. 8.22-25)

³⁵ Nunú tsawantai kiyagbaunum niina jintintaiji aidaun chichajak: —Amain wegagmi, —tiuwai.

³⁶ Tusa aents aidaunak akateg ukuinak Jisus botenum egketunak dutiksag jukiag wegajui. Nuniai tikich botenum minidaush aidau.

³⁷ Nunik weenai dase shiig senchi kuchan umpuak tsukatmitkau, imaniau asa botenmag yumik yajanu. ³⁸ Imatiktai Jisus bote ukujin atamjutain atamjuk kanak tepettaman ishintainak:

—¡Jintinkagtinuh! ¿Amek jutii jakektatag duka pachijattsumek? —tuidau.

³⁹ Tama nantakí dasen jiyak idayak, nayantsanashkam:

—¡Mijakta! —tiuwai.

Tamawaik kuchashkam mijak miyasuch yaunchuk aajakbauk nunisag we patamsauwai. ⁴⁰ Nuna dutika niina jintintaiji aidaun chichajak:

—¿Wagka sapigmajume? ¿Wagka Apajuyiaish kajintsajum anen-taimtsugme? —tau.

⁴¹ Nuna dutikamtai senchi puyatkag sapigmakaju, nunikag ditak pempeentunikiag:

—¿Jusha ya asamtaiya dasesh, kuchash antujuinawa? —tudayinau.

5

Gadarammaya aents wakan pegkegchau egkemtuamu

(Mt. 8.28-34; Lc. 8.26-39)

¹ Nunik Galilea kuchajin amain Gadarammaya batsamtaí nugkeen katigkaju. ² Nuwi anumak botenmaya jinai, ukumatainmaya aents wakan pegkegchau egkemtugbau Jisusan tajuauwai. ³ Nunú aentsuk ukumatainum pujú, jiju ikagmauwai jigkajaish emetuatakamá tujinkamu. ⁴ Jiju ikagmauwai uwejen jigkajá, dawenum jigkajá awajkamash tsujiag utsau, imaniau asa emetmainchau wajaí wekagu. ⁵ Nuniak kashi tsawaishkam mujanum, ukumatainmash wekagas untsamá wekagu, nuigtush kayá jukishkam ijubau. ⁶ Imaní wekagu asa, Jisusan atushat wainmawaik tupikatki jegantun tikishmatug pujujus, ⁷ senchi untsamak:

—¡Jisusah, Apajuí nayaimpinum pujuwa nuna uchijiyah! ¿Wagka amesh minaish miname? Apajuí pachisan segajame, ¡wait aneamam suwimkak sukagtusaipa!

⁸ Nunak Jisus:

—Wakan pegkegchauwah, aents jinkim ukuktá, —tibau asa tiuwai.

⁹ Tutai Jisus iniak:

—¿Amesh yaitpa? —tau.

Tama ni aimak:

—Wika Untsujiyaitjai, wagki jutiik kuashat asaja, —tiuwai.

¹⁰ Nuna ti Jisusn segainak: “Wait aneam yajá tikich nugkanmag awekagtipa, jutii pujag juwig idaikagtusta”, tiajui. ¹¹ Nuanuí mujanum jegantatak kuashat kuchi yutaijin yuwinak ijunu asamtai, ¹² wakan pegkegchau Jisusan segainak:

—Wait aneam awi ishijatkata, au kuchi ijuna awi utsanawagmi, —tuidau.

¹³ Tiagtai Jisuschakam:

—Wamkesjum wetajum, —tima wakan pegkegchau aidau aentsnak ukuinak, dos mil kuchi tumain ijununum utsanawajui. Dutikawajam kuchishkam pisajag betsag tajagak kuchanum najataunum utsanawag jinawajui.

¹⁴ Nunikagmatai kuchi kuitamin aidaushkam pisajag yaaktanun jegawag etsejuinak, ajanum batsataidaunash dutiksag ujakaju. Dutikawajam, wagkag ankae tusag diisagtatus shimutkaju. ¹⁵ Nunik Jisus pujamunum jegakmag, wakan pegkegchau shiig kuashat chimpimtum jam waitkam wekayin pegkeg wajas, jaanchin nugkujá Jisusai ayaumas eketun wainkag, senchi ishamkajui. ¹⁶ Nuna wainkau aidau tikich aidaunashkam ujaidau, aents wakan pegkegchau chimpintuamu tsagajun, kuchi jinaamun pachisashkam. ¹⁷ Nunikag Jisusan:

—Wait aneam ju ii nugkega juwig pujutsuk yajá weta, —tusag segajui.

¹⁸ Tusá tima Jisus wegak botenum egkemtai, wakan pegkegchau egkemtuamu etsagagbaushkam:

—Wisha amijai wekaesatjai, —tusa segauwai. ¹⁹ Tujash Jisusak ayú tutsuk:

—Dekas jeemin wetá pataim batsatbaunum, nunikam shiig kuashat Apajuí amina wajuk wait anenjamjae nunú pachisam ujaktá, —tiu.

²⁰ Tima wegak Decápolis jegaa, Jisus niina kuashat wait anenja nuna pachis etseju. Nunitai ashí puyatjukag diidau.

Jairo nawanji tikich nuwa jaujai etsagagbau

(Mt. 9.18-26; Lc. 8.40-56)

²¹ Jisus botenum egkemag kuchá amain katigmatai, kuashat aents aidau tuwagkaju; dutikam nigka nuwig kuchá tugkitkenig juwakui. ²² Nui pujai jega ijuntaiya nuna apuji Jairo daagtin Jisusan wainak, jegantun tikishmatug pujus:

²³ —Mina jegajuí wemí, mina nawantug ashí mayai ashinak tepaun ukujjai. Wait aneam ame minim uwegmin antinjukta, dutikam nawanjush tsagag pujugtusti, —tusa segau.

²⁴ Tama Jisus niijai wegau, nunitai kuashat aents saetuidau asag Jisusan chanuidau. ²⁵ Nu imatikainamunum nuwa doce mijadai numpan puwak waitú pujú, ²⁶ nuniak kuashat ampjatin aidaunum wekagas ampimak ashí ni ajamuchijinak ashimkush, tsagautsuk nuní nagkaemas waitú wekayin, ²⁷ Jisus pachisa augmatuinamun antuk, aents tuwakbaunum eteenki ukujin pataetuk Jisus jaanch pataká nugkuagbaujin antinkauwai. ²⁸ Nigka: “Imá Jisusa jaanchjinalesh antignuk tsagagatjapi”, tau asa. ²⁹ Nunik antiamuik numpa puwamujinak megkaekauwai, nunitas ashí niina iyashinish pegkeg wegamun

dekapjauwai. ³⁰ Nunitai Jisus niina senchijí jininun dekapmamag, aents minidaun ayampatua:

—¿Ya mina nugkutaijuish antinkae?

³¹ Tutai niina jintintaiji aidau:

—Kuashat aents tuwakaju asag chanumpaina nu wainiatkumek, ¿ya antinkae tusamesh tame?

³² Nu tamashkam Jisusak ashí diyau, yaki antinkame tusa wainkata-tus. ³³ Nunitai nuwa Jisusa jaanchjin antig tsagajuk, senchi puyatuk kujaukmaikia Jisusan jegantun, tikishmatug pujus dekaskenum ashí ni waitiamujinak ujakú. ³⁴ Tusá ujaam:

—Nawantah, ame kajintsá anentaimam duwi tsagajume, shiig agkan anentaimsam wetá. Yamaik agkan wajasume, —tiuwai.

³⁵ Eke chichaak wajai, apu Jairo jeen batsatu kaunawag jegantun ujainak:

—Nawanjumek jakame ¿itugkatasamea jintinkagtinush waitkame? —tuidau.

³⁶ Nu tuinamun Jisus antuk, jega ijuntain apujiya nuna pempeentuki:

—Puyatkaipa, ayatak kajintsam anentaimsata, —tiuwai.

³⁷ Nuna tusa aents aidaunak, minigpajum tusa ukuak Pedron, Jacobon ni yachi Juagjai yajuak weuwai. ³⁸ Nunik apú jeen jégakmá kuashat aents pampainak, buutuinak wake besemag batsatun wainkauwai. ³⁹ Nuniai Jisus wayaak:

—¿Wagka pampakjumesb buutush batsatjume? nuwauchik jakache kanag tepawai, —tiuwai.

⁴⁰ Tutai dushikidau. Tujash nigka nuna ti, ashí aents nui batsatunak jijjá, nuwauchi apají, dukují, nuigtú ni jintintaiji kampakum aidaujai utsanauwai nuwauch jaka tepamunum. ⁴¹ Nunik uwegnum achik:

—¡Talita cumi! —tiuwai. (Nunak: “Nuwauchih, amina tajame nantaktá”, taku tiuwai.)

⁴² Tusa tamawaik nuwauch doce mijan ajamu jakaushkam nantakí wekagu. Nuna dutikantai aents aidauk puyatjuk dii ijuntuidau.

⁴³ Nuniagtai Jisus:

—Tikichkesh ujakaigpajum —tusa idayak:

—Yutái susatajum yuwati, —tiuwai.

6

Jisus Nazaret pujusbau

(Mt. 13.53-58; Lc. 4.16-30)

¹ Jisus nuwiya jinki ni nugken Nazaret wetai, niina jintintai aidaushkam nijai wegajui. ² Nunik tsawan ayamtai tsawagmatai Jisus jega ijuntainum wayaa jintinkagtau. Nunitai antukag puyatjukag:

—¿Jusha tuwí imatikash unuimajuita? ¿Itusaya imatikash dekawa wainchatai aidaunash iwainag taká junash? ³ ¿Ju María uchijí carpinterowe duchaukaih? ¡Ju Santiago, José, Judas, Simón aina nuna yachiyajama! —tuidau —¡Nuigtush umayí aidaush jutijai batsatajama! —tusag pampantuidau,

Jisusaig kajinas anentaimainachu asag. ⁴ Nuniagtai Jisus:

—Apajuí etsegtin niina nugken pujusá etsegtaik, niina patayí aidaush, niina jeeniagkesh eme anentus antugchau ainawai, tujash

tikich nugkanum wekagas etsegtaik shiig aneas antujin ainawai, — tiuwai.

⁵ Nuna tau asa nuwig dita wainkachbaujinak iwainajag takaschauwai, nuniayatak ujumchik jau aidaun uwejen buuknum achik etsagakui. ⁶ Ditak dekaskeapi tuinachu asamtai puyatjuk anentai jegagchauwai. Nunik tikiju yaakat ayaunum wekagas jintinkagtau.

Jisus ni jintintaiji aidaun chichagkagtuktinme tusa ishiakbau
(Mt. 10.5-15; Lc. 9.1-6)

⁷ Nunik ni jintintaiji doce aina nuna untsuk ijumag, jimá jimajan apatuk ishimak, wakan pegkegchau aidau jiiimainnash senchijin susauwai. ⁸ Dutika:

—Jintá wegaku atsumainuk ayatak ushujutaigmek jukitajum. Makichkish jukigpajum jintá wegaku atsumainuk, waji egkesá jutaigkesh, yuwatnukesh, kuichkikesh jukigpa. ⁹ Ayatak sapatik wegamaktajum, nuniakjumesch yachia nugkugtinuk jukigpajum, ¹⁰ —tusa, nuigtú ditan chichajak:

—Atum tu jeganma wayattagme, nunikjumech nuwig pujusjum wegakjum ukuktajum. ¹¹ Untsu atum tu yaaktanma jegattagme nuniagmin nuwiya aents aidau ditá jeen jujamtan dakitjamainak, atum chicham etsegbaun antutnash dakituinakuig, nunú yaaktak ukuakjum atumi dawemin nugka awa nu pegagjum akakekjam ukuktajum, dita suwimak jukitnuji iwaintakjum. Dekas tajime: Atak Apajuí aents suwimak suwamu atina nuaduí Sodoma, Gomorranmaya aents aidaujai suwimak susamua nuna nagkagas suwinkan jukiagtin ainawai, —tiuwai.

¹² Tima jintintaiji aidau shiyakag, aents aidaun: Tudaujum idaikujum Apajuí nemagkatajum, tuidau. ¹³ Nuninak wakan pegkegchau aentsun egkemtaju aidaunash jiiijag ishimainak, jau aidaunashkam buuken aceitiyai nijak etsagaidau.

Herodes Jisusan dekas yakita tusa deka juatatus wakejukbau
(Mt. 14.1-12; Lc. 9.7-9)

¹⁴ Apu Herodes Jisus pachisa augmatuinamun antuku, Jisusa daajig ashí yantannum wantinjau asamtai nuna antuk: “Duka Juan Yami-jatin maamua nu nantakiu asa, senchigtin wajas imaniawai”, tau.

¹⁵ Tutai tikich chichaidau: “Auk Eliasai” tuinai, tikich chichaidau: “Apajuí etsegtinai nuniachkush Apajuí etsegtin aajakú aina dut-sukaitai”, tuidau.

¹⁶ Nunú tuinamun Herodes antuk:

—Auk Juan wi buuké tsupigkatajum tima tsupijuk maawajamia nunú nantakne, —tiuwai.

¹⁷ Nunak Herodesak nigki Juan achiktajum tima shimutkag, achikag jiju ikagmauwai jigkajag aents achiká egketainum egkeau aajakui, ni yachi Felipe nuwen Herodiasan nuwatuk pujutai, ¹⁸ Juan chichajak: “Herodesah, amek yatsumi nuweg nuwatkamech pujumaitsume”, ¹⁹ tabaun Herodías antuk kajejuk maatatus wakegayatak dutikmainchau dekapeau. ²⁰ Wagki Herodesak ishamau, Juagkak aents pegkeg tudaunash takachun dekau asa. Iman asamtai ayatak kuitamu, nuniau asa tamash puyatayatak wakejus antau. ²¹ Nuniamunum Herodes ni akinamuji tsawagmatai jistamak, yutai umikbaun ni aentsji aidaujai nuigtú comandante, apu Galileanmaya aidaujai ijunag

yuwinak pegagbaunum, ²² Herodiasa nawanji wayaa nantsebaw, nuniak Herodesan nuigtú niijai mesanum pekajuidaunashkam shiig awajkauwai. Nunikmatai apu nuwan chichajak:

—Ame wakegamu segattá, tujutkuminig amastajai, —ti, nuigtú:

²³ —Wi taja nunak dekas dutikattajai, wi inamag jukesh jimaituk segatkuminish dekas amamain asan tajame, —tiuwai.

²⁴ Tima jiinki dukujin jegajua:

—¿Wajinak tujuta nunash segatja? —tau.

Tama dukují ayaak:

—Juan Yamijatna nuna buuké segatá, —tau.

²⁵ Tima nuwauchishkam wamkes wakettsag apu pujamunum wayau, nunik:

—Yamaikiuch Juan Yamijatnun buuken, platonum egkejá sujústí tusan wakegajai, —tau.

²⁶ Tama Herodes shiig senchi wake besekú, nuniayatak ditajai peka-jaidash antuinamunum, dekas amastatjame tiu asa yapajimainchau dekapjau. ²⁷ Nuniku asa apushkam makichik suntajan awemauwai, Juagká buuké tsupikam utitá, tusa. ²⁸ Tima suntajishkam aents achiká egketainum jegá Juagká buuken tsupigkau, dutika platonum egkea itan nuwauchin susau, dutikam ni juki dukujin susauwai.

²⁹ Nu dutikamun Juagká jintintaiji dekawag kautuk, iyashin jukiag ukusajui.

Cinco mil aentsun Jisus ayugkamu

(Mt. 14.13-21; Lc. 9.10-17; Jn. 6.1-15)

³⁰ Jisus chicham etsegtugkatajum tusa ishiakbau waketug kaunkag, Jisusan:

—Nuní takasmaji, aaja jintinkagtuamji, tusag —ujaidau. ³¹ Tama ni ayaak:

—Wegagmi, agkan aents atsamunum nunika machik ayamsagmi, —tiuwai.

Nunak tikich waketiagtaish, tikich minii wajaidau asagmatai, yujumak yumainush agkan atsugbau asa, tiuwai. ³² Nunik botenum chimpimjag ditak shiyakajui nugka agkantunum.

³³ Tujash nunik wetatman kuashat aents aidau wainkag, kukag juwakiag we weenakua, ditá Jisus anumkatnunum jegawaju. ³⁴ Jisus botenmaya jinkamá shiig kuashat aents tuwaká ijunun wainkau, nunik wait anenmain diisuí, uwig kuitamainji atsugbau wajukmaina numamtuk wajaidau asagmatai. Dutikak shiig kuashat jintintu.

³⁵ Nuniai etsashkam akagu asantai, niina jintintaiji aidau:

—Juwig jutiik aents atsamunum batsatji, etsash akaewai. ³⁶ Aentsuk ishiakta, yaaktanum jegattak aents batsata nui aja tikiju aina nui wegag dita yuwatnujin sumaktinme, dita yumainuk atsawai, —tuidau.

³⁷ Tiagtai ni ayaak:

—Atum dita yuwatnuk susatajum, —tiuwai.

Tama dita aiinak:

—¿Jutii shiyakaiyash doscientos tsawan takasá kuichik jumaina ibauwaiyash pag sumaka ayugkatag? —tuidau.

³⁸ Tiagtai ni ayaak:

—¿Wajupa pag ajutjamainawa? wejum diistajum.

Tima wegag:

—Cinco pag nuigtú jimagchik namak amae, —tuidau.

³⁹ Tusa ujakam:

—Aents aidau yajuakjum chijichi aina anuí shiig akanjajum batsag-tajum, —tusa ishiakui.

⁴⁰ Tiajam ditashkam cien aentsun ijumag batsainai, tikich cincuenta ijumush aidau. ⁴¹ Dutikawagmatai cinco pagkan nuigtú jimagchik namaka nuna juki, nayaimpinum pagkai see tusa, pagkan puujá jintintaiji aidaun susaju, dita aentsun tinamkatnume tusa. Dutiksag namak jimaja nunashkam ashí tinamkau. ⁴² Dutikawajam ashí shiig yuwawag ejemakaju. ⁴³ Nunikagmatai pag mamayakjai ampinkaunak yajuakag doce chagkinnun aimjaju. ⁴⁴ Junak cinco mil aishmag aidau yuwawajui.

Jisus yumí awanken wekaesá webau
(Mt. 14.22-33; Jr. 6.16-21)

⁴⁵ Nuna yuwawag nagkanaig niina jintintaiji aidaunak:

—Atumek botenum chimpimjajum amain Betsaida katigtajum.

Tusa ishimak aents aidaun aujus ishiaktatus juwakui. ⁴⁶ Nunik aentsun aujus ukuak mujanum wakauwai Apajin ausatatus. ⁴⁷ Nuniai kiyaju, boteshkam kuchanum ejapean wegai nigki kukag juwaku. ⁴⁸ Nunikmá wainkau dase igku umpuamu asa, wiya wiyantuinakua pimpikiag tsawampaidan. Nuniamunum niishkam yuminum wek-agas ayaumas nagkaikitatus ditan adijkau. ⁴⁹ Nunik yumí awanken wekagas minittam wainkag, dita anentaimsjag pasun minatsuash tusag senchi untsumaidau, ⁵⁰ ashí wainaidau asag ishamainak. Imati-agtai Jisus chichaak:

—¡Witjai ishamjukaigpajum! —tiuwai.

⁵¹ Tusa botenum egkemjamtai daseshkam mijaku; nunikmatai senchi puyatkag anentai jegagchaju. ⁵² Nunak Jisus namak puujá ikaugka ajamamunash shiig anentaimjag dekaachaju asag, utujimas anentaimaidau.

Genesarenumia jau aidau Jisus etsagakbau
(Mt. 14.34-36)

⁵³ Nunia nuniakua kuchá amain katigkag Genesaret nugkanum kaamatak anumkaju. ⁵⁴ Nunik jiinainaig Jisusnak aents aidauk wainkaju. ⁵⁵ Nunikag ashí yaaktanmayan shimutkag jau aidau-nak pegakjin pataidiag Jisus nui pujawai tabaun antuinakug nui emaidau. ⁵⁶ Dutikaidau asag aents yaakat batsamin aidau, yaaktan ukukiag batsamin, ajajin batsamin aidaushkam, jaun yajuakag jintanum batsaidau, dutikam: Idaikagtusta ame pataká nugkuajam nuna nagkattsamujigkesh antigkagmi, tusag segaidau. Tuja ashí aents Jisusa jaanchjin antidauk tsagainau.

7

Aentsun pegkegchau ema nunú pachisa Jisus etsegkamu
(Mt. 5.1-20)

¹ Fariseo aidau, chicham umiktinun jintinkagtin Jerusalegnumia kaunawaju aidaujai, Jisusan jegaantajui. ² Nunikag Jisusa jintintaiji aidau ikigmatsuk yutatman wainak, anmainchaun aaninawai tusag chichaman patatuidau. ³ Fariseo aidauk, ashí judío aidaushkam dita

muunji aidau: Ikigmatskek yuchatai atí, tibau asamtai, tuidau. ⁴ Ditaik, yutai sujutainum wejum taakjumesik ikigmatskek yuwawaigpajum tibau aajakajui. Nuigtushkam kuashtai dita umijakbau aidauk; shikiká umutai, yajaa ekentai, yujumak inagku takatai jiju aidaushkam, nuigtú pegakshakam tuke nijasjumké atajum tibau asamtai. ⁵ Fariseo nuigtú chicham umiktinun jintinkagtin aidaujai Jisusan jegaantag:

—¿Wagka amina jintintaijum aidauh, iina muunji umiktajum tusa tibauwa nuna umitskesh ikigmatskesh yuwinawa?

⁶ Tama ni ayaak:

—Aentsú tsanú aidauwah, Apajuin etsegtin Isaías atumin pachisagak:

‘Ju aents aina juka, minak dekas ditá anentain eme anenjuinak adaituinatsui,

ayatak wenin adaituinawai.

⁷ Nuniau asag, mina pachittsag auna emematjai tujutuinaawai; jintinkagtuinakush, aents umiktajum tibauwa nuna jintinkagtuinak Apajuinu jintinkagtaji’, tuinaawai.

⁸ —Atumek dekas Apajuí chicham umiktajum tibaujiya duka umigtsuk, aents tibauwa nu umiajume. Umutai yajá ekentai, vaso nijakjum nuigtushkam tikich kuashtajumamtin aidau taká yujajume. ⁹ Nuigtushkam Apajuí chicham umiktajum tujabauwa duka imanchauch emakjum, atum chicham najanamua nu umiagme. ¹⁰ Nuniakjum Moisés chichaak: ‘Atumin apa dukujai eme anentsá diitajum, dutikakjum yaigtajum; untsu ni apajin, dukujinakesh pegkegchaun chichajuk tsagkugtsuk maatajum’, tibauwai. ¹¹ Tibau aig atum chichaakjum: ‘Aentsuk ni apajinak, ni dukujinakesh: Mina waji ajutaina juka corbagkai, nuniau asamtai yaimaitsujame tumainai’ tajume. (Corbán tawa duka: “Apajuí anentag anagkuamu”, taku tawai) ¹² Atumek nuna aatus tauk apajinak, dukujinakesh yaimaitsui, tajume. ¹³ Ju aatsa tau asajum, Apajuí chicham umiktajum timawa duka imanchauch emajum idaikujum, atumi muunjum umiktajum tibauwa duke wejajakjum tikich jumamtuk aina dushakam takaagme, —tiuwai.

¹⁴ Juna ti aents aidau untsuká chichaak:

—Wi taja ju shiig antugtuktajum: ¹⁵ Aentsú wenin agaaya wayaa duka makichkish aentsnak pegkegchau emamainuk atsawai; untsu anentainmaya jiina nuuwai aentsun pegkegchau emauk.

¹⁶ Ni antutaiji ajamak antuktinme, —tiuwai.

¹⁷ Nuna tusa aents aidau unkuak jegá wayamtaí, niina jintintaiji aidau nu augmatbaun pachisag iniidau. ¹⁸ Tama ni ayaak:

—¿Atumesh tikich shiig antuinatsu antsagmekek antuinatsjum? Ashí agaaya wayaa duka aentsnak pegkegchau emamait sui, ¹⁹ anentainum waitsuk, ampugnumag egkemag letrinanum ajapnau asa.

Junak ashí yutaig pegkeg ainawai tusa tiuwai. Nuigtushkam:

²⁰ —Aentsú anentain jiina nu aentsnak pegkegchau emawai. ²¹ Duka aentsú anentainia jinui pegkegchau anentaimat, pegkegchau takas-tasa wakegamu, magkagtamushkam, ²² tsanijinbau, kasabau aidau, sujimamu, pegkegchau ata, tsanubau, nuwajai shiig senchi takanistasa wakegat, tikichdau diigsá kajejut, yumigmamu, ememamushkam, anentainkas takamat aina dushakam. ²³ Ju ashí pegkegchau aina duka

anentainmaya jiinui, nuniau asa aentsnak pegkegchau emawai, —
tiuwai.

Tikich nugkanmaya nuwa Jisusan dekaskeapi tibau

(Mt. 15.21-28)

²⁴ Nuwiya jiinki Tiro nugkanum, Sidón nugkanmashkam weuwai. Nunik makichik aentskesh dekajuawainum tau asa jeganum wayau, tujash uumainchau dekapjau. ²⁵ Nuniai nuwa nawanji wakan pegkegchau egkemtugbau antuku nui pujawai tabaun, nunik tajuntun tikishmatjau. ²⁶ Duka nuwak griega Sirofenicianmaya aajakuí, nunú segau:

—Nawantug wakan pegkegchau egkemtugbauwa nu jigtugkita, — tusa. ²⁷ Tujash Jisus ayaak:

—Jasta, dekatkauk Israela uchijí aidauwá yuwatnume, pag uchi yuwamu atankí yawá suwamuk pegkegchauwai.

²⁸ Tama nuwa ayaak:

—Ehé dekaske Apuh, tujash yawashkam mesa wapken pujusá uchi yujumak akakeamun yuwame, —tau.

²⁹ Tama ni ayaak:

—Nunú tame duwik wetá. wakan pegkegchauk nawanjumnak jiinki ukukne, —tau.

³⁰ Tima nuwashkam wakitki jeen jegakmá, nawanji wakan pegkegchau egkemtuumunak agkan wajas pegaknum tepettaman wainkauwai.

Aents chichachun Jisus etsagagbau

³¹ Jisus Tiro nugkanum pujau jinki Sidón nagkaemak, Galilea kuchajin jegauwai. ³² Nunikmatai aents empekú dewaun itaantaju, dutikawag:

—Uwegmin achigtukta, —tusag segaidau.

³³ Tiagtai Jisus aents nuninun akanak juki, ni tsajam uwejen kuwishin inujuauwai; dutika usukin juki nuna inayin antinkauwai.

³⁴ Dutika wajan nayaimpinum pagkai mayatak: “Éfata”, tau. (Nunak “ujanta” taku tiuwai.)

³⁵ Tusa tamawaik aents antuchun kuwishig ujaniuwai, inayishkam pegkeg wajasuí, nunikmatai shiig chichakú. ³⁶ Dutika:

—Makichik aentskesh ujakaigpajum, —tiuwai. Tusa tibau ainayatak nuní senchi etsegtuidau. ³⁷ Imatjiagtai shiig puyatjusag: “Ashí dekas pegkejan takaawai, empekunash antumtikawai, chichachunash chichamtikawai”, tuidau.

8

Jisus cuatro mil aents ayugkamu

(Mt. 15.32-39)

¹ Nunú tsawantinig kuashat aents tuwakaju asag, yumainji atsujuidau asagmatai, Jisus ni jintintaiji aidaun unsuká ijumag:

² —Ju aents aidaun wait anentuinajai, juwi wijai kumpatum tsawantai yujumkanash yutsuk batsatina duwi, ³ wi yujumkan ayugsuk ishiakmak, jeen jegatakamá pimpikiag jaka iyaumain ainawai, dita atushtanmaya kaunkajush aina duwi, —tau.

⁴ Tutai niina jintintaiji aidau aiinak:

—¿Tuwiya jutiish aents atsamunum pujag juniautish jusha ajamsag-tatji?

⁵ Tiagtai ditan iniak:

—¿Wajupa pagka ajutjamainawa?

Tama:

—Siete pag ajutjamui, —tuidau.

⁶ Tiagtai:

—Aents nugkanum batsagtajum —tusa ishiaku.

Dutika ashí umikagmatai pagkan juki, Apajuin see tusa puujá ni jintintaiji aidaun tinabiu, dita aentsú susatnume tusa. Dutikam ditashkam aentsun tinamkaju. ⁷ Namakshakam ujumchik au asamtai, dutiksag Apajin aujus nunashkam tinamkagtajum tusa tinabiu. ⁸ Dutikawajam yuwawag shiig ejemakaju. Nunikagmatai pag mayakjai ampinkaun siete chagkinnun aimjajui. ⁹ Nuna yuwawajua duka cuatro mil aents tumain aajakajui. Imanun ayujuk akatek ishiakui.

Fariseo aidau wainchatai iwainkagtukta tusa Jisus segamú

(Mt. 16.1-4; Lc. 12.54-56)

¹⁰ Dutika ukukí, ni jintintaiji aidaujai botenum chimpimag Dalmanuta nugkanum weuwai. ¹¹ Nui jegamtai fariseo aidau kautuawag, Jisusjai kuashat tudayinau. Nuninak dekas Apajuí uchijimpashit tusag dekapsatatus:

—Nayaimpinmaya wainchatai iwainkagtukia, —tuidau. ¹² Tusá segainam Jisus senchi mayati wajan chichaak:

—¿Wagka atum wegantutigmesh wainchatai iwainkagtukia tusagmesh tuké tajume? Dekas tajime: Atumnak makichik iwainamunakesh iwaintukchattajime.

¹³ Tusa ukuak botenum egkemag, ataktú amain katigkuí.

Fariseo jintinkagtutaijig lewaduraya numamtainai tibau

(Mt. 16.5-12)

¹⁴ Nui weenak pagkan kajimatkiag jukichaju asag yumainjig at-sujuidau, nuninayatak makichik pagkan takus weedau. ¹⁵ Nuniku asagmatai Jisus:

—Nijah, fariseo aidau, nuigtú Herodesa lewaduraji aina nujai kuitamamkatajum, —tau.

¹⁶ Tutai ditak pempeentunikiag: “Junak ii pag takukchajag duwi tujamji”, tuidau.

¹⁷ Nu tuinamun Jisus dekajua:

—¿Wagka pag pachisjumesh jiyaniagme? ¿Atumek dekamainchau dekapeau asagmek utujimsajum anentaimjum? ¹⁸ ¿Atumek jime ajutjamainaigkik, wainmachu wajukmaina numamtuk wajakjum, antayatkugmesh antuchu wajukmaina numamtuk wajajum? ¿Nuniau asagmek aneaktsujum? ¹⁹ Wi jimagchik paagkai cinco mil aents ayugkamash ¿wajupa chagkina aimkamiugme ampinjau aidaush?

Tama dita aiinak:

—Doce, —tiaju.

²⁰ Tiagtai:

—Wi siete pagkan jukin cuatro mil aents ayugkamash ¿wajupa chagkina aimkamiugme ampinkau aidaush?

Tama dita aiinak:

—Siete aimjamiaji, —tuidau.

²¹ Tutai ni ayaak:

—¿Dutikau ayatkugmek dekamainchau dekapeajum?

Betsaidanmaya aents wainmachun Jisus etsagagbau

²² Nuna ti Betsaida jegauwai. Nunikmatai wainmachun itajiag, antinjukta tusa segaidau. ²³ Tama Jisuschakam wainmachun egkesá juki, yaaktauchin ukumtiki jiin usuktua, uwejen nuna jiin patatiu, dutika:

—¿Machikish wainmatsmek? —tusa iniasu.

²⁴ Tama niimak:

—Aents aidaunak tuke numia nuninun wainjai; tujash weedaun, —tau.

²⁵ Tutai Jisus wainmachu jiin ataktú uwejen patatiu, dutikam shiig esetug niimi pegkeg wajasú, nunik atushtanmayanash shiig paan wainkau. ²⁶ Nunikmatai ni jeen awebau, dutikak:

—Yaaktanmak wayawaipa, makichik aentskesh ujakaipa, —tiu.

Pedro Jisusan amek Kristuitme tibau

(Mt. 16.13-20; Lc. 9.18-22)

²⁷ Jisus nuna dutika niina jintintaiji aidaujai yaakat Cesarea, Filipino tutaya nuanuí yaakta ukukí batsamin aidaunum wegajui. Nunik jintá wesa ni jintintaiji aidaun iniak:

—¿Aents aidaush minash yaayai tujutuinaawa? —tau.

²⁸ Tutai dita aiinak:

—Wajumak aents aidau: ‘Juan Yamijatin maamua nuuwai’ tujamainai, tikich chichaidau: ‘Auk Eliasai’ tujamainai, tikich tuidau: ‘Apajuí etsegtin aajakajua dutsukaitai’ tujamainawai, —tuidau.

²⁹ Tiagtai ni ayaak:

—¿Tujash atumesh, minash yaayai tujutjume? —tau.

Tutai Pedro ayaak:

—Amek Kristuitme, —tiu.

³⁰ —Tujash mina pachittsagmek makichik aentskesh ujakaigpajum, —tiuwai.

Jisus ni maam atinji etsegkamu

(Mt. 16.21-23; Lc. 9.22)

³¹ Nuna ti nagkama jintintak:

“Wi Apajuí Uchijiyaitkun Aentsmaga Akiinawaitag nunak senchi waitkagsagtatui, apu aidau, sacerdote apuji aidaush, chicham umiktinun jintinkagtin aidaushkam dakitjuinak mantuawagtatui. Dutijuawagmataish kumpatum tsawan asan nantaktatjai”, tusa etsegkauwai. ³² Nuna tusa paan etsegtai, Pedro akanak juki kakaakan chichajak:

—¿Wagka amesh annush anentaime? —tiuwai.

³³ Tama ni jintintaiji aidaun ayampattsag diyak Pedron jiyaak:

—¡Wetá iwanchih, minai tantá wajatsuk! Amek dekatsme Apajuí dutikatjai tabaujiya duka, aentsú anentaimtaig anentaimam duwi, —tiuwai.

Jisus mina nemagtukta tautigmek atum wakegamuk idaikujum nemagtuktajum tibau

(Mt. 16.24-28; Lc. 9.23-27)

³⁴ Nunik ni jintintaiji aidaun, nuigtú tikich aents aidaujai untsuk ijumag chichajak:

—Mina nemagtuktasajum wakegautigmek, atum wakegamuk idaikum nemagtuktajum, nuniakjum senchi waitiakjumes atsanjatajum. ³⁵ Ashí aents ju nugka juwi pujutan imá senchi wakegak, mina nemagtuk waittan dakitauk uwemjashtin ainawai. Untsu ashí aents mina nemagtuk pujus, nuigtú yamajam chichaman etsejak pujus jaina nu uwemjagtin ainawai. ³⁶ Aents ju nugka juwiya waji aidaun, ashí niinu emakush jaakug niina wakaninak tuké uwentikmaitsui. ³⁷ Aentsuk ni wakaní uwemtijatasa akikmatmainjig atsawai. ³⁸ Atum mina pachitsa chichat datsamakjum, chichamjushkam datsantakjum aents mina dekaskeapi tujutchau aidau, Apajuí chichame umijuinatsu dushakam ujakchau aidautigminak, wi Apajuí Uchijiyaitkun Aentsmagan Akiinawaitag nuna, mina Apajuí tsaaptinjijai tsawan wajasan nayaimpinmaya aents pegkejam aidaujai minaknushkam: Juka mi-dauchu ainawai, titinaitjime.

9

¹ Nuigtushkam:

—Dekas tajime: Atum juwi ijunjum juwiyatijum wajumak aidauti-jum eke jatsuk iwaaku pujusjumek, Apajuí inamtaiji senchijijai minau wainkatnutigmesh ajume, —tiuwai.

Jisus yapajinamu

(Mt. 17.1-13; Lc. 9.28-36)

² Seis tsawan asa Jisus, Pedron, Jacobon, nuigtú Juangkan juki ditanak akanki muja yakí tsakajunum wegajui. Nui ditash wainainaig Jisusa niimé yapajinawai. ³ Niina jaanchjig winchamtin shiig puju nieve tutaiya iman wajasuí, ju nugka juwiya aents jaanchin senchi nijakush imatika puju emamainchau aajakuí. ⁴ Nuniaig Moisés, Eliasjai Jisusan aujuidaun wainkajui. ⁵ Nunik Pedro Jisusan chichajak:

—Jintinkagtinuh, jutiish maigkis juwig batsatagai, kumpatum aak aakmagmi. Makichik aminu, tikich Moisesdau, nuigtú Eliasdau, —tau.

⁶ Nunak ni tabaujinakesh dekachiatak senchi ishamkamunum, tiuwai. ⁷ Nuna taig yujagkim ijikuí. Nuniaig yujagminmaya chichaak: “Juwai dekas mina uchig anetaijuk, nigki antugkujum umigkatajum”, tabaun antukajui. ⁸ Nuna timatai diikmá imá Jisusnak wainkajui.

⁹ Nunik mujanmaya minisá:

—Atum wainkaujum nu pachisjumek makichik aentskesh ujakaig-pajum, wi Apajuí Uchijiyaitkun Aentsmaga Akiinawaitag nuna mantuawagmatai nantatsaigkik, —tiu. ¹⁰ Tusa tiajam pachitsuk idaisajui. Nuninayatak, jakau ayatkun nantaktinaitjai, tawa nunash wajukat-nunak tawa tusag iniinidau. ¹¹ Nuninak:

—¿Wagka chicham umiktinun jintinkagtin aidaush, dekatkauk Eliasá taatnai tuinawa?

¹² Tiagtai Jisus ayaak:

—Eliasak niyá eemak taatnai nunik tikich takastinun umiktinai tibauwa duka dekaske. Tujash ¿wajintu agagbauwaita Apajuí Uchijiyaitak Aentsmaga Akiinatnun pachisash, senchi waittsatnai nuigtush dakitjamu atinai tatsuak? ¹³ Tujash wi tajime: Eliasak taabi,

nunikmataish dita pegkegchau takaamujinak dutiksag inagkeatkiag-mayi. Agagbaunum niina pachis tawa dutiksajag, —tiu.

Wakan pegkegchau uchin egkemtuumun Jisus etsagagbau
(Mt. 17.14-21; Lc. 9.37-43)

¹⁴ Nunik ni jintintaiji aidau batsatbaunum jegakma wainkaju kuashat aents tuwajuk aun, tuja chicham umiktinun jintinkagtinchakam ditajai tudayinaun. ¹⁵ Nunidau Jisusan wainkag puyatuk tupikatkiag jegaantag kumpamawajui. ¹⁶ Nunikmatai ditan iniak:

—¿Wají pachisjumea ditajaish tudaijume? —tau.

¹⁷ Tutai aents tuwakbaunmaya makichik ayaak:

—Jintinkagtinuh, mina uchijun wakan pegkegchau egkemtua chichachu tugtimun amina itajuagme. ¹⁸ Juka wakan egkemtamak kujaak, saun kaput apak, nain takegtak, ichichkam patamnuwe. Imatijutin asamtai amina jintintaijum aidaun, jiigtugkitajum timajai, tujash tujinkagmae, —tau.

¹⁹ Tutai Jisus ayaak:

—¿Aents dekaskeapi tuchau aidauwah! ¿Wajupá dukapea atumjai ijunjanush pujumainaitja? ¿wajupá dukapek dakastajime minak dekaskeapi tujuttinme tusanush?— Nuna ti: —¡Itantá! —tiuwai.

²⁰ Timatai uchin ejentuntaju. Dutiktai wakan nunú uchin egkemtashkam Jisusan wainak uchinak waugmitkaku, dutikam nugká iyaag tanagak saunak kaput apakú. ²¹ Imatiktai Jisus uchi apajini iniak:

—¿Wajupa tsawantaiya junash imatiká pujugnaita? —tau.

Tama:

—Uchuch aig nagkamauwai. ²² Dutikau asa jinumash jiyata tinuwe, namakash ajug maata tinuwe. Ame machikiuchikesh dutikmainaitkumek wait anenkagtujam jutiish yaijatkata, —tau.

²³ Tutai Jisus ayaak:

—Dutikmainaitkumek tiipa; aents dekaskeapi tauk ashí dutikmainai, —tiu.

²⁴ Nuna taig uchi apajishkam senchi untsamak:

—¿Dekaskeapi tajai! ¡Wi dekaskeapi tumain dekapachkuish yainkata! —tiu.

²⁵ Jisus kuashat aents tuwagtai wainak, wakan pegkegchaun jiyaak:

—Wakan chichachu empekuwah, wi tajame: ¡Jiinkim ukuktá, ataktuk waketjukmek egkemtuaipa! —tiu.

²⁶ Tama wakanchakam senchi untsamak uchin kujamtikak waamak jiinkiuwai, nunikmatai uchik jaka iyaantu. Nunitai kuashat aents chichainak:

—Uchik jakae, —tuidau.

²⁷ Tujash Jisus uwegnum achiká inankiu, dutikam wajantú.

²⁸ Nuna dutika Jisus jegá wayamtai, ni jintintaiji aidau agkan niinak iniinak:

—¿Wagka jutiish jiiktakamaish tujinkamji? —tuidau.

²⁹ Tiagtai ni ayaak:

—Ju wakania juka makichkish kakajus jiimait sui, Apajuí aujku yujumak ijagmaka pujachkuik, —tiu.

Jisus awentsag ni mantamnatnuji etsegkamu
(Mt. 17.22-23; Lc. 9.43-45)

³⁰ Nuwiya jiinki Galilea wegamun makichik aentskesh dekawainum tusa Jisus dakitau, ³¹ niina jintintaiji aidaun jintintuata tau asa. Nunik jintintak tau:

—Apajuí Uchijiyaitak Aentsmaga Akiinauwa nunak, tikich aents aidaunum sujukag idaisagtatui, dutikawagmatai maawagtatui. Tujash jakaashkam kampatum tsawanta juwi nantaktatui, —tau.

³² Tutaish ditak nuna takumpap tawa tusag dekamain dekapenachu. Nuninakush ajantuidau asag iniaschajui.

Yaki dekas imá wagaakush atinaita tiagbau

(Mt. 18.1-5; Lc. 9.46-48)

³³ Nunikag yaakat Capernaum jegawajui, nui jegá wayaa bat-satbaunum Jisus ni jintintaiji aidaun: ¿Jintaa minisjumes waji chichamjimugme? tau. ³⁴ Tujash ditak chichainachu, jintaa minisag ditak pempeentunikiag, yaki imá wagaakush atinaita tudayaju asag. ³⁵ Nuniagtai ekeemas, ni jintintaiji doce aina nuna untsuká ikaunman: Ni eme anentai atatus wakegauk, tikichi takajin nuigtú imanchauch amainai. ³⁶ Nuna ti uchin ejapeen awajus midaaki juki chichaak: ³⁷ Aents mina nemagtuidau ju uchua jumamtin aina juna, shiig anentus juwidauk minashkam mina Apagnashkam aikasag juwinawai.

Jutiin shiwagmatjamtsu duka jutiinu asa aniwai

(Mt. 10.42; Lc. 9.49-50)

³⁸ Tutai Juan:

—Jintinkagtinuh, aents wainkamji amina daagmin wakan pegkegchaun jiyau, tujash jutijai minitan dakitaku amek aikawaipa timaji, —tau.

³⁹ Tutai Jisus ayaak:

—Amek aikawaipa tusagmek tiigpajum. Makichik aentskesh mina daajui wainchatain iwainayatkug, pempeentugsagkek pegkegchaunak chichagtuamsui. ⁴⁰ Jutiin shiwagmatjamtsu duka, jutiinu asa nuniawai. ⁴¹ Tuja makichik aentskesh atum mina nemagtin asagmin, yumin uwagta tusa amasú aidauk, dita waji shiig pegkeg jukitnujig ajagtina.

Tikichin pegkegchau emaidau tibau

(Mt. 18.6-9; Lc. 17.1-2)

⁴² “Mina dekaskeapi tusag nemagtuidau ju uchi piipichia jumamtin aidaun makichikesh pegkegchaun takamtikaidauk, dekas kaya muun dekeetai aina iman juki kuntugnum jigká detuais nayants ajugká ajapmain ainatai. ⁴³ Amina uwejum tudaun takamtijamkuig, tsupika ajapmaina numamtuk wajaktá tudau takat idaikum. Dekas pegkejai tudau idaisau asá, pujut tuke atina nui makichik uwegtin waimaina numamtuk wajamuk, jimá uwegtin asá suwimak juwaku jii ajumaish kajinchau, ⁴⁴ akash jinuchu aina nui ajapeam amaina nu. ⁴⁵ Amina dawem tudaun takamtijamkuig, tsupika ajapmaina numamtuk wajaktá tudau takat idaikum. Dekas pegkejai tudau idaisau asá, pujut tuke atina nui shutusá waimaina numamtuk wajamuk, jimá dawentin asá suwimak juwaku jii ajumaish kajinchau, ⁴⁶ akash jinuchu aina nui ajapeam amaina nu. ⁴⁷ Amina jiiim tudaun takamtijamkuish, ukuinkam ajapmaina numamtuk wajaktá tudau idaikum. Dekas pegkejai tudau idaisau asam, Apajuí inamtaijin makichik jiiyaik

niimsá waimainaitam numamtuk wajamuk, jimá jiintin asam, ⁴⁸ akash jinuchu, jiish ajumaish kajinkashtina nui ajapeam amainaitam nu.

⁴⁹ “Ashí nunú aidauk weegai kachikbau kakajus kautsama numamtuk, dita takasbaujijai jiinum batsatkush tuke jakachagtin ainawai. ⁵⁰ Week[☆] dekas pegkejai, tujash jea jeatuji megkagak sakam wajasmataish, çitugsaya ataktush jea jeatush emamainaita? Dekas atumin weega anmamtinun Apajuí pujutan amasbau ajutjamainai. Nunikmatai tikich aidaujaish shiig anendaisajum agkan batsamainaitjume.”

10

Nuwak idaimaitsui Jisus tibau

(Mt. 19.1-12; Lc. 16.18)

¹ Jisus Capernaumnumia jiinki Judea nugkanum jegaa, Jordagka amain katigkú. Nunikmatai aents aidau tuwagkajam ataktú ni jintinkagtutaijinak dutiksag jintinkagtau. ² Nuniai fariseo aidau pegkegchaunum dekapsatasag jegaantag iniasaju, nuwennush nuwennash idaimainashit tusag. ³ Tuinam Jisus ayaak:

—¿Moisesash atumnash wajukatajum tujabiauaita?

⁴ Tama dita aiinak:

—Moisesak papi idaidaiku najantai umikjum nuwemek idaimainaitjume, tujabiuwai.

⁵ Tiagtai Jisus chichaak:

—Juna dutikatajum Moisés tujabiauaita nunak atum chicham umitnumash katsujam asagmin tujabiauaita. ⁶ Tujash yama nagkamchakug Apajuik aishmagkun nuwajai najanauwai. ⁷ Dutikamu asag aishmag nuwenkug apajin, dukujin ukuak niina nuwejaig pujumainai, ⁸ nunikag makichik iyash wemainai. Nunin asag jimaja nuninchauwai makichkia numamtinai. ⁹ Nunin asamtai Apajuí nuweamua nunak makichik aentskesh idaimitkamain ainatsui.

¹⁰ Tusa ukukmatai Jisusa jintintaiji aidau jegá jegawag, nuna pachis iniidau. ¹¹ Tusá iniam:

—Makichik aentskesh nuwen idayas tikich nuwajai nuwenkug, jeteken ekajeak nunimainai, ¹² nunisag nuwashkam aishin idayas tikich aentsnum nemakug, aishin ekajeak nunimainai, —tiuwai.

Jisus uchi ikautkamu

(Mt. 19.13-15; Lc. 18.15-17)

¹³ Juna ashí tusa inagnai, uchi aidaun Jisus uwejen antinjukti tusag ikautkajui. Imatikiagtai ni jintintaiji aidau, uchin ikaunmaina nuna jiyaidau. ¹⁴ Dutikiagtatman Jisus wainak kajek chichajak:

—Tutsuk idaisatajum, uchi aidauk minai kauntatnume utugkajum awagkippajum. Jujú uchi anentaimaina jumamtin aidaunum Apajuik inamjata tawai. ¹⁵ Dekas tajime: Aents aidau uchi mina anentaimjutuina imanis anentaimjutuinachuk Apajuí inamak amain ainatsui.

¹⁶ Jisus nuna tusa makí makichik uchin midaaki juki, uwejen achiak:

—Apajuí yaimpaktinme, —tiuwai.

Datsauch wiyakuch Jisusjai chichasbau

(Mt. 19.16-26; Lc. 18.18-27)

17 Nuna dutika Jisus jinki jintá wetatman makichik aishmag tupi tupikakua amainag tikishmatug pujus iniak:

—Jintinkagtin pegkejah, ¿wajina dutikmainaitja pujut tuke atina nuna jukitasanush? —tau.

18 Tama Jisus ayaak:

—¿Wagka pegkejá tujutme? Makichkish pegkejak atsawai, imá makichik Apajuiya duke pegkejak. 19 Amek dekame chicham umik-tin agagbaunum: ‘Tsanijnawaipa, magkagtuawaipa, kasamkaipa, wainkamek tsanumkagtujaipa, wainkam tsanumjam tikichdau jukipa, amina apa dukujai eme anentsam diyaakum yaigtá’, tusa tawa nunú.

20 Tama ni ayaak:

—Jintinkagtinuh, wika nunak uchuch nagkamsanuk ashí umikuitjai, —tiuwai.

21 Tutai Jisus wait anenmain diis chichajak:

—Makichik umimain ajutjame: Wetá nunikam ashí amina ajutjamaína duka sujukam ujunauch aina nu susata. Nu dutikawamin nayaimpinum wajigmik ajutjamtinai. Nu dutika ukuakum waitiakmesh atsanjam nemagtukta, —tiuwai.

22 Nu tama antuk, nunimainchau dekapeg wake beseká weuwai, shiig wiyakuch asa.

23 Nunikmatai Jisus nui ijunun ayampá ashí diis ni jintintaiji aidaun chichajak:

—Wiyakuch aidauk Apajuí minai inamjati tusag kakajus idaimainchau ainawai.

24 Nuna tutai jintintaiji aidauk puyatkag ijuntsaju. Nunikagmatai Jisus ataktú chichaak:

—Uchig aidauh, aents aidau niina wajiiin imá senchi puyatjuidauk, kakajus Apajuí inamak amain ainatsui. 25 Camellok aujá jiinish waigká nagkaemamainai. Tujash wiyakuch aidauk Apajuí minai inamjati tusag kakajus idaimamainchau ainawai.

26 Nuna tutai antukag nuní nagkaemas puyatkag:

—¿Yaki tujash uwemjaush amainaita? —tusag ditak iniinidau.

27 Tiagtai Jisus ditan diis chichajak:

—Aents diismak juka utugchatai machikish dutikmait sui, tujash Apajuiyaig annuchui, nigka ashí dutikmainchaunash dutikmainai.

Mina nemagtuidauk ditanu ukukbaujin nagkaesau jukiagtinaí tibau (Mt. 19.27-30; Lc. 18.28-30)

28 Tutai Pedro ayaak:

—Jutii aidautik ashí iina ajutjamaidauk ukuinaku nemagkamiajime.

29 Tutai Jisus ayaak:

—Dekas tajime: Ashí aents mina nemagtuinak yamajam chichama nunakesh etsejak, jeen, yachin, umayin, apajin, dukujin, nuwen, uchijí aidaun, nugke aidaunash ukukiu aidauk, 30 yamaik ju nugka juwig pujusag, cieгка imania jukiagtinaí: Jee aidau, yachi aidau, umayí aidau, dukují aidau, uchijí aidau, nuigtú nugke aidaujaí ukukbauwa nuna nagkagas. Waittsajash atak atina duwi pujut tuke atina nui pujusagtin ainawai. 31 Tujash kuashat aents dekatkau atatus wakegaina nu ukunum juwakagtinaí. Untsu iman atan anentaimtumachu aina nu dekatkauk agtinai.

Kompatuma juna Jisus ni mantamnatnuji etsegkamu

(Mt. 20.17-19; Lc. 18.31-34)

³² Jerusalén jegawagtatus weedau. Nuniamunum Jisus eemak wegai ni jintintaiji aidauk ishamainak puyatkiag weedau. Nuniagtai ataktú niina jintintaiji doce aina nuna yajuak akankiag, wajak dutikawagtatua nuna pachis ujaidau. ³³ “Yamai Jerusalén jegattag duwi, wi Apajuí Uchijiyaitkun Aentsmagan Akiinawwaitag nunak achigkag sacerdote apuji, chicham umiktinun jintinkagtin aidaunum ejetuawagtatui. Dutijuawagmatai dita jujukiag judiuchu aidaunum dita maatnume tusag sujutkagtatui. ³⁴ Dutijuawagmatai pegkegchaun chichagtuinak dushí dushiktuinakuag, asututan asutu, usuktutnash usuktu awa awajtuinakua mantuawagtatui, tujash dutijuawagmataish kompatum tsawanta juwi ataktú nantaktatjai”, tau.

Juan Jacobojai Jisusan segagbau

(Mt. 20.20-28)

³⁵ Nuna timatai, Zebedeo uchijí aidau Jacobo Juagjai, Jisusan jegaantag:

—Jintinkagtinuh, ii segattajam nunak dutiksag umigkagtukti tusa wakegaji, —tuidau.

³⁶ Tusa tiagtai Jisus ayaak:

—¿Wajina dutijuati tusagma wakegagme? —tau.

³⁷ Tutai dita chichainak:

—Wakegaji amina inamtaigmin, jutii jimajaitag nunuti makichik amina untugmin ekenkum, tikich menagmin ekejattsatin atá tusaja.

³⁸ Tiagtai Jisus ayaak:

—Atumek mina segatjum duka dekatsjume. ¿Atumesh mina waitkajus mantuawagtata dusha imanisjumkek waitmainaitjum?

³⁹ Tuinam dita chichainak:

—Ehé, iishkam duka waitmainaitji, —tuidau.

Tiagtai Jisus ditan chichajak:

—Dekas tajime: Wi waittsan jakattag imanisjumek waittsatin ainagme, ⁴⁰ tujash mina untujuí, tikich mina menajuí ekeemsatin atajum tusanuk tumaitsujime. Nunak mina Apag ya aidau ekeemsatnujinak umigkauwaita nuna ekentsagtinai.

⁴¹ Nunú tabaun diez aina nu antukag, Juangkan Jacobojai senchi kajekajui. ⁴² Nuniagtai Jisus ditan untuká:

—Atumek shiig dekagme, tikich nugka aina nuna apuji aidau judiuchu aina duka, aentsnak ditanua nunin emak inainawai. Untsu nunú apu aina nuna aentsji aidau, aents aina nuna dita wakegamun inau ainawai. ⁴³ Tujash atumek aajagmek dutikdaimain ainatsjume. Nunit-suk atum ainajum anuiyatijum eme anentai atasajum wakegautigmek tikich aina nu takajin amainaitjume. ⁴⁴ Atum ainajum anuiya eme anentai atatus wakegauk, ashí tikich aidaun inake amainai. ⁴⁵ Wagki wi dekas Apajuí Uchijiyaitkun Aentsmagan Akiinawwaitag nunak, atum aidautijum mina takagtustinme tusanuk taachuitjai, wi dekas atumin takagkun mantamnan kuashat aents aidau pujutin uwemtijata tusan taamjai, —tiuwai.

Bartimeo wainmachun Jisus etsagagbau

(Mt. 20.29-34; Lc. 18.35-43)

⁴⁶ Nuna tusa Jericó jegawajui. Nuwiya jiinki Jisus niina jintintaiji aidaujai, nuigtú shiig kuashat aents ashinai, aents wainmachu Bartimeo daagtin Timeo uchijí jintá yantam ekeemas, aents nagkaemagtai kuichik sujustajum tusa sumá eketu. ⁴⁷ “Jisus Nazarenumia nagkaemawai”, tabaun antuk, untsuntan nagkamau. Nuniak:

—¡Jisusah David wegantu uchijiyah minash wait anenjugta! —wajau.

⁴⁸ Imattai kuashat aents aidau jiyaidau itatkati tusag. Tusá jiyamash nigka nuní senchi untsamak:

—¡David wegantu uchijiyah, minash wait anenjugta! —wajau.

⁴⁹ Imattai Jisuschakam nui wajan:

—Untsuktajum juwi tantati, —tiu.

Timatai wainmachun untsuinak:

—Yamaik untsugmawai kajintsam tantata, —tuidau.

⁵⁰ Tama niishkam pataká nugkuagbaunak awik nugká aepeak, tseke wajakí Jisus wajamunum jegantuí. ⁵¹ Nunikmatai Jisus iniak:

—¿Minash utugtuhi tusamea wakegame? —tau.

Tama wainmachu ayaak:

—Jintinkagtinuh wika wainmaktasan wakegajai, —tiu.

⁵² Tutai Jisus:

—Yamaik wetá, amek kajintsá anentaimam duwi tsagajume, —tiu.

Tusá tamawaik wainmakui, nunik Jisus wetai niishkam Jisusjai weuwai.

11

Jisus Jerusalén apu wajasá wayamu

(Mt. 21.1-11; Lc. 19.28-40; Jn. 12.12-19)

¹ Jisus ni jintintaiji aidaujai Olivosan mujajin jegawaju, yaakat Befagé, nuigtú Betania Jerusalegnum tikiju awa nui, nunik ni jintintaijin jimajan awemak:

² —Au yaakat jegattak aents batsata awi wetajum, awi jegakmajum burro makichik aentskesh entsamchatai tsakatuch wajau wainkattagme, nu atia jukim itagtuatajum. ³ Nunú juwagmin makichik aentskesh, ¿wagka aikagme? tujamkujaish, Apu atsumawai, ajum awagtugmaktatui tusa ukuktajum, —tiuwai.

⁴ Tiajam wejiag diikmá, waitainum agaa jinta tuniasunum jigkam wajattaman wainkag atiidau.

⁵ Dutikiagtai nui aents ijunaidau:

—¿Utugkatagsagmea burrush atiagme? —tuidau.

⁶ Tiagtai ditashkam, Jisus titá tibaunak, dutiksag ujak ukukiajui.

⁷ Dutikawag burron jukiag Jisusan itaantaju, dutikawag burro tuntutpen awantak nugkuagbauji jukiag aitkajui, dutikawagmatai Jisus ekeemiu. ⁸ Nunik wetai kuashat aents asag, dita awantak nugkuagbaujin jintanmag aitug emaidau, dutikainai tikich aidauk dukan tsupijag jintanum ainag emaidau. ⁹ Dutikiagtai aents dekas eemak ashinu, ukunum minidaujai senchi untsumkag:

—¡Apajuí awemamu iina agkanmitkagmatin miná jujú ememati-agmi! ¹⁰ ¡Iina apachji apu David inamajakua nunisag inamjatatus miná jujú emematiagmi, nigki nayaimpinmayanash agkanmitkattawai! —wajaidau.

¹¹ Nunik Jisus Jerusalén jegaa, jega Apajuí ememattainum wayauwai. Nunik nui ashí wají agtatmanak diis ukuak etsa akagu asamtai, niina jintintaiji aidaunak ashí yajuak Betania weuwai.

Numi higuera tutai nejenchaun Jisus yumigja maamu
(Mt. 21.18-22)

¹² Betania kanag jiinkiang wegamunum Jisus yapajau, ¹³ nunikmá higuera shiig dukejuk wajattaman ikaag wainak wejiu neje atsuash tusa diistatus. Nunikmá nejefi jegachu asamtai neje atsutai, ¹⁴ Jisus higuera chichajak:

—¡Ame nejeamunak makichik aentskesh tuke yuwachagtin ainawai!
—titatman niina jintintaiji aidau antugkajui.

Jega Apajuí ememattainum aents batsatun Jisus jiigbau
(Mt. 21.12-17; Lc. 19.45-48; Jn. 2.13-22)

¹⁵ Jerusalén jegawag jega Apajuí ememattainum Jisus wayaa, nui sujak batsatun sumau aidaujai agaa jiijú, dutikak aents kuichki yapajiin aidau mesajinashkam shitatki akaketuk, paumá sujin aidau ekeemtaiji aidaunash dutiksag ashí akaketkau. ¹⁶ Jega Apajuí ememattaiya nui makichik aentskesh takusá wayawainum tusa shiig dakitau. ¹⁷ Nunik jintinkagtak:

—Apajuí chichame agagbaunum:

“Mina jegajuk ashí tikich nugkanmaya aidau Apajuí aujuinaku ijuntaiyai tama atinai” tawa nuniaig atum kasá aidau batsamtai emaugme, —tiu.

¹⁸ Nuna timatai sacerdote apuji, chicham umiktinun jintinkagtin aidaujai antukag, wajuk maawajik tuidau. Tuinayatak ni jintinkagtamun ashí aents aidau puyatjus antujuidau asagmatai nuna ishamaidau. ¹⁹ Nuninai Jisusak kiitai niina jintintaiji aidaun yajuak, nunú yaaktanak ukuak yajá weuwai.

Higuera kukajú wainkamu
(Mt. 21.20-22)

²⁰ Nui kanajag kashikmasag nagkaemakmag, higuera ashí kagkapejai kukag wajattaman wainkajui. ²¹ Nunik Pedro adeag Jisusan chichajak: —Jintinkagtinuh, diisia ame higuera yumigjam ukukmaum nu kukajá wajana, —tau.

²² Tutai Jisus ayaak:

—Imá Apajuiyaig kajintsá anentaimsatajum. ²³ Dekas tajime: Makichkitigmekesh utujimsa anentaimtsuk, dekaskeap nuniktatua tusajum ju muja chichagkujum: ‘¡Juwi atsuk nayantsanum wajaata!’ tamak nunisag nunimainai. ²⁴ Nuadú tajime: Atum Apajuí segattajum duka dekas sujustatuapi tusajum segatajum, nuniakjumej ukittagme. ²⁵ Atum Apajuí aujukgmek, tikichjai kajegdaikamu ajutjamkuig tsagkujatajum, atumnashkam Apajuí nayaimpinum puja dushakam aikasag tsagkugtamjatnume atum pegkegchau chichakbaugminash. ²⁶ Atum nu tsagkugchataik, atumin Apa nayaimpinum puja dushakam, atumin tudaugminash tsagkugtamjashatjume.

Sacerdote apuji Jisusan iniasbau
(Mt. 21.23-27; Lc. 20.1-8)

27 Juna timatai wakitkiag Jerusalén kaunawajui. Nunik jega Apajuí ememattainum Jisus wekaetatman sacerdote apuji, chicham umiktiinun jintinkagtin aidau nuigtú tikich apu aidaujai jegaantag, ²⁸ iniinak: —¿Aminash ya jintinkagtuata tusash awetamae? ¿Yana chichamenia jusha juniame? —tuidau.

29 Tuinam Jisus ayaak:

—Wishakam iniastajime, atum nu aigkagmin ujaktajime ya jutikata tujutmataiya jutikaja junash. ³⁰ ¿Ya awemauwaita Juagnash yamijatjati tusash, Apajuik awemauwait, atsa aents aidauk awemauwait? nunú aigkatajum.

³¹ Tama utujimkag, ditak pempeentunikiag chichainak: “Juagnak Apajuí awemauwai tajinish, ‘¿Tujash wagka dekaskeapi tichau ainagme’ tujamtata jama? ³² ¿Aents awemauwai titajiash?” Tuinayatak ashí aents aidauk Juagak dekaskenum Apajuí etsegtinai tuidau asagmatai ishamaidau. ³³ Nuninak Jisusan chichajuinak:

—Dekatsji, —tuidau.

Tiagtai Jisus ayaak:

—Ayú, wisha tichattajime yana chichamenia jutikaja nunak, —tiu.

12

Inak pegkegchau aidau pachisa augmattsamu
(Mt. 21.23-46; Lc. 20.9-18)

¹ Jisus ataktú augmatbaun pachis aents aidau jintintak, tau: “Aents niina ajajin uva aajakuí, dutika tanishig, uva yumiji ijugtinnash umik, wajasá diistinnash torre tutain yakí jiiukuí. Dutika wajumak aentsun atum ju takastajum dutikakjum minash sujustajum tusa susa ukuak, nigka tikich nugkanum atushat weuwai. ² Nunik uva juut jegamtai, makichik inaken awemauwai, aents ajanum takaina nui jegamtai, uva neje susam, juki itagtuati tusa. ³ Dutikam jegamtai ajanum takaina nunú achikag suwi suwimainakua, wainak awagkiuwai. ⁴ Dutikawagmatai tikich inaken awemauwai, dutikam jegattaman, nunashkam kayai tukuí tukuinakua upu upujukiag, pegkegchau chicha chichajuinakua awagkiajui.

⁵ “Nuna dutikawagmatai ataktushkam tikichin awemauwai, dutikam jegattaman maawajui. Dutikamtai nuní kuashat ishiakui. Dutikawajam jegattaman, tikich aidauk suwimawag ayatak awa awatuinakua awakenak, tikichnak maawajui.

⁶ “Dutikawagmatai inagnamun niina uchijí makichkiuch aneetaiji ajamun, takaak batsatbaunum awemauwai: ‘Mina uchignak ajan-tusampap diimain ainawa’ tusa. ⁷ Tujash ajanum takaina nu ditak pempeentunikiag: ‘Auwai ju aja juna jukitnuk, dekas maa ajapeaku, juka iinu emami’, tuidau. ⁸ Tusag achiká maawag ajá ukumtikiag ajapawajui.

⁹ “¿Nunash ajagtina dusha itugmainaita? Dekas ajagtina nu tajakug nunú ajanum takaina nunak kajeg utsaak, tikich aents aidauk susa idaimainai.

¹⁰ “Atumek ausachukaitjum Apajuí chichame agagbauwa nui: ‘Aents jegá jegamin aidau kayá ajapawajua nunú, kaya dekas jegá ichichkatin apututia iman wajasé,

11 nunak Apajuí dutikau asamtai, jutií anentaig ejetumaitsui' tawa duka", tiuwai.

12 Tutai: "Nuna augmatus tawa nunak, iina tujamak tawai" tusag achikta tuidau, tujash aents tuwakajua nuna ishamaidau asag ukuinak wegajui.

Apú kuichkiji pachisa Jisus iniasbau

(Mt. 22.15-22; Lc. 20.20-26)

13 Nunik ukukiag fariseo aentsji aidaun, Herodesan aentsji aidaun-jai pachiachmau Jisus iniastajum, tamash wajintig timatai duwi tsanumjujagmi tusag ishiakaju. 14 Dutikawajam ditashkam Jisusan jegaantag:

—Jintinkagtinuh, jutiik shiig dekainaji, amek dekaskea duke etsegme, tikich aentsun niimé diigsam shiig awajkatasamkesh chichatsme, imá Apajuí jintiya duke pachisam jintinkagtau asamin, amin iniajame: ¿Roma apuji kuichkiji atinush sumainashit, atsa sumainchaukaih? —tusa iniidau.

15 Tama Jisus dita tsanubaujin dekaju asa:

—¿Wagka minash tsanujatasagmesh wakejutagme? ¡Makichik kuichik itagtuakjua diistajai! —tiuwai.

16 Tutai ejentuntam diisá:

—¿Yana niimé dakumkaya daajish agagbauwaita? —tau.

Tama dita aiinak:

—Anka Roma apuji dakumkamui, —tiaju.

17 Tiagtai Jisus ayaak:

—Roma apujinua duka nigki susatajum, Apajuinua dushakam imá Apajuik susatajum, —tiuwai.

Nuna timatai anentai jegagchajui.

Jakau nantagtin pachisa iniimsamu

(Mt. 22.23-33; Lc. 20.27-40)

18 Nuniku ai saduceo aidaushkam Jisusan tajuntajui, ditak aents jakauk nantakchagtin ainawai tinu asag Jisusan iniinak:

19 —Jintinkagtinuh, Moisés papí agag ukugtamkiuwa nui: 'Aents nuwan juki uchí akiitsuk jakamtaig, ni yachintin nuwan juki uchin akiimainai, dutika yachí uchijiya nunin emamainai' tawai.

20 Nuniamunum siete yachigbau aajakuí. Nuanuiya nagkamchak iwai nuwenauwai, tujash uchin akiitsuk jakauwai. 21 Nunikmatai tikich yachí jukiuwai. Nunik niishkam uchinak akiitsuk jakauwai.

Kampatuma nu jukishkam nunisag jakauwai. 22 Nuni nuninakua siete aajakajua duka uchinak akiitsuk ashí jinawajui. Nunikagmatai duwi pujus nuwashkam jakauwai. 23 Siete aajakajua duka ashí nunak nuwatkaju aina duwish ¿yana nuweg atinaita atak nantainamun-mash? —tuidau.

24 Nuna tiagtai Jisus ayaak:

—Atumek Apajuí chichamen tawa dusha dekachu, niina senchijiya dushakam wainkachu ainajum nuaduí dewakugme. 25 Jakau aidau nantajagtin aina duwik makichkish nuwenachagtinai. Apajuí aentsji nayaimpinun batsata nuninuk agtinai. 26 Tujash jakau nantajagtinun pachis, Apajuí numi zarza tutai kegamunom chichakbau Moisés agagbauwa nui: '¿Witjai Abraham, Isaac, Jacob aina nuna Apajuijinuk' tawa duka ausachukaitjum? 27 ¡Apajuik jakau aidaun Apajuijinchi,

iwaaku aina nuna Apajuiiyai! Nunin aig atumek shiig kuashat dewagme, —tiuwai.

Chicham dekas puyatjusa umiktin

(Mt. 22.34-40)

²⁸ Saduceo aidau tiagtai Jisus shiig aikmatai, chicham umiktinun jintinkagtin antuku asa, jégantun iniak:

—Chicham umiktin aina nuwiyash ¿tuwaita dekas puyatjusa umi-maina dusha? —tau.

²⁹ Tutai Jisus ayaak:

—Chicham umiktajum tibau aina nuwiya dekas puyatjusa umi-mainuk juuwai: ‘Israel aidauwah, Apu iina Apajuiiya duka imá makichkiuchi. ³⁰ Amina Apujum Apajuiya nu imá senchi aneeta, nuniakum imá niinig anentaimsam pujustá, Apajuinu pegkeg aina duke dekaata, ashí Apajuí wakega duke takastá’, tawa juuwai dekas puyatjusa umimainuk. ³¹ Untsu tikich jujai betekmantina duka: ‘Amijai ijutkamushkam amek anenmamsam aneeta’ tawai. Tikich chicham umiktin juna nagkaesauk atsawai.

³² Ju aatsa tima chicham umiktinun jintinkagtinchakam:

—Jintinkagtinuh duka dekas tame, imá makichik Apajuik awai, tikichik atsawai. ³³ Shiig pegkejai Apajuí senchi aneamua duka, Apajuinu pegkeg aina nu dekamushkam, niinig anentaimsa pujuta dushakam, ashí ii takaamua duka imá niinuk atí tusa takaamushkam. Apajuí senchi anea duka aatus nunimainai. Nuigtú, amijai ijutkau aidaushkam amek anenmamsam aneeta tibauwa dushakam pegkejai, nunú aatsa nuniamu Apajuinak shiig awagmawai, tudau tsagkugnag-tasa kuntin maa apeamua nuna nagkagas, —tiuwai.

³⁴ Tusa shiig anentaimas timatai, Jisus chichajak:

—Apajuí inatjati tusam idaimamtak namput wajatsme, —tiuwai.

Nuna timatai makichik aentskesh iniimainchau dekapjaju.

Kristush yaá wegantukita tibau

(Mt. 22.41-46; Lc. 20.41-44)

³⁵ Jisus juga Apajuí ememattainum jintinkagtak:

—¿Wajuk asamtaiya chicham umiktinun jintinkagtin aidaush, Kristuk David wegantu atinai tuinawa? ³⁶ David Wakaní Pegkeji chichamtikam:

‘Apu mina Apujun chichajak:

Mina untsujuí ekeemsata,

nunikamin wi amina shiwajum aidaunak aminí ikaunmakmatai duwi ame diisminum’, tiuwai.

³⁷ David mina Apug tawa nuniaish: ¿Wajuk asaya David wegantush amainaita? —tau.

Tutai nui aents tuwakú aidauk shiig aneasag antujuidau.

Jisus chicham umiktinun jintinkagtin aidau pegkegchauji pachisa tibau

(Mt. 23.1-36; Lc. 11.37-54; 20.45-47)

³⁸ Nui Jisus jintinkagtak: “Atumek kuitamamkatajum chicham umiktinun jintinkagtin aidau, nugkutaí esagman nugkujá yujatan wakegaina nunin aigpajum, ditak aents kuashat ayamunum igkuntu-inakush eme anenjus kumpamjitnume tusa wakegainawai. ³⁹ Nunisag

jega ijuntainum utsanainakush, dekas apú ekeemtai shiig iwa-jamu aina imannum ekeemsatatus wakegainawai. Aantsag jistatin yuwamunmash dekas ekeemtai shiig iwajamunum ekeemsatatus wakegainawai. ⁴⁰ Nuwa waje aidau jeenash atankiag, aents aidau pegkegnap takainawa tujuttinme tusag, Apajuin au aujuinakua ukú yujau aina nunin aigpajum. Nunú aidau imá senchi suwimkan jukiagtin ainawai.”

*Nuwa waje ujunauch Apajuinu anentag kuichik egkeamu
(Lc. 21.1-4)*

⁴¹ Jisus kuichik Apajuinu atin egketainum adijis ekeemas, kuashat aents aidau kuichkin chimpiinai, wiyakuch aidaushkam kuichkin kuashat chimpiagtai diyak eketu. ⁴² Nuniai nuwa waje wayaa niishkam jimagchik kuichik cobre najanamu, akiktanash imanís akikchaun egkeauwai. ⁴³ Nuwa nuna egkeamtai Jisus wainak ashí ni jintintaiiji untsuká ikaunmak chichajak:

—Au nuwa waje ujunauchitak ashí aents kuichkin egkeena auna nagkagas egkeae. ⁴⁴ Tikich egkeena auk kuichik ampinun egkeenawai, tujash jujú nuwa waje ujunauchitak ashí niinu auchinak egkeae, ni sumasa yumainjínakesh ampis ukutsuk, —tiuwai.

13

*Jega Apajuí ememattai tsayam atinai tusa Jisus etsegkamu
(Mt. 24.1-2; Lc. 21.5-6)*

¹ Jisus jega Apajuí ememattainmaya jiinki wetatman niina jintintaiiji aina nuwiya makichik:

—Jintinkagtinuh ¡amesh diisia kayash yajau ekenjá iwaja jegamka-muajah! —tau.

² Tutai Jisus ayaak:

—Ju ibau ekenjá jegamkamu aidau wainam juka, makichik kayakesh ekenjamu aina nuwiyag juwakchatnai, ashí tsaikbau atinai, iman-isagkek asashtinai, makichik kaya tsaikchamukesh tikich kayanum ekeemi juwakukesh atsustinai, ashí tsainkatnai, —tiuwai.

*Nugka nagkantsaig wantinkagtin aidau pachisa etsegkamu
(Mt. 24.3-28; Lc. 21.7-24; 17.22-24)*

³ Jisus Olivosan mujajin waka, jega Apajuí emematku ijuntaijai niinis awa nui ekeemsau. Nunikmatai Pedro, Santiago, Juan, Andrés aatus jegantun niinak iniidau:

⁴ —¿Nunash wajutiya dutikawagtin ainawa? Ashí nunú aidau uminkatin tsawan jegattak wajataish, ¿wají wantidiagtinaita? nunú ujjatkata, —tuidau.

⁵ Tiagtai Jisus ditan ayaak: “Kuitamamkatajum makichkish tsanug-majainum. ⁶ Wagki kuashat aents aidau mina daajun adaimasag miniagtinai nuninak, ‘Witjai Kristunuk’ tusag kuashat aentsun tsan-uagtinai.

⁷ “Maaninawai tuinamu antitnaitjume, nuigtú maaniawagtasa pam-pandayamushkam, imaniakuish puyatkatin aigpajum. Duka aatus nagkaemaktinai, tujash nu achatnai nagkanbauk. ⁸ Nugka yaignum batsamin aidau tikich nuninum batsatujai maadiagtinai, tuja nuninai

nugka muunnum batsamin aidaushkam mai imanumiajaig maadiagtinaí. Ashí tikich nugkanmash ugtinai, yapagtash tepeatnai, kuashat pampandayamush atinai. Jujú aina juka waitut yamá nagkamnak imanitnai.

⁹ “Tujash atumek kuitamamkatajum, atumnak achigmakag apu chicham dekaatasa ijuntainum etejamawagtinaí, dutijamawagmatai juga ditá ijuntaiji aidaunum awaintamawag asutamawagtinaí. Duti-jamainak tikich apu aidaunmash etejamawag, nui jujamkiag dekas apu nugkanum inamin aidaunmash etejamawagtinaí, mina nemagtin asagmin mina pachitus titinme tusag. Dutijamawagmatai ditá em-tinish mina pachittsajum ujaktinaitjume. ¹⁰ Dekas nugka nagkanbau jegatsaig yamajam chichama duka, ashí tikich nugka aidaunmash etsegekamu atinai. ¹¹ Tujash apunum etejamawagtatus atumin jujamainakuish, wajintuk titaja tusagmek anentaimtusaipajum. Atumek Apajuí tujamtata nunú chíchaktinaitjume. Duka atum chichakchattagme, Wakaní Pegkejiya nu chichamtijamkatnai. ¹² Nunú nuniamunum ditá yachiuchijinash maatnume tusag sujiagtinaí, aantsag uchigtin aidaushkam uchijinak sujitnai, uchi aidaushkam apají shiwagmawag maitin ainawai. ¹³ Atum mina nemagtin aidautigminak ashí aents aidau kajegtabiagtinaí, tujash ni mina nemagtukbau-nak nunisag pujusá nagkanbaunum juga nu uwemjatnai.

¹⁴ “Apajuí etsegtin Daniel aajakua nu, Apajuí dakitmainun shiig pegkegchau dutikawagtinun pachis agajui (nuna aujuk dekaatnume): Juga Apajuí ememattai pegkegma nui aents utsanainak, dita apajimatasa dakumkamun awayawagtinaí tawa nuna dutikaidau wainkugmek; atum Judea batsatutigmek mujanum pisagtajum. ¹⁵ Tuja juga jegamká tuntupé paka inagnakbaunum waka pujaushkam akaiki juga wayaag wajijjinak jutsuk wemainai. ¹⁶ Aantsag ajanum takaak pujaushkam, pataká nungkugtinnun jukitjai tusag waketjumaitsui. ¹⁷ Nunú tsawantin nuwa ejamtin, nuigtú uchi amuntsuaku agtina nunak wait anentuinaí. ¹⁸ Apajuí ausatajum, atum pisamua nu tsetsek tepeamunum ajutjaminum.

¹⁹ “Apajuí nugká najanauwa nui nagkamas yamaya juwish imanika waitchatain, atakea duwish imanika waittsashtin tikima senchi waitiamu atinai. ²⁰ Apajuí nu waitut imadiaun imijtsuk idaitaik, makichik aentskesh uwemainchau ainawai. Tujash Apajuí niinu agtinun etegjauwa nuna wait anentau asa, waitut ayatak wegaunak imijkatnai.

²¹ “Tuja makichik aentskesh: ‘Juwi Kristu pujawai diistajum’, tachakush: ‘Awi pujume’, awajtamainakuish dekaskeapi tiigpajum. ²² Kuashat aents ‘Kristuitjai’ tusa tsanumiagtinaí, aantsag ‘Apajuí chichame etsejin ainaji’ tusag tsanumaidaush agtinaí. Nuninak aents dutikmainchau aidaun iwainainak aentsun tsanuagtinaí, dutikaidau asag Apajuí etgekamu aidaunash dita tsanuamunak tsanujagtinaí. ²³ Nuaduí atumek kuitamamkatajum, ashí juna pachisnuk yaunchuk emtikan tibaijime.

Apajuí Uchijí Aentsmaga Akiinawuwa nu minitnuji tibau
(Mt. 24.29-44; Lc. 21.25-28)

²⁴ “Nunú tsawan waitut nagkaemaig etsag suwe wajastinaí, nantushkam etsanjashtinaí. ²⁵ Nayaimpinmaya yaya punjau aidaushkam nugkanum kakeyagtinaí. Imanidau asagmatai nayaimpinmaya

machikish umuchmainchau aidaush buchitjatnai. ²⁶ Nunú imaniai wi Apajú Uchijiyaitkun Aentsmagan Akiinauwaitag nuna, yujagminum pachitkau ashí mina senchigjai tsawan wajasá minamun waitkagtinai. ²⁷ Wi mina aentsug nayaimpinmaya aidaun ishiaktinaitjai, mina aentsug etejamu aidau ashí nugka nagkatkamunum batsatun ijumjatnume tusan.

²⁸ “Numi higuera pachisan augmattsan titatjim nu anentaimtustajum. Atumek higuera duke betenkakuig wamkeap esat nagkammattawa tusajum dekau ainagme. ²⁹ Nunisjumek atumshakam ashí wi tajim nunú imanisag uminag wegau wainkugmek, yamaik Apajú Uchijí Aentsmaga Akiinauwa nu taatnuk ashí jegaegapi, titin atajum. ³⁰ Dekas tajime: Wi Jerusalegkan pachisan ashí tajim duka, yamai aents batsatana jusha ashí jinuinatsaig uminkatnai. ³¹ Nayaimpick nugkajaig megkaejatnai, tujash mina chichamjuk umintsukek juwakchatnai.

³² “Tuja wájí tsawantinig, wájí horatinig taatnaitja nunak makichkish dekainatsui, nayaimpinmaya aents aidaukesh dekainatsui, tuja wikish dekatsjai, imá mina Apajuk dekawai. ³³ Nuaduí atumek aneaku batsamsajum Apajú aújú pujutajum, nu uminkatnuk tsawantak dekachu asajum. ³⁴ Juka aents atushat tikich nugkanum wegak, niina inake aidaun, jega kuitamjuktatajum tusa makí makichik inake aina nuna takatan tinamak, waitin kuitamkatnunashkam aneaku pujusam kuitamkata tusa ukuak weuwa nujai betekmamtinai. ³⁵ Aneaku pujustajum, jeennush wajutik taat, kintamkumpash minit, nuniachkush ae aetash, atash shinaimpush, atsa kashikmasampash taat duka shiig dekachu asajum. ³⁶ Pachiachmau minak kajigká batsatjumin waipamaina numamtuk awajtamkainum. ³⁷ Juna tajim junak imá atumnakek tatsujime ashí aentsun tajai: ¡Niimkau aneaku batsamsatajum!”

14

Jisus maami tusa chicham umigkamu

(Mt. 26.1-5; Lc. 22.1-6; Jn. 11.45-57)

¹ Pascua pag levadurajai pachimtsuk yutaiya nunú jegatin jimag tsawan ai, sacerdote apuji aidau chicham umiktinun jintinkagtin aidaujai Jisusan egaidau, wajuk unupiajaik achiká maawag tusag. ² Tujash jista aigkik dutikachagmi, aents aidaujai pampandayamu ai, tuidau.

Betanianmaya nuwa Jisusa buuken kugkuinui ukatjamu

(Mt. 26.6-13; Jn. 12.1-8)

³ Yaakat Betanianum Simón lepra achikbau etsagagbau aajakua nuna jeen, Jisus mesanum jegan ekeemtatman, kaya alabastro tutai botella najanamunum kugkuin nardo ayatak duke najanamu akik wajaknun takusá nuwa jegantau. Dutika nuna ujak Jisusa buuken ashí ukatjauwai. ⁴ Dutiktatman wainkag nui ijunu kajekag:

—¿Wagka ibau kugkuinnash aikash ajapeawa? ⁵ Aikatsuk trescientos tsawan inagkeasa takasá kuichik jumaina imaan akik sujuka, nunú kuichkik ujunauch aidau yaimainajama, —tusag nuwan ashishmatuidau. ⁶ Tiagtai Jisus chichajak:

—Idaisatajum ¿wagka nuwauchish kajejagme? Nigka junak pegkejan jutijawai. ⁷ Ujunauch aidauk tuke atumjai batsamiagtatui, nuniakui atum wakegakjume k yaimainaitjume, untsu wika atumjaig pujushtatjai. ⁸ Juka nuwak mina mantuawag ukujuinak, iyashjun kugkuinai ukatjukag ukugsagtina nuaduí jutijawai. ⁹ Dekas tajime: Yamajam chichama juna ashí nugkanum yujasag etsejuinakush, ju nuwa mina jutija junak tuke pachisag chichatin ainawai.

Judas Iscariote Jisus sujukbau

(Mt. 26.14-16; Lc. 22.3-6)

¹⁰ Nuna timatai niina jintintaiji doce aina nuwiya Judas Iscariote, jiinki weuwai sacerdote apuji aidaujai Jisus sujuktinun chichaman umiktatus. ¹¹ Nunik sacerdote batsatun jegají, dutik achimainaitjume tuinam shiig aneenak kuichkin akiktajame tusag anagkuawajui. Tiagmatai Judaschakam, wajuk yupichu sujukajak tusa egatu.

Pascuatin yuwatin umikbau

(Mt. 26.17-19; Lc. 22.7-13)

¹² Pag lewaduragtuchu yutai nagkamak tsawagbaunum, Pascuatin yuwatin uwig aishmag tsakat aidau mautai asamtai, Jisusa jintintaiji aidau:

—¿Tuwig umiktaji Pascuatin yuwatnush?

¹³ Tiagtai jimagchik niina jintintaijin awemak:

—Yaakat wetajum, nunikjum aishmag yumin aimak waketu wainkattajum nunú pataetuktajum, ¹⁴ nunikjum jeen wayaakui: 'Jintinkagtin chichagtamak: Agkantash awash wi mina jintintaig aidaujai Pascuatin yumainush' tujamae titajum —tiu. ¹⁵ —Nu tajumin ni inaktugmastatui yakí tesamu muun shiig umikbaun, nuanuí ashí jutii yuwatnuk umiktajum, —tiu.

¹⁶ Tusa tiajam Jisusa jintintaiji aidaushkam wegag yaakat jegakmag, ni tibaunak imatiksag wainkag, Pascuatin yuwatnunak nui umikajui.

Jisus inagnaku Pascuatin yuwamu

(Mt. 26.20-25; Lc. 22.21-23; Jn. 13.18-30)

¹⁷ Kiyagmatai Jisus niina jintintaiji doce aina nujai jeganum ut-sanawaju. ¹⁸ Nunik mesanum pekaamsag yuwinamunum Jisus chichaak:

—Dekas tajime: Atum ainajum juwiya g makichik wijai jimajuk yuwa nu minak sujutkattawai, —tau.

¹⁹ Tutai ditak wake besekag pekaamsaju, nunikag makí makichik iniininak:

—¿Wikaitag? —tutai, tikitchakam: —¿wikaitag? —wajaidau.

²⁰ Tutai Jisus ayaak:

—Doce ainajum juwiya wijai nu platonmag uchutua yuwa nuuwai, —tau.

²¹ Tusa:

—Wi Apajuí Uchijiyaitkun Aentsmagan Akiinawwaitag nunak, mina pachittsag agajajua nuna imatiksasuk umiktatjai, tujash aents mina sujutkatta nunak wait anentajai. Duka dekas akiinmainchaunas akiinawabiataih, —tau.

Jisus mina anentaimjuttasajum yuwakjume k juni dutikatajum tibau

(Mt. 26.26-29; Lc. 22.14-20; 1 Co. 11.23-26)

²² Yuwinak pekagbaunum, Jisus pagkan juki Apajin see ti puuká, ni jítintaiji aidaun suwak:

—Ju jukijum yuwatajum, juka mina iyashjua numamtinai.

²³ Nuna ti idayak, copanum vino yajaam ekeematman juki Apajin see ti ditan susaju, dutikam ashí betek uwakajui. ²⁴ Dutika ashí uwakagmatai chichajak:

—Juka mina Apag, mina numpag ukaejamunum kuashat aents uwemkagtinun yamagman anagkagtuaauwa nunú uminkatnun iwainawai. ²⁵ Dekas tajime: Wika ju uvan yumijiya junak awenanuk uwagchatnaitjai, atak tsawan uminkui Apajui inamtaijin atumjai ijuntinaitag duwi vino yamagman uwagtinaitjai, —tiuwai.

Jisus Pedron uugtuktatme tusa ujakbau

(Mt. 26.30-35; Lc. 22.31-34; Jn. 13.36-38)

²⁶ Nuna timatai kantamtain kantamawag, Olivosan mujajin wegajui.

²⁷ Nunikag nui Jisus chichaak:

—Jujú kashia juwik, ashí atum aidautigmek mina anentaimjuttak kajimatkittagme, agagbauwa nui: ‘Uwijá kuitamnun mantuawagtinai, dutikawagmatai uwigji aidauk pampagkagtin ainawai’ tawa nunisag. ²⁸ Tujash mantuawagmataish ataktú nantakin atumek wegatsjuminig wiyá emkan Galilea wetatjai, —tiuwai.

²⁹ Nuna tutai Pedro ayaak:

—Ashí tikich aidau kajimatjamainakuish, wika nunikhattajai, —tau.

³⁰ Tutai Jisus chichajak:

—Amek yamai kashia juwik atash eke jimajá shinatsaig, Jisusnak waintsamjai tusam kumpatumá uugtuktatme, —tau.

³¹ Tamashkam Pedrok:

—Amijai apaatuk mantuinakuish wika nunak tichattajai, —tau.

Nuna tutai, ashí niina jintintaiji aidauk ditashkam dutiksag tiajui.

Jisus Getsemani pujusá Apajui ausamu

(Mt. 26.36-46; Lc. 22.39-46)

³² Tiagmatai juwakiag ajak ajakbau Getsemani tutainum jegawajui. Nunik ni jintintaiji aidaun:

—Juwi ekeemsatajum, wi awi wenu Apajuin ausatjai.

³³ Tusa wegak Pedron, Jacobon, Juan aatus yajuak ditajai wesa, shiig senchi wake besemag dekapeakun ane anentaimkawan jamain dekapeakun, atumek juwi pujusjum iwá batsamtajum.

—Senchi wake besemag dekapeakun ane anentaimkawan jamain dekapeakun, atumek juwi pujusjum iwá batsamtajum.

³⁵ Tusa ukuak machik kuwaesag nugká tikishmag pujus Apajui aujak: “Apawah, nunimainaitkuig wi waitmainaitag duka nagkaetukchati”, tau. ³⁶ Nunik: “Mina Apajuh, amek ashí dutikmainaitme, wi waitmainaitag duka datumtujata, tujash wi wakejamuk achati ame dekas wakejamua nu atí”, tiuwai.

³⁷ Nuna ti wakitki ni jintintaiji batsakbaun jegantun diikmá, kajig batsatun wainak Pedron chichajak:

—Simón, ¿kanamek? ¿makichik horakesh iwá pujumainchawk dekapeakun? ³⁸ Shintaagum pujusjum Apajui ausatajum, iwanch pegkegchau takastinme tusa dekapjamsainum, wakanik dekaskenmag pegkeja nuna wakegawai, tujash iyashik kakakchau ainawai.

³⁹ Tusa ataktú weeshkam ni Apají ausamujinak dutiksag ausauwai. ⁴⁰ Nuna tusa ataktú tanta diikmá kajigká batsatus wainak ishintau, dutikamash ditak kaji senchi mainamu asag, Jisus augmash aimainchau dekapjajui. ⁴¹ Kampatuma juwi waketjuki taak:

—Wi Apajuí Uchijiyaitkun Aentsmagan Akiinawaitag nuna aents tudaugtin aidaunum sujam atag duka horak jegae, maake yamaik kanagtajum. ⁴² Nantagtajum wegagmi, mina sujutkatta duka ashí taa minawai, —tiuwai.

Jisus achiká jukimu

(Mt. 26.47-56; Lc. 22.47-53; Jn. 18.2-11)

⁴³ Tusa Jisus eke chichaak wajai, Judas doce aina nuwiya kuashat aentsun espada aidaun, numi aidaunaske takaku aidaujai saasá tajuntajui. Nunú aidauk sacerdote apuji aidau, chicham umiktinun jintinkagtin aidaushkam, nuigtú apu awemamu aidaujai minidau. ⁴⁴ Judas Jisusan sujuktina nunú: “Wi kugkuastatag nunuwai Jisusak, shiig achikjum emetjajum jukitajum”, ⁴⁵ tiu asa Jisusan adijak:

—¡Jintinkagtinú! —takug kugkuasui. ⁴⁶ Dutiktai achikag shiig emetjaju.

⁴⁷ Nuna dutikiagtai makichik nui ijuna nuwiya espadajin ukuini juwakug, dekas sumo sacerdote inake kuwishin asankauwai. ⁴⁸ Tuja Jisus nu aents aidaun chichajak:

—¿Wagka kasa achiktasa utugtaya imanikjumesh espada, numi aidau takusjum achigkatasagmesh minitjagme? ⁴⁹ Wi atumin jintinkun kashí kashinig juga Apajuí ememattainum pujuweg nuaduik jutijuajum achigchau agmaugme. Tujash aatus chicham agagbauwa nu uminui, —tiuwai.

⁵⁰ Nuna taig ashí niina jintintaiji aidauk pisainak ukukiajui. ⁵¹ Nuninaig makichik datsauch sabanan pempemag pataetuku, nunitaman achikajui, ⁵² dutikam jaanchnak awik ukuak wisú tupikakuwai.

Jisus apu aidau batsatbaunum ejegamu

(Mt. 26.57-68; Lc. 22.53, 54-71; Jn. 18.12-14, 19-24)

⁵³ Jisusan jukiag dekas sumo sacerdote pujamunum ejegawajui; dutikawagmatai ashí sacerdote apuji aidau, tikich apu aidaushkam, chicham umiktinun jintinkagtin aidaujai ijunjajui. ⁵⁴ Tuja Pedroschkam ikaag pataetus wejá wejakua, sumo sacerdote jeen agaajin jegaa, achijatín aidaujai jiin anamak eketu.

⁵⁵ Sacerdote apuji aidau, ashí chichaman inagdau aidaushkam egatuidau, Jisusan bakuag maatnume tusa sujukagtatus, imatikainakush ejetuinachu. ⁵⁶ Kuashat aents aidau wainak tsanumjuidau, tujash dita tuinamuk betek jugaachu. ⁵⁷ Nuniagtai wajumak aents wajaidiag tsanumjuinak:

⁵⁸ —Jutii ni tabauk antugkabiaji: Wi ju juga Apajuí ememattai uwejái takasbauwa nunak, yumpuan kumpatumchik tsawantai tikichin jegamkattajai uwejai takaschamun timayi, —tuidau.

⁵⁹ Nuna aatus tuinakushkam makichkish bakumainchaun tuidau.

⁶⁰ Nuniai dekas sumo sacerdote ejapeen eketu wajatki Jisusan iniak: —¿Wagka machikish aimtsume? ¿Nunash wajinbaugmina jusha imatjutpainawa? —tau.

⁶¹ Tamashkam Jisusak machikish aimkagkesh chichaachu, nunitai sumo sacerdote awentsag iniak:

—¿Amekaitam Kristu, Apajuí Pegkegma nuna Uchijim?

⁶² Tutai Jisus ayaak:

—Witjai, wi Apajuí Uchijiyaitkun Aentsmagan Akiinawaitag nuna, Apajuí ashí senchigtina nuna untsujin eketun tsawan uminkamtai yujagminum pachitkau minamu waitkatnaitjume, —tiuwai.

⁶³ Tutai sumo sacerdote nugkutaijin japikí ichigká chichaak:

—¿Nuigtush ya etsegtukti tusaya atsumaji? ⁶⁴ Apajuí pegkegchau chichagka nu antukugme, ¿wajinjupa atumesh?

Tutai ashí aents aidauk:

—¡Ayatak mantamnati! —tuidau.

⁶⁵ Tiagmatai Jisusan usukidaush ainai, yapiin ejatkag ijuinak:

—Dekakia, ¿ya awatamni? —awajuidau.

Jega Apajuí ememattain kuitamnushkam Jisusnak yapinum awatu-
idau.

Pedro Jisusnak waintsamjai tusa uukbau

(Mt. 26.69-75; Lc. 22.56-62; Jn. 18.15-18, 25-29)

⁶⁶ Pedro apu agaajin nugká pujaun, sumo sacerdote inake nuwa aina nuwiya makichik tajuntau, ⁶⁷ nunikmá Pedro jiin anamak ekeemtatman wainak dii wajatu, nunik:

—Amesh Jisus Nazaretnumiaya nujaimpap wekaemume, —tau.

⁶⁸ Tama Pedro ayaak:

—Wika wainchaujai, ame tujutam nunak dekatsjai, —tiuwai.

Tusa ukuak wayamunmanini jinkiuwai, nuniai atash shinukuí.

⁶⁹ Duke nuwauch ataktú wainak, nui tikich aidau batsatun:

—Jujú aujai wekaenuwejama, —tau.

⁷⁰ Tamashkam Pedrok ataktush aikasag:

—Jisusnak wainchaujai, —tau. Nuniai machik asag nuwi batsatu ataktú Pedron chichajuinak:

—Amek dekas auna jintintaiyaitme Galileanmaya asam, chichaakmesh dita chichau agma nunismek chichame, —tuidau.

⁷¹ Imatjuinam Jisusan pachis pegkegchaun chichajak, Apajuí adayas:

—¡Atum tajum nunak wika wainchaujai! —tau.

⁷² Nuna taig atash awentsag shinukuí, nunitai Pedroschkam Jisus chichajak: “Atash jimajá shinatsaig, kumpatumá waintsamjai tusam uugtuktinaitme” tibauwa nuna anentaimtus, buutiuwai.

15

Jisus Pilatuwai ejegamu

(Mt. 27.1-2, 11-14; Lc. 23.1-5; Jn. 18.28-38)

¹ Kashikmasag sacerdote apuji aidau, tikich dekas apu aidau, nuigtú chicham umiktinun jintinkagtin aidau, nuigtú chichama inagnau aidaujai ijunjag chichasag, Jisusan jigkajag jukiag Pilato pujamunum ejegawaju. ² Dutikawagmatai Pilato iniak:

—¿Amekaitam judío aidau apujim?

Tama ni ayaak:

—Ame tujutam duka dekaske, —tau.

³ Tujash sacerdote apuji aidauk shiig senchi tsanumjuidau.

⁴ Imatiagtai Pilato ataktú iniak:

—¿Amek nuna imatjupainakuish machikish aimtsumek? diisia wajupa imatjupainatsua, —tau.

⁵ Tujash Jisusak nu tamashkam aimchau, nunitai Pilato anentai jegagchau.

⁶ Jistatinig aents achikbau aidaun nu jinkiti tusag makichik mamiki-awagmatai, tuke jiisagké aidaun. ⁷ Nuanuí Barrabás daagtinchakam, Roma apuji dakituinaku pampandayamunum ni kumpajijai aentsun mau asamtai achikam egketu. ⁸ Nuniamunum kuashat aents kaunkag makichik aents tuke akupdauwe, dutiksaik akupnakti tusag Pilatun segaidau. ⁹ Tama Pilato ditan chichajak:

—¿Wakegagmek dekas atumi apugmia nuna akupkati tusagmesh? —tau.

¹⁰ Nunak sacerdote apuji aidaun tuke aneas kajejuinak, maatnume tusa sujukajun dekau asa tiuwai. ¹¹ Tujash sacerdote apuji aidauk aents tuwakú aina nuna:

—Dekas Barrabás jinkiti, —tusa akatjajui.

¹² Tiagtai Pilato ataktú chichajak:

—¿Atum iina apuji tajum nunash utugkati tujutjume? —tau.

¹³ Tutai ataktú senchi untsumkag:

—¡Achigtajum! —tiajui.

¹⁴ Tiagtai Pilato ayaak:

—¿Tujash jusha waji pegkegchauna takase?

Tutaishkam nuní senchi untsumkag:

—¡Achigtá! —awajuidau.

¹⁵ Imatiagtai Pilatushkam aents aidaujai shiig juwakta tau asa, Barrabasan jiyaak Jisusnak asutiatajum tima asutiawagmatai sujukui achigtajum tusa.

Suntag aidau Jisusan waitkasagbau

(Mt. 27.27-31; Jn. 19.1-3)

¹⁶ Dutikamtai suntag aidau apú pujusá inamtaijinian jukiag agaa jiikiagmatai, ashí suntag aidau ijuntuajaju. ¹⁷ Dutikawag jaanch yamakaitkaun anugjag, atsejutain jagkí najatuawag atsemitkakag, ¹⁸ eme anentsá kumpamji tusag:

—¡Juuwai judío aidaun Apujig! —awajaidau.

¹⁹ Imatjuinak tagkanai buuknum awatuidau, usuktanash usukidau, nuninak emematji tusag tikishmatuidau. ²⁰ Dutikainak dushí dushikinakua jaanch yamakaitkaunak awituk jujuinak ni nugkutaijinak anugjag juki emajui, achijag maawagtatus.

Jisus achigbau

(Mt. 27.32-44; Lc. 23.26-43; Jn. 19.17-27)

²¹ Yaakat Cirenenmaya Simón daagtin Alejandro, Rufo apajiya nunú, ajajinia minittaman wainkag: Jisus achigtin numi yapajia achiamun yanaktí, tusag susajui.

²² Dutika jukiag Gólgota tutainum ejentajui, (“Gólgota” tawa duka “buuk sakajua nunin” taku tawai.) ²³ Nui ejentag, vino mirrajai pachimjamun uwagti tusa susajui. Tujash nigka uwagchawai. ²⁴ Dutika Jisusa achijagmatai, suntag aidau jaanchji aidaun jujukiag, yana kayajig jiinkit nu jaanchnak jukiti tusag wasugkamaidau. ²⁵ Jisusnak etsa dukap takunai achijaju ainawai.

²⁶ Dutikainak wajuk asamtaiya achijaje nuna pachisag: “Judío aidau apuji” tusa agag adujtukajui. ²⁷ Nuigtushkam jimag magkagtinun Jisusjai achijag, tikichia nuna untsugnum awajainak, tikichia nunak menajinini awajawajui. ²⁸ Aatus uminkauwai agagbaunum chichaak: “Pegkegchau takau aidaujai betek dutikam atinai”, tawa nunú.

²⁹ Aents aidau duke ayaumas nagkaemainak buuken pegajag pegkegchau chichajuinak:

—¡Waj!, ame jega Apajuí ememattaiya nunak yumpuan kampakum-chik tsawantaik ataktú jegamainaitjai tinum jama, ³⁰ aaní nematsuk akaikim uwemjakia, —awajuidau.

³¹ Dutiksag sacerdote apuji aidaushkam, chicham umiktinun jintink-agtin aidaujai dushikinak:

—Tikichnak yajau uwemtikchauwe, nuninaitak nigka uwemtsui. ³² ¡Kristuh, Israela Apujiyah! achijam detam nu akaikikia, nuniakmin wainká iish dekaskeapi tiagmi, —tuidau.

Nuwi Jisusjai achijam detaidaushkam aiksag pegkegchaun chichajuidau.

Jisus jakamu

(Mt. 27.45-56; Lc. 23.44-49; Jn. 19.28-30)

³³ Etsa tutupit wajasú ai nagkamas ashí nugkanum suwe wajas, etsa dukap tegau aishkam imanisag asauwai. ³⁴ Imanik abaunum Jisus senchi untsamak: “Eloi, Eloi, ¿lama sabactani?” tiu. (Nunak: “Mina Apajuijuh, mina Apajuijuh, ¿wagka minash idaitusume?”) taku tiuwai.

³⁵ Aents nui ijunaidauk nuna antukag:

—Antukjua, Eliasa untsuana, —tuidau.

³⁶ Nuniaig nuwiya makichik tupikaki vino chujuau pujaunum esponja ajugká juki, tagkannum etea Jisus uwagti tusa sutai:

—Idaisakia, Elías juna uwemtijatatus minishtimpash nuniau waink-agmi, —tuidau.

³⁷ Tujash Jisusak senchi untsamak jakauwai. ³⁸ Nunikmatai jega Apajuí ememattainum jaanch ejaamuk, yakiin nagkamnas ichiinak jimaituk kanakuí. ³⁹ Tuja capitán Jisus achigbaun diyaak wajau, Jisus senchi untsumká jaamun wainak chichaak:

—Ju aentsua juka dekaskenmag Apajuí Uchijiyai, —tau.

⁴⁰ Nuigtushkam kampakumak nuwa aidau ikaag ijunas diidau. Nuanuí María Magdalanmaya tikich María Jacobo José aina nuna dukují, Salomé aatus ijunu. ⁴¹ Nunú aidau Jisus Galileanum pujusá chichaman etsegtai, yujasag yaijakaju ainawai. Nuigtushkam kuashat nuwa aidau Jisusjai Jerusalén kaunawajua dushakam ijunaidau.

Jisus ukusbau

(Mt. 27.57-61; Lc. 23.50-56; Jn. 19.38-42)

⁴² Tsawan ayamtaig etsa akaikintai nagkamnatin asamtai, ashí takatan umikagtatus takainai etsashkam akagu. ⁴³ Nuniai José Arimateanmaya apu dekas chichaman inagdaun aina nuwiya eme anentsá diitaiya nu taú, niishkam Apajuí inatjai tusa wakejin asa ajantsuk Pilatun utua: Jisusa iyashin segauwai. ⁴⁴ Nu tusa segam jakaek tusa anentai jegachu; junik capitanin untsuká itan:

—¿Dekas Jisus jakamka? —tusa iniau. ⁴⁵ Tama jakame tusa ujakam, Pilatushakam Josen:

—Jisusa iyashig jukita, —tiuwai.

⁴⁶ Tima Joseshkam jaanch puju dekas pegkeg najanamun sumak Jisusa iyashin numinum achigbaun kuwaki juki pempeaju. Dutika kaya tai umikbaunum egkea, kaya muuntan akagketuk waajin epeti ukukiwai. ⁴⁷ Nui ukuamun María Magdalanmaya, nuigtú María Josen dukujiya nujai wainkajui.

16

Jisus nantakbau

(Mt. 28.1-10; Lc. 24.1-12; Jn. 20.1-10)

¹ Tsawan ayamtai nagkaemakmatai María Magdalanmaya, tikich María Jacobo dukují, nuigtú Salomé aatus, pegkeg kugkuinun sumakaju, Jisus ukusbaunum wegag Jisusa iyashin ukatkagtatus. ² Nunikag tumig tsawaju asamtai, kashikmasag Jisus ukusbaunum wegaju, etsa yamá jiinai. ³ Nunik weenak pempentunisag:

—¿Yaki eketjamkati waitainum kaya aputuamuwe nunash? —
tudayinau.

⁴ Tujash jegantag diikmá, kaya shiig muun aputukbauk ekemak atatman wainkajui. ⁵ Nunik utuawag diikmag unsugnumanini aents datsauch jaanch puju esagman nugkuaju ekeemtatman wainkag ishankaju. ⁶ Nuniagtai nunú chichajak:

—Ishamkaigpajum, atumek Jisus Nazaretnumian achijag maawagma nu egagme. Duka nantakne, juwig atsawai, anuí ukusagma nunú diistajum. ⁷ Tujash wejum niina jintintaiji aidau, nuigtú Pedroskam ujaktajum. Nigka Galilea eemak wetatui, awi wainkagtatui ni tiuwa nunisag, —tiuwai.

⁸ Nu tima nuwa aidaushkam Jisus ukusmaunum jegantajuk ukuinak tupikakiaju, shiig senchi ishankag kujaidau asag makichik aentsnakesh ujakchajui.

María Magdalanmaya Jisus wantintukbau

(Jn. 20.11-18)

⁹ Jisus tumigtin kashikmas nantakí dekatkauk María Magdalanmaya wantintukui, ni siete wakan pegkegchau aidau chimpimtuamun jii-jamu aajakua nuna. ¹⁰ Dutikam we Jisusjai yujajakú aidau, wake besemag dekapenak buutú batsatun jegajua ujak:

¹¹ —Jisusak iwaakuwe, wi wainkamjai tusa ujamash, —ditak dekaskeapi tuinachu.

Jisus ni jintintaiji jimag wantintukbau

(Lc. 24.13-35)

¹² Nuigtushkam ni jintintaiji jimag, ajanum wetainum jintá wetatman tikich niimtina nunin wajas wantintuku. ¹³ Dutika wantintukam ditashkam tikich batsatun jegajiag ujakaju. Tuinamash ditanash dekaskeapi tichaju.

Jisus chicham etsegtugkatajum tusa ishiaktinji etegjamu aidau akat-jamu

(Mt. 28.16-20; Lc. 24.36-49; Jn. 20.19-23)

¹⁴ Nuniai niina jintintaiji once aina nunú mesanum pekajun wantintuku, nunik Jisus kakakan chichajak:

—¿Wagka dekaskeapi tatsugme? —tiu, wainkaju ujamash dekaskeapi tichaju asagmatai.

¹⁵ Nuna ti chichajak: “Ashí nugkanum wetajum, nunikjum yamajam chichama ju ashí aents aidaunum etsegkatajum. ¹⁶ Nuna antuk dekaskeapi tusa nemagtukag yamiimaidauk uwemjagtinai, untsu dekaskeapi tuinachuk suwinkan jukiagtinai. ¹⁷ Mina dekaskeapi tujutuina duke wainchatai aidaunash iwainagtinai: Nuninak mina daajui wakan pegkegchau aentsun egkemtujunash jijainak, yamajam chicham chichashtainash chichagtinai; ¹⁸ dapi esaimash, jatai egket-uamun umuinakush jakashtin ainawai. Jau aidaunash ditá uwejen achikag etsagaidiagtinai.”

Jisus nayaimpinum wakitkimu

(Lc. 24.50-53; Tak. 1.6-11)

¹⁹ Apu Jisus juna taka takawa ashimak, nuaduí nayaim wegak takuniuwai. Nunik waka Apajuí untsujin ekeemsauwai. ²⁰ Nunikmatai Jisusa jintintaiji aidaushkam jijnajui, ashí yantamnum chichaman etsegkagtatus. Nuniagtai Apu Jisus chicham etsegbaunash aents aidaush dekaskeapi titinme tusa, wainchatai aidau iwainamunmash yaigkuí.

Aatus atí.

YAMAJAM CHICHAM LUCAS AGAGBAU

Nagkabau

¹ Kuashat aents agajaje jutiiní wají augmatbau dekaskenum nagkae-makiuwa nuna pachisag. ² Dita Jisusan dekas wainkau aidau, chichaman etsejuina nu jutiinashkam dutiksag jintinjamawaju asam-tai, ³ wishakam aikasnuk, wajuk nagkamdauwaita nuna ashí iniimsan shiig dekaan agatjame, aneetaiju Teofiloh, ⁴ amina dekaskea nuna jintinjamawajua nu shiig dekau aminum tau asan.

Juan Yamijatin akiinatnuji etsegkamu

⁵ Herodes Judea apuji wajas pujamunum, nu tsawantinig pujujakuí sacerdote Zacarías, Abías wegantu. Niina nuweg Elisabet aajakuí Aarón wegantu. ⁶ Ditak Apajuí emtinish pegkegchauji atsugbau aajakajui, nunidau asag Apajuí chicham umiktajum tibaunashkam imatiksag betek umiidau. ⁷ Tujash uchijig atsujuidau, Elisabet kaga asamtai, nuigtushkam ditak muuntuch wajasaju asag.

⁸ Nuniemunum Zacariasjai ijunag Apajuí takajin aidau takastin tsawan jegamtai, jega Apajuí emematku ijuntainum takaak batsat-baunum, ⁹ tuke dutikin asag: ¿Yaki jega Apajuí ememattai dekatkau tesamu Pegkejam tutaya nui wayaash, kugkuin incienso tutainash apeati? tabaunum Zacariasan antigkui. ¹⁰ Nunik Zacarías incienso apetai, ashí aents aidauk agaa ijunas Apajuin aujú ijunaidau. ¹¹ Nuniai Apajuí aentsji nayaimpinmaya Zacariasan wantintuk, altar incienso apetainum ayaumas untsugnumanini wajantau. ¹² Nunitaman wainak Zacariasak puyatuk senchi ishamak dii wajau. ¹³ Nunitai:

—Zacariasah ishamkaipa, ame Apajuí aujam nunak Apajuik antug-tamkae. Nuniau asamtai nuwem Elisabet aishmagkun uchigmakmatai, Juan adaikattame. ¹⁴ Nunikmatai shiig aneamam dakujustatme. Tuja kuashat aents aidaushkam shiig aneediagtatui nu uchi akiinamunum. ¹⁵ Duka Apajuí wakegamun takajin atinai. Uwagchatnai vinunash, umutai kajiau aidaunashkam. Dukuji wakeen nagkamsag Wakaní Pegkejig tuke ajitnai. ¹⁶ Ni etsegbaunum kuashat Israelan uchiji wegantu aidauk, pegkegchau takatan idayinak, ditá Apuji Apajuiya nuna umijiagtatui. ¹⁷ Niiyá eemak taa etsegkattawai Apu minitnun, Apajuí etsegtin Elías, Wakaní Pegkeji senchiji ajujakua nunisag. Dutikak muun aidaush uchijijai chichaman iwajag pujustinme, aents intinkiu aidaushkam chichaman betek umiktinme, apu minitaish shiig anentus jukita tuidau asag.

¹⁸ Tusá tama Zacarías ayaak:

—Wi, mina nuwajai muumpakig juninnush ¿itugsanuk dekaskeap tawa duka uminkattawa titaja? —tau.

¹⁹ Tutai:

—Wika Gabrielaitjai dekas Apajuí inakegaitjai, ni awetime chicham pegkeja nuna ujaktí tusa. ²⁰ Tujash dekaskeap tujutua tatsum duwi, yamai nagkamsamek chichatsuk pujusam, tsawan wi tajam nu ejetatme, —tau.

²¹ Nuniai aents aidauk: “¿Zacariasash wagkag jega Apajuí ememattainum wayaash imanikash megkaekae?” tusag daká batsatu. ²² Nuninai jiinki augmamaichau dekapeak ayatak iwiimau, nunitai aents aidauk: “Jega Apajuí ememattainum wayaa awiyap wantintuke”, tuidau.

²³ Nunik Zacariasak takaamujinak ashí umik ukuak, ni jeen wakitkiu. ²⁴ Nuna nunik dukap tsawan pujatsaig nuwe Elisabet ejapjuku, nunik wantintsuk jeenig pujus cinco nantun inagkeakiu. ²⁵ Nigka nunak: “Apajuí wait anenjak jutijuae, yamaik tikich aidaush uchigmachui tusag dushijin agma nunak tujutchagtatu”, tau asa nunikui.

Jisus akiinatin etsegkamu

²⁶ Elisabet ejapjuk seis nantu pujai, Apajuí Gabrielan yaakat Nazaret tutai, Galilea nugkanum awa nui awemauwai, ²⁷ nuanuú makichik nuwa María daagtin aentsú takashtai, apu David aajakua nunú wegantu José anagmamu pujau asamtai. ²⁸ Nunik Gabriel María pujamunum wayaa:

—María pujamek, aminak ashí nuwa aina nuwiyan Apajuí wakejus etegtamjae. Dutijabau asa Apajuik amijai awai, —tau.

²⁹ Tujash nigka nuna wainak puyatkau, wagkag tuush kumpanjawa tusa. ³⁰ Nunitai Apajuí aentsji nayaimpinmaya chichajak:

—María ishamkaipa, aminak Apajuí etegtamjau asa shiig anenjamui. ³¹ Dutikamu asam, ejapjukam aishmag uchigmakam adaikattame JISUS. ³² Duka eme anentai atatui, nuniau asa ‘Apajuí Uchijí’ tama atinai. Apu Apajuiya nu, niina muunji apu David inamajakua iman emattawai. ³³ Dutikamu asa, Israela uchijí wegantu aidaunum tuke inamjatnai, ni inabaujig ajumaish nagkankashtinai, —tau.

³⁴ Tutai María ayaak:

—¿Dusha wajuk nunimainaita wi aishinchauwaitagjama? —tau.

³⁵ Tutai nayaimpinmaya aents chichaak:

—Wakaní Pegkeji, Apajuí senchijiya nujai aminak tajutjamantai ejapjuktatme. Nuaduú uchi akiinatta duka, pegkejam ‘Apajuí Uchijí’ tama atinai. ³⁶ Tuja ame pataim Elisabetchakam muumpatnum uchin ejapjuke, nunik seis nantu wegawai, kagai tinu agma nunú. ³⁷ Apajuí tujinmainuk makichkish atsawai, —tau.

³⁸ Tutai:

—Dekas wika Apajuí inakegaitjai, ame mina tujutam duka nunisag uminkati, —tiu.

Timatai nayaimpinmaya aentschakam wegak ukukiu.

María Elisabet ijagsamu

³⁹ Nunú tsawan wegamunum, María waujus jiinki weuwai, Judea nugka mujajin yaakat aunum. ⁴⁰ Nuwi jegaa, Zacariasa jeen wayaa Elisabetan kumpamak, ⁴¹ María chichatai, Elisabetan wakeenia uchi kakaaju, nuniaig Wakaní Pegkeji egkemtuju, ⁴² dutikam senchi jiiká chichaak:

—Ashí nuwa aina nuwiyan amina Apajuí etegtamjae, antsag amina uchigmishkam pegkegmai. ⁴³ Wi imanchawaitag nunin aish, ¿wagka mina Apujú dukujimesh waitkatasamesh miname? ⁴⁴ Ame jegaa wayaam mina kumpanjakum chichaam nuna antaig, uchi kakaaje

shiiḡ aneak. ⁴⁵ Shiḡ aneestatme amek, dekaskeap Apu tawa duka uminkattawa tiu asam.

⁴⁶ Tutai Mariashkam:
“Wika Apajuinak dekaskenum mina anentaimtagjai emematjai, tikima senchigtina ibau asamtai.

⁴⁷ Shiḡ aneamu ajutui Apajuí mina uwemtijin asa,

⁴⁸ wi imanchauch aigkish niina inake asamtai mina etegtua duwi.

Yamai nagkamsag ashí aents mina pachitus chichainakug:

Mariak Apajuí etegkamu asa shiiḡ aneas pujusuí, tusag tuké tujutiagtin ainawai.

⁴⁹ Apajuí dekas ashí senchigtina nunú minai uminkatnun tujuti duka shiiḡ tumaitsui,

niina daajig pegkegmai;

⁵⁰ Apajuik aents aidau niina umijuidaunak tuke wait anentsagké atinai.

⁵¹ Nigka tikima senchigtina ibau asa junak jutikae; dutikak, emebau aidaunash imanchau emakui.

⁵² Apu inamin aidaunashkam jiikí ajapeak, aents imanchau aidaun apu emakui.

⁵³ Aikasag nujantai waituidaunashkam ashí pegkeg aidaunak susauwai,

dutikak wiyakuch aidaunak wainak idaisauwai.

⁵⁴ Ni inake Israel wegantun ayamjuke, dita wait anentanak kajimat- kiche,

⁵⁵ jutii muunji Abraham aajakua nuna aatus anagkuauwai,

nuigtú ni wegantu akiinak wegagtina nuwish tuke atina nuna.”

⁵⁶ María nuna ti, Elisabetan jeenig kampakum nantu tumain pujusuí, nunik wakitkiuwai niina jeen.

Juan Yamijatin akiinamu

⁵⁷ Elisabet tsawanji uminkamtai aishmagkun uchigmakui.

⁵⁸ Nunikmatai nui ijutkau batsataidau, niina patayí aidaujai Apajuí wait anenjam uchigmakbaun antukaju asag shiiḡ aneasajui. ⁵⁹ Uchi akiina ocho tsawan wetai, judío aidauk uchi aishmag akiinaunak tuke pakaji* ajapjin asag, jukiajui nuna dutikawagtatus. Nuninak: “Uchik Zacarías atí, apají daajiya nunisag”, tuidau. ⁶⁰ Tujash uchí dukují chichaak:

—Atsá, uchik Juan atatui, —tau.

⁶¹ Tutai: —Ame pataim aina nuwiyag tu daagtinuk atsajama, — tuidau.

⁶² Tutai uchí apajin iwiyas iniidau, ya atí tawaki tusag. ⁶³ Nuniagtai, taapna sujustá tusa inakmatai susam: “Uchí daajig Juagkai” tusa agaju. Dutikamtai ashí anentai jegagchaju. ⁶⁴ Nuna dutikamuik ataktú chichakú. Nunik Apajuin emematiu. ⁶⁵ Nunitai nui ijutkau batsamin aidauk puyatjukaju. Ashí Judea mujajin batsamin aidaushkam nunak ashí dekaawaju. ⁶⁶ Ashí aents nuna antuidauk: “¿Ju uchish wajukuk atinaita?” tusag anentaimaidau, Apajuí niina senchijin yayamun dekaidau asag.

Zacarías Apajuí emematbau

⁶⁷ Zacarías Wakaní Pegkeji egkemtujam chichaak:

* **1:59** “Pakaji ajapjin asag” tawa nunak, judío aidauk uchi aishmag akiinamtaig, Apajuí dutikata tibau asag uchí katiuchiji chuchuken tsupigkag ajapjukú asamtai tawai. Diistá Gén. 17.10-12; Lev. 12.3.

68 “Emematiagmi Apu, Israelan Apajuijiya nu,
ni aentsjin uwemtijatatus tau asamtai.
69 Dekas senchigtin Uwemtikagtinun awetugmaji,
ni inake David aajakua nu wegantun.
70 Yaunchuk nagkamas Apajui etsegtin
pegkejam aajakaju etsegkajua dutiksag,
71 iina shiwaji aidaun,
nuigtú ashí tikich aents kajegtamin aina nunash depetuk uwemtijam-
jatna nuna.
72 Iina muunji aajakajua nuna pegkejan anagkuak:
‘Tuké aminak wait anenjatnaitjame’, tiuwa nunak kajimattsuk betek
umiké.
73 Iina apajin Abragkan dekas umiktatjai tiuwa duka juuwai:
74 ‘Wi ditá shiwajinash depetukan agkan ematnaitjai,
dutikam ishamkagtutsuk minak umigtuinak,
75 pegkediag batsamas,
wi wakegamunak ashí tsawantai takastinme’,” tiuwai.
76 Nuna ti uchijinashkam:
“Amek Apajui etsegtinai tama atatme;
amek Apu takastina nu emtikam umigkattame.
77 Ni aentsji aidau uwemjatnuji,
tudauji tsagkugnagtinchakam pachisam ujaktatme.
78 Nunak Apajui shiig wait anenjamu asa nayaimpinmayan Uwemtik-
agtinun awetugmae,
etsa minak tsawantan tsaaptin emama numamtuk wajaktinun.
79 Tudau takainak,
suwenum batsamas wajukmaina numamtuk wajainak,
jaak megkaemainnum batsatunash tsaaptinun iwaintuktatui.
Dutikak jinta agkan pujutnum ekagtina nui wetinme tusa dekamtija-
mattawai”, tiuwai.
80 Uchishkam tsakaak nuní senchi jintiag anentaimu, nuniak
uwegshunum pujusui, Israellum chicham etsegkatin tsawan jegatai
Apajui awemam wantinkatatus.

2

Jisus akiinamu

(Mt. 1.18-25)

¹ Nu tsawantin Roma apuji Augusto daagtin, ashí aents aidau daaji agatnakti tusa inamjau. ² Junak dutikchatain Cirenio, Siria apuji we pujai dutikauwai. ³ Tibau asamtai aents aidauk makí makichik ditá yaaktajin agatmamjatatus shimuidau.

⁴ Tuja Joseshkam Galileanum yaakat Nazaret awa nuwiya juwaki Judea nugkanum jegau, yaakat Belén apu David akiinamu aajakua nui, nigka David wegantu asa. ⁵ Nui agatmamjatatus wegak, ni nuwenamig tusa anagmamuji María ejamtinun ayasá weuwai. ⁶ Nunikag nui jegaa pujuinai tsawan ni uchigmaktinji jegajiu. ⁷ Nunikmatai iwaijin aishmagkun uchigmaku, dutika uchi pempetaiyai pempeag tagku ayugtainum egkeauwai, ijagka kajiitainig dita ayamainuk agkantak atsusú asamtai.

Uwijá kuitamin aidaun nayaimpinmaya aents aidau wantintukbau

⁸ Nunú kashia duwik, uwijá kuitamin aidaushkam nu nugkanmag uwigjin kashi kuitamainak batsatu. ⁹ Nuniai Apajuí aentsji nayaimpinmaya wantintuku, dutikak Apajuí tsaaptinjiya nu tsawan awasau dita batsatbaunum, dutikam shiig senchi ishankajui. ¹⁰ Nuniagtai nayaimpinmaya aents chichaak: “Ishankaipajum, wika atumin yamajam chichaman ujaktasan minitjime, nuna antuinak ashí aents aidauk shiig aneasagtata nuna. ¹¹ Yamai kashia juwi, apu David aki-inauwa nunú yaaktanmag uwemtikagtin Apu Kristu akiinae. ¹² Tagku ayugtainum uchi pempejam egketu wainkajum, juwapita titajum.”

¹³ Nuna taig kuashat aents nayaimpinmaya aidau wantinjau, nunikag Apajuin emematuinak kantamainak:

¹⁴ “Nayaimpinmash Apajuia duke emematiagmi, nugkanmayanash ashí niina umijuidaunak shiig agkan anentaimsa pujutan susatta duwi”, wajaidau.

¹⁵ Apajuí aentsji nayaimpinmaya aidau tusa ditan ujak, nayaim waketjantai, uwijan kuitamin aidau pempentunisajag:

—Belén uchi akiinae tusa Apajuí tujama nunú wegaja wainkagmita, —tuidau.

¹⁶ Tusag waujus wegag jegakmag, Marían Josejai, nuigtú uchi tagku ayugtainum egkematman wainkaju. ¹⁷ Nunik wainkag uchin pachis nayaimpinmaya aents tibaun etsejuidau. ¹⁸ Tusag uwijá kuitamin aidau etsejiagtai, ashí aents aidauk puyatus antuidau. ¹⁹ Maríashkam nu etsejuinamun antuk, sakapamainchau anentaimu. ²⁰ Nunikag uwijá kuitamin aidau waketuinak, Apajuin emematuinak see tuidau, ashí nayaimpinmaya aents tibaunak imatiksag wainkaju asag.

Jisus jega Apajuí ememattainum ejegamu

²¹ Ocho tsawan jegantai, uchin pakaji ajapjuinak adaikaju JISUS. María eke ejapjumainchau aig, nu adaikattame tusa nayaimpinmaya aents tibaunak dutiksag.

²² Moisés chicham umiktinun agajua nui, uchigmaku aidauk cuarenta tsawan jegatai pegkeetnume tibauwa nuna ejeyag, Jerusalén weenak uchin jukiaju Apajuí emtin iwainakagtatus, ²³ Apajuí chicham umiktajum tibaunum: “Ashí uchi aishmag iwai akiinuk Apajuinu atí”, tibau asantai. ²⁴ Weenak Apajuinu atinun jukiaju chicham umiktajum tibaunum: Jimag tórtola,* nu atsakuig jimag paum tsakat itaatajum tibauwa dutiksag.

²⁵ Nunú tsawantinig Jerusalén pujujakuí Simeón daagtin, aents pegkeg, Apajuí senchi aneen, Israelan Apajuí agkanmitkamun wainkatatus daká pujujin, Wakaní Pegkejishkam ajamu. ²⁶ Nuniau asa dekamtikau aajakuí: Apajuí awemamu waintsukek jakashtinaitme, tusa. ²⁷ José Maríajai Jisusan jukiag jega Apajuí ememattainum jegawaju, chicham umiktinum dutikatajum tawa nuna betek umikagtatus. Nuniai Simeogshakam, Wakaní Pegkeji anentaimtikjam jegau. ²⁸ Nunik uchin midaaki juki Apajuin emematu, nuniak:

²⁹ “Apuh, yamaik ame chicham tujutbauwa duka uminkau asantai, shiig anentaimsan jaaknush jakatjai.

³⁰ Uwemtikagtina nunak yamaik mina jiijuí wainkajai,

³¹ ashí aents aidaushkam ame awemamun wainkagtata nuna.

* **2:24** Tórtola tawa duka pauma numamtin tagkumtai aajakuí.

³² Juka tsaaptina nuninai, ashí aents judiuchu aidaunashkam uwemtikatin asa, tuja amina aentsjum Israel aents aina nunash eme anentai ematnai”, tau.

³³ Uchí pachis tutai, Josek Maríajai anentai jegachaju. ³⁴ Nuna ti ditanashkam:

—Atumnash Apajuí yaimpaktinme, —tusa idayak, Marían chichajak:

—Nijah, jujú uchía junak Israel aents aina nuwiyag dakitiagtinai, nuniai kuashat nemajuidaush agtinai nuninak uwemjagtinai. ³⁵ Nuniagtai Apajuí ashí aents anentaibaujin paan iwainatta duka, (aminak nagkí ijumaina imatijamak anentaiminig waitkagmastinai), —tau.

³⁶ Nuanuig nuwa Apajuí etsegtin Ana daagtin, Fanuela nawanji Aser wegantu shiig muuntuch wajasá pujau. Nigka shiig tsakatuch aishina siete mijan pujusuí, ³⁷ nuniau wajemea ochenta y cuatro mijan wegau, nuigtushkam jega Apajuí ememattainmag tuke tsawai kashishkam, yujumkan ijagmá pujus Apajuin aujú pujú. ³⁸ Nunin asa Simeón tusa ashimkamtai, Anashkam jegantá, Apajuin see taku emematak Jisusan pachis:

—Ashí aents Jerusalén agkanmagati tusa dakaina nunak ju uchi dutikatnai, —tau.

³⁹ Apajuí chicham umiktajum tibauwa nunak imatiksag umikag, ditá yaaktajin Nazaret waketjaju Galilea nugkanum awa nui.

⁴⁰ Nunik batsatbaunum Jisuschakam tsakaak iyashinish senchi wegau, nuniak nuní senchi jintiag anentaimu, Apajuí wakega nunashkam shiig dekau, tuja Apajuishkam niini shiig aneau.

Jisus tsakat asa jega Apajuí ememattainum webau

⁴¹ Makí makichik mijantin José Maríajai, Jerusalén tuke wesagké aidau Pascua jegatai. ⁴² Nunin asagmatai Jisuschakam doce mijan ajamu weu, ditajai Jerusalén jista inagkeautaiya nuna betek dutikata-tus. ⁴³ Nuwi jegawag batsamas, Pascua ashimnakmatai waketjaju, nuninai Jisusak Jerusalén juwaku, niina dukujish Joseshkam dekat-saig. ⁴⁴ Dita anentainsajag tikich aidaujais ijunag wegatai tusag, makichik tsawan kuwaekaju, nuniau ashí ditá waintai, nuigtú ditá patayí aidaunmash egakú. ⁴⁵ Tujash wainkachag Jerusalén waketjaju egainak.

⁴⁶ Nunikag kumpatum tsawanta juwi wainkaju, jega Apajuí ememattainum chicham umiktinun jintinkagtin aidaujai ejapena ekeemas, chichaagtai antak niishkam iniimak eketun. ⁴⁷ Ashí aents ni chichaa-mun antujuidauk, yachajin diijus puyatkag diidau, dita iniamash shiig aimu asamtai. ⁴⁸ Nunittaman apají dukujijai wainak puyatjuk, dukují chichajak:

—Uchuchih ¿wagka tikima aan wekaenaitme? Nijah, wi apajai shiig senchi puyatjukan egakun wekaetusjamna, —tau.

⁴⁹ Tama ni ayaak:

—¿Wagka minash egatjume? ¿Atumek dekatsjumek mina Apag wakegamun takaakun pujumainaitag duka? —tau.

⁵⁰ Tujash ditak, wagkak tawa tusag dekagmainchau dekapedau.

⁵¹ Nunikag Jisusan jukiag Nazaret waketjajui, Jisus nui pujusá ashí dita tabaunak betek umiau. Tujash niina dukujig ashí Jisus

nunikbaunak tuke kajimattsuk anentaimtú pujau. ⁵² Tuja Jisuschakam nuní senchi tsakau, dekatjinishkam nunisag, tuja Apajuishkam, aents aidaushkam shiig anentuidau.

3

Juan Yamijatin uwegshunum chichagkagtukbau
(Mt. 3.1-12; Mr. 1.1-8; Jn. 1.19-28)

¹ Roma apuji Tiberio quince mijadai ashí nugkanum inamu. Tuja Poncio Pilato inamu Judeanum, nuniai Herodes inamu Galileanum, untsu niina yachi Felipe inamu Iturea, nuigtú Traconitenum, untsu Lisaniyas Abilinianum inamu. ² Nuniamunum Anás, Caifás aatus sumo sacerdote aajakajui. Nunú batsatai Zacariasa uchijí Juan uwegshunum pujuttaman Apajuí ujakuí chichagkagtukti tusa. ³ Tima namak Jordagnum tikiju batsataidaunum ashí wekagas chichagkagtau, tudau takatan idayinak yamimag tsagkugnagtinme tusa. ⁴ Nunak Isaías Apajuí etsegtin agagbauwa nui, ju tibauwa nu tau asantai nunikui:

“Makichik aents eemak taa uwegshunum wekagas senchi jiiká chichagkagtak:

Apu wekaesatun jintan shiig iwajug, esegak tutupit dakueg,

⁵ ashí jinta japagau aidaunash nugkan aintug,

nainnashkam yumpuag pakamak betekmak, jinta tunin aidaunash tutupit esegak,

tutitag aidaunashkam shiig iwajug umiyajama numamtuk,

atumi anentaimish shiig iwajajum umiktajum, Apu minitin asantai.

⁶ Apajuí aents aidau uwemtikatnun awematta nunak ashí aents wainkagtinai”, tawai.

⁷ Kuashat aents aidau Juan yamijati tusag minituidau, nuniagtai chichajak: “¡Atumek iwanchi uchijí asajum aents tsanú yujagme! ¿Wagka yamimagtasagmesh wakegagme? ¿Atumek ayatak yamimamukis Apajuí suwimak sukagtumaina duka uwemtumainaitai tajumek? ⁸ Dekas tudau takatan idaisaush wajuku amainaita nunú iwainmamkatajum. Atumkek: Jutiik Abraham wegantu asaja yupichuch uweemain ainaji, tumamigpa. Dekas tajime: Apajuik jujú kaya aina junakeshkan Atragka uchijí emamainai. ⁹ Ashí ajak nejechu aidauk, jachai ajaka tsupija apetiama numamtuk, aents tudaunak taká batsatun, Apajuí suwimak susatnuk uminas awai.”

¹⁰ Tutai aents aidau iniinak:

—¿Tujash wajukmainaitji? —tuidau.

¹¹ Tiagtai ni ayaak:

—Jimag nugkumainji ajamuk atsugbaun susati, yumainji ajamushkam dutiksag dutikati, —tau.

¹² Apú kuichkiji atinun yajumin aidaushkam yamimagtasag kawnawag iniinak:

—¿Jintinkagtinuh, jutiish wajukmainaitji? —tuidau.

¹³ Tiagtai:

—Apunu kuichik atinun akikmainakui juwajum nunú, nuní ingkeasjum aents aidau akikmakta tigpajum, —tau.

¹⁴ Tutai Suntag aidaushkam dutiksag:

—¿Jutiish wajukmainaitji? —tuidau.

Tiagtai:

—Atumek aents uwakajum atanjum duka dutikawaigpa, tikitchakam wainkagmek tsanumjujaigpajum, atumí apujum akigmaina nujaig shiig aneasjum juwaktajum, —tau.

¹⁵ Tuja ashí aents aidauk, Apajuí awematnaitjai tibauwa nuna daká batsataidau asag: ¿Juagchawashit Kristu? tusag anentaimtuidau.

¹⁶ Tu anentaibiagtai aents aidaun Juan chichajak: “Wika ayatak yumí yamijatjai, tujash mina nagkaetasu senchigtin minittawai, wika niiya imanchau asan niina sapatjinakesh atitmaitsujai. Nunú yamigmagtatjume Wakaní Pegkejiya nujai, nuigtushkam nigki jiiyai suwimkan sukagtustinuk. ¹⁷ Nigki ashí aents aina nuwiyen akanjattawai, aents trigon ajakbau aidau juuká ijumag, awagti wampujin utsaak nejeen trigo ijumtainum yajumama numamtuk, Apajuí umigchaunak jii ajumaish kajinkashtina nui suwimkan suwak, niina umigkau aidaunak ni pujutaijin yajuaktinai.”

¹⁸ Juna aatus tusa nuigtush aents aidaun jintintu yamajam chicham pekeja nuna: “Dekas Kristu Apajuí Uchijiya duka tajutjamae”, tusa.

¹⁹ Tusa jintinkagtú wekagu asa Herodes Galileanmaya apua nuna igkua: “Yatsum Felipe nuwe Herodías jujukium auk pegkegchawai, tikitchakam pegkegchau takame”, tusa jiyakú. ²⁰ Tusá Juan tima, Herodes senchi kajeká nuní nagkaemas pegkegchaun takaak, Juangkan achiká aents achiká chimpitainum egkeauwai.

Jisus yamimagbau

(Mt. 3.13-17; Mr. 1.9-11)

²¹ Juan ashí aentsun yamiak pujai, Jisuschakam yamimajui, nunik Apajuí aujai nayaim ujaniuwai. ²² Nunikmatai Wakaní Pegkeji pauma nunin wajas paan wainainamunum niiní akagu, nuniai nayaimpinmaya chicham antuekau:

—Ametme mina uchig aneetaigmek, aminí shiig aneajai, —tabau.

Jisukristu muunji aajakú aidau

(Mt. 1.1-17)

²³ Jisusak treinta mijanji ajamu tumain ni takaamujinak nagkabauwai. Jisusnak José uchijiyai tuidau,

Josek Elí uchijí aajakuí, ²⁴ Elik Matata uchijí,

Matat Leví uchijí, Levik Melqui uchijí,

Melquik Jana uchijí, Jana José uchijí,

²⁵ José Matatiasa uchijí, Matatías Amosa uchijí,

Amós Nahuma uchijí, Nahum Eslí uchijí,

Eslí Nagai uchijí, ²⁶ Nagai Maata uchijí,

Maat Matatiasa uchijí, Matatías Semei uchijí,

Semei José uchijí, José Judá uchijí,

²⁷ Judá Joana uchijí, Joana Resa uchijí,

Resa Zorobabela uchijí, Zorobabel Salatiela uchijí,

Salatiel Neri uchijí, ²⁸ Neri Melqui uchijí,

Melqui Adi uchijí, Adi Cosama uchijí,

Cosam Elmodama uchijí, Elmodam Era uchijí,

²⁹ Er Josué uchijí, Josué Eliezera uchijí,

Eliezer Jorima uchijí, Jorim Matata uchijí,

Matat Leví uchijí, ³⁰ Leví Simeogka uchijí,

Simeón Judá uchijí, Judá José uchijí,
 José Jonagka uchijí, Jonán Eliaquima uchijí,
³¹ Eliaquim Melea uchijí, Melea Mainagka uchijí,
 Mainán Matata uchijí, Matat Natagka uchijí,
 Natán Davita uchijí, ³² David Isai uchijí,
 Isai Obeta uchijí, Obed Booza uchijí,
 Booz Salmogka uchijí, Salmón Naasogka uchijí,
³³ Naasón Aminadapa uchijí, Aminadab Arama uchijí,
 Aram Esroma uchijí; Esrom Faresa uchijí,
 Fares Judá uchijí, ³⁴ Judá Jacopa uchijí,
 Jacob Isaaka uchijí, Isaac Abragka uchijí,
 Abraham Taré uchijí, Taré Nacora uchijí;
³⁵ Nacor Serugka uchijí, Serug Ragau uchijí,
 Ragau Pelegka uchijí, Peleg Hebera uchijí,
 Heber Sala uchijí, ³⁶ Sala Cainagka uchijí,
 Cainán Arfaxata uchijí, Arfaxad Sema uchijí,
 Sem Noé uchijí, Noé Lameka uchijí,
³⁷ Lamec Matusalegka uchijí, Musalén Enoca uchijí,
 Enoc Jareta uchijí, Jaret Mahalaleela uchijí,
 Mahalaleel Cainagka uchijí,
³⁸ Cainán Enosa uchijí,
 Enós Seta uchijí, Set Adagka uchijí,
 Adagak Apajuí najanamu.

4

Iwanch Jisusan pegkegchau takamtiksata tibau
 (Mt. 4.1-11; Mr. 1.12-13)

¹ Jisus Wakaní Pegkeji egkemtujam Jordagnumia jiinki wakettai, Wakaní Pegkeji uwegshunum emauwai. ² Dutikam nui cuarenta tsawantai Jisus pujaun iwanch dekapsauwai. Imaan tsawan yutsuk inagkeau asa yapajuauwai. ³ Nunitai iwanch chichajak:

—Dekas ame Apajuí Uchijiyaitkumek, ju kaya nu pag emam yuwakia, —tau.

⁴ Tutai Jisus ayaak:

—Agagbau awai: ‘Aentsuk imá yujumkajaigkik pujumaitsui, Apajuí chichamega nujaishkam pujumainai’, —tiuwai.

⁵ Timatai iwanch nui inagkeaki Jisusan muja tsakajunum iwakuí. Dutika juú inaktamuik ashí nugkanum yaakat aina nuna, nuigtú ashí pegkeg aidaunashkam iwaintukui. ⁶ Dutika chichajak:

—Ashí ju imaja junak amina amastajame. Juka minai idaisamui, nuaduí wi wakegamun sumainaitjai. ⁷ Ame mina tikishmajam emematjakminig, ashí aminuk atí tusan idaitustajame, —tau.

⁸ Tama Jisus ayaak:

—jWetá iwanchih! agagbau awai: ‘Ame Apujum Apajuiya duke emematta, nuniakum imá nigki umigkata’, tawai —tiu.

⁹ Timatai nui inagkeaki yaakat Jerusalén ejegau, dutika jega Apajuí ememattainum yaki iwaká:

—Ame dekas Apajuí Uchijiyaitkumek juwi wajasmek tsekem iyaata, ¹⁰ wagki agagbau awai:

‘Apajuí ni aentsji nayaimpinmaya aidaun awetugmattawai kuitam-jamkatnun,
 11 dutikamu asag uwegmin achigmakagtatui iyaakum kaya tukumkaim tusa’, —tau.

12 Tutai Jisus ayaak:

—Agagbau awai: ‘Amina Apujum Apajuiya nu pegkegchaunum dekapsatasamek wakeyipa’, tawai —tiuwai.

13 Timatai iwanchik pegkegchau takamtiksatatus anentaimtusbau-nak ashí dekapes ukukiuwai, tikich tsawantinish dekapsatjai tusa.

Jisus Galileanum ni takaamuji nagkamamu

(Mt. 4.12-17; Mr. 1.14-15)

14 Nunik Jisusak Wakani Pegkeji senchimitkam Galilea wakitkiuwai, nunikmatai ashí nugkanum nui batsataidauk niina pachisag kuashat chichaidau. 15 Nui jegaa, jega ijuntainum wayaa jintinkagtutai ashí aents aidauk emematuidau.

Jisus Nazaret pujusbau

(Mt. 13.53-58; Mr. 6.1-6)

16 Jisus Nazaret ni pujusá tsakagbaunum wakitki jegaa, tsawan ayamtaí tsawagmatai jega ijuntainum wayau tuke nunin asa. Nunik wajainiu Apajuí chichamen ausatatus, 17 nunitai papiin Apajuí etsegtin Isaias agagbaun susaju. Dutikam dakuek diikmá ju agagbauwa juna wainak, auju:

18 “Wakani Pegkeji minai awai nuniau asamtaí mina etegtuae, ujunauch aidaun pegkeg chicham aidaun ujakti tusa.

Apajuí minak awetine, achikbau aidaush agkanmagawagtatui tusam ujaktá tusa.

Wainmachu aidaushkam wainmitkakta dutikakum waitkatai aidaush ayamjukta,

19 tuja yamaik Apajuí aentsun wait anentawai tusam etsegtkata” tibauwa nuna.

20 Nuna aujus inagnak pempeag nui takaun susa ekeemsau. Nunikmatai ashí aents nui utsanawajuk, dii pekajaidau. 21 Nuniagtai:

—Wi augbau antukujum juka yamai uminkae, —tiuwai.

22 Ashí aents aidauk niina pachisag pegkejan etsegtuidau, ni waji pegkeg pachisa chichamunashkam puyatjusag diidau, nuninak:

—¿Jujú Josen uchijiya jama? —tuidau.

23 Tiagtai ni chichaak:

—Dekaskenum jujú chicham: ‘Ampijatnuh, amek ampimata’ tibauwa ju tujuttatjume. ‘Nuigtushkam kuashat waji Capernaum ame dutikamu antinuweg nu, yamai amina nugkemia juwish dutikata’ tujuttatjume, —tau.

24 Nuna ti nuigtú:

—Dekas tajime: Apajuí etsegtinuk ni nugkenig wakejusa antugmak achauwai. 25 Junak dekas tajai: Apajuí etsegtin Elías pujujukua nunú tsawantinig, Israel nugkanum batsamajakajui kuashat nuwa waje aidau, nuniemunum ashí Israel nugkanum nujantai waitiamu tepeauwai, kampatum mijan jimaituk yumi yutachu asamtaí. 26 Tujash Apajuik atumni waje batsatun Elías yaigtí tusa awematsuk, Sareptan-maya nuwa waje judiuchu, yaakat Sidón tikiju awa nui pujaunum Eliasnak awemauwai. 27 Nuigtushkam kuashat aents jata lepra

tutain achimaku Israel aijakuí, Apajuí etsegtin Eliseo pujujakua nunú tsawantin, tujash makichkish nunú aidaunak etsagautsuk, judiuchu Naamán Siria nugkanmayaya nuna etsagajui, —tiuwai.

²⁸ Tusa tutai jega ijuntainum utsaanawajuk senchi kajekaju. ²⁹ Nunikag wajatjag Jisusan achiká júkiag yaaktan ukumtikiag munjanum iwakaju, betsag tajaekaunum ajuami tusag. ³⁰ Dutikam dita mininamunmag eteenki, eteenki waketak ukukiuwai.

Aents wakan pegkegchau egkemtuumun Jisus etsagagbau
(Mr. 1.21-28)

³¹ Nunik Jisusak yaakat Capernaum Galilea nugkanum awa nui weuwai. Nui pujus tsawan ayamtai tsawautai jintinkagtau. ³² Nunitai puyatjusag antujuidau ni jintiamunak, nigka aents chichame antugtai aidaun nagkaesau jintinkagtau asamtai.

³³ Nuniamunum aents wakan pegkegchau egkemtuumu jega ijuntainum wayaa eketu, shiig senchi unsumak:

³⁴ —¡Jisus Nazaretnumiayah ukujatkita! ¿Wagka amesh jutii pujamunmash miname, ijijatuatasamek minam? Wika ame yaitpa nunak dekagme, Apajuinu pegkegma nuuwaitme, —tiuwai.

³⁵ Tutai Jisus jiyaak:

—¡Itatkata, takamtak jiinkim wegakum aanú aentsuk ukuktá!

Tama wakan pegkegchaushkam aentsun nugká ajiaju tikich aidau emtin, nunik jiinkiu, dutikashkam aentsnak machikish pegkegchauk emachui. ³⁶ Nunikmatai wainkag ashí aents aidauk anentai jegagchaju, nunikag:

—¿Jusha wajuku asaya chichamesh senchigtinaita, wakan pegkegchau aidaunash chichamenig jiyaa jusha? —tuidau.

³⁷ Jisus dutikamua nunak ashí nugka tikiju aidaunum batsatuk antujajui.

Jisus Pedro tsatsají etsagagbau
(Mt. 8.14-15; Mr. 1.29-31)

³⁸ Jega ijuntainmaya Jisus jiinki Simón Pedro jeen jegauwai. Nunikmá wainkau Simón Pedro tsatsají senchi tsuweak tepettaman, nunitai:

—Wait aneamam etsagagta, —tusag segajui. ³⁹ Tiagtai Simón Pedro tsatsajin jegantun tsunsumtua: “¡Tsuwemuwah ukuktá!”, tiu. Tamawaik pegkeg wajasuí, nunik yutain inajuk Jisusan, nuigtú niijai yujau aidaunashkam ajamsau.

Kuashat jau aidau etsagagbau
(Mt. 8.16-17; Mr. 1.32-34)

⁴⁰ Agkuantai kuashat aents jaidaun Jisusan ikautkajui, dutikawagmatai niishkam makí makichik achiká etsagakui. ⁴¹ Tuja wakan pegkegchau aidau kuashat aentsun egkemtujuk senchi unsumak jiinainak:

—Amek Apajuí Uchijiyaitme —tuidau, Kristuk Apajuí awemamua nuna dekaidau asag, tujash Jisusak chichaktí tusag idaichau.

Jisus jega ijuntai aidaunum chichagkagtukbau
(Mr. 1.35-38)

⁴² Nunik tsawau tsawaig yaaktanmaya jiinki, nugka agkantu aents atsamunum weuwai. Nunikmatai aents aidauk egai egainakua ni pujamunum jegawag:

—¡Ukujatkipa! —tusag segaidau. ⁴³ Tuinam:

—Wika tikich yaakat aina nuwish yamajam chicham Apajuí aentsnum wajuk inamua nunak etsegkattajai, nuna nunikti tusa awemamuitjai, —tiuwai.

⁴⁴ Tau asa, Galileanum * jega ijuntai aidaunmash wayaa jintinkagtau.

5

Kuashat namak achikbau
(Mt. 4.18-22; Mr. 1.16-20)

¹ Tikich tsawantai Jisus kucha Genesaretnum uwet wekagai, kuashat aents Apajuí chichamen antukagtatus tuwakag chanuidau. ² Imaniagtai niimkamá, jimag bote anugkam tepettaman wainkau, namaká main aidaushkam botenmaya jinjag redjin nijainak batsamtu-idaun. ³ Nunik Simogka botejin egkemag: Machik ejapeen inanmanta, tusa nui ekeemas aents tuwakun jintintu. ⁴ Nunik ashimak, Simogkan chichajak:

—Wiyankam ejapeen emam redjum ajugkam namak maata, —tiuwai.

⁵ Tama Simón ayaak:

—Jintinkagtinuh, kashi tuke ajú ajunkawa tsawampakuish makichk-ish maachmaji, tujash ame chichamjumin ajugtajai, —tusa ⁶ ajugkú. Dutikkamá shiig kuashat namakan achikú, imatikamu asa rednak ichiau. ⁷ Nunitai ditá kumpají tikich botenmayan iwiyauidau, taawag yaimpaktinme tusag. Dutikam kautuawaju, nunikag namaknak botenmag mai aimkaju, dutikam botek tepeattak wajau. ⁸ Imanitai Simón Pedro, Jisusan tikishmatug pujujus:

—Apuh, ukugkita minak, wika shiig tudauwaitjai, —tiu.

⁹ Namakan imatika kajegkaju asag, ditajai yujaidauk puyatkajui, ¹⁰ Simogjai ijunja namak mautajji aidau Jacobo, Juan Zebedeo uchijí aina dushakam. Nunitai Jisus chichajak: —Simogkah ishamkaipa, namak maatasajum yujagjum anmamtuk, Apajuí chichame etsegkujum aents aidau minai ikautjin atajum tusan wi jintintuatjime, —tiu.

¹¹ Nunikag bote aidaunak anugkag, ashí ukuinak Jisusjai wegajui.

Jisus aents jata lepra achikbau etsagagbau
(Mt. 8.2-4; Mr. 1.40-45)

¹² Tikich tsawantai Jisus makichik yaaktanum pujai, aents lepragtin tajuauwai, nunik Jisusan wainak tikishmag tsunsumá, nijayin nugká antig pujusá:

—Apuh, wakegakmek etsaentumainaitme, —tau.

¹³ Tama Jisuschakam uwejen antiak:

—Wakegajai, yamaik tsagagta, —tiuwai.

Tusa tamawaik leprak megkaekauwai. ¹⁴ Dutika Jisus:

—Makichik aentskesh ujakaipa, tutupit sacerdote pujamunum jegaata, nuniakum ame tsagaja pegkeg webaujum iwainmamkum,

* **4:44** Tikich papí agagbaunmag “Judea” tuinai, tikich agagbauwa nui “Galilea” tawa nuwiya jukimui, nunin asa mai pegkejai.

Moisés tibauwa dutiksamek ejegata ditashkam: Dekaskeap tsagaje, tujabiagti, —tiu.

¹⁵ Tujash ni dutikamua duka senchi naatu, nuniau asamtai tuwajuidau ni chichamen antugkagtatus, nuigtú dita jaamujinash etsaentugtinme tusag. ¹⁶ Tujash nigka kanaká nugka agkantunum wegau, nunik Apajuin auju.

Jisus aents wekaechau etsagagbau

(Mt. 9.1-8; Mr. 2.1-12)

¹⁷ Makichik tsawantai Jisus jintinkagtutai fariseo aidau, chicham umiktinun jintinkagtin aidaujai wayawag antuinak pekajaidau, Galilea nugkanmaya, Judea nugkanmaya, nuigtú yaakat Jerusalén bat-samin aidau kaunkajushkam, nunik wainaidau Jisus Apajuí senchijin aents jau etsagamun. ¹⁸ Nuniamunum wajumak aents aidau, aents wekaechaun ainká tepetaijin pataidiag itawag: Wajuk jegá wayaik Jisus wajamunum ejentag, tuidau. ¹⁹ Tujash kuashat aents tuwakú asa waimainchau asamtai, jegá tuntupen wakag chigkaidiag, wekaechauwa nuna ainká tepetaijijai nenawag akakiaju, dutikawag Jisusa emtin aepsaju. ²⁰ Nunú aents aidau niini kajinas anentaimaid-aun wainu asa:

—Aishmagkuh, amina tudaujum aidauk tsagkugnaje, —tau.

²¹ Nuna tutai chicham umiktinun jintinkagtin aidau, fariseo aidaujai ditak anentaimsag: “¿Niish ya asaya Apajuinash pegkegchaunash chichajua? Imá Apajuikeajama tudaun tsagkugkagtumainuk”, tuidau.

²² Tu anentaimaidaun Jisus dekau asa:

—¿Wagka annush anentaimjume? ²³ ¿Tuwaita imá yupichuch tumainush, tudaujum aidauk tsagkugnaje taja dukaih, atsa nantakim wetá tumainaitag dukaih? ²⁴ Tujash wi Apajuí Uchijiyaitkun Aentsmaga Akiinau asan, ju nugka juwish tudau aidaunash tsagkugkagtumainaitag nu dekaatajum.

Tusa wekaechaun chichajak:

—Amina tajame, nantakim ainká tepetaijum jukim jeemin wakitkita, —tiuwai.

²⁵ Tusa tamawaik ditash ijunaig, nantakí ni ainká tepamujin juki Apajuin emematki jeen wakitkiuwai. ²⁶ Dutikamtai ashí aents aidauk puyatkg Apajuin emematuinak:

—¡Yamai dekas wainkaji Apajuí senchijiya duka! —tuidau.

Jisus Levin mina jintintaig atá tibau

(Mt. 9.9-13; Mr. 2.13-17)

²⁷ Nuna dutika ukuak jiinkiu, nunik wekamá Levin[☆] wainkauwai, kuichik apunu atinun akikmagtai yajumak ekeemtatman, nunik:

—Mina jintintaig atá, wemí, —tiuwai.

²⁸ Tama ni takataijinak ashí ukuak Jisusjai weuwai.

²⁹ Nunik nunú tsawantaik Jisusan eme anentus ajamsatatus niina jeen yutain shiig umikú, dutikamunum Leví kumpají, apú kuichkiji atinun yajumin aidaushkam, nuigtú tikich aidaujai mesanum pekajaidau.

³⁰ Nuniagtai chicham umiktinun jintinkagtin aidau fariseo aidaujai, Jisusa jintintaiji aidaun ashishmatuidau, nuninak:

☆ 5:27 Diistá Marcos 2.14

—¿Wagka atumesh apú kuichkiji atinun yajumin, nuigtú aents pegkegchau aina ibaujai ijunajum yuwakjumesh, umutash ditajaish umajume? —tuidau.

³¹ Tiagtai Jisus ayaak:

—Aents jamamtuchu aidauk ampijatnunak atsumtsame, aents jau aidau ampijatnunak atsumame. ³² Wika aents tudaugtuchu aidaunak minitchauwaitjai, wika aents tudaugtin aidau tudaujin idayinak mina nemagtuktinme tusan tauwaitjai, tiuwai.

Jisumaka pujusá Apajuí aujut iniimsamu

(Mt. 9.14-17; Mr. 2.18-22)

³³ Jisus tutai dita aainak:

—¿Wagka Juan Yamijatna nuna jintintai aidauk, fariseo aidaujai yujumkan ijagmainaish, amina jintintaijum aidauk yuwinak, umutnash umu wajaash yujainawa? —tuidau.

³⁴ Tutai ni ayaak:

—¿Nuwena nunú aents ipaamu aidaush, nu nuwenu ditajai pujaigkish, yujumkan ijagmak pekamainkaih? ³⁵ Tujash tsawan jegattawai nuwena nunú juwam atata nu, nunikmatai ipaamu aidaush wake besemag dekapenak yujumkanak ijagmakagtatui, —tiuwai.

Jisus jintinkagtak yamajam jintinkagtamua duka yaunchuk jintinkagtutai aina nujaig pachiiimitsui tibau

(Mt. 9.16-17; Mr. 2.21-22)

³⁶ Tusa junashkam augmatus:

—Makichkish nugkutai yamagman tsupikag nugkutai mamujunmag adujtuchu ainawai, dutikamak nugkutai yamagmaitak besemain asamtai, tuja yamajam tsupikbau mamujunum adujtamashkam shiig juwamaitsui. ³⁷ Tuja makichkish uva yumiji yamá ijugbaunak, vino yajatai duwap apagbau ajutnumag yajachu ainawai, dutikamak uva yumiji yamá ijugbau kajiak, duwap apagbaun ipatmainai, nunik vinuk ukagag duwap apagbaujai ajapnamainai. ³⁸ Duwi uva yumiji yamá ijugbauk duwap yamajam apagbaunum yajataiyai, dutikamu asa vino kajiak pushutakushkam ayatak egkenag wetai nunisag pegkejak amainai. ³⁹ Tuja umutai yaunchuk najanamun umin aidauk, yamagmanak wakegainatsui, ditak: 'Yaunchuk najanamua nu imá pegkejai' tuidau asag, —tiuwai.

6

Jisusa jintintaiji aidau tsawan ayamtai aig trigo juki yuwawagbau

(Mt. 12.1-8; Mr. 2.23-28)

¹ Tsawan ayamtai tsawaju ai, Jisus ajak ajakbaunum nagkaebau. Nuniamunum ni jintintaiji aidau trigo nejeen kupik jukiag uwejen pakajag yuwidau. ² Nuniagtai fariseo aidau ditan chichajuinak:

—¿Wagka atumesh tsawan ayamtai tsawagmataig takantsashti tibauwa nunin aish aikagme? —tuidau.

³ Tiagtai Jisus ditan ayaak:

—¿Atumek agagbauk ausachuk ainajum, David niijai yujaamujai yapajuinak, ⁴ jega Apajuí ememattainum wayaa, pag imá sacerdotek yuwati tibauwa nuna juki, niina kumpají aidaujai yuwawajua duka? —tau.

⁵ Nuna ti, nuigtú chichaak:

—Wi Apajuí Uchijiyaitkun Aentsmagan Akiinaw asan, tsawan ayamtai tsawagmataish wajukmainaita nunak wikitjai tumainnuk, —tiuwai.

Tsawan ayamtai tsawaju aig aents uweje chuwiun Jisus etsagagbau (Mt. 12.9-14; Mr. 3.1-6)

⁶ Atakeshkam tsawan ayamtai tsawagmatai, Jisus jega ijuntainum wayaa jintinkagtau. Nuniamunum aents uweje untsujiya nu chuwiú nui pujau. ⁷ Nunitai chicham umiktinun jintinkagtin aidau, fariseo aidaujai Jisusan diidau, tsawan ayamtai aig etsagaun wainkag tsanumjugtasag. ⁸ Tujash nigka dita anentaibaujinak dekau asa, aents uweje chuwiun chichajak:

—Wajakim ejapeen wajantá.

Tama niishkam wajakí ejapeen wajantú. ⁹ Nunikmatai Jisus chichaak:

—Iniastajime: ¿Tsawan ayamtai aish pegkeja duká takamainait, atsa pegkegchauk dutikmainait? ¿Tsawan ayamtai tsawaje tusaik, aentsuk etsagautsuk jakati tusa idaimainait? —tau.

¹⁰ Nuna ti ashí aents nui ijunun diisá, nuna aentsun chichajak:

—Uwejum dakuekta, —tiuwai.

Tama dakueku, nunik uwejenig pegkeg wajasú. ¹¹ Dutikamtai senchi kajekag: Jisusash itugmainkita tusag ditá ditak chichaidau.

Jisus chicham etsegtugkatajum tusa ishiaktinji doce etegjamu aidau (Mt. 10.1-4; Mr. 3.13-19)

¹² Tikich tsawantai Jisus Apajuin ausatatus mujanum weu, nunik nui kashi pujus Apajuí au aujkawa tsawampajui. ¹³ Nunik tsawaag ni jintintaiji aina nuwiyau doce etegkeg ijumjauwai, nunú aina nunak: “Mina chichameg etsegtujin atajum”, tiuwai. ¹⁴ Duka jujú ainawai: Simón, Pedro atí tibauwa nu, Andrés Simogka yachi, nuigtú Jacobo, Juan, Felipe, Bartolomé, ¹⁵ Mateo, Tomás, Jacobo Alfeo uchijí, nuigtú Simón niina nugken agkanmitkatatus kuashat aents aidaujai chichajakua nu. ¹⁶ Judas Jacobo yachi, tikich Judas Iscariote Jisusan unupiang sujukua nu aatus.

Jisus kuashat aents jintintuamu (Mt. 4.23-25)

¹⁷ Nunik ditajai ijunag akaiki, pakanum wajantú ni jintintaiji aidaujai. Nunikmatai kuashat aents tuwagkaju ashí Judeanmaya, Jerusalegnunia, Tiro nayants awa nuwiya, Sidognumia aidau, ni jintinkagtamujin antukagtatus, nuigtushkam dita jaamujinash etsaentugti tusag, ¹⁸ nuniagtai wakan pegkegchau egkemtugbau aidaunash etsagakui. ¹⁹ Ashí aents aidauk Jisusan antigtatus kakanmamaidau, niiniya senchi jiinak ashí aents jau aidaunak etsagau asantai.

Shiig aneasjum pujustajum tibau (Mt. 5.1-12)

²⁰ Jisus ni jintintaiji aidaun diisá chichajak: “Atum iik nagkamik iina senchijinig pegkeg pujuta duka jumaitsuapi tautigmek shiig aneasjum pujustajum, Apajuí atumiin inamjatin asantai”, tau.

²¹ “Atum yamai Apajuinu pegkeg takastasa wakegakjum, yapajaku waitmaina imanikjum waitiautigmek shiig aneasjum pujustajum, atumnak Apajuí kuashat amastin asantai. Atum yamai wake besemag

batsatkujum buutú pujautigmesh shiig aneasjum pujustajum, atumek shiig aneakjum dushigtin asajum.

²² “Wi Apajuí Uchijiyaitkun Aentsmagan Akiinauwaitag nunú nemagtuidau asagmin, aents aidau kajegtamainak yajá pujusta tusa jiiipainak, pegkegchau chichagtamainak, daagmin adaisajash pegkegchau tujamainakuish shiig aneastin atajum. ²³ Nuna imatjupainakuish shiig aneasjum dakujustajum, atum nayaimpinum jukitna duka wají shiig pegkeg kuashat ajutjamaidau asamtai. Atumi muunjum aajakajua dushakam, yaunchuk Apajuí etsegtin batsamajakajua nunashkam aatus waitkasaju ainawai.

Shiig aneas pujuschagtinaí tibau

(Mt. 23.13-36)

²⁴ “¡Tujash atum wiyakuch aidautigminak wait anentajime! Atumek shiig aneasjum pujajume ashí ajutjamaidau asamtai, tujash atak waittsatin ainagme.

²⁵ “¡Atum atsumkas yuwá batsatutigminak wait anentajime! Atak yapajakjum waittsatin asagmin.

“¡Atum yamai uyumat aneakas ayatak dushit batsamtautigminak wait anentajime! Atumek waitiakjum buuttin asagmin.

²⁶ “¡Atum ashí aents pegkegnum chichajam aidautigminak wait anentajime! atumi muunjum aajakajua dusha imatikas chichajujakajui waitá etsejin aidaun.

Shiwajum aidau aneetajum tibau

(Mt. 5.38-48; 7.1-2, 12)

²⁷ “Atum mina chichameg antugtautigmin tajime: Atumi shiwajum aidaush aneetajum, kajegtamaidaushkam pegkegnum yaigtajum; ²⁸ pegkegchau chichagtamaidaush pegkegnum chichagkatajum, wainak tsanumjutpainakuish Apajuí aujtustajum. ²⁹ Yapinum awatamkujaish, juinia yapijuish awatita tusajum ayampatuatajum; pataká awantak nugkuagbaugmin jujutjamkujaish, tikitchakam susata. ³⁰ Atsumamun segapainakuig sujittsuk susata; tuja atumin wajiigmin segapatsuk jujutjamkuishkam, awagtugkita tutsuk idaisatajum. ³¹ Atum tikich aidau shiig awajuktinme tusajum wakejin ainajum nunisjumek tikichish shiig awajkatajum.

³² “Atumin anempa duke atumshakam aneakjumesh, ¿wají imana juwagme? Aents tudaugtin aidaushkam dita aneniamujaig aneninawai. ³³ Atumin pegkegnum yaimpaina duke yayakjumesh ¿wají imana juwagme? Aents tudaugtin aidaush dita yainiamujaig yainin ainawai. ³⁴ Atumí kumpajum kuichkin waamak awagtugmamaina duke tsagkatkugmesh ¿wají imana juwagme? Aents tudaugtin aidaushkam kumpajin tsagkatkag awagtugkitpash tusag dakainawai. ³⁵ Atumí shiwajum aidaush aneetajum, nuniakjum pegkegnum yaimkatajum, tuja tsagkatkagtukmesh betekash awagtugkit tusagmek anentaímtú pujuigpa. Atum jukitnuk nayaimpinum kuashat wají shiig pegkeg aidau ajutjamiagtinaí, aaja dutikakjum Apajuí uchijí atinaíjtume. Nigka aents pegkegchau, niina see tuchau aidaunash wait anentin asamtai, ³⁶ wait anenkagtin atajum, atumin Apa nayaimpinum pujuwa nu wait anenkagtina íbau asamtai.

Tikichi pujutji pachisjumek augmatigpa tibau

(Mt. 7.1-6)

³⁷ “Tikichi pujutjig augmatú yujaigpajum, Apajuí atumnash aikasag tujaminum. Tikich suwimak susatasagmesh chicham umijú yujaigpajum, Apajuí atumnash tikich ituajum dutiksag dutijamawainum. Dekas tsagkujatajum, Apajuí atumnash tsagkugtamjatnume. ³⁸ Tikich atsumaushkam susatajum, atum tikich wajuk suwajume, dutiksag Apajuishkam atum atsumamunak amastatjume.

Tikich augmatigpa tibau

(Mt. 7.3-6, 15-23; 12.34-35)

³⁹ “Jisus junashkam augmatak tau: ¿Wainmachush tikich wainmachunash jintanash inaktumainkaih? ¿Mai waanum iyaumainchauhkaih? ⁴⁰ Jintinbauwa duka jintinkagtinun nagkaesauk dekatsui. Untsu papí augbaujin ashimak, jintinkagtinjai betek wemainai.

⁴¹ “¿Wagka yatsum imanchau takaish, atum imá pegkegchau takaayatkugmesh, auk pegkegchaun takaawai tusagmesh augmatú yujagme? Nu nuniakjumek aents niina jiin tsetse muun egketun waintsuk, tikichi jiin tsetse piipich egketun wainmaina numamtuk wajagme. ⁴² ¿Itugsagmek atum imá pegkegchau takaajum nu wainmamtuchautigmesh: Yatsujuh, pegkegchau takaam duka idaisata titagme? ¿Aentsú tsanú aidauwah! Dekas dekatkauk ame imá pegkegchau takaam nuuwá idaisam, duwi yatsum imanchau takaidaushkam, idaisata titajum.

Numik niina nejenig dekamainai waji numiita duka

⁴³ “Ajak pegkeja duka pegkegchaunak nejemaitsui, ajak pegkegchaushkam pegkegnak nejemaitsui. ⁴⁴ Ashí ajak aina duka niina nejeen dekanui, untukjak munchiinak nejetsame, aantsag uvashkam jagkinmayag juushtayame. ⁴⁵ Aents pegkejak pegkegnumag anentaimu asa, chichaakush pegkegnak chichauwai. Nunisag aents pegkegchaushkam pegkegchaunak anentaimu asa, pegkegchaunak chichawai. Aentsuk ni wajukuna anentaimua, nunak chichaak iwainawai.

Jega jegabaun pachis Jisus augmattsamu

(Mt. 7.24-29)

⁴⁶ “¿Wagka mina chichameg umigtachiatkugmesh: ‘Apujuh, Apujuh’ tujutjume? ⁴⁷ Ashí aents mina nemagtuidau, mina chichamjun antugtukag imatiksag umigtuidaush wajukuita nuna titajai. ⁴⁸ Duka aents jegá jegamkatatus initak tai, kaya muunnum dekanmitkak ajia shiig jegamkamun, namak piyujak senchi tukuakush, makichkish umuchkachua numamtinai. ⁴⁹ Tujash mina chichamjun antayatak umigtachuk, aents jegá jegamak, nugka suugnum kaya atsamunum initak ajitsuk jegamkamun, namak dujajua piyujak senchi tukú tegak ajapama numamtinai.”

7

Capernaumnumia capitani inake etsagagbau

(Mt. 8.5-13; Jn. 4.43-54)

¹ Jisus jintinkagtamujin ashimak Capernaum weuwai. ² Nui capitani inake dekas aneetaiji jakattak tepau. ³ Nuniau asamtai capitán Jisus

pachisa chichaamun antuk, judío apuji aidaun wajumak awetiuwai: Wait aneas taa mina inakeg jaa juna etsaentujati, tusa. ⁴ Tima Jisusan jegajag ujakaju, nuninak:

—Au capitánik dekas wait aneasam yaimainaitme. ⁵ Nigka judío aidautinash anejatnuwe, nuniau asa jega ijuntainash jegamjupakmayi.

⁶ Tiagtai Jisuschakam ditajai weu. Nunikag jegá tikiju wajasá weenai, capitán* niina kumpají aidaun awetiu, dutikak: “Apu kajegtukaigka, wika niya ibaunak mina jegajuig awaimaitsujai, ⁷ nuniau asan wi niina egamainnash egakchamjai, ayatak tsagagti tujutti tamak mina inakjush tsagagtatui. ⁸ Wi apu umigbau ajutui, aantsag suntag mina umigtuidau ajutuinaawai, nunú aidaun wi: Jijnajum shiyaktajum, tamak jijnag shimumainai, tuja: Waketjatajum, tamashkam waketug kaunmainai, nunisag mina inakeg aidaushkam: Ju dutikata, tamak betek umigtuinawai. Aantsag Jisus anuí pujusag, tsagagti tamak mina inakjush tsagaumainai tujamae”, tuidau. ⁹ Tuinam Jisus antuk anentai jegagchau, nunik nui aents minidaun ayampattsag:

—Israel aina nuigkish imatikas minai kajinas anentaimunak wainchaujai, —tau.

¹⁰ Nunú awemamu waketug jegá kaunkamá inak jaa tepau ukukbauk, tsagag pegkeg pujaun wainkaju.

Nuwa waje uchiji jakau Jisus inankimu

¹¹ Nuna nunik Jisus yaakat Naín tutainum wegau. Nunitai ni jintintai aidaun nuigtú kuashat aents aidaun saetukaju. ¹² Nunik yaakta waitijin tikiju wajas wegai, nuwa waje uchiji makichkiuch ajamu jakamtai ukustatus emaidau, nunitai nuwan uyunainak kuashat aents weedau. ¹³ Nunittaman Jisus wainak wait anenjau, nunik nuwan chichajak:

—Buutipa, —tiu.

¹⁴ Tusa ukuak jakau egkea yanasá wegamun antigku. Dutikamtai yanasá weedausch wajantaju, nunikmatai chichajak:

—Datsauchih nantaktá, —tiu.

¹⁵ Tusá tamawaik jakaushkam nantakí chichau, nunikmatai dukujin susauwai. ¹⁶ Dutikamtai ashí aents aidauk ishamkag Apajuin emema-tuinak:

—Apajuí etsegtin dekas senchigtin jutiinish ajutjamji, Apajuí ni aentsji aidautin yaimpaktatus awetugmaji, —tuidau.

¹⁷ Nu dutikamuk ashí Judeanmag antuejau, nui tikiju aneem batsatu aidaunmashkam.

Juan Yamijatín ni jintintaiji aidaun chicham dekaatajum tusa ishiakbau

(Mt. 11.2-6)

¹⁸ Jisus dutikamun Juagká jintintaiji aidaun antukag, Juagnashkam ujakaju. Dutika ujaam ni jintintaijin jimajan untsuká, ¹⁹ Jisus pujamunum awebau iniastinme: “¿Amekaitam Apajuí uwemtikagtinun awematnaitjai tibauwa nunú? ¿Amechuitkuminig tikichnak dakastatag?” tusa. ²⁰ Tusá awemajam Jisusan kautuawag:

—Juan Yamijatna nu amina iniasti tusa awetamaji, nuniak: ¿Amekaitam Apajuí uwemtikagtinun awematnaitjai tibauwa nunú, amechuitkuminig tikichik dakastatag? timae, —tuidau.

²¹ Nuna tuinaig aents jau aidaun, tikich jatai waituidaunash, wakan pegkegchau egkemtuamu aidaun, nuigtú wainmachu aidaunashkam etsagaku. ²² Dutika Jisus ditan ayaak:

—Wetajum, nunikjum atum wainkajum ju, nuigtú antukum-jum dushakam Juan ujaktajum: Wainmachush wainmainawai, shutushkam wekagainawai, lepragtin aidaush tsagainawai, empekush antuinawai, jakaush nantainawai, tuja ujunauch aidaunash yamajam chichaman jintinmae tusajum. ²³ Nuaduí wi takaamujua nuna wainainak dekaskeapi tujutuidauk, shiig aneasagtinaí timae tusam ujaktá, —tiu.

Juan pachisa Jisus etsegkamu

(Mt. 11.7-15)

²⁴ Juan awemamu aidau waketjamtai, Jisus Juangkan pachis aents aidaun iniak: “¿Wají wainkatasagmae uwegshunmash wegabiugme? ¿Tagkanan dase umpuau wainkatasagmek wegabiujum? ²⁵ Nuniachkugmesh ¿wají wainkatasagmae wegabiugme? ¿Aents shiig iwajamun nugkujá pujau wainkatasagmek wegabiujum? Atumek dekademe, nugkutai iman iwajamun nugkujá iwagmamaidauk apú jeen pujuinawai. ²⁶ Tujash ¿wají wainkatasagmae wegabiugme? ¿Apajuí etsegtinuk wainkatasajum wegabiujum? Dekas tajime: Duka Apajuí etsegtin aajakajua nuna nagkaesauwai. ²⁷ Apajuí etsegtin niina pachis agajua duka juuwai:

‘Wi mina chichamjun etsegnun amina emtimin awemajai, ni jintanak umigtamkattawai’, tawai.

²⁸ Dekas tajime: Ju nugka juwi akiinaidauk Juan Yamijatna nuna nagkaesauk atsawai, tujash Apajuí inamtainig aents dekas iman-chachuchia nuuwai Juangkan nagkaesauk.

²⁹ “Nunú tibaun antukag ashí aents aidau, nuigtú apunu atinun kuichki yajumin aidaushkam, Apajuí nuniktajum tibaun umiinak yamimakajui Juan yamijatbaunum. ³⁰ Tujash fariseo aidauk, chicham umiktinun jintinkagtin aidaujai dakitjaju Apajuí umiktajum tibauwa nu umitnak, nunidau asag Juan yamijatbaunash pachikchajui.”

Juangkan dekaskeapi tichaju aidau

(Mt. 11.16-19)

³¹ Nuniagtai Jisus chichajak: “¿Wajina pachisan takunua antumtik-mainaitjime? ³² Atumek uchi aidau kuashat aents ayamunum pekaamsag wasugkamainak: Wi nantsematnume tusan flauta tutaya nuna umpuakuish nantsemachmaugme, wake beseman kantamtai buutinme tamash, buutchamugme tusa pempeentuniki untsuniyama numamtuk wajagme. ³³ Juan Yamijatna nunú yutai aidaunash yuwachu, vinunash umachu asantai chichagkujum: Wakan pegkegchau egkemtuamu asa aniawai, tajume. ³⁴ Tuja wi Apajuí Uchijiyaitkun Aentsmagan Akiinaun yutainash yuwakun, umutain umaish: Ju aentsua juka ayatak wekagas yu wekaewai, umutnash umú wekaewai, nuniau asa apú kuichkiji atinun yajumin tudaugtin aina nuna kumpajiyai, tujutjume. ³⁵ Tujash Apajuí umijuidau wajuk pujuinawa nuna wainainak, Apajuí yachajiya nunak dekamain ainawai.”

Makichik fariseo Simón daagtin Jisusan ipaamu

³⁶ Makichik Fariseo Jisusan mina jegajuí yujumak yuwami tusa ipauwai. Tima nuna jeen wayaa mesanum jegan ekeemsauwai.

³⁷ Nuniai nuwa nu yaaktanmaya pujutji pegkegchau ajamu, Jisus fariseo jeen yujumkan yuwatatus we tabaun dekaa, kaya alabastro tutai botella najanamunum kugkuin shiig pegkejan juki tajuntau.

³⁸ Nunik Jisusa naween ayaumas pujus buutak nawen negaikia-jui, dutika intashinig ujgtau, nuniak nawen kugkuntak kugkuinui ukatkauwai. ³⁹ Dutiktai fariseo Jisusan ipauwa nunú nigki anentaimas: “Jujú Apajuí etsegtinaitkug dekamainapi ju nuwa pujutji pegkegchau niina antia nuna”, tau.

⁴⁰ Nunitai Jisus chichaak:

—Simón, iniastajame.

Tutai:

—Jintinkagtinú tujutta, —tau.

⁴¹ Tutai Jisus ayaak:

—Aents kuichkin tsagkatkagtinun jimag aents diwimaidau, nuni-
amunum makichkia nu quinientos tsawantai takasá akikmamainun
kuichkin diwimai, tikichia nu cincuenta tsawan takasá akikmamainun
diwimu. ⁴² Nunidaun akikmamainji atsujiagtai mai tsagkujauwai.
Yamai tujutta: ¿Ju jimaja juwiyash tu imá senchish aneemainaita? —
tau.

⁴³ Tama Simón ayaak:

—Diwijí imá muun ajamu tsagkujamua nu imá senchi nunak
aneemainai tajai. Tutai: Duka dekas tame, —tiu.

⁴⁴ Tusa nuwan diis Simogkan chichajak:

—¿Ju nuwa wainmek? Wi jeemin wayamtaish daweg nijamainkesh
yumik sujusчамume; tujash jujú dawejun negaikiang ni intashinig
ujgtujae. ⁴⁵ Kumpamjakmekesh minak kugkuntsachmaume; tujash
ju nuwa juka wayamag duwi nagkamas dawegnak kugkunjú pujawai.

⁴⁶ Buukeajuish asaitaikish nijatkashmaume; tujash jujú kugkuinui
dawejun nijatjuje. ⁴⁷ Nunin asantai tajame; ni tudauji shiig kuashta
duka ashí tsagkugnaje, dutikamu asa imá senchi anentui, tujash aents
tudauji ujumak ajamu tsagkujamuk ujumak anentui.

⁴⁸ Nuna ti nuwan chichajak:

—Tudajum aidauk tsagkugnaje, —tiu.

⁴⁹ Tuja mesanum niijai pekajaidauk ditak pempentunisag
chichainak:

—¿Jusha ya asaya tudaunash tsagkugkagtawa? —tudayinau.

⁵⁰ Tuinaig nigka nuwan chichajak:

—Ame kajintsá anentaibaunum uwemjaume, shiig aneamam wetá,
—tiuwai.

8

Nuwa aidau Jisusan yaigbau

¹ Nuna nunik Jisusak kuashtat yaakat aidaunum, nuigtú yaakta
ukukiag aents batsataidaunmash wekagas, yamajam chichaman Apa-
juí nuni inapaji tusa chichagkagtau, nunitai chicham etsegkata
tusa ishiaktinji doce etegjamu aidau uyunaidau. ² Nunisag nuwa
wakan pegkegchau aidau egkemtuamu, nuigtú jau aidau etsagagbau
aidauhkam uyunaidau. Nuanuí pachitkau Maria Magdalanmaya,
siete wakan pegkegchau egkemtuamu jiijamua nunú, ³ tikich Juana,

Chuza Herodesa kuichkijin kuitamnun nuwe, nuigtú Susana, tikich nuwa aidaujai kuichkin ijumag sumakag, Jisusan ni etegjamuji aina nujai atsumiagtaish yaidau.

Ajakan ajakbau pachisa Jisus augmattsamu

(Mt. 13.1-9; Mr. 4.1-9)

⁴ Kuashat aents yaaktanmaya aidau Jisusan wainkatasag wegaju, nunikag shiig kuashat tuwakagmatai augmatak tau: ⁵ “Ajakan ajakbau ajajin ajaka jigkayin nagkimak ukutatus weuwai, dutika ajakmau asa. Nunik ajajin jegaa nagkimkau, dutikam wajumak jigkai jintaa kakekauwai, nunikun aents najakag ukukbaun yakiya pishak kaketuk amukajui. ⁶ Tikich jigkai kayá awanken nugka machik aunum kakekauwai, nunik tsapainiuwaitak jakauwai chupitnuchu asamtai. ⁷ Tikich jigkai kakekajui jagki ayaunum, dushakam tsapaidiajuitak jagki yutuam jinauwai. ⁸ Tuja tikich jigkai nugka dekas pegkegnun kakekauwai, nunikajuk tsapaidiag muun wajas makí makichik ajak aidau cien jigkain nejeawajui.”

Nuna ti inagnak senchi jiká chichaak: “Dita antutaiji ajamuk antuktinme”, tiuwai.

⁹ Nuna augmatus ashimkamtai niina jintintai aidau Jisusan:

—¿Apuh waji takumea ajakan ajakbau pachismesh timaume? — tusag iniidau.

¹⁰ Tama Jisus ayaak:

—Atumnak Apajuí ni aentsnum inamjatnuji dekajakchamun, Apajuí aentsnum inama nuna pachisan wi yamai etsejag nunash shiig dekamtijamatatus wakejutpagme. Tujash tikich aidaunak ayatak augmatbaun pachisan ujaajai, dutikamu asag ditak wainkujash wainmachu wajukmaina nuninawai, antakush antuchu wajukmaina nuni-nawai, —tiuwai.

Ajakan ajakbau timag nunak juna takun timajai tusa Jisus etseggamu

(Mt. 13.18-23; Mr. 4.13-20)

¹¹ “Wi ajakan jakbaun augmattsan timag nunak juna takun timajai: Jigkaiya duka Apajuí chichamega nuuwai. ¹² Jintá jigkai kakekaun pishak amukuí timag nunak, aents Apajuí chichamen antittaman iwanch juwatki, chicham ni anentain wayaun dekaskeapi tuinak, uwemjainum tusa yajuta nuna takun timajai. ¹³ Tikich jigkai kayá awanken nugka machik aunum kakekauwai timag duka, aents chichaman antuk dekaskeapi tusa wakegas nemajuidau, utugchatnum jegaak idayina nuna takun timajai. ¹⁴ Tuja tikich jigkai jagki ayaunum iyaaju timag duka, aents Apajuí chichamen antuinayatak, ju nugkanum wiyakchameauta nuna uyumainak, nuigtú niina shiig awagma nunak puyatjuinak, Apajuí chichamen pachitsuk idayinawai, nunin aidauk ajak nejechua nunin aina nuna takun timajai. ¹⁵ Tujash jigkai nugka pegkegnun iyaaju timag nunak, aents Apajuí chichamen antukag dekaskeapi tusag nemagkag, wakejus chichaman umiina nuna takun timajai. Nunin asag ajak shiig senchi nejekajua nunin ainawai.

Lámpara pachisa augmattsamu

(Mr. 4.21-25)

¹⁶ “Makichik aentskesh lámpara ekemakajag dukukag idaichau ainawai, dutikachkush pegaká wakentinkish awayag apujchau

ainawai. Dutiktsuk ekemakajag yakí ekenin ainawai, wayatatus minidaush tsaaptinun wainkatnume tusag. ¹⁷ Numamtuk yamai uukbauwa nunik awa juka, atak paan wantinkatnai. Aantsag yamai dekamainchauwa dushakam atak shiig dekamun atinai.

¹⁸ "Juna tajim jujú anentaimtustajum, 'ni imá kuashat ajá duka nuní dukap uwaetuka suwam atinai, untsu piipich ajá duka atantam atinai'."

Jisusa dukují ni yachi aidaujai kautuamu
(Mt. 12.46-50; Mr. 3.31-35)

¹⁹ Tusa jintinkagtai ni dukují, yachi aidaujai tajuawajui. Tujash Jisus wajamunmag jegamainchau kuashat aents tuwakaju asamtai, agaa ijunaidau. ²⁰ Nunitai niina ujainak:

—Amina duku yatsum aidaujai waipaktatus tajutjamawag agaa ijunui, —tuidau.

²¹ Tama ni ayaak:

—Apajuí chichamen antukag umiina, nunú ainawai mina dukug, mina yatsug aidauk, —tiuwai.

Jisus dase imijkamu
(Mt. 8.23-27; Mr. 4.35-41)

²² Tikich tsawantai Jisus ni jintintaiji aidaujai botenum chimpimjaju. Nunik: Kuchá amain katigkagmi, tusag weedau. ²³ Nunikag wegmunum nigka kanaju. Nuniku ai dase shiig senchi dasentak kuchan umpuau, dutikam yumik botenum yajanu, imaniau asa ishamain wajau. ²⁴ Imanitai niina jegantag ishintainak:

—¡Jintinkagtinuh, Jintinkagtinuh iik jakektatji! —tuidau.

Tama shintaag dasen jiyak idayak, nayants tsukatunashkam:

—¡Mijakta! —tiuwai.

Tusá tamawaik dase imaniauk mijak, namakash shiig miyaasu wajas patamsau. ²⁵ Nunikmatai ni jintintaiji aidaun chichajak:

—¿Wagka Apajuiyai kajintsajum anentaimtsugme? —tau.

Tujash ditak ishamak puyatkap nuna wainak anentai jegagchaju, nunikag ditak pempeuntunikiag:

—¿Jusha ya asamtaiya dasesh, yumish antujuinawa? —tudayinau.

Gadaramaya aents wakan pegkegchau egkemtuamu
(Mt. 8.28-34; Mr. 5.1-20)

²⁶ Nunikag kuchá amain katigkag Gadaramaya batsamtaí nugkeen Galilea igkuas awa nuwi anumkajui. ²⁷ Nunik Jisus jiinkimtai nunú yaaktanmaya aents, kuashat mijadai wakan pegkegchau egkemtuam pujú tajuauwai, duka shiig wisú jegaash pujuchu, ayatak aents ukutainum wekayin. ²⁸ Nunú Jisusan wainak senchi untsamak tikishmatug senchi untsamak:

—¡Jisusah, Apajuí nayaimpinum pujuwa nuna Uchijiyah, minash itugtuktasamea miname! ¡Wait aneam suwimkak sukagtusaipa! —tau.

²⁹ (Nunak Jisus: Wakan pegkegchauwah aents jiinkim ukuktá tibau asa tiuwai. Nu aentsuk kuashat tsawantai wakan pegkegchau egkemtuamu asa, jiju ikagmawai uwegnumash, dawenum jigkagmaskam tsujiag utsag, wakan pegkegchau aents atsamunum emam nuwi pujú.)

³⁰ Tutai Jisus iniak:

—¿Amesh yaitpa?

Tama ni aimak:

—Wika Untsujiyaitjai, —tau.

Nunak kuashat wakan pegkegchau aidau aentsun chimpimtua bat-samtau asag tiuwai. ³¹ Imaan asag: “Waa muun ishamain akaga nuwig chimpijatuawaipa”, tusag segaidau. ³² Nuanuí kuashat kuchi mujanum yuwinak yujaidau asantai, nuwi wayatjai tusag segajui. Tiagtai Jisuschakam: Nuniktajum, tiuwai. ³³ Tima wakan pegkegchau aidauk aentsnak ukuinak kuchinum utsanawajui; dutikam kuchishkam pisajag betsag tajagak kuchanum najataunum iyagkag jinawajui.

³⁴ Nunikagmatai kuchí kuitamin aidauk pisajag yaaktanum jegawag etsejuinak, ajanum batsataidaunash dutiksag ujakajui. ³⁵ Tusá ujaka-jam: Wagkag ankae diisagmi, tusag wejiajui. Nunik Jisus pujamunum jegakmag, aents wakan pegkegchau egkemtuamu aajakua duka pegkeg wajas, shiig anentaimas Jisusai ayaumas nugkurai nugkujá ekeemtatman wainkaju. Nunittaman wainkag senchi ishamkaju. ³⁶ Nuniagtai wakan pegkegchau aidau jiiigbaun wainkaju aidau: “Nuní dutika etsagagmae”, tusag tikich aidanashkam ujaidau. ³⁷ Tiagtai ashí aents Gadaranmaya aidauk Jisusan:

—Juwig pujutsuk yajá weta, —tiaju senchi ishamaidau asag. Tama Jisuschakam ayú tusa botenum egkemtai, ³⁸ aents wakan pegkegchau egkemtuamu jijjamushkam:

—Wisha amijai wekaesatjai, —tusa Jisusan segau. Tama nuna chichajak:

³⁹ —Amek jeemin wakitkita, nunikam shiig kuashat Apajuí wajuk amina wait anenjamjae nunú etsekkata, —tiuwai.

Tima we Jisus niina kuashat wait anenja nuna pachis ashí yaak-tanum etsekkau.

Jairo nawanji tikich nuwa jaujai etsagagbau

(Mt. 9.18-26; Mr. 5.21-43)

⁴⁰ Jisus wakitki jegamtai kuashat aents tuwakajuk shiig aneas jukiaju, ashí aentsuk niina dakaidau asag. ⁴¹ Nuniamunum Jairo daagtin, jega ijuntaiya nuna apuji tajuntun Jisusan tikishmatug:

—Jintinkagtinuh, mina jegajuí wemí, ⁴² nunikam nawantug doce mijanji ajamu shiig makichkiuch pujugta nunú, jakattak tepaun ukukmag nu etsaentujata, —tau.

Tama wetai shiig kuashat aents weedau asag Jisusan chanuidau. ⁴³ Imaniamunum nui nuwa pachitkau doce mijadai numpan senchi puwak jaa pujú, kuashat ampijatun aidanum ampimak kuichkijin ashimkau. Tujash imaniakush tsagagchawai. ⁴⁴ Nunú nuwa ukunum jegantun Jisus jaanch pataká nugkuagbauji wenin antigkui. Dutika-muik numpa puwamujinak megkaekauwai.

⁴⁵ Dutikam Jisuschakam:

—¿Ya antinkae? —tau.

Tutai aents nui ijunuk:

—Achah yatsukait, —tuidau.

Tiagtai Pedro chichajak:

—Jintinkagtinuh, kuashat aents tuwakaju asag chanumpaina nuni-aigkik, ¿ya antinkae tame? —tiu.

⁴⁶ Tutai:

—Dekas wika dekajai, aents mina antintuk mina senchijuí jaamujin tsagaja nunak, —tiuwai.

⁴⁷ Tutai nuwak, dekajuagapi tusa puyatuk kujaukmaikia Jisusan jegantun tikishmatug, ashí aents antuinamunum, wajuk asaya antigke nuna pachis, nuigtú ni Jisus antiamuik tsagagbaujinashkam ujakú.

⁴⁸ Tusá ujaam:

—Nawantah, ame kajintsá anentaimam duwi tsagajume, shiig agkan anentaimsam wetá, —tiuwai.

⁴⁹ Eke chichaak wajai, Jairo jega ijuntaiya nuna apuji jeenia aents tanta:

—Nawanjumek jakame, nuigtuk jintinkagtinuk waitkasaipa, —tau.

⁵⁰ Tabaun Jisus antuk:

—Puyatkaipa, ayatak kajintsam anentaimjata, nawanjumik aneantatuí, —tau.

⁵¹ Nunik jegá wayamunum tikich aidaunak awayachajui. Ayatak Pedro, Jacobo, Juan, nuwa jakau apají dukují aina duke utsanawajui.

⁵² Tuja ashí aents aidauk nuwauch jakaun pachis buutuidau. Nuniagtai chichajak:

—Buutigpajum, jakache ayatak kanaje, —tau.

⁵³ Tutai dushikidau, nuwauch jakau dekaidau asag. ⁵⁴ Tujash nigka uwegnum achiak senchi chichaká:

—¡Nuwauchih nantaktá! —tiu.

⁵⁵ Tusá tamawaik mayai egkemtujam nantakiu. Nunikmatai:

—Yumain ayujatajum —tiu.

⁵⁶ Dutikamtai nuwauchi apajig dukujijai shiig senchi puyatkaju. Nuniagtai Jisus:

—Ju pachisjum makichik aentskesh ujakaigpajum, —tiuwai.

9

Jisus ni jintintaiji aidaun chichagkagtuktinme tusa ishiakbau
(Mt. 10.5-15; Mr. 6.7-13)

¹ Jisus ni jintintaiji doce aina nuna ijumag wakan pegkegchau aidau jiimainun, jau aidau etsagaumainnash niina senchijin susauwai.

² Dutikak:

—Apajuí aentsnum inama nu pachisjum etsegkatajum, nuniakjum jau aidauš etsagatajum, —tusa ishimak ³ tiu:

—Makichkish jukigpajum jintá wegaku atsumainuk. Ushuju-taigkesh, wají egkesá jutaigkesh, yuwatnukesh, kuichkikesh, nuigtú nugkutaigmesh yachiagmek jukigpajum. ⁴ Atum tu jeganma way-attagme, nunikjumek nuwig pujusjum wegakjum ukuktajum. ⁵ Tuja tuwí atumin awaintamtan dakitjabiagtatua, dutijamainakuig nunú yaaktak ukuakjum, daweminia tsetse pegatajum akaketkatajum, dita suwimak jukitnuji iwaintakjum.

⁶ Tiajam ditashkam jijnag yaakta ukukiag, aents aidau batsatbaunum wegaju, nunikag yamajam chichama nuna etsejuinak, jau aidaunashkam etsagaidau.

Herodes Jisusan dekas yakita tusa dekajuatatus wakejukbau
(Mt. 14.1-12; Mr. 6.14-29)

⁷ Jisus ashí waji dutikamujin Herodes Galileanmaya apua nu antuk, shiig senchi anentaimá pujau, aents aidau chichainak: “Juan maamua

nu nantakí wekaewai”, tuinai, ⁸ tikich chichainak: “Elías wantinkae” tuinai, tikich tuidau: “Yaunchuk Apajuí etsegtin aajakajua nuwiya nantakne”, tuidau asagmatai. ⁹ Tiagtai Herodes chichaak:

—Wi Juagnak inamja ai buuken tsupikagmayajama, tujash ¿jusha ya amainaita iman chichaman antujag dusha?

Tusa wainkatatus wakegau.

Jisus cinco mil aents ayugkamu

(Mt. 14.13-21; Mr. 6.30-44; Jn. 6.1-15)

¹⁰ Jisus ishiakbau waketug kaunkag ashí dita dutikamujinak ujaka-jui. Dutikam ditan ashí yajuak kanakiag nugka agkantú yaakat Betsaida tutainum awa nui wegajui. ¹¹ Tujash aents aidau dekaawag shimutkajui. Nunikag jegajuawajam Jisuschakam ditan shiig anentus jukiajui, dutika Apajuí aentsnum inama nuna pachis jintintak, jau aidaunashkam etsagau.

¹² Nuniai etsashkam akagu asamtai, niina jintintaiji doce aina nunú jegaantag:

—Juwig jutiik aents atsamunum batsatji aentsuk ishiakta, yaak-tanum jegattak aents batsata nui wegag, aja tikiju aina nui yumainjin sumak yuwinak kajigtinme, —tuidau.

¹³ Tiagtai ni ayaak:

—Atum dita yuwatnuk susatajum, —tau.

Tuinam dita aiinak:

—Imaan aents ayugmainuk atsugtamji, ayatak cinco pag, nuigtú jimagchik namak awai, ashí ju aents ayugkata takuik jutii wemainchawa dita yuwatin sumagkatasa, —tuidau.

¹⁴ Aishmag aidauk cinco mil aishmag tumain aajakajui. Tiagtai Jisus ni jintintaijin:

—Cincuenta, cincuenta aents akanjajum batsagtajum, —tiu.

¹⁵ Tima ditashkam Jisus tibaunak betek umikaju. ¹⁶ Dutikawagmatai cinco pagkan nuigtú jimag namaka nuna juki, nayaimpinum pagkai see tusa puug jintintaiji aidaun tinabiu, dita aentsun tinamkatnume tusa. ¹⁷ Dutikawajam ashí shiig yuwawag ejemakaju, nunikagmatai ampinkaunak yajuakag doce chagkinnunum aimjajui.

Pedro Jisusan amek Kristuitme tibau

(Mt. 16.13-20; Mr. 8.27-30)

¹⁸ Makichik tsawantai, Jisus kanaká Apajuí aujak pujamunum ni jintintaiji aidaush, niijai pujuidau asamtai iniak:

—¿Aents aidaush minash yaayai tujutuinawa? —tau.

¹⁹ Tama dita aiinak:

—Wajumak aents aidau: ‘Juan Yamijatin maamua nuuwai’ tujamainawai, tikich chichaidau: ‘Auk Eliasai’ tujamainai, tikich tuidau: ‘Yaunchuk Apajuin etsegtujakú aina dutsu nantakitai’ tujamainawai, —tuidau.

²⁰ Tiagtai Jisus ayaak:

—¿Tujash atumesh minash yaayai tujutjume? —tau.

Tutai Pedro ayaak:

—Amek Kristu Apajuí awemamuitme, —tiu.

²¹ Timatai Jisus chichajak:

—Makichik aentskesh mina pachittsagmek ujakaigpajum —tusa idayak:

²² —Wi Apajuí Uchijiyaitkun Aentsmaga Akiinauwaitag nunak, shiig senchi waitkagsag judío aidau apuji, sacerdote apuji aidaush, chicham umiktinun jintinkagtin aidaujai dakitjuinak mantuawagtatui, dutijuawagmataish kampatumchik tsawan asan nantaktatjai, —tiuwai.

Jisus mina nemagtukta tautigmek atum wakegamuk idaikujum nemagtuktajum tibau

(Mt. 16.24-28; Mr. 8.34-38)

²³ Jisus nuna ti ashí aents aidaun chichajak:

—Mina nemagtuktasajum wakegautigmek, atum wakegamuk idaikujum, kashi kashinig waitiakjumes atsanajum nemagtuktajum. ²⁴ Ashí aents ju nugka juwi pujutan imá senchi wakegak, mina nemagtuk waittan dakitauk uwemjashtin ainawai. Untsu ashí aents mina nemagtuk nunisag jaa nu uwemjatin ainawai. ²⁵ Aents ju nugka juwiya wájí aidaun ashí niinu emakush, jaakug niina wakaninak tuké uwemtikmaitsui. ²⁶ Atum mina pachittsa chichat datsamakjum, chichamjushkam datsanjau aidautigminak, wi Apajuí Uchijiyaitkun Aentsmaga Akiinauwaitag nuna, mina Apajuí tsaaptinijai tsawan wajasan, nayaimpinmaya aents pegkejam aidaujai ataktú ju nugka juwi minaknushkam: Juka midauchu ainawai, titinaitjime. ²⁷ Tujash dekas tajime: Atum juwi ijunjum juwiyatijum eke jatsuk, Apajuí inamauiya nu wainkatnutigmesh ajume, —tiuwai.

Jisus yapajinamu

(Mt. 17.1-13; Mr. 9.1-13)

²⁸ Nuna ti ocho tsawan pujus Jisus Pedron, Juagkan, nuigtú Jacobon juki mujanum wakauwai, Apajuí ausatatus. ²⁹ Nunik Apajuin aujak pujus niina niimenig yapajinawai, jaanchjish puju winchamtin wajasuí. ³⁰ Nuniaig jimag aents Jisusan aujuidaun wainkajui, duka Moisés, Eliasjai aajakajui. ³¹ Nunikag tsaaptin winchamtin tenteamunum pujusag, Jisus Jerusalén waitkasa maam atinun pachis aujuidaun. ³² Tuja Pedro ditajai ijunag yujaidaushkam, senchi kaji pujajuinam kajigkú shintaukmá, Jisus tsawan wajas Moisés, Elías aatus ijuntatman wainkajui. ³³ Jimag aentsua nunú wegagmatai, Pedro Jisusan chichajak:

—Jintinkagtinuh, jutiish maigkis juwi batsatagtai. Kampatum aak umikagmi, makichik aminu, makichik Moisesdau, nuigtú Elíasdau, —tiuwai.

Tujash nunak shiig dekachiatak tiuwai. ³⁴ Juna aatus Pedro chichai, yujagkim ditajai ijumag ijikuí, dutika yujagkim ijikam ishamkajui. ³⁵ Nuniaig yujagminmaya chichaak: “Juuwai dekas mina Uchig anetaijuk, nigki antugkujum umigkatajum”, tabaun antukajui.

³⁶ Nuna ti ashimaig diikmag, imá Jisusnak wainkajui. Nuna wainkajash makichkish tikich aidaunak ujakchajui.

Wakan pegkegchau uchin egkemtuumun Jisus etsagagbau

(Mt. 17.14-21; Mr. 9.14-29)

³⁷ Nunik kashinia duwi mujanmaya akagag mininai, kuashat aents Jisusan igkugtatus minidau. ³⁸ Nuniaai tuwakbaunmaya aents senchi jiiká chichaak:

—Jintinkagtinuh, wait aneamam mina uchig makichkiuchia ju etsaentujata, ³⁹ junak wakan pegkegchau egkemtug senchi

untsumtiknuwe, imatikam senchi kujainuwe, dutikak weninig saunak pushumkasua emauwe! ¡Kakajus idaichamu asa tunamag pujugtawai!
⁴⁰ Imatikakui amina jintintaijum aidaun: Wait aneasjum wakan pegkegchau uchin waitkagta nu jüigtugkitajum timajai, tujash tujink-agmae, —tau.

⁴¹ Tusá tama, Jisus ni jintintaiji aidaun chichajak:

—¡Aents pegkegchau, minai kajinas anentaimchau aidauwah! ¿Wajupá dukapea atumjai ijunjanush pujumainaitja? ¿Wajupá dukapek dakastajime, minaig kajinas anentaimjatnume tusanush? —tiu.

Nuna ti idayak uchi apajin:

—Uchijum juwi itantá, —tiuwai.

⁴² Tima uchijin juki Jisusai ejentattak emai, waugmitkak uchin nugká ajiajam senchi kujau. Imatiktai Jisus wakan pegkegchaun: “¡Jiinkim wegakum uchi ukuktá!”, tiuwai. Tama wakan pegkegchau uchin egkemtuaushkam jiinki ukukiwai, dutikam uchishkam pegkeg wajasmatai apajin susauwai. ⁴³ Dutika etsagamun wainkag: Dekas Apajuin senchijiniap aikawa tusag, puyatjusag diidau.

Jisus awentsag ni mantamnatnuji etsagakamu
 (Mt. 17.22-23; Mr. 9.30-32)

Ashí aents aidauk Jisus uchi etsagagbaun pachis puyatjusag augmatigtai, niina jintintaiji aidaun chichajak:

⁴⁴ —Wi tajim nunú shiig antuktajum, nunikjum aneaku atajum, wagki Apajuí Uchijiyaitak Aentsmaga Akiinauwa nunak, tikich aents aidaunum sujukag idaisagtatui, —tau.

⁴⁵ Tutaish ditak nuna takumpap tawa tusajag dekamainchau dekapedau, eke Apajuí shiig dekamtikchamu asag. Nunidau asag iniaschajui ajaantuinak.

Yaki dekas imá wagakush atinaita tiagbau
 (Mt. 18.1-5; Mr. 9.33-37)

⁴⁶ Nunikag ditak pempeentunikiag: “Yaki jutii ainag juwiyash imá wagakush atinaita” tusag tudayinau. ⁴⁷ Jisus tusá anentaimainamun dekaju asa, uchin juki niini ayaunas awajus, ⁴⁸ chichaak:

—Aents mina nemagtuidau ju uchia jumamtin aina juna, shiig anentus juwidauk mina dutiujinawai. Tuja mina jujuidauk mina awetiuwa nuna juwinawai. Atum ainajum anuiya imanchauch anenmamaina nunú imá wagaaku atinai, —tiuwai.

Jutiin shiwagmatjamtsu duka jutiinu asa aniawai
 (Mr. 9.38-41)

⁴⁹ Tutai Juan ayaak:

—Jintinkagtinuh, wainkamji aents amina daagmin wakan pegkegchau aidau egkemtuamun jiyau. Dutikakui: Amek aikawaipa timajai, jutiijai ijunchau asamtai, —tau.

⁵⁰ Tutai Jisus:

—Duka tiigpajum, jutiin shiwagmatjamtsu duka jutiinu asa aniawai, —tiuwai.

Samarianmaya dakituinam yajá webau

⁵¹ Jisus ashí jintinkagtamun ashimak, ni nayaimpinum wakitkitnuji tsawan jegau asamtai, puyatkas Jerusalén wegau. ⁵² Nuniak ni jintintaiji aidaun emtikak awemauwai. Dutikam ditashkam nugka

Samarianum wegajui, nui aents batsatbaunum jegawag kanumainun egakagtatus. ⁵³ Tujash Samarianmaya aidauk dita ikantanak dakituidau, Jerusalén weenak tuidau asamtai. ⁵⁴ Dutikawajam Jacobo, Juagjai wakitkiag Jisusan jegaantag:

—Apuh iish duwik ¿Elías Apajuin segatí nayaimpinmaya jiin ajuntug ijinauwa dutikmainchaukaih? —tuidau.

⁵⁵ Tiagtai Jisus kakaakan aiká:

—Atumek dekatsjume wajuk anentaimkugmea tajume duka. ⁵⁶ Wi Aentsmagan Akiinawaitag nunak aents aidaun ijinata tusanuk taachuitjai, ayatak uwemtikatasan tauwaitjai. —Tusa idayak tikich aents aidau batsatbaunum wegajui.

Jisusa jintintaiji agtatus wakejukaju aidau
(Mt. 8.18-22)

⁵⁷ Nuna yaaktan ukukiag ashinbaunum, makichik nuwiya Jisusan:

—Apuh, wisha ame tuwig wekaetam nuniakminish tuke aminak nemagkiní wajatin atajai tusan wakegajai, —tau.

⁵⁸ Tutai Jisus chichajak:

—Kujan Cham aidauk kanutaijig ajuinawai, aantsag pishak aidaushkam pasugkeg ajuinawai, tujash wi Apajuí Uchijiyaitkun Aentsmaga Akiinaunuk jeenchau, tepesá ayamainkesh atsugtaig, wainkan wekaejai, —tiu.

⁵⁹ Nuna ti Jisus tikich aentsnashkam:

—Nemagtukta, —tiuwai.

Tama:

—Apuh, idaitusta mina jegajuí wenu, apag jakamtai ukusan ukuakun nemagkatjame, —tau.

⁶⁰ Tutai Jisus chichajak:

—Auk idaisata, aents wakanin jakaujai betekak batsata nu, apa jakamtaish ukustin atinme, amek yamai nagkamsamek mina chichameg yamagma nu etsegekum, Apajuí aentsnum inama nu pachismesh etsejata, —tiu.

⁶¹ Nuna timatai tikich aents chichaak:

—Dekas Apuh, wi amina jintintaijum ata tusan wakegajai, tujash idaitusta, dekatkauk mina pataag aidaun ashí akattsan ukuktajai, —tau.

⁶² Tutai Jisus ayaak:

—Aents nugkan tsayaak, nugka tsaitaijiya nuna bakajin nenea tsayaak wekaetayatak, ukujin ayampatua dii wajauk shiig tutupit emamait sui. Numamtuk Apajuí chichamen etsekatatus wakegayatak patayin ukukchamin dekapeauk, Apajuí chichamen etsekatati tusaik atsumait sui, —tiuwai.

10

Chichagkagtuktajum tusa setenta y dos ishiakbau

¹ Nuna ti idayas Jisus tikich aidaunashkam etegjauwai, setenta y dos* aentsun. Dutika: “Ashí yaaktanum wejum chichagkagtuktajum”, tusa ni wetin aidaunum jimá jimajan ishiakajui.

* **10:1** Yamajam chicham nagkamku griego chichamai agagbau aina nuwish jimajan tuinawai, tikich 70 tai tikich 72 tawai, nuniau asa apach chicham aina nuwish mai pegkejai. Duwi ina chichamega juwig 72 apusamui.

² Dutika chichajak: “Dekas tajime: Shiig kuashat aents aidau Apajuí minaish inamjati tusa atsumainawai, tujash ujumchikiuchi yamajam chichama juna etsejuidauk, nuaduí Apajuí segatajum tikich ní chichame etsegmain aidaun ishiakti tusajum. ³ Nunin asamtai wetajum, tujash kuitamamkatajum, wi atumnak uwig ikamyawa batsatbaunum ishimaina numamtuk aents pegkegchau batsatbaunum ishimjime. ⁴ Wegakjumesh kuichkik, waji egkesá jutaigmekesh, sapatjumkesh jukigpajum. Jintá wesajum aents igkuakjumesh chichaakjum megkaekaigpajum, wamkesjum nagkaetajum. ⁵ Tuja atum yana jeenia wayattajume, nuniakjumek dekatkauk: ‘Apajuí atumnash shiig agkan anentaimsa pujutan amastinme’ titajum. ⁶ Tajumin aents nui puja nu shiig aneas jujabiagtaik, Apajuí ditanash yaigtatui. Untsu atumin shiig aneas jujamchagtaik, Apajuishkam ditanak yaigchagtatui. ⁷ Nunú jega nuwig pujusjum dita yutain amainamuk yuwakjum, umutain amainakuish uwagtajum. Wagki aents taká duka akiam auwai. Makí makichik jeganum kanagjum nagkaemá yujaigpajum. ⁸ Tikich yaaktanum jegagminchakam, jeentin ní jeen jujamki yutain ajamjamainakuig yuwatajum. ⁹ Nuniakjum nui jau akuish etsagaitajum, dutikakjum: ‘Apajuí aentsnum inamjatnuk tsawan namput wajaschae’, tusajum ujaktajum. ¹⁰ Tuja tikich yaaktanum jegagmin jujamtan dakitjamainakuig jiinkujum: ¹¹ ‘Atumi nugkem jutii sapatjin peemja juka, atuminig pegajá akakeka ukuaji, jutii chicham etsegbauk dakitjau asagmin. Tujash Apajuí aentsnum inamjatta duka namput wajaschae’, titajum. ¹² Juna tajime: Suwimak sukagtamú tsawan jegatna duwik, nunú yaaktanmaya aents nunina nunak, Apajuí duwik yaakat Sodomannmaya aidaun suwimkan susauwa nuní nagkaemas suwimkan jukiagtinaí.

*Aents pegkegchau idaitan dakitin aidau
(Mt. 11.20-24)*

¹³ “¡Corazignumia aidaunak, aikasnuk Betsaidanmayanash wait anentuinajai!, ditak mina chichamjun dekaskeapi tujutchaju asagmatai. Yaakat Sidognum, Tironmash aents batsataina duka, wi atumin wainchatain iwaintajim imatika ditash iwaintam wainkujag, dita wake besemag pujaku iwainmamtain jaanchin nugkujag, buukenish yukuun batsakag, ditá tudaujin wake besemag batsatbaunash, Apajuin iwaintumain aajakajui. ¹⁴ Nuaduí Apajuí suwimak sukagtamú tsawan jegatna duwik, yaakat Tironmaya aents aidau, Sidognumia aidaujai suwimkan jukiagtin aina nuní nagkaemasjum atumek suwimkak jukiagtin ainagme. ¹⁵ Yaakat Capernaum batsamin aidauwah, atum anentaimsagmek: Jutiik jainakuish nayaimpinum juwam agtinaitji, tajume. Tujash dutikamak achatnaitjume, jatumek tikich aents pegkegchau aidau jinawaju waitú batsata nui batsamsatnaitjume!

¹⁶ “Atum chicham etsegbau antugtamaina duka, mina antugtuinawai. Tuja atumin dakitjamaina nunak, mina dakitjak nuninawai. Untsu mina dakitjuinakug, mina awetiuwa nuna dakituinak nuni-nawai”, tusa ishiakui.

Jisus ishiakbau kaunkamu

¹⁷ Nunú setenta y dos ishiakbau waketug kaunak, shiig aneasag Jisusan jegaantag:

—Apuh, wakan pegkegchau aidau aentsun egkemtuauid aidaush amina daajum adaisa: Jinkita, tamak nunisag iinash antugtamak aents aidaunash jiinkiag ukuagmae, —tuidau.

¹⁸ Tama ni ayaak:

—Dekaske wisha wainkabiajai, iwanch peem wajukeya imanik nayaimpinmaya iyaun. ¹⁹ Nuaduí atumi shiwajum iwanchia nuna senchiji ashí depetkatnun, mina senchijun amasmajime. Dutikamu asagmin, dapi esapainakuish, titigkesh ijupakuish wajukashtatjume. ²⁰ Tujash wakan pegkegchau aidau antugtamakaja duwikik shiig anenigpa, dekas imá senchi shiig aneetajum, atumin daagmik nayaimpinum agagbauwa nuaduí.

Jisus shiig aneasbau
(Mt. 11.25-30; 13.16-17)

²¹ Nuna ti idayak Wakaní Pegkeji shiig anemtikam: “Apawah, amek ashí nayaimpinum batsamin aidau, nugkaya aidaushkam apuji asamin emematjame, iman asam aents yacha aidauk iwaintutsuk, aents imanchauch aidau etegjamujum, tikima uchi itugmaina imatiksam iwaintukum nuaduí. Dekaske Apawah, amek aajam wakegame”, tiu.

²² Tusa idayak: “Mina Apag ashí nugkanmayag ame diistá tusa idaitugsauwai, nunin aig wi Apajuí Uchijiyaitag nunak makichkish dekajuinatsui, imá mina Apajuk shiig dekajui, aikasag mina Apagnash wainainatsui imá wiki shiig wainjai. Tuja wi iwaintamu aidau Apagnak wainmain ainawai.”

²³ Tikich aidaun juna ujak idayak, dekas ni jintintaiji ijuntatman ayampatua: “Atumek shiig aneestajum wi takaamush wainu asajum. ²⁴ Yaunchuk Apajuí etsegtin aajakú aina duka, apu aidaush yamai atum wainjum juna wainkatatus wakegajakú ainawai, tujash wainkachu ainawai. Antutnash yamai atum antajum juna antukagtatus wakegajakú ainawai, nuninakush ditak antukchajui ju chichamnak”, tiuwai.

Dekas juuwai chicham umimainuk
(Mt. 22.34-40; Mr. 12.28-34)

²⁵ Tutai chicham umiktajum tibauwa nuna jintinkagtin wajakí, Jisusan dekapsatatus:

—Jintinkagtinuh, ¿wisha wajina dutikmainaitja pujut nagkanchaun jukitasanush? —tau.

²⁶ Tama Jisus ayaak:

—Chicham umiktinun Moisés agajua nunú aujkumesh, ¿wajintu agagbauwa wainme?

²⁷ Tama ni ayaak:

—‘Amina Apujum Apajuiya nu imá senchi aneeta, nuniakum imá niinig anentaimsam pujustá, Apajuinu pegkeg aina duke dekaata, ashí Apajuí wakega duke takastá, nuniakum amijai ijutkamushkam amek anenmamsam aneeta’ tawai, —tiu.

²⁸ Timatai Jisuschakam:

—Dekas tame, ame tame nunú imatiksamek umiktá, nunú nuniamunum pujut nagkanchauk ajutjamtatui —tau.

²⁹ Tama nigka betek umiachu asa Jisusan iniak:

—¿Yaita wijai ijutkau aidaush? —tau.

Samarianmayan pachisa Jisus augmattsamu

30 Tutai Jisuschakam augmatbaun nagkama ujaak:

—Jerusalegnumia aents imá nigki, yaakat Jericonum wekamá kasanum egkemkauwai. Nunikmatai kasa aidau achikag, senchi suwi suwimainakua, ipu ipujú ashí maawag, ni takakbaujinak ashí yajutuk wegak ukukiajui. ³¹ Dutikamu ai sacerdote nunú jintanum nagkaemakmá wainak, ikaag diis ukukiuwai. ³² Tuja levita nagkaemakmá wainkashkam, ikaag wajas diis wegak ukukiuwai. ³³ Nuniai aents Samarianmaya niishkam nu jintanmag nagkaemakmá wainak, wait anenmain diisuí. ³⁴ Dutika jegaantun ampín vinujai juki, ipujamu aidaun ampíjua, jaanchi ijijuk, nuaduí ni entsamtaijin ekeni juki, jega ijagkan kajiitaijin ejega kuitamak, ³⁵ kashinia duwi wegak, jeennun jimag tsawantai takasá kuichik jumainun akik ukuak: ‘Ame kuitamjutkata, wi waketkun wajupa tujuttatme nunash akiktajame’, tusa nui aepeak weuwai. ³⁶ Amesh wajintu anentaime kampatum aents aajakua nuwiyash, ¿ya aajakuita dekas nigki anenmamas aents kasa suwimaam tepaun wait anenjaush?

³⁷ Tusa tama ni ayaak:

—Suwimaam tepaun wait anenjauwa nuuwai, —tiuwai.

Timatai Jisuschakam:

—Ameshkam wakitkim, dutiksamek amijai ijutkamushkam amek anenmamsam wait anenjata, —tiuwai.

Jisus Martan Mariájai ijagsatasa webau

³⁸ Tusa ukuak Jisusak wega wegakua yaaktan ukukiag, aents batsatbaunum jegau. Nunikmatai nuwa Marta daagtin niina jeen juki awayauwai. ³⁹ Nuna kai María daagtin pujau, Mariák Jisus chichatai ayaumas ekeemas antak eketu. ⁴⁰ Tujash Martak kuashat takamain au asamtai, nuna uyumak wekaetau, nuniak Jisusan jegantun:

—Apuh, aanú mina kaig ayatak eketa nu, kaim yaigtá, tusam awetujia, niish yainkati, —tau.

⁴¹ Tusa tama:

—Martah, shiig kuashat takamain uyumakam wekaeme, ⁴² dekas imá senchi puyatjumainuk makichkiuchi. Mariák dekas pegkejan etegka mina chichamjun antugtak eketui, nunak makichkish emegkat-mainchau ainawai, —tiu.

11

Jisus Apajuí aujut jintinkagtuamu

(Mt. 6.9-15; 7.7-11)

¹ Tikich tsawantai Jisus Apajuin aujak pujuttaman wainkaju. Nunik ashimkamtai makichik ni jintintaiji jegantun:

—Apuh, Apajuish wajuk aujmainaita nunú jutiish jintinkagtuata, Juan ni jintintaijin jintintujakua dutiksamek, —tau.

² Tama ni ayaak:

—Atum Apajuí aujkugmek aatsajum titajum:

‘Apawah, amek nayaimpinum pujuwaitme.

Pegkegmaitam ibau asamin ashí tikich aidaush imá aminak ememat-jabiagtinme.

Amek jutiishkam inajatjata, amina aentsjum nayaimpinmaya ame wakegamun umigtamin aina dutiksag, nugkanmayashkam umigtuktinme tusam.

³ Dutiksamek ii yuwatnushkam kashí kashinig sukagtita.

⁴ Ii tudaujishkam tsagkugkagtugta, jutii tikich pegkegchau takagta-maidaush tsagkugnaitag aikasmek.

Iwanch pegkegchau takamtiksati tusamek idaikagtutsuk, ayatak yayiatkam agkanmitkaguata', —tiuwai.

Segatajum, egaktajum, untsuktajum Jisus tibau
(Mt. 7.7-12)

⁵ Aaja segatajum tusa jintintua idayak:

—Atum ainajum anuiyatigmesh kumpajum dekas shiig anendaitajum ajutjamu asamtai, niina jeen aehaet jegantam: 'Kumpajuh, minash kumpatum pag tsagkatjukta, ⁶ mina kumpag imauya tajutua nunú ajaamain atsugtau asamtai tajame' tamin. ⁷ Ni aigmak: 'Waitk-agsaipa, waitinak epenin mina uchig aidaujui kanakun tepajai, nunin asan nantaknuk amamaitsujai', ¿tujamainkaih? ⁸ Nunak tujantsuk sujustá tusa segamu asa, nantamainchau ayatak amina kumpajum asa, nantakí ame atsumaku segamunak ashí amamainai. ⁹ Duwi wi tajime: Apajuishkam segatajum, imatjamak amastatjume; egatah egaktajum, egakjume igkugtatjume; untsuktajum, imatjamak waitin ujatjamtatjume. ¹⁰ Ashí aents sumauk suwam auwai, egauk igkuinai ní egamujinak, waitinum wajas untsumushkam waiti ujatam auwai.

¹¹ "¿Atumesh uchijum yujumkan segapaig, kaya sumainkaitjum? ¿Dutikachkugmesh uchijum namakan segapaig, dapi sumainkaitjum? ¹² ¿Dutikachkugmesh uchijum nujintan segapaig, titig sumainkaitjum? ¹³ Atum pegkegchau ainayatkugmesh uchigmik pegkeg suu ainagme. Atumkesh nuniagminish Apajuí nayaimpinum puja dusha, ¿wagkag Wakaní Pegkejinash atum segamash amaschagti?", tiuwai.

Wakan pegkegchau aidau apuji Beelzebú daagtinun senchijin Jisusak wakan pegkegchaunak jiyaawai tibau
(Mt. 12.22-30; Mr. 3.20-27)

¹⁴ Juna inagnak tikich tsawantai wakan pegkegchau aentsun egkemtua chichachu emamun, Jisus jiikí awetak chichamtikau. Dutikamun wainkag aents tuwak ijunuk puyatjukag diidau. ¹⁵ Nuninaig wajumak aents aidau chichainak: "Juka Beelzebú, wakan pegkegchau aidau apujiya nuna senchijin wakan pegkegchaunak jiyaawai", tuidau.

¹⁶ Nuna tusag tuinaig, tikich aidau Jisusan, dekas Apajuí Uchijimpashit, tusag dekapsagtatus: Nayaimpinmaya wainchatai iwainkag-tukia, tuidau. ¹⁷ Tama dita anentaimainamun dekau asa:

"Makichik nugkanmag batsatiatak pempeentuniki maaní batsatkujag megkaemain ainawai, nunisag makichik jeganmak ijunag batsatiatak, pempeentuniki maaní batsatkushkam, ditak megkaemain ainawai. ¹⁸ Aantsag iwanchakam niina senchijin mina sujus, aentsun wakan pegkegchau egkemtuaun aidauun jiijati tujutkug, ditak pempeentuniki shiwagmaemainai, nuniak ditá senchijinash megkaemain ainawai. Nunin aig minak, Beelzebú senchijin wakan pegkegchaunak jiyaawai tujutjume. ¹⁹ Beelzebú niina senchijin mina sujaish, atumi jintintajum aidanash ¿ya senchijinash suwawa, wakan pegkegchau aidauun jiiiktinme tusash? Jutii jintintajai aidauk Apajuí senchijin jiyaawai tujutkugmek, atum wainka dewakjum tu yujagme. ²⁰ Wi

Apajuí senchijiin wakan pegkegchau aidau aentsun egkemtaun jiyaag nunak, yamaik atumiin Apajuí inamu asamtai jutikajai.

²¹ “Aents senchigtin niina jeen kuitamak waitinum akajun takus wajataig, niina wajiji nui awa duka ashí betek amainai. ²² Tujash tikich aents niya nuní senchi minitak, niina depetki akajun atanki jegá wayaa, ashí wajiinak yajutuk kumpají aidaun tinamainai.

²³ “Aents wi takaag nujai shiig aneas juwachuk mina shiwagmatui, nunisag Apajuí chichame etsegbaunash yainchagtaik, kuashat aents uweemainun megkagainawai.

²⁴ “Wakan pegkegchau aentsnum egketu jiikmak, aents atsamu agkantunum ni pujumainun egaak wegawai. Nunik ni pujumainjin wainkachag: ‘Dekas wakitkitjai wi pujujakbaunum’ tusa anentaimas, ²⁵ tajua diikmá, nunú aentsuk juga japimká shiig iwajamuama imanun wainak ukuak, ²⁶ tikich wakan niina nagkagas pegkegchau aidaun, sieteya imaan yajuak waketjuki egkemtawai. Dutikam aentsuk duwik pegkegchau aajakbaunak, nuní nagkaemas shiig pegkegchau wegawai”, tiu.

Dekas shiig aneasagtin aidau

²⁷ Juna pachis Jisus eke chichaa wajai, aents tuwakbaunmaya nuwa senchi jiiká chichaa:

—iNuwa amina jujepag, muntsujin amuntstamauwa duka, shiig aneastinai! —tiuwai.

²⁸ Tutai Jisus chichajak:

—iDekas Apajuí chichamen antukag umiidau, nuní nagkaemas shiig aneasagtinai! —tiuwai.

Aents pegkegchau aidau wainchatai iwainakia tibau

(Mt. 12.38-42; Mr. 8.12)

²⁹ Jisus aents aidau ayatak tuwajam, ditan chichajak: “Atumek aents pegkegchau, Apajuish umigchau asajum, dekas Apajuí Uchijimpashit tusajum dekapjustasajum: Wainchatai iwainakia, tujutjume. Tujash atum tajum nunak dutikashtatjai, ayatak Apajuí etsegtin Jonás wajukauwa nujai betekak iwaintuktatjime. ³⁰ Jonás namaknumia iwaaku jinki, yaakat Ninive batsamin aidaunum Apajuí chichamen etsegtai, dekas Apajuí awemamuapita tiu aina numamtuk, wi Apajuí Uchijiyaitkun Aentsmagan Akiinawaitag nunashkam, mantuawagmataish ataktú nantakmatai waitkag, dekas Apajuí awemamuapita tujutiagtatui. ³¹ Nuwa Sabá nugkanmaya aentsun apuji surnumia Salomogkan tajiawai, Apajuí yachamtikamun antujuk dekajuatatus. Nunú atumnak bakugmagtinai, atak suwimak atina duwik, wi Salomogkan nagkaesaun dekaun imatika chichagmash antukchaju asagmin. ³² Ninivenmaya aents aina nunú atumnak bakugmagtinai, atak suwimak atina duwik. Ditak Jonás Apajuí chichame ujakam, dekaskeapi tusag tudaujin idayinak Apajuin nemagkajui. Tujash atumek, wi Apajuí Uchijin dekas Jonasa nagkaesaun juwi pujusá chichagmash antukjum, tudau takat idaikujum Apajuí nemajuinachu asagmin.

Lámpara pachisa augmattsamu

(Mt. 5.15; 6.22-23)

³³ “Makichik aentskesh lámpara ekemakajag dukukag idaichau ainawai, dutikachkush pegagan wakentinkish awaigkag aputsjame. Lámpara ekemakag yakí ekenin ainawai, tikich aidau wayaakush shiig wainak wekaesagtin tusa. ³⁴ Atumi jiimek lámpara ekemakam tsaaptin emaama numamtuk atumi iyashminak awagmawai. Jiim pegkeg asantai shiig wainmamainaitam imatiksam, ashí pegkeg aina duke anentaimtaik, anentaiminish tsaaptin ajutjamainai. Untsu jiim pegkegchauwaitkui wainmamainchawaitam nunisjumek, ayatak pegkegchauk anentaimkugmek suwenum pujagme. ³⁵ Kuitamkata, aminí tsaaptin awa nunú suwe wajatjamsai. ³⁶ Ame ashí pegkegchau aidau idaisam pujakmek, jii kashi ekemakam tsaaptin emama numamtuk, atumi pujutjuminish wajagme.”

Jisus fariseo aidaun chicham umiktinun jintinkagtin aidaujui pegkegchauji pachisa tibau

(Mt. 23.1-36; Mr. 12.38-40; Lc. 20.45-47)

³⁷ Nunú chichaamun ashimak wakai fariseo jegantun:

—Mina jegajui yujumak yuwami, —tusa ipau.

Tima Jisuschakam fariseo jeen wayaa, mesanum jegantá ekeem-sau. ³⁸ Nunikmatai wainak fariseok anentai jegagchau, wagkag chicham umiktin tuke ikigmasjumké atajum tawa nuniaish, Jisusash ikigmatskesh yuwatasash ekeemsae tusa. ³⁹ Nunitai Jisus chichajak:

—Atum fariseo aidautigmek, shikiká umutai, nuigtú plato aina nuna awanke nijamaina numamtuk wajagme. Tujash atumi anentaiminíg kasamtajum, pegkegchau takataijum aidaushkam piyak ajutjamainawai. ⁴⁰ ¡Anentainkachu aidauwah! ¿Apajui iyashin najanauwa duke iina anentainash najanachukait? ⁴¹ Atum pegkeg ata takugmek atumin ajutjamaina duka ujunauch aina nu susatajum, nuuwai dekas pegkeja duka.

⁴² “¡Fariseo aidautigminak wait anentajime! Atumek ajak menta, ruda, nuigtú yutai inagku ajuntua ukugkutai aina nu puyatjusjum diezmó wajagme. Ju dutikayatkujum chicham umiktinum pegkeg takatan jintinjama nu, nuigtú Apajui aneetan jintinjama duka pachitsuk idaijume. Tujash ju aina ju umiakjumesh, nuigtú tikich umiktin aina dushakam umitskek idaimain ainatsjume.

⁴³ “¡Fariseo aidautigminak wait anentajime! Atumek jega ijuntainum wayakjumesh, dekas apú ekeemtai shiig iwajamu aidau etegkajum ekeemin ainagme, nuigtushkam aents kuashat ayamunum igkuntuinakush, shiig ajantujus kumpamjuatnume tusajum wakejin ainajum nuaduí.

⁴⁴ “¡Chicham umiktinun jintinkagtin aidautigminak, fariseo aidautigmijai wait anentajime, waitjuidau asagmin! Atumek aents ukusbau wainmainchau shiig epekbauwa nunin ainagme, nunin asantai aents nui awantak wekaekush dekachu ainawai initak aents ukusbauwa nunak. Atumesh numamtuk awankak iwainmamjume pegkeja iman, tujash atumin anentaimin pegkegchau ajutjamaina nunak waitjamainachu asantai.”

⁴⁵ Jisus tabaun chicham umiktinun jintinkagtin antuk:

—Jintinkagtinuh, ame fariseo aidau pachisam tame duka jutiish tukagtakum tame, —tau.

⁴⁶ Tutai Jisus ayaak:

—¡Chicham umiktina nu yacha aidautigminash wait anentajime! chicham umiktajum tibauwa nu kakajus umimainchauwa ibauk, tikich aidauk ju umiktajum tajume, atumkesh umiachiatkujum, atum kijin jumainchauk tikich ayankajum, machikish yaitsuk emasjum chichagmainaitjum numamtuk wajau asagmin.

⁴⁷ “¡Atumnak wait anentajime, atumí muunjum aidau, Apajuí etsegtin aajakajua nuna maawag ukusajua nu dakumká najanajum batsamtajum duwi! ⁴⁸ Jujú dutikakjum atumek iwainmamjume, atumí muunjum aajakajua nunú, Apajuí etsegtin aidaun maawajua nunisjumek anentaibaujum. Dekaskenmag dita maawag ukusajui, dutikamunum atumshakam nui ekenjum dakumká najanajum batsamtage.

⁴⁹ “Nuaduí Apajuí ni yachajin atumin pachipas: ‘Wi chichamjun etsejin aidaun ishikattajai, chicham yamagman etsegkatin aidau-nashkam, dutikamtaish dita maamunak mainak, tikich aidaunak yaaktanum yujajus waitká yujajiagtin ainawai’, tiuwai. ⁵⁰ Wagki atum wegantu aidau, Apajuí nugkan najanauwa duwi nagkamas, Apajuí etsegtin aajakajua nuna maawaju aina duwi, atumnak Apajuí suwimkan sujamsagtinaaitjume. ⁵¹ Nunak Abel maamua nui nagkamas, Apajuí etsegtinun Zacariasan jega Apajuí ememattainum pujuttaman maawaju ainawai. Imaan aents kajegbau aina nuaduí atumnak suwimkanak sujamsagtin ainawai.

⁵² “¡Atum chicham umiktin jintinkagtin aidautigminak wait anentajime! Atumek aents yawin takakiatak, tikich jegá wayata tutai waitin epetin aina numamtuk, aents Apajuí nemagkag uwemjata tuinaig, atum chicham umiktina duka dekyatukjum, wajina tawa nunú dekachu asajum shiig jintintsugme, nuniau asajum atumkesh uwemainnum pujatsjume.”

⁵³ Jisus juna chichá chichakua ashimak jiinkimtai, fariseo aidau, chicham umiktinun jintinkagtin aidaujai senchi kajejuuidau asag wainainakug ⁵⁴ kuashat iniidau, wajintuk chichakat timatai tsanumjuja maami tusag.

12

Jisus ni jintintaiji aidaun nuní pujustin atajum tusa ujakbau
(Mt. 10.26-33; 12.32; Mt. 10.19-20)

¹ Nunú imanik shiig kuashat aents tuwainak najanidau, imaniagtai Jisus dekatkauk ni jintintaiji aidaun: “Fariseo aidau levaduraji aina nu-jai kuitamamkatajum, ditak dekaskea imanun tuinak aents aidaunak tsanuinawai. ² Tujash ashí uukbau aina duka wantinkagtinaí, aantsag ashí dekaachbau aidaushkam dekaamu agtinaí. ³ Nuniau asamtai atum tikichish antachbaunum chichasbaunash ashí antukagtinaí, tuja atum kanutaigmin epeni pujusjum chichakbaunashkam ashí antukagtinaí”, tiuwai.

⁴ Nuna jintintaiji aidaun tusa idayak, tikich aents tuwakajun chichajak: “Kumpag aidauh, atumnashkam titajime: Manta-mainakuish ishamkaigpajum, atumin iyashmin mainakush wakanminak maachagtinaí. ⁵ Dekas ishamainaitjume atak jakagmin, Apajuí suwimkan sujamak jii ajumaish kajinchauwa nui egkepawagmatai waitmainaitjum nunú.

⁶ “¿Atum shiig piipich kuichik juwakjum, cinco pishak sujuchuk agmaujum? Nunú aina duka, makichkish Apajuí kajimatki idaisamuk ainatsui. ⁷ Apajuik atumi intashim wajupa awa nunash shiig dekawai, nunin asamtai atumek ishamkaigpajum. Atumek pishak aina nuna nagkaesau ainagme.

Ishamtsuk Kristu nemagnaitjai tumamainai
(Mt. 10.32-33; 12.32; 10.19-20)

⁸ “Nuniau asamtai atum tikich ujaakjum wika Kristu nemagnaitjai tiu aidautigminak, wi Apajuí Uchijiyaitkun Aentsmagan Akiidau asan, Apajuí aentsji nayaimpinum batsata nunú antuinai, ditak dekaskenum mina nemagtin ainawai titinaitjai. ⁹ Atum mina nemagtin ainayatkujum, tikich aidau emtin: Wika Kristunak nemagchawaitjai, tujutiu aidautigminak, wishakam aikasnuk Apajuí aentsji nayaimpinum batsata nunú antuinai, ditak minak nemagtuchu ainawai, titinaitjime.

¹⁰ “Ashí aents aidau, wi Apajuí Uchijiyaitkun Aentsmagan Akiinawaitag junakesh pegkegchau chichagtuku ainakjash tsagkugnamain ainawai. Tujash Wakaní Pegkejin pegkegchau chichagkaju aidauk tsagkujam achagtinai.

¹¹ “Atum mina nemagtin aidautigminak achigmakag, jega ijuntainum apu chichaman epegkin aidau ijunjamunum etetamawagtinai. Dutijamchakjash tikich apu aidaunum etetamtatus jujamkiag etamainakuish: Wajintuk apunash titaja, tuja wajintuk aiktaja apu ininkuish, tusagmek uyumaktin aigpa. ¹² Atumin apu aidau inimpatai, Wakaní Pegkeji dekamtijamattawai apu aimainnak.”

Tikich sujitin aigpajum

¹³ Nunú tuwakbaunmaya makichik:

—Jintinkagtinuh, mina apag jaak yatsumjai wajií akaantunikjum jukitajum tujabauwa nunú, ame wait aneamam mina yatsug: Dutiksagmek akaantunikam jukitajum, tusam tujutta, —tiu.

¹⁴ Tusa tama Jisus:

—¿Kumpajuh, ya minash atumin utugchatjumin epegtin atí tusash, nuniachkush ame aents wajiin sujitdayakuish akaantukam suu ata tusash adaitukmae? —tau.

¹⁵ Nuna ti idayak:

—Nijah, atumek kuitamamkatajum, itugsag wajií shiig kuashat ajutia tusagmek anentaimtú pujuigpajum. Aentsuk wajií imá kuashat ajamu asa imá shiig dakunkut pujumatsui, —tiuwai.

¹⁶ Nuna tusa idayak tikich augmatbaun pachis: “Aajakuí aents wiyakuch, nuna ajajin shiig kuashat ajak juumain uminjauwai, ¹⁷ imanikmatai nigki anentaimas: ‘¿Utugkatjaki juuká ijumainush jega atsugta jama?’ tau. ¹⁸ Nunikmá anentaimag: ‘Dekas ajak juuká ijumtai yaig aina aunak tegagtajai, dutikan nuní muun aidaun jegamatjai. Dutikan nuanuú ashí ajakan juukan utuaktajai, mina wajiig aina nunashkam. ¹⁹ Imatikan kuashat mijanai yumainun, wajií aidaunash ijumjan, nuaduú jegá ayamkun pujusan shiig yuwakun, umutainash umakun shiig aneamam pujustajai’, tiuwai. ²⁰ Tu anentaimá pujaun Apajuí chichajak: ‘¡Anentainkachuh, amek yamai kashia juajuik jakattame! ¿Nunikaminish wajiijum imatikam ijumjaum ancha yanau atatua?’ tiuwai. ²¹ Nu nunikua numamtuk wajaktinai aents ju nugka

juwi wiyakchamea pujakush, Apajuí wakegamua nuna takaachkug”, tiuwai.

Apajuí ni uchijí aidaunak kuitamui tibau
(Mt. 6.25-34)

²² Nuna tusa idayak ni jintintaiji aidaun pempeentuki: “Atum-nashkam jutiksanuk tajime. Atumek wajina yuwanuk pujustaja, wajinak nugkugtaja tusagmek puyatjú pujuigpajum. ²³ Dekas pu-juta nuuwai yutai nagkaesauwa duka, iyashmia nuuwai jaanchin nagkaesauwa duka. ²⁴ Atumesh pishak anentaimsajum diistajum. Ditak ajakmakagkesh juuchu ainawai, jeganakesh jegamkag yutai-jinak ijumainatsui. Nuniaunak Apajuí suwawai dita yuwatnunak. Tujash atumetjume dekas pishak nagkaesauw aidautigmek. Iman ainagminish ¿wagkag Apajuish atum atsumamunash amaschagt-inme? ²⁵ ¿Atumesh wajupatigmea, tikich esajam aina ibau wisha atajai tusajum anentaimtú pujakjumes esaumainaitjume? ²⁶ Nunú pipichikesh dutikmainchawaitkugmesh, ¿wagka tikich waji aidaush imatikagmesh anentaimtjume?

²⁷ “Atumesh yagkug yagkujuina nunú anentaimsajum diistajum. Yagkug aidauk takainatsui, ujchnash kutamainatsui, nuninayatak Salomón nugkutai pegkejan tikich aents aidau waitus najanamun sumak nugkujá, tikichin nagkaesau iwagmamajakua nuna nagkae-sau pegkeg iwajamun yagkujuinawai, Apajuí yagkugmitkamu asag. ²⁸ Yagkug ikamia aidauk yamaikik pegkejan yagkujuk, ajuma duwi etsa sukuam kagagmatai, apea ajapeam atinnakesh Apajuí imatikas iwaja ibaush, ¿wagkag atumnash idaitamsati Apajuiyai imatikas kajinas anentaimchaw aidauwa? ²⁹ Nuaduí atum yuwatin, uwagtin, anentaimtakjum wajak nunikajak tusagmek uyumá pujuigpajum. ³⁰ Ashí ju aidaunak aents Apajuí nemagchaw aidau imatin ainawai, tujash atum atsumajum nunak atumin Apa Apajuiya nu dekawai. ³¹ Nuaduí atumek, Apajuí pegkegnum inapa nunuwá umigkatajum. Nuniakjumek ashí nunú aina dushakam aan kuashat jukitnaitjume.

Nayaimpinum wiyakchameaut
(Mt. 6.19-21)

³² “Mina jintintaig uwig wajumchik kakakchauchia numamtin ajuminig, atumin Apa Apajuiya nu wakejutpagme, mina inamtaijui pujusagti tusa, nuaduí ishankaigpajum. ³³ Atumin wajijium akuig sujukjum tikich atsumaidau yaigtajum. Atum dutiktaik, Apajuí nayaimpinum wiyakchameaut tuke atinun, kasash waimainchau, kabau wajiin emesmainchawa nuanuí ukugtamsattajume. ³⁴ Nunú wiyakchameatin ajutjamaina nuanuig anentaimsajum pujustajum.

Umintsajum aneaku pujustajum tibau
(Mt. 25.1-13; Mr. 13.34-36)

³⁵ “Ashí shiig umintsajum jii ekemakjum dakamsatajum. ³⁶ Atumek inak aidau apuji nuwenbaunum wematai, jegaa juwakag pujusag waju-pa asag taat, ni taa waitin ijuakui wamkesan ujattajai tusa kanutsuk iwá pujú aina numamtuk wajatajum. ³⁷ Nu inak aidauk shiig aneemain ainawai, iwaa batsatai apuji minau asamtai. Dekas tajime: Apushkam jegaa wayaa kamsijin yapajia, ni inataiji aidaunashkam mesanum

ejegan pekas, ni yutain tinamainai. ³⁸ Apú inake aidau aehaet wajasmataish, kajiitsuk batsamas tsawampainak, apuji minaun igkugku aidauk shiig aneemain ainawai. ³⁹ Ju anentaimtusjum diistajum, aents jeentin kasa kasagkatasa utuam atinjin dekau asa, kanutsuk iwaa pujauk jeenig utuam amaitsui. ⁴⁰ Numamtuk atumshakam aneaku pujustajum, wi Apajuin Uchijiyaitkun Aentsmagan Akiinawaitag nunak, tsawan imatika anentaimtachbau ai minitnaitjai”, tiuwai.

Inak pegkeg inak pegkegchaujai pachisa augmatbau

⁴¹ Juna Jisus ashí tusa inagnakmatai, ni jintintaiji Pedro:

—Apu ame augmatbau pachisam tame dusha imá jutikek tukagtam, atsa ¿ashí tikich aents aidaush antuktinme tusamek tame? —tau.

⁴² Tutai Jisus ayaak: “¿Yaita inak niina apuji tabaunak imatiksag umin, nuigtú shiig anentaimkau asamtai kajitus: ‘Ame juwi pujusam, jujú aents mina jegajú batsamas takaina ju yutain atsumainakuish susata’, tusa inag ukuak, apujig tikich nugkanum wegak ukumaina numamtuk awajkamush? ⁴³ Nunú inak apuji inaja ukukbau ashí ni tibaunak betek umiká pujakug, apuji minitaish shiig aneemainai. ⁴⁴ Dekas tajime: Nunú inak imanis umiaunak apujishkam ashí mina ajutuina duka, ame kuitamjutin atá tusa idaitumainai. ⁴⁵ Tujash nunú inak inaja ukukbauwa nu: ‘Mina apujuk waamak taashtatui’, tusa anentaimas, tikich takau aidau senchi suwimak, nuwanaskam waitkak, nigka shiig yuwak, umutnash umak, nampetan nampe waja pujai, ⁴⁶ nunú inaka nuna apuji tsawan dekachbau ai pachiachmau takamá wainak, shiig senchi suwimkan susa, tikich aents pegkegchau aidaujai betek waittsati tusa idaimainai.

⁴⁷ “Nunú inak apuji wakegamun shiig deokayatak, umitsuk takatnash takatsuk puja nunú imá senchi suwimkan jumainai. ⁴⁸ Untsu tikich inak apuji wakegamun dekachu asa, pegkegchau takasuk ujumak suwimkak suwam amainai. Untsu ya imá senchi susamuita dushakam imatikaik segam amainai, ni umiktá tibaujinash betekash umikaja tusa diigsatatus, numamut Apajuish aents aidau takatin diigsagtinai.

Jisusa nemajin nemagchau aidaujai tupandayagtinai tibau

(Mt. 10.34-36)

⁴⁹ “Wika ju nugka juwig waitkajus mantuawagmatai, mina nemagtu-idauk Wakaní Pegkeji jukitnume, nunitai tikich mina dakitjuidaunak Apajú jiiyai suwimkan susatnume tusan tauwaitjai. Nuniau asan, iwika wakegajai itugsag waamak nu uminkaja tusan! ⁵⁰ Shiig senchi waitkam atinaitjai, tujash yamaik waitiajai, wi dekas waittsatnaitag nunú ashimdaekati tusan. ⁵¹ ¿Atumek ju nugka juwig shiig agkan anentaimas batsamsati tusas tauwaitai tujutjumek? Nunikchauwaitjai. Wika atum mina nemagtuidau asagmin, tikich mina dakitjuidau utugchatan aputugmasag kajegtamá batsamtin asamtai tauwaitjai. ⁵² Yamaya juwi nagkamas, makichik jeganum cinco aents pujuidauk, kempatuma nu jimaja nuna kajegtinai. ⁵³ Uchigtina dushakam uchijijai kajegdayagtinai, uchishkam apajin shiwagmatnai, nuwashkam nawanjijai shiwagmaetina, dutikam nawanjishkam dukujin shiwagmagtinai, nuwa nemakushkam tsatsajin shiwagmatnai, tsatsajishkam uchijí nuwen shiwagmatnai”, tiuwai.

Aents ni nunimainji pachisa tibau

(Mt. 16.1-4; Mr. 8.10-13; Mt. 5.25-26)

⁵⁴ Jintintaijin tusa idayak aents tuwaká ijunun pempeentuki: “Atum etsá akaetaiya atú ikiyamkuig, yumi yutugtatui tibauk imanisag yutawai. ⁵⁵ Dase tsumunmaya dasentuk nujinum wegakuishkam, esat tepeattawai tibauk imanisag esat tepeawai. ⁵⁶ ¡Tsanumin aidauwah! atum nugkanmayash diisjum, nuigtú nayaimpi niimé diisjumesh tsawan wajuku atatua nunú dekauwaitkugmesh, ¿wagka wi wainchatain iwainaja takaag dusha, Apajuinumianap iwainawa tusagmesh shiig dekatsjume?

Shiwajumjaish shiig chichasá epegkata tibau

(Mt. 5.25-26)

⁵⁷ “¿Wagka atumek dekas pegkeja duke egatmamtsugme? ⁵⁸ Makichik aentskesh, pegkegchau takagtusume tusa apunum chichaman egketjamantai, niijai apu chichaman epegnunum wegakmek, eke jegatsuk jintaag shiig chichasam epegtuniata. Nunikchaminig jegaa amin chichaman dekagtama, ni jujamki achijatin aidaunum sujupakmatai, achijatin jujamki aents katsek aidau achiká chimpitainum egkepawai. ⁵⁹ Junak dekas tajime: Amina apu achigmak egkepamtaig kakajus jijnmaitsume, ayatak amina kuichkijum ashí akikmakam, shiig ashimkam jijnmainaitme”, tiuwai.

13

Tudau takat idaichakjume waittsatin ainagme tibau

¹ Nunú tsawantaik tikich aents aidau kauntuntaju Jisusan, nunikag: Galileanmaya aidau uwijan maawag apeenak Apajuin emematú ijun-tatman, Pilato suntaji kautuk kuashat aentsun kajegkagmae tusag ujaidau.

² Tiagtai Jisus ditan chichajak: “¿Atum anentaimsagmek dita imá tudau asag aikam ainawai tajumek? ³ Tujash nuniatsui. Atumshakam tudau takat idaikujum, pujutjum yapajiachkugmek antsagmek jakat-naitjume. ⁴ Wajasá niimtai torre tutai yakí jiikbau Siloé tutaya nu iyaak, dieciocho aentsun kajegkua dusha, Jerusalegnum batsama-jakaju aina nuna nagkaesau tudau asajampap, suwimkan juwak jinauwaita ¿tajumek? ⁵ Tujash wi tajime: Atumshakam tudau takat idaikujum pujutjum yapajiachkugmek, dita jinawajua antsagmek jinatnaitjume.”

Numi higuera nejenchau pachisa augmattsamu

⁶ Juna tusa idayak Jisus augmatbaun nagkama augmatak: “Aents ajajin higuera ajauwai. Dutikau asa, nejeatsuash tusa diistatus wejiu, tujash nejeg makichkish atsuju. ⁷ Nunitai ni inake ajan kuitamak pujuttaman: ‘Jujú higuera ajakam ajapata. Kampatum mijadai tajuan diyajai nejeatsuash tusan, tujash nejeatsui. Juniayatak tikich ajak ajamainun nugká akijuag wajamaitsui’, tiuwai. ⁸ Ajakjintin tutai inak ayaak: ‘Apuh, dekas makichik mijan dakasmi nejeashtimpash, wi wajauti tentean pukujan, tikich nugka dekas pegkeg aina nuna ya-jutkan ijutjatjai; ⁹ dutikamash nejekchatpash, untsu tikich mijantinish nejeachkui ajakmi,’” tiu.

Tsawan ayamtai aig nuwa jau etsagagbau

¹⁰ Jisus tikich tsawan ayamtai tsawagmatai, jega ijuntainum aents ijunjagmatai jintinkagtak wayaa pujau. ¹¹ Nuniamunum nuwi nuwa wakan pegkegchau egkemtuamu asa, dieciocho mijadai tuke machikish dakuenas wekaetsuk, ayatak punus wekagas waitú wekayin eketu. ¹² Nunittaman Jisus wainak untsuká:

—¡Nuwauchih, yamaik wi etsagajame!

¹³ Takug nuwan achikú. Dutikam nuwashkam shiig dakuenak tutupit wajasuí. Nunik Apajuin see taku emematu. ¹⁴ Dutika etsagagmatai, jega ijuntaiya nuna apujishkam senchi kajeká, aents ijunjaun chichajak:

—Seis tsawan takamainuk awai, nunú tsawan aina duwi kaunmainaitjume etsaentugti takugmek, tsawan ayamtai ai aan yujatsuk, —tau.

¹⁵ Tutai Jisus ayaak:

—¡Tsanumin aidauwah! Atum aidautijum tsawan ayamtai aig baka atiajum, burrugmishkam jukijum namaká ejegajum yumi aminujum dusha ¿wagka atumesh tsawan ayamtai aish dutiknugme? ¹⁶ Jujú nuwa Abraham wegantu, iwanch egkemtuam, dieciocho mijadai tuke punus wekagas waitú wekagun wainkaunush ¿wagkanuk etsagagchatja, tsawan ayamtai aigkish?

¹⁷ Jisus aaja tama niina kajejuidaushkam senchi datsajajui. Nuniai tikich aidauk shiig anedau, Jisus etsaegkagtutai wainaidau asag.

Mostaza jigkayí nuigtú levadura pachisa augmattsamu

(Mt. 13.31-33; Mr. 4.30-32)

¹⁸ Nuniagtai Jisus: “¿Apajuí aentsnum inama nunash, wajijai betekmamtinai tusanua tumainaitjime?” tiuwai. ¹⁹ “Apajuí inapa duka, mostaza jigkayin aents ajajin ajaamu, tsapai jigkai piipichitak tsakajá muun wajasmatai, yakiya pishak aidau nuna kanawen pasugmama numamtuk, Apajuishkam aents wajumkea nui inabaujin nagkama kuashat emawai”, tiuwai

²⁰ Tusa junashkam: “¿Wajina pachisnua Apajuik jumamtinun inamui tusanush ujainaitjime? ²¹ Apajuí aentsnum inama duka nuwa pagkan najanatatus kuashat harinan juki, nui levadura piipich ajuntuamu, ashí jegajug kajiak wampushmitkama numamtinai”, tiuwai.

Jinta menaku pachisa jintinkagtuamu

(Mt. 7.13-14, 21-22)

²² Jisus Jerusalén wegak, yaakat aidaunum wayaa nagkaemak, nuigtú yaakta ukukiag aents batsatunmash jintí jintinkagtakua wegau.

²³ Nuniamunum makichik aents:

—Apuh ¿wajumchikek uwemkagtin aina? —tau.

²⁴ Tutai:

—Atumek kakanmamsajum dekas waiti menakua nui wayatajum. Kuashat wayatatus wakeyagtin ainawai, tujash ashí betekak wayachagtinai. ²⁵ Wi jeennun waitin epenmataig atum agaa ijunuti-jum: ‘Apujuh, Apujuh waiti ujatjita’, tusajum untsugkugminish, wi chichagkun: ‘Wika atumnak wainchau ainajime, tuwiyants ainajum titinaitjime.’ ²⁶ Tusá wi tama atum aigkujum: ‘Apuh, jutii amijai yujumak ijunja yuwaku, umutash amijai ijuntuja umin ayagjama, jintinkagtutash iina yaaktajin wekaesam jintinkagtin aayumjama, tujutiagtin ainagme.’ ²⁷ Tusajum imatkugminchakam wi chichagkun:

'Atumesh tuwiyants ainajum wainchauwaitjime, ashí wetajum juwi batsamsajum tu batsamtsuk, pegkegchau takau aidauwah', titin ainajime. ²⁸ Aaja tai niimsatakamajum Apajuí inamtaijin Abraham, Isaac, Jacob, tikich Apajuin etsegtin aajakú aina nujai ijunu wainkajum, atumek agag batsamsajum, senchi buutkujum daik takegtitin ainagme. ²⁹ Wagki ashí nugkanmaya aents aidau kaunkag, mesanum Apajuí inamtain pekaamsagtinai. ³⁰ Nuniagtai aents yamai eme anentujakchamu aina nu, dekas eme anentam agtinai, tuja aents yamai eme anentam aina juka wainak juwagtinai.

Jisus Jerusalegnumia aents aidau egaagbau
(Mt. 23.37-39)

³¹ Tusa Jisus chichai, nunú tsawantaik wajumchik fariseo aidau Jisusan kautuawag:

—Jisusa apu Herodes mantamatatus wakejutpame, yajá tikich nugkanum wetá, —tuidau. ³² Tusa ujaam Jisus ditan chichajak:

—Wetajum, nunikjum apu pegkegchau takatan imá shiig anentaimtug takauwa nu jegagjum ujaktajum: Wika yamai, kashinchakam wakan pegkegchau aentsú egkemtuaunak jiijan ishimtatjai, dutikakun jau aidaunash etsagaittajai, kempatuma juwi mina tsawantug umi-intugkui duwi nagkankattajai, timae tusajum. ³³ Wika Jerusalén wegag junisnuk wetatjai, yamai, kashin, duwi tsawaknushkam. Apajuí etsegtin aidauk tikich nugkanmag mauchu ainagme, nuaduí wishakam Jerusalegnumak waitkasa maam atatjai.

³⁴ "¡Jerusalegnumia aidauwah atumek Apajuí etsegtin aidaush main ainagme, nuigtushkam Apajuí chichagkagtukti tusa awetugmamtaish, kayai tukuí tukuinakuajum main ainagme! ¡Wika shiig wakeesan, atash uchuchiji aidaun nanapen awayag ijumag kuitamama numamtuk, atumnash ijumjan kuitamkata tamash, atumek dakitjamugme! ³⁵ Nuniku asagmin jujú atum batsatjum juka ukumkimu, aents pujugsachbau agkan agtatui, nuniktin asamtai tajime: Yamai nagkamsagmek ataktuk waitkashtatjume, nuniautijum tsawan jegamtai wi minakui: '¡Apajuí awemam mina ju emematiagmi!' tujuttinaitjum duwi waitkatin ainagme."

14

Aents iyashin iyag jau etsagagbau

¹ Tsawan ayamtai ai, Jisus dekas fariseo aidaun apuji jeen yujumkan yuwatatus wegau. Nunitai tikich fariseo aidauk wajukatig tusa diidau.

² Nunik waikmá Jisus wainkau aents iyashin iyag tepettaman. ³ Nunik Jisus chicham umiktinun jintinkagtin aidaun, fariseo aidaujai ijumag chichajak:

—¿Atumesh wajuk anentaimjume, tsawan ayamtai aish aents jaush etsagaumainkaih, atsa etsagaumainchaukaih? —tau.

⁴ Tamash ditak aimkachaju, nunikagmatai Jisus kuntunum achiká inantak etsagaju, dutika:

—Yamaik tsagajume, amina jeemin wakitkita, —tusa awemak, ⁵ fariseo aidaun pempeentuki:

—¿Ya atum ainajum anuiyash niina burrují, nuniachkush baka-jigkesh tsawan ayamtai aig waanum egkemá jinkishmin wajas

egketu wainkush, yamaik tsawan ayamtaiyai, kashin jiktajai tusash idaimainaita?

⁶ Tamashkam aimainchau dekapenak takamtak ijunu.

Nuwenbaunum ipaamu aidau pachisa augmattsamu

⁷ Nuwenbaunum ipaamu aidau dekas ekeemtai pegkeg iwajamu aidan etegkeg pekabiagtai, Jisus wainak tiuwai:

⁸ —Atumek nuwenbaunum makichik aentskesh ipapawagmataish, dekas ekeemtai pegkeg iwajamu etegkagmek ekeemsatasa wakeyig-pajum. ⁹ Atum imannum eketjumin tikich ipak atumin nagkae-tamsau taamtai, atumin ipapau tajuntugman: ‘Amek wajaktá jujú aents ekeemsati’, tusa tujamkui, datsá datsanjai wajakjum ukunum ekeemtai imanchaunum ekeemsaijum. ¹⁰ Makichik aentskesh ipapainakuishkam, amek yama wayamunmag ekeemtai imanchaunmagkesh ekeemsata. Nuniamin ni ipapau minak: ‘Kumpajuh, emkam au ekeemtai dekas pegkeg aina awi ekeemsata’, tusa aentsun emtin ekepasmatai, ameshkam shiig aneasam datsamkas ekeemsamnum. ¹¹ Aents dekas tikichin nagkaesau ata tusa wakegauk, eme anentam achatnai; untsu aents imanchau tikichin nagkaesau atanash anentaimtuchu, dekas eme anentam atinai.

¹² Nuna tusa idayak, aents niina ipauwa nuna chichajak:

—Ame, yujumak yuwami tusam ipaamakmek imá amina kumpagmik, amina yatsumik, amina pataim, tikich atumjai ijutkau dekas wiyakuch aidauk ipaawaipa. Ame nunú aents iman aidau ipaamak, niishkam iiktamak aminashkam dita jistamainakushkam ipapawag-tatui, dutijamkui atumek yamaik ju nugka juwi akikbauwa nunin juwaktatjume. ¹³ Tujash dekas imá pegkeg, ame atak jistamkumek ipaata ujunauch, kuntujin tsujinkau, shutú, wainmachu aidaushkam. ¹⁴ Ame nunú dutikakmek atak shiig aneasam pujuttame, ditak akigmakchagtin asamtai. Untsu Apajuí atumin akigmakagtinai, ashí aents ni pegkeemtikbau aidau inanjatin tsawan jegatna duwi, —tiuwai.

Aents yujumak yuwawagmi tusa ipaamu kaunkachbau pachisa augmattsamu

(Mt. 22.1-14)

¹⁵ Jisus aatus tutai, nunú mesanum ditajai pekaju makichik chichaak:

—Shiijap aneastin ainawa Apajuin inamtain batsamsag yujumkan yuwidauk, —tiuwai.

¹⁶ Tutai Jisus chichaak:

—Aents jistamatatus, yutain kuashat umikuí, dutika kuashat aents aidau ipauwai. ¹⁷ Dutika yujumak yuta jegamtai, ni inaken awe-mauwai: ‘Ipaamu aidau ujaktá: kaunkatnume yutaig ashí uminkae’, tusa. ¹⁸ Tusá ujainam ipaamu aidauk dakituidau asag, dekatkau ipaamua nu chichaak: ‘Wika yamá nugká sumakag juna diyakun wetatjai, wait aneas tsagkugtugi’, tau. ¹⁹ Nuniai tikich chichau: ‘Wishakam diez toro sumakjai. Nuna nugka tsaitain detuan dekapsata tajai, wait aneas tsagkugtugi’, tau. ²⁰ Tikitchakam aikasag: ‘Wisha yamá nuwenajai, nuniku asan minishtatjai’, tau. ²¹ Tiagtai inakeshkam ukuak taa apujin ujakú. Tusá ujaam apushkam kajekú, nunik ni inaken chichajak: ‘Waamak weme yaaktanum jinta aidau, ujunauch aidau, uwejen nawenkesh tsujinkau, shutú aidau, wainmachu aidaushkam ipajum ikaunmakta’, tusa awemauwai. ²² Tima inakshakam we, aents nunin

aidaunak yajuak ikaunma apujin wejí: ‘Apuh, ame tujutmaum nunak imatixsanuk ikaunmakjai, tujash nuigtú ekeemainush awai’, tau.²³ Tama apu inaken chichajak: ‘Wetá nunikam yaakat pegmagbau agaajin, jintaagkesh aents wekagu wainkamek: Wegajai awi yujumak yuwami, tusa dakimakuish kakantsá jukim ikaunmata, ashí mina jegajuí ekeentai agkan awa nu piyakti.²⁴ Wi yama nagkamchakun ipaamag duka makichkish taawajag yujumkanak yuwachagtatui, tiuwai.’

Mina nemagtuidauk waitiakush katsuntug nemagtumain ainawai Jisus tibau

(Mt. 10.37-38; 5.13)

²⁵ Kuashat aents Jisusan saetusag ashinaidau, imaniagtai Jisus ayampatua chichajak: ²⁶ “Makichik aentskesh ni apajin, ni dukujin, ni nuween, ni uchijí aidaun, yachi aidaun, umayí aidaunakesh, mina anenmaina nuní nagkaemas aneuk, mina jitintaijuk amaitsui. Nuigtú nigkishkam ni wakejamun taká pujutatus wakegauk, mina jintintaijuk amaitsui.²⁷ Mina nemagtuk waittan dakitauhkam, mina jitintaijuk amaitsui.²⁸ Atum ainajum anuiya, wajasá niimtai torre tutain yakí jiiká jegamkatatus wakegakug, ¿dekatkauk ekeemas anentaimainchaukait, ibau jegamainush kuichkish ajutuash, wajupa kuichkinak ashimkainja tusa? ²⁹ Aents nunak anentaimtutsuk ayatak nagkama, kuichkijin ashimak idaisamtaig, aents aidaun nuna wainkag dushikinak: ³⁰ ‘¡Nijah! Juna nunú aents jegamkatjai tusa yamaikik nagkamau ayatak, ashimkachmin dekapeak idaisabi’, tumain ainawai.³¹ ¿Tikitchakam, apu tikich nugkanmaya apujai maaniatatus wakegakug, dekatkauk niina suntajiná ijumag diez milkesh suntag ataig, mina shiwag veinte mil minitjuina aujaish itagdaikan maanimainashitag, tusa dekamainchaukaih? ³² Nunik maanimainchau dekapeakug, eke nagkamtsuk: Maanitak atsustí tusa epegtunimainai.³³ Numamtuk, atum ainajum anuiya ashí niinu aidaun idaitan dakitauk, mina jintintaijuk amaitsui.

Wee jea jeatuji pachisa Jisus augmattsamu

(Mr. 9.50)

³⁴ “Week dekas pegkejai, jea jeatuji ajamu asa. Tujash jea jeatuji megkagak sakam wajasmataig, makichik aentskesh wakejumaitsui.³⁵ Wee nunik besegmataig jukiag agaa ukajá ajapmain ainawai, nugkajai pachimja takamainnumkesh atumnachu, ajakan wajautinkesh batsatmainchau asamtai. Antutaijum ajamutigmek wi tajim jujú shiig antuktajum”, tiuwai.

15

Uwig emegkakbaun pachis Jisus augmattsamu

(Mt. 18.10-14)

¹ Jisus chichagkagtutai antugkagtatus kuashat aents apú kuichkiji atinun yajumin aidaun, tikich aents pegkegchau aidaujui ijuuntuidau.² Imatikiagtai fariseo aidaun, chicham umiktinun jintinkagtin aidaujui Jisusan pachisag:

—Auk aents katsek aidaun kumpamak tuke ditajai ijuuntug yu wekaenuwe, —tusag wakenmag imatjuidau.

³ Nu tama augmatbaun pachis augmatak: ⁴ “¿Atum ainajum anuiyatigmesh, cien uwig ajutjamu makichik megkaetugmakmatai, noventa y nueve uwija duka uwegshunum batsaakjum, megkaekauwa nu egaa egakuajum igkumainchauk ainajum? ⁵ Dutika wainkagmek shiig anentsajum midaaki ju ainagme. ⁶ Nunika jegá wakitki jegaajum atumi kumpajum aidaujai, nuigtú ijunja batsamtaijum aidaujai ijun-jajum: ‘Mina kumpag aidauh, mina uwig megkaetugkaunak yamaik jukijai, nuniku asamtai atumjai ijuntsa shiig aneasagmi’, tumainchaukaitjum. ⁷ Numamtuk Apajuí aentsji nayaimpinmaya aidaushkam shiig aneenawai, noventa y nueve uwemkau ainai, aents tudau takatan wekaetak megkaetanum pujú, Apajuí nemajak pegkegchaun idayak pujutjin yapajiau asamtai”, tiuwai.

Kuichik emegkakbaun pachis Jisus augmattsamu

⁸ Tikichnashkam tiuwai: “Nuwa diez tsawantai takasá kuichik jumaina ibau takakbaun, kashi makichik ajuag emegkak, jii ekematuk kuitamas japimak ¿wainmainchaukaih? ⁹ Nunik wainak shiig aneas juwakug, ni pujamunum aents tikiju batsataidaun, ashí ni kumpají aidaunashkam untsuká ijumag: ‘Atumjai ijuntsa shiig aneasagmi, kuichkin makichik tsawantai takasá jumainun emegkakmayag nunak jukijai’, tumainai. ¹⁰ Aatus Apajuí aentsji nayaimpinmaya aidaushkam shiig aneenawai, makichik aents niina tudaujin idayak Apajuin nemagtaik.”

Uchi apajiin wakitkimu pachis Jisus augmattsamu

¹¹ Junashkam Jisus tiuwai: “Makichik aents ajujakuí jimag uchijí. ¹² Nuna uchijí ekeu apajiin: ‘Apawah, ashí wájí midau amaina duka yamaik sujustá’, tusa segauwai. Tama apajishkam: ‘Ayú’ tusa mai uchijin ni wajiijinak etsegtuk: ‘Jujú aminuk atí’ tusa tinabiuwai. ¹³ Dutikam machik tsawan apajijai pujus, uchi ekeuk ashí ni wajiijinak ijumag juki, apajinak ukuak tikich nugkanum atushat weuwai. Nunik nui pujus wainak pujut pegkegchaunum wekagak, kuichkijinak wajiiijai ashimkauwai. ¹⁴ Nunik ashimak pujai, nunú yaaktanum yapajut tepeauwai. Nunikmatai niishkam senchi yapajau, wajiyaik sumak yuwati. ¹⁵ Nuniak we takatan iniimtai, nu yaaktanmaya aents kuchigtin asa: ‘Ame mina kuchig kuitamjutin atá’, tusa kuchi batsatbaunum awemau. ¹⁶ Dutikam niishkam kuchin ayujak pujus senchi yapajak, kuchi yuwinamun yumain dekapeau, tujash makichik aentskesh yutainak suwinachu. ¹⁷ Dutikam senchi yapajak ekeemas anentaimá ekeemkamá, adeaju apají inake aidaun, nunik: Mina apajú inake aidauk kuashat yutanak yuwinak, ampíjajash wainak utsá batsatainainpap, wi juwi pujusan nujantai jaaja. ¹⁸ Dekas wisha mina apag pujamunum wakitkitjai, nunikan jegan: ‘Apawah, wika Apajuinash kuashat pegkegchaun takagsajai, imanik aminashkam pegkegchaun takagsajame. ¹⁹ Nuniku asan wika amina uchigmek amaitsujai, minak ame inakem etita, dutijuawamin wishakam amina takagtamin aidaujai ijunjan takagsatjame titajai’, tiuwai nigki anentaimas. ²⁰ Tusa jiinki wega wegakua apají pujamunum tikiju jegattak minittaman, apajishkam ikaag uchijin wainkauwai.

“Dutika uchijin wait anentug tupikatki igkug, kajut pagkuk kugkuas shiig anentus ni jeen jukiuwai. ²¹ Dutikam uchi apajin chichajak:

'Apawah, wika yamaik Apajuinash kuashat pegkegchau takagsajai, imanik aminashkam pegkegchaun takagsajame. Nuniku asan wika amina uchigmek amaitsu'ai', tiuwai. ²² Tusá uchijí tama, apají ni inake aidaun untsuká: 'Wamkesjum jaanch dekas pegkeg agma iman jikjum anugtujatajum, dutikajum tsajam uwejen anillo patakuakjum, sapatchakam wegagtuktajum. ²³ Dutikajum toro tsakat duwejam diisjum maajum, wamkesjum inagkajum umiktajum, yuwinaku jistamawagmi. ²⁴ Yamaik mina uchig tuke waipakchatnapitja, jajutkas megkaetugkamiatai tuwamag nunú iwaaku tajutí wantintugkae.' Apuji timatai inak aidaushkam wamkesag ni tibaujinak imatiksag umikagmatai, jistamtan nagkamauwai ni uchijí tajuam shiig aneak.

²⁵ "Nuniai niina uchijí dekas emkaushkam ajanum takaak weu minikmá, antukui pampainamun. ²⁶ Nunik inake nui wekagun untsuká: ¿Wagka nunash imatuinawa? tusa iniau. ²⁷ Tama inakeshkam: 'Amina apa yatsum taamtai, uchig jatsuk iwaaku tajutmatai waipakjai tusa, toro tsakat dekas duwejam diisjum maatajum, dutikawagmin nuna uchin ayugkui jistamawagmi tiajam, ditashkam imatiksag umikagmatai nuna yuwinak jistamainak imatuinawai', tiuwai. ²⁸ Tusá ujakam senchi kajeká, jegaa waitnak dakitug agaag wajasuí. Nunikmatai ni apají jüintuki: 'Wegajai jegá wayaami', tau. ²⁹ Tama apajin ayaak: 'Apawah, wajupa mijadaiya wi juwig pujusan yayatsjame inakjai betek, chichamjumnash intimjutsuk, wi imatikamaitkumesh minak makichik cabra tsakatchikesh sujuchume, niina kumpajijai jistamati tusamek. ³⁰ Nuninaitkum yamai amina uchijum, kuichkigmin nuwa akiká takatai aidaujai wekagak utsanjamak taamtai, toro tsakat dekas duwejam mantuam ayugkum jistamjame', tiuwai.

³¹ "Tusá uchijí tama: 'Uchijuh, amek wijai ijunjam tuke pujuwaitme, ashí wají midau aina duka aminu ainawai. ³² Nuniaig juka amina yatsum jakautskaitai tuwamag nunú iwaaku pujau asa, imapam tajutjama wantintugmaku asamtai, shiig aneenaku jutikaji, nuaduí jujú jistabauk pegkegchauwai tumaitsuji', tiuwai.

16

Apú wajijin kuitamin pegkegchaun pachis Jisus augmattsamu

¹ Junashkam Jisus jintintaiji aidaun tiuwai: "Aents wiyakuch ajukái inake, ashí niina wajijí aidaun kuitamin. Nuna tikich aidau etsegtukajui: 'Wajigminak wainak takagtamui', tusag. ² Tima nuna untsuká itan: '¿Wajuk asamtaiya nunash tujutuinawa? Yamaik amek minaig takaschattame, nuniktin asam mina kuichkijuk, ashí mina wajig aina nujai papiinum agakam sujustá', tusa segauwai. ³ Tusá tama: 'Apu mina ni takatjin jüja duwish ¿wisha wajuk takas nuk pujustaja? Wika nugka tautnumash kakaumaitsu'ai, wainkan pujusan kuichik sujustajum tusan sumá wekaetanash datsamajai', tusa anentaimá eketu. ⁴ Nunik: 'Untsu juna jutikatjai, apu ni takatjin jüigkuish, tikich aidau mina jegajú taam pujustá tujuttinme', tusan. ⁵ Tusa ni apujin diwimaidaun untsuká ikaunman, dekatkauwa nuna iniak: ¿Wajupa mina apujush diwime? tau. ⁶ Tama ni ayaak: 'Wika

aceite cien barrilnum* aimkamun awagtumainun diwimjai', tau. Tutai: 'Ju papí jukim ekeemsam wamkesam agagta: Ayatak cincuenta diwimjai, tusam', tiuwai. ⁷ Nuna tusa idayak tikichin: '¿Amesh wajupa diwime?' Tama ni ayaak: 'Wika trigo cien sakunum aimjamu awaktumainun diwimjai', tau. Tutai nunashkam: 'Ameshkam ju papí jukim ekeemsam waamak agagta: Ayatak ochenta diwimjai, tusam', tiu. ⁸ Nunú inak pegkegchau imatika emtika anentaimag umikmatai, apuji wainak anentai jegagchauwai. Nuna tusa Jisus, Apajuí nemagchau aina duka pegkegchau takatnumag, Apajuí nemajin aidaun nagkagas imatika anentaimainawai.

⁹ "Tujash wi tajime: Atumesh duka nu wajukauwa nunisjume kunimainaitjume, dekas kuichkia duka tikich pegkegnum yayakjum kumpajum ikaugkatajum, nu dutikagmin atumdau amutugmakmataish, Apajuí ni pujutaiji tuke auwa nui jujamkitin asamtai.

¹⁰ "Aents imachik ajamaitkush pegkegnum takauk, kuashat ajamash nunisag dekas pegkeg aidaunak takamainai; nuniai tikichia nu imachik ajamash pegkegnum takaachuk, kuashat ajamash pegkegchaunak takamainai. ¹¹ Aents ju nugka juwi pujus, kuichik kuashat ajamaitak pegkejan takaachunash, ¿itugsaya Apajuish tuke pujutaiya nuwish kajintsash awaimainaita? ¹² Atumin ju nugka juwi pujus, takagtusti tusa Apajuí amasbauwa nu, betek takaschautigminash ¿Itugsaya nayaimpinmaya dekas tuke atina nunash amainaita?

¹³ "Makichik inakak jimag apugtinuk amaitsui. Tikich apujin imá senchi aneak, tikichin dakitmainai. Nuniachkush makichik apujin wakejus umijak, tikichnak dakitau asa umigmait sui. Numamtuk atumshakam Apajuí umigkata tu, wiyakchameatasa anentaimtu wajamait sugme."

¹⁴ Jisus tutai fariseo aidau antukag, dita imá senchi kuichkinak anentaimtin asag, dushikis chichajuidau. ¹⁵ Nudiagtai Jisus: "Atumetjume aents aidau emtin pegkeja iman jumamin aidautigmek, tujash Apajuí atumí anentaimnak shiig dekagtamjume; nuniau asa aents aidau eme anentam ata tus wakegaunak Apajuik dakitawai.

Apajuí chichame duwik etsegkamu tuja yamai etsegbaujai pachisa tibau

¹⁶ "Juan Yamijatin Apajuí chichamen eke etsegtsaigkik, aents aidauk Moisés chicham umiktajum tibauwa nuna, nuigtú Apajuí etsegtin agagbauwa nunash antujakajui. Tuja Juan Yamijatin yamajam chicham, Apajuí inamjatnun etsegbaun nagkabauwa nuwi nagkamas, ashí aents aidauk Apajuí inatjati tusag senchi kakanmamainawai.

¹⁷ "Nugka, nayaim aina nu megkagainatsaigkik, chicham umiktinum Moisés agagbau piipich aina dukesh umintsukek juwakchatnai.

Nuwak idaimaitsui Jisus tibau

(Mt. 19.1-12; Mr. 10.1-12)

¹⁸ "Ashí aishmag aidau nuwen idayinak tikich nuwajai nuwenkug ekagmainawai. Tuja nuwa aishi idaisamua nuna nuwatushkan nunisag ekagmawai.

Lázaro wiyakchajai

* 16:6 Makichik barrilnumag "ocho galones inagkeasa" aceitek yajá wajakbauwai.

19 “Aajakuí aents wiyakuch jaanch dekas pegkejan iwagmamag pujus, kashí kashinig jistamu. 20 Imaní pujai ujunauch Lázaro daagtiinun ashí iyashinig kucha kuchapjú wajasun itawag, nunú wiyakcha jeen waitijin apukiajuí, nui pujus segamí tusa. 21 Nui pujus senchi yapajak yuwatatus wakegau wiyakuch yuwaku mesajinia akakeamun, nunittaman yawá aidau kuchapen dukatuinak waitkaidau. 22 Lázaro nuní pujau jakamtai, Apajuí aentsji nayaimpinmaya aidau jukiag iwakaju Abraham pujamunum. Nuniku ai wiyakchashkam jakamtai ukusajui.

23 “Dutikam wiyakchak jiinum pujus senchi waitiak pagkas ni-inkamá, wainkau Abragkan, Lazaronashkam Abragkaí ayaumas ekeematman. 24 Nunik wainmawaik senchi jiiká untsuak: ‘¡Apawah Abragka, minash wait anenjugta!, nuniakum Lázaro awetugta ni tsjam uwejen yumin uchupig idaijun antinjuk machik bichatmitkajuati, jii imagniamunum pujusan senchi waitiag nuna’, tau. 25 Tama Abraham ayaak: ‘Uchijuh adeagta, ame nugká pujusam shiig aneamam waitkas pujubium nu. Nuniamin Lazarok senchi waitmayi, imanijakú asa yamaik nigka juwig ayamak shiig pujawai, nuniai ame waitiame. 26 Nuigtushkam juwiyati anuí minita takuish minimait-sui, wake ishamain asamtai. Anuiyatigmeshkam juwi minitasajum wakegakjumesh nagkaemamait-sugme.’

27 “Tama wiyakuch chichaak: ‘Untsu apawa Abragkah, wait aneamam Lázaro nugká awemata, 28 dutikam mina yatsug cinco batsaama nuna shiig Apajuí chichamen ujatjuktinme, dutikam ditak jujú imag waitta juwig minishtinme’, tau. 29 Tama Abraham ayaak: ‘Ditak Moisés agagbau, nuigtú Apajuí etsegtin aidau agagbauwa nuna aujus imatiksag umiinak waittanmag minimainchau ainawai’, tiu. 30 Tama wiyakuch ayaak: ‘Apawah Abragka, dekas aents jakau nantakí chicham ujaam antugkag tudau takatan idayinak Apajuin nemagmain ainawai’, tau. 31 Tutai Abraham chichajak: ‘Moisés chicham umiktinun, nuigtú Apajuí etsegtin aidau agajajua nuna betek uminatsu anidauk, jakau nantakí ujamash dekaskeap tawa tusag antugmainchau ainawai’, tiuwai.

17

Tikichin pegkegchau emaidaun pachis Jisus tibau

(Mt. 18.6-7, 21, 22; Mr. 9.42)

1 Nuna ashimak Jisus ni jintintaiji aidaun chichajak: “Aentsuk tudau takatnak kakajus uwemtumait-sui, tujash aents tikichin tudaun takamtikaina nuna wait anentajai. 2 Ju uchi piipichia jumamtin mina yamá nemagtuidaun makichik aentskesh pegkegchaun takamtikaidauk, dekas kaya muun dekeetai aina iman juki kuntugnum jigká detuais, nayants ajugká ajapmain ainatai. 3 ¡Kuitamamkatajum atumek!

“Amina yatsum pegkegchaun takagtamkuish, ankaipa tusam senchi titá, tama tsagkugtugta takuig tsagkujata. 4 Tuja makichik tsawantinig sieteya imagnia pegkegchaun takagtamas, sieteya imania tsagkugtugta tusa segapakuish tsagkujata”, tiuwai.

Apajuiyai kajintsá anentaibaunum dutikmainai tibau

(Mt. 21.21)

⁵ Jisus tutai jintintaiji aidau:

—Apujuh, Apajuiyai kajintsá anentaimta nu aan senchi sukagtusta, —tuidau.

⁶ Tiagtai Jisus ayaak:

—Atum Apajuiyai kajintsá anentaimaumum mostaza jigkayiya nun-
inchikesh ajutjamainakuig, numi sicómoro waja jujú chichagkujum:
'Teganim nayantsanum wajaata', tamak nunisag uminmainai, —
tiuwai.

Inak aidauk apujin umignai tibau

⁷ “¿Atum aidautigmesh inakjum nugkan pukug tsayaak wekae-
tau, nuniachkush bakagmin kuitamak pujau wakitki jegá taamtaish,
wayam: 'Juwi tantá ekeemsam yujumak yuwata', tumainkaitjum?
⁸ Duka tutsuk: 'Agkú yujumak yuwatin inagtugkata, nunikam ya-
pagmamam sujustá, wi shiig yuwan, umutnash uwajan uminkamtai,
amesh duwi yuwata', tumainaitjume. ⁹ Inakem ame tibaunak imatik-
sag umigtamkamtai yuwagmesh: See ame umikbaun yuwag duwi,
tusagmesh ¿tukamujum? Dekas tajime: Duka tuke tuchau ainagme.
¹⁰ Numamtuk ainagme atumshakam, Apajuí takatan amasbauwa imá
duke umikjum idaikugmek: 'Jutii inak aidautik atsumchatai ainaji, imá
ni tujabauk umiká idayidau asaja', tumainaitjume.”

Diez aents jata lepra achikbau aidaun Jisus etsagakbau

¹¹ Jisus Jerusalén wegak, Samaria nugka, Galilea nugkajai tesagdaya-
munum jinta asamtai nagkaebau. ¹² Nuna nagkagag jegawajui aents
yaakta ukukiag batsatbaunum, nuniai diez aents lepra achikam waitú
batsamin igkugtatus jünag ikaag ijunas, ¹³ senchi unsumkag:

—Jisusah jintinkagtinuh, jutiish wait anenkagtujia! —wajaidau.

¹⁴ Imatiagtai Jisuschakam:

—Sacerdote pujamunum jegajum wantinkatajum, —tiu.

Tima ditashkam jintá wesag, dita jaamujinak tsagagkaju. ¹⁵ Nunik
dita aina nuwiya makichik ni tsagagbaujin wainmamak, senchi jiiká
Apajuin eme emematak waketak, ¹⁶ Jisusan jegantun tikishmag puju-
jus, see tau ni tsagagbaunum, duka Samarianmaya aajakuí. ¹⁷ Nunitai
Jisus chichajak:

—¿Diez aidau tsagagchagmaka? ¿Nueveya dusha wajukawag-
mae? ¹⁸ ¿Imá jukeuchikaih tikich nugkanmayayaitak wakitki Apajuí
ememati duka? —tau.

¹⁹ Tusa Jisus:

—Wajakim wetá, amek minai kajintsá anentaimam duwi tsagajume,
—tiuwai.

Jisus ni taatnuji pachisa etsegkamu

(Mt. 24.23-28, 36-41)

²⁰ Fariseo aidau Jisusan iniinak:

—¿Wajupa asaya Apajuí jutiin inapamush atinaita? —tusag iniidau.
Tama ni ayaak:

—Apajuí inamjatna duka duwiyap atatua tusaish kakajus dekamait-
sui. ²¹ Nuniau asamtai: 'Apajuik juwi inamui, awi inamae', tabauk
achatnai. Apajuik yamaiya juwik atumnak inapajume, —tiuwai.

²² Tusa idayak ni jintintaiji aidaun pempeentuki chichajak:

—Tsawan jegatnai, wi Apajuí Uchijiyaitkun Aentsmagan Akiin-
 auwaitag nuna wakitkimtai, atum utusaik makichik tsawantaikish
 wainak tusajum wakeyagtinaitjum nunú, tujash takugmeshkam mi-
 nak waitkashtin ainagme. ²³ Nunashkam tujabiagtinaí: ‘Juwi pujawai,
 awi pujume’, tujamainakuish wegpajum. ²⁴ Wi Apajuí Uchijiyaitkun
 Aentsmaga Akiin-
 auwaitag nunak, peem pachiachmau peeti wamkes
 nayaimpin tsaaptin emak, tikich yantamnumash tsaapmitkama nu-
 mamtuk wajaktinaitjai. ²⁵ Nunú tsawan jegatsaig, dekatkauk senchi
 waittsattajai, aantsag aents aidaush dakitjiagtatai. ²⁶ Wi Apajuí
 Uchijiyaitkun Aentsmagan Akiin-
 auwaitag nuna minittakun wajataik,
 Noé pujai wajujejakú aina numamtuk wajagtinaí. ²⁷ Ditak yutain
 yuwinak, umutan umuinak, nuwentan nuween, aishintan aishin,
 nawanjin suju wajaí batsatai tsawan jegamtai, Noé arcanum egkemá
 waitin epenmatai, nujag abauji ashí nugkan amuak, tikich aents
 aidaunak ashíajak utsagkui. ²⁸ Nunisag Lot pujusmataish, yutan
 yuwinak, umuinak, sumainak, sujuinak, ajakmainak, nuigtú jegá
 jegam wajainak batsamajakú aina numamtuk wajagtinaí, wi juwi
 minittaku wajataish. ²⁹ Lot yaakat Sodoma pujau jiinki wematai,
 nayaimpinmaya jii azufrejai pachimjamu, yumi yutak wajujeama
 imaanik iyaajui, nuniak aents aidaunak ashí apekag ijinawajui.
³⁰ Numamtuk wajaktinaí, Wi Apajuí Uchijiyaitkun Aentsmagan Akiin-
 auwaitag nuna minakun wantinbaush.

³¹ “Nu tsawantin aents jega jegamká tuntupé paka inagnakbaunum
 waka pujaushkam, wajiiji jegá aunak akaikig jumaitsui. Nunisag ajajin
 takaak wekagushkam jeenig waketmaitsui. ³² Adeagtajum Lota nuwe
 wajakauwaita nunú. ³³ Ashí aents ju nugka juwi pujutan wakegak,
 mina nemagtuk waittan dakitauk uwemtijashtin ainawai. Untsu dita
 pujutin uyumachuk uwemjatin ainawai.

³⁴ “Junashkam tajime: Jimag aents kashi makichik pegaknumag
 tsanias tepaushkam, makichik juwaku, tikichik ukuam atinaí. ³⁵ Jimag
 nuwa shaa dekeenak pujuidaushkam makichik juwaku, tikichik
 ukuam atinaí. ³⁶ Jimag aents ajanum takaak wekagushkam, makichik
 juwaku, tikichik ukuam atinaí.”

³⁷ Juna Jisus tutai:

—Apuh, ¿dusha tuwig dekaskesh nuniktinaita? —tusag iniidau.

Tuinam Jisus:

—Duka tuwí jakau tepettawa, nuanuí chuwaagak tuwakagtinaí, —
 tiuwai.

18

Apu chichaman epegkin nuwa wajejai pachis Jisus augmattsamu

¹ Junashkam Jisus mijamtsuk Apajuinash ausatnume tusa jintink-
 agtak nagkama augmatu: ² “Makichik yaaktanum pujujakuí apu
 chichaman epegkin, duka Apajuinash ishamsash anentaimtuchu, aents
 aidaunashkam ajantum diichu aajakuí. ³ Nunú yaaktanmag makichik
 nuwa wajeshkam pujau asa utugchat ajusam, apun jegajua: ‘Jujú epeg-
 tujuata’, tusa segau. ⁴ Tusa imatjú pujugmash yaitnak dakitú pujau
 asa nigki anentaimas: ‘Apajuinash ishamsanush anentaimtuchitjai,
 aents aidaunashkam ajantunush diichuitjai; ⁵ nunin akunush, nuwa

waje waa waamak tajutak waitkaja junak, yaigkan epegtuatjai dutikam agkan idaitusti,” tiuwai.

⁶ Jisus juna ti: “Apu chichama epegkin tikima pegkegchaukesh aatus tiuwa nunin aish, ⁷ Apajuish niina nemajin aidau utugchatnum pujuskashi tsawashkam untsuamash, ¿yaitsuk idaimainkaih? ¿Nuni-achkush dukap asan yaigtajai tumainkaih? ⁸ Dekas tajime: Apajuik dukap atsuk waamak yaimpamainaitjume. Tujash wí Apajuí Uchi-jiyaitkun Aentsmagan Akiinawaitag nuna ataktú nugká minaknuk, wajumchik Apajuí anentaimtuidauk batsatai taatnaitjai”, tiuwai.

Fariseo apu kuichkiji atinun yajumnujai pachis Jisus augmattsamu

⁹ Aents aidau dita imá pegkejan takauwa iman anenmamainak, tikich aidaunak dakituidau asagmatai, Jisus jujú augmatbaun pachis: ¹⁰ “Jimag aents Apajuin ausatatus jega Apajuí ememattainum wegajui, makichik fariseo, tikich apú kuichkiji atinun yajumnujai. ¹¹ Nunik fariseo Apajuin aujak wajai wajas: ‘Apawah, see tajame, wika tikich aents aidau kasa, pegkegchau takau, tsanijimta wekaetin, jujú apú kuichkiji atinun yajumin puja juninkesh atsujai. ¹² Wika aminak makichik tumigtinig jimag tsawantái yujumkan ijagmá pujusan segaugme, kuichkinash mina akijuinakuig diezmó wajaujai’, tau. ¹³ Tujash apú kuichkiji atinun yajumnuk nigka ukunum wajas, ni tudaujin anentaimtus wake besemag dekapeak, machikish nayaimpinak pagkaish diitsuk detsepen ijuak: ‘Apajuiyah, wika tudauwaitjai, minash wait anenjugta’,” tiuwai. ¹⁴ Jisus nuna ti: “Dekas tajime: Apú kuichkiji atinun yajumna duka tudauji tsagkujamu asa shiig aneas waketai, fariseok nunikchauwai. Ashí aents eme anenmamaidaunak Apajuik imanchauch diyawai; untsu imanchauch anenmamaidaun eme anentus diyawai”, tiuwai.

Jisus uchi ikautkamu

(Mt. 19.13-15; Mr. 10.13-16)

¹⁵ Nuna tusa ashinkamtaí uchi aidaun Jisusan ikautuidau uchin antinjukti tusag. Imatikiagtai ni jintintaiji aidau wainkag uchigtin aidaun jiyaidau. ¹⁶ Tiagtatman Jisus antuk, uchin untsuká:

—Tutsuk idaisatajum, ashí uchi aidauk minai kauntatnume, utugkajum awagkigpajum. Jujú uchi anentaimaina jumamtin aidaunum Apajuik inamjata tawai. ¹⁷ Dekas tajime: Aents aidau, uchi mina anentaimjutuina imanís anentaimjutuínachuk, Apajuí inamak amain ainatsui, —tiuwai.

Apu wiyakuch Jisusan iniasbau

(Mt. 19.16-26; Mr. 10.17-27)

¹⁸ Nuna Jisus timatai apu wiyakuch Jisusan iniak:

—Jintinkagtín pegkejah, ¿wajina dutikmainaitja pujut tuke atina nuna jukitasanush? —tau.

¹⁹ Tama Jisus ayaak:

—¿Wagka pegkejá tujutme? Makichkish pegkejak atsawai, imá Apajuiya duke pegkejak. ²⁰ Amek dekame chicham umiktin agabauunum: ‘Tsanijinawaipa, magkagtuawaipa, kasamkaipa, wainkamek tsanumkagtuajaipa, amina apa dukujai eme anentsam diiyaakum yaigtá’, tawa nunú.

²¹ Tama ni chichaak:

—Wika nunak datsauch asanuk ashí umikuitjai.

²² Nuna tutai Jisus antuk ayaak:

—Nuigtú makichik umimain ajutjamui: Ashí amina ajutjamaina duka sujukam ujunauch aina nu susata. Nu dutikawamin nayaimpinum wajigmik ajutjamtinai. Nu dutika ukuakum mina nemagtukta, —tiuwai.

²³ Nu tama antuk wake besekuí, shiig wiyakuch asa. ²⁴ Nunik senchi wake besektatman Jisus wainak chichajak:

—Wiyakuch aidauk kakajus Apajuí minash inatjati tusag idaimainchou ainawai. ²⁵ Camellok aujá jinish waigká nagkaemamainai, tujash wiyakuch aidauk Apajuí minai inamjati tusag kakajus idaimainchou ainawai, —tiuwai.

²⁶ Jisus tabaun tikich aidaushkam antukag:

—¿Yaki tujash uwemjaush amainaita? —tuidau.

²⁷ Tiagtai Jisus ayaak:

—Aents aidau dutikmainchouwa nunak Apajuí dutikmainai, —tiuwai.

Mina nemagtuidauk ditanu ukukbaujin nagkaesau jukiagtinai tibau (Mt. 19.27-30; Mr. 10.28-31)

²⁸ Tutai Pedro ayaak:

—Jutii aidautik iina ajutjamaidauk ukuinaku nemagkamiajime, —tau.

²⁹ Tutai Jisus ayaak:

—Ashí aents Apajuinun takainak yujainak jeen, nuwen, yachin, uchi-jin, apajin dukujijai ukukiag yujaidauk, ³⁰ jujú nugka juwi pujusash, ni ukukbaujin nagkaesau jukiagtinai, nuigtushkam atak atina duwi pujut tuke atina nui pujusagtin ainawai.

Kampatuma juna Jisus ni mantamnatnuji etsegkamu

(Mt. 20.17-19; Mr. 10.32-34)

³¹ Jisus ni jintintaiji doce aina nuna akanak juki: “Jerusalén jegattag duwi, Apajuí etsegtin aidau, Apajuí Uchijí Aentsmaga Akiinauk nuniktinai tusa agajajua duka uminkattawai. ³² Nuniau asamtai minak aents judiuchu aidaunum sujutkagtatui, dutijuawagmatai pegkegchou chichagtuinak, dushiktuinak usuktiagtatui; ³³ asututnash asutu awa awajtuinakua mantuawagtatui; tujash dutijuawagmataish kampatum tsawanta juwi ataktú nantaktatjai”, tau.

³⁴ Tujash ni jintintaiji aidauk shiig dekamainchou dekapedau, shiig antukchamnum tau asamtai.

Jisus Jericonmaya aents wainmachu etsagagbau

(Mt. 20.29-34; Mr. 10.46-52)

³⁵ Jisus yaakat Jericó jegattak wegai, aents wainmachu jintá yantamen ekeemas: “Kuichik sujustajum”, tusa sumá eketu. ³⁶ Nuniau kuashat aents nagkaemainak pampainamun antuk iniimu:

—Wagka imatainawa, —tusa. ³⁷ Tutai: —Jisus Nazarenumia wetai imatuinawai —tusag ujaidau. ³⁸ Tiagtai senchi untsamak:

—¡Jisusah, David wegantu uchijiyah, minash wait anenjugta! —wajau.

³⁹ Imattai aents eemak ashinaidau itatkati tusag jiyaidau, tujash nigka nuní senchi untsamak:

—¡David wegantu uchijiyah, minash wait anenjugta! —wajau.

⁴⁰ Wainmachu imatbaun antuk Jisus wajantá:

—Jukijum juwi itagtuatajum, —timatai jukí ejentuntam, ⁴¹ Jisus iniak:

—¿Minash utugtukti tusamea wakegame? —tau.

Tama ni ayaak:

—Apuh, wika niimtijiti tusan wakegajai, —tau.

⁴² Tutai Jisus chichajak:

—¡Wainmakta! Amek minai kajintsá anentaimam duwi tsagajume, —tiu.

⁴³ Tusá tamawaik wainmakui. Nunik Apajuin emematkamaikia Jisusan nemagkauwai. Tuja ashí aents nuna wainkajushkam Apajuin emematuidau.

19

Jisus Zaqueo jeen webau

¹ Nuna dutika ukuak Jisusak yaakat Jericó wayaa nagkaebau.

² Nuniai Zaqueo apú kuichkiji atinun yajumin aidaun apuji shiig wiyakuch, nunú yaaktanmak pujau. ³ Nuniau asa, Jisusash wajukukita tusa wainkatatus wakegau, nuniayatak kuashat aents tuwagkagmatai wainmainchau dekapjau sutajuch asa. ⁴ Nuniak Jisus wetinmanini eemak tupikaki, numi sicómoro wajaunum waka ekeemsau, Jisus nagkaematai wainkatatus. ⁵ Nuniai Jisuschakam nui jegak pagkai diyak:

—Zaqueoh, wamkesam akaikita, amina jeemin minajai, —tiu.

⁶ Tama Zaqueoshkam wamkes akaiki, shiig anentus Jisusan juki niina jeen emauwai. ⁷ Nunitai ashí aents aidau: Aents tudaugtinu jeen kanagtatus wegawai, tusag augmatuidau. ⁸ Tujash Zaqueok niina jeen ejege wajakí, Jisusan:

—Apuh, yamai nagkamsanuk aents ujunauch aina auna jimaituk wajijun akantukan tinamtajai, dutikakun wi kasagkamug aidaunash ipaksumta imajin susatjai, —tau.

⁹ Tutai Jisus ayaak:

—Yamaik ashí amina pataimijai uwemkaugme, Abraham dekaskeapi tiuwa nunisjumek dekaskeapi tujutium nuaduí, dekas Abraham wegantu wajasugme. ¹⁰ Wi Apajuí Uchijiyaitkun Aentsmaga Aki-inauwaitag nunak, aents megkaejau aidaun egakan uwemtijatasan tauwaitjai, —tiuwai.

Apu ni inake aidaun kuichik tinamí ukukbau pachisa augmatbau (Mt. 25.14-30)

¹¹ Jisus Jerusalén jegattak wegau asamtai, aents aidau ni chichaamu antugkaju asag, awi jegaa apu wajasá waamak inamjashtimpash tusag anentaimaidau asagmatai augmatbaun nagkabau.

¹² Nuniak tau: “Makichik aents ashí aents aidau eme anentsá diitai aajakuí, nunú tikich nugkanum atushat weuwai, nuwi apu emam wakitki niina nugkeen taatatus. ¹³ Eke wetsuk niina inaken diez aina nuna untsuká ikaunmak, makí makichik aentsun, cien tsawantai takasá jumainun kuichkin tinamí chichajak: ‘Jujú kuichkia juwik waji sujakjum, kuichik aan kuashat ikaugkatajum, nuniagmin wisha taatjai’, tiuwai. ¹⁴ Nunikunak aents niina kajejudau asag, dekas apun chichaman awetuinak: ‘Jutiik dakitaji aanú iina apuji atí tusaik’, tiajui.

¹⁵ “Tujash nigka apu adaikam wakitki niina nugkeen tauwai. Nunik niina inake kuichik tinamká ukukbauji aidaun untsukaju, maki makichik aentsush kuichkinash wajupak ikaugkaje tusa dekajuatatus. ¹⁶ Tiajam makichik niiyá eemak jegantá: ‘Apuh, ame kuichik sujusmayum nunak, aan nagkaemasan cien tsawantai takasá jumainun ikauntukjame’, tau. ¹⁷ Tama ni ayaak: ‘Ayú, amek inak pegkejaitme, machik susamuitkum kuashat ikaugkaume, duwi wishakam diez yaakat aina nuna apuji emattajame.’ ¹⁸ Tusa inagnaig tikitchakam jegantun chichajak: ‘Apuh ame kuichik sujusmayum duka, nuigtú cincoa imajin kawegke.’ ¹⁹ Tutai nunashkam aikasag chichajak: ‘Ameshkam cinco yaakta apuji atá’, tiuwai.

²⁰ “Tuja tikitchakam tajuntun chichajak: ‘Apuh, juuwai kuichkigmek jukita, jaanchi shiig ijian kuitamkamun itajuagme, ²¹ wika amek senchi takamtikagtakum waitkagkagtinaitam nuna dekagjame, nuigtush ame susachu ayatkum atantin, aikasmek ame ajak ajakmachbau aig, juukam yajumin asamin, ishamakun kuichkigminak takamtiksachmajai’, tau. ²² Tama ni ayaak: ‘Amek inak pegkegchauwaitme, amina chichamjuminig bakumattame, wi senchi takamtikagtakun waitkagkagtin, susachu ayatkun tikichnash atantin, aikasnuk wi ajachbaugnak ju waitiatkumesh, ²³ ¿wagka kuichik kawegti tusa egketainum egkeam ukugtuchamiume? Dutikauwaitkuminig wi wakitki taakun kawegkun jumain awajkajai’, tau. ²⁴ Tusa idayak tikich nui ijunun chichajak: ‘Aanú kuichkin takaka nu jujukjum, cien tsawantai takasá jumainun ikaugka nu susatajum.’ ²⁵ Tutai aents chichajuinak: ‘Apuh, niinuk cien tsawantai takasá jumain kuichik ikaugkamuji ajajama’, tuidau. ²⁶ Tujash wi tajime: ‘Ni kuashat ajá duka nuní dukap uwaetuka suwam atinai; untsu piipich ajá duka, nu piipich ajamua duke atantam atinai’, tiu. ²⁷ Nuna tusa idayak aents nui ijunun chichajak: ‘Mina, apu we tusa dakitjuju aina nunú juwi itanjum kajegtajum,’” tiuwai.

*Jisus Jerusalén apu wajasá wayaamu
(Mt. 21.1-11; Mr. 11.1-11; Jn. 12.12-19)*

²⁸ Juna tusa ashimak Jisus nagkaemaki Jerusalén weuwai. ²⁹ Nunik yaakat Betfagé tutai Betaniajai olivosan mujajin tikiju abaunum jegantatak wegak, Jisus ni jintintaijin jimajan awemak:

³⁰ —Wetajum au yaakat jegattak aents batsata awi, awi jegakmajum burro makichik aentskesh entsamchatai jigkaam wajau wainkattagme, nu atia jukim itagtuatajum. ³¹ Nu atiagmin makichik aentskesh: Wagka atiame tujamkujaish: Apu atsumau asamtai juwaji titajum, —tiu.

³² Tiajam Jisusa jintintaiji aidaushkam wegak, jegakmá ni tibaunak imatiksag betek wainkaju. ³³ Nunik jegantun atittaman burrugtin wainak:

—¿Wagka burrush atiagme? —tau.

³⁴ Tama dita aiinak:

—Apu atsumau asamtai juwaji, —tiaju.

³⁵ Dutika jukiag Jisusan itaantaju, dutikawag awantak nugkuagbaujin jukiag burro tuntupen aitkagmatai, Jisus ekeemiu. ³⁶ Nunik Jisus wetai, aents aidauk dita awantak nugkuagbaujin jintanum ainag emaidau. ³⁷ Nunikag olivosan mujají chapaibaunum jegantatak weenak, ashí Jisusa nemajin aidauk shiig dakujusag senchi jiikag

Apajuin emematuidau, Jisus ashí pegkeg takaamun wainkaju asag, nuninak:

³⁸ —¡Apajuí awemamu iina Apuji mina juuwai iina agkanmitkagmatna duka, nayaimpinum agkan batsata dushakam aantsag agkan batsamiagtatui! —wajaidau.

³⁹ Imatiagtai wajumak fariseo nui pachitkau aidau:

—Jintinkagtinuh, amina nemagtamin aidau imataina nu imattsuk itatjata tusa itatmitkajia, —tuidau.

⁴⁰ Tama Jisus ayaak:

—Dita itatiagtaik kaya aina ju pampaumain ainawai, —tiu.

Jisus Jerusalegnumia aents aidau egaagbau

⁴¹ Jisus Jerusalén tikiju wesa yaaktan wainak, aents nui bat-samin aidaun anentaimitus buutu. ⁴² “Jerusalegnumia aidautijum, wi agkanmitkamainaitjim nunú yamaikish dekawagminig, Apajuik agkanmitkagmamainai. Tujash atumek Apajuí awemamuapita tujtchaujum nuaduí, Apajuishkam dekamainchau etamkaje. ⁴³ Nunin asamtai atumnak tsawan tikima ishamain ajutjamtainaitjume, shiwajum kautjamkag yaaktagminak peegmak apagtamak, ashí yantamnum dakagmajag jetepakagtinaí. ⁴⁴ Dutijamainak atumnak ashí amupainak jeemnash ashí tsaikagtinaí, imatikamu asa makichik kayakesh tikich kayanum patamiukesh juwakchatnai. Atumek Apajuí atumin tajutjabau aigkish: Iina uwemtijamjatasampap tae, tusagmek dekaachu asagmin.”

Jega Apajuí ememattainum aents batsatun Jisus jiigbau

(Mt. 21.12-17; Mr. 11.15-19; Jn. 2.13-22)

⁴⁵ Nuna tusa idayak, Jisus wayau jega Apajuí emematku ijuntainum, nunik nui sujak batsamtatman jijjú. ⁴⁶ Dutika chichajuinak:

—Apajuí chichame agagbaunum: ‘Mina jegajuk Apajuí aujku ijuntaiyai’ tawa nuniaig, atum kasá aidau batsamtai awasaugme, —tiu.

⁴⁷ Nunik Jisusak jega Apajuí ememattainum kashí kashinig jintinkagtau. Nunitai sacerdote apuji, chicham umiktinun jintinkagtin, nuigtú judío apuji aidaujai wajuk maawajik tusag chichaidau. ⁴⁸ Tujash yupichu dutikmainchau dekapedau, kuashat aents aidaush ni chichagkagtamunak puyatjus antujuidau asagmatai.

20

Sacerdote apuji aidau Jisusan iniasagbau

(Mt. 21.23-27; Mr. 11.27-33)

¹ Jisus jega Apajuí ememattainum wayaa, yamajam chichama nuna aents aidaun jintintak pujujai, sacerdote apuji aidau, chicham umiktinun jintinkagtin, tikich judío apuji aidaujai utsanawajui. ² Nunikag Jisusan iniinak:

—¿Aminash ya jintinkagtuata tusash awetamae? ¿Yana chichame-nia jusha juniame? —tuidau.

³ Tama Jisus ayaak:

—Wishakam iniastajime, aigkatajum: ⁴ ¿Ya Juagnash yamijatjata tusash awemauwaita, Apajuik awemauwait, atsa aents aidauk awemauwait? —tau.

⁵ Tama utujimkag ditak pempeentunikiag chichainak: “Juagnak Apajuí awemauwai, tajinish, ‘¿Tujash wagka dekaskeapi tichau ainagme?’ tujamtata jama. ⁶ Tuja aents awemauwai tajinchakam, ashí ju aents aina juka: Juagkak Apajuí etsegtinai, tuidau asag kayai tukugmag mantamain ainawai”, tuidau. ⁷ Nunikag: “Dekatsji” timi tusag Jisusan jegaantag:

—Dekatsji, yatsu Juagnash yamijatjata tusash awemauwait, — tuidau. ⁸ Tiagtai Jisus ayaak:

—Ayú, wisha tichattajime yana chichamenia jutikaja nunak, —tiu.

Takau pegkegchau aidau pachisa augmattsamu
(Mt. 21.33-46; Mr. 12.1-12)

⁹ Junashkam Jisus aents aidaun jintintak augmatbau nagkama tau: “Makichik aents ajajin uvan ajakmakui, dutika wajumak aentsun: ‘Atum ju takastajum, dutikakjum minash sujustajum’, tusa susa ukuak weuwai dukap asan taamig tusa. ¹⁰ Nunik uva juut jegamtai, makichik inaken awemauwai, aents ajanum takaina nui jegamtai, uva neje susam jukí itagtuati tusa, dutikam jegattaman achikag suwi suwimainakua sutsuk wainak awagkiajui. ¹¹ Dutikawagmatai tikich inaken awemauwai, dutikam jegattaman, nunashkam suwimawag pegkegchau chicha chichajuinakua sutsuk wainak awagkiajui. ¹² Nuna dutikawagmatai ataktushkam kempatuma juna tikich inaken awemauwai, dutikamtaishkam ajanum takaina nu senchi suwimá, upu upujú jiikí ajapawajui.

¹³ “Dutikawagmatai dekas ajagtina nunú chichaak: ‘¿Yamaish utugkatjaki? dekas mina uchig anetaijua juna awetitjai, dutika ai nuna wainkag ajantus diischajaintash’ tiuwai. ¹⁴ Tujash ajanum takainak batsata nu uchi minittaman wainkag: ‘Auwai ju aja juna jukitnuk, dekas maa ajapami, dutika juka iinu emami’, tuidau. ¹⁵ Tusag achiká jukiag ajá ukumtikiag maawajui.

“¿Nunash ajagtina dusha itugmainaita? ¹⁶ Dekas ajagtina nu tajakug nunú ajanum takaina nunak kajeg utsaak, tikich aents aidaun susa idaimainai.”

Nuna Jisus tutai antukag:

—¡Duka tuke dutikamak achatnaitji! —tuidau.

¹⁷ Tiagtai Jisus ditan diyaak:

—¿Tujash wajina pachisaya Apajuí chichame agagbauwa nuwish: ‘Aents jegá jegamin aidau kayá ajapawajua nunú, kaya dekas jegá ichichkatin apututia iman wajasé’, tawa nunash tawa?

¹⁸ Aents nu kaya nui iyauk tsainkatnai, tuja kaya aentsnum iyaakug aentsnak tuke yuku ematnai, —tau.

¹⁹ Nuna augmatu tutai antukag: “Jutiinak tujamak tawai”, tusag sacerdote apuji aidau, chicham umiktinun jintinkagtin aidaujai achikta tuidau. Nuninayatak aents aidaun ishamainak dutikainachu.

Apú kuichkiji pachisa Jisus iniasbau
(Mt. 22.15-22; Mr. 12.13-17)

²⁰ Nuninak aentsun awemajui, iish pegkeg aina duke takainaji tusajum yunumkajum, Jisus makichik iniibau iniastajum, wajintuk tujamit nunikmatai tsanumjuja achiká Romanmaya apunum sujukmi tusag. ²¹ Tiajam ditashkam Jisusan jegajiang:

—Jintinkagtinuh, jutiik dekainaji amek dekas tutupit dekaskea duke jintinkagtame, aentsú imanjinkish etegkeatsme, Apajuí jinti dekaskea duke jintiame. ²² Nuniau asamin amina iniagme: ¿Roma apuji kuichkijish sumainkaih, atsa sumainchaukaih? —tuidau.

²³ Tama Jisus dita anentaibaujin shiig dekaju asa:

—¿Wagka minash tsanujatasagmesh wakejutagme?

²⁴ Iwaintugkakjua makichik kuichik. ¿Yana niimé dakumkaya daajish agagbauwaita?

Tama dita aiinak:

—Anka Roma apuji dakumkamui tuidau. ²⁵ Tiagtai Jisus ayaak:

—Roma apujinua duka nigki susatajum, Apajuinua dushakam Apa-juik susatajum, —tiu.

²⁶ Nuna Jisus ashí aents antuinamunum timatai, tsanumjujag achikta tuinakush dutikmainchau diisaju, nuninak nu aaja aikam, ayatak puyatjukag diidau.

Jakau nantagtin pachisa iniimsamu

(Mt. 22.23-33; Mr. 12.18-27)

²⁷ Juna tusa machik aig, wajumak saduceo aidau, jakauk nantagtaghtin ainawai tinu asag, Jisusan iniinak:

²⁸ —Jintinkagtinuh, Moisés papi agag ukugtamkiuwa nui: ‘Aents nuwan juki uchin akiitsuk jakamtaig, ni yachintin nuwan juki uchin akiimainai, dutika yachí uchijiya nunin emamainai’, tawai. ²⁹ Tuja nuniamunum, siete yachigbau aajakajui, nuanuiya nagkamchak iwai nuwedauwai, tujash uchinak akiitsuk jakauwai. ³⁰ Nunikmatai tikich yachi jukishkam, uchinak akiitsuk jakauwai. ³¹ Tuja kempatuma nu jukish, uchinak akiitsuk jakauwai, nuni nuninakua siete aajakajua duka, uchinak akiitsuk ashí jinawajui. ³² Nunikagmatai duwi pujus nuwashkam jakauwai. ³³ Siete aajakajua duka ashí nunak nuwatjaju aina duwish ¿dekas yana nuweg atinaita atak nantainamunmash? —tuidau.

³⁴ Tusa tiagtai Jisus ayaak:

—Ju nugka juwig aishmag aidauk nuwenainawai, nuwa aidaushkam aishinainawai, ³⁵ tujash uwemkaju aidau jakau nantajag, tuke pujustin aina nuwig makichkish nuwenbauk atsutnai, ³⁶ jatanash jakachgtinai. Ditak Apajuí aentsji nayaimpinum batsata nuninuk agtinai, ditak jakauwaitak nantakiaju asag Apajuí uchijí agtinai. ³⁷ Jakau aidau nantajagtinun pachis Moisés agajua nunú shiig dekamtijamui, Apajuí numi zarza tutai kegmunum chichaak: ‘Wika Abraham, Isaac, Jacob aina nuna Apajujiyaitjai’, tiuwai. ³⁸ Wagki ¡Apajuik jakau aina nuna Apajujiinchui, nigka iwaaku aidaun Apajujiyai! Apajuí diismak jakau aidaush iwaaku batsatainawai.

³⁹ Aatus timatai chicham umiktinun jintinkagtin aidau:

—Jintinkagtinuh yajau tichaume, —tuidau.

⁴⁰ Nuna timatai ataktuk iniaschajui.

Kristush yaá wegantukita tibau

(Mt. 22.41-46; Mr. 12.35-37)

⁴¹ Nuniagtai Jisus ditan iniinak:

—¿Wajuk asamtaiya Kristuk David wegantui tuinawa?

⁴² Davidchakam aikasag Salmosnum agak:

‘Apu mina Apujun chichajak, ekeemsata mina untsujuí;

⁴³ nunikamin wi amina shiwajum aidaunak, ame najamsa ekeemtaigmin ikaunmakmatai duwi ame diisminum', tiuwai.

⁴⁴ David Apug tujakua nuniaish ¿wajuk asaya David wegantush amainaita? —tau.

Jisus chicham umiktinun jintinkagtin aidaun pegkegchauji pachisa tibau

(Mt. 23.1-36; Mr. 12.38-40; Lc. 11.37-54)

⁴⁵ Ashí antú ijunainai niina jintintaiji aidaun chichajak: ⁴⁶ “Atumek kuitamamkatajum, chicham umiktinun jintinkagtin aidaun, nugkurai esagman nugkujag yujatan wakejin aina nunin aijum. Ditak aents kuashat ayamunum igkuntuinakush, eme anenjus kumpamjitnume tusa wakegainawai, nunisag jega ijuntainum utsanainakush, dekas apú ekeemtai shiig iwajamu aina imannum ekeemsatatus wakegainawai. Jistatin yuwamunmash, ekeemtai shiig iwajamunum ekeemsatatus wakegainawai. ⁴⁷ Nuwa waje aidaun jeenash atankiag, aents aidaun pegkegnap takainawa tujuttinme tusag, Apajuin au aujuinakua ukú yujau aina nunin aigpajum. Nunú aidaun imá senchi suwimkan jukiagtin ainawai.”

21

Nuwa waje ujunauch Apajuinu anentag egkeamu

(Mr. 12.41-44)

¹ Jega Apajuí ememattainum wiyakuch aidaun, Apajuinu atin kuichik egketainum anentag kuichik egkeamun Jisus wainkau. ² Nuniai makichik nuwa waje shiig ujunauch jimag kuichik cobre najanamun egkettamanash wainkauwai. ³ Nunik:

—Dekas tajime: Jujú nuwa waje shiig ujunauchitak tikich egkeawaja nuna nagkaesau kuichkin egkeae. ⁴ Tikich aidaun kuichik ampinun egkeenawai, tujash jujú nuwa waje ujunauchia juka ni sumasa yumainjinak ashí egkeae, —tiuwai.

Jega Apajuí ememattai tsayam atinai tusa Jisus etsegkamu

(Mt. 24.1-2; Mr. 13.1-2)

⁵ Jisusak tusa chichá wajaig, wajumak aents aidaun: Ju jega Apajuí ememattaya juka, kaya shiig pegkeg aidaun ekenjá jegamkayap, Apajuinu atí tusag anentag ikaunmakbauwai imatika iwajamuita, tusag augmatuidau. Nuniagtai Jisus chichajak:

⁶ —Atum ju imatiksa iwaja jegamkamu wainjum juka, makichik kayakesh ekenjamu aina nuwiyag juwakchatnai, ashí tsaikbau atinai, —tiuwai.

Nugka nagkantsaig wantinkagtin aidaun pachis Jisus etsegkamu

(Mt. 24.3-28; Mr. 13.3-23; Lc. 17.22-24)

⁷ Juna Jisus tutai iniinak:

—Jintinkagtinuh, ¿nunash wajutik dutikawagtin ainawa? ¿Nunú aidaun uminkatin tsawan jegattak wajataish, waji wantintinaita? nunú uajatkata, —tuidau.

⁸ Tama ni ayaak: “Kuitamamkatin atajum tsanugmajainum, kuashat aents aidaun mina daajun adaimasag: ‘Witjai Kristunuk, tsawantak jegawai’, wajagtinai, imatuinakuish dekaskeapi tusajum antugkaipajum.

⁹ Maaninawai tuinamu antitnaitjume, nuigtú maaniawagtatus pam-pandayamushkam, imaninakuish ishamkatin aigpajum, dekatkawk jujú aidauwá nagkaemagtinai, tujash nagkanmauk waamak achatnai.”

¹⁰ Tusa nuigtushkam: “Nugka yaignum batsamin aidau tikich nuninum batsatujai maaniagtinai, tuja nuninai nugka muunnum batsamin aidaushkam, mai imannumiajaig maaniagtinai. ¹¹ Senchi ugbaush ashí nugkanum atinai, yapagtash tepeatnai, nuigtú jata aentsun nagkaematug ijinbaush atinai. Nayaimpinmayashkam shiig ishamain wantinjatnai.

¹² “Tujash ju ashí wi tajim nu eke jegatsaig, atumnak achig-makag waitkagmasagtinai. Dutijamainak jega ijuntai aidaunum awaintamawag, nui jujamkiag aents achiká chimpitainum egkepawag, nui jujamkiag tikich apu aidaunum ejetamawag, nui inagkeapakiag apu dekas nugkanum inamin aidaunmash ejetamawagtinai, mina nemagtuidau asagmin, mina pachitus titinme tusag. ¹³ Tujash nuna dutijamainakuish, mina pachittsajum tikich ujamainuk yupichu ajut-jamiagtinai. ¹⁴ Nuniakjumes: ‘Wajintu chichaknuk ayamjumkatja’, tusagmek anentaimigpajum. ¹⁵ Wi atum chichaktinnak dekamtikat-naitjime, dutikamu asagmin atum chichataik, makichkish aigmamain-chau dekapigatinai. ¹⁶ Tujash atumi apa, yatum, pataim, kumpajum aina duke sujupakagtinai, dutijamawagmatai dita maamuk maam agtinai. ¹⁷ Atum mina nemagtin aidautigminak ashí aents aidau kajegtabiagtinai. ¹⁸ Imatijamainakush minaig datumtamain ainatsui. ¹⁹ ¡Wajiu wajastajum! Atum mina nemagtukbautak pujautigmek, pujut nagkanchau jukiagtin ainagme.

²⁰ “Suntag aidau Jerusalegkan tentea au wainkugmek, yaaktanak wamkeap tsaikagtatua titin atajum. ²¹ Nuna nuninakuig, atum Judea batsatutigmek mujanum pisagtajum. Jerusalén batsatutigmes yaaktak jijnajum ukuktajum. Tuja aents ajajin takaak batsatushkan, Jerusalén wakitkig waimainchau ainawai. ²² Duka Apajú Israelan suwimkan susatnai tusa agagbauwa nunú uminak imanitnai. ²³ Tujash nunú tsawantin nuwa ejamtin, nuigtú uchi amuntsuaku agtina nunak wait anentuinajai. Wagki Israel nugka juwig shiig senchi waitiamu atinai. Apajú suwimkan suwau asamtai. ²⁴ Maaniamunum maamush agtinai, dutikainak tikich aidaunak achijag, tikich nugkanum judiuchu aidau batsatbaunum kuashat yajuakagtinai. Dutikawag Jerusalén juwajunak, judiuchu aina nu inainak waitkagtin ainawai. Duti dutikainakua Apajú tibauwa nu jegatai idaisagtinai.

Apajú Uchijí Aentsmaga Akiinawuwa nu minitnuji tibau
(Mt. 24.29-44; Mr. 13.24-37)

²⁵ “Nuniamunum etsa, nantu, yaya aidaushkam yaunchkesh nun-ishtaiji nuninamu wainnatnai. Ashí nugkanmaya aents aidauk senchi ishiamiagtinai, nayants shiig senchi tsukatak uutbauji antuinak: Wajukawajik, wajagtinai. ²⁶ Imatainak jaka iyauke agtinai, nugkanum nagkaemaktinun anentaimtusag ishamainak, nayaimpinmaya machik-ish umuchmainchau aidaushkam buchitaidau asagmatai. ²⁷ Nunú imaniamunum wi Apajú Uchijiyaitkun Aentsmagan Akiinawuwaitag nuna, yujagminum pachitkau tsawan wajasan mina senchigjai minamun waitkagtinai. ²⁸ Nunú nagkamna imaninakuig atumek shiig

aneastajum: Waamkeap waitiag nuna Apajuí agkanmitkagmattaji, tusajum.”

Numi higuera pachis Jisus augmattsamu

(Mt. 24.32-35; Mr. 13.28-31)

²⁹ Junashkam Jisus augmatak tau: “Diistajum numi higuera, nuni-achkugmesh tikich numi esat dekatai aina dukesh. ³⁰ Atumek nuna duke betenkainakuig: Waamkeap esat nagkamnattawa, tusajum dekau ainagme. ³¹ Nunisjumek atumshakam ashí wi taja nunú imanisag uminag wegau wainkugmek: Apajuí ju nugka juwi inamjatnuk nampup wajatsuapi, titin atajum.

³² “Dekas tajime: Wi Jerusalegkan pachisan ashí tijim duka, yamai aents batsata jusha ashí jinuinatsaig uminkatnai. ³³ Nayaimpik nugka-jai megkaejatnai, tujash mina chichamjuk umintsukek juwakchatnai.

Umintsajum dakamsatajum tibau

³⁴ “Shiig kuitamamkajum umintsajum dakamsatajum, Apajuiyai anentaimtan datumtamain, nampet, ju nugka juwiya imá senchi anentaimtut aina nu tupanajum batsatkujum, wi pachiachmau minakui ishamjukaijum. ³⁵ Ashí aents aidauk chinamunum kuntin dekeemama numamtuk wajakgtinai. ³⁶ Atumek shiig umintsajum ashí tsawantai Apajuik aujú pujutajum, nunú ishamain nagkaemagtina nuanuish waitkats, wi Apajuí Uchijiyaitkun Aentsmagan Akiinawaitag nuna aents aidaun suwimkan susatasan minakuish, ajankas igkunkamnum.”

³⁷ Jisusak tsawai jega Apajuí ememattainum jintinkagtua, kiitaik Olivosa mujajin weejakuí. ³⁸ Nuniau asamtai kashikmasag jega Apajuí ememattainum aents aidauk kauntsagké aidau, jintinkagtamujin antukagtatus.

22

Jisus maami tusa chicham umigkamu

(Mt. 26.1-5; Mr. 14.1-2; Jn. 11.45-57)

¹ Jista pag lewadurajai pachimsuk inajua yutai Pascua tutai jegattak wajai, ² sacerdote apuji aidau, chicham umiktinun jintinkagtin aidaujai, aentsun ishamaidau asag, Jisus wajuk maawajik tusag chichaidau.

³ Nuniamunum Jisusa jintintaiji doce aina nuwiya Judas, Iscariote tuuta awagmatia nuna iwanch egkemtuau, ⁴ dutikam sacerdote apuji aidaujai, nuigtú jega Apajuí ememattain kuitamin aidaujai: Wajuk Jisus achiká sujumainaita, nuna pachisag chichasaju. ⁵ Nuna chichas umikag shiig aneenak: Kuichik akikmí, tusag ame dutikata akiktajame, tiajui. ⁶ Tama Judaschakam ayú tusa wajuk Jisusan aents atsamunum sujukajak tusa egau.

Pascuatin yuwatin umikbau

(Mt. 26.17-19; Mr. 14.12-16)

⁷ Pascuatin, pag lewaduragtuchu yuaku uwig aishmag tsakat maa yutai jegau asamtai; ⁸ Jisus, Pedron Juagjai awemak:

—Wetajum, nunikjum Pascuatin yuwatin umiktajum, —tiuwai.

⁹ Tuinam dita aiinak:

—¿Tuwí umiktí tusamea wakegame? —tuidau.

¹⁰ Tiagtai Jisus ayaak:

—Yaakat wayamunum makichik aishmag yumí aimak waketu wainkattagme, nunú pataetuktajum, ¹¹ nunikjum jeentin jeen wayaakui: 'Jintinkagtin chichagtamak: Agkantash awash wi mina jintintaij aidaujai Pascuatin yumainush, tujamae' titajum, ¹² tajumin ni inaktugmastatui yakí tesamu muun shiig umikbaun, nuanuí umiktajum, —tiu.

¹³ Tusa tiajam wegag Jisus tibaunak imatiksag wainkaju. Nunikag nui Pascuatin yuwatnunak umikajui.

Jisus inagnaku Pascuatin yuwamu

(Mt. 26.20-25; Mr. 14.17-21)

¹⁴ Yujumak yuta jegamtaí, Jisus mina chichameg etsegtugkatajum tusa etejamu aina nujai mesanum jegantag pekaamsajui. ¹⁵ Nunik chichaak:

—Senchi wakemajai, eke mantuinatsaig ju Pascuan atumjai ijunjan yuwatasan. ¹⁶ Dekas tajime: Atumjaig ataktuk jutikanuk Pascuanak yuwashtainitjai; atak Apajuí inabauji jegatna duwi yuwatin asan, —tiuwai.

¹⁷ Nuna tusa idayak umutai copanum ekeemtatman juki, Apajuin see tusa jintintaijin suwak:

—Ju copa juwiya ashí atum aidautijum uwagtajum, ¹⁸ dekas tajime: Ataktuk jutikanuk uva yumijinak uwagchatnaitjai, atak Apajuí inabauji jegatna duwi uwagtin asan, tiuwai.

Jisus, mina anentaimjutsajum yuwakjumek juní dutikatajum tibau

(Mt. 26.26-29; Mr. 14.22-25; 1 Co. 11.23-26)

¹⁹ Tusa idayak pagkan juki Apajuin see ti puuká, jintintaiji aidaun susa chichajak:

—Jujú pagka juka mina iyashig atumní mantamnatta nuna iwainawai, juka tuke jutiksagmeké atin atajum mina anentaimjutkujum.

²⁰ Tusa ashí yuwawagmatai umutai copanum ekeemtatman juki, nunashkam aikasag Apajin see ti:

—Ju vino copanum awa juka, mina Apag yamagman mina numpajuí atum uwemkatnun anagtamawajua nunú uminkatnun iwainawai:

²¹ Mina sujutkatta duka ju mesa juwig wijai eketui. ²² Tuja wi Apajuí Uchijiyaitkun Aentsmaga Akiinawaitag nuna, nuniktinai tusa agajajua nuna umiktasan wejajai, tujash jmina sujutkatta nuna imá senchi wait anentajai! —tau.

²³ Jisus tutai ni jintintaiji aidau pempeentunikiag iniinidau, yakí dutikati tusag.

Yaki dekas eme anentaish atinaita tiagbau

(Mt. 19.28; 20.25-28; 23.11; Mr. 9.34-35; 10.42-45; Lc. 9.46; Jn. 13.12-

15)

²⁴ Nuna tusag idayinak: Jutii ainag juwiwash yakí atakesh imá wagakush atinaita, tusag ditak pempeentunikiag pampandayidau.

²⁵ Tudayagtai Jisus chichajak: "Apu judiuchu aidauk aentsnak ditanua nunin emak inainawai, nuna dutikaidauk shiig takaawai tama au ainawai, ²⁶ tujash atumek nuninuk amaitsugme. Atum ainajum anuiya eme anentai atag takug, uchi eme anentsá diishtaya nunin anenmamain ainawai. Inamna dushakam aantsag tikichin takagna

nunin amainai. ²⁷ ¿Atumesh wajuk anentaimjume, mesanum eketa dukaih eme anentsá diitaish, atsa ajaama dukaih? Mesanum eketa nunuwai. Tujash wika yujumkan ajamauiwa numamtin wajasan, wi atumin ajampeajime.

²⁸ “Atumek wi shiig utugchatnum wekaekuish wijaig ijuntsajum yujasú asagmin, ²⁹ wi atumnak apu emaktinaitjime, mina Apag mina apu etiuwa dutiksanuk, ³⁰ dutikamu asajum wi inamtinaitag nuanuí atumesh mina mesajuí wijai yuwatnaitjume, nuniakjum Israelan uchijí doce aajakajua nuanuiya wegantu aidau inakjum, ekeemtai aidaunum ekeemsatnaitjume.”

Jisus Pedron ugtuktatme tusa ujakbau
(Mt. 26.30-35; Mr. 14.26-31; Jn. 13.36-38)

³¹ Jisus junashkam Pedron tiuwai:

—Simón, iwanch Apajuin segae, trigo pegatiama numamtuk atumin pegkegchaunum dekapjamsatatus; ³² tujash wishakam aminak segat-magme, minai kajintsá anentaibaujum mijakaim tusan, ame mina waintsamjai tujutmesh, ataktú minai anentaimjam tikich aidaush anentai ichichtugminum tau asan. ³³ Tama ni ayaak:

—Apuh, wika amina achigmakag egkepainakuish, nuniachkush mantamainakuish amijai jakatasan umintsan wekaejai, —tau.

³⁴ Tutai Jisus ayaak:

—Pedro, yamai kashia juwik atash eke shinatsaig, Jisusnak waintsamjai tusam kumpatumá ugtuktatme, —tiu.

Waitiakuish kuitamamain tibau

³⁵ Tusa idayak:

—Wi atumin chichagkagtuktajum tusan ishimkun, waji egkea juitaigmekesh, kuichik, sapat aidaukesh jukigpajum tusan ishiakuitjim duwish, ¿waji atsumjauwaitjume?

Tama dita aiinak:

—Apuh atsumjachamiaji, —tuidau.

³⁶ Tiagtai Jisus ayaak:

—Tujash yamaik waji egkea juitaigmeshkam jukitajum, espadajum atsugtamkuig, awantak pataká nugkutaijum sujakum makichik sumak-tajum. ³⁷ Yamaik, duwik Apajuin etsegtin aidau mina pachitus againak: ‘Aents pegkegchaujai betek maam atinai’, tibauwa nu minai uminkattawai, —tau.

³⁸ Tutai dita aiinak:

—Apuh, juwi jimag espada ajutjamui, —tiajui.

Tiagtai Jisuschakam:

—Maake idaisatajum, —tiuwai.

Jisus Getsemani pujusá Apajuí ausamu

(Mt. 26.36-46; Mr. 14.32-42)

³⁹ Tusa jinki weuwai Olivosan mujajin nui tuke weu asa, nunitai jintintaiji aidaushkam ashinkajui. ⁴⁰ Nuanuí wakag ni jintintaiji aidaun chichajak:

—Juwi pujusjum Apajuí aujú pujutajum, iwanch pegkegchau takastinme tusa dekapjamsainum.

⁴¹ Tusa ukuak nigka kanakí machik kuwaesag tikishmag pujus Apajuin aujak: ⁴² “Apawah, amesh wakegakmek wi waitmainaitag nu

agkanmitkajuata; tujash wi wakegamuk achati, ame wakegamu atí", tiuwai.

⁴³ Tusa aujai Apajuí aentsji nayaimpinmaya wantintuku Jisusan anentain ichichtugtatus. ⁴⁴ Jisus ni waittsatnujin shiig senchi anentaimtus, Apajuin senchi aujak numpan sekijai segaju, nunik nugká kitaidau.

⁴⁵ Jisus Apajuí augbaun inagnak jintintaiji batsakbaun jegantun diikmá, wake besemag dekapenak ane anentaimainakua kajig batsatun wainak:

⁴⁶ —¿Wagka kajiish batsatjume? Nantakjum Apajuí ausatajum, iwanch pegkegchaun takastinme tusa dekapjamsainum, —tiuwai.

Jisus achiká jukimu

(Mt. 26.47-56; Mr. 14.43-52; Jn. 18.2-11)

⁴⁷ Tusa Jisus eke chichaak wajai, ni jintintaiji doce aina nuwiya Judas daagtin kuashat aentsun saasá ni emjuk tajantau, Jisusan kugkuastatus. ⁴⁸ Dutikam Jisus ayaak:

—Judasah, Apajuin Uchijí Aentsmaga Akiinawk kugkuasmeap sujame, —tiuwai.

⁴⁹ Jisusan achikagtatus nudiagtai, niina jintintaiji aidau:

—¿Apuh, maaniattajik? —tuidau.

⁵⁰ Tusa tuinai, tikich nui ijuna nuwiya espadajin ukuini juwakug, dekas sumo sacerdote apuji inaken kuwishí untsujinian asankau.

⁵¹ Dutiktai Jisus:

—Maake, aikatsuk idaisatajum.

Tusa kuwishí asankamun juki ataktú anujtuk pegkeg awajtusui.

⁵² Nuna dutika sacerdote apuji, jega Apajuí ememattain kuitamin aidaujai niina achiktatus kauntau aidaun chichajak:

—¿Atumek kasa achiktasa utugmaina imatijuagmeap, espadak tinamdaekajum, numi aidauk takuinasuajum minitjuinagme? ⁵³ Wi kashí kashinig jega Apajuí ememattainum atumjai ijunnuweg duwikish jutikagmek achigchaw agmaugme. Tujash yamaik atum mina jutijuatnun iwanch atumin inapakui jutijagme, —tiuwai.

Pedro Jisusnak wainchaujai tusa ukbau

(Mt. 26.57-58; Mr. 14.53-54; Jn. 18.12-18, 25-27)

⁵⁴ Tuja Pedroskam ikaag pataetus wega wegakua sumo sacerdote jeen jegantú, ⁵⁵ nunik jegaa jí ikapajag anamainak batsatbaunum, niishkam nui ditajai anamak ekeemsau. ⁵⁶ Nunittaman makichik nuwa, apú inake tanta diikmá wainak dii wajatu, nunik:

—Jushakam Jisusjai wekaemajama, —tau.

⁵⁷ Tama Pedro chichaak:

—Nuwah, wika wainchaujai aunak, —tau.

⁵⁸ Nuna tusa machik eketaig, tikitchakam aikasag:

—Amesh Jisusa jintintaijitamjama, —tau.

Tama Pedro ayaak:

—Atsa, wichauwaitjai, —tau.

⁵⁹ Tutai idaisajam makichik hora tumain ekeemtatman tikitchakam aikasag:

—Dekaskenum jushakam Jisusa jintintaiya jama, Galileanmaya asa, —tuidau.

⁶⁰ Imatjuinam Pedroskam:

—Wika atum tajum nunak dekatsjai.

Tusa chichaak wajai, atash shinukuí. ⁶¹Nunitai Jisuschakam ayampá Pedron diisú, dutikam Pedroshkam Jisus chichajak: “Atash eke shinatsaig kempatumá ugtuktinaitme”, tibaun adeaju. ⁶²Nunik Pedro agaa jiinki senchi wake besemag dekapeg kajegmamak buutiuiwai.

Apu aidau Jisus maatajum tusa inamjamu

(Mt. 26.59-68; Mr. 14.5-65; Jn. 18.19-24)

⁶³ Jisus diyaku atajum tibau aidau dushikinak awatuidau.

⁶⁴ Dutikainak jiin epetkag chichajuinak:

—¿Dekakia ya awatamni? —tuidau.

⁶⁵ Tusag kuashat pegkegchaun chichajuinak waitkaidau.

⁶⁶ Imá imatikainakua tsawajag, judío apuji aidau, sacerdote apuji aidau, chicham umiktinun jintinkagtin aidaujai ijunjag Jisusan jukiag, chichaman inagnau batsatbaunum ejegawagmatai, iniinak:

⁶⁷ —¿Ame dekas Kristukaitam? tukagtita, —tuidau.

Tama Jisus ayaak:

—Wi Kristuitjai takuish, dekaskeapi tujutchattagme, ⁶⁸ wi atumin iniamash aigmaitsugme, nuigtush akupjumaitisugme. ⁶⁹ Tujash yamaya juwi nagkamsanuk wi Apajuí Uchijiyaitkun Aentsmagan Akiin-auwaitag nunak, Apajuí ashí senchigtina nuna untsujin ekeemsattajai, —tiuwai.

⁷⁰ Tutai pampanjag iniinak:

—¿Untsu amekaitam Apajuí Uchijim?

Tuinam Jisus ayaak:

—Dekaske atum tujutjum nuuwaitjai, —tiuwai.

⁷¹ Nuna timatai:

—¿Nuigtush ya etsegtukti tusaya dakainaji? ii dekas ni chichaamu antugkajama, —tuidau.

23

Jisus Pilatuwai ejegamu

(Mt. 27.1-2, 11-14; Mr. 15.1-5; Jn. 18.28-38)

¹ Chicham inagnatainum aents ijunag batsatuk ashí wajajag, Jisusan jukiag Romanmaya apu Pilato pujamunum ejegawaju. ² Dutikawag Jisusa tsanumjuinak:

—Jujú aents jutii nugken chichaman tsuwapak wekagas, witjai Kristunuk, Roma apujish kuichkik sumaitsui, tu wekagu asantai juwi itaaji, —tuidau.

³ Tiagtai Pilato iniak:

—¿Amekaitam judío aidau apujim?

Tama Jisus ayaak:

—Ame tujutam duka dekaske, —tau.

⁴ Timatai sacerdote apuji, nuigtú tikich aents tuwakú aina nuna Pilato chichajak:

—Wika jujú aentsnak makichkish pegkegchau dutikamunum bakumamainnak dekaagsujai, —tau.

⁵ Tutai nuní nagkaemasag:

—Tujash aanú aents aidaun jintintak dapamkagtú wekaenuwe. Nuniak Galilea nagkamas jintí jintinkagtakua juwish Judeanmash dutiksag dapamkagtú wekaewai, —awajuaidau.

Jisus apu Herodesai ejegamu

⁶ Jisus Galilea nagkama jintinkagtinuwe tabaun Pilato antuk:

—¿Dekas jujú Galileanmayachukaih? —tusa iniimu.

⁷ Tutai:

—Awiyyayai, —tuidau, Apu Herodesa inamtaijinia asamtai. Nuna tiagtai dekaa, Pilato Jisusan Herodesai awemauwai, niishkam nu tsawantin Jerusalén taa pujau asamtai. ⁸ Dutika ejetim Herodes Jisusan wainak shiig aneasu, kuashat tsawantai: Itugsanuk wisha aents dutikmainchau ni iwainag takaamunash wainkag, tusa wakegá pujú asa, ⁹ kuashat iniasu tujash nigka aikchauwai. ¹⁰ Nunitai nui sacerdote apuji, chicham umiktinun jintinkagtin aidaujai ijunaidau, wainak senchi tsanumjuidau. ¹¹ Imatiagtai Herodeschakam ni suntaji aidaujai, Jisusan aentschau chichajus dushikinak, jaanch pegkeg apu nugkutai aina ibaun anugkug, ataktú Pilato pujamunum awebau. ¹² Nuna dutikainak Herodesak Pilatojaig kumpamdayawajui shiwag pjuwaitak.

¹³ Ataktú itawagmatai, Pilato sacerdote apuji aidaun, tikich apu aidaun, ashí aents aidaujai ijunjau. ¹⁴ Dutika chichajak:

—Atum jujú aentsun dapampawai tusajum itagtuawagmin atumesh antagmin, atum pegkegchau tajum nuna iniasan dekajuatakamanush dekajuachmajai. ¹⁵ Nunisag Herodeschakam dekajuachu asa awagkimtai juwi itawaje. Nuniau asamtai, wika ni mantamnati tusanuk tumaitsujai; ¹⁶ ayatak asutiatajum tusan akupkatjai, —tiu.

¹⁷ Nunak ashí mijantin jista Pascua inagkeamunum, aents achikam egketaina nuwiya makichik jiikí idaitai asamtai tiuwai.

¹⁸ Tutai aents nui tuwak ijunuk ashí pampanjag:

—¡Waagkamek ancha akupkatame! ¡Dekas Barrabás akupkata! —awajuidau.

¹⁹ Duka Jerusalegnum Romanmaya apu dakituinaku pampandayamunum aentsú maú asamtai achikam egketu. ²⁰ Tiagtaishkam Pilatok Jisusan akupkata tau asa, ataktú awentsag ditan chichajak:

—Dekas Jisusan akupkatjai, —tau.

²¹ Pilato tutai nuní nagkaemasag senchi untsumkag:

—¡Achigtá! ¡Achigtá! —awajuidau.

²² Imatiagtai kempatuma juwishkam Pilato chichajak:

—¿Tujash wají pegkegchauna takasé jusha? wika ni pegkegchau takasbaunum bakumaku mantamnamainjinak dekagchau asan, ayatak asutiawagmatai jiktajai, —tau.

²³ Tutaishkam nuní senchi untsumkag, achinjati wajainak Pilatunak wagagkijau. ²⁴ Imatiagtai Pilatushkam:

—Dita tuina dutiksag uminkati, —tiuwai. ²⁵ Dutikak Barrabás, Jerusalegnum Romanmaya apu dakituinaku pampandayamunum aentsú maú asamtai achikam egkematman, nunú jinkiti tuidau asagmatai nuna jiyaak, Jisusnak dita tuina dutiksag umiktinme tusa sujuk idaisauwai.

Jisus achigbau

(Mt. 27.32-44; Mr. 15.21-32; Jn. 19.17-27)

²⁶ Tima Jisusan achigtatus juki emasag, yaakat Cirenenmaya Simón daagtin ajajinia minittaman, Jisus achigtin numi yapajia achiamun ayankaju. Dutikam Jisus eemak wetai, ukuunum yanas wegau.

27 Jisusan kuashat aents nemajus ashinainamunum, nuwa aidaushkam imanisag ukunum saegas, untsu untsumas buu buutuinaakua ashinaidau. 28 Imatiagtai Jisus nuwa aidaun ayampatua:

—Jerusalegnunia nuwa aidauh, minak eganjaigpajum, atumek egaamakjum uchijum anentaimtusjumesch buuttajum. 29 Tsawan jegagtamiagtina, nunikmatai: ‘Uchigtin aidautigmek uchigtuchu wasajsum, tikich nuwa kaga uchigtuchu muntsujinash amuntsuachu aidauk, yajau aneas batsatainatsuapita’, wajatin ainagme. 30 Imanik senchi waituinak mujá pagkajiag: ‘¡Mujah, yumpunkum ijijatuakia!’ awajiagtina. 31 Wi tudau takaschau aig, imatijuawag waitkajuinaish, ¿Apajuish wagkag tudau aidaunash waitkaschati? —tiuwai.

32 Jisusan jukiag, nuigtú jimag aents magkagtin aidaunashkam achijagtatus jukiag emaidau. 33 Dutikawag nain “buuk sakajua” nunina tutainum ejegawag, Jisusan achijag, magkagtin aidaunashkam achijajui, dutikawag makichik untsugnumanini awajuinak tikichnak menajinini awajawajui. 34 Dutikam Jisus chichaak: “Apawah, tsagkujata dekainachu asag, minak jutijuinawai”, tau.

Nunia suntag aidauk, yana kayajig jinkit nunú Jisusa jaanchjinak jukiti tusag wasugkamaidau. 35 Nuniamunum aents aidauk Jisusan dii ijuntuina, apu aidaush dushikinak:

—Tikichnak yajau uwemtikchawue, yamai niishkam dekas Kristu, Apajuí etegjamuitkug nigki akaiki uwemjati, —tuidau.

36 Suntag aidaushkam dutiksag dushikinak vino chujuinun jukiag aagtatus jegantag, 37 chichajuinak:

—Ame dekas judío apujiyaitkumek, akaikim uwemjakia, —awajuidau.

38 Tuja ni chaichenchakam griego, latin, hebreo chicham aidauiwai: “Juuwai judío aidau apujig”, tusa agatug adujtukajui.

Magkagtin aidau chichakbau

(Mt. 27.45-56; Jn. 19.28-30)

39 Jimag magkagtin achijam deta nuwiya makichik Jisusan pegkegchau chichajak:

—Ame dekas Kristuitkumek, aaní nematsuk amea akaikim, jutiishkam uwemtikagtujia, —tau.

40 Tutai nui tikich detau kumpajin aiká:

—¿Amek machikish Apajuik ishamatsmek, niijai betek achinjam nemasmesh? 41 Jutiik pegkegchau takasbaunum dekaskenum waitiaji; tujash juka pegkegchau takasbaujig shiig atsujui, —tau.

42 Tusa Jisusan ayampattsag:

—Jisusah, minash ame apu wajasam inamjattam nuniakmesh kaji-matjukipa, —tiuwai.

43 Tutai Jisus ayaak:

—Dekas tajame, yamaya juwik amek wijai nayaimpinum pujuttame, —tiuwai.

Jisus jakamu

(Mt. 27.45-56; Mr. 15.33-41; Jn. 19.28-30)

44 Etsa tutupit wajasú ai nagkamas ashí nugkanum suwe wajas, etsa dukap tegau aishkam imanisag asauwai. 45 Nunik suwe wajas ai, juga

Apajuí ememattainum jaanch ejaamu auk yakiin nagkamnas ichiinak jimaituk kanakuí. ⁴⁶ Nuniai Jisus senchi untsamak chichaak:

—Apawah, amina uwegmin mina wakanjunak idaijai, —tusa jakauwai.

⁴⁷ Nunik jakamtai, nuigtú kuashat nagkaemajun capitán wainak, Apajuin emematak:

—Dekas ju aentsua juka shiig pegkejai, —tau.

⁴⁸ Aents nui ijunas dii ijuntuidaushkam Jisus nunik jakamtai wainkag, wake besemag dekapenak waketuinak, detsepenak awatkiag weedau. ⁴⁹ Nuninai ashí Jisusa waintaiji aidauk, nuwa Galilea nagkamas, Jisusa saetusag yujajakú aidaushkam, ikaag ijunas Jisusan dii ijuntuidau.

Jisus ukusbau

(Mt. 27.57-61; Mr. 15.42-47; Jn. 19.38-42)

⁵⁰ Judeanum yaakat Arimatea tutai awa nuwiya José daagtin, niishkam apu chichaman inagdau aina nuwiya pegkeg aidaunak takaak pujau. ⁵¹ Nigka Apajuí minash inatjati tusa wakeyin asa, tikich aidau Jisusak mantamnati tiagtaish dakitjauwai. ⁵² Nuniku asa Pilatun jegají, Jisusa iyashin segauwai. ⁵³ Dutika, numi yapajiamunum Jisus nemattaman akakí sávana pujuí pempeag, kaya waa muun tai umikbau, makichik aentskesh ukuschamunum egkeauwai. ⁵⁴ Nunú tsawantak, tsawan ayamtai atin asamtai, ashí umintai aajakú.

⁵⁵ Nuwa Galilea nagkamas Jisusa nemajus yujasaju aidaushkam, José wetai pataetukaju, nunik wainkaju Jisusan wajuk ukusaje nuna, ⁵⁶ nunik waketug jegá kaunkag, Jisusa iyashí ukatkatnun shiig pegkeg kugkuin aidaun, nuigtú yakagtinnash najanawaju, dutikawag tsawan ayamtai tsawaju asamtai, ayamjaju chicham umiktinnum tawa nunisag.

24

Jisus nantakbau

(Mt. 28.1-10; Mr. 16.1-8; Jn. 20.1-10)

¹ Tumig tsawagmatai shiig kashikmasag nuwa aidau kugkuin nananamujin jukiag, Jisus ukusbaunum wegaju. ² Nunik jegakmag wainkaju kaya muuntai epenbauk ekemak atatman. ³ Dutika wainkag utuawaju, tujash Jisusa iyashinak wainkachajui. ⁴ Nunikag puyatkag ijunai, jimag aents winchamtinun nugkuaju ditai ayaumas wajaantaju. ⁵ Nuna wainkag senchi ishamainak, nugká tsunsumawag ijuntsamtai chichajak:

—¿Wagka iwaaku pujaush jakau ukutainmash egagme? ⁶ Juwig atsawai nigka nantakne. Adeagtajum ni Galilea pujus ⁷ chichaak: ‘Wi Apajuí Uchijiyaitkun Aentsmagan Akiinawaitag junak, achijuk aents tudaugtin aidaunum sujutkagmatai mantuawagmataish, kampakum-chik tsawantai nantaktinaitjai’, —tiuwa nunú.

⁸ Tama ditashkam yaunchuk, Jisus nuniktinaitjai tibauwa nuna adeajaju. ⁹ Nunik ukusmaunmaya waketug jegawag, ashí dita wainkamujinak Jisusa jintintaiji once juwakajua nuna ujakaju, aikasag ashí tikich aidaunashkam. ¹⁰ Duka ju aajakajui: María Magdalanmaya, Juana, tikich María Jacobo dukujiya nunú, nuigtú tikich nuwa aidaujai,

Jisusa jintintaiji aidaunak ujakajui. ¹¹ Nuwa tusa etsejiagtaish, wainak tu yujatsuash tusag, ditak dekaskeapi tichajui.

¹² Nuniagtai Pedrok jinkug tupi tupikakua Jisus ukusbaunum jengatá, tekená diikmá imá sabananak wainkau, nunik wajukamki tusa ane anentaimkawa jegá wakitkiu.

Emaús wetatman wantintukbau
(Mr. 16.12-13)

¹³ Nunú tsawantinig Jisusa jintintaiji jimag, yaakat yaijuch Emaús tutai, Jerusalén juwaki once kilómetro abaunum jegatatus wegaju.

¹⁴ Nunik weenak ashí Jisus dutikamun pachisag augmatuidau. ¹⁵ Nuna tuinak ditak tudayinai, Jisuschakam amainag ditajai ijunag ashinu.

¹⁶ Tujash ditak, Jisusapita tuinachu asag pachiakats ashinaidau. ¹⁷ Nuniagtai:

—¿Jintá wesagmesh, waji augmatkugmea wake besemjash ashin-jume? —tau.

¹⁸ Tutai Cleofas daagtin ayaak:

—¿Amesh Jerusalegnumiayaitkumek, waji nagkaemaki dusha dekatsum? —tau.

¹⁹ Tama Jisus ayaak:

—¿Wajuk awa? —tau.

Tutai:

—Jisus Nazaretnumia Apajuí etsegtin, chichamesh senchigtin, Apajuí senchijin wainchatai aidaunash iwainag, ashí aents aidaush wainainamunum takauwe, nuna ²⁰ sacerdote apuji aidau, tikich judiuti apuji aidaujai mantamnati tusag, Romanmaya aidaunum sujua idaisagmae, dutikamtai numinum achijag maawagmae. ²¹ Tujash jutiik: Niimpap Apu wajas, Israel aents aidautinak ashí iina shiwaji aidaunmash agkanmitkagmattaji, tusa dakauji. Nuna dutikawaja duka kampa-tum tsawan nagkaemawai. ²² Nuniamunum nuwa jutiijai yujau aidau kashikmas Jisus ukusbaunum wegaju, anentai jegagmainchaun

²³ Jisusa iyashin waitkachag, nayaimpinmaya aents wainka ajin: Jisusak iwaaku pujawai, tujamaji tusag wakitki kaunawag ujakakagmae.

²⁴ Tiagtai jutiijai ijunag yujau aina nuwiya Jisus ukusbaunum wejiag, nuwa tiagbaunak dutiksag Jisusa iyashinak wainkachag waketug kaunkagmae, —tuidau.

²⁵ Tiagtai Jisus ayaak:

—¿Wagka shiig anentaimtugjum dekaskeapi tumainchaush dekape-nagme, yaunchuk Apajuí etsegtin aidau ashí juniktinun pachis agajajua dusha? ²⁶ ¿Kristuk imatika waitkasa maam, ni inamtaijinig wayatnai tusa agagbauchukaih?

²⁷ Tusa, Apajuí chichamen agagbauwa nuna, Moisés agagbauwa nui nagkamas, ashí Apajuí etsegtin aidau agajajua nuna ujakaju.

²⁸ Nunik yaakat yaijuch Emaús jegamunum, Jisusak nagkaemaki wegau, nuní atushat wegau wajukmaina numamtuk. ²⁹ Nunitai:

—Dekas juwi jutiijai juwakta, kiyawai, —tuidau.

Tima nui ditajai juwakui. ³⁰ Nunik yujumkan yuwatatus mesanum jegantag pekaamsamunum, Jisus pagkan juki Apajuin see tusa puuká susaju. ³¹ Nunitai: Dekas Jisusapita tusag dekaawaju, nuninai ditajai eketu megkaekau. ³² Nunikmatai ditak pempeentunikiag:

—¿Wagkaik jintá minis Apajuí chichameg nuní awai tusa ujakui, shiig aneasua minimag duwish anentaimjaish diischamji? — tudayinau.

³³ Tamawaik Jerusalén waketug, Jisus chicham etseggkata tusa ishiaktin once aina nu, nuigtú tikich aidaujai ijunag batsatbaunum jegawaju.

³⁴ Nunik jegawagmatai:

—Dekas Jisusak nantakne, nunik Simogkan wantintuke, —tusag ujaidau.

³⁵ Tama ditashkam:

—Iish jintá wesá Jisus wainkamji, nunika jegá jegaa ajin, pagkan puuk amasmatai, dekas Jisusapi tusa dekaamji, —tusag etsejuidau.

Jisus chicham etsegtugkatajum tusa ishiaktinji etegjamu akatjamu (Mt. 28.16-20; Mr. 16.14-18; Jn. 20.19-23; Tak. 1.4-9)

³⁶ Nuna pachisag chichainak batsatai, Jisus ejapeen wajantá ditan kumpamak:

—Apajuí atumnash shiig agkan anentaimsa pujutan amastinme, — tiuwai.

³⁷ Tama ditak senchi ishamkaju, wakanchawashit tusag.

³⁸ Imaniagtai Jisus chichajak:

—¿Wagka minash wakanchawashit tusagmesh ishamjagme? ¿Wagka utujimsagmesh anentaimjutjume? ³⁹ Tusa:

—Wika Jisusaitjai, mina uweg dawegjai achikjum diigtustajum, wakanik nejesh ukunchish atsunai.

⁴⁰ Takug niina uwejen, dawenmashkam achiamu aajakua nuna ditan inaktusajui. ⁴¹ Dutikam shiig aneenayatak, dekaskeapi tumainchau dekapiagtai chichajak:

—¿Yumainuk atsugtamainawak? —tau.

⁴² Tutai namak achijuamun puukag, dapá yumijijai susaju,

⁴³ dutikam ditash wainainaig yuwauwai. ⁴⁴ Nunik Jisus:

—Juna pachisan atumjai pujusan, Moisés, Apajuí etsegtin aidau, Salmosnumash mina pachitus agajajua duka ashí uminkattawai tusan ujayajime, —tiuwai.

⁴⁵ Nuna aatus taku Apajuí chichamen agagbauwa nuna shiig dekamtikawajui, ⁴⁶ dutika nuigtushkam:

—Apajuí chichame agagbauwa nuwig, Kristuk waitkasa maam atinai nunikash kumpatum tsawanta juwí nantaktinai, ⁴⁷ nunikmatai niina daajin pachis Jerusalén nagkamas, ashí nugkanmash etsejiagtina, tudaujin idayinak tsagkugnagtinme tusag, ⁴⁸ atum ainagme ju ashí wainkaujum nunú etsejatin aidautigmek. ⁴⁹ Tujash yamaikik Jerusalegak juwaktajum, nuniagmin wi mina Apag Wakaní Pegkejin anagkagtuamua nuna awetitjime, ni senchimtijamawagtatui, —tiuwai.

Jisus nayaimpinum wakitkimu

(Mr. 16.19-20; Tak. 1.9-14)

⁵⁰ Juna ashí ujak ni jintintaiji aidaun yajuak, yaakat yaijuch Betaninanmanini weuwai, nunik nui Jisus uwejen takuí: Apajuí yaimpaktinme, tiuwai. ⁵¹ Tusa akateamuik yakí takuniuwai. Nunik nayaimpinum wakitkimtai, ⁵² ememati ukuinak, shiig aneasag Jerusalén waketajui. ⁵³ Nunikag juga Apajuí ememattainum kashí kashinig tuke ijuntsagké aidau Apajuín emematuinak.

Aatus atí.

YAMAJAM CHICHAM JUAN AGAGBAU

Kristu chicham dekaskea nunak itauwai

¹ Chicham dekaskea duka Kristui, nunú nugkash najannatsaig Apajuijai aajakuí, nunin asa niishkam Apajuike, nigki Apajuí wajukuíta nunash shiig dekamtijamauwai. ² Nagkamtinish nigka Apajuijaig tuke pujujakuí. ³ Apajuijai najankauwai ashí ii wainainag nunak, nunin asa ashí wají najankamu aina duka, makichkish shiig atsawai ditak najaneaku tumainuk. ⁴ Niinig pujutash aajakuí, nuniau asamtai, ni nunú pujutan aentsun inagkeatkiuwai, nunú tsaptin nugká tauwa nu, ii dekachbaunash dekamtijamauwai. ⁵ Ashí suwe aidaunak Jisus tsaptina nunú tsawan emauwai, imatikamu asa suwea dushakam tsaptina nunak depetmainchau dekapjauwai.

⁶ Apajuí makichik aentsun Juan daagtinun awemauwai yamijatjat-nun, ⁷ nunú Jisus tsaptina nuna pachis etsegtai, ashí aents aidaush dekaskeapi titinme tusa. ⁸ Juagkak Kristu tsaptina nu ajakchauwai; niinak Kristu tsaptina nuna pachis, aents aidaun ujaktí tusa Apajuí awemauwai, ⁹ nu ashí aents aidaun tsapmitkatnuk waamak taatin asamtai.

¹⁰ Chicham dekaskea duka Kristui, nunú nugkanum akiinawai. Nuigtushkam Kristuk najankauwai ashí najankamu nugkanmaya ii wainainag junak. Iman juwi taamtaishkam, juwapita Apajuí awemamuk tusajag dekaachaju ainawai. ¹¹ Dekas nugkanum niinbau aidau batsatbaunum tauwai, nunikmataishkam ditak pachikchajui. ¹² Ditanbauk dutikawagmatai, tikich aidau dita jukiag, niina chichamen etsegtai dekaskeapi tuinak, shiig wakejus antugkajui. Nu aents nunikaju aidaunak Apajuí uchijí emakui. ¹³ Ditak Apajuí uchijí wajasajua nunak, Apajuiya nu niina uchijí emakbau asag, ashí akiinaidautik, aentstí wakegamunum akiinainag nunin ainatsui.

¹⁴ Chicham dekaskea duka Kristui, nunú Aentsmaga Akiina jutiijai wajumchik mijan pujusuí. Jutii dekas Apajuí Uchijí tikima makichki-uchia nuna senchijig, ni dekas chichaamu, wait anenkagtamujiya nujai waitkabiaji. ¹⁵ Juan Jisusan pachis chichaak: “Wi atumin ujaakun mina ukujui minitta nunú, dekas mina nagkaetasuk atatui, nigka nagkamtinish tuke pujujakú asa, timayag duka juuwai”, tiuwai.

¹⁶ Ashí niina imanjiya nuwiyag pegkeg pujutak jukiuwaitji, nunika ajin tuke kashí kashinig yaimpakui. ¹⁷ Apajuik duwik chicham umiktinnak Moisesan susauwai, dutikam ni aents aidaun ujakuí, untsu yamaik anejatta duka chicham dekas chichata nujai, Jisukristuiya juwaji. ¹⁸ Apajuinak makichik aentskesh tuke wainchau ainawai, tujash niina Uchijí, ni aneetaiyya nunú, Apajuí nuninaí tusag shiig ujakpakaji.

Juan Yamijatín Jisukristu pachisa etsegtukbau
(Mt. 3.11-12; Mr. 1.7-8; Lc. 3.15-17)

¹⁹ Jerusalegnunia apu aidau, sacerdote, levita aidaujai Juagkan aentsun ishitkauwai: Dekas Kristukaitam, tusajum shiig dekaajuatajum

tusa. ²⁰ Nu tusa ishiakbau aidau jegají iniam, Juan shiig imagnis chichaak:

—Wika Kristuchuitjai, —tiuwai.

²¹ Tusa timatai awentsag iniinak:

—¿Dekas tujash yaitpa? ¿Apajuí etsegtin Elías aajakua dukaitam? —tuidau.

Tama Juan chichaak:

—Wika Eliaschawaitjai, —tau.

Timataishkam awentsag iniinak:

—¿Apajuí etsegtin taatna dukaitam?

Nu tamashkam:

—Atsa, duchauwaitjai, —tau.

²² Tutai ashí tujinkag:

—Wait aneasam amesh yaitpa dekaskesh nunú shiig ujabatkata, shiig dekaa jutii awetabiagma nu ujaktasa taji, dita amina dekagtamatatus wakejutpaidau asgmtai, —tuidau.

²³ Tama Juan ayaak:

—Wika makichik aents eemak taa, uwegshunum wekagas senchi jiká chichagkagtak: ‘Apu wekaesatnun jintan shiig iwajug esegak tutupit dakuégajama’ numamtuk, atumí anentaimish shiig iwajajum umiktajum ‘Apu minitin asamtai’, titinai tusa Apajuí etsegtin Isaías tiuwa nuuwaitjai, —tiuwai.

²⁴ Fariseo aidau aents ishiakbau Juangkan ausatatus jegajiag batsam-tuidau nuna timatai:

²⁵ —Tujash ame Kristuchu, Eliaskeshkam Eliaschau, Apajuí etsegtin taatnai timawa dukesh achayatkumesh ¿wagka aentsush yamiame? —tuidau.

²⁶ Tusa tama, Juan aiimak:

—Wika yumí yamijatjai, tujash tikich atum ainajum anuí makichik pujawai, yamaikik duka Apajuí awemamuapita tusagmek dekatsjume.

²⁷ Nigka duwik nagkamas tuke pujuwaitak mina ukujui patatkawai. Wika niya ibauchu asan, ni sapatji jigkamunakesh atitmaitsujai, —tiuwai.

²⁸ Nunak nugka Betábara tutai Jordán amain Juan yamijatak pujamunum tiajui.

Juan Yamijatin Jisus pachisa tibau

²⁹ Kashinia duwi Jisus minittaman Juan Yamijatna nu wainak: “Juuwai dekas Apajuí Uwigji,* ashí aents aidau tudaujin akikmak mantamnatta nunú. ³⁰ Juuwai atumin chichagkun: ‘Mina ukujui, tikich minitta nunuwai dekas mina nagkaetasuk, nigka duwikish tuke pujujakú asa’, timag duka. ³¹ Wikishkam niinak wainchauwaitkun yumí yamijatmajai, Israel aents aidauk ni wantintai, shiig dekaatnume tau asan, tiuwai.”

³² Nuna ti junashkam: “Wakaní Pegkeji pauma nunin wajas Jisusai ekeemtatman wainkabiajai. ³³ Nuniakuish wika niinak eke dekachbaijai yaita nunak, nuniai Apajuí yamijatjata tusa awetiuwa nu chichagtak: ‘Wakaní Pegkeji akaikí yaayai ekeemu wainkattame,

* **1:29** Judío aidauk ditá tudaujin tsagkugnagtasag, tuké uwijá uchijin aishmagkun maa apejakú ainawai. Juan Jisusan pachis: ‘Juuwai dekas Apajuí Uwigji’ tiuwa nunak, jutii tudaujin mantamnatin asamtai tiuwai.

nunú atatui Wakaní Pegkejijai yamijatjatnuk', tujutmayi. ³⁴ Wika nuna wainkau asan, dekas nigka Apajuí uchijiyai tajai", tiuwai.

Nagkamchak Jisusa jintintaiji aajakaju

³⁵ Kashinia duwi Juan Yamijatin ataktú jimag jintintaijijai wajai, ³⁶ Jisus nagkaemattaman wainak:

—Diistajum, auwai dekas Apajuí Uwigjig, —tiuwai.

³⁷ Nuna Juan tutai Jisusan nemajuinak, Juagnak ukukiajui. ³⁸ Nunik miniagtatman Jisus ukujin ayampá diikmá wainak:

—¿Atumesh wají egagme? —tíu.

Tutai dita aiinak:

—Jintinkagtinuh, ¿dekas amesh tuwí pujame? —tuidau.

³⁹ Tiagtai Jisus ayaak:

—Wegajai, awi wainkatajum, —tau.

Tima niijai ijunag Jisus pujamunum, etsa ashí akagu asamtai, nuwig kajigkaju.

⁴⁰ Nuna Juan Yamijatin takui antuka jimagti Jisus nemagkajuitag nuwiyag Andrés aajakuí, Simón Pedro tutaya nuna yachi. ⁴¹ Andrés Jisusan wainak, tikichnak tutsuk dekatkauk niina yachi Simogná weji:

—Yamaik Mesías wainkaji, —tusa ujakuí. (“Mesías” tawa nunak “Kristu” taku tawai.)

⁴² Nuna tusa Andresak Simogkan juki Jisus pujamunum ejegantai, Jisus wainak chichajak:

—Amek Simón Jonasa uchijiyaitme, tujash yamaik amina daagmik Cefas† atatui, —tiuwai, (nunak ‘Pedro’ taku tawai.)

⁴³ Kashinia duwi Jisus Galilea wekamá Felipen wainkauwai, dutika:

—Wegajai, mina jintintaig aminum, —tiuwai.

⁴⁴ Duka Felipek yaakat Betsaidanum Andrés Pedrojai pujuakua nuwiyag niishkam aajakuí. ⁴⁵ Dutikam Felipeshkam weuwei Natanaelan ujaktatus, nunik jegají ujaak:

—Duwik Moisés chicham umiktin aidaun agak, ‘Makichik aents Apajuí etegkamu nugkanum taatnun’ pachis agajua nunú dekas wainkamji, tikich Apajuí etsegtin aidaushkam dutiksag agakajui. Nunú aentsuk Jisusai, José Nazaretnumiaya nuna uchijí.

⁴⁶ Nunú tusa ujaam Natanael chichaak:

—¿Nazaretnumiash makichik pegkejash jijnmainkaihi? —tiuwai.

Tusa tama Felipe chichaak:

—Dekas wemí amesh wainkamnum, —tiuwai.

⁴⁷ Tima Felipejai juwakiag Jisus pujamunum jegantagtatus wetatman, Jisus wainak:

—Juuwai dekas Israel aents tsanumtanash tsanumainchauwa duka, —tau.

⁴⁸ Tama Natanael antugmamak:

—¿Minash tuwí waitkamume?

Tama Jisus ayaak:

—Wika aminak Felipesh tajutjama ujpatsaig, numi higuera wakentin pujamin wainkamjame, —tau.

⁴⁹ Tusá tama Natanael chichaak:

—Jintinkagtinuh, amek dekas Apajuí Uchijiyaitme, ametme Israelan Apujimek, —tau.

† 1:42 “Cefas” tawa nunak arameo chichamnum kayan tawai. Tuja Pedro tawa duka diistá Mt. 16.18.

⁵⁰ Tama Jisus ayaak:

—Higuera wakentin pujamin wainkamjame taja duwikik, ¿Dekas Apajuí Uchijimpapita tujutam? Tujash dekas juní nagkaemas iwainamu wainkattame.

⁵¹ Nuna ti nuigtú chichaak:

—Dekas tajime: Atumek nayaim ujanmatai Apajuí aentsji nayaimpinmaya aidau, wi Apajuí Uchijiyaitkun Aentsmaga Akiinawwaitag nuna, minai taawag waketuidau wainkagtin ainagme, —tiuwai.

2

Yaakat Caná nuwenbaunum Jisus yumin vino emamu

¹ Kampatuma nu tsawamunum nuwenbau Galilea nugkanum yaakat Caná tutainum au asamtai, María Jisusa dukujiya duka nui pujau. ² Jisuschakam jintintaiji aidaujai ipaamu asa, ditashkam wegajui. ³ Nuwenbau nagkamnamtai umuinamunum, vino abuekauwai. Nunikmatai María Jisusan chichajak:

—Vinunak amukaje, —tiuwai.

⁴ Tama Jisus ayaak:

—Dukuwah, ¿wagka minash dusha tujutme? Wi iwainmamkun shiig dekajuatnume tusan takamainuk eke tsawantak umintsui.

⁵ Tutai ajaamak yujaun María chichajak:

—Ni tujamtata duka imatiksagmek umigkatajum, —tiuwai.

⁶ Timatai nui seis buits kaya najankamunum, judío aidau yumin aimag, tuke dutiktai atí tibau asamtai, nijamajakú aina nu batsatu, nu buitsnumag cincuenta, setenta litros* tumain pimuidau. ⁷ Jisus ajaamak yujaun chichajak:

—Yumí shikigjum aanú buitsnum aimjatajum, —tiu.

Timatai ajamau aidaushkam yumin shikikag buitsnum aimjaju.

⁸ Imatika aimjagmatai:

—Yamai shikikjum deatkauk jista chichamja auwá susatajum, —tau. Tusa tima nunaa shikik susauwai. ⁹ Dutika susam jistan chichamjauk yumi vino emamunak dekatsuk uwag, pegkejan dekapjauwai. Inak yumin shikik aimkaju aidauk, yuminap jutikawa tusajag shiig dekaidau. Nuninaig jistan chichamja nu, nuwena nuna untsuká:

¹⁰ —Tikich nuwenaidauk yama nagkamchak pegkejan ajaamasag, aents senchi uwajagmatai, duwi vino imanchau ajamau agmae. Tujash amek nagkamchakum pegkeg ajamasmesh yamaish imanuk ajamame, —tiu.

¹¹ Juna jutikauwa nunak Galilea nugkanum yaakat Caná tutai awa nui, aents dutikmainchaun Jisus nagkamchak yumin vino emauwai, niina imanjin iwainmamkatatus. Nuna dutikamtai niina jintintaiji aidauk: Dekas Apajuí Uchijimpapita, tusa shiig dekaawajui.

¹² Nuna Jisus dutikamtai, ni dukují, niina yachi, ashí jintintaiji aidaujai ijunjag Capernaum jegawajui, nunik nui wajumak tsawantai batsamsajui.

Jisus jega Apajuí ememattainum aents batsatu jiijá ishiakbau
(Mt. 21.12-13; Mr. 11.15-17; Lc. 19.45-46)

* 2:6 “Cincuenta, setenta litros” tawa juka versión (DHH) tawai, tikich versión aidauk “dos o tres medidas” tuinai, tikichik “cien litros” tuidaush ainawai, nunin asag ashí pegkejak ainawai.

¹³ Judío aidau jistamtaiji, Pascua jegattak wajasmatai, Jisusak Jerusalén weuwai. ¹⁴ Nunik jega Apajuí ememattainum waikmá, baka aidau, uwig aidau, paum aidau sujuinak utsanawag, kuichkin yapajiin aidaushkam pekajaidaun wainkauwai. ¹⁵ Nunik nuwi duwap etsentsjamu atatman juki chapikmag, jiyaká iwiyag, jega Apajuí ememattainum batsatunak uwig aidau, baka aidaujaí ashí jiig ishimak, kuichkin yapajidaunashkam nagkimjuk nugká akaketuk, mesajinashkam shitaki ajuntug idayak, ¹⁶ paumá sujin aidau:

—Ju aina juka ashí agaa jiigtajum. Atumek, mina Apajun jeega juka waji sujutaig emaigpajum, —tiuwai.

¹⁷ Nuna tutai jintintaiji aidau Apajuí chichame agagbaunum: “Amina jeemnak senchi akasmatjai”, tusá agagbauwa nuna adeajajui.

¹⁸ Dutiktai apu aidau:

—¿Waji iwainakmea aents dekas chicham antugtai wajukea nunikmesh, aentsush aikamesh jiigmesh ishime? —tusa imatjuidau.

¹⁹ Tusá tama Jisus ditan chichajak:

—Ju jega Apajuí ememattaiya jujú tegaktatjume, dutikawagmin wi kumpatumchik tsawantaik ataktú jegamkattajai, —tiuwai.

²⁰ Tutai apu aidau:

—Ju jega Apajuí ememattaiya ju cuarenta y seis mijadai jegamkamua duká, ¿ame kumpatumchik tsawantaik jegamkattam? —tuidau.

²¹ Nunak Jisusak dekas jegan taku tichauwai; niina iyashin pachis taku tiuwai, maam kumpatumchik tsawantai nantaktin asa. ²² Jisus juna tiuwa nunak, niina jintintaiji aidaushkam ni mantamna nantakmatai, dekas niina iyashin takumpap tiuwaita tusag adeajajui. Nuninak Apajuí chichamen agagbauwa nuna, tuja Jisus tibauwa nunashkam dekaskeapi tiajui.

Jisusak ashí aents anentaibaunash dekawai

²³ Jisus jista Pascua tutain inagkeaktatus Jerusalén jegaa pujus, makichik aentsush dutikmainchaun iwainag takatai, kuashat aents aidau, dekas Apajuí Uchijimpapita, tiajui. ²⁴ Nuniagtaishkam Jisusak: Dekaskeap imagnis anentaimejutuina tichauwai, nigka shiig dita anentaibaujina waituidau asa. ²⁵ Nigka, tikich aents aidau, juka aentsuk nuní anentaimeinawai tusa ujatkatit tichauwai, ni aentsun anentaimejinak shiig dekaju asa.

3

Nicodemo Jisusan tajuamu

¹ Makichik aents Nicodemo daagtin fariseo aajakuí, ashí judío aina nui eme anentsá diitai. ² Nunú Nicodemo Apajuin pachis ausatatus kashi Jisusan jegajiuwai. Dutika aujak:

—Jintinkagtinuh, jutiik dekainaji dekas aminak Apajuí awetabiuwai, jutii aidautin jintintuati tusa. Apajuijai pujachuk aents dutikmainchau aidau, ame kuashat iwainajam takaam imatikag takamainchau ainawai.

³ Tusá tama Jisus ayaak:

—Dekas tajame: Aents wakanin akiinachuk Apajuí inamak amaitsui, —tau.

⁴ Jisus tutai Nicodemo iniak:

—¿Wajukaya aents muuntash ataktú wakitkish akiinmainaita? ¿Ataktú dukujin egkemkag nuaduí akiinmainait?

⁵ Tutai Jisus ayaak:

—Dekas tajame: Wakaní Pegkejiya nu egkemtuja pujutí yapagtu-achbauk, Apajuí inamtaijinig wayashtinai. ⁶ Aents akiiamuk aentsun uchijigke, untsu Wakaní Pegkejin akiinuk Apajuí uchijiyai, nunú Wakan egkemtugbau asa. ⁷ ‘Juna ataktú akiinmainai’, takuí wajukaik nunikaishni tusamek utujimsam anentaimipa, ashí betek ataktú akiin-mainai. ⁸ Daseg ni wakegamunum umpuawai, dutikak numi ishinbau antayatkuish, tuwiya minawa, tuja tuwí nagkaemakish wegawa duka dekashtayame. Ju shiig dekatsug juninke aents Wakaní Pegkejin akiinaushkam, —tiuwai.

⁹ Tama Nicodemo awentsag:

—¿Nunash wajukag nunikainta? —tusa iniau.

¹⁰ Tutai Jisus ayaak:

—¿Ame Israel aidau jintinnaitam ibauwaitkumek dusha dekatsum? ¹¹ Dekas tajame: Iik dekamu chichaaji, tuja wainkamu etsegi. Tujash atumek dekaskeapi tatsugme. ¹² Atum wi ju nugka juwiya pachisan tamash dekaskeapi tachautigmesh, ¿Itusagmek dekaskeapi titagme nayaimpinmaya pachisa chichaakuish?

¹³ “Makichkish nayaimpinmag wachau ainawai. Tujash Witjai nayaimpinmayan, Apajuí Uchijiyaitkun Aentsmagan juwi Akiinaunuk. ¹⁴ Moisés dapi dakumká najanamun uwegshunum yakí jiikua numamtuk, minashkam yakí jiihgagtin ainawai, wi Apajuí Uchijiyaitkun Aentsmagan Akiinauwaitag nunak, ¹⁵ dutijuawagmatai, ashí aents mina dekaskeapi tujutuidauk pujut nagkanchauwa nuna jukiagtin ainawai.

Apajuik aentstin imá senchi anempau asa uchijin awetugmauwai

¹⁶ “Apajuik ashí aentstin senchi anejatu asa, ni Uchijí makichkiuchia nunak awetugmauwai, ashí niina dekas Apajuí Uchijimpapita tusa niinig kajinas anentaimaidauk, waitut nagkanchaunmag wechatnume, ayatak pujut nagkanchaunum Apajuijai tuke pujustin atinme, tusa. ¹⁷ Apajuik Uchijinak ju nugka juwig aentsun suwimkan susati tusag awetugmachui, ayatak aents aidaun ayamjuk uwentikati tusa awe-tugmauwai.

¹⁸ “Apajuí Uchijiya nuna dekaskeapi tuinak, niinak umijuidauk waittanmag wechagtin ainawai, untsu niina dekaskeapi tuinachu, chichamenash umijuinatsu nunú waittanmag wegagtin ainawai. ¹⁹ Apajuí Uchijí ju nugka juwi taa, ditá tudauji aidaunak paan iwaintukajui, suwenum batsamaina numamtuk wajainamun. Dutikamaitak aents aidauk, tudau takatan imá senchi wakegaidau asag, Apajuí wakegamujiya nuna takainak tsaaptinnum pujumaina numamtuk wajamaina nuna dakitjaju asag, Apajuijaig tuke kanaak kanakagtin ainawai. ²⁰ Tudau takau aidauk tsaaptinnak dakituinawai, nunidau asag, wi pegkegchau takaamujun iwaintugkai, tusag tsaaptinnak tupantuinawai. ²¹ Tujash dekaskenum pegkeja nuna takaidauk, ditá takatjin paan iwainaktasag Jisusai mininawai, Apajuí wakegamun takasú asag.”

Juan kampakumá etsegkamu

²² Jisus juna tusa ukuak, ashí niina jintintaiji aidaújai Judea nugkanum wegajú, nui yamijatiagtai dukap tsawan pujusuí. ²³ Nuniai Juagshakam Enón Salimnum jegaattak awa nui pujus yamijatu, nui yumi au asamtai, ashí aents niini jegauk betek yamimakaju ainawai. ²⁴ Nunak Herodes Juagkan eke achiatsaig nunikajú.

²⁵ Nuanuí Juagká jintintaiji aidaú, judío apuji aidaújai, aentsush wajuk tudaujinash pegkemainaita tusag tudayinau, ²⁶ nunikag Juagkan jegaantag:

—Jintinkagtinuh, amijai Jordagkan amain pujubium nunú, ame mina ukujui minittawai tusam etsegmayum nu yamai yamijattai, kuashat aents aidaú nemajuinawai, —tuidau.

²⁷ Tama Juan chichaak:

—Apajú dutikata tichamuk aunak aikmait sui. ²⁸ Atumek shiig dekagtagme, wi atumesh ashí antuinagmin paan iwainakan, wika Kristuchuitjai, wika niina pachis etsegtukti tusa emtika awemamuitjai, tusan timayag duka. ²⁹ Makichik aents niina nuwe atinjijai wajas chichaagtai, niina kumpají antujak shiig aneas wajama nunisnuk, wishakam shiig senchi shiig anejai, nuna pachisag chichainamun antaknuk, aents aidaú shiig antujuinak niinak nemajuídaú asagmatai. ³⁰ Niinak kashí kashinig aents tuwajuinak eme anentiagtatui, dutikainak minak junik diijagtatui.

Yakiya tauwa nunú imá wagaakui tibau

³¹ “Yakiya tau asa nigka ashí nagkaekagtasui. Untsu wi nugkaya asan, chichaaknush nugkaya aidaunak pachisan chichaajai. ³² Nayaimpinmaya tauwa nu ashí ni wainkamujin dekas antukbaujijai pachis etsejui, nunitaish aents aidaú dekaskeapi tuinatsui. ³³ Untsu ni etsegbaun aents antujuk dekaskeapita tuidauk, Apajuinu dekaskea nunaap tawa tusag shiig antujuinawai. ³⁴ Apajú awemamua duka Apajuinak pachis chichaawai, chichamenash shiig etsegtawai, Wakaní Pegkeji ashí susamu asa. ³⁵ Apajuik niina Uchijin aneau asa, ni senchijinak susauwai ashí tikich aidaunash nigki diísti tusa. ³⁶ Apajú Uchijiin dekaskeapi tuidauk, pujut nagkanchaunum tuke pujusagtinai; untsu Apajú Uchijin dekaskeapi tuinachuk, Apajú suwimke shiig ishamain atina nui pujus waittsagtinai”, tiuwai.

4

Jisus Galilea wegaku jinkimu

(Mt. 4.12; Lc. 4.14)

¹ Fariseo aidaú: Jisus aents aidaú jintinbau, nuigtú yamiamu aidaú imá kawemai Juagdaun nagkaesau, tuinamun antukajú. ² (Jisusak yamijatjachu niina jintintaiji aidaú yamijatjaju ainawai.) ³ Nuniau asamtai fariseo aidaú nuna dekaje tabaun antugmamak, Jisusak Judeanak ukuak ataktú wakitki Galileanum weuwai.

Samarianmaya nuwajai igkunikbau

⁴ Nunik Samaria nugkanum nagkaemak, ⁵ yaakat Sicar tutainum jegaújai, yaunchuk Jacob ni uchijin Josen nugkan susauwa nui. ⁶ Nunik Jisus miná minakua senchi pimpikiu asa, Jacopan yumigmatji aajakua nui, etsa tajiastatak wegai, nu yumigmatnum ayaumas ekeemsauwai. ⁷ Nuniai Samarianmaya nuwa yumin shikiak tantamtai:

—Minash yumi ajamjusta uwagtajai, —tusa Jisus segauwai, ⁸ jintintaiji aidauk yaakat yutain sumaktasag wegaju ai.

⁹ Nu tusá segam nuwa Jisusan ayaak:

—¿Wagka minash ame judiuwaitkumesh, yumi ajamjusta tusamesh segatme, wi Samarianmaya aish? Judío aidauk Samarianmaya aidaujaig makichkish augdaichau ainawai, —tau.

¹⁰ Tama Jisus ayaak:

—Ame dekas wi Apajuí anentag awemamun, amina yumin segajam nunú dekajuamek, dekas tajame minashkam segatmainaitme, tujutkuminig wi dekas yumi pujut tuke atinun sukagtina nuna amamainaitjai, —tiu.

¹¹ Tutai nuwa chichaak:

—Apuh, ame yumi shikitai takaktsum aniaumesh, yumishkam initak awa aniaish, ¿wajiyai shikikam sujustasamea tame? ¹² ¿Ame ii muunji Jacob aajakua nunú nagkaesaukaitam? Ii muunji Jacob aajakua nu juna yumigmatnak ukugtamkiuwai. Niishkam ju yumigmata junak ashí ni uchijijai umujakuí, tagkujinashkam junak suujakuí, —tau.

¹³ Tusá tama Jisus chichaak:

—Ju yumia juna umauk, ataktushkam tuke kitajagtinai, ¹⁴ untsu wi yumi midauwa nu susam uwaju aidauk atakea duwish kitaagchatin ainawai, ayatak ni anentain tuke yumi pukuni jiiinama imaní ajamu asa. Nu aentsnumag yumi pujutan sukagtina duka tuke atinai, —tiuwai.

¹⁵ Tama nuwa:

—Apuh, nunú yumi minash sujustá, kitamakun yumin shikiakun waketjag imaní pujuig, —tiuwai.

¹⁶ Tutai Jisus chichajak:

—Weme aishum untsukam jukim juwi niijai tantata, —tau.

¹⁷ Tama nuwa ayaak:

—Wika aishinchauwaitjai, —tiuwai.

Tutai:

—Dekas tame, wika aishinchauwaitjai tame duka; ¹⁸ cinco aishum ajutjamajakuí, tuja yamai ajutjama dushakam amina aishumchauwai. Duwi dekas aishinchauwaitjai tame duka tame, —tau.

¹⁹ Nunú tama nuwa chichaak:

—Apuh, ame dekas Apajuí etsegtin diyajame. ²⁰ Ii muunji aajakajua nu Apajuin emematuinak shimujakmauk au muja auwai, tujash atum judío aidautigmek, Apajuí emematku ijunmainuk imá Jerusalegkak awai tinu ainagme.

²¹ Tutai Jisus ayaak:

—Nuwauchih, dekaskeapi tujutta, tsawan jegamtaig imá ju muja juwig, imá Jerusalegnumag Apajuk emematchatin ainagme. ²² Atumek ya emematjume dusha dekatsjume, tujamtai iik shiig dekau asa, Apajuí emematji, uwentikagtinuk judiunmaya atin asamtai. ²³ Yamaik tsawantak uminui, yamaya juwik mina Apajun emematuidauk, dekaskenum Wakaní Pegkeji tabauwa dutiksag emematiagtata nunú. Mina Apajuk aatus emematjitnume tusa wakegawai. ²⁴ Apajuik Wakani. Nunin asamtai niina emematin aidaushkam dekaskenum Wakani Pegkeji wakaiga dutiksag emematmain ainawai, —tiuwai.

²⁵ Tutai nuwa ayaak:

—Mesías* Kristu daagtin taatna nunak dekajai, ni taak ashí ujak-tinai.

²⁶ Tutai Jisus ayaak:

—Nunak wi amina augjam juuwaitjai, —tiuwai.

²⁷ Tusa nuwan aujak pujaun jintintaiji kaunkamá wainkag anentai jegagchajui. Nunikajash ¿wají pachismea nuwash augme? ¿Wagka augme? tutanakesh tichajui. ²⁸ Nunik kauntamtai, nuwak yumi shikitaijinak ukuak yaaktanun weuwai. Nunik jegaa aents aidaun ujaak:

²⁹ —Atumesh minijum diistajum, awi aents pujuma nu, wait-chauwaitak wi nunikbaugnak ashí ujatrame. ¿Yakita, Mesi-aschawashit? —tiuwai.

³⁰ Tutai aents aidaushkam, Jisus pujamunum jegajiagtatus ashin-tukajui. ³¹ Nuwa yaaktanun wematai, Jisusa jintintaiji aidau:

—Jintinkagtinuh, amesh yuwata, —tuidau.

³² Tama ni ayaak:

—Mina yutaijuk atum wainchamu ajutui, —tau.

³³ Tutai ditak pempeentunisajag:

—Tikichiashtutainash ajamsagma, —tuesdayinau.

³⁴ Tiagtai Jisus chichajak:

—Mina awetiu wakejamu umiamua nu, nuigtú ni takatji ashimjamua nuuwai mina yutaijuk. ³⁵ Atum chichaakjum: Ajak juutak eke ipaksumat nantu awai, tinu ainagme. Tujash wi tajime: Pagkai di-istajum, ajak ajakbauk uminag saigká, juumain wajas awai. ³⁶ Ju ajak juwaamun mina yaintuidaunak, wi ajakan ajakú asan, akiktatjai pujut nagkanchau tuke ajitnun, dutikam niishkam nunú juwaamun yainkau asa, shiig dakujus pujustinai wijai betek. ³⁷ Duwik chicham tibau awai: Makichik aents ajaawai, dutikamun tikich juwaawai, tibauwa duka waitchauwai. ³⁸ Wika atumnak, atum takasá ajakmachbaugmin juuktajum tusan ishiakbaijime, dutikamu asajum tikich ajakmamuk juukbaijume, —tiuwai.

³⁹ Nuna tutai niina jintintaiji aidaushkam yumigmatnum ayaumas pujusag chichaak pujuinai, nuwa yaakat jegaa: “Wi nunikbaugnak ashí ujatrame”, tusa etsegbaun antukag, kuashat Samarianmaya aents nunú yaaktanun batsataidauk, dekas Kristuapita tiaju ainawai.

⁴⁰ Nunikag Jisusan koutuawag: Juwi kanajam wetá, tusag segajui. Tuinam nui jimajá kanajui. ⁴¹ Nui pujus chichatai niina chichamen antuinak, nuní kuashat dekaskeapi tiaju ainawai. ⁴² Nunikag nuwan chichajuinak:

—Yamaik imá ame ujakatkamun duwikik dekaskeapi tatsuji, dekas jutiishkam ni chichaamuk shiig antugkaji, nunikaju asaja: Dekas juwapita ashí aents aidau ditá tudaujin suwimak jumainun ayamjuk-tina duka, tuinaji —tiajui.

Capernaumnumia capitani uchijin Jisus etsagagbau

⁴³ Samarianum jimajá kanag Jisus jiinki Galilea weuwai. ⁴⁴ Jisus junash pachis: “Apajui etsegtinuk niina nugkenigkik eme anentamak achauwai”, tiuwai. ⁴⁵ Galilea jegaamtai, nuwiya aents aidau shiig

* 4:25 Hebreo chichamnum “Mesías” tai, griego chichamnum “Kristu” tawai, nunak “Apajui Apu atinun etegka awemamu” tawa nunak taku tuinawai.

anentus jukiajui, Jerusalén pujus takaamun ditashkam jista Pascua tutain jistamainak jegawag ashí wainkaju asag.

⁴⁶ Ataktú Jisus Galilea nugkanum yaakat Caná tutainum jegauwai, duwik ni yumi vino emamunum. Nuwi tikich yaakat Capernaum tutainum makichik suntajá apuji uchiji jaak tepau. ⁴⁷ Nunú suntajá apuji Jisus Judeanmaya jiinki Galilea tae tabaun antuk, tajua igkug chichajak:

—Mina jegajuí tajutuam mina uchig ashí nagkanki tepegtima nu etsaentujata, —tusa segauwai. ⁴⁸ Tama Jisus chichaak:

—Aents dutikmainchau iwainamu waintsukek kakajus dekaskeapi tumaitsume, —tiuwai.

⁴⁹ Tutai suntajan apuji ayaak:

—Apuh, wait aneam, mina uchig tikima mayai nagkantsaig jegaam etsaentujakia, —tau.

⁵⁰ Tama Jisus chichajak:

—Wetá, amina uchigmik tsagaje, —tiuwai.

Tutai suntajá apuji Jisus tabaun dekas nuniktatuapi tusa wakitki-uwai. ⁵¹ Nunik waketkamá jintá ni inake minittaman igkugkui. Dutika igkugkam apujin chichajak:

—¡Amina uchigmik tsagagmae! —tusa ujakuí.

⁵² Tama:

—¿Etsash wajukeya tsagagmae?

Tutai inakshakam:

—Yau etsa tegawai bichatjame tsuweamunak, —tau.

⁵³ Tama uchí apajishkam anentaimjau:

—Jisus etsa nuní aimpap: “Uchigmek tsagagtatui”, tujutmae tusa.

Nunik suntajá apuji ni ashí patayijaí: Jisusak dekas Apajuí awemamui, tiajui.

⁵⁴ Jisus jimaja juna wainchatain iwainakua nunak Judeanmaya jiinki Galilea jegaa dutikauwai.

5

Aents wekaechau yumi ipiakbau Betesda tutainum pujaun Jisus etsagagbau

¹ Duwi pujus Jisus Jerusalén weuwai, judío aidau jistamiagtai pachinkatatus. ² Yaakat Jerusalén pegmagbaunum dekatkau wayamunum, waiti Uwijá Waitai tutainum, ayaumas tikijuch yumi ipiakbau hebreo chichamaik Betesda tutai aajakuí. Nuanuí uwet cinco aak pekaamu au. ³⁻⁴ Nunú aaknum kuashat aents aidau wainmachu, shutú, iyashí jaka ekeemjuktai aidaujui nugká tepetpet waigkag batsataidau. ⁵ Nuanuí makichik aents treinta y ocho mijadai jaa pujú tepau. ⁶ Nunik tepettaman wainak, kuashat mijadai nunisag tepenun dekau asa, Jisus jeganun:

—¿Tsagagtasamesh wakegatsmek? —tusa iniasui.

⁷ Tama jau ayaak:

—Apuh, yumi tagkittai yuminum ajunmain atsau asantai, tikich imá iyainawai, —tiuwai.

⁸ Tutai Jisus chichajak:

—Nantakim ainká tepetaijum jukim wetá, —tiuwai.

⁹ Tusá tamawaik nunú aentschakam tsagajui. Nunik ainká tepetaijinak juki weuwai, duka tsawan ayamtai aig nunikui.

Tsawan ayamtai chichamjukbau

Nunik wetatman tsawanchakam ayamtai tsawaju asamtai, ¹⁰ judío aidau, aents tsagajun chichajak:

—Ju tsawanta juka ayamtaiyai, nuniau asamtai amek amina ainká tepetaigmek jukimek wemaitsume, —tuidau.

¹¹ Tama ni ayaak:

—Tujash mina etsaentuju chichagtak, amina ainká tepetaigmek jukim wetá tujutmajamah, —tau.

¹² Tutai dita iniinak:

—¿Yae amina ainká tepetaijum jukim wetá tujabiush? —tuidau.

¹³ Tujash nigka: Jisusap etsaentugmae, tusagkesh dekachu, Jisusak weu asamtai, nuigtushkam kuashat aents asamtai dekaachui.

¹⁴ Dutikamu ajuma duwi Jisus, jega Apajuí ememattainum waikmá, ni aents etsagagbaujin wainkau, dutika chichajak:

—Nijah, yamaik tsagajam pegkeg wajasume, ankauwaitkum awagkimek tudauk takasaipa, jamayum nuní nagkaemasam jata jujutmamkim, —tiuwai.

¹⁵ Nu tusa tima aents tsagajushkam judío aidaun wejí: “Mina etsaentugma duka Jisusai”, tusa ujakajui. ¹⁶ Tusá ujakajam judío aidaushkam: Jisus tsawan ayamtai aig etsaegkagtuje, tusag egaidau.

¹⁷ Imatikam Jisus chichaak:

—Mina Apajuk yamai tsawanta juwish takaawai, nuaduí wishakam dutiksanuk takaajai, —tiuwai.

¹⁸ Nuna tutai judío aidauk kajegkag maata tuidau, tsawan ayamtai aig etsagaju asamtai, nuigtushkam: Wika Apajuijai betek takaajai, mina Apajuk Apajuiyai, tau asamtai dutikaidau.

Apajuí Uchijiya duke dutikmainuk

¹⁹ Nu imatjuinam Jisus chichaak: “Dekas tajime: Wika Apajuí Uchijí asan wi wakegamunak takamaittujai, ashí mina Apag takaamun wainag nunak takamainaitjai, nunuwai mina Apag wakegamuk.

²⁰ Nunak mina Apag anentu asa, jintinjawai nuní nagkaemasashkam shiig puyatjusa diyaam atí, tujutu asa. ²¹ Mina Apajuk aents jakaunash inanki ataktú pujutan egketug apugna ibau asamtai, wishakam wi wakejamugnak pujutan suwajai. ²² Apajuk aentsnak, ju uwemjati, tuja juka uwemjashiti tusag etejashtinai. Nunak ashí mina idaitugsauwai, ame duka dutikata tusa. ²³ Mina tujutiu asa mina antugtin aina dutijamsag, aminash antugtabiagti tusa ashí minaig idaisauwai. Tujutiu asamtai mina antugtuinachuk, Apag mina awetiuwa nunashkam antujuinatsui.

²⁴ “Dekas tajime: Wi tajim juna antuk, shiig dekaskeapita tusa taku mina awetiuwa nunash dekas niimpap awemauwaita tauk, ni jaakush suwimak jukí waitmainjinak ukuak, dekas pujut tuke atina nuna jukiag pujusagtinai. ²⁵ Dekas junashkam tajime: Aents yamai tsawanta juwi pujuidaush pujutjinig jakaujai betek ainawai, nuniai minak umigtak pujuidaok, wi Apajuin Uchijin minakun untsubaun shiig paan antugtugagtin ainawai, nu ainawai tuke pujusagtin aidauk.

²⁶ Apajuk shiig senchigtinai, iman asa nigki pujutan sukagtinuk. Ni

iman asa, wi niina Uchijí asamtai, minashkam nigki pujutan sukagtiti tusa sujusmayi. ²⁷ Dutijusag wi Apajuí Uchijiyaitkun Aentsmagan Akiinau asamtai, amek aents aidaushkam diistá ju uwemjati, tuja juka uwemjashti tusam tegjata, tujutiuwai. ²⁸ Juna wi tajim juka anentai jegashamin anentaimtigpajum. Tsawan jegatnai ukusbau aidau wi untsubaun antukag, ²⁹ aents pegkejan takasú aidauk, pujut tuke atina nuna jukiagtatus nantajagtina nunú. Untsu pegkegchaun takasú aidauk suwimkan jukiagtatus nantajagtinaí.

Apajuí awemamuitjai Jisus tibau

³⁰ “Wika wi wakegamunak takamait Sujai, mina Apag dutikata tujutbauwa dutiksanuk dutikajai, nunin asa wi dutikamua duka pegkejai, nuaduí wika wi wakejamunak takatsuk, mina Apag awetiu wakejamunak takaajai. ³¹ Wi wiki pachimasan nuninaitjai tusan etsegtumakuig, wainak tawai tujutmainaitjume. ³² Tujash awai tikich mina pachitus shiig etsegtuju, nunú mina pachitus etsegtuja duka dekas tawai. ³³ Atum mina pachittsajum dekatasajum, aents aidau Juan pujamunum awemauwaitjume, dutikam ni atum awemamun ujakua duka dekaske, wainkag tichauwai. ³⁴ Wika aents mina pachitus etsegtugkatnume tusanuk wakegatsjai, junak atum uwemjamnujum tau asan tajai. ³⁵ Juagkak lámpara ekemakam kegak tsaaptin emama numamtinuk aajakuí. Nuniau asamtai wajumak tsawanchik atumshakam dekas niina chichame wakejusjum antugkujum shiig aneejakuitjume. ³⁶ Juan etsegtugkauwa nunú mina iwaintawai, tujash nuní nagkaemas wi takasbauwa nu minak iwaintawai. Wi takaag nunak mina Apag dutikata tujutmawa nunak takaajai, nunú dekamti-jamainawai dekas mina Apag awetiuwa nunak. ³⁷ Nuigtushkam mina Apag juwi awetiuwa dushakam, mina pachitus shiig etsegtujui. Atumek ni chichaamujig antugchauwaitjume, waintashkam wainchau ainagme. ³⁸ Atumek niina chichamega duka umigtsugme, dekas Apajuí awemamuapi tujutchau asajum. ³⁹ Atumek Apajuí chichame agagbauwa nunú shiig kuitamsajum augjume, nuwiya pujut tuke atina dushakam jukitasajum, tujash nunú agagbauwa nuwig mina pachitus chichaawai. ⁴⁰ Nuniaig atumek minaiya dekas pujut jutak dakitajume.

⁴¹ “Tujash wika aents aidau mina eme anenjush chichagtitnume tusanuk wakegatsjai. ⁴² Wika atumnak shiig dekajime, Apajuí aneatsjum nunashkam. ⁴³ Wika mina Apag awetimtai juwig taajai, nuniaig atumek minak dakitjagme. Tuja tikich, awemachmaitak nigki nagkami minakuig, imá shiig anentsajum jumainaitjume. ⁴⁴ Atumek, imá atumek pempeentunisjum eme anendajakjum, Apajuí emematmaina duka pachiatsum aniautigmesh ¿itugsagmek mina chichamjush dekaskeapi tujuttage? ⁴⁵ Atumek ni Apajin ujatjamak bakug-mattawai tusagmek minak anentaimjutigpa. Wika bakumaitsumjime. Atumin bakugmatnuk Moisés chicham umiktajum tibauwa nunú umiktasa batsatsum nu bakugmattage. ⁴⁶ Tujash atum Moisés agagbauwa nu dekaskeapita takugmek, minash dekaskeapi tujutmain ainagme, nunak mina pachitus agajui. ⁴⁷ Moisés agagbau dekaskeapi tichautigmesh, ¿itugsagmek mina chichamjush dekaskeapi titagme?”, tiuwai.

6

*Cinco mil aentsun Jisus ayugkamu**(Mt. 14.13-21; Mr. 6.30-44; Lc. 9.10-17)*

¹ Nuna ti ukuak Galilea kuchají Tiberias tuuta awagmatia nuna amain Jisus katigkuí. ² Nuniamunum kuashat aents saetukajui, nigka aents dutikmainchaun takaak, jau aidaun etsagamun wainkaju asag. ³ Aents imaniagtai Jisusak mujanum waka, ni jintintaiji aidaujai ekeemsauwai, ⁴ Judío aidau jistamtaiji Pascua tutai tikiju wajasú ai. ⁵ Nunik nuwi ekeemas Jisus niimkamá shiig kuashat aents minidaun wainak, Felipeñ iniak:

—¿Yutaish tuwiya sumaktatji aents imanik miniina au ayugmai-nush? —tiuwai.

⁶ Jisusak ni dutikatnujinak shiig deokayatak, Felipeñ wajintuk aigkat tusa dekapeak tiuwai. ⁷ Nu tama Felipe ayaak:

—Doscientos kuichki pag sumaka, makí makichik aents imá imachik tinamash tuké jegamaitsui, —tiuwai.

⁸ Tutai tikich Jisusa jintintaiji Simón, Pedro tuuta awagmatia nuna yachi Andrés chichaak:

⁹ —Juwi makichik uchi cinco pag cebadajai najanamun, nuigtú jimagchik namakan takakui. Tujash junakeuchik imaan aents aina duka betek yumain ainatsui, —tiuwai.

¹⁰ Tusa tiagtai Jisus ayaak:

—Aents aidauk shiig pekaajum batsagtajum, —tiuwai.

Tiajam ditashkam dutiksag nui chijichi kuashat ayau asamtai, nuwig betek pekaa batsasajui cinco mil aishmag tumainun. ¹¹ Dutika umikagmatai Jisus pagkan juki Apajuin see tusa, ni jintintaiji aidaun tinabiuwai, dutikawajam dita aents aidaunak ashí imatiksag tinabi-ajui. Dutiksag namaknashkam aents wakegainamujinak imatiksag tinamkajui. ¹² Aents shiig yuwawag ejemakagmatai, Jisus jintintaiji aidaun chichajak:

—Pag ampinka duka yajuaktajum, wainak utsankai, —tiuwai.

¹³ Tiajam ditashkam, cinco pag cebada najanamun puujá tinamkamua nuna yuwinak, ampigbau aidaunak yajuakag doce chagkinnun aimja-jui. ¹⁴ Dutikawagmatai aents aidaushkam, Jisus aents dutikmainchaun dutikau asamtai chichainak:

—Juka dekas Apajuí etsegtin ju nugka juwi taatnai timawa nuuwai, —tuidau.

¹⁵ Nuna tuidau asag aents aidauk: Jisus dakitaigkishkam ijuuntuja jukí, iina apuji emá apusami, tuinamun Jisus dekaa, jiinki ataktú muja yakí jiiatkaunum nigki wakauwai.

*Jisus yumí awanken wekaesá webau**(Mt. 14.22-33; Mr. 6.45-52)*

¹⁶ Nunikmatai, Jisusa jintintaiji aidauk kiyau asamtai, kuchanum ut-saanawajui. ¹⁷ Nunikag botenum chimpimjag kuchanum Capernaum katigkagtatus shimuidau. Kiyag suwe wajasú aigkishkam Jisusak tatsuk megkaekau asamtai, ¹⁸ ditak ashinainai, dase senchi dasentak, kuchanak senchi tsukatmitkau. ¹⁹ Imatikamaitak seis kilómetros amainun kuwagainai, Jisus yumí awanken wegagas boten adjikkattak minittaman wainkajui. Nunik wainkag sapigmaidau. ²⁰ Imaniagtai Jisus chichaak:

—¡Witjai ishamjukaigpajum! —tiuwai.

²¹ Nuna timatai shiig anentus botenum egkejag jukiag, machik wesag wamkes dita jegatasa wegamunmag anuumkajui.

Jisusan egakagtatus ashinkagbau

²² Kashinia duwi aents kuchá amain batsataidauk, Jisusa jintintaiji aidauk imá makichik bote tepaun jukiag weenak, Jisusnak jutsuk ditak ashinkamun adeajaju. ²³ Nuniamunum yaakat Tiberiasnumia bote aidaun, Jisus Apajuin see tusa pagkan puujá, aents aidaun ayugkauwa nui, tikiju anumkajui. ²⁴ Nunikagmatai Jisus ni jintintaiji aidaujui nui atsuagtai, nunú bote anumkauwa nuwig chimpimjag Capernaum wegajui, Jisusan egakagtatus.

Jisus witjai yutai pujutan sukagtinnuk tibau

²⁵ Nunik kuchá amain katigkag nui Jisusan wainkag:

—Jintinkagtinuh, ¿wajutiya amesh juwish katigmaume? —tusag iniidau.

²⁶ Tama Jisus ayaak:

—Dekas tajime: Atum mina egatuinajum duka, wi aents dutikmainchaun iwainakan dutikamag dui, iina dekamtijamatasampap aikag-mae tusa dekachiatkujum, wi pag tinamim shiig ejemakaju asajum egatjume. ²⁷ Yutái dukap atsuk ashimdauwa duka anentaimtigpajum. Dekas anentaimtustajum yutai abuechau tuke pujutan sukagtina nu jukitasajum. Nunak wi Aentsmagan Akiinaun, Apajuí mina Apajua nu: Ame duka dutikata, tusa inatjau asantai amastatjime.

²⁸ Timatai aents aidaun iniinak:

—¿Wají dutikmainaita Apajuí wakejamu umigkatasais? —tuidau.

²⁹ Tiagtai Jisus ayaak:

—Apajuik atumnak, wi awemag juna dekas Apajuiyap awemae tusag niinak anentaimtiagtinme tujamjume. Nuuwai ni wakejamuk.

³⁰ Tutai:

—¿Tujash amesh wají wainchataish iwainagmae takaame, jutiish nu wainkaja dekas Apajuí awemamu asampap aikawa tumainush? —tusag iniinak, ³¹ —jutii muunji duwik batsamajakajua dushakam yutai maná tutain yuujakú ainawai, Apajuí chichame agagbaunmashkam nuna pachisag, nunak ‘Apajuí nayaimpinmaya pagkan akaketujakú’, tawai —tuidau.

³² Tiagtai Jisus ayaak:

—Dekas tajime: Moiseschauwai nayaimpinmaya pagkan aentsun akaketkauk. Mina Apajui yutai dekas nayaimpinmayan sukagtau, ni dutikauwai. ³³ Nayaimpinmaya akaiki ju nugka juwi taa puja nuuwai, ashí aents nugkaya aidaun pujutan susatnuk. Nuuwai pag Apajuí sukagtamuk.

³⁴ Tutai:

—Apuh, nunú pag dekas tuke pujutan sukagtin tame duke sukagtita, —tuidau.

³⁵ Tiagtai Jisus chichaak:

—Witjai yutaiya numantin pujut tuke atinun sukagtinnuk. Aents minai minidauk tuke yapajuashtin ainawai. Nunisag aents mina dekas Apajuiyap awemauwaita tujutushkam tuke kitaagchagtinai. ³⁶ Tujash

duwik timajim dutiksanuk yamaishkam tajime, atumek minak waitiatkujum: Dekas Apajuí awemamap tae, tusagmesh dekaskeapi tujuttugme. ³⁷ Ashí mina Apag ikautjamu minaig kaunainawai; aents minai kaunaidaunak jiiknuk ajapmaitsujai. ³⁸ Wi nayaimpinmayan ju nugka juwi taag nunak, wi wakegamugnak takastasanuk junikchamjai. Wika mina Apag awetiuwa nunú wakejamun takastasan tauwaitjai. ³⁹ Mina Apag awetiuwa duka ashí aentsun wi niina suwag nunak, imatiksag shiig kuitamas, makichkish emegkautsuk, jakagmataish tsawan dekas nagkanbaunum nigki inanjatin atí tusa wakejutawai. ⁴⁰ Mina Apajuk, wi ni Uchijitag juna waitkag, dekas kajinas anentaimaidauk tuke pujustin atinme tusa wakegawai. Nunú aents aidau nak jakagmataishkam, tsawan nagkanbaunum wiki inanjagtinaitjai, —tiuwai.

⁴¹ Jisus: “Witjai yutaiya numamtin pujut tuke atinun sukagtinun nayaimpinmayan taunuk”, tibaun pachis judío aidau pampantuinak:

⁴² —¿Ju Jisus José uchijiyae duchaukaih? Juna apají niina dukujijai jutai shiig wainnuweg jamah, ¿wagka nayaimpinmayan akaikin nugkaa taajai tusash tawa? —tuidau.

⁴³ Tiagtai Jisus chichaak:

—Wi timajim duka pampantsuk idaisatajum. ⁴⁴ Makichik aentstigmekesh mina Apag wakemithkagmashkuig, atumek wakekagmek minaig kaunmaitsugme. Aents minak jikatjus kautjuidaunak, nugka nagkanbaunmash inankin uwemtijatnaitjai. ⁴⁵ Apajuí etsegtujakú aina nu agagbaunum: ‘Apajuí taa ashí jintinkagtinaí’, tabau awai. Nuaduí ashí mina Apajun antujuidauk niiniyan unuimajag, minai kaunainawai.

⁴⁶ “Mina Apajun wainkaju asagkesh nuninatsui. Imá wikitjai niina shiig wainnunuk, niijai pujaun juwi miniu asan. ⁴⁷ Dekas tajime: Mina, dekas Apajuí Uchijimpapi tusa dekaskeapi tujutuk, pujut tuke atina nuna jukiagtinaí. ⁴⁸ Witjai yutaiya numamtin dekas pujut tuke atinun sukagtinuk. ⁴⁹ Yaunchuk atumin muunjum aidau uwegshunum batsanum, maná nayaimpinmaya kakegun juuká yujakajush batsatainatsui, jinawaju ainawai. ⁵⁰ Tujash junak yutai manaya nuna pachisnuk tatsujai. Wika nayaimpinmayan akaikin aentsnum tau asan, mina nemagtuidauk pujutan jukiagtinme atakesh jakachmig tuinakjag tusan tajai. ⁵¹ Witjai yutaiya numamtin pujut tuke atinun sukagtin nayaimpinmaya akaikiunuk. Jujú pagka juna yuwauk tuke pujutnui. Wi yutai sukagtittag duka mina iyashjuke. Nunak ashí aents juwiya aidaush pujut tuke atina nuna jukitnume tau asan dutikattajai.”

⁵² Nunú tabaun judío aidau antukag ditak chichainak:

—¿Utugkaya nunash niina iyashinianakesh yutai jukish yuwatajum tusash sukagtumainaita? —tusag pampantuidau.

⁵³ Tiagtai Jisus ditan chichajak:

—Dekas tajime: Atum Aentsmaga Akiinawuwa nuna iyashinia yuwachkugmek, umutash niina numpe umachkugmek, tuke pujuta duka jukishtinaitjume. ⁵⁴ Aents mina iyashjun yuwak, umutnash mina numpajun umauk, pujut tuke atina nuna jukiagtinaí; nuniku aidaunak tsawan nagkanbaunmashkam wi inankiagtinaitjai. ⁵⁵ Wagki mina iyashjua nuuwai dekaskenum yutai shiig ichichmamtan sukagtina

duka, antsagke mina numpajua dushakam. ⁵⁶ Mina iyashjun yuwak, umutnash mina numpajun umauk, dekas wijai ijutkau ainawai. Nunidaujaig wishakam ditajai pujajai. ⁵⁷ Apag mina awetiuiwa nuwi dekas pujutak awai, nuniau asamtai wika niijai pujajai, wi wajukeyag nunisag aents minaiyan yuwidaushkam wijai pujusagtina. ⁵⁸ Wika junak pag nayaimpinmaya nugkaa akaikiuwa nuna pachisan chichaaajai. Jujú yutaig atumin muunjum duwik maná tutain yuujakú aina nuninchauwai. Tujash nuna yuwawaju aidauk ashí jinawaju ainawai, untsu ju yutain yuwidauk tuke pujusagtina.

⁵⁹ Jisus juna pachis jintinkagtuauwa nunak, yaakat Capernaum jega judio ijuntaijin wayaa jintinkagtuauwai.

Chicham pujut tuke atina nuna sukagtin

⁶⁰ Nunú tu jintinkagtamun kuashat niina ijuntú yujaidau antukag:
—Juna tawa duka shiig dakitmainai ¿yaki nunash antugkati? —tusag ashishmatuidau.

⁶¹ Nuna tiagtatman Jisus dekajua:

—¿Wi tajim duka atumnak shiig awajtamkachajek? ⁶² Atumesh wi Aentsmaga Akiinawaitag juna nayaimpinum mina duwik pujutaijua nui, ataktú waketbau waitkugmesh, ¿wajuk anentaimtugmainaitjume? ⁶³ Dekas Wakaní Pegkejiya nuuwai pujut tuke atinun sukagta duka, tuja wi timajim nunak minaig kajintsá anentaimsatajum tusan timajime, nunak wika dekas mina iyashig yuwatajum tusan tichamjime. Wi atumin timajim nunuwai Apajuinumiag, nuigtú pujutnash sukagtina duka. ⁶⁴ Nuniaigkishkam atum ainajum anuiyatijum, dekaskeap nunak tawa tichamin anentaimaidautigmeshkam ainagme.

Nunak Jisusak, duwik yama nagkamchak niina jintintaijin etegjauwa duwik ya dekaskeapi tuinatsua, nuigtush ya sujama atinaita nunashkam dekaajakuí, nunin asa tiuwai. ⁶⁵ Nuigtushkam ekesag tiuwai:

—Atum mina dekaskeapi tujutuinchu asagmin, makichik aentstigmekesh mina Apag wakemitkagmachkuig, minaig tamaitisugme timajime.

⁶⁶ Nuna timatai kuashat aents niina ijuntú yujajuidauk tuke tupan-tuinak ukukiajui. ⁶⁷ Nunikagmatai Jisus ni jintintaijin doce aina nuna:
—¿Atumesh anka wetasajum wakegatsjume? —tau.

⁶⁸ Tutai Simón Pedro ayaak:

—Apuh, ¿jutiish yaayaig wetaji, ame chichamjum pujut tuke atinun sukagta aniaish? ⁶⁹ Jutiik ame tame duka dekaskeapi tuinaji. Nuniau asá shiig dekaji, amek Kristuitme Apajuí pegkegma nuna Uchijí, —tiuwai.

⁷⁰ Tutai Jisus ayaak:

—¿Wichaukaitag atum doce ainajum nuna etegjaunuk? Dutikamu ainajuminig anuig makichik iwanch pachitkawai, —tiuwai.

⁷¹ Jisus tiuwa nunak Judas Iscariote, Simogka uchijiya nu niijai wekaenaitak pempeentuki sujam atin asa tiuwai.

7

Jerusalén wetsuk Galilea pujusbau

¹ Juna tusa idayas Jisusak Galileanmag wekaesauwai, Judea nugkanmak wetsuk, nuwiya aidau maata tabaa asa. ² Tujash judío aidau ditá

muunji uwegshunum aakmaja yujajakbau anentaimtusa jistamtaiji tsawan jegattak wajai, ³ niina yachi chichajuinak:

—Amek juwig juwatsuk, Judea nugkanum jintintaijum batsata nui wetá, ditash ame takaamugmin wainkatnume. ⁴ Aents ni takaamun iwainagtatus wakegawk uukag takachu ainawai. Ju ame takaam imag takaakmek, ashí tikich aents aidaush wainainamunum takastá, —tiajui.

⁵ Nunak niina yachi aidaukesh: Dekas Apajuí awemamuapi, tusag dekainachu asag tiajui. ⁶ Nunú tama Jisus chichaak:

—Apag mina awetak, ashí tikich aidaush iwaintuja takastá tujutbauwa duka eke tsawan jegatsui, tujash atuminig ashí tsawantak agkan ajutjamainawai. ⁷ Atumnak ju nugkanmaya aents aidauk kajegtamain ainatsui, tujash minak kajegtuinawai, wika dita pegkegchaun takainamun wainu asan, pegkegchauwai tuinamu asag. ⁸ Atumek jistanmag wetajum, wika minishtatjai. Mina awetiu takastá tujutbauwa nunú eke tsawan jegachu asantai, —tiuwei.

⁹ Nuna tusa idayak nigka Galileanum juwakui.

Aak aakmagbau pachisa jistamtainum Jisus webau

¹⁰ Nunik juwakuitak niina yachi shiyakagmatai, niishkam aents dekajuawainum tusa uumak, yaunchuk aak aakmaja yujajakbau pachisa jistabaunum weuwei. ¹¹ Judío aidauk nu jistanum batsamsag, Jisusan wainkatasag egainak:

—¿Dusha tuwig pujawa? —tusag imatuidau.

¹² Nunú imat yujainai, nu aents tuwakbaunmaya wajumak niina pachisag: “Duka aentsuk dekas pegkejai”, tuinai, tikich chichaidau: “Auk pegkegchauwe, aentsun wainak tsanú wekaenuwe”, tuidau.

¹³ Tusa tuinakush iwainak paanmasag chichainachu, apu aidaun ishamaidau asag.

¹⁴ Jistamainamu tsawan ejapeantu ai, Jisuschakam jega Apajuí ememattainum wayaa jintinkagtuaui. ¹⁵ Nunik nui jintinkagtutai, judío apuji aidauk puyatjusag diinak:

—Imaanik papiin ausachua annaitkush, ¿utusaya imatikash dekawa? —tiajui.

¹⁶ Nunú aaja tuinam Jisus chichaak:

—Wika midaunak jintinkagtatsjai, wika mina awetiuwa nudaun jintinkagtajai. ¹⁷ Aents dekas Apajuí wakegamun takastatus wakega nunú minak: Dekas Apajuin chichamen jintinjamji, nigka niinunak jintinjamtsuji, tusa dekamain ainawai. ¹⁸ Aents niina imanjin pachis chichauk, aents antugtuidau eme anenjitnume tusa tinu ainawai, untsu aents mina awetiuwa nuna eme anentinme tusa chichauk, waitjusagkesh chichatsuk, nigka dekaskea nunak chichau ainawai.

¹⁹ “¿Dekas Moisés atum chicham umiktinun amaschaukaitjum? Tujash nunú susamuitkujum makichkitigmekesh umiatsjume. Nuni-ayatkugmesh ¿wagka minash mantuatasagmesh wakejutagme?”, tau.

²⁰ Tusa tutai aents nui pekajaidau aikag:

—Aminak dekas iwanchia nu pujugtame, ¿ya aminash mantamata tawa? —tiajui.

²¹ Tiagtai Jisus chichaak:

—Wi tsawan ayamtai aig, aentsun etsagagmag nuaduí anentai jegatsjume. ²² Moisés, uchi aishmagkuch akiinkuig tuke pakaji

ajapjitajum tujabiajui, (nunak Moisesak ni nagkamachu aig, atumi muunjum nagkabau asamtai) atumshakam tsawan ayamtai tsawaju aigkish tuke dutikin ainagme. ²³ Duka dekaske, atumek Moisés timawa nuna uwaekaig tusajum, tsawan ayamtai tsawaju aigkishkam uchi aishmag akiinamtaig pakaji ajapjin ainagme. Nunin ainayatkugmesh ¿wagka wi tsawan ayamtai tsawaju aig, aents jaun etsagagmag duwish kajeagme? ²⁴ Atumek aents dutikamujiya nu shiig dekaagsukek pegkegchawai tiigpajum, shiig dekaajum duwi nuninai takugmesh titajum, —tiuwai.

Jisus ni minimuji pachisa etsegkamu

²⁵ Nuna tutai wajumak aents Jerusalén batsamin aidau antukag:

—¿Auchukaih maatasag egaa yujajigma nu? ²⁶ Diisjua aents tuwakbaunum wajan chichataish pachitsuk idayinana. ¿Dekas Apajuí awemamui tuidau asajampash apu aidaush ayatak diina? ²⁷ Jutiik ju aents tuwiyampaita duka shiig dekaji, tujash Kristu minamujinak makichkish dekajuachgtinai, —tiaju.

²⁸ Tuinamun Jisus jega Apajuí ememattainum jintinkagtak pujau antuk, senchi jiiká chichaak:

—Dekas atumek dekagjume, wi tuwiyana minaja duka. Tujash wika. wi wakegamun takastasanuk minichuitjai, wika atumin wainchataigmia nunú awetimtai tauwaitjai. ²⁹ Wika niijai pujaun juwi tau asan niinak shiig dekajai, nigki minak awetiuwai, —tiuwai.

³⁰ Nuna tutai achiká jukiagta tuidau, tujash makichik aentskesh jegaantag achikchajui, ni achinkatnujig eke jegaachu asamtai. ³¹ Kuashat aents dekas Apajuí awemamap tae tuidau asag:

—¿Kristu taatnai tibauwa nu taash, ju aents jutii wainchataijin iwainag takaa juni nagkaemasampash takastinait? —tuidau.

Fariseo aidau Jisusan achikta tibau

³² Aents aidau Jisus pachisa chichainamun fariseo antukag, sacerdote apuji aidaujai ijunag chichasag, achijatin jega Apajuí ememattai kuitamin aidau:

—Jisus achiktajum, —tiajui.

³³ Tiaju ai Jisus chichaak:

—Wika atumjaig wajumchik tsawanchik pujusan, nuaduí mina awetiu pujamunum wetatjai. ³⁴ Atumek minak egatkagtinaitjume, tujash waitkashtin ainagme, wi pujamunmag minimainchau asajum, —tiuwai.

³⁵ Timatai apu aidau ditá ditak iniininak:

—¿Aush tuwig ii wainmainchaunmash weti? ¿Judío aidau kanajag shiyak, griego aents batsatainamunum pujuina nuna jintintak wetin asampash tawa? ³⁶ ¿Nunash wajuk tujamkua, ‘atumek minak egatkugmesh waitkashtin ainagme, wi pujamunmak minimainchau asajum’, tujama nunash tujamji? —tiajui.

Yumi pujutan sukagtinun pachis Jisus tibau

³⁷ Jista ashimnamua nunú tsawan dekas imá puyatjusa anentaimtutai asamtai, nunú tsawantin Jisus wajantá senchi jiiká chichaak:

—Aents kitabauk, minai tanta uwagti. ³⁸ Ni mina dekas Apajuí Uchijimpapita tusa anentaimtujuidaunak, agagbau chichaa nunisag,

niina anentainig yumi pujutan sukagtina nunú pukuni jiintitnai, —
tiuwai.

³⁹ Jisus nuna tiuwa nunak, niina dekaskeapi tusa nemajuidauk
Wakaní Pegkejin jukiagtinun pachis taku tiuwai. Nu tsawantaik
Wakaní Pegkejig eke taachu, Jisus eke mantamna anean nayaimpinum
waachu asamtai.

Aents aidau Jisusan pampankiag kanajagbau

⁴⁰ Nunú tabaun aents antukaju chichainak:

—Juka dekas Apajuí etsegtin taatnai timawa nu taajamah, —tuidau.

⁴¹ Tikich chichaidau:

—Juka Kristuí, —tiajui.

Nuna tuinai tikich chichaidaushkam:

—Atsa duchauwai ¿Kristu Galileanmaya amainkait? ⁴² Apajuí
chichame agagbauwa nui chichaak: ‘Kristuk David wegantunum aki-
inu asa, Davitash Belegnum akiinawuwa nunisag niishkam Belegnumak
akiinatnai’, tawa aniaish —tuidau.

⁴³ Nuna tusag aents aidauk Jisusan pampankiag ditak kanajajui.

⁴⁴ Nuninai tikich aents Jisusan achiká jukiagtatus wakejuidaushkam
achikchajui.

Apu aidau Jisusak Apajuí awemamuapita tichamu

⁴⁵ Nunikag achijatín jega Apajuí emematku ijuntain kuitamin aidauk
jegawajui, fariseo aidau, tikich sacerdoten apuji aidau batsatbaunum.
Nunikagmatai:

—¿Wagka Jisusash juwi itachugme? —tusag iniasajui.

⁴⁶ Tusá tuinam dita aiinak:

—Makichik aentskesh nu aents chichama imatika chichauk tuke
wainkashbauwai, —tiajui.

⁴⁷ Tiagtai fariseo chichainak:

—¿Atumesh tsanuamak yujainajum? ⁴⁸ ¿Jutii apuji aidau, nuni-
achkush fariseo apuji aidaukesh niini dekaskeapi tuinawash dusha
wagka anentainsajum diyatsjume? ⁴⁹ Au aents chicham umiktinun
dekatsu auk tiki pegkegchauwai, —tuidau.

⁵⁰ Tiagtai nui Nicodemo niishkam fariseowaitak Jisusan ausatatus
kashi jegajuiwa nunú chichaak:

⁵¹ —Jutii chicham umiktinji chichaak: ‘Aents chichaamuji antugt-
sukek suwimak susami tumaitsui, dekatkauk chichamujiyá antugka,
nuaduí shiig ni dutikamujish dekajua dutikmainai’ tujamji, —tiuwai.

⁵² Tutai dita aiinak:

—¿Amesh Galileanmayagkaitam? Apajuí chichamen agagbauwa
nu shiig kuitamsam ausam diisia, Galileanmaya aentsush Apajuí
etsegtinush asauwashit nunú, —tiajui.

⁵³ Tusa ukuinak makí makichik ditá jeen shiyakajui.

8

Nuwa ekagmaku Jisus ejeentunbau

¹ Tujash Jisusak Olivosan mujajin weu, ² nunik kashinia duwi
kashikmas wakitki, jega Apajuí ememattainum jegauwai. Nunikmatai
kuashat aents tuwagkam ekeemas jintinkagtutan nagkamauwai.

³ Nuniai chicham umiktinun jintinkagtin aidau, fariseo aidaujai, nuwa tikich aentsjai takamun wainkag jukiag itajiajui. Dutika itaa aents tuwakag ijunbaunum ejapea awaantag, ⁴ Jisusan iniinak:

—Jintinkagtinuh, ju nuwa ekagmaku jukí itanji. ⁵ Moisés chicham umiktajum tujabiwa duka, nuwa junin aidaunak ayatak kayai tukua tukuakuajum maatajum tawai, ¿tujash amesh wajinpa? —tuidau.

⁶ Nunak wajintig ni timatai duwi tsanumjugtasag tiajui. Tujash Jisusak tsunsumá ekeemas uwejen nugkanum agau. ⁷ Nunitaishkam ayatak iniidau, imatjam Jisus pagkai chichaak:

—Atum ainajum anuiyash yaita machikish tudaun takachush, nu iman deatkauk kayai tukutí.

⁸ Tusa ataktú tsunsumá nugkan agau. ⁹ Nuna timatai ditá tudaujinash dekagmamaidau asag, muunchinum nagkamna makí makichik jii jinkawag ashí shimuinak, imá Jisusnak nuwajaig ukukiajui. ¹⁰ Nunikagmatai Jisus pagkai niimkamá aents atsuagtai nuwan iniak:

—Nuwauchih, amina aents itagmawagma dusha wajukawagmae. ¿Makichkikesh tukugmachajek? —tau.

¹¹ Tusa tama nuwa ayaak:

—Apuh, makichkish tukugchaje, —tiuwai.

Tusa tutai Jisus chichagkushkam:

—Wishakam aminak suwimkan jukiti tusanuk tumaitsujame. Yamaik jeemin wetá, tujash awagkimek tudauk takasaipa, —tiuwai.

Jisus tsaaptinun aentsun itajuauwai

¹² Aents aidau ataktú ijunjamtai, Jisus jintinkagtak:

—Witjai ju nugka juwi tsaaptinjai betek tauwaitag nunak. Nunin asamtai aents mina nemagtuidauk tsaaptin pujutan sukagtin tuke ashimnachua nuna jukiagtatui, nuna jukiajuk suwenmak wekaesachagtinai.

¹³ Nuna tutai fariseo aidau chichajak:

—Ame imanaitjai tusam etsegtumam duka tikima pegkegchauwai, —tuidau.

¹⁴ Tiagtai Jisus ayaak:

—Wi wiki pachimasan taja dushakam wainkachui. Wika dekagmamjai tuwiyana juwi taamja nunak, nunisnuk tuwí wetatja nunashkam shiig dekajai, nuniaig atumek shiig dekagtatsjume. ¹⁵ Atumek ju nugkaya aents aidau aentsun etegkin aina nunisjumek aentsuk etegkeagme, tujash wika makichik aentsnakesh etegkeatsjai. ¹⁶ Tujash wi etegkeaknuk dekaskenum dutikmainitjai, ju pegkegchauwai, ju pegkejai tusanchakam. Wikik nunak dutikmait-sujai, mina Apag awetiuwa nujai atuekan etegmain asan. ¹⁷ Atum chicham umiktin papiinum agagbauwa nuwig; Jimag atuegak mai nunak pachis etsegtuinakui nuaduí dekaskeapi takugmesh titajum, tibauwai. ¹⁸ Wishakam chicham dekaskea nuna etsejgai tumamjai, tuja mina Apagshakam aikasag: Chicham dekaskea nunak etsejui, —tujutui.

¹⁹ Nuna tutai:

—¿Amina Apash tuwí pujawa? —tusag iniidau.

Tama Jisus ayaak:

—Atumek minakesh dekagtsugme, nuniau asajum mina Apagshakam dekamaitsugme. Atum minash dekagkugmek mina Apagshakam dekamain ainagme, —tiuwai.

²⁰ Nunak Jisusak jega Apajuí emematku ijuntainum jintinkagtak tiuwai, Apajuinu kuichik anentag suwaku chimpitai puja nui pujus. Ni achinkatnujig tsawantak eke jegachu asamtai, makichik aentskeshkam achikajag jukichu ainawai.

Wi wegamunmag minimaitsugme tibau

²¹ Jisus ataktú chichaak:

—Wika wetatjai, nunikmatai atum mina egatkagtinaitjume, nuniakjumesh atumek wi tuwí wegaja nuwig minishtin ainagme, atumin tudaujum idaitsuk pujusjum jau asajum.

²² Tutai judío apuji aidau chichainak:

—Atumek wi wegamunmag minimaitsugme tujama nunash, nigki maamatan asampash tujama, —tuidau.

²³ Nuna tusa tiagtai Jisus ditan:

—Atumek juwiyag ainagme, wika yakiyayaitjai. Atumek ju nugka juwiya aentsuitjume, tujash wika ju nugka juwiyachuitjai. ²⁴ Atumek mina: Dekas juwapita Apajuí Uchijig, tujuttsujum duwi jaakjumesh atumin tudaugminig jakatnaitjume timajime, —tiuwai.

²⁵ Tutai iniinak:

—¿Tujash dekas amesh yaitpa? —tusa tuidau.

Tama Jisus ayaak:

—Wika nunak atumnak yaunchuk nagkamsan tuké ujajime. ²⁶ Atumdaun pachisan nuninawai tusa etsegmainuk kuashat ajutui, mina awetiuwa dushakam dekaskea nunak chichauwai, wi ju nugkaya aidautigmin tajim nunashkam, wika ni chichaamun antukbaujun tajime.

²⁷ Nuna aatus chichataish, ni Apajinap pachis tawa tusajag dekainachu. ²⁸ Nuaduí Jisus ditan chichajak:

—Atumek minak wi Aentsmagan Akiinawaitag nu, yakí numinum achijajum takugjum detusjum, nuaduí dekas juka Apajuin Uchijimpapita tusagmek, nuigtú wi wakegamun takaatsug dushakam dekajuatin ainagme. Wika mina Apag jintinjuamua nunak atumnashkam tajime.

²⁹ Mina Apag awetiuwa duka wijaig tuke pujawai, imá minakek idaitatsui, wika ashí ni wakejamua nunak takau asamtai, —tiuwai.

³⁰ Nuna Jisus tutai kuashat aents: Dekas Apajuí Uchijimpapita, tiaju.

Dekaskea nunú agkanmitkagmamainai tibau

³¹ Jisus judío aidau niini dekaskeapi tiaju aidaun chichajak:

—Wi atumin tajim jujú chicham betek umigtakjume, dekas mina nemagtin amainaitjume. ³² Nuniakjum chicham dekaskea dushakam dekamainaitjume. Nu dekaskea nunú agkanmitkagmamainai, —tiuwai.

³³ Tutai dekaskeapi tichau aidau aiinak:

—Jutiik Abrangka uchijí wegantu asaja, makichkiakesh tikich inaku waitkamak asachuitji. Nunin ainajinish, ¿amesh wajuakeakmea agkanmaemainaitjume tukagtame?

³⁴ Tiagtai Jisus ayaak:

—Dekas tajime: Aents pegkegchaun takaina duka, pegkegchau takata nuna waitkatai ainawai. ³⁵ Inakak inamnun jeenig tuke pujuchu ainawai, nuna uchijinchu asag, untsu inamnun uchijiya nunú jegag tuke pujuwai, duka niina uchijí asa. ³⁶ Nuniaú asamtaí atumin Apajuí Uchijí agkanmitkagmakuig, dekas shiig agkanbaekagtin ainagme. ³⁷ Dekagjime atum Abraham wegantuitjum nunak, nuninaitkujum mina chichameg dekaskeapi tumainchau dekapeau asajum mantu-atasajum wakejutagme. ³⁸ Wika mina Apag iwaintugkamun wainkau asan chichaajai, atumshakam nunisjumek atumin apa tabauwa nu dutiksagmek takau ainagme, —tau.

³⁹ Tutai dita aiinak:

—Iina muunjig dekas Abragkai, —tuidau.

Tiagtai Jisus chichajak:

—Atum dekas Abragka uchijí ainakjumek, ni takasua dutiksagmek takamain ainagme. ⁴⁰ Wi dekaskea nu jintinmaitkujum, minak ayatak mantuatasajum wakejutagme. Abragkak makichkish annunak anentaimajakchauwai. ⁴¹ Atumek, atumin apajai betek takaagme, —tiu.

Tama dita aiinak:

—Jutiik wainka kasanum akiamuk ainatsji, iina apajiya duka dekas Apajuiya nuuwai, —tuidau.

⁴² Tiagtai Jisus ayaakshakam:

—Atumin apa dekas Apajuiyaitkuig minashkam anenmain ainagme. Wika wiki nagkamnuk juwig taan pujatsjai, mina Apag awetakui wika taan juwi pujajai. ⁴³ ¿Wagka wi chichaamush dekamain dekapeat-sjume? Duka mina chichameg antut dakituidau asajum nuniagme. ⁴⁴ Atumin apa duka iwanchia nuuwai. Atumek niinu asajum, ni takaa-mua dutiksagmek takastasajum wakegajume. Yama nagkamchakug iwanchia nu nagkamauwai magkagtutan, dekaskea nunak dakitak waitjutan imá waitjin weuwai. Nigka waita nuna apají asa, waitjutan pujugnai, nu imá shiig awagmamu asa. ⁴⁵ Atumek nunin asajum, wi dekaskea nuna etsegkuishkam dekaskeapi tujuttsugme. ⁴⁶ Atum aidautigminiash ¿ya wi tudau takasbaugnash dekagtuinawa? ¿Wagka wi dekaskea nuna etsegkuish, dekaskeapi tujuttsugme? ⁴⁷ Apajuinu aidauk, Apajuí chichamen antujuk umijin ainawai. Tujash atumek Apajuinuchu ainajum nuaduí, nu antutak dakituinagme.

Kristuk Abraham akiintsaij pujuwai

⁴⁸ Nuna tusa tutai judío aidau Jisusan chichajuinak:

—Juwi tibaiji, amek Samarianmaya aents asam wakan pegkegchau egkemtugmagmatai tu wekaeme, timayag duka dekaske.

⁴⁹ Tama Jisus ayaak:

—Makichik iwanchkesh minak atsugtawai. Wi takaag nunak Apajun ememattasan aikajai, dutikaig atumek minak emematjuinatsjume. ⁵⁰ Wika wikik emematjitnume tusanuk wakegatsjai, nuniaig Apajuí ememattinme tujutu asa, nigki nunak egak mina emematjumainnak iwainawai. ⁵¹ Dekas tajime: Aents wi taja nuna dekaskeap tawa tusa tauk ajumaish jakashtinai, —tiuwei.

⁵² Tutai nuigtú judío aidau aikag:

—Yamaik shiig dekaji, dekas aminí wakan pegkegchau pujugtamupai tusaik. Abraham, nuigtú tikich Apajuí etsegitin aidaushkam ashí

jinawajui, nunikaju ainaig ame yamai chichaakum: ‘Mina chichamjun umigtauik ajumaish jakashtinai’, tame. ⁵³ ¿Ameik dekas ii muunji Abragka nu nagkaesau asamek dusha tame? Abraham, nuigtú tikich Apajuí etsegtin aidaush ashí jinawajua nuniaish ¿amesh wajuk takumea dusha tumame? —tiajui.

⁵⁴ Tama Jisus ayaak:

—Wi wiki emematmamkun midaunak pachimasa chichaamuk tiki wainak amainai. Tujash minak mina Apag emematjawai, atum iina Apajig Apajuiyai tajum nunú. ⁵⁵ Nunú tusá tayatkugmeshkam nigka wainchauwaitjume, tujash wika wainnujai. Wainchaujai takunuk atum tikima wait ainajum, wisha ibauk wegakun tumainaitjai. Wika shiig wainu asan, ni tujutbaunashkam dutiksanuk umigjai. ⁵⁶ Atumi muunjun Abraham aajakua duka, wi ju nugka juwi taamujun waitkatatus wakegas dakak pujusuí, nuniau mina waituk shiig aneasui, —tiuwai.

⁵⁷ Nuna tutai judío aidau Jisusan chichajuinak:

—Ame cincuenta mijankesh pujatsum aniayatkumesh, wajutí wainkau asamea, ¿Abragkan wainkabiajai tame? —tuidau.

⁵⁸ Tama Jisus ayaak:

—Dekas tajime: Wika Abragkash akiintsaisig tuke pjuwaitjai, —tau.

⁵⁹ Tutai aents aidauk kayan jukiaju tukutasag, tujash Jisusak uumak juga Apajuí ememattainmayag jiinkiuwai.

9

Aents wainmachu akiinaun Jisus etsagagbau

¹ Jisus nuwiya jiinki wekamá, aents yama akiinmawaik tuke wainmachu akiinaun wainkauwai. ² Nunikmatai ni jintintaiji aidau iniinak:

—Jintinkagtinuh, ¿wagka jusha wainmachush akiinauwaita? ¿Ni apají tudaujiniash ankauwait, atsa niina tudaujiniagkash aanin akiinauwait? —tuidau.

³ Tiagtai Jisus ayaak:

—Juka ni tudaujinig junikchauwai, tuja apají dukují tudaujinkish ankachui. Ju junin akiinauwa juka, Apajuí ni senchijin iwainaktatus wakegau asamtai aanin akiinauwai. ⁴ Eke tsawaiya juwik, mina awetau dutikata tujutmawa nunak takastajai, kiyagatui, nunikmataig makichkish takamainchau agtatui. ⁵ Yamai nugkaa pujag juwik, nugkan tsaaptinjiyitjai, —tiuwai.

⁶ Nuna tusa Jisus nugkaa usukmá, niina usukinig nugkan uchupig juki, wainmachu jiin anujtukui. ⁷ Dutika chichajak:

—Yumi ipiagbau Siloé tutaya awi weme nijamita, —tiuwai. (“Siloé” tawa nunak: “Awemamu” taku tawai.)

Tusá tima wainmachushkam we, nijami shiig wainmaku. ⁸ Nunik wainmakmatai nu wainmachujai ijutkau batsamin aidau, tuja tikich niina wainin aidaushkam:

—¿Juchaukaih jintá ekeemas wainkauch sujustajum tusa sumá ekeemnuwe nunú? —tusag iniimaidau.

⁹ Nuna tiagtai tikich aents chichainak:

—Ehé, nunuwei, —tuinai tikich chichainak: —Duchauwai auk, ayatak nujai betekmamtinai, —tiajui.

Tiagtai nunú aents tsagaju nigki etsegtumak:

—Witjai, —tumabiuwai.

¹⁰ Tutai:

—¿Tujash wajukamea wainmakume? —tusag iniidau.

¹¹ Tama ni etsejak:

—Makichik aents Jisus daagtin, niina usukin nugkajai machik pachimag jijuí anujtujuk chichagtak: ‘Yumi ipiagbau Siloé tutaya nuwi weme nijamita’, tusa awetime. Tujutmatai wenu nijamakman wainmakmajai, —tau.

¹² Tutai:

—¿Nu aentsush tuwí pujawa?

Tusá iniinam:

—Achah, dekatsjai, —tiuwai.

Fariseo aidau wainmachu tsagajun iniasagbau

¹³ Nunú duwik wainmachu aajakun jukiag fariseo batsatainamunum ejegawajui. ¹⁴ Jisus aents wainmachun tsawan ayamtai aig, usukin nugkan uchupig jiinum anujtuk etsagaju asamtai, ¹⁵ fariseo aidau:

—¿Duwik wainmachumesh yamaish utusamea wainmame? —tusag iniidau.

Tama ni chichaak:

—Minak Jisus usukin nugkan uchupig jijuí anujtujuk: Nijamita, tujutmatai nijamin wainmakmajai, —tau.

¹⁶ Wajumak fariseo aidau chichainak:

—Nunú aents dutijama duka Apajuí awemamuk amaitsui, dekas Apajuí awemamuitkug tsawan ayamtai aig takamaitsui, —tuidau.

Nuna tuinai tikich chichaidau:

—¿Tudaugtinaitkush utusaya aents dutikmainchaunash aikash takaawa?

Tusag ditak kanajajui. ¹⁷ Nunikag waketjusag duwik wainmachu wekayin tsagajun jegaantag:

—Amesh aents amina etsaentamjaush ¿ya tame?

Tusa iniam ni chichaak:

—Wika Apajuin etsegtinai tajai, —tiuwai.

¹⁸ Nuna tutaish judío aidauk, dekas jujú wainmachuwe nuuwap wainmake tumain dekapenachu, nuninak wainmachu apajin dukujijai untsukag, ¹⁹ iniinak:

—¿Jukaih atumi uchijum wainmachu akiinauwai tuina nunú? ¿Nunin akiinaush yamaish utugsaya wainmawa? —tuidau.

²⁰ Tiagtai nuna apají dukujijai chichaak:

—Juka iina uchijí wainmachu akiinauwa nuuwai, ²¹ tujash wajuk wainmake duka iik dekgtsuji, tuja yaki niimtikme dushakam dekatsji. Ni iniastajum, nigka uchuchichua aanin asa, nigki ujamainai ni wajuk wainmake nunak, —tiuwai.

²² Nuna tiajua nunak judío aidau: Jisusak dekas Apajuí awematnaitjai tibauwa nuwapita tuidauk jega ijuntainmak jiikí ajapami, waichu atí tusa chicham umikbau asamtai, nuna dutijamawainum tusa ishamainak tu chichakajui. ²³ Nuniau asamtai wainmachu apajig dukujijai:

—Ni iniastajum tikima uchuchichui, —tiuwai.

²⁴ Nuna timatai judío aidau duwik wainmachu aajakun ataktú untsuká itan chichajak:

—Apajuiya nuna emtin dekaskenum waitjutsuk etsegekata. Jutiik dekeinai nu aentsua duka tudaugtinai.

²⁵ Tiagtai ni ayaak:

—Wika dekatsjai, dekas tudauwashit nunak. Wika duwik wainmachuitkun, yamai wainmag junak shiig dekajai, —tiuwai.

²⁶ Tutai ataktú iniinak:

—¿Utugtamekame? ¿Niimtijamtkush wajina dutikame? —tuidau

²⁷ Tusa iniam:

—¿Wagka dutik etsaentugmae tusa etseguish dekaskeap tawa tujutchayatkugmesh, ataktú etsegekati tusagmesh wakegagme? ¿atumesh ni nemagkatasajum wakegau asagmek tajum? —tiuwai.

²⁸ Tusa tutai pegkegchau chichajuinak:

—Amek nunú aents nemagme, tujash jutiik Moisés aajakua duke umigji. ²⁹ Moisesan Apajuí aujukua duka dekaji, tujash au aents amina etsaentamja duka machikish dekantsui, niish tuwiyampaita duka, —tiaju.

³⁰ Tuinam aents wainmachu tsagaju chichaak:

—¡Waj! anentai jeagmainkaih mina etsaentuja nu, tujash atumek dekatsjume tuwiyagkita nunú aentsush. ³¹ Jutiik dekaji Apajuik aents tudaugtin aidau wakegamunak umigtsui, nigka niina emema-tuinak ni wakegamun umiina nuna antujuinawai. ³² Duwikish tuke dekachbauwai, aents wainmachu akiinaun makichik aents etsagajui tusa etsegbaukesh. ³³ Aents mina etsaentuja nu, Apajuí awemam taachuitkug, makichkish aikamaisui, —tau.

³⁴ Tusa tutai:

—Ame akiinmawaik nagkamsam ibau tudau aajakuitkumek, ¿jutiijintinkagtuatasam wakegam? —tusag jega ijuntainum pujaun jiikiag awemajui.

³⁵ Nunú dutika wainmachu tsagaju jiiki awemamun Jisus dekaa wekamá wainak:

—¿Amesh Apajuí Uchijinish dekaskeapi tamek? tiuwai.

³⁶ Tama nu aents chichaak:

—¿Apuh dusha yaita? Wisha nuna wainkan niinig dekaskeapi titajai, —tau.

³⁷ Tutai Jisus ayaak:

—Amek duka wainme, wi amijai chichaag juuwaitjai, —tumabiuwai.

³⁸ Tutai nu aentschakam Jisusan tikishmatug pujujus:

—Apuh, yamaik ame tame nunak dekaskeapi tajame, —tiuwai.

³⁹ Tutai Jisus ayaak:

—Wi ju nugka juwi tauwaitag nunak, aents aidau: Wika pegkegchau asan wainmachua nuninaitjai, nunin asan Apajuinak dekatsjai tumamainak, Apajuin tsagkugtugta tama, ditá pegkegchauji tsagkujam, wainbaujai betek wetinme; nuniai tikich aidau: Wika pegkegchaunak takachujai, nunin asan wainmajai betekaitjai tumamaidau asantai, Apajuí ditá pegkegchauji tsagkujacham, Apajuinak dekatsuk wainmachujai betek juwakagtin asantai, tauwaitjai, —tiuwai.

⁴⁰ Nuna tutai fariseo aidau wajaidau iniinak:

—¿Jutiish wainmachu aina annukaitag? —tuidau.

⁴¹ Tiagtai Jisus ayaak:

—Atum wainmachu ainakjume atumin tudaugminish bakuma-mainchau amainaitjume, tujash atum wainbauwaitji tajum awi dekas bakumatin ainagme, —tiuwai.

10

Uwijan kuitamin uwigjjai pachisa augmatbau

¹ Nunik Jisus chichaak: “Dekas tajime: Uwija wenuke waitjiya nuni waitsuk, yaja yantamnum wayaa nunak aents kasa nunin ainawai, ² tujash dekas uwijan kuitamna duka waitjin wainai. ³ Tuja waitin kuitamnuk, uwigjintin minitai ayatak waitin ujati idaitinai, nunak uwigshakam niina chichamenak shiig antujin ainawai. Nuniau asa ni jiyaakushkam makí makichik daajinak adaituk jiinai. ⁴ Dutika jiiá juki ni eemak, uwijan ukuunum saak weegame, nunitai uwigshakam nuna chichamenak shiig antuju asag saetinai. ⁵ Uwajak niina wainchatai-jinak, chichamenakesh yaja antujiatkug nemagchau ainawai, ayatak pisag shiminai”, tiuwai.

⁶ Jisus juna pachis fariseo aidaun jintintuauwai; dutikamashkam ditak nuna tujamkumpap tawa tusag dekaachajui.

Aents uwijan shiig kuitamna numamtinaitjai Jisus tibau

⁷ Jisus ataktú chichaak: “Dekas tajime: Witjai uwijan wenuke waitjiya numamtinnuk. ⁸ Tuja wi taatsaig kuashat kaunawaju ainawai, tujash nunú aidauk kasa, uwijan yajumin ainawai. Nunak uwajak chichamenash antujuinatsui. ⁹ Witjai waitiya numamtinnuk, aents minai waidauk uwemjagtin ainawai. Nunú aents aidauk shiig dakujus batsamtinai Apajuí kuitabau asag.

¹⁰ “Kasak ayatak kasamkatatus, magkagtuatatus, jegan tsaitatus mininai. Tujash wika pujutan jukitnume, nunikag shiig atsumkas batsamsatnume tusan miniuwaitjai. ¹¹ Witjai dekas aents uwijan shiig kuitamna numamtinnuk. Nunin asan mina aentsug uwemjatnume tabaunum mantamnattajai. ¹² Untsu aents ayatak akiká, kuitamjuktata tusa ukukbau aidauk, kuntin yukagtin uwijan yuwatatus minittaish, uwajak niinuchu asagmatai tupikaak ajapa ukumatai, nunú kuntin yukagtin yuwak ipisig ishinnai. ¹³ Nunú aents tupiká duka, ni tagkujichu asamtai, ayatak akikam takau asa nuniawai.

¹⁴ “Witjai dekas aents uwijan shiig kuitamna numamtinnuk. Wika mina aentsug aidaunak shiig dekainajai, nunisag ditashkam minak shiig dekajuinawai. ¹⁵ Aantsag mina Apajush shiig dekajui, wishakam niinak imatiksasuk shiig dekajai, nuniau asan wika mina aentsug pujutan jukitnume tabaunum mantamnattajai. ¹⁶ Uwig tikich wenukn-umiaya numamtin, tikich mina nemagtuidaush ajutui, nunashkam yajuakan makichik wenuknumak chimpiaku utugmaina numamtuk ijumjattajai, dutika ai ijunjag batsamsag, mina chichamjun antugtunaku wiki ditanak kuitamkattajai.

¹⁷ “Mina Apajuk anentui, wika mina aentsug aidau uwija numamtin aina nuna ayamjakun, mantamnan ataktú nantaktin asamtai. ¹⁸ Tuja minak mantumain ainatsui. Wika wiki sujumankattajai. Wiki sujumankan jakan ataktushkam wiki nantaktinaitjai. Wi nunimain ajuta nunak mina Apag nunikta tujutiuwai.”

¹⁹ Jisus tusá chichaamun judío aidau antukag, ditak pempeentunikiag pampandayidau. ²⁰ Nuninai kuashat aents chichainak:

—¿Wagka aanin wakan pegkegchau egkemtuam imaanag chichaa wekaga aniaush antujuinagme? —tuidau.

²¹ Tujash tikich chichaidau:

—Makichik aentskesh wakan pegkegchau egkemtuamuk junak imatiksag chichamaitsu jama. ¿Itusaya aents wakan pegkegchau egkemtuamush aents wainmachunash niimtikmainaita? —tuidau.

Judío aidau Jisusan maata tiagbau

²² Tsetsek tepeau ai, Jerusalén jistamaidau jega Apajuí ememattai jegamkamua nunú tsawan jegau asamtai. ²³ Tuja Jisus jega Apajuí ememattainum Salomón waiti ujugbaunmanini wekagun, ²⁴ judío aidau Jisusan tentea apakag chichajuinak:

—¿Wajupa asamea shiijash etsegkattame? Ame dekas Kristu-itkumek, shiig ujajatkakia, —tuidau.

²⁵ Tiagtai Jisus ayaak:

—Wika timajime, tujash atum minak nuna etsegkuish dekaskeapi tujuttsugme. Mina Apag dutikata tusa inatjamunak wika paan iwainakan atumnash iwaintajime. ²⁶ Tujash atumek mina aentsjuchu asajum, dekaskeapi tujuttsugme. ²⁷ Mina aentsug aidaunak shiig wainjai, ditashkam shiig chichamjunash antugtuidau asag, uwig aidau uwijá kuitamnun nemajuina numamtuk nemagtuinawai. ²⁸ Wi ditanak pujut tuke atina nunak suwajai, dutikamu asag ditak tuke waittsashtin ainawai. Minai batsatunak makichkikesh atanjukchagtin ainawai. ²⁹ Mina Apag ashí tikich aidaunash nagkaesauwa nunú minak sujusuí. Nunin asamtai niina uwejen aunak makichkish atanmain ainatsui. ³⁰ Wika mina Apagjaig makichkiuchitji, —tiuwai.

³¹ Tutai judío aidau kayan jujukiag tukutá tuidau, ³² dutikainam Jisus chichaak:

—Wi mina Apajun senchijin takaakun kuashat pegkeg aidaun atumin iwaintukmajime. Tuja, ¿wají takasbaunma minash kayaish tukugtasagmesh wakejutagme? —tau.

³³ Tama dita aiinak:

—Jutiik ame pegkeg iwainajam takaamunmag kayaik tukumaitsu-jime, amek dekas shiig aentsuitkum Apajuí pegkegchau chichagkum, Apajuiya imanuk jumamam duwi kayaik tukunjattame.

³⁴ Tiagtai Jisus chichaak:

—Atum chicham umiktina nuwig: ‘Wika atumnak apajuí ainagme tajime’, tusa agagbauwai. ³⁵ Apajuí chichame agagbauwa nu-anuig: ‘Atumek apajuí ainagme’ tujamui, nunak dekas tujamainawai. ³⁶ Apajuí mina ju nugka juwi awetimtai tau asan, wika Apajuin Uchijiyaitjai takuish, ¿wajuk anentaimsagma, Apajuí pegkegchau chichagkaume tusagmesh tujutjume? ³⁷ Wi mina Apag wakega dutiksanuk takaachbau wainkugmek dekaskeapi tujutigpajum. ³⁸ Mina dekaskeapi tujutchamin dekapeakjumesh, mina Apag dutikata tujutmawa nuna wi iwainakan takaakui, nu wainkajum dekaskeapi tujuttajum, nuniakjum minai Apag ai, wi niijai pujag dushakam dekaajum dekaskeapi timinjum.

³⁹ Tutai ataktú achikag jukiagta tuidau, imatikainam Jisus jiinki wegak uwemjauwai.

⁴⁰ Nunik Jisus wakitki namak Jordagkan amain etsá minitaijiya nuní Juan yamijatujakbaunum jegaa pujusuí. ⁴¹ Nunikmatai kuashat aents wejiag wainainak:

—Juan aents dutikmainchaun iwainachkush jujú aentsun pachis chichaaya duka dekaske, —tuidau.

⁴² Nuna tuidau asag nui batsataidauk kuashat aents Jisusnak dekaskeapi tiajui.

11

Lázaro jakamu

¹ Yaakat Betanianmaya aents Lázaro daagtin jaak tepau. Duka umayí Maríá, Marta aatus ijunag nunú yaaktanmag batsamajakajui.

² Maríaya juuwai kugkuinu juki Jisusan nawen ukatug niina intashinig ujgtojua nunú. ³ Maríá, Martajai Jisusan chichaman akupjuinak:

—Apuh, amina kumpajum aneetaigmea duka jaawai, —tiajui.

⁴ Nu akatjamu tusá ujaam Jisus:

—Aunak tuke jaak jakashtatui, Apajuí senchijin, nuigtú Apajuí Uchijí senchijnashkam iwainaktatus aniawai, —tiuwai.

⁵ Jisusak Martan niina kaijai, nuigtushkam umayí Lazonashkam senchi aneejakuí. ⁶ Imaatknaitak jaawai tabaun antukashkam wetsuk, ni pujamunmag jimajá kanajui, ⁷ nunik ni jintintaiji aidaun chichajak:

—Judeanum ataktú wakettsaik wegagmi, —tiuwai.

⁸ Tama dita ayaak:

—Jintinkagtinuh, amina awiya judío aidau kayai tukú tukug-mainakua mantamawagtatus imatijabiagmaya nuniaigkik, ¿awi ataktú wemi tusamesh tame? —tuidau.

⁹ Tiagtai Jisus ayaak:

—¿Makichik tsawantan doce hora ajatsuak? Aents tsawai wegaguk tukuumaitsui, shiig wainak wegau asa. ¹⁰ Untsu kashi wegauk tukuumain ainawai, tsaptinum wainmak wegachu asa.

¹¹ Nuna ti nuigtú:

—Iina kumpají Lazarok yamaik kanag tepawai, tujash wi wejin inankittajai, —tiuwai.

¹² Nuna tutai ni jintintaiji chichajuinak:

—Apuh, dekas kanag tepauku nantaktatajama, —tuidau.

¹³ Jisusak Lázaro jakamtai taunak, ditak ayatak kanagmatais tawatai tusag tiajui. ¹⁴ Tiagtai Jisus paan iwainak:

—Lazarok dekas jakae, ¹⁵ tuja wi awi juwakchau asan shiig aneajai, atumek wi au inanbau wainkajum dekaskeapi tiagtin asagmin. Tujash jegaa diisagmi, —tiuwai.

¹⁶ Tutai Tomás, Jimagmamutu taiya nunú, tikich Jisusa jintintaiji aina nuna chichajak:

—Jutiish niijaig wegagmi, mainakush jutiijai mantamatnume, —tiuwai.

Jisus witjai jakaunash inanmainnuk pujutnash sukagtinuk tibau

¹⁷ Jisus Lázaro pujutain jegakmá, Lázaro ukusam cuatro tsawan wegai jegauwai. ¹⁸ Betaniak Jerusalén jegattak kempatun kilómetro jegaantu. ¹⁹ Tuja kuashat judío aidau shimutkajui Marían, Martajai ijagsagtatus, umayí jajukam buutuinak senchi wake besemag batsatu

asamtai, anentain ichichtugtasag. ²⁰ Nuninai Jisus taattak minawai tabaun Marta antuk, Jisusan igkugtatus jintai, Mariák jegag juwakui. ²¹ Nunik Marta Jisusan igkug chichajak:

—Apuh, ame juwi pujutaik mina ubajuk jamain wajakchae, ²² tujash wika yamaikish ame Apajuí segamunak imatiksagkeap amamainaita tajai, —tiuwai.

²³ Tusá tama Jisus ayaak:

—Amina umaimik aneantatui, —tau.

²⁴ Tama Marta chichaak:

—Dekas tame, wika dekajai tsawan nagkantina duwi aneantina nunak, —tiu.

²⁵ Tutai Jisus chichajak:

—Witjai jakaunash inanmainnuk, wikitjai pujutnash sukagtinnuk. Aents minai kajinas anentaimaidauk, jakaash pujut nagkanchaunum pujusagtinai. ²⁶ Tuja yamai iwaaku batsata dushakam, mina: Dekas Apajuí Uchijimpapi, tujutuinak imá minak umigtuidauk, waitut nagkanchaunmag wechagtin ainawai. ¿Dusha amesh dekaskeap nuniktinaita tamek? —tiuwai.

²⁷ Tama:

—Ehé Apuh, wika dekaskeapi tajame. Amek Apajuí Kristun ju nugka juwi awematnaitjai timawa nunú asam, Apajuí Uchijiyaitme, tiuwai.

Lázaro ukusbaunum Jisus jegantá buutbau

²⁸ Nuna tusa ukuak, Martak kai Marián jegantun niinak akanki:

—Jintinkagtin juwi taa untsugmawai, —tiuwai.

²⁹ Nunú tamawaik Mariáshkam wajaakug Jisusan wainkatatus wejiuwai. ³⁰ Jisusak yaaktanmag eke waitsuk, Marta igkugbaunmag pujau.

³¹ María waujus jiinki wetai, judío aidau María anentai ichichtuinak kauná batsatushkam: Umayí ukusbaunum jegantá buuttasas wegatai, tusag pataetukajui.

³² Nunik Mariák Jisus wajamunum jegantá tikishmatug pujus:

—Apuh, ame juwi pujutaik, mina ubajuk jakachampastaih, —tau.

³³ Tusa María buuttai, judío Marián pataetuk kaunkaushkam buutiagtatman Jisus wainak, shiig senchi wake besemag dekapjauwai.

³⁴ Nunik:

—¿Tuwí ukusmaugme? —tusa iniimu.

Tutai:

—Apuh juwi ukusmaji, tantá diistá, —tiajui.

³⁵ Tima jegan diikmá wainak Jisus buutu. ³⁶ Nunitai judío aidau:

—¡Diisjuah, yaitnaku aneejakuajah! —tuidau.

³⁷ Tiagtai tikich aidau:

—¿Jujú wainmachunash wainmitkauwe ibaush, Lázaro jataish utugkatnuki, ni pujutaish jakatnasha? —tuidau.

Jisus Lázaro inankimu

³⁸ Jisus ataktú senchi wake besemag dekapjau, nunik waa muun taimunum ukusá kaya aputukbaun jegantun:

³⁹ —Kayak ekektajum, —tiuwai.

Tutai Marta chichaak:

—Apuh, mejeawastaih, ukusam cuatroa imania kintamjae, —tau.

⁴⁰ Tutai Jisus ayaak:

—¿Ame dekaskeapi takumek Apajuí senchijí iwainamu wainkattame timajam duka, dekaskeap dutikmainaita tatsumek? —tiuwai.

⁴¹ Timatai Lázaro ukuaku openbaun, kayan eketkaju. Dutikamtai Jisus nayaimpin pagkai diyaak:

—Apawah see tajame, amek minak tuke antugtau asamin. ⁴² Wika shiig dekajai, amek minak tuke antugtusmeké ame nunak. Nuniy-atkun yamai tajame, jujú aents ijuna jushakam shiig wainkag, dekas Apajuí awemamuapi tujuttinme tusan, —tau.

⁴³ Nuna ti idayak senchi untsuká:

—¡Lázaro, nantakim agaa jiinkita! —tiuwai.

⁴⁴ Tama Lazaroshkam ukuaku uweje nawejai jaanchi shiig pempeaja, nuigtú yapiin jaanch aputusa ukusbauk imanisag jiinkiuwai. Nunikmatai Jisus chichaak:

—Atiatajum wetí, —tiuwai.

Jisus maami tusa chicham umigkamu

(Mt. 26.1-5; Mr. 14.1-2; Lc. 22.1-6)

⁴⁵ Kuashat judío aidau Marian uyunainak yujaidauk, Jisus nu dutikamu wainkag: Dekas juka Apajuí Uchijimpapita, tiajui. ⁴⁶ Tujash wajumak aents fariseo aidaun jegajuawag, Jisus dutikamun pachis ujakajui. ⁴⁷ Nunú ujakajam fariseo aidau, sacerdoten apuji aidau, nuigtú apu ditan nagkaesau aidaujai ijunjag chichainak:

—Au aentsua nunú aents dutikmainchaun kuashat iwainag takaa aush ¿utugkattaji? ⁴⁸ Ayatak idaisa ajinig ashí aents aidau niinak: Dekas Apajuí Uchijimpapita, tusag nemajiagtai, Romanmaya apu aidau suntajan ishitjamkamtai kautjamak, jega Apajuí emematku ijuntaiya juna yumpunjamainak ashí jutiijai amupaktatajama, —tuidau.

⁴⁹ Nuna tiagtai nuwiya Caifás daagtin nunú mijantin sumo sacerdote atí tusa adaikam pujau asa chichaak:

—Atumek duka machikish dekatsjume, ⁵⁰ anentaimsagmesh diyatsjume, ashí aents jinumaina nuna makichik aents mantamnamaina duka, —tiuwai.

⁵¹ Nunak Caifasak nigki nagkamig tichauwai. Nunú mijantin ni sumo sacerdote wajas pujau asamtai, Apajuí tu anentaimtikbau asa, Jisusai judío aidaunum mantamnatnuk, tiuwai. ⁵² Tujash imá judío aina nuwigkik maam amaitsui, ashí aents tikich nugkanum batsata nunashkam uwemtikak niina uchijí emakta tau asa, Jisus maam atinun taku tiuwai. ⁵³ Nuna timatai nunú tsawantaik apu aidauk: Jisusak dekas mantamnati, tusag chichaman umigkajui.

⁵⁴ Tibaun Jisus dekagmama shiig wantinka wekaemainchau asamtai, Judea nugkanak ukuak, makichik yaakat yaijuch Efraín tutai uwejush tikiju anem aunum weuwai. Nui jegaa ashí niina jintintaiji aidaujai ijunag pujusuí.

⁵⁵ Nuniamunum judío aidau Pascuatin uwijan maawag yuujakú aina nu tsawan tikiju wajasú asamtai, kuashat aents Jerusalén ashinaidau, nui jegawag: Nu jista tsawaakuig pegkediaja jistamtai atí, tibau asamtai nuna umikagtatus. ⁵⁶ Tuja aents aidauk Jisusan wainkagtatus egaa yujajuidau, nunidau asag jega Apajuí ememattainum wayaa ekeemsajash pempentunisag iniininak:

—¿Atumesh Jisusash wajuk anentaimtagme, ju jistanmash minit-pash, atsa pujustimpash? —tuidau.

⁵⁷ Fariseo aidau sacerdote apuji aidaujai aentsun akatenak:
—Makichkitigmekesh Jisus pujamuji dekagkugmek etsegkatajum,
achiká jukimi, —tiajui.

12

Betanianmaya nuwa Jisusa dawen kugkuinui nijatjamu
(Mt. 26.6-13; Mr. 14.3-9)

¹ Seis tsawan asa jista Pascua jegatin ai Jisusak Betania weuwai, Lázaro jakamtai ni inankiuwa nuna pujutaijin. ² Nui jegamtai Jisusan eme anentsag yutain umigkajui. Dutikawagmatai Marta yutain pekasmatai, Lázaro, nuigtú tikich aidaush Jisusjai mesanum jegantag ekeemsag yuwidau. ³ Nuninai María kugkuin ayatak nardok najanamu, senchi akik trecientos gramos ajamun juki tajuntun, Jisusa nawen ukaatuk, niina intashinig ujujtujui. Nu dutikamu kugkuntig jeganak akijauwui. ⁴ Imanikmatai Judas Iscariote, Jisusa jintintaijitaik pempeentuki sujuktina nu chichaak:

⁵ —¿Wagka dekas trescientos tsawan takasá kuichik jumaina imaan akik sujuka, nunú kuichkik ujunauch aidaun yaimainnash aikawa? —tau.

⁶ Nunak Judasak dekas ujunauch aidaun puyatjakug tichauwai. Nigka kasa asa kuichik egketai kuitamkata tusa susam wekagas, aents aidau nu egketainum kuichik chimpianun, wakenmag kasamá wekagu asa dutikatatus tiuwai. ⁷ Nuna tutai Jisus chichaak:

—¡Tutsuk idaisata! Junak mina ukugsagmatai jutijuawagtinun jutijawai. ⁸ ujunauch aidauk atumjaig tuke batsabiagtatui, untsu wika atumjaig pujushtatjai, —tiuwai.

Lázaro maami tusa chicham umigkamu

⁹ Kuashat judío aidau Jisus Betanianum pujawai tuinamun antukag wegajui, niina wainainak Lazaronashkam jakau aig Jisus inankiu asamtai, wainkata tuidau asag. ¹⁰ Nudiagtai sacerdoten apuji aidaushkam: Lázaro maami, tusag chichaman umigkajui, ¹¹ ni nantakbaujin wainainak kuashat judío aidau Jisusan: Dekas Apajuí Uchijimpapita, tusag nemajuidau asagmatai.

Jisus Jerusalén apu wajasá wayaamu
(Mt. 2.1-11; Mr. 11.1-11; Lc. 19.28-40)

¹² Jista Pascua atin asamtai, kuashat aents Jerusalén wegajui. Nunik kintamag tsawaukmag, Jisus taattak minawai tuinamun antukag, ¹³ duká tsupijag jijnjag igkuinak, senchi untsumkag:

—¡Apajuí awemamu jutii Israel aidauti Apuji, iina agkanmitkag-matatus mina jujú emematiagmi! —wajaidau.

¹⁴ Jisusak burrun wainak nui ekeemi minau, duka duwik agagbaunum:

¹⁵ “Yaakat Siognumia aents aidautigmek ishamkaigpajum, diistajum atumin apujum burrunum entsatkau mina nunú”, tawa nu uminkauwai.

¹⁶ Jisus burrunum ekeemi wetaish, ni jintintaiji aidauk nu agagbau tawa nunak anentaimtugchajui, nunikajuitak Jisus nayaimpinum wakitkimtai, Jisus nuniktinun pachis yaunchuk agajajua duka, dekas imanisagkeap uminkae tusag adeajajui.

17 Aents aidau Jisusa nemajus yujaidauk, Jisus Lázaro jakaun untsuká inantun wainkaju asag, nuna dutikame tusag, ashí dita wainkamujinak tikichnash ujaidau. 18 Jisus aents dutikmainchau dutikamua nuna antukaju asag, aents aidauk Jisusan igkugkagtatus jintujajui. 19 Nuniagtai fariseo aidau pempentunisag tudayinak:

—¡Diisjuah, ashí aents igkugtatus ashintuinana! Ii chicham umikmag duka dutikmainchau emaji, —tiajui.

Griego aidau Jisusan wainkatatus kaunkamu

20 Jista tsawagmatai Apajuin emematiagtatus Jerusalén wegamunum, wajumak griego aents aidaush pachiinkajui. 21 Nunú aidau, Felipe yaakat Betsaidanmaya Galilea nugkanum pujuwa nuna jegaantag:

—Apu Jisus wainkatasa wakegaji, —tiajui.

22 Tima Felipe Andresan jegajua ujakú, nunik niijai atuegak Jisusan jegajuawag, tujamainawai tusag ujakajui. 23 Tusá ujaam Jisus chichaak:

—Wi Aentsmaga Akiinaun nayaimpinum wakitkittag duka yamaik tsawan umiintugkae. 24 Dekas tajime: Ajakan jigkayí akaká nugkaa ajachmak nunisag makichik jigkaik awai, untsu nugkaa initak ajaam jaka tsapai nejeakug kuashat jigkaijuwame. 25 Aents ju nugka juwi pujutan imá senchi wakegawk uwemjashtin ainawai. Untsu aents pujutin uyumachuk uwemjatin ainawai. 26 Aents mina umigtuktatus wakegawk nemagtuktinme, mina umigtin aidauk wijai pujusagtinai, tuja mina umigtin aina nunak mina Apagshakam eme anentinai.

Jisus ni mantamnatnuji etsegkamu

27 “Yamaik shiig kuashat anentaimekun waitiajai. ¿Wajintajaki: ‘Apawah, mina mantuawagtata nunak idaitustinme’, titajash? Tujash wika ní tabaun umiktasan tauwaitjai.”

28 Nuna tusa: “Apawah, amina senchijum aents aidaush iwaintukta”, tiuwai.

Nuna tai nayaimpinmaya chichaak: “Mina senchignak iwainakbaijai, tujash ashí aminí nagkaemaktata duwi awentsanuk iwainaktatjai”, tiuwai.

29 Nu tabaun nui aents ijunu antukag:

—Ipamtai, —tiajui.

Tuinai tikich chichaidau:

—Nayaimpinmaya aents chichaké, —tuidau.

30 Tiagtai Jisus chichaak:

—Juna chichaa nunak mina antumtijuktasag tatsui, atumin antumtijamkagtatus tawai. 31 Aents ju nugkaya aidau etegnagtina duka yamai jegawai, tuja yamaiya juwiki iwanch ju nugka juwi inama nunú depetkamu atata dushakam. 32 Mina numinum achii jag yakí takujiagmatai, jakan nantaakun, ashí aentsnak minai minaig ikaunmantatjai, —tiuwai.

33 Nunak ní wajuk maam atinaita nuna aentsun dekamtikak tiuwai.

34 Tutai aents aidau aiinak:

—Jutii chicham umiktina nuanuig: Kristuk tuke pujutnui, tusa agabauwa nu dekaji. Nunú taish, ¿wagka amesh Aentsmaga Akiinauk, maatasa yakí takuam atatui, tame? ¿Nu Aentsmaga Akiinaush yaita?

35 Tiagtai Jisus ayaak:

—Yamaikik atumjai ijunjan pujajai, tujash dukap tsawantak pujushtatjai, wajumchik tsawanchik pujuttajai. Witjai tsauptinjai betekmamtinnuk, eke atumjai pujag juwik wi jintinkagtamuk unuimag-tajum. Suwenum wekaguk dekatsui ni wegamujinak shiig wainak wegachu asa. ³⁶ Wi tuke tsauptinjai betekmamtinun atumjai pujag juwik dekaskeapi tujuttajum, atumesh wi tsauptinaitag nuna uchiji aminjum.

Juna Jisus tusa idayak, aentsun ejamki jiinki weuwai.

Judío aidau Jisusan dekaskeapi tichamu

³⁷ Jisus aents dutikmainchaun iwainag ditash wainainamunum takataish dekaskeapi tichajui. ³⁸ Dita nuninamunum Apajuí etsegint Isaiás agagbau:

“Apuh, ¿ya iina chichamenash dekaskeapi tuinawa?

¿Apush yana niina senchijinash iwaintuke?” tawa nu betek uminkauwai.

³⁹ Aatus nunidau asag dekaskeapi tumain dekapenachu. Tuja junashkam Isaiás agak:

⁴⁰ “Apajuí, nu aents aidaunak anentaimtanash anentaimainchau emakbau asag,

jiinchakam epetkamua numamtin ainawai.

Nuninchau ainakug mina chichamjun antukag pujutjin yapajinakuig, wi ditanak uwemtikmainaitjai”, tiuwai.

⁴¹ Isaiás juna tiuwa nunak, Jisusa imanjin wainkau asa, niina pachis tiuwai.

⁴² Tujashkam kuashat aents aidau, nuigtú apu aidaushkam Jisusnak dekaskeapi tiajui. Nuninakjash fariseon ishamainak iwainmainachu, ditá ijuntaijin tuke jiyaku jiyaam aig tusag. ⁴³ Nunak aents eme anenkagtamua nuna imá senchi wakegainak, Apajuí dekas eme anentam amaina nunak imanchau anentuinak nunikajui.

Jisus aentsun uwemtijatasan tauwaitjai tibau

⁴⁴ Jisus senchi jiiká chichaak: “Aents mina dekaskeapi tujutuna duka, mina Apag awetiuwa nunashkam dekaskeapi tuinawai.

⁴⁵ Tuja mina waituina duka, mina awetiuwa nunashkam wainainawai.

⁴⁶ Wika ju nugka juwig tsauptinnum wainmatiamua numamtuk aents aidaun dekamtikatasan taamjai, mina dekaskeapi tusa nemagtu-idauk suwenum wekagu wajukmaina numamtuk tudaunak takaa batsaminum tusan. ⁴⁷ Aents mina chichamjun antayatak umigtachunak wika bakushtatjai; wika aents aidaun bakutasanuk juwig taachmajai,

aentsun uwemtikatasan taamjai. ⁴⁸ Mina dakitjak, chichamjunash betek umiachun bakutnuk awai, chicham wi tukagtimag nunuwai tsawan nagkanbaunum bakujattinuk. ⁴⁹ Wika wi wakegamunak chichaatsjai, Apag mina awetiuwa nunú chichagkagtuka, nuniakum jintinkagtuata tujutbaun tajai. ⁵⁰ Nuaduí wika mina Apag umiktajum tukagtimua duka, pujut tuke atina nunap sukagtawa tajai. Tau asan wi atumin ujaajim, nunashkam mina Apag tujutmawa dutiksanuk ujaajime”, tiuwai.

13

Jisus ni jintintaiji aidau nawe nijatkamu

¹ Pascua jegatin tikiju wajasú ai, Jisus ni Apajin wegaku ju nugka ukuktinjin dekau asa, ni jintintaiji aidaun nagkamsa aneejakbaujin iwaintukui, wetatak pujusash imatiksaik aneamujin.

² Nunik yujumkan yuwinak pekaamsamunum Judas Iscariote Simogkan uchijiya nuna, Jisus sujutnum iwanch anentaimtijuwai. ³ Tuja Jisusak Apajuijai pujau taamujinak dekau, nunisag dekau ataktú Apajuiyai wakitkitnujin, nuigtú niina Apají senchimtika: Ashí ame diistá, tusa idaitusbauwa nunashkam. ⁴ Nuniau asa yujumak yuwaku pekagbaunum Jisus wajakí, awantak pataká nugkuagbaujin awimak toalla juki akachuma wajantuí, ⁵ nunik mantignum yumin yajaa apujus, niina jintintaiji aidau nawe nijattan nagkama nijatuk, toalla akachumamun juki ujugtuk emau.

⁶ Dutikak Simón Pedronashkam jegantun, nawe nijatjata tama:
—Apuh, amek ibauwaitkumek mina dawejuk nijatjumaitsume, —tau.

⁷ Tutai Jisus ayaak:
—Yamaikik wi juna jutikag juka dekatsme, tujash duwi dekaattame, —tiuwai.

⁸ Tusa tama Pedro chichaak:
—Apuh, amek mina dawejuk tuke nijatjugchattame, —tiuwai.
Tutai Jisus ayaak:

—Amina nawemin wi nijagchamtaig, amek wijaig ijunmaitsume, —tau.

⁹ Tama Simón Pedro chichaak:
—¡Untsu apuh, imá dawejuk nijatsuk, uwejush nijatjakum, buukeagshakam nijatjugta! —tiuwai.

¹⁰ Tutai Jisus ayaak:
—Yamá mainuk pata patakag maak pujumaitsui tsuwatjin ajapau asa, ayatak naweeg nijatam amainai, anmamtuk atumek tsuwatchau ainagme, tujash ashí tsuwat Chauk ainatsjume, —tiuwai.

¹¹ “Ashí tsuwat Chauk ainatsjume”, tiuwa nunak aents niina sujuktin jutuijai pachitkau asamtai wainu asa, tiuwai.

¹² Nuna ti ashí niina jintintaijin nawen nijatuk, Jisus ataktú ni awantak pataká nugkutaijin nugkujá mesanum jegantá ekeemas:

—¿Wi juna jutikajim dusha atumesh shiijak dekaajum? ¹³ Atum mina: Jintinkagtinú, Apú, tujutjum duka dekas iman asamtai tujutjume.

¹⁴ Wi Jintinkagtin, Aputnash Apuitkun atumin nawemin nijatjajim antsagmek, atumesh atumin kakagchaujum pempeentunikjum iwaintuniktajum. ¹⁵ Junak atumin ditash juna wainkaja jutiksag takastinme tusan iwaintakun aikajime. ¹⁶ Dekas tajime: Inakak apujin nagkaesauchi, tuja awemamua dushakam awekagtiuwa nuna nagkaesauchi. ¹⁷ Juna wi tajim jujú shiig dekaajum, atumesh umiktasajum takaagtaik, Apajuí shiig aneas pujustinme tusa yaimpak-tatjume.

¹⁸ “Tujash junak ashí atumin takun tatsujime. Wika shiig dekaajime atumnak wi etegjau asan, nunin aigkish duwik Apajuí chichame agagbauwa nui: ‘Wijai ijunag yuwina nuwiyag pempeentugkiag sujutkagtinai’, tibauwa nunash dekaajai. ¹⁹ Nuniyatkun junak uajajime, nu tsawan jegaku dekas Apajuí Uchijimpapita tujutminjum tau asan. ²⁰ Dekas tajime: Wi awemamun dakittsuk juwauk, mina jujuinawai. Untsu mina jujuina duka, mina awetiwa nuna juwinawai.”

Jisus Judas sujam atin etsegkamu

(Mt. 26.20-25; Mr. 14.17-21; Lc. 22.21-23)

²¹ Jisus nuna ti senchi wake besemag dekapeg, ashí antuinamunum paan iwainak:

—Dekas tajime: Atum ainajum juwiyag makichik minak sujutkat-tawai, —tau.

²² Nuna timatai niina jintintaiji aidaushkam yana takug tawa tusag, mai niinia, mai niinia wajaidau. ²³ Nuniai niina jintintaiji aina nuwiya, makichik Jisusa aneetaiijiya nunú yujumak yuwamunum Jisusai ayaumas yuwak eketu. ²⁴ Nunittaman Simón Pedro tutaya nu: Ame iniasta, tusa iwijau. ²⁵ Dutikam ni Jisusan:

—¿Apuh, dusha yaita? —tusa iniau.

²⁶ Tama Jisus ayaak:

—Yana wi pagkan uchutuan susattaja nunú atatui.

Tusa pagkan puuk juki uchutua Judas Iscariote Simogkan uchijiya nuna susauwai. ²⁷ Nuna dutika suwaig wamkes Judasan iwanch egkemtujui. Dutikamtai Jisus chichajak:

—Ame dutikata tame duka wamkesam dutikata, —tiuwai.

²⁸ Nuna tutaishkam makichkish anentaimtugchajui, ni sujam atinum takumpap tawa tusajag. ²⁹ Judas kuichkin kuitamin asa, kuichik chimpitain takaku asamtai, tikich anentaimsajag jista atinum at-sumna nu sumakta tusampash tawa, nuniachkush ujunauch aidau susata tusampash tawa, tiaju.

³⁰ Tama Judaschakam pagkan waujus yuwa jinkiuwai. Nunak kashi nunikui.

Yamajam chicham umiktin tibu

³¹ Judas jiinki wematai Jisus chichaak:

—Apajuí senchigtina nunak, wi Apajuí Uchijiyaitkun Aentsmaga Akiinawaitag duwi dekaawagtatui, nunak wi nuniktatag nuna wainainak Apajuinak eme anentiagtatui. ³² Wi niinak puyatjusa umigkamu asa, yaunchuk wi aajakbaujua nunak imanuk etittawai. ³³ Uchuchig aidauh, atumjai ijunjanuk kuashat tsawantaik pujushtajai. Judío aidaun: Egatkugmesh waitkashtatjume, timag dutiksanuk atumnashkam tajime. Atumek wi wegamunmag yamaikik minimain ainatsjume. ³⁴ Chicham umiktajum tibaun yamai wishakam tajime. Ashí iikdaisajum makí makichik aneeniamu iwaintuniktajum. Wi atum aneamujun iwaintukjim aikasjume atumshakam tikichjaish iikdaisajum aneenimain ainagme. ³⁵ Atum aaja pempeentunikjum aneediagtaik, dekas Jisusa jintintaijimpap ainawa tujabiagtin ainawai, —tiuwai.

Jisus Pedron uugtuktatme tusa ujakbau

(Mt. 26.31-35; Mr. 14.27-31; Lc. 22.31-38)

³⁶ Nuna tutai Simón Pedro iniak:

—Apuh, ¿tuwí wetatme? —tau.

Tama:

—Wi wetatag nuwig yamaikik minimain ainatsjume, tujash duwi pujusjum minitin ainagme, —tiu.

³⁷ Tutai Pedro ayaak:

—Apuh, ¿wagka yamaikish minimainchawaitja? Wishakam amijai jakatasan umintsan wekaejai, —tau.

³⁸ Tutai Jisus ayaak:

—¿Dekaskek wijai mantamnatasam umintsam wekagam? Dekas tajame: Eke atash shinatsaig kampakumá: ‘Wika Jisusnak waintsamjai tujuttatme’, —tiuwai.

14

Mina Apag pujamunum wenu ataktú taakun jukitjime tibau

¹ Nuna ti: “Atumek wi tajim nunú anentaimtakjum wake besemag pujuigpajum. Apajuyiaig dekaskeapi tusajum imá senchi anentaimkujum, minaishkam imanisjumek anentaimtajum. ² Nayaimpinmag mina Apag pujamunmag kuashat agkan awai atum pujumainuk. Nu achakuig ujamaitsujime. Nu iman au asantai, wi atum pujustinak umigkatjime tusan wegajai. ³ Yamai wenu atum pujustinun umikan, ataktú wakettsanuk taattajai, mina pujutajui pujustajum tusan atumin juwakun. ⁴ Atumek wi tuwí wegaja duka dekagme, nuniau asajum jintashkam wainjume, wajuk wi pujamunmash wamainaitjume dushakam.”

⁵ Tutai Tomás:

—Apuh, ame wegamuk dekatsug aniautish, ¿wajuk dekaik minitji? —tau.

⁶ Tutai Jisus ayaak:

—Witjai jinta numamtinuk, tuja dekasketnash wikitjai, nuigtushkam wikitjai pujutnash sukagtinnuk. Imá minaig kajinas anentaimaina duke mina Apajug jegamain ainawai. ⁷ Atum wi yaitja nunú shiig dekagkugmek, mina Apagshakam aikasjumek dekamain ainagme. Yamaiya juwikiuch mina waitjum nunisjumek mina Apagshakam wainjume, —tau.

⁸ Tutai Felipe chichaak:

—Apuh, Apa iwainkagtukta, nu wainká maak juwakagmi, —tiuwai.

⁹ Tama Jisus ayaak: Felipeh, tuke atum wijai ijunajum batsamin ainayatkugmesh, ¿eke shiig dekagtsumek? Mina shiig dekajuina duka, Apagnashkam aikasag dekainawai. Nuniaish, ¿wagka Apa iwaintugkata wainkatjai, tame? ¹⁰ ¿Dekaskeapi tujuttsumek wi mina Apagjai makichik aentsua numamtinaitag duka? Wi tajim nunak nuigtú iwaintajim nunashkam wi wakegamugnakek dutikatsjai. Mina Apag dutikata tibaun iwaintajime. ¹¹ Wi mina Apagjai pujau asantai, mina Apag minai pujawai taja duka dekaskeapi titajum. Nu dekaskeapi tichamin dekapeakjumesh, wi takaamu wainkugmekesh, dekaskeapi tujuttsajum dekapjustajum.

¹² Dekas tajame: Mina dekas Apajuin Uchijimpapita tusag umigtuidauk, ditashkam wi takaag juní nagkaemas takasagtin ainawai, wi mina Apag pujamunum wemataishkam. Awi wakan atumin pachisan Apajun segattajime, ni atumin yaimpaktinme tusan. ¹³ Atum ashí atsumamu pachisjum, mina Apajush wakegamu, wisha wakegamua nu segatkugminig, imatixsanuk amastajime, mina Apagnash shiig emematiagtinme tusan. ¹⁴ Atum mina pachittsajum dekaskeapi tusajum, ashí atsumamu segatkugminig imatixsanuk umiktatjai.

Wakaní Pegkejin awetittajime tusa Jisus anagkagtuamu

¹⁵ “Atum mina anenkugmek, wi chicham umiktajum tajim nunú betek umiktajum. ¹⁶ Dutika umigtakjuminig Apajun segattajai, atumiin

pujus tuke ichichtamtina nuna Wakaní Pegkejin awetugmati tusan. ¹⁷ Nunú Wakaní Pegkeji dekaskea nunak jintinkagtina nunak, aents mina umigtuchu aidauk jumain ainatsui, waintanash wainchau asag, ní tabaunash dekamainchau ainawai. Tujash atumek wainjume, nigka atumiin pujau asa, aantsag tuke atuminig pujutnai.

¹⁸ “Tuke bitaika numamtukek ukukchatnaitjime, waketjusnuk ataktú tajuatnaitjime. ¹⁹ Machik asa mina umigtuinatsu duka waitkachagta-tui, tujash atumek waitkattajume mantuawagmatai aneantatag duwi. Witjai pujutan sukagtinnuk, nunin asamtai atumshakam tuke wijaig batsamtin ainagme. ²⁰ Tujash nu tsawan jegattawai, nunikmatai shiig dekattagme, wi mina Apagjaig makichik aentsua nuninaitag duka, antsagmek wi atumjai ijutkau pujamushkam. ²¹ Aents wi chicham umiktajum timawa nuna umiakug dekas mina anentak nuniawai. Nuna nuniaun mina Apagshakam aneettawai. Aikasnuk wishakam aneettajai, dutikamu asajum aan nagkaemasjum shiig dekajuattagme.”

²² Tutai Judas (Iscariotechu) chichaak:

—Apuh, ¿amina nemagtamchau aidau wantiintutskesh itusamea imá jutiikesh wantinkagtuktatme? —tau.

²³ Tama Jisus ayaak:

—Mina anentuk wi taja nuna umiktatui; nudiaun mina Apajuk aneettawai. Dutikakui, wishakam mina Apagjai niina anentain tajuan tuke pujustinautjai. ²⁴ Untsu mina anenchau wi taja nunak umigtukchattawai. Atumin wi tajim duka mina chichamjuchui, Apag mina awetiuwa nuna chichamegai.

²⁵ “Junak atumjai pujag juwik ashí ujajime. ²⁶ Tujash wi mina Apajun segattajai Wakaní Pegkeji atumi ichichtamjatnun awetugmati tusan, nunú wi wemataish yaimpaktatjume nuniak jintinjamattajume, nuigtushkam ashí wi jintintuajim nunashkam anemtijamjattagme.

Jisus akatmamku tibau

²⁷ “Shiig agkan anentaimsa pujutan ukugjime. Wi shiig agkan anentaimsan pujutaijua nuna amajime, wika ju nugkanmaya shiig aneetan sukagtina nujai beteknak amatsjime. Nu uyumakjum anentaimkujum ishamá pujuigpajum. ²⁸ Wika wegajai, nuniknush wakettsanuk atumjai pujustasan tajuattajime, tabaushkam antugtukmaugme. Dekas mina shiig anenkugmek, wi Apag mina nagkaetasu asamtai, nui wegajai tabaug antugtakjumek shiig aneemain ainagme. ²⁹ Junak emtikan tajime, nu uminu wainkujum dekaskeapi timinjum tusan.

³⁰ “Atumjaig kuashat chichaa pujushtatjai, ju nugka juna apuji iwanch midau asamtai, nigka mina depetumainjig senchijig atsujui. ³¹ Tujash mina Apag tabaun umigkattajai, wi mina Apag aneamujun ashí dekaatnume tau asan.

“Wajagtajum, juka ukuaku wegagmi.

15

Jisus wika uva numijiya numamtinaitjai tibau

¹ “Witjai dekas uva numijiya numamtinnuk, untsu mina Apajui ajanak kuitamna numamtina duka. ² Mina kanaweg nejeachunak tsupiawai, untsu nejeaunak, jegamujinak asantak kuitamui aan nagkaemas nejektí, tusa. ³ Atumek wi jintintuamjim nu umiau asajum,

ajak jeeshji asanjamua numamtin ainagme. ⁴ Wi atumjai ijuntsan pujag antsagmek atumshakam wijaig ijutkau atajum. Ajakan kanawe, numijin achitkachu nigki kanaki auk nejemaitsui. Atumshakam numamtuk wijai ijutkau achakjumekek pegkeg aina duka iwainamait-sugme.

⁵ “Witjai dekas uva numijiya numamtinnuk. Atumek mina kadaujua numamtin ainagme. Wijai shiig ijutkauwa nunu pegkeg aidaunak iwainamainai. Atumek wijai ijutkau achakjumekek Apag wakegamua duka makichkish dutikmain ainatsjume. ⁶ Makichkitigmekesh wijai ijutkau achakjumekek, numi kanawe nejeachu asamtai tsupika ajapamu kukagmatai apetiamama numamtuk awajam atinaitjume.

⁷ “Tujash atum wijaig ijutkau pujakjum, wi ashí jintintuajim dushakam betek umiakjumekek atum atsumamu segattajum, nuni-akjuminig ashí amastinaitjime. ⁸ Atum pegkeg takaamu aina duke iwainagtaik, tikich aidaush mina Apagnash shiig emematiagtatuí, nuninak dekas mina jintintaig ainajum nunashkam dekgamawagtatuí.

Jisus niina jintintaiji aidaun, mina kumpag ainagme tibau

⁹ “Apag mina anenta aikasnuk atumnashkam aneajime. Wi aneajim antsagmek atumshakam aneenitajum. ¹⁰ Wi chicham umiktinun ukugjim ju umiakjuminig wishakam aneettajime, wi mina Apajun chichamen umiju asamtai, ni anenta aikasnuk.

¹¹ “Juna wi tajim nunak wijai betekak shiig aneasag dakujus pujustinme tusan tajime. ¹² Chicham umiktajum tibaun wi patasnuk tajim duka: Mina nemagtin aidautigmek pempentunisjumekek aneen-itajum, wi atumin aneajim antsagmek, tajim nuuwai. ¹³ Makichik aents ni kumpajin ayamjuktatus mantamna nu iwainawai senchi anejata nunak, nu anejata nuna nagkaesau anejatmainuk atsawai. ¹⁴ Atum wi tajim nu imatiksagmek umiautigmek mina kumpag ainagme. ¹⁵ Nuniau asagmin wika inak ainagme tumaitsujime. Inakak apuji takaamujinak ashí dekgachau ainawai. Wika atumnak kumpag ainagme tajime, mina Apag tujutbaunak ashí ujakjim nuaduí. ¹⁶ Atum minak etegtuachu ainagme, witjai atumin etegjaunuk, dutikau asan mina chichameg etsegkujum, ajak senchi nejegama numamtuk wajaktajum timajim duka ajumaish tuke atinai. Nuaduí atum atsumamujum mina pachittsajum mina Apag segamak amasagtinai. ¹⁷ Yaunchuk timajim dutiksanuk tajime: Mina nemagtin aidautigmek pempentunisjumekek aneenitajum.

Tikich aents aidauk kajegtamiagtinai Jisus tibau

¹⁸ “Aents mina nemagtuchu aidau, atum mina nemagtau asagmin kajegtamainakuish, adeagtajum, mina dekas nagkamchakug kajegtuku ainawai. ¹⁹ Atum ditajai betek agtaik, dita aneenina aikagmasajag anempamain ainagme. Tujash wi atumnak dita aina nunin ainum tusan etegjan midau emakbau asajum, ditajai betekchau ainajum duwi kajegtamainawai. ²⁰ Wi, ‘inakak apujin nagkaesachui’ timajim duka aneaku atajum. Mina waitkagsaju aina dutiksajag atum-nashkam waitkagmasagtinai. Mina chichamjun antugtukag umiidaug atum etsegbaun antuinakush, dutiksag umikagtatuí. ²¹ Nunak mina nemagtuídau asagmin imatijabiagtinai, mina Apag awetiuwa nuna dekajuinachu asag.

²² “Wi juwi taan chichaman etsegekachuitkuig ditá tudaujinig baku-mamainchau ainawai. Tujash yamaik mina chichamjun antukaju asag, wika deka chu asan tudaunak takaayajai tumain ainatsui. ²³ Mina kajetuidauk mina Apagnashkam kajejuinawai. ²⁴ Wi iwainajan dita wainainai tikichish dutikmainchaun takaschauwaitkuig bakumamain ainatsui. Tujash wi iwainaja takaamun wainainayatak ayatak kajegtunak, mina Apagnashkam kajejuidau asag bakumagtinai. ²⁵ Nunak dita chicham umiktinjin agagbauwa nui: ‘Wainak kajegtukagtinai’, tawa nunú uminu asamtai aikajuinawai.

²⁶ “Tujash wi mina Apajuiyan Wakaní Pegkeji dekaskea nuna jintinkagtinun awemattag nunú atumnak yaimpaktatjume, dutikak mina pachittsash shiig dekamtijamattagme. ²⁷ Dutijamainakui atumshakam yama nagkamawaik tuke wijaig batsamsau asajum, mina pachittsajum tikich aidaush ujaktatjume.

16

¹ “Nuna wi jintintuajim nunak minai kajintsá anentaimat megkaekaijum tabaunum tajime. ² Tsawan jegataik jega ijuntainum wayaagminish agaa jigmagtin ainawai, dutijamawag mantamainak: Juka Apajuí wakegamu takaju asá jutikaji, tiagtinai. ³ Nunak mina Apagnash, minashkam shiig dekajuachaju asag dutijamiagtinai. ⁴ Juna tajim nunak, nu tsawan jegagtamkujaish wi tibauwa nu adeagminjum tusan uajime.

Wakaní Pegkeji jintinjamattajume Jisus tibau

“Junak yaunchkek tichamiajime atumjai pujau asan. ⁵ Tujash yamaik mina awetiuwa nujai pujustasan wegajai, makichkitigmekesh tuwí wegame tusagmekesh inintsachugme, ⁶ wi nuna takuí ayatak wake besemag pekagjume. ⁷ Tujash dekaskea nuna tajime: Dekas wi juwi pujutsuk wegamua nu imá pegkejai. Wi wechataik, atumin yaimpak anentain ichichtugmamaina duka tajutjamaitugme. Nuaduí wi wenu nunak awetittajime. ⁸ Dutikam Wakaní Pegkeji taa, aents aidaun ditá tudaujin paan dekamtikattawai, pegkeg takata nuna, nuigtú aents aidaun tudau takaidaun Apajuí suwimkan susatna nunashkam. ⁹ Tudau takaina duka, mina dekas Apajuí Uchijimpapita tujutuinaitsu nu ainawai. ¹⁰ Wi pegkejan takaunuk mina Apajuí wetatjai, nunikmataig ataktuk waitkashtatjume. ¹¹ Wakaní Pegkejiya duke Apajuí ju nugka juna apujin suwimkan susatna nunash dekamtikattawai.

¹² “Atumin ujamainjuk juní kuashat ajutuí, tujash atumek yamaikik ashí dekamain ainatsjume. ¹³ Tujash Wakaní Pegkeji dekaskea nunak chichauwa nunú, ashí dekaskea nunak jintinjamattajume. Nigka ni wakegamujinak chichatsuk, mina Apagdaun antukbaujin, atak agtina nunashkam dekamtijamattajume. ¹⁴ Wakaní Pegkejiya nu mina imanjua nunak iwaintugmak, imá midaunmayanak atumnak dekamtijamattagme. ¹⁵ Ashí mina Apagdauwa duka midau ainawai. Nuaduí Wakaní Pegkeji imá midaunmayanak atumnak dekamtijamattawai taja nunak tajime.

Wake besemag pujamu shiig aneastinaitjume Jisus tibau

¹⁶ “Wajumak tsawantai minak waitkashtatjume, nunikjum dukapech tsawan asajum ataktú waitkattagme, eke mina Apajuí wegatsaig.”

17 Nuna tutai niina jintintaiji aidauk ditak pempeentunikiag iniini-nak:

—¿Wajuk nunash takua, wajumak tsawantai minak waitkash-tatjume, nunikjum dukapech tsawan asajum ataktú waitkattagme, eke mina Apajuí wegatsaig tujamji? ¹⁸ ¿Wajina takua: Wajumak tsawan asajum tujama nunash tawa? Wajuk takus tawa dekamaitsui, —tuidau.

¹⁹ Nuna tusag dekas iniasmi tusag anentaimiagtatman Jisus wainak:

—Atumin wi chichagkun: Wajumak tsawantai waitkash-tatjume, nunikjum dukapech tsawan asajum ataktú waitkattagme, tajim duká, ¿atumek pempeentunikjum iniininajum? ²⁰ Dekas tajime: Atumek wake besemag anentaimtugkujum buuttatjume, nuniagmin aents pegkegchau aina duka shiig aneeniagtatui mina mantuina. Nuninai atumshakam wake besemag pujamugmik sakapakjum ataktú shiig aneestatjume, wi nantakin wantintuktatjim duwi. ²¹ Nuwa uchig-matji jegagmak najaimak wake besemag pujuwame, nuniau uchin uchigmak shiig aneak najaimajakbaujinak kajimatame. ²² Anmamtuk atumshakam yamaikik buuttatjume, nuniagmin ataktú wi wantinkam-tai waitkajum, atumi anentaiminish shiig aneasjum dakujustatjume, nu dakujutnak makichkish emegkatjamain ainatsui.

²³ “Nunú tsawantaik makichkitigmesh inintsashtin ainagme. Dekas tajime: Mina pachittsajum mina Apag segamak, mina jintintaig asag-min ashí amastatjume. ²⁴ Duwikik atumek minak eme anenjuszumek mina Apajuk segachuitjume. Tujash yamaik segatajum, mina Apag yaimpakuí shiig aneasminjum.

Jisusai ju nugkanmayan ashí depetkauk

²⁵ “Yaunchkek atumnak augmatbaujai apattsan tuké jintinnujime. Tujash tsawan jegattawai, wi shiig paan mina Apajun pachisan ujak-tatjim nunú. ²⁶ Nunikmatai atumek tutupit mina pachittsajum Apag segatajum, wika atumi pachisnuk segatú pujugchattajime. ²⁷ Apajuk tuké atumnak anempajume, atum mina anentu asagmin, nuigtushkam Apajuí dekas awemamuapita tujutjum duwi. ²⁸ Wika Apagjai pujaun ju nugka juwig tauwaitjai, nunikun yamaik ju nugka junak ukuakun ataktú mina Apajuí wegajai.”

²⁹ Tutai niina jintintaiji aidau chichajak:

—Yamaik augmatbaujai apatka tutsuk shiig antumain tukagtiume. ³⁰ Yamaik dekaji amek ashí dekame, nunin asam jutii anen-taibaushkam shiig dekame, nuniau asam atsumatsme dita anentaibau-jin tujuttinme tusamek. Nuaduí jutiik dekas Apajuiyap awemauwaita tuinaji, —tuidau.

³¹ Nuna tiagtai Jisus ayaak:

—¿Yamá dekaskeapi tujutjumek? ³² Tujash yamaik tsawantak jegae, atum makí makichik kanagjum shimakjum, imá minakeuch ukugkittajum nunú. Tujash imá wikik juwakchattajai, mina Apag wijaig pujawai. ³³ Junak wika atumek wijai ijutkau batsatkujum, shiig agkan anentaimsajum pujusminjum tusan tajime. Ju nugka juwi pujusjumek kuashat waitiamu igkugtinaigtume, tujash nuniakjumesh minai kajintsá anentaimsatajum, ju nugka juwi iwanch pegkegchaun takamtikagtina nunak wi depetkajai.

17

Jisus niinu pachisa Apajuí segamú

¹ Nuna ti idayak Jisus nayaimpinum pagkai: “Apawah, minak tsawantak umintugkae. Minash ememattai etita aents aidaushkam: Dekas Apajuin Uchijimpapita, tusag dekajuatnume. Wishakam aminash dutiksanuk aents aidaunmash iwainaktajame, emematjamiagt-inme tusan. ² Ame minak ashí nugkanmaya aina nunak, nigki diistí tusam idaitugsaume, dutikakum senchigmishkam sujusmaume, mina nemagtin aidau ame sujusmauwa nunash pujut nagkanchaun susati tusam. ³ Nu pujut nagkanchauwa nunak, amina dekagmawag: Imá jukeapita dekas Apajuik, tujamainak, ame mina awetiuwaitam nunashkam: Dekas juwap uwemtikagtumainaita, tuidau jukiagtinaí.

⁴ “Wika ju nugka juwi pujusnuk emematjame aminak, nuniakun ame umiktá tusam tujutiwaitam nunash imatiksanuk takaakun dekamtikajai aents aidau emematjamtinme tusan. ⁵ Apawah, yamaik ame minash yaunchuk nughash najannatsaig amijai emematjamin aajabia imanuk etita.

Jisus ni jintintaiji aidau segatbau

⁶ “Ame ju aents aidau etegjam sujusuitam nunak, wishakam amina pachisnuk shiig jintintuawagjai. Duka aminuk sujusuitme, dutikamu asag ditashkam chichamjumnak betek umigtamainawai. ⁷ Nunidau asag yamaik ashí wi takasbaug aina nunak shiig dekaawaje, dekas Apajuí dutikata tibaunak betekap takasé, tusag. ⁸ Aikasnuk ame mina chicham etsegtugkata tusam tujutbaunak imatiksanuk ujakagmajai, dutikam ditashkam wakejus antukagmae nuninak: Dekas Apajuí awemamuap tauwaita, tusag dekaskeapi tujutuinaí.

⁹ “Duwi ditanun pachisan segagme aminu asagmatai, tikich aents mina nemagtuinatsu nuna pachisnuk segatsjame. ¹⁰ Ashí aents midau aina duka aminu ainawai, tujamtai aminu aidauk midau ainawai. Nunú aidau mina emematjuinawai, tikich aidaushkam Jisusa imanjin wainkatnume tusag.

¹¹ “Wika aminí minau asan ju nugka juwig nuigtuk pujushtatjai, tujash jujú aidauk juwainawai. Apawah pegkegmah, amina senchijum sujusbauwai wi kuitamag aikasmek kuitamkata. Iina umigtamainak ii makichik anentaimag nunisag ditashkam anentaimtinme. ¹² Wi ju nugka juwi ditajai pujaknuk, ame senchijum sujusbauwai ditanak kuitamnujai, makichkish emegkatkachjame, dutikamaitak makichik megkaekae, yaunchuk chicham agagbauwa nu uminu asamtai.

¹³ “Nunikmataish ditak shiig aneetnume, wi shiig aneag imanisajag tusan, eke anuí minitsuk segajame. ¹⁴ Amina chichamjumnashkam jintintuawagmajai, dutikai aents aidau ditanak kajejuinawai. Wi ju nugka juwiychuitag ditash nuninuk asagmatai. ¹⁵ Nunú aents aidaujai ijunag batsamsainum ditash batsasta tusanuk segatsjame, iwanch waitkainakuish ayamjukta tusan segajame. ¹⁶ Wi ju nugkanmayachuitag nunisag ditashkam juwiychu ainawai. ¹⁷ Amina chichamjum dekaskea nunak umigtamkatnume ditash pegkeemtikata. ¹⁸ Ditanak aents katsek aidau batsatbaunum ishimjai, chichamjumin jintinkagtuatnume tusan, ame mina awetiuwaitam dutiksanuk. ¹⁹ Wi amina takagkun mina pujutjunak ashí idaitusjame, nunisag ditashkam aminu

dekaskea nuna takagtamainak, ashí ditá pujutjinak idaitugmastinme tusan wakegajai.

Jisus ashí niina nemajin agtin segatbau

²⁰ “Imá jujú aidaunakek segatsjame, dita chicham etsejuinamun antuinak: Dekas nigkiap uwentikagtumainaita, tusag nemagtukagtin aidaun pachisnushkam segajame. ²¹ Wi amijai ijutkau asamtai, ameshkam minai ijutkam nunisag, ditashkam pempentunisag ijutkau atinme, nuninak jutiijaish ijutkau asag makichik agtinme. Nuniagtai aents amina dekaskeapi tujamchau aidaush, ame mina awetiuwaitam nunash dekajuatnume, tusan segajame. ²² Dutiksanuk amina iman-jum inagkeatjukiwaitam nunak, imatiksasuk ditanashkam wisha inagkeatkijai, ii makichik duke anentaimag nunisajag, ditashkam nuninuk agtinme tau asan. ²³ Wi ditajaig ajai, ame wijai ame, nunisag ditashkam makichkiuchia nunin agtinme. Nu dita nuninamun wainainak aents amina dakitjamin aidaush: Jisusnak dekas Apajuiyap awemauwaita, juna anea imatiksagkeap jutiinash anempaji, titinme.

²⁴ “Apawah, ame sujusbau aina nunak mina pujutaijui ditash pujusag, nugkash najannatsaig ame mina anentujakú asam, amina imanjum ashí mina sujusum nunash wainkatin atinme tusan wakegajai. ²⁵ Apag pegkegmah, aents amina dekaskeapi tus umigtamainachuk dekagmainatsui, tujash wika aminak wainjame, ju ame sujusbau aina jushakam ame mina awetiuwaitam nunak dekainawai. ²⁶ Wi amina pachisnuk ditanak shiig dekamtikamjai, aan nagkaemasnush tuke dekamtiksanke atatjai, ame mina anentam aantsag ditaish atí, nuniakui jutiishkam ditajai ijutkau amí tau asan”, Jisus tiuwai Apajin segaak.

18

Jisus achikbau

(Mt. 26.47-56; Mr. 14.43-52; Lc. 22.47-53)

¹ Jisus nuna ti inagnak, niina jintintaiji aidaun yajuak jiinki entsa Cedrón tutai amain katigká, numi olivos tutai ajakbaunum jegantaju. ² Judas Jisusan sujuktinchakam nunak shiig dekau, nui Jisus ditajai kuashtá ijunin asamtai. ³ Nunin asa Judas, kuashat suntag Romanmaya aidaun yajuak, nuigtú sacerdote apuji, fariseo aidau ditashkam, jega Apajui ememattain kuitamin aidau ishiakbaujai, lamparan, nuigtú jii ekemajag, nagkin tinamdaekag, Jisusan kautuawajui. ⁴ Imaninaig Jisusak ni dutikam atinjinak shiig dekagmamu asa, paan ditá emtin wajantá:

—¿Ya egagme? —tiuwai.

⁵ Tuinam dita aiinak:

—Jisus Nazaretnumiaya nu egainaji.

Tiagtai Jisus ayaak:

—Witjai nunak, —tumabiuwai.

Judas Jisusan unupiaigtatus wekagushkam, nui ditajai ijutkau asa, ⁶ Jisus: “Witjai”, tutai puyatkag wakettsag nugkaa kakekaju.

⁷ Nunikagmatai awentsag:

—¿Ya egagme? —tiuwai.

Tutai dita aiinak:

—Jisus Nazaretnumiaya nu egaji.

⁸ Tiagtai Jisus ayaak:

—Yaunchuk witjai timajim jama, mina dekas achigkatasa egatkugmek, tikich aina juka idaisatajum, wetinme, —tiuwai.

⁹ Nunak Jisus Apajin segaak: “Apawah, ame sujusbaunak makichkish emegatkachjame” tiuwa nu betek uminu asamtai tiuwai. ¹⁰ Nuna tusa taig Simón Pedro tutaiya nu, espada akachumamujin ukuini juwakug, dekas sumo sacerdote inake Malco daagtinun kuwishí untsujiya nuna asankauwai. ¹¹ Dutiktai Jisus Pedron chichajak:

—Espadajum jukim awajata, ¿amek, mina Apag waittsati tujutbauwa nunak umimainchauk anentaimtujam? —tū.

Jisus Anasa jeen ejegamu

¹² Nuna tusa taig suntag aidau, ditá capitanji, nuigtú jega Apajuí ememattain kuitamin aidaujai ijuntujag Jisusan achikag jigkajajui. ¹³ Dutikawag Anasa jeen ejegawajui Caifasa wegajin, nu mijantinig Caifás sumo sacerdote wajas pujau asamtai. ¹⁴ Nunú Caifás judío aidau chichajak: “Ashí aentsun ayamjuk uwemtijatnuk, dekas makichik aents mantamnamainai”, tiuwa nunuwai.

Pedro Jisusnak waintsamjai tibau

(Mt. 26.69-75; Mr. 14.66-72; Lc. 22.54-57)

¹⁵ Jisusan jukiag emagtai, Simón Pedro tutaya nu, tikich Jisusa jintintaijiya nujai ukunum pataesag weedau. Nunú tikich Jisusa jintintaijiya duka, sumo sacerdote waintai asa, Jisusan apú jeen awayagtai niishkam wayauwai. ¹⁶ Nunitai Pedrok agaag juwakui. Nunikmatai nu sacerdote waintaiji asa wayauwa nunú, waiti kuitamnun ajus Pedron awayauwai. ¹⁷ Nui Pedro waittaman, nuwa waiti kuitamin chichajak: —¿Amesh auna aentsun achikaja nuna jintintaijichukaitam? —tusa iniau.

Tama Pedro ayaak:

—Atsa, wika auna jintintaijichuitjai, —tau.

¹⁸ Tsetsek asamtai, sacerdote apujin inake aidau, suntajá apuji aidaujai, jiin ikapajag anamainak ijunbaunum Pedroskam nui jegan anamak wajau.

Sumo sacerdote Anás Jisusa dekajuatatus iniasbau

(Mt. 26.59-66; Mr. 14.55-64; Lc. 22.66-71)

¹⁹ Nuniai sumo sacerdote Jisusan jegantun, niina jintintaiji aidau pachis, nuigtú waji jintinkagtinume tusa iniau. ²⁰ Tama Jisus aimak:

—Wika ashí aents antuinamunum chichaujai. Tuke jintinkagtinujai jega ijuntainmash, jega Apajuí ememattainum wayaanush ashí judío aidau ijunainamunmash paan iwainakan chichaujai. ²¹ ¿Wagka minash ininjume? Minak inintsuk dekas wi chichaamun antuku aina nu, wajina pachisaya jintinkagtinuwe tusajum iniastajum. Dita wi tibaugnak shiig dekainawai, —tiuwai.

²² Juna Jisus tutai, jega Apajuí emematku ijuntain kuitamin makichik juwatki yapinun awatak:

—¿Amesh sumo sacerdotesh tu chichagkamum? —tiuwai.

²³ Dutikam Jisus ayaak:

—Wi pegkegchaun chichakmataig tujutta, wajina tija nunú. Wi pegkejan taja duwish ¿wagka awatame? —tiuwai.

24 Nuna timatai Anás Jisusnak jigkagbautak awemauwai sumo sacerdote Caifás pujamunum.

Pedro ataktú Jisusnak waintsamjai tibau

(Mt. 26.71-75; Mr. 14.69-72; Lc. 22.58-62)

25 Nuna dutikainai Pedroskam jii anamak wajattaman:

—¿Amesh juna aentsun achikaja auna jintintaijichukaitam? —
tuidau.

Tama Pedro chichaak:

—Atsa wichauwaitjai, —tiuwai.

26 Tusa titatman sumo sacerdote inake, Pedro kuwishí asankauwa nuna patayí jegantun chichajak:

—¿Wi amina Jisusjai numi olivos ajakbauwe nuwi niijai wajamin wainkamjamjama? —tau.

27 Nu tamashkam Pedrok ataktushkam aikasag: “Wichauwaitjai”, taig atash shinukuí.

Jisus Pilato jeen awayamu

(Mt. 27.1-2, 11-14; Mr. 15.1-5; Lc. 23.1-5)

28 Nunikmatai Caifasa jeenian Jisusa jukiag Romanmaya apu pujusá inamtaijin ejegawajui. Dutikawag pag levadurajai pachimtsuk inagkamu yutai Pascua tsawau asantai, judío aidauk nuwig wayachajui: Pegkegchau utsumakaja Pascuatin yuwachajaig, tuidau asag.

29 Nunidau asagmatai Pilato jiinki wajan iniinak:

—¿Jusha wajukamtaiya achikjumesch itagtuauagme? —tiuwai.

30 Tutai dita ainak:

—Pegkegchaun takachuitkuig jutika achikaik itagmaitujime, —
tuidau.

31 Tiagtai Pilato chichaak:

—Untsu atum jukijun, atumi chicham umitaigminish wajuk aentsush suwimak susami tibauwaita dutiksagmek suwinkak susatajum, —tiuwai.

Tuinam apu aidau chichainak:

—Jutii judío aidautik numinum achinag mantamnati tuinaji, tujash makichik Romanmaya apukesh, atum dutikatajum tichamu asaja iik dutikmaitusji, —tiajui.

32 Nunak Jisus yaunchuk chichaak, dutik mantuatin ainawai tibau uminu asantai tiajui.

33 Tiagmatai Pilato ataktú jega niina pujusá inamtaijin wakitki wayaa, Jisusa iniak:

—¿Amekaitam judío aidau Apujim? —tau.

34 Tama Jisus ayaak:

—¿Dusha amek anentaimsamek inintam, atsa tikich mina pachitus tujabiagmataig tujutam? —tiuwai.

35 Tama Pilato ayaak:

—Wika judiuchuitjai, ame pataim judío aina nunú, sacerdote apuji aidaujai achigmakag jujamkiag minai itagmawaje. ¿Wají pegkegchauwa takasmaume juna jutijamawagatkuish? —tau.

36 Tama Jisus ayaak:

—Mina inamtaijuk ju nugka juchauwai. Wi juwiya ataik, mina jintintaig aidau achikag judío apuji aidanum sujukainum tusag ayamjutuinak maanimain ainawai, —tiuwai.

³⁷ Tutai Pilato chichajak:

—¿Untsu nuniakmek amek dekas Apuapitme? —tau.

Tama Jisus ayaak:

—Ame tujtam duka dekaske. Wika ju nugka juwig chicham dekaskea nuna etsegkatasan tauwaitjai. Ashí aents chicham dekaskea nuna antukag umiina nu mina chichamjunak antugtuinawai, —tiuwai.

³⁸ Nuna timatai Pilato:

—¿Wajimpaya dekaskea dusha? —tusa iniau.

Jisusak dekas mantamnati tiagbau

(Mt. 27.15-30; Mr. 15.6-17; Lc. 23.17-25)

Nuna ti ukuak agaa jiinki, judío aidau ijuntatman chichajak:

—Wika ju aents bakumamainjinak dekajuachjai. ³⁹ Tujash Pascua jegakuig, aents achikbau makichik jiiktá takugmin tuké jiinuweg dutiksag, atumi Apugminash ¿jiikti tusagmesh wakegagmek? —tau.

⁴⁰ Nuna tutai ataktú ashí senchi untsumkag:

—¡Aanka jiikipa, dekas Barrabás jiiktá! —wajaidau.

Duka Barrabasak kasa aajakuí.

19

¹ Imatiagtai Pilato Jisusan suntag aidaun asutiatajum tusa inajui.

² Dutikamtai suntag aidaushkam jagkin chapikmajag atsejutain nanawanawag atsemitkakag, jaanch yamakaitkaun anugjag, ³ chichajuinak: —¡Juuwai judío aidaun Apujig, emematmi! —awajuidau.

Tuinakug yapinum awatuidau.

⁴ Dutikainai Pilatushkam ataktú jiintuki:

—Wika ju aents bakumamainjinak makichkish dekajuachjai, tau.

⁵ Tusa Jisusan jagki atsejutai najana atsemitkakbaun, nuigtushkam jaanch yamakaitkau anugjamunak imatiksag jiikiuwai, dutika Pilato chichaak:

—¡Juwi itanjai diistajum! —tiuwai.

⁶ Nunik jiinkimtai wainkag, sacerdote apuji aidau, achijatin aidaujai ijunag senchi untsumkag:

—¡Achigtá! ¡Achigtá! —awajuidau.

Imatiagtai Pilato ditan chichajak:

—Imatjakjumek atum jukijum achigtajum. Wika ni pegkegchau takasbaujin mantamnamainjinak dekajuachjai, —tiuwai.

⁷ Tutaishkam apu aidauk:

—Jutii chicham umiktin agagbauwa nu umiaku maumainaitji, wagki nigka, Apajuí Uchijiyaitjai tumamu asamtai, —wajaidau.

Pilato Jisusan ataktú iniasbau

⁸ Nuna imatiagtai Pilatushkam nuní senchi ishamkagtukui. ⁹ Nunik juga niina pujusá inamtaijin ataktú wayaa Jisusan iniak:

—¿Amesh tuwiyampaitpa? —tau.

Tamashkam Jisusak aikchau. ¹⁰ Ayaacham Pilato chichaak:

—¿Wagka minash aigtsume? ¿Dekatsmek wiitagjama achigtajum takunush, akupkatajum tusanush tumainaitag duka? —tiuwai.

¹¹ Tusa tama Jisus ayaak:

—Mina Apag dutikata tujamchakuig, makichkish minak dutijumaitsume. Tujash mina aminí itajiaja nu ainawai dekas amina nagkaetamsag tunamaina duka, —tiuwai.

12 Nuna tutai Pilato Jisusan, utusanuk jiikiag tusa kakantu, nuni-taishkam judío aidauk senchi untsumkag:

—Ame aanú akupeakmek Roma apujiya nuna kumpajig achattame. Aanka Jisusak nigki apuitjai tumamá wekaenuwe, nunin asa Roma apujiya nunak shiwajiyai, —awajuidau.

Jisus sujukbau

13 Nunú tuinamun Pilato antuk, Jisus agaa jikktajum tusa idayak, chicham dekaku ekeemtaijin ekeemsauwai hebreo chichamnum Gabata tutainum. “Gabata” tawa nunak “kaya ukatkamu” taku tawai. 14 Pascuatín yuwatnun uminainak batsatai, etsashkam tutupit wajasú asamtai, Pilato judío aidaun chichajak:

—¡Pai, juwi atumí Apugminak itantajime! —tau.

15 Tama senchi untsumkag:

—¡Mantamnati! ¡Mantamnati! ¡Achigtá! —wajagtai, Pilato chichajak:

—¿Atumí Apugminash wagkanuk achigtaja? —tiuwai.

Nu tamashkam sacerdote apuji aiinak:

—¡Aanka iina apujinchui, iina apujig Roma puja duke! —tuidau.

16 Tiagtai Pilatushkam:

—Achigtajum, —tusag ditai sujua idaisauwai, dutikamtai dita Jisusan jukiajui.

Jisus achigbau

(Mt. 27.32-50; Mr. 15.21-37; Lc. 23.26-49)

17 Dutikam Jisus ni achinjatnunak numi yapajiamun yanakí jinkiu, nain “buuk sakajua nuninai” tutainum jegatatus. (Duka hebreo chichamnumag Gólgota tawai.) 18 Nui ejentag achijag, nuigtushkam jimag magkagtinun achijag, Jisusan ejapeawag awajawajui. 19 Dutikawagmatai Pilato Jisusa chaiken taapanum: “Jisus Nazaretnumia, judío aidau apuji”, tusa agag adujtukui. 20 Duka hebreo chichamai, griego chichamaish, latín chichamaishkam agagbau aajakuí. Dutikamun Jisusak yaakat tikiju achigbau asamtai, kuashat judío aidau nui nagkaemaidauk nu agagbaun aujuidau. 21 Nu dutikamu asamtai, sacerdote apuji aidau, tikich apu aidaujai Pilatun jegantag aujuinak:

—‘Judío aidaun Apujiyai’ tusam agajum auk aikatsuk, juka ‘judío Apujiyaitjai tumamá wekaenuwe nuuwai’, tusam agagta —tiajui.

22 Nunú tuidaun Pilato chichajak:

—Wi agagmag duka nunisag atatu, —tiuwai.

23 Suntag aidau Jisusan achijag, jaanchjin jujukijag ipaksumta imajin ichijag makí makichik tinamdaekajui. Nuna dutikawag tikich dekak nugkutaiji ayatak yakiin nagkamsa apajá nugkaan ashimkamu asamtai, 24 suntag aidau ditá ditak pempeentunikiag chichainak:

—Dekas juka ichiagchagmi, yana kayajig jiinkit nunú dekak jukiti, —tiajui.

Nuní uminkauwai, duwik agagbau chichaak: “Mina jaanchjun, yana kayajig jiinkit nu jukitnai”, timawa duka.

25 Jisusa dukují, niina kajai, tikich María Cleofasa nuwe, nuigtú María Magdalanmaya aatus Jisus achigbaunum anijus ijunauidau.

²⁶ Nuniagtatman Jisus dukujin wainak, ni jintintaiji dekas niina aneetaiyya nunashkam wainak chichajak:

—Dukuwah, yamaik anuwai amina uchigmik, —tau.

²⁷ Tusa idayak, duwi ni aneetaiyya wajattaman:

—Anuwai amina dukuk, —tiuwai.

Nunú tima niina dekas aneetaiyyig Jisusa dukujinak juki jegá emauwai.

Jisus jakamu

(Mt. 27.45-56; Mr. 15.33-41; Lc. 23.44-49)

²⁸ Nuna ti Jisus ashí ni dutikmainjinak umikú asa, duwik agagbau uminkati tus:

—Kitamajai, —tiuwai.

²⁹ Tutai buitsnum vino chujuau aimkam pujaunum esponja ajugká juki, numi hisopo kanawen ayai takuji aapawajui. ³⁰ Dutikam Jisuschakam vino chujuauwak uwag chichaak:

—¡Yamaik ashí umikjai! —tusa tsunsumá jakauwai.

Jisus bijagnum nagki ijumu

³¹ Junak Pascua jegatsaig nuniku asamtai, apu judío aidau, aents achigbau aidauk achinjamutkek achagti, tusag dakitin asag, nunú tsawan ayamtaiya duka dekas puyatjusa diitai asamtai, Pilatun jegajiang chichajuinak: Suntag ishikata aents achijam detainana nuna kagkajin kupijag, ashí kuwajag yajuaktinme, tiajui. ³² Tima niishkam suntagnak imatiksag ishikauwai, dutikam suntagshakam dekatkau aents Jisusjai ayaumas achijam deta nuna kagkajiná kupigkajui, tikichnashkam dutiksag kupigkajui. ³³ Nuna dutikawag Jisusan jegantun diikmag, jaka nematai, kupigtsuk idaisajui.

³⁴ Dutikawaju ainaig makichik suntag nagki Jisusan bijagnum iju ichigkuí. Dutikam numpa yumijai saekiuwai. ³⁵ Wika nunak dekas wainkau asan etsegjai, wainkachbaugnak etsegtsujai. Wi wainai dutikawaju asagmatai, atumshakam shiig dekaatajum, nunikjum dekaskeap nunikuita timinjum tusan ujajime. ³⁶ Nuna ukunchin kupigkachajua nunak, Apajuí etsegтин agagbaunum: “Makichik ukunchinakesh kupigkachagтинai”, tibauwa nunú uminkauwai. ³⁷ Tikich Apajuí etsegтин agagbauwa nuwishkam: “Ijumu wainkagтинaitjume”, tawai.

Jisus ukusbau

(Mt. 27.57-61; Mr. 15.42-47; Lc. 23.50-56)

³⁸ Nuna dutikawagmatai, José yaakat Arimateanmaya, niishkam Jisusa jintintaiji asa, judío aidaun ishamau asa wakenmataik Pilatun jegaji: Jisusa iyashin wi jukin ukustajai, tusa segauwai. Tama Pilatushkam: Jukita, tima José wejí Jisusa iyashin jukiwai. ³⁹ Nuna dutika ai, Nicodemo Jisusan kashi ausatatus jegajiuwa dushakam, treinta kilos kugkuin mirra, áloe tutaijai pachinjamun takus tauwai. ⁴⁰ Nunikmatai Joseshkam nujai atuegak Jisusa iyashin jukiag, jaanch pegkeja jukiag kugkuin itanbauwai ukatuk pempeajag, judío wajuk ukumau ainawa dutiksag ukusajui. ⁴¹ Jisus achigbaunum ayaumas numi ajakbau aunum, aents ukustin waa taimu yamagmauch makichik aentskesh ukuschamunum, ⁴² judío aidau ayamtaiji tsawan ashí jegau asamtai, Jisusa iyashinak jukiag ukusajui nu imá tikiju asamtai.

20

*Jisus nantakbau**(Mt. 28.1-10; Mr. 16.1-8; Lc. 24.1-12)*

¹ Tumig tsawagmatai kashikmas suwe aig, María Magdalanmaya Jisus ukusbaunum weuwai, nunik jegakmá Jisus ukusá kaya aputuka ukukbau ekekam atatman wainak, ² tupi tupikakua Simón Pedro tikich dekas Jisusa aneetaijiya nujai pujaun jegajuawag chichajuinak:

—Iina Apujin ukusagma nunak jukiaje, tujash dekatsji tuwig ukusaje, —tusa ujakuí.

³ Tusa ujakajam Pedro tikich Jisusa jintintaijiya nujai ukusbaun diisagtatus wegajui. ⁴ Nunik mai tupikainayatak, tikich Pedro nagkaesau tupikau asa, niyá eemak Jisus ukusbaunum jegantuí. ⁵ Nunik jegantá tekená diikmá imá sabananak wainkauwai, tujash nigka wayachui. ⁶ Nuniai Simón Pedro ukunum juwaku taankug, Jisus ukusbaun utuauwai, nunik diikmá imá sabanak atatman wainkauwai, ⁷ nuigtushkam Jisusa buuké pempenjamuk dushá akanka shiig ninuja aipkimun wainkauwai. ⁸ Nunú niyá tantauwa dushakam wayaa niish wainak: Dekaskeap nantakne, tiuwai. ⁹ Ditak Apajuí chichame agagbaunum: Jisusak maamash ataktú nantaktinai tibauwa nunak aneenachu, nunidau nuna wainkag shiig dekaawajui. ¹⁰ Nunikag Pedro, tikich Jisusa jintintai aajakua nujai ditá jeen wakitkiajui.

*Jisus María Magdalanmaya wantintukbau**(Mt. 28.1-10; Mr. 16.9-11; Lc. 24.10)*

¹¹ Nuninaig Mariak juwak Jisus ukusbau agaajin ayaumas buutu wajau. Buutkabaikia Jisus ukusbaun tekenas diikmá, ¹² jimag nayaimpinmaya aents pujun nugkuaju chaiknum makichik eketai, tikich dawenmanini ekeemtatman wainkauwai. ¹³ Nu nunik pekajaidau iniinak:

—¿Wagka buutme?

Tama nuwa chichaak:

—Wika mina Apujin jujutkiagmatai, tuwig ukusagmae nunash dekachu asan buutjai, —tiuwai.

¹⁴ Nuna tusa ayampakmá aents wajattaman wainkauwai, dutikash Jisusapi tusag tachau. ¹⁵ Nuniai nu aents iniak.

—¿Wagka buutme? ¿Ya egame? —tiuwai.

Tama ni anentaimsag, ajak jakbaun kuitamnuskaitai tau asa:

—Ame Jisusa iyashí jukiwaitkumek tuwí ukusmaume nu ujatkata, wi jukitjai, —tiuwai.

¹⁶ Tutai:

—¡Maríah! —tiu.

Tama ayampatua diikmá Jisusan wainak hebreo chichamai:

—Rabuni, —tiuwai. (Nunak jintinkagtinú taku tiuwai.)

¹⁷ Nuna takug achikta tama Jisus chichajak:

—Achigkaipa, eke mina Apajuí waatsjai. Wetá nunikam mina dekaskeapi tujutin agma nu, yamaik iina Apají pujamunum wegajai tujamae tusam ujaktá, —tiuwai.

¹⁸ Nu tima María Magdalanmaya dushakam, Jisusa jintintaiji aidau batsatbaunum jegaa: Wi dekas Apunak wainkamjai, nuniai juna akatugmae, tusa ujakajui.

*Jisus ni jintintaiji aidaun wantintukbau**(Mt. 28.16-20; Mr. 16.14-18; Lc. 24.36-49)*

¹⁹ Nunú tsawantin kintabaunum, Jisusa jintintaiji aidaushkam, judío apuji aidaun ishamainak, waitin shiig epediag ijunag batsatainai, pachiachmau Jisus ejapena wajantá ditan kumpamak:

—Apajuí atumnash shiig agkan anentaimsa pujutan amastinme, —tiuwai.

²⁰ Nuna tusa uwejen achigbaun, bijagnum nagkí ijumunashkam iwaintukui. Nunitai Jisusa jintintai aidaushkam Jisusan wainkag shiig anejasui. ²¹ Nuna dutika iwaintuk Jisus ataktú chichajuinak:

—Apajuí atumnash shiig agkan anentaimsa pujutan amastinme. Mina Apag juwi awetiuwa dutiksanuk atumnashkam uwemat pachisjum etsegkatajum tusan awemajime, —tiuwai.

²² Nuna takug ditainini suut umpuinui, dutikak:

—Yamaik Wakaní Pegkeji jukittajume. ²³ Atum ju nugka juwi tsagkujashbauk, nayaimpinmashkam tsagkugnagchatnai. Untsu atum ju nugka juwish tsagkujamak nayaimpinmashkam tsagkugnagtainai, —tiuwai.

Jisus ataktú wantinkamu

²⁴ Nuwi Jisus wayaunak, Tomás Jimagmamu tutaya duka atsau asa wainkachui. ²⁵ Nuniku asamtai wainkau aidau:

—Apu wainkamji, —tusag ujaidau.

Tama Tomás chichaak:

—Wika Jisusa uwejen clavo akaetukbaun wainkan, nuigtushkam bi-jajin nagkí ijuagmaya nunash inujuan dekapsan, dekaskeap nantakne tumainaitjai, —tiuwai.

²⁶ Ocho tsawan asag ashí Jisusa jintintaiji aidauk ijunajui, nuwig Tomaschakam pujau. Waitinak shiig epenag batsataig ataktú Jisus ejapeen wajantá kumpamak:

—Apajuí atumnash shiig agkan anentaimsa pujutan amastinme, —tiuwai.

²⁷ Nuna tusa Tomas chichajak:

—Tsajam uwegmin mina uweg inuata dutikakum shiig diistá, juwi tantam bijajushkam inuata. ¡Utujimá pujutsuk, dekaskeapi tujutta! —tiuwai.

²⁸ Tama Tomás ayaak:

—Mina Apujuh, amek mina Apajuijuitme, —tiu.

²⁹ Tutai Jisus chichajak:

—Tomasah, yamai mina waitkaum duwi dekaskeapi tujutme. ¡Mina waittsuk dekaskeapi tujutuina nu imá shiig aneasagtainai! —tiuwai.

Jisus Apajuí Uchijiya nuna dekaatnume tabaunum agagbau

³⁰ Jisus aents aidau dutikmainchaun ashí iwainag niina jintintaiji aidaush wainainamunum takasua duka, ashí ju papinumag agagchamui. ³¹ Nuniaig juka: Atumesh Jisusak, Kristu, Apajuí Uchijimpapita, tusajum dekaskeapita takujum, pujut tuke atina nu jukimnujuk, tusan agatjime.

21*Jisus jintintaiji aidaun ataktú wantintukbau*

¹ Nunik tikich tsawantai ataktú Jisus kucha Tiberias tutai tugkitken batsatun wantintukui. Junak juní dutikauwai. ² Simón Pedro, Tomás Jimagmamutu tutai, Natanael Caná Galilea awa nuwiya, Zebedeo uchijí aidau, nuigtú jimag Jisusa jintintaiji aidau batsataidau.

³ Nuninamunum Simón Pedro chichaak:

—Namakan maatjai, —tau.

Tutai, tikich aidaushkam:

—Inum wegagmi, —tusag botenum chimpimjag shiyakaju, nunikagaju ajuntuinakua tsawampainakush makichkish maachajui. ⁴ Nunikag yamá tsawaig, Jisus kuchanum uwetus wajau, nunittaman niina jintintaiji aidau wainainakush, Jisusap wajawa tichajui.

⁵ Nuniai Jisus:

—Uchig aidauh, ¿makichik namakkesh maachugmek? —tiuwai.

Tama dita ainak:

—Atsá maachji, —tiajui.

⁶ Tiagtai Jisus chichaak:

—Retjum untsugnumanini ajugtatum dutikakjum namak achikatjume, —tuinam dutiksag ajugkag kuashat namak chimpimkamtai jiktakamag tujinkajui. ⁷ Nunikmatai Jisusan dekas aneetaijiya nunú Pedron chichajak:

—¡Auk Apu Jisusai! —tiuwai.

Tabaun Pedro antamuik kutugjin nugkujá namaká tseke iyagkuí.

⁸ Nuniai tikich aidauk botenum minidau, retnum namak chimpimkaun japisag, anumkatnuk cien metros au asantai. ⁹ Kukag jinkamag jii ikapagbaunum makichik namak, pagjai jiyamun wainkajui. ¹⁰ Dutikainai Jisus chichaak:

—Namak achikujum aanú wajumak itatajum, —tiuwai.

¹¹ Tutai Simón Pedro namak muun aidau ciento cincuenta y tres retnum chimpimkaun, botenum egkemtug japikí kukag jii, wajumak juki ejeetauwai. Imaan chimpimkash rednak ichiagchawai.

¹² Nunik ashí uminkamtaí Jisus chichaak:

—Tantajum yujumak yuwatajum, —tiuwai.

Nuna tutaish makichkish: Amesh yaitpa, tusagkesh iniaschajui, juka Jisusapita tuidau asag. ¹³ Nuna ti kaunkamtaí Jisus jegantá, pagkan juki tinamak, namakan jukishkam dutiksag tinamkauwai.

¹⁴ Junak Jisusak maamu nantakí kampatuma juwi niina jintintaiji aidau wantintukui.

Jisus Pedro kampatumá iniasbau

¹⁵ Yujumak yuwá nagkankamunum Jisus Simón Pedron iniak:

—Simón Jonasa uchijiyah, ¿minash jujú anentuina juní nagkaemas-mek anentam? —tiuwai.

Tama Pedro ayaak:

—Ehé Apuh, ame wi aneajam duka dekgatame.

Tutai Jisus chichajak:

—Mina aentsug aidau uwijá uchuchiji kuitamtaya numamtuk kuita-mjutkata, —tau.

¹⁶ Tusa ataktú iniak:

—Simón Jonasa uchijiyah, ¿minash anenmek? —tau.

Tama Pedro ayaak:

—Ehé Apuh, amek dekgatame wi aneajam duka, —tiuwai.

Tutai Jisus chichajak:

—Nuniakmek mina nemagtin uwija numamtin aina nunú shiig jintintuata.

¹⁷ Tusa kempatuma juna iniak:

—Simón, Jonasa uchijiyah, ¿minash anenmek? —tau.

Tama Pedro wake besekú, kempatuma juwishkam: Minash anenmek, tabau asa, nunik Pedro ayaak:

—Apuh, ame ashí dekagtame wi dekaskenum aneam duka.

Tutai:

—Untsu ame mina nemagtuina nunú uwig kuitamtayama numamtuk kuitamjuktata. ¹⁸ Dekas tajame, ame datsauch asamek, amek nugkujam ame wakegamunum wejakuítme. Tujash wi tajame, ame muuntuch wajasaminig, tikich aidau kuntujum awentamin anugtam-jag, ame weta tachamunmag jujamkiag etabiagtinaí, —tiuwai.

¹⁹ Nunak Pedro wajak maam atinaita nuna ujaak tiuwai. Nuna ti:

—¡Nemagtukta! —tiuwai.

Jisusa aneetaiji pachisa chichasbau

²⁰ Tima Pedro ayampá niimkamá Jisusa dekas aneetaiji, duwik tikich tsawantai yujumak yuwamunum niini ayaumas wajas: Apuh, yaita amina sujupaktinush, tusa iniasua nu minittaman wainak:

²¹ —Apuh, ¿tujash jusha wajukatnaita? —tau.

²² Tama Jisus ayaak:

—Wi wakegaknuk nigka iwaakuk pujaig taatin atajai tumainaitjai. ¿Amesh dusha wagka uyumame? Duka tutsuk amek minak nemagtukta, —tiu.

²³ Nunú tabaun tikich Jisusa jintintaiji aidau antukajui. “Dekas jakashtinai tawapita” tuidau. Tujash Jisusak: “Juka jakashtinai”, tusag tichauwai. “Wi wakegaknuk nigka iwaakuk pujaig taatin atajai tumainaitjai, ¿Amesh dusha wagka uyumame?” tiuwai.

²⁴ Junak Jisusa dekas jintintaiji aajakua nunú, ashí ni wainkamujinak, jintiamujinashkam dekaske tusa agajui. Dutikamu asamtai dekaskeapi tuinaji.

²⁵ Jisus takasbauwa duka shiig kuashtai, nunú makí makichik pachisa agamak, ju nugka juwig ayatak papikes piyakaintai.

Aatus atí.

JISUS CHICHAM ETSEGTKATAJUM TUSA ETEGJA ISHIAKBAU AIDAU TAKASBAU

Apajuí Wakaní Pegkeji anagkagtuamu pachisa tibau

¹ Mina anetaiju Teofiloh, wi yama nagkamchakun papiin agajan awetibiajam nunak, Jisus nagkamchak ashí takasbauji, jintinkagtuamujinashkam, ² ni nayaimpinum wegak takuniuwa nuna pachisan agatjabiajame. Eke nayaimpinum wetsuk, ni: Mina chichameg etsegtugkatajum tusa ishiaktinji etegjamu aidaun jintintuauwai, jutika takastajum tusa, Wakaní Pegkeji dutikata tabau asa. ³ Waitkasa maam nantakí, ni chichame etsegkatin aidaun etegjamua nuna, cuarenta tsawantai paan kuashtá wantintukui, dekas iwakuapi tujuttinme tusa. Nuniak Apajuí inabaujin pachis jintintuauwai.

⁴ Nui ditajai ijunag pujusá, Jisus ni etejamuji aina nuna chichajak:

—Jerusalegnun dakastajum, mina Apag Wakaní Pegkejin amastajime tusa anagtamamun ujakmajim nunú umintsagkik wegpaum. ⁵ Juagkak yumiik yamijatjauwai, tujash atumek dupak tsawan atsuk Wakaní Pegkejiya nujai yamigbau atatjume, —tiuwai.

Jisus nayaimpinum wakitkimu

⁶ Tutai ni jintintaiji aidaun iniinak:

—¿Apuh, yamaikik jutii apuji wajasam, yaunchuk agkan batsamiag nuninuk ekagtittam? —tuidau.

⁷ Tama Jisus ayaak:

—Mina Apajua duke tu tsawantinia dutikatnaita nuna umikua duka, atumek dekamaitsugme. ⁸ Ni Wakaní Pegkejin sujamsatta nuna senchiji jukijum, mina pachittsajum juwi Jerusalegnun, Judeanum, Samarianmaskam, ashí tikich nugka atushat aina nuwishkam etsegkattajume, —tiuwai.

⁹ Nuna tutai ditash dii ijunaig takuniuwei, nuniaig yujagkim ijikuí. Nunikmatai awenag wainkachajui. ¹⁰ Nunik Jisus nayaimpinum wetai pagkai dii ijunai, jimag aents pujan nugkuaju ditai ayaumas wajaantaju, ¹¹ nunikag ditan chichajuinak:

—Galileanmaya aents aidauh, ¿wagka nayaimpish diish ijunjume? Yamai Jisus nayaimpinum wegak takuniu wainkaujum junisag atak-tash minitnai, —tiaju.

Judas Iscariote kajemag jakamunum Matías etegkamu

¹² Nunú tusá tiajam Jisus chicham etsegtugkatajum tusa etejamu aidauk, Olivosa mujajin batsatu Jerusalén wakitkajui, tsawan ayam-tai tsawagmataig tikujuk wekaenasti, tibau asamtai. ¹³ Yaaktanun jegawag jega yakí tesamunum wakaju nui batsataidau asag, nuna daajig ju ainawai: Pedro, Juan, Jacobo, Andrés, Felipe, Tomás, Bartolomé, Mateo, Jacobo Alfeo uchijiya nunú, Simón Zelote tutai, Judas Jacobo uchijiya nunú. ¹⁴ Ashí nunú aidauk kashí kashinig makichik anentaiyaik ijunas Apajuin aujuinak ijunaidau, Jisusa yachi aidaujui, María Jisusa dukujiya nu, nuigtú tikich nuwa aidaushkam.

¹⁵ Nunú tsawantin ciento veinte ijunjai Jisusa nemajin aidau, nunikbaunum Pedro wajakí chichaak: ¹⁶ Yatsug aidauh, David Wakaní Pegkeji dekamtikam agak: Judas Jisusan achikintme tusa unupiagtinun pachis tibauwa duka uminkae. ¹⁷ Judasak jutijai ijunag wekagas niishkam jutii takaag jutiksag takaajakuí. ¹⁸ (Nuninaitak Jisusan sujak kuichik jukumui nugkan sumaku ainawai, tujash nigka kajeemag tsujimak achapai iyaak pujaká ampujin jiijá jakauwai. ¹⁹ Nunik jakamtai Jerusalegnumia aents aidau antukag, nunú nugkan Acéldama adaikajui ditá chichamen. Junak “nugka numpeagbau” taku tiajui.) ²⁰ Nuna nunikua nunak, yaunchuk David Salmosnum agak: “Niina jeeg ukumkimu atatui, makichik aentskesh nuwig pujuschatnai niina takatjinak tikich takastinai”, tiuwa nunú uminkae.

²¹ “Nunin asamtai Jisus jutijai pujusmatai tuke ijunag yujasajua nu jutijai batsatainawai. ²² Duka Juan Jisusan yamijua duwi nagkamas, tuke Jisusjai wekagas, nayaimpinum wegaunash wainkauwa nuwiya amainai. Nunin asa imá shiig Jisus nantakbaun pachisash jutijai betekak shiig etsegmainai.”

²³ Pedro tutai, jimag aentsun ju atí tiaju, José daagtin Barsabás tuuta, Justo tuuta awagmatia nuna, tikichin Matiasan. ²⁴ Nuna tiagmatai Apajuin aujuinak: “Apuh, amek ashí aentsú anentaimtajig dekauwaitam ibau asam, ju jimaja juyash yaita ame etegkamush, nunú iwainakta juuwai tusam, ²⁵ niishkam ame chichamjum etsejuinag juna uyumakti, Judas ni tudau takaamujin waittsatnujiya nuwi wegak ukukí nuna takastí tusam”, tiajui. ²⁶ Tusa Apajuin segag, José kayajin, Matiasa kayajijai egkea pegajajui, dutikamunum Matiasan kayají jiinkiuwai; nunikmatai, Jisus chicham etsegtugkatajum tusa ishiaktinji etegjamu once juwakua nuanuí Matiasan pachiaawajui.

2

Wakaní Pegkeji aents aidau egkemtugbau

¹ Tsawan jista Pentecostés tutai tsawagmatai, ashí Jisusa nemajin aidauk dita tuke ijuntaijin jeganum ijunjai. ² Nunik nui ijunai, dase minak wajukeya imatuk nayaimpinmaya senchi uutun, ashí nu jeganum batsatuk antukajui. ³ Nu imatbaunmaya jiiya numamtin, ashí aents nui ijunanak makí makichik buuken pekaamtujui. ⁴ Nunikmatai Wakaní Pegkejishkam ashí aentsun egkemtujajui, dutika Wakaní Pegkeji chichamtikam tikich chichaman chichaidau.

⁵ Nunú tsawantinig Judío Apajuinun puyatjus umin aidau, tikich nugkanum batsamin aidaushkam Jerusalén jista asamtai ijunjai.

⁶ Nunú imatuk uutbaun antukag kuashat aents aidau ijunjai, nunikmag makí makichik ditá chichamen chichaidaun antukag puyatkajui. ⁷ Nunikag puyatkag ditak pempentunisag:

—¿Ju aents aina jujú Galileanmaya ainatsuak? ⁸ ¿Nuninaitkujash utusaya imatiksash ii chichamenash chichainawa? ⁹ Juwig ijunjaje: Partianmaya, Medianmaya, Elamnumia, Mesopotamianmaya, Judeanmaya, Capadocianmaya, Pontonmaya, Asianmaya, ¹⁰ Frigianmaya, Panfilianmaya, Egiptunmaya, juka ditak nugka Libia tutaya nuwiya, Cirene tutaiya nuna nagkaikiag atushat batsamin ainawai. Tuja Roma batsatushkam, ¹¹ wajumak judío aidau, nuigtú tikich ayatak judío atajai tumabiag judío waigkú aidaujai kaunkaje. Tuja Cretanmaya

aidauskam, Arabianmaya aidaujai kaunkaje. ¡Jutiishkam ashí iina chichamen Apajuí imanjin pachis etsejuina duka shiig antuinaji! — tudayinau.

¹² Nuna tusag ashí aents aidauk senchi puyatkag:

—¿Wajukaya junash juninawa? —tudayinau.

¹³ Juna aatus tuinai, tikich aidauk tuke aneas dushikinak:

—Namepejajama, —tuidau.

Pedro chichagkagtukbau

¹⁴ Tusa tiagtai Pedro ditá kumpají aidaujai ijunag eketu wajakí senchi chichaká: “Mina pataag judío aidauwah, ashí Jerusalén batsamin aidauwah, jujú shiig antuktajum wi titatjim nu. ¹⁵ Atum namepejaje tukagtajum duka nuninchauwai, kashikijamamah. ¹⁶ Ii juniag juka duwik Apajuí etsegtin Joel nuniktinai tibauwa nu uminkui juniaji, duka:

¹⁷ ‘Ashí aents aidauk, tsawan inagnamunum Wakaní Pegkejin susatnaitjai.

Dutikamu asag ditá uchijí aidau, nawanji aidauskam mina pachittsag etsejiagtinai.

Datsauch aidauk paantak iwaintakun, muuntuch aidau kajanum iwaintuktinaitjai.

¹⁸ Wakaní Pegkejiya nunak, aishmag mina nemagtuidaun, nuwa aidaujai betek amastinuitjime.

Dutikawajam duwi mina pachittsagmek etsegtugtinuitjime.

¹⁹ Nayaimpinmaya ishamain aidau iwaintuktinuitjime.

Nugkaashkam duwikish wainkashbaun iwaintuktinuitjime numpan, jiin,

nugkanum senchi bukuitamun.

²⁰ Etsag etsanjashtinai, nantushkam numpa kapantuwa iman wajastinai,

eke Apu Apajuí minitin tsawan iman atina nu jegatsaig.

²¹ Ashí aents Apu Apajuin segauk uwemjagtinai’, tawai.

²² “Israel aents aidautigmesh wi chichaakui antuktajum: Jisus Nazaretnumiaya nuna Apajuí niina senchijin susauwai, dutikam aents dutikmainchaun atumin iwaintugmakajui, dekaskeapi tujuttinme tau asa, duka atumek shiig dekagme. ²³ Tujash Apajuí yaunchuk nunikti tiu asantai, atum achikjum aents pegkegchau aidauknum sujukuitjime, dita numinum achijag maatnume, tusajum. ²⁴ Tujash Apajuí ataktú inankiuwai ni jaak najaimak waittsamujija nuna agkanmitka, dutikamu asa jaamua duka Jisusnak depetkachui.

²⁵ “Davidchakam Jisusan pachis agajui:

‘Wainbaijai mina Apujuk tuke wijai pujaun,

mina untsujuinini, makichkish ishamain ajiní tujutu asa.

²⁶ Nuaduí mina anentaijuish shiig anejai nuniakun shiig aneasan kantamjai,

jakanush nantaktinapitja tau asan.

²⁷ Apajuiyah, mina wakanjuk ukumatainmagke amek idaitugsash-tatme.

Tuja amina inakem pegkegma duka kaugtí tusamkesh idaisashtatme.

²⁸ Ame inaktugsauwaitme jinta pujutnum ekagta nunú.

Dutijuam amek minai pujau asam, minashkam shiig aneemtijusuitme.’

²⁹ “Yatsug aidauh, shiig dekaji jutii aidautik iina muunji David aajakua nu jakamtai ukusbauwa duka. Nu ukusbauk yamaikishkam awai. ³⁰ Tujash Davitak Apajuin etsegtin asa dekaajakui, Apajuí chicham yapajimainchaun anagkuak, ni wegantunum makichik aki-inatna nu Apu atinai tusa. ³¹ Nuna aatus ujaam dekau asa, Kristu maawagmatai, Apajuí ukusbaunmag idaitsuk, inankimu asa kaugchat-nunashkam nuniktinai tusa etsejajakui. ³² Nunú Jisusan Apajuí inanki-uwa duka, jutii ashí wainkau asaja etsegtuinaji. ³³ Dutikam nantakí niina Apají inamtaijin untsujin ekeemsauwai. Nunik Apajuí Wakaní Pegkejin amastinaitjime tusa anagkagtuauwa nuna awetugmamumu minamu antukugme, waintash yamai wainjum nuuwai. ³⁴ Nayaimpinum wakauwa duka Davidchauwai, nigki juna agak:

‘Apu mina Apujun chichajak, ekeemsata mina untsujui,

³⁵ nunikamin wi amina shiwajum aidaunak amina dawemin ikautkat-jame,

dutikamtai ame wajuk dutikattame nu dutikamnum’, tiuwai.

³⁶ “Duka ashí Israel aents aidautik shiig dekamain ainaji, nunú Jisus atum achigjum mauwaitjum nuna, Apajuí atumi Apujum ema ni Uwemtikagtin atí tusa etegkauwai.”

³⁷ Nunú tabaun antukag puyatuk kuashat wake besemag anentaim-jag, Pedron, nuigtú tikich aidau Jisus chicham etsegtugkatajum tusa etegkamu aina nuna iniinak:

—Yatsug aidauh, ¿tujash jutiish wajukmainaitji? —tuidau.

³⁸ Tiagtai Pedro ayaak:

—Tudau takat idaikujum pujutjum yapajiatajum, nunikjum makí makichik Jisukristu daajin yamimagtajum. Nuniagmin Apajuí tudaug-min tsagkugtamjag, Wakaní Pegkejinash amastinme. ³⁹ Apajuí anagk-agtuamun Joel tiuwa duka atumdau, atumi uchijum aina nudaun, nuigtushkam ashí nugkanum atushat batsataina nudaunush atinun tiuwai. Nunak iina Apuji iina Apajuijiya nu aents aidaun midau atinme tusa untsuktin asa, tiuwai.

⁴⁰ Nuna ti, tikichnashkam kuashat chichaman aents aidaun tiuwai:

—Aents pegkegchau takaina duka atumek uwemtugtajum.

⁴¹ Tusa Pedro tabaun antukag dekaskeap tawa tuidauk, kuashat aents yamimakajui. Nunú tsawantinig Jisusan dekaskeapi tuidauk tres mil aents kawegkajui. ⁴² Jisus chicham etsegtugkatajum tusa etegjamu aidau jintintuamun betek umiinak, shiig ijuntsag pempentunisag yainidau dita ajuinamujjai. Nuninak Apajuin aujuinak ijunjag, Jisus minak anentaimjutsajum pag yuwatajum tibauwa dutiksag yuwidau.

Nagkamchak Jisusa nemagkaju aidau pujutji

⁴³ Jisus chicham etsegtugkatajum tusa etegjamu aidau, aents dutik-mainchaun kuashat iwainaja takaamun wainkag puyatjusag diidau.

⁴⁴ Nuninak Jisusan dekaskeapi tusag nemajuidauk shiig ijuntsag bat-sataidau, nuninak ashí ditá wajiji ajuinamujai atsubiagtaik iikdaisag sudayidau. ⁴⁵ Nunidau asag, ditá wajijin sujukag, nugkenashkam sujuk, makí makichik atsumainamun diis kuichkin akandayidau.

⁴⁶ Kashi kashinig juga Apajuí ememattainum ijuntsagké aidau, nuninak Jisus mina anentaimjutsajum pag yuwatajum, tibauwa nuna ditá jeen ijunjag shiig anendaisag dakujusag yuwinak, ⁴⁷ Apajuin emematuidau.

Imadiagtai ashí aents aidaushkam wakejus diinau. Nunidau asagmatai Apajuishkam kashí kashinig aentsun uwentikak ikaweau.

3

Aents wekaechaun Pedro etsagagbau

¹ Makichik tsawantin Pedro, Juagjai jega Apajuí ememattainum wegajui etsa dukap tegau ai, Apajuí aujku ijuntai jegau asamtai.

² Nunú jega Apajuí ememattaiya nuna waitiji daajig Shijjam tutai aajakuí, nunú waitinum aents shutú akiinkush nuninuk akiinau asamtai, kashí kashinig waitinum itan apujin asa apukiuwai, aents wainiagtai kuichkin segamti tusag. ³ Nunin asa, Pedro Juagjai jega Apajuí ememattainum wayattak minittaman wainak:

—Wait aneamam kuichik sujustá, —tusa segau.

⁴ Tama Pedro Juagjai wainkag:

—Dijattsakiah, —tiu.

⁵ Tama shutuuk sujustatkumpap tujutua tusa dakau. ⁶ Nunitai Pedro chichajak:

—Kuichkik atsugtawai, oroshkam atsugtawai, tujash mina ajuta nuna amastajame. Jisukristu Nazaretnumiaya nuna daajin tajame: ¡Wajakim wekaesata!

⁷ Nuna takag uweje untsujin achiká awajkiu. Dutikamuik nawe, wanushkam pegkeg wajasú. ⁸ Nunikmatai tseke wajakí wekagu, nunik ditajai ijunag jega Apajuí ememattainum nigki wekagas tsekeas dekapki, Apajuí emematki wayau. ⁹ Nunik wekagas Apajuí emematan ashí aents wainaidauk, ¹⁰ jega Apajuí ememattai waitiji Shijjam tutainum ekeemas segamá ekeemnuwe dukeapi, tusag puyatjuk ishankag diidau, wajukag ankae tusag.

Jega Apajuí ememattainum Pedro chichagkagtukbau

¹¹ Pedro, Juagjai shutú etsagagbauwa duka ditanak akupeachu. Nuniai ashí aents aidauk nuna antukag, pisajag Salomón waiti ujabau tutainum pujuttaman jegaantag, ijuuntug puyatjuk diidau.

¹² Imatikainam Pedro aents aidaun chichajak: “Israel aents aidauwah, ¿wagka imanikjumesch puyatkaugme? ¿Wagka imanikjumesch diijatjume? Iina senchijinkish juka etsagagchaji. Jutii imá pegkeg asajaikish juka aikatsji. ¹³ Junak iina muunji Abraham, Isaac, Jacob

aina nuna Apajuijiya nunú, mina Uchijun Jisusan ememattinme tusa jutikae. Atum achiká sujukagminish Pilatok akupkata taig atum dakitjauwaitjum nuna. ¹⁴ Aents pegkejam, pegkegchau takachu ayamjutsuk, aents pegkegchau magkagtin ayamjakjum jilkiuwaitjume.

¹⁵ Nu dutikakjum Jisus dekas pujutan sukagtina nunú mauwaitjume. Tujash Apajuí inankiuwai, duka jutiik ashí shiig dekainaji, wainkaju asaja. ¹⁶ Atum jujú tsagaju wainjum juka, Jisusai kajinas anentaimu asa tsagaje. Jisusai kajinas anentaimak tsagaja juka ashí atumshakam wainjume.

¹⁷ “Mina yatsug Israel wegantu aidauh, wika shiig dekajai, atum atumi apujum aidaujai, Jisus mauwaitjum duka dekachu asajum mau ainagme. ¹⁸ Jisusan dutikawajua nunak, duwik Apajuí etsegitin aidau: ‘Uwentikagtin atí tusa etegkamua nunak maawagtin ainawai’,

timawa nunú imatiksagmek umikugme. ¹⁹ Nuniku akugmesh yamaik tudau takat idaikujum pujutjum yapajiatajum, Apajuí atumi tudaugminash esaktugmag ichichmamtan amastinme. ²⁰ Tuja Apajuí atumi uwemtijamjatnun Kristun, yaunchuk etegkauwa nuna ataktú awetugmatnume. ²¹ Tujash yamaikik Jisukristuk nayaimpinmag pujuttawai, ashí wají aidau yamagmitkamu tsawan jegatnun, Apajuí etsegtin aajakaju etsegkaju aina nu jegatí tusa. ²² Moiseschakam ii muunjin chichajak: ‘Apu Apajuí makichik aentsun jutii wegantunmayan mina chichamjun etsegtujin atí tusa etejatnai mina utugtukua dutiksag, nunú antugkatajum. ²³ Tuja ashí aents nunú Apajuí etsegtina nuna chichamen antugkachajuk tuke megkaekagtinaí, niina aentsji aidaujaish ijunjachagtinaí’, tiuwai.

²⁴ “Tikich Apajuin etsegtin Samuelash aikasag tiuwai; tuja nuigtú tikich Apajuí etsegtin aidaushkam Jisusan pachisag aikasajag ni taatnujinak tiajui. ²⁵ Apajuí niina etsegtin aidau anagkuauwa duka atumdauwai tuja jutii muunji aajakajua nujai chichaman apakua dushakam atumdauwai. Nuna tiuwa nunak juna Abragkan tiuwai. ‘Amina tijajum wegantunmaya makichik akiinatna nuaduí ashí nugkanmaya aidauk pegkegnun yumigsamu agtinaí’ tiuwai. ²⁶ Apajuí ni Uchijin maawagmatai inanki dekatkawk atumná awetugmae, mina Uchig yaigtinme dutikam makí makichik tudaujin idaisatnume tujamu asa.”

4

Pedro Juagjai apu aidau emtin chichakbau

¹ Pedro Juagjai aents aidau aajak chichaa wajai, sacerdote aidau, jega Apajuí ememattaiya nuna kuitamnun apuji, saduceo aidaujai kautkaju. ² Nunikag Pedro Juagjai aentsun jintintak: Jakau aidau nantagtinak, Jisus maam nantaak iwainak ukukni, tuidau asagmatai kajakaju. ³ Nunik achiká júkiag aents achiká egketainum egkeawag ukukijaju etsa akagu asantai, kashin dekaajuami tusag. ⁴ Tujash kuashat chicham etsegbaun antukaju dekaskeapi tuidauk, imá aishmagkuk dekapam cinco mil aents wajasajui.

⁵ Kashinia duwi Jerusalén ijunjaju judío apuji aidau, tikich apu aidaushkam, nuigtú chicham umiktinun jintinkagtin aidaujai. ⁶ Nuanuí pujau sumo sacerdote Anás, tuja nuwig pujuidau Caifás, Juan, Alejandro, nuigtú tikich sacerdote aidau, sumo sacerdote patayí aidaushkam. ⁷ Nunikag, Pedron Juagjai itantagmatai ejapeen awaantag iniinak:

—¿Yana senchijinia jusha, yana daajinia jutikagme? —tuidau.

⁸ Tama Pedro Wakaní Pegkeji chichamtikam chichaak:

—Yaakta apuji, Israel aents aidau apuji aidautigmeshkam antuktajum: ⁹ Atumek aents jau pegkegnun yaigkag nu pachisjum iniinjume, junash utugkag etsagaje tusajum shiig dekaata tusajum. ¹⁰ Nunin asantai ujaktajime shiig dekaatajum, ashí Israel aents aidaush dekaatnume, ju aents ashí wainjum juka, Jisukristu Nazaretnumia atum achijum maawagmin Apajuí inankiuwa nuna daajin tsagaje.

¹¹ “Nunú Jisus atum aidautijum, aents jegá jegamin aidau kayan dakitug idayin aina dutikajum idaisauwaitjume. Tujash yamaik kaya dekas jegá ichichkatin apututia iman wajasé. ¹² Tikichik iina

uwemtijamainuk atsawai, ashí nugka aina nuwiyagkesh Apajuí juna nemajuinak uwemjatnume tusa awemamuk tikichik atsawai”, tiuwai.

¹³ Pedro Juagjai ajankas chichaagtai apu aidau wainkag, papi-nash ausachu unuimagchau aina nuninaikush itugsaya imatikash chichainawa tusag anentai jegagchaju, nunikag dekas Jisusa jintin-taipap ainawa, tusag dekaawaju. ¹⁴ Aents tsagajush nuwig wajaun wainaidau asag, aikag nuní atsu jama tusag tumain dekapenachu. ¹⁵ Nunidau asag agaa jiijaju, nunikag juwakag ditá ditak ijunag chichainak:

¹⁶ —¿Au aents aina dusha utugkagtatji? Aentskesh dutikmainchaun aikawaja nunak ashí Jerusalegnumia aidauk wainkajajama. Imatikawaju asagmatai waitai tusaikish tumaitsuji. ¹⁷ Tujash nuna pachis augmatiagtai tikich aidau Jisusan dekaskeapi tiinum tau asa: ‘Yamai nagkamsagmek Jisus pachisjumek makichik aentskesh ujakaig-pajum, nu idaichakjuminig suwimkan amastatjime’ timí, —tuidau.

¹⁸ Tusag Pedron Juagjai untsukag:

—Yamai nagkamsagmek Jisusa daaji pachisjumek makichik aentskesh jintintuawaigpajum, —tiaju.

¹⁹ Tama dita aimainak:

—Atumesh aentaimstajum ¿Apajuí emtinish pegkegkai ni umigmaina nu idaiku atum umigmaina dusha? ²⁰ Jutiik ii wainkamu antukbau aina duka tutsukek idaimaitsuji, —tuidau.

²¹ Tiagtai apu aidau:

—Atum nu idaichakjuminig suwimkan amastatjime tusag awemaju, suwimak jumainnak waitkachaju asag. Nuigtú aents aidaush nunú dutikamun wainkag, Apajuin emematuidau asagmatai. ²² Makichkish tsagaumainchau aig etsagagbauwa duka cuarenta mijan tumain ajujakuí.

Jisusa nemajin aidau Apajuí ausagbau

²³ Pedron Juagjai jiiikí awemajui, dutikam Jisusa nemajin aidau batsatbaunum jegawag, sacerdote apuji aidau, tikich apu aidaujai tiagbaunak aatus tujabiagmae tusag ashí ujaidau. ²⁴ Tusa ujainam antukag ashí ijunag Apajuin aujuinak: “Apuh, ametme nayaim, nugka, nayants aina nu najankam ashí nui batsamsatin najankaumek, ²⁵ amina inakem David jutii muunji aajakua nunú Wakaní Pegkeji chichamtikam:

‘¿Wagka aents aidaush pampainawa? ¿Wagka shiig anentaimtsukesh chichamnash najanainawa?

²⁶ Nugkanmaya apu aidau nuigtú yaakta apuji aidaushkam ijunag, Apun kajejuinak ni etegka Apu ema Uwemtikagtin emauwa nunash kajejiagtinaí.’

²⁷ “Tibau asamtai, Herodes Poncio Pilatojai jujú yaaktanum ashí Israel aents aidau, judiuchu aidaujai ijunag, amina Uchijum Jisus pegkejam etegkam awemauwaitam nuna kajejuinak, ²⁸ ame yaunchuk nuniktin atí tibauwa dutiksag umikaje. ²⁹ Apuh, ameshkam dekame amina inakem aidau awantuina duka. Dutikau asam senchijum susata, ditash ishankagtutsuk chichamjumin etsegkatnume, ³⁰ nuninak jau aidaunash ame senchigmin etsagainak, ame Uchijum Jisusa daajin aents dutikmainchaunash iwainatnume, tusam.”

³¹ Nuna tusa Apajuin aujus nagkanai dita batsatbau buchitkau. Nuna aatus nuniaig Wakaní Pegkeji aents nui ijununak ashí egkemtaju, dutikamu asag sapigmakas Apajuí chichamenak etsejuidau.

Jisusa nemajin aidau pempentunisag yainikagbau

³² Ashí Jisusa nemajin aidauk betekak anentain idajus anentaim-tunidau, nunidau asag betek anentaimaidau. Tuja makichkish imá midauk atí tusag anentaimainachu asag ikdaikag sudayidau. ³³ Tuja Jisus chicham etsegtugkatajum tusa etegkamu aidaushkam, Apu Jisusa senchijin ni maam nantakiuwa nuna pachisag etsejuidau, imadiagtai Apajuishkam niina nemagkaju aidaunak senchi yayau. ³⁴ Makichik aentskesh atsumamujig atsujuidau, wagki Apajuí yayamu asag. Nuninak ditá nugken sujukag, jee ajuinamunashkam sujuk kuichkin jukiag, ³⁵ Jisus chicham etsegtugkatajum tusa etegkamu aidau batsatbaunum itaidau, aents aidau atsumamujin diijus susatnume tusag. ³⁶ Nuanuí makichik aents José, Leví wegantu ajuntai Chiprenmaya nuna Jisus etejamu aina nu Bernabé adaikamua nunú, nui pachitkau. (Bernabé tawa duka “ichichkagtin” taku tawai.) ³⁷ Nunú aents nugken sujuk kuichkin juki, Jisus etejamu aina nuna susauwai.

5

Ananías Safirajai

¹ Tuja Ananiaschakam niina nuwe Safirajai nugken sujukui. ² Nunik kuichkin jukiag nuwejai chichasag, kuichkin akanak ukuinak, tikich akankamun jukiag Jisus chicham etsegtugkatajum tusa etegkamu aidaun susauwai. ³ Nunikmatai Pedro chichajak:

—Ananiasah, ¿wagka iwanch wakejamu takaakmesh, Wakaní Pegkeji tsanugtasamesh wakejame, nugkem sujukam kuichik jukim aminu amain ukukiuwaitkumesh? ⁴ Nugka sujukum duka aminui. Nunin asamtai nugka sujukum kuichik jukium dushakam aminui. Nunin aish, ¿wagka jusha juniame? Amek aentsuk tsanugchaume, Apajuí tsanujume, —tau.

⁵ Nu tusa tamawaik Ananiasak jaka iyaantui, tuja ashí aents nuna dekaawajuk senchi ishamkajui. ⁶ Nunik jakamtai datsauch aidau tajuntag pempeag jukiaju ukustatus.

⁷ Nunik kempatumchik hora nagkaemai, Ananiasa nuweshkam aishi jakamunak dekatsuk wayau. ⁸ Nunikmatai Pedro iniak:

—Nugka sujuka kuichik jukimuk ashí itaji tibaujum nu ¿dekaskekaih? —tau.

Tutai nuwa ayaak:

—Ehé, nunichik sujukmaji, —tau.

⁹ Nuwa tutai Pedro chichajak:

—¿Wagka aishumjai betekash Wakaní Pegkejiya dusha tsanug-tasagmesh wakegagme? Amina aishumin ukusag ukuinak kauntaja anke aminashkam ukugmasagtatui.

¹⁰ Tusa tamawaik Safirashkam Pedro wajamunum ayaumas jaka iyaantu. Nuniktatman datsauch aidaushkam waikmá jaka tepettaman wainkag jukiag, aishi ukusbaunmag ayaunas ukusajui. ¹¹ Nu nunikag-baun Jisusa nemagkaju aidauk tikich aents aidaushkam antukag senchi ishamkajui.

Aents dutikmainchau aidau kuashat iwainakbau

¹² Jisus chicham etsegtugkatajum tusa etegkamu aidau, aents dutikmainchau aidaun ashí aents wainainamunum kuashat iwainaidau; tuja Jisusa nemajin aidaushkam jega Apajuí ememattai Salomón waiti ujabauunum ashí ijunaidau. ¹³ Tujash Jisusa nemajuinachuk eme anentus diinayatak ditajai ijuntanak dakituidau. ¹⁴ Tujash Jisusan dekaskeapi tusag nemajuidauk aan kuashat kawegku aishmag aidau nuwa aidaushkam. ¹⁵ Tuja jau aidaunashkam ainká tepetaijijai jiikiag jintanum batsaidau, Pedro nagkaematai makichkinakesh niina wakaní wakanman wajantati, dutikam tsagagtinme tusag. ¹⁶ Jerusalén tikiju batsataidaushkam jau aidaun, aents wakan pegkegchau waitkam batsamin aidaunash yajuakag ikaunmamu aidauk ashí tsagagkaju.

Pedro Juagjai waitkasagbau

¹⁷ Imatikiagtai sumo sacerdote, saduceo aidaujai wainkag senchi kajegkaju. ¹⁸ Dutikawag chicham etsegtugkata tusa Jisus etegjamu aidaun achikag, aents achiká chimpitainum egkeawajui. ¹⁹ Tujash nayaimpinmaya aents kashi tajua waiti ujati jiyaak: ²⁰ “Wetajum, nunikjum jega Apajuí ememattainum wayaajum, ashí ju chicham pujutan sukagtina jujú aents aidau ujaktajum”, tiu. ²¹ Nu tabaun antukag kashinia duwi, jega Apajuí ememattainum wayawag jintinkagtuidau.

Nuninai sumo sacerdote ditajai ijunja chichataiji aidaujai, nuigtú ashí judío apuji aidaun utsukag, chicham epegkatasa ijuntainum ijunjag, Jisus chicham etsegtata tusa etegjamu aidau achiká egkeamun: Jiikjum itatajum, tusag suntajan awemaju. ²² Tima jegajua diikmag wainkachaju, nunikag waketjag ditan ujainak:

²³ —Aents achiká chimpitaig shiig epenjamuwe, suntag nuna kuitamaidaushkam waitinum ijunmae. Tujash ujai wayaa diikmá wainkashmaji, atsuagmae, —tuidau.

²⁴ Tusa etsejuinamun sumo sacerdote, tikich jega Apajuí ememattain kuitamin aidaun apuji, nuigtú sacerdote apuji aidaujai antukag ijunjag chichainak:

—¿Tujash nunash wajuakeakug nunikainta? —tusag anentai jegagchajui.

²⁵ Nuna tu ijunai makichik aents tanta:

—Atum aents achikjum egkeamujum duka, jega Apajuí ememattainum wayaa batsamas aents aidaun jintintú pujuagma jamah, —tuidau.

²⁶ Tiagtai suntajá apuji aidau niina suntajijai wejiag, shiig kuitamsag juki itawaju, tutit awajai aents juna antujuuidau kayai tukú tukujuinakua mantuawainum tuidau asag. ²⁷ Itawag, apu aidau tuwakbaunum ejapeen awantagmatai, sumo sacerdote chichajak:

²⁸ —¿Antukchamkaijum ii yamai nagkamsagmek Jisus pachisjumek aents aidauk jintintuawaigpajum tibaijim duka? ¿Wagka antukchaugme? Atum aajajum ashí Jerusalegnumia jintinbau asag, jutii aidautin ditap nu aentsnak mau ainawa tujamainawai, —tuidau.

²⁹ Tuinam Pedro niina kumpají aidaujai chichainak:

—Dekas dekatkauk, aentsuk umigtsuk Apajuí umigkata tabauwa nuuwai jutiiinuk. ³⁰ Atum Jisus numi yapajiamunum achigjum maawagmin, iina muunji aajakajua nuna Apajuijiya nunú inankiuwai. ³¹ Dutika niina untsujin ekentsauwai Apu ema Uwentikagtin atí tusa,

nuigtú Israel aents aidaush tudaujin idayinak tsagkugnagtinme, tusa.
³² Jutiik dekas wainkau asaja etsegi, tuja Wakani Pegkejiya dushakam dutiksag etsegtau asa jutiinash dekamtijamji. Wagki Apajuik niina umijuina nuna Wakani Pegkejiya nunak suwawai, —tuidau.

³³ Nunú tuinam kajekgag maata tuidau. ³⁴ Nu apu aina nuwiya makichik fariseo Gamaliel chicham umiktinun jintinkagtin asamtai, chichamesh dekas umigtai wajakí:

—Atumek agaa jiinkijum machik wajastajum, —tusa jiikí ni wajaná.

³⁵ Tikich apu aidaun chichajak:

—Israel aents aidauwah, ju aents aidau maatasajum anentaimtuinajum duka kuitamamkatajum. ³⁶ Adegtajum yaunchuk, Teudas nigki wí apu atajai timatai ayú tusag, cuatrocientos aents saetus yujajuidau nuna maawagmatai wainak pampagkag megkaejajua nu. ³⁷ Nu nuniku ainai, Judas Galileanmayashkam aentsú daaji agatbau jegamunum, niinashkam kuashat aents nemagkajui, tujash nunash maawagmatai niina nemajuidauk pampagkajui. ³⁸ Nunin asamtai dekas jujú aents aina juka waitkatsuk idaisatajum wetinme. Jujú dita takaina ju ditak jutiká yujainakug megkaekattawai; ³⁹ Untsu dekas Apajuinuitkuig atumek depetmaitsujume, Apajuí takatji aig Apajuikai maaniaku aaní batsattsujiash, —tiuwai.

⁴⁰ Nuna tusag Jisus chicham etsegtugkatajum tusa etegjamu aidaun awayawag asutiawag:

—Jisus pachismek aents aidauk ujakaigpajum, —tusag akupkaju.

⁴¹ Tiajam ditashkam apu batsatun ukukiag weenakush, shiig aneasag dakunkut weedau, wagki ditanash Apajuí eme anentus, Jisus pachisa etsegbaunum waittsatnume tabau asa. ⁴² Tusá imatjuawagmashkam yamajam chichama nuna, Jisusnak Apajuí etegkauwai Uwentikagtin atí, tusa etsegtanak idaitsuk, kashí kashinig aents aidaun jega Apajuí ememattainum, makí makichik jeganmashkam jintinkagtuidau.

6

Yujumak yuwamun tinamkagtitin aidau etegjamu

¹ Nunú tsawantin Jisusa nemagkaju aidau kuashat kawegkaju asag, griego chichau aidaun nuwe waje aidau, yutai shiig ajampenashbau asag, hebreo chichau aidaujai kajegdaikaju. ² Nudiagtai Jisus chicham etsegtugkatajum tusa doce etegjamu aina nu, nui batsataidau asag, ashí Jisusa nemagkau aidaun ijumjag chichainak:

—Apajuí chichame etsegmaina nu idaiku, yujumkan wajuk yuwawagtatua nu uyumaka wekaetuta duka shiigchauwai. ³ Nunin asamtai yatsug aidauh, atum ainajum anuiya siete yatsug kajittsá diimain etegjatajum Wakani Pegkeji ajamu, shiig anentaimas dutikmain, nunú aidau ju takatnak diistinme. ⁴ Nuninai jutiik Apajuí aujut, chichame etsegta nujai uyumakagmi.

⁵ Nuna aatus tiagtai, aents tuwakaju aidauk wakekaju, nunikag etegkawaju Esteban Apajuiaig kajinas anentaimna nuna, Wakani Pegkejish ajamun, tikichin Felipen, Procoron, Nicanoran, Timogkan, Parmenasan, Nicolás Antioquianmaya judío atajai tumamiuwa nujai.

⁶ Nuna etegjag jukiag Jisus chicham etsegtugkata tusa etegjamu aidau batsatbaunum ejegawaju, dutikawagmatai ditashkam buuknum achikag Apajuin aujtusaju.

⁷ Tuja Apajuí chichame etsegbaushkam nuní senchi wegau, nunisag Jisusa nemajuidaushkam nuní senchi Jerusalegkak kawegkaju; sacerdote aidaushkam kuashat Jisusa nemajuidau.

Esteban achiká jukimu

⁸ Apajuí niina senchijin, Estebagkan senchi yayau, dutikamu asa aents dutikmainchaun aents aidaun iwaintau. ⁹ Jega judío agkanmagau aidau ijuntai tutaya nui ijunin aidau, yaakat Cirenemaya, Alejandrianmaya, nugka Cilicianmaya, Asianmaya aina nu ijunjag Estebagjai tudayinau. ¹⁰ Tujash Estebagnak wagagsag chichajuinachu, nigka Wakaní Pegkeji dekamtikam chichau asamtai. ¹¹ Nunidau asag tikich aidaun:

—Atum: ‘Moisesan pegkegchau chichajak, Apajuinashkam pegkegchau chichaju ii antugkabiaji’ titajum, —tusag wakenmag akikaju. ¹² Nuna dutikawag aents aidaun, judío apuji aidaun, chicham umiktinun jintinkagtin aidaunashkam inajaju. Dutikawajam Estebagkan achikag jukiag, chicham dekaku ijuntainum ejegawaju. ¹³ Dutikawagmatai wainak tsanumjugti tibau aina nu chichajuinak:

—Ju aentsuk jega Apajuí ememattai pegkegma nuna pachis, chicham umiktina nunashkam pegkegchau chichajú wekaewai. ¹⁴ Jutii dekas antukbaiji, ni chichaak: ‘Jisus Nazaretnumiaya nunú ju jega Apajuí ememattaiya junak tsaiká idayak, Moisés ju jutikatajum tujabauwa nunashkam yapagkattawai’ timayi, —tuidau.

¹⁵ Ashí aents nui ijunjajuk nuna tiagtai, shiig esettsag Estebagkan diikmag, nayaimpinmaya aentsu yapijai betek wajas eketun wainkajui.

7

Esteban apu aidau emtin chichakbau

¹ Sumo sacerdote Estebagkan: ¿Dekaskek tujamaina? tusa iniasu, ² tama ni ayaak: “¡Yatsug aidauh, muun aidautigmesh antuktajum! Ii Apajuí dekas imana nunú, iina muunji Abraham aajakua nuna, Harán wegatsaig Mesopotamia pujuttaman wantintuk, ³ chichajak: ‘Nugkemik pataim aidaushkam ukuktá, nunikam wetá wi nugkan inaktustatjam nui’, tiuwai. ⁴ Tima Abragshakam Caldea nugkanak ukuak, Harán nugkanum pujustatus weuwai. Nuwi pujai apaji jakamtai, Apajuí ii yamai batsatag ju nugkanum awemauwai. ⁵ Tujash nugkanak niinu atí tusag susachui, eke uchijish atsujag ayatak anagkuauwai, ni jakamtaish niina uchijí wegantu aidau batsamsat-nunak susatnaitjai, tusa. ⁶ Nuigtushkam Apajuí Abragkan chichajak: ‘Amina uchigmiin akiinak wegagtina duka, tikich nugkanum pachinawag nugkenchau, inaku waitkam cuatrocientos mijan batsamsagtinai’, tiuwai. ⁷ Tuja nuigtush Apajuí: ‘Wi ditan inak waitkaidaunak suwimkan susatnaitjai, dutika ai nuwiya jünjag jujú nugka juwi kawnawag mina umigtiagtatui’, tiuwai. ⁸ Tuja Apajuí Abragjai chichaman apaak, ashí uchi aishmag akiinuk pakaji* ajapjitajum tiuwai, tibau asa Abraham Isaakan akiag ocho tsawan wetai, dutikauwai. Isaakshakam Jacopan akiash dutiksag dutikauwai, tuja Jacobshakam aikasag doce uchijí aajakajua nunash dutikauwai.

* 7:8 Pakaji ajapjitajum tiuwai tawa duka, diistá Lc. 1.59num.

⁹ “Nunú Jacopan uchijí aidau iina muunji aajakajua duke ditá yachinak Josen wainak kajejuidau asag, Egipto jukitnume tusag sujukajui. Tujash Apajuí Josejai au asa, ¹⁰ ashí ni waitiamujinak agkanmitkauwai, dutika yachamtikauwai. Nunikmatai Faraón Egipto apujiya dushakam wakejus Josenak diisúí, dutikau asa: ‘Egiptunmag ame inamjata nuniakum ashí mina jegajuiyash amek diistá’, tusa apu emauwai.

¹¹ “Nuniku ai Egipto, Canaán nugkanmash ashí yapajut tepeauwai, nunikmatai ii muunji aajakajua dushakam yumainji atsujuinam senchi waituidau. ¹² Imaní batsatu, Egiptunum trigo sujamu awai tabaun Jacob antuk, ni uchijí aidaun ishiakui. Nunak nagkamchak wegashbaun wegajui. ¹³ Nunikaju ataktú sumaktatus jegamunum, José ni yachin wainak: ‘Wika atumin yatsumitjai’, tusa ujakajui, nunikmatai Faraogshakam Josek Jacopa uchijimpapi tusa dekauwai. ¹⁴ Nunik José, apajin ashí niina patayí aidaujai kaunatnume timatai setenta y cinco aents Egipto jegawajui. ¹⁵ Nui Egipto jegaa pujus Jacopak jakauwai, nunisag ii muunji aajakajua dushakam nuwig jinawajui. ¹⁶ Nunikagmataish ditá iyashí aidaunak jukiag Siquem ejegawag, Abraham yaunchuk ukumatain Hamora uchijinun akikmak sumakua nui ukusajui.

¹⁷ “Apajuí duwik Abrugkan anagkuauwa nu uminkattak wajau asamtai, Jacopa uchijí wegantu aidauk shiig kuashat wajasaju. ¹⁸ Imanikaju ai, yamajam apu Egiptunum ekeemiuwai Josen wainchau. ¹⁹ Nunú apu jutii muunji aajakajua nuna tsanujá suwimkan suwinak waitkaidau; imatikainak uchi aishmag akiinkuig jutsuk ayatak maatajum, tusa inamjauwai. ²⁰ Nunú tsawantin Moiseschakam akiinawwai, nunikmatai Apajuishkam aneas diisúí, tuja apají ditá jeen kampakatum nantu ukag apusajui; ²¹ dutikawag uumainchau wajasmatai, uchi egkemainun najatuawag egkeawag namaká inanakiuwei. Dutikamun Faraogka nawanji wainak juki ni tuke uchijima tsakapajui. ²² Dutikamu asa Moisesak Egiptunmaya unuimataijinak ashí unuimaju aajakuí. Iman asa, chichamesh antugtai ni takatjinish imanuk ajakuí.

²³ “Cuarenta mijan ajamu ni patayí Israel wegantu batsatbaunum weuwai. ²⁴ Nunikmá wainkauwai Egiptunmaya aents, ni patayí Israel aentsun suwimun. Dutiktai niishkam nuna ayamjak Egiptunmayan mauwai. ²⁵ Moisés anentaimesag Apajuí mina yatsug Israel aents aina nunak, ni agkanmitkati tujuttata nunash dekagtuinawapi tau. Tujash ditak nunak duiyap aniawa tichajui. ²⁶ Kashinia duwi Moisés niina patayí jimag ditak pempeentuniki maaninak tikichin suwimatman wainkauwai; nunik epegtuatatus: ‘¿Wagka yatsumjaish pempeentunikjumesh maanish yujagme?’ tiu. ²⁷ Tama yachin suwima nu Moisesan shitakiu, dutika: ‘¿Ya aminash apu chichaman epegkin atí tusash adaitamkame?’ ²⁸ ¿Minash yau Egiptunmaya maamum dutiksamek mantuatasamek tujutam?’ tau. ²⁹ Nu tima Moisesak tupikaki Madián nugkanum jegauwai, nunik nui pujus jimag uchin akiauwai.

³⁰ “Nui pujusá cuarenta mijan wegai, muja Sinaí tutain uwegshujin Apajuí aentsji nayaimpinmaya, numi jagkigtin zarza tutai kegamunum wantintuku. ³¹ Nunittaman Moisés wainak puyatkau, nunik shiig wainkatatus adijtatman Apajuí untsuká: ³² ‘Witjai, amina muunjum

Abraham, Isaac, Jacob aajakajua nuna Apajuijinuk', tiu. Nuna tutai Moisesak senchi ishamak kujau, diitnash diimainchau dekapeau. ³³ Nunitai Apajuí chichajak: 'Sapatjum ukuimakta, ame wajam anka nugkak pegkegmai. ³⁴ Dekaskenun mina aentsug Egipto batsamas waituina nuna wainkajai, nuigtush buutainak mina untsujuina nunash antugkajai, nunikan ditan agkanmitkatasan taajai. Nuaduí ame Egipto nugkanum wetá', tiuwai.

³⁵ "Israel aents aidau Moisesan dakituinak: '¿Ya aminash apu chichaman epegkin atí tusash adaitamkame?' tiajua nuna Apajuí apu ema, ame agkanmitkata tusa awemauwai. Nunak nayaimpinmaya aents Apajuí awemamu numi jagkigtin zarza tutainum Moisesan wantintukua duwi tiuwai. ³⁶ Tibau asa Moisés ii muunji Egipto nugkanum batsamtatman jiijuí, aents dutikmainchaun Egiptunum iwainak, nayants kapantu tutainmash, nuigtú cuarenta mijadai uwegshunum awekasashkam dutiksag iwainakui.

³⁷ "Nunú Moisesak Israel aents aidaun chichajak: 'Wiiya jumantinun tikichin Apajuí atum wegantunmayan makichik aentsun, mina etsegtujin atí tusa etegjatnai', tiuwai. ³⁸ Nuigtushkam Israel aents aidaujai uwegshunum batsatbaunmash Moisesan muja Sinaí tutainum, Apajuí aentsji nayaimpinmaya ausam, chicham pujutan sukagtina nuna jukiuwai, iina muunji aidau ujaktinun, dutikamun jutiinash ujakajui.

³⁹ "Dutikamu ainayatak iina muunji aidauk chicham umitan dakituinak ayatak Egipto waketjagtatus anentaimajakajui. ⁴⁰ Nunidau asag Aarogkan ii apajuimatin najanata ni emjutpakti, Moisés Egipto batsatjin jigmajamia duka dekagtsuji wajukants megkaeka, tiajui. ⁴¹ Tusag toro tsakata nuninun najanawag, kuntinun maa apeenak dita najanamujin emematuidau, dutikainak shiig anentuidau. ⁴² Nudiagtai Apajuishkam ditanak idaisauwai etsan, nantun, yaya aina nuna ememattinme tusa. Nunak Apajuí etsegtin nuniktinai tusa agak:

'Israel aents aidauh,

¿atum uwegshunum cuarenta mijadai yujasuitjum duwish kuntin maa apeakjumesh emematjiuk ainajum?

⁴³ Duka dutijutsuk atum apajimatin Moloc,

nuigtú yaya Renfán tutaiya nu najanajum emematkujum jegamkamu takusjum yujau asagmin,

Babilonia nugkanum atushat emattajime, Apajuí tiuwai.'

⁴⁴ "Iina muunji aajakajua nunú uwegshunum jegan jegamkajui, Apajuí Moisesan ame wainkaum imatiksamek jegamkata tibauwa nuna. ⁴⁵ Nunú jega duka iina muunji jidiagtaish ditá uchijí aidaunu juwakui, nunikua nuna Josuejai tikich nugkanum aents batsatbaunum utsanainak itawajui, nunikag aents nui batsatunak Apajuí yayasam jiiijajui, dutika itamuk David pujujaku duwishkam aajakui. ⁴⁶ Apu Davitak Apajuí wait anenjamu asa, Jacob wegantu Apajuijiya nudaun jegan jegamkatatus wakejukui. ⁴⁷ Tujash Salomón jega Apajuí ememattainak jegamkauwai. ⁴⁸ Dekaskenmag Apajuiuk aents jega jegamkamunmag pujumait sui. Juna pachis Apajuí etsegtin chichaak:

⁴⁹ 'Mina ekeemtaijuk nayaimpia auwai, untsu mina najamtaijua duka nugka nuuwai.

¿Minash wají jegak jegagtuktagme? ayamainjush atslugta juniaish, ¿tu amainaita mina ayamtaijush?

⁵⁰ ¿Atumek wi ju aina junak ashí najankauwaitag duka dekatsjumek? Apajuí tawai’,” tiuwai.

⁵¹ Nuna tusa Esteban: “Atum aidautigmek tuke antakchawk aajakuitjume, antutaigminish, anentaiminchakam Apajuí anentaimtuchu aina nunú anentai ajutjamainawai. Atumek atumi muunjum aajakajua nujai betek asajum Wakaní Pegkejishkam kajejuinagme. ⁵² Apajuí etsegtin aajakajua nunash, ¿iina muunji aidaush waitkatskesh idaisauk aina? Ditak Kristu taatnujin pachis etsejuidaunash maa ajapejakú ainawai. Yamai Kristu taamtaishkam nunisjumek atumesh wainkajum tsanú tsanumjuinakuajum mauwaitjume. ⁵³ Atum dekas chicham umiktinun Apajuí aentsji nayaimpinmaya sujamsamu takakiatkugmesh umiatsjume.”

Esteban maamu

⁵⁴ Esteban nuna aatus tutai, senchi kajegkag, nainak taket emenawag katetmitkaidau. ⁵⁵ Imaninaig Esteban Wakaní Pegkeji ajamu asa, nayaimpin pagkaji diikmá Apajuí tsawan wajasbaunum, Jisuschakam Apajuí untsujinini wajattaman wainak:

⁵⁶ —Nayaim ujanmatai, Apajuí Uchijiyaitak Aentsmaga Akiinauwa nu Apajuí untsujin wajaun wainjai, —tau.

⁵⁷ Nuna tutai aents aidauk kuwishinak paket epenkag, senchi pampanjag ashí wajatjag achikag ⁵⁸ jukiaju, yaaktan ukumtilkiag kayai tukuag maatatus, nuninak ditá jaanchjinak awimajag datsauch Saulon: —Ame kuitamkata, —tusa susajui.

⁵⁹ Imatika kayai tukuinam Apajuin aujak: “Apu Jisusah, mina wakanjuk jujutkita”, tusa ⁶⁰ tikishmag pujus senchi jiiká: “¡Apuh, ju aents mina mantuinak tunamaina juka ayatak tsagkujata!” tiuwai.

Nuna ti jakauwai.

8

Saulo Jisusa nemajuidaun waitkasbau

¹ Sauloshkam: Estebagkak dekas mantamnati, tusa chichamnak ijutkau aajakuí.

Nunú tsawan wegamunum Jisusa nemajin Jerusalén batsatun waitkatan nagkamawajui. Imatikainam ashí pisajag pampagkaju Judea nugkanum, Samarianmashkam. Nuniagtaish Jisus chicham etsegtukatajum tusa etegjamu aidauk nuwig batsatu. ² Tuja Estebagnak wajumak aents Apajuin puyatjus umijin aidau, Estebagkan iyashin jukiag ukusag, senchi buutiajuí. ³ Nuniamunum Sauloshkam Jisusa nemajin aidaun makí makichik jeganum utua, aishmag aidaun, nuwanashkam achig yajumu, aents achiká egketainum chimpiatatus.

Samaria nugkanum Apajuí chichame etsegkamu

⁴ Tujash aents pisajú aidauk, dita tuwí jegainawa nuanuí yamajam chichaman pachis etsejuidau. ⁵ Nuniamunum Felipe Samarianmaya aidau yaaktajin jegaa, Kristun pachis etsegtai, ⁶ aents aidaushkam kaunkag Felipe etsegbaunash puyatjus antujuinak, aents dutikmainchau iwainamunash wainaidau. ⁷ Dutikak kuashat aents wakan pegkegchau egkemtuamu aidaunashkam etsagau, dutikamu asa

wakan pegkegchau aidauk senchi untsamak jiiinaidau, nuigtushkam wekaechau aidau, shutú aidaunashkam etsagakui. ⁸ Nuna dutiktai nunú yaaktanmaya aidauk shiig aneedau.

⁹ Nuniamunum iwishin Simón daagtin aentsun etsagautai, Samarianmaya aents aidauk puyatjus diinam: “Wika imajaitjai” tumamá pujau. ¹⁰ Tutai ashí uchi, muun aidaujai nagkamas puyatjus antujuinak: “Juuwai ‘dekas Apajuí senchintikamua duka’ ”, tuidau.

¹¹ Tuidau asag nuna antujuidau, duwik nagkamas ni tunchijiin tsanumak iwainamun puyatjus dii batsataidau asag. ¹² Tujash Felipe yamajam chicham Apajuí inabaujin, Jisukristun pachis etsegbaun antukag, dekaskeapi tusag kuashat aishmag, nuwa aidaujai yamimakajui. ¹³ Nuniamunum Simogshakam dekaskeapi tau asa yamimajui, nunik Felipejai wekaetan nagkabau, aents dutikmainchaun kuashat iwainatai puyatjus diyau asa.

¹⁴ Nuniamun Jisus chicham etsegtugkatajum tusa etegjamu aidau Jerusalén batsatu, Samarianmaya aidaush Apajuí chichamen wakejuinawai tabaun antukag, Pedron Juagjai awemajui. ¹⁵ Dutikawajam ditashkam jegawag Apajuin aujtusaju, Wakaní Pegkejin jukitnume tusa, ¹⁶ ditaig makichkinmakesh Wakaní Pegkejig taachui, ayatak Apu Jisusa daajinak pachisag yamimakaju asagmatai, ¹⁷ Pedro Juagjai buuknum achikag Apajuí aujtuinam, Wakaní Pegkeji egkemtujajui.

¹⁸ Jisus chicham etsegtugkatajum tusa etegjamu aidau aentsun buuknum achikag, Apajuí aujtutai Wakaní Pegkeji egkemtaun Simón wainak:

¹⁹ —Minash aanú senchi sujstajum kuichkin akiktajime, wisha tikich aents aidaun buuken achiaknush Wakaní Pegkejin egketin atajai, —tusa segauwai.

²⁰ Tutai Pedro chichajak:

—Amek kuichkigmijai megkaekatnaitme, Apajuí anentag sukagtusbauwa nunú kuichki sumakta tiu asam. ²¹ Amek jutii takainag jutikamkesh takamaitsume, amek Apajuí diismak shiig anentaimtsume. ²² Nuniau asam pegkegchau anentaimam nu idaikum Apajuí ausata. Ame anentaimsam tium nunash tsagkugtomain achaintash. ²³ Wainjame, shiig senchi kajeam nuna, imaniau asam pegkegchau takata duka idaisashmin dekaepeame, —tiuwai.

²⁴ Tama Simón ayaak:

—Atum minash Apu segatjitajum, atum mina tujutjum nunú iman-isag jegagti, —tiuwai.

²⁵ Pedro Juagjai Jisus pachisa etsegbaun ashimkag, Jerusalén waketu-inak, yaakat Samarian ukukiag aents batsatbaunum weenak, yamajam chichaman pachisag etsejuidau.

Felipe Etio pianmaya aentsun Jisusan pachis ujakbau

²⁶ Nuniku ai nayaimpinmaya aents, Apajuí awemamu, Felipechichajak: “Felipeh, wamkesam Jerusalén ukukim, yaakat Gaza tutainum junta amatka nui aents atsamu uwegshua nui wetá”, tiuwai. ²⁷ Nu tima Felipeshkam weu, nunikmá Etio pianmaya aents Jerusalén Apajuin ememattatus weu wakettatman igkugku, Etiopía apuji nuwa Candace daagtina nuna kuichkijin kuitamin. ²⁸ Nugken waketak carrojí caballo wegaku japataijiya nui egkemas Apajuí etsegtin Isafas agagbaun au aujkawa wegau.

²⁹ Nunittaman Wakaní Pegkeji Felipen chichajak: “Au aents caronum wega au adjikata”, tiuwai. ³⁰ Tama Felipeshkam adjikamá Apajuin etsegtin Isaias agagbaun au aujkawa minittaman antujuk iniak:

—¿Ame aujam dusha, antakmek aujam? —tau.

³¹ Tama ni ayaak:

—¿Wajuk antuktajaki, nuna taku tawai tusa ujachbaunush? — tiuwai.

Nuna tusa Felipen:

—Juwi wakam, ekeemsam ujatkata, —tusa segam niishkam wakauwai. ³² Ju agagbauwa juna auju:

“Uwig maatasa juki ematia numamtuk jukiag emagmayi maawagtatus, uwig uje tsupigmash takamtak tepegama nunisag niishkam chichakchabi.

³³ Nuniau asa ayatak yunumkabi, nunitaish makichkish ayamjauk atsusuí, niina uchijigkesh atsugsauwai maamu asa.”

³⁴ Tibauwa nuna apu Etioipianmaya Felipen iniak:

—Wait aneasam minash ujatkata, ¿juna Apajuí etsegtin tiuwa nunash yana pachis takua tiuwaita? ¿Nigkik tumamiuwait, atsa tikichin takug tawa?

³⁵ Tutai Felipeshkam nunú ni auja nuna pachitus, chicham yamagman Jisusan pachis ujakú. ³⁶ Nunik wegmunum entsa aunum jegaak:

—¿Ju entsa awa juwi wi yamimagta tamash wají utugchata amainaita? —tusa iniau.

³⁷ Tutai Felipe ayaak:

—Ame dekas anentaiminish dekaskeapi takumek yamimainaitme, —tiuwai.

Tama ni ayaak:

—Wika Jisusak dekas Apajuí Uchijimpapita tajai, —tiuwai.

³⁸ Tutai carrujum awantata tima awantamtaí, mai akaikiag entsanum jegaa Felipeshkam nunú aentsun yamijuí. ³⁹ Entsanmaya jiinkimtai, Wakaní Pegkeji Felipenak jukiuwai. Dutikamtai apuk ataktuk wainkachu; tujash nunikmataishkam apu Etioipianmayag shiig aneas weuwai. ⁴⁰ Felipek Azotonum wantinak, ashí yaaktanak nagkaetsuk Jisusai uwentikagtau k tusa chicham yamagma nuna chichá chichagkagtakua Cesareanum jegauwai.

9

Jisus Saulo wantintukbau

(Tak. 22.6-6; 26.12-18)

¹ Nuna nuninai Sauloshkam Jisusa nemajuidaun maatasa awantanak idaichau. Imaniau asa sumo sacerdoten jegají:

² —Papí agajam sujustá Damasco jegaan jega ijuntaiya nui wayaknush nuna inakmasan, Jisusa nemajuidaun aishmag, nuwa aidaujai achijan, Jerusalén ikaunmaktajai, —tusa segau. ³ Tutai papiin agatug susau. Dutikam yaakat Damasonum jegaattak tikiju anem wajas wegai, pachiachmau nayaimpinmaya etsantug Saulon tenteauwai. ⁴ Dutikam nugká iyaju, nunikmá: “Saulo, Saulo ¿Wagka minash waitkajame?”, tabaun antukui.

⁵ Tama Saulo iniak: “¿Apu amesh yaitpa?” tau. Tutai ni ayaak: “Wika Jisusaitjai, ame ya waitkame nuuwaitjai. Amek baka kajeká jagkin dajag beseakush dekapsama numamtuk, amek pegkegchau wegakum imaniame”, tau. ⁶ Tutai Sauloshkam ishamak kujaukmaikia: “Apuh, ¿wajukati tusamea wakejutame?” Tutai Apu Jisus ayaak: “Nantakim yaakat jegata, nunikamin awi ame dutikmainjumnak tujabiagtatui”, tiuwai.

⁷ Aents Saulojai ashinuk senchi ishankaju, chichamunak antuinay-atak wainainachu asag. ⁸ Nunik Sauloshkam nугká tepau nantakí niimtakamá wainmamaichau wajasú. Nunikmatai aents aidau uwegnum egkesag Damasco ejegawaju. ⁹ Dutikam kampakum tsawan, machikish niimtsuk, yujumkanash yutsuk, umutnashkam umutsuk pujau.

¹⁰ Damasco Jisusa nemajin Ananías daagtin pujau, nunittaman Jisus wantintuk: “¿Ananiasah!” tiuwai. Tama ni ayaak: “Apuh, juwi pujajai”, tau.

¹¹ Tutai Apu Jisus chichajak: “Jinta Untsug tutaya nui wetá. Nunikam Judasa jeen jegaam iniimsata Saulo daagtin Tarsonmaya pachisam, nui Apajuí aujak pujau wainkattame. ¹² Wi ujakmajai, Ananías daagtin tanta uwejen buukmin antimpaktatui, dutijamantai niimtatme tusan”, tiuwai.

¹³ Tusa tama Ananías chichaak: “Apuh, au Jerusalén pujusá amina nemagtamin aidaun tikima pegkegchau waitkamun pachitus mina ujatiagma jama. ¹⁴ Nunú sacerdote apuji aidau inajam, juwiya amina nemagtamin aidau amina pachipasag chichaina nunash ashí yajuaktatus taajama”, tiuwai.

¹⁵ Tutai: “Tutsuk wetá. Aunak wika mina pachitus ashí judiuchu tikich nugka aidaunmash, apu aidaunash, Israel aents aidaunashkam ujakti tusan etegkajai. ¹⁶ Wi mina pachitus etsejak senchi waittsatnujinak ujaktatjai”, tiuwai.

¹⁷ Tima Ananiaschakam, ayú tusa Saulo pujamunum weuwai. Nunik Saulo pujamunum jegá wayaa, niina uwejen buuknum achiak:

—Yatsug Sauloh, Apu Jisus jintá minamin wantintugmaka nunú awetine, amina ataktú niimti, nunik Wakaní Pegkejinash jukiti tujamu asa, —tiuwai.

¹⁸ Tusa achiká tamawaik, wamkes niina jiiina namaká saepega numamtin kaketukui dutikam wainmakui; nunikmatai Ananías yami-juí. ¹⁹ Dutikam pimpijá pujamunash yujumkan yuwa chichiag, Jisusa nemajin Damasconmaya aidaujai wajumchik tsawantai ijunag pujusuí.

Saulo Damasco chichagkagtukbau

²⁰ Duwi pujus judío jega ijuntai aidaunum wayaa chichagkagtak Jisusak Apajuin Uchijiyai, tusa etseju. ²¹ Nuna tusa etsegtai, ashí aents nuna antuidauk puyatjukag:

—¿Juchaukaih Jerusalén wekagas, awiya aents Jisusan pachis chichaidaun achig yajuaktatus aintú wekaetinuwe nu? ¿Aukechukait juwiyannash achijá sacerdote apujin sujukagtatus taa wekaemaya nunú? —tuidau.

²² Tujash Saulok Apajuí senchijijai etseju, Jisusak dekas Kristuí tusa. Imattai judío Damasco batsataidau, wainak tu wekaewai tuinakush depetkachajui.

Saulo chagkin muunnum egkea yaaktanmaya jiikbau

²³ Nunikag dukap tsawan asag judío aidau, itusaik Saulo maawag, tusag chichaman umijuidau. ²⁴ Imatjuinamun Sauloshkam antugmamkau, tujash ditak tsawai kashishkam yaakat pegmagbau waitijin dakak batsamtuidau Saulo jiinkui maami tusag. ²⁵ Imatjuuidau asagmatai Saulo jintintaiji aidau chagkin muunnum egkeawag yaakat pegmagbaunum yakí iwakag kashi jiikiag awemajui, nuní uwemjauwai.

Saulo Jerusalén wakitki jegaamu

²⁶ Saulo Jerusalén jegaa tikich Jisusa nemajuidaujai ijunjatatus wakegau. Nunitaishkam ditak ishamaidau: “Saulok Jisusa nemagtsuapi”, tuidau asag.

²⁷ Nuninaig Bernabé Saulon juki, Jisus chicham etsegtugkatajum tusa etegjamu aidau batsatbaunum ejegau. Dutika Saulo jintaa wesa Apu Jisus wainkamujin, Jisus Saulo ausamun, Saulo Damasconum jegaa ajankas Jisus pachisa chichasbaujai etsegtau. ²⁸ Nunik Saulok Jerusalén juwak pujusá, ditajai ijunag wekagas ajankas Jisusan pachis chichagkagtau. ²⁹ Nunik pujus judío, griego chichaman chichau aidaun Apu Jisusan pachis ditan ujaidau, tutaish ditak ayatak maata-tus chichaman umijuidau. ³⁰ Dutikiagtatman tikich yatsut Jisusa nemajuidau nuna antukag, Saulon jukiag Cesareanum ejegawag nui inagkeakiag Tarsonum awemajui.

³¹ Dutikawagmatai Jisusa nemajuidau ashí Judea nugkanum, Galileanmaya, Samarianmaya aidaujai, shiig agkan batsatainak nuní senchi ichichmamaidau. Jisusnak ajantusag anentaimtuidau, nunidau asagmatai Wakaní Pegkejiya nu yayasajam batsatainak, ayatak nuní kuashat kawedau.

Pedro Eneas etsagagbau

³² Pedro Jisusa nemajin aidaun diyak wekaetau asa, Lidanum Jisusa nemajin batsataidaunashkam wainkatatus weuwai. ³³ Nunik nunú yaaktanum aents Eneas daagtin wekaechau asa, ocho mijadai imá pegajinig tepenun wainkauwai. ³⁴ Dutika wainak:

—Eneasah, Jisukristu etsaentamui. Nantaktá nunikam ainká tepetai-jum jukita, —tiu.

Tamawaik Eneasak pegkeg wajas wajakiuwai. ³⁵ Dutikamun yaakat Lidanum nuigtú yaakat Sarognum batsamin aidau aents etsagamun wainkag Apu Jisusan nemagkajui.

Dorcas jakaun Pedro inankimu

³⁶ Nunú tsawantin yaakat Jopenum, Jisusa nemajin Tabita daagtin pujau. (Duka griego chichamnumak “Dorcas” taku tawai). Nunú nuwak ashí pegkeg aina nunak takaak, aents ujunauch aidaunash yayaak pujau. ³⁷ Imaní pujau Dorcas jakauwai. Nunikmatai iyashin shiig nijatjag jega makichkia ekeni jegamkamunum iwakag, makichik tesamunum awayaa aepsajui. ³⁸ Pedro Lidanum pujau, Jope tikiju awa nui. Nuniaun dekajuawag Jisusa nemajin aidaushkam jimag aentsun akateak: “Jopenum megkaetugsuk tajutuati tujabiagmae, tusa ujaktajum”, tusa awetiaju.

³⁹ Tusa ujakajam Pedroskam ditajai weu. Nunik jegamtai jukiag jakau tepamunum awayawag, ashí nuwa waje aidau tenteawag ijuntasag buutuinaik, Dorcas iwaaku pujusá jaanch peetai, kutug

aidaujai najantaijin inaktuidau. ⁴⁰ Dutikam Pedroshkam ashí aentsun jiig idayak, tikishmag Apajuin aujus, nuwa jakaun pempentusag:

—¡Tabita nantaktá! —tiu.

Tama nuwa jakaushkam niimi, Pedron wainak nantakí ekeemsau. ⁴¹ Nunikmatai Pedroshkam uwegnum achik awajai, Jisusa nemajin aidaun, nuwa waje aidaujai untasuk ikaunman iwaintukaju. ⁴² Nunú dutikamun ashí Jopenmaya aidauk dekaawag Apu Jisusan dekaskeapi tiaju. ⁴³ Nuna dutika Pedrok Jopenum Simón duwapé apijin tutaiya nuna jeen kuashat tsawan pujusuí.

10

Cornelio Pedro utugtitajum tusa awemamu

¹ Yaakat Cesareanum, Italianmaya suntajan apuji capitán Cornelio daagtin pujau. ² Duka ashí niina patayí aidaujai ijunas Apajuinak puyatjusag emematin aidau. Nunin asa judío ujunauch aidaun yayaak kuashat kuichkin suwau, nuniak Apajuinashkam tuke aajsagké au. ³ Nuní pujaun etsa dukap tegau ai, Apajuí aentsji nayaimpinmaya ni pujamunum waittaman shiig paan wainkau. Nunik chichajak:

“¡Corneliosh!” tiuwai. ⁴ Tama Corneliok puyatuk wajas dii wajatu, nunik ishamayatak: “¿Apuh, wagka tujutme?” Tama nayaimpinmaya aents ayaak: “Apajuí, ame aujam nunak antugtamak, ame aents atsumaidau yayamunash ashí waitjamkae. ⁵ Nuniau asamtai yaakat Jopenum aents awemata, Simón, Pedro tutaya nuna utitnume. ⁶ Nigka tikich Simón duwape apijin tutaya nuna jeen nayantsan uwetus pujawai.”

⁷ Nayaimpinmaya aents chichaman ujak wakitkimtai, Cornelio jimag ni inaken, makichik suntajan dekas Apajuinak anentaimtus wekayin kajittsá diitaijijai untsuká, ⁸ ashí ni wainkamujinak ujak, duwi Jopenum awemauwai.

⁹ Tusá tima kashinia duwi jintá eke Jopenum jegattak weenai, Pedroshkam etsa tajiastatak wajasú ai, jega jegamká tuntupé paka inagnakbaunum wakauwai, nui pujus Apajuin ausatatus. ¹⁰ Nui pujus senchi yapajak yuwatatus wakegayatak eke inajiagtai, pujukmá niishkam shiig paan wainkauwai, ¹¹ nayaim ujanmatai, sámana muun wegkagma iman makí makichik nagkatjamujin jigkatkamu nugkanum akaetatman, ¹² nunú sabananum ashí kuntin yuchatai, chigki aidaujai, dapi aidaushkam pachimka chimpianu yakiya akaiki, nugkaa tajam-tai, ¹³ nayaimpinmaya chichaak: “Pedro, ju kuntin aina aanú maam yuwata”, tiu.

¹⁴ Tama Pedro ayaak: “Apuh, dutikashtatjai, wika ju aidauk yuwawaipajum tibauwa nunak tuke yuchaujai”, tiu. ¹⁵ Tutai awentsag nayaimpinmaya chichaak: “Apajuí pegkeg emakmauwa duka amek yuchaujai tiipa”, tiuwai. ¹⁶ Kampatumá dutika, duwi ataktú nayaimpinum awagkiuwai.

Pedro judiuchu jeen wayaamu

¹⁷ Nunú nunikon wainak: “¿Wagkanuk aunash aik wainkaja?” tusa anentaimtú pujai, Cornelio aentsji aidau: Simogkan jee tuwí pujawa, tusag inií iniimainakua waitinum tantag, ¹⁸ senchi untsumkag:

—¿Ju jega juwi Simón daagtin, tikich daaji Pedro tutaya nu pujat-suak? —tusa iniimu.

¹⁹ Pedro eke ni wainkamujiya nuna anentaimtú pujai, Wakaní Pegkeji chichajak: “Simogka kampakum aents egapainawai, ²⁰ waamak akaikita, nunikam ditajai ijunjam utujimtsuk wetá, wi ditanak awe-mamjai”, tiuwai.

²¹ Tama Pedroskam akaiki, Cornelio aents ishiakbaun jegantun:

—Witjai, ¿wajak asagmae egatkugmesh miniugme? —tiu.

²² Tama dita aiinak:

—Capitán Cornelio, aents dekas pegkegnak takau, Apajuinak puy-atjus emematin, ashí judío aidaush aneenak wakegas diin aina nuna, Apajuí aentsji nayaimpinmaya: ‘Pedro utitajum tusan awemata, ni taa ame dutikmainnak tujamti’, tima jutiin awetamatai minaji, —tuidau.

²³ Tusa ujakam Pedroskam jegá awayawajui, dutikam nui kajigkaju. Nunik tsawajag Pedroskam aents kaunkaujai wetai, wajumak Jopen-maya Jisusa nemajuidaushkam uyudiaju.

²⁴ Nunikag ashí ashinkawag kashinia duwi, Cesareanum Cornelio ashí niina patayí aidaujui, dekas ni kumpají shiig tsanitaiji aidaun ipaa pujamunum jegawajui. ²⁵ Pedro jegá jegattaman, Cornelio jiiintuki igkuak tikishmatjau ememattatus. ²⁶ Dutikam Pedrok achiká chichajak:

—Wajaita, wishakam ame aentsuitam annuketjai, —tiuwai.

²⁷ Tusa chichá chichakua waikmá Cornelio ipaamu aidau tuwak atatman wainkau. ²⁸ Imanik atatman wainak Pedro chichajak:

—Atumek dekagme, judío aidaulik judiuchu aina duka, ditá jeenkesh utuchu ainaji. Tujash Apajuí mina: ‘Wi pegkeg emakbauwa duka, pegkegchau ainawai, tiipa’ tusa dekamtijuame. ²⁹ Tujutiu asamtai, tajutuati tujamae tujutuinaish utujimkas wamkesan minimjai. Yamai dekaatasan wakegajai, wagka minash unsugkamugme nuna, —tiuwai.

³⁰ Tutai Cornelio ayaak:

—Cuatro tsawan pujajai, nuna wainkan, ju agkua juniai mina jegajuí pujusnuk yujumkan ijagmaan yutsuk pujusan, Apajuin aukun pujumjai. Nuní pujai nayaimpinmaya aents jaanch dekas winchamtin wajaknun nugkuaju wajantuntame. ³¹ Nunik chichagtak: ‘Cornelio, ame Apajuí aujam nunak antugtamkae, ame aents atsumaidau yayam nunash waitjamkae. ³² Nunin asamtai yaakat Jopenum aents awemata, dutikam Simón, tikich daaji Pedro tutaya nuna itaatnume. Nigka, tikich Simón duwape apijin nayants uwetus puja nuna jeen pujawai’, tujutmae. ³³ Nuna tujutiu asamtai wamkesan utugtitajum tusan awetimjame, dutikamu asam ameshkam taume. Yamai Apajuí waipamunum juwi ijunjaji, nunidau asaja wakegainaji, amina Apajuí tujabau iishkam ame etsegekumin antukagtas.

Pedro Cornelio jeen chichagkagtukbau

³⁴ Tima Pedro nagkama chichaak:

—Dekaske, yamaik wishakam shiig dekaikai, Apajuik aents aidaunak akanag juka jushá awai, jushakam niishá awai tusag tatsui. ³⁵ Ashí nugkanmaya aents aidau, niinak puyatjus anentaimtuinak pegkegnak takaagtaik, shiig anentus diyawai. ³⁶ Apajuí Israel aents aidaun

chichajak: 'Jisukristu taa yamajam chichaman, shiig agkan batsam-satnun pachis etsegkatnai. Nigki ashí aentsun apuji atinai', tiuwai. ³⁷ Atumek ju chicham tibauwa juka, ashí Judea nugkanum Galilean-mashkam Juan chichagkagtak yamijatujakua nui nagkamsajum dekau ainagme. ³⁸ Apajuí Jisus Nazaretnumiaya nuna, Wakaní Pegkeji susa senchintikam; nuigtushkam Apajuí niini pujau asamtai wekagas, pegkejan takaak, aents iwanch egkemtuam waitú batsatunash etsagajakua dushakam shiig dekagme. ³⁹ Jisus Judea nugkanum, yaakat Jerusaleghshakam, ashí ni takasbauji wainkau aidautik jutiiyaitji. Nunittaman numinum achijag maawaju ainawai. ⁴⁰ Dutikawagmatai Apajuí kampatum tsawanta juwi inanki, iinashkam iwaintugmakui. ⁴¹ Tujash ashí aentsnak wantintugchauwai, jutii aidautin Apajuí duwik nagkamas, ju aidau etsegkatin atinme tusa etegjamu aidautinak wantintugmakui. Jutii aidauti dekas ni maamu nantakmatai ijuntuja yuwaku, umutash uwajagmaiji. ⁴² Nunidau asajin ni jutiiinak: 'Wejum chicham etsegkujum, yamaik Apajuí Jisusnak aents iwaaku, jakau aidaujai etegkin ema apusae, tusajum etsegkatajum' tusa awetabiajai. ⁴³ Ashí Apajuí etsegitin aajakú aina duka, Jisusan pachisag etsejuinak niina dekaskeapi tuidauk tudaujinish tsagkujam agtinai tiajai, tiuwai.

Judiuchu aidaun Wakaní Pegkeji egkemtugbau

⁴⁴ Pedro tusa chichaa wajai, Wakaní Pegkeji ashí aents nunú chichaman antuidaunak egkemtujajui. ⁴⁵ Judío Jisusa nemajin aidau Pedrojai kaunkajuk, judiuchu aidaun Wakaní Pegkeji egkemtugmatai anentai jegagchajui, ⁴⁶ tikich chichaman chichainak Apajuin ememataidau asagmatai. ⁴⁷ Nudiagtai Pedro chichaak:

—Atumesh jutiijai betekak Wakaní Pegkeji jukiu ainayatkugmesh, ¿wagkagmek yamimagchatagme?

⁴⁸ Dekas yamimaktajum tusa, ashí yamikajui Jisukristu adaisag, dutikawajam Pedron:

—Juwi wajumak tsawankesh pujusam wetá, —tusag segajui.

11

Pedro ni wainkamujin Jerusalegnumian ujakbau

¹ Jisus chicham etsegtukatajum tusa etegjamu aidau, nuigtú Jisusa nemajin aidau Judea batsatushkam dekaawaju: Judiuchu aidaushkam Apajuí chichamen wakejus antuinawai tabaun. ² Tujash Pedro Jerusalén wakitki jegamtai, chichaman patatuidau wajumak judío Jisusa nemajin aina nu:

³ —¿Wagka amesh aents judiuchu aidau batsatbaunum wemesh, ditajai ijunjamesh yujumkash yuwaume? —tuidau. ⁴ Imatjuinam Pedroschkam, ashí ni wajuk wekaesae nui nagkamas, wainkamujinash pachis ditan ujainak:

⁵ —Wika yaakat Jopenum pujusan Apajuí aujú pujukman, nayaimp-inmaya sávana muun wegkagma iman makí makichik nagkatjamujin jigkatkamu nugkanum akaetatman wainkamjai, ⁶ nuniakui esettsan diikman ashí kuntin yuchatai aidau, chigki aidaush, dapi aidaushkam pachimka chimpiamun wainkabiajai. ⁷ Nuniai nayaimp-inmaya chichagtak: 'Pedro, ju kuntin aina nu maam yuwata', tujutmayi. ⁸ Tujutkui wi ayaakun: 'Apuh dutikashtatjai, wika ju

aidauk yuwawaipajum tibauwa nunak tuke yuchaujai', tibaijai. ⁹ Nuna tai awentsag chichagtak: 'Amek Apajuí pegkeg emakbauwa duka pegkegchau ainawai tumaitsume', tujutmayi. ¹⁰ Kampatuma imania iwaintujuk ataktú nayaimpinum awagkibi. ¹¹ Nuna dutikamtai pujai, Cesareanmaya apu awemamu kumpatum aents jega dekas wi puja-munum tajutiagmayi. ¹² Nunikagmatai Wakaní Pegkeji chichagtak: 'Utujimtsuk ditajai wetá', tujutmayi. Tujutmatai jujú seis Jisusa nemajin aina jujai wegagmaiji, nunika jegaa ditajai utsanabiaji. ¹³ Nunika ajin, Cornelio niina jeen Apajuí aentsji nayaimpinmaya waintintuk chichajak: 'Aents awemata yaakat Jopenum. Simón, Pedro tuuta awagmatia nuna utitnume. ¹⁴ Dutikam ni tajutjama ame, amina pataimijai uwemjatnugminak shiig ujakpakti, tujutmae' tusa ujakpakti. ¹⁵ Wi dita batsatbaunum jegaan ditajai chichai, jutiin yama nagkamchak utugtambakbia ditanash dutiksag Wakaní Pegkeji egkemtujagmae. ¹⁶ Nuna nunikmatai adeagmajai, duwik Jisus chichaak: 'Juagkak yumí yamijatujakuí, tujash wika Wakaní Pegkejiyai yamigtinaitjime', tujabauwa nuna. ¹⁷ Nunin asamtai, Apajuí jutiin Apu Jisukristu dekaskeapi tusa nemagjin, Wakaní Pegkejin amasajua dutiksag ditanash susaja nunash, ¿wisha yaitja Apajuí dutikaun, dutikawaipa titinnush?

¹⁸ Nuna aatus tabaun Jerusalegnumia Jisusa nemajuidauk antukag, shiig anentaimsag Apajuin emematuinak:

—Dekas Apajuiya duke judiuchu aidaunash yamaik dekas pujutjin yapajiwag, pujut nagkanchaun jukitnume tusa aikae, —tuidau.

Antioquianum Jisus nemajut nagkamamu

¹⁹ Estebagkan maawagmatai pujusag, Jisusa nemajuidau waitkatan nagkamawajui. Dutikainamu asag wajumak Fenicianum weenai, Chiprenmash, Antioquianmashkam shiyakaju. Nui batsamsag yama-jam chichaman Apu Jisusan pachisag imá judío aidaunak jintintuidau. ²⁰ Nuninai wajumak Jisusa nemajin aidau Chiprenmaya, Cirenemaya aidau yaakat Antioquianum jegawag, griego aidaunashkam yamajam chichaman Apu Jisusan pachisag ujaidau. ²¹ Nunidau asagmatai, Apu Jisuschakam ditanak niina senchijin suwau. Aatsa dutikainamu asag kuashat aents ditá pegkegchau anentaimtaijinak idayinak, Apu Jisusnak dekaskeapi tusag nemagkajui.

²² Nunú nuninamun Jisusa nemajuidau Jerusalegnum batsatu antukag, Bernaben Antioquianum awemajui. ²³ Dutikam jegaa, Apajuí wajuk yayawa nuna wainak senchi shiig aneasu. Nunik: Anentaiminish shiig ichichmamjajum Apu Jisus nemagkatajum, tusa chichaju. ²⁴ Bernabek aents pegkeg, Wakaní Pegkejish ajamu, kajintsá anentaimtanmash imanuk asa, kuashat aentsun Jisusdau atinun ijumjauwai.

²⁵ Nuna dutika Bernabek Tarsonum weuwai Saulon egaak, ²⁶ nunik wainak Antioquía jukiuwai. Nuwi Apu Jisusa nemajin aidaujai makichik mijan pujusuí, kuashat aents aidaun jintintak. Nunik Antioquianum nagkamas, Jisus mina chichameg etsegtugkatajum tusa etegjamu aina nuna, "Kristunu" ainawai, tiuwai.

²⁷ Nunú tsawantinig wajumak Apajuí etsegtin Jerusalegnumia Antioquía wegaju, ²⁸ nuanuiya makichik Agabo daagtin wajakí, Wakaní Pegkeji chichamtikam: "Senchi yapajut ashí nugkanum tepeattawai",

tusa etseju, duka Apu Claudio inamak pujai jegauwai. ²⁹ Nunikmatai Jisusa nemajin Antioquianmaya aidaun, tikich Jisusa nemajuidau Judeanun batsamas waitiagtai, yaigmí tusag makí makichik aents dita wajupa susatjai tawa dutiksag, dutikati tusag umikajui. ³⁰ Dutikawag anenjauch ijumjamun jukiag, Bernabé Saulojai wegagtai, Jisusa nemajin aidaun apuji Judea batsataidaun awetiajui.

12

Jacobon mainak Pedro achiká egkeamu

¹ Nunú tsawantaik apu Herodes ni suntaji aidaun Jisusa nemajuidau achigtajum tusa ishitkau. ² Dutikak Jacobo* Juangkan yachiya nunak: Espadayai maatajum, tusa inamjauwai. ³ Nu dutikamu judío aidaun shiig awajkagmatai: Pedroskam achiktajum, tima achikajui. Duka tsawan pag lewaduragtuchu yutaiya nu jegamunum nunikui. ⁴ Dutika achikagmatai Herodes aents achiká chimpitainum Pedron egkeauwai, dutikak dieciséis suntajan: Atum cuatro cuatro kanagjum Pedro kuitamkatajum, tusa ishiakui. Nunak: Jista Pascua nagkaemakmatai aents aidaun ijunjamunum jiikin, chichaman dekaajatjai, tusa anentaimu asa dutikauwai. ⁵ Dutikamu asa Pedrok aents achiká egketainum shiig kuitamkam egketu, nuniai Jisusa nemajin aidaun, Pedron pachisag mijattsuk senchi Apajuin aujtuinak batsatu.

Pedro aents achiká egketainum pujaun Apajuí jikbau

⁶ Nunú kashia duwik, Herodes: Kashin jiktajai ashí aents wainkat-
nume, tusa tibauk tsawaatsaig, Pedrok jimag suntag ejapeam, jimag jiju ikagmawai jigkajam kanú tepau, nuniai tikich aidaun waitin kuitamainak ijunaidaun. ⁷ Nuninai Apajuí aentsji nayaimpinmaya awemamu wantintuku. Nunikmatai juga aents achiká chimpitaig tsawan wajasuí. Nunik nayaimpinmaya aents wayaa Pedro kanag tepettaman bijagnum antig ishintaak: “Wamkesam nantaktá”, tiuwai. Nuna taig Pedro jiju ikagmawai jigkagbauk tsujinag kakekauwai. ⁸ Nunikmatai nayaimpinmaya aents chichajak: “Jaanchjum nugkujam akachumam, sapatjumshakam wegamakam shiig jigkagtá”, tiuwai. Tima Pedroskam dutiksag umikmatai, nayaimpinmaya aents chichajak: “Pataká nugkutajum nugkujam, wi wegakuí pataetugkata”, tiuwai.

⁹ Tama Pedroskam nayaimpinmaya aents wetai pataetuku, jusha dekaskeash junia tusa shiig dekachiatak. Nigka kajanum wantintugbaunash wainag tau. ¹⁰ Juwakiag suntag dekatkau kuitamak ijunun nagkaikiag, tikich ijununashkam dutiksag nagkaikiag, kempatuma juwi dekas waiti ayatak jijuk epenbaunum jegantajui. Nuniamunum nu waiti iman nigki ujaniuwai. Nunikmatai jinkiaju, nunik jinta yaaktanum wegaunum kuwaká waketak, imá Pedronak ukukuiwai.

¹¹ Dutikam Pedroskam: “Dekaskeap mina Herodes achujuk mantuata tau asamtai, Apajuí ni aentsjin awetuji jutijawa, mina pataag judío aidaun mina waitkagmain aina nuna agkanmitkajuatatus”, tusa anentaimjau.

* **12:2** Ju “Jacobok” Juangkan yachi Zebedeo uchijí Jisus chicham etsegtugkata tusa etegkamun aajakua nunuwai. Jacoboa duke Santiago tuuta awagmataiyai.

¹² Nuna tusa idayak, Juan tikich daaji Marcos tutaya nuna dukují María pujamunum, kuashat aents ijunag niina pachisag Apajuin aujtuinak batsatbaunum jegantá, ¹³ Pedro waitin ijuau ujatjítume tusa, nunitai nuwauch Rode daagtin yakita tus diistatus jegantú. ¹⁴ Nunik jegantá waitinak ujatsuk wajas antukmá, Pedro chichamen antujuk shiig aneas tupikaki wakitki:

—Pedro tanta waitinum wajawai, —tiuwai.

¹⁵ Tutai:

—¡Wainkam tatsumek!, —tiajui.

Tama:

—Atsa, dekas ni chichamen antugkamjai, —tiuwai.

Tutaishkam:

—Pedrok amaitsui, niina wakanitskaitai, —tiajui.

¹⁶ Nuna tuinai ataktushkam waitin ijuau, dutiktai waitin ujakmá, Pedron wainkag puyatkajui. ¹⁷ Nuninaig jegá wayaa uwejen takuinu bitat asatajum tusa, nunik wajuk Apajuí aents achiká chimpitainum egketun jikne nuna etseju, nuna etsejuk nuigtú:

—Atum anuí Jacobo, tikich yatsut aidaushkam ujaktajum, —tusa ukuak nigka jinki yajá weuwai.

¹⁸ Pedro nuniku ai tsawagmatai, suntag aidauk nuna emegkakag:

—¿Dusha wajukamki, utusag jiinkime? —tusag senchi pampaidau.

¹⁹ Nuniku ai, Herodes suntajan: Pedro egaktajum, tusa ishikauwai, dutikamu wainkachagmatai: Achikbaun kuitamin aina nunú kajegtajum, tusa ishikam kajegkajui, nuna dutika Herodes Judeanak ukuak Cesarea weuwai nui pujustatus.

Herodes jakamu

²⁰ Herodes Tironmayan, Sidognumia aina nuna shiig senchi kajekauwai; tujash dutikamu ainayatak apu Herodesjai chicham apakmí tusag chichaman umikag, Blasto apu Herodesjai takau asamtai, kajintsá diitaijiya nuna chichajuinak: “Wait aneasam ame jutii pachijattsam, dekas kajegdaitasuk agkan batsamsagmi tuinawai tusam apu Herodes titá”, tiajui Herodes inabaujinian yutain sumaidau asag. ²¹ Tiagmatai Herodes tsawantan dekapatuawai, nunik nu tsawan jegamtai jaanch dekas pegkeg apú nugkutaijin nugkug shiig iwagmamag, chicham dekaatasa ekeemtainum ekeemas nagkama chichatai, ²² aents aidauk senchi untsumkag: “¡Shiig aentschauwai, Apajuí chichau wajawai!” awajuidau. ²³ Nuna imatjuinai, Apajuí ni aentsji nayaimpinmayan makichik awetim jatan susauwai, Apajuin emematchau asamtai; dutikam dukap atsuk Herodesak aka amukam jakauwai.

²⁴ Tujash Apajuí chichamega nunak aan nagkaemasag ashí antamunum etsejuidau.

²⁵ Bernabeshkam Saulojai dita takaamujinak ashimak, Jerusalén waketuinak Juan, tikich daaji Marcos tutaya nuna jukiaju.

13

Bernabé Saulojai Apajuí chichame etsegku yujasbau

¹ Yaakat Antioquianum Jisusa nemajin aidau batsatbaunum Apajuí etsegtin aidau, jintinkagtin aidaushkam batsataidau. Nunuka ju ainawai: Bernabé, Simón (Shuwin tutai), Lucio Cirenenmaya nu,

Manaén (Herodes Tetrarcjai ijunas tsakajua nu) nuigtú Saulo aatus. ² Nuninak, Apajuí emematuinak yujumkan ijagmakag batsatai, Wakaní Pegkeji chichaak: “Bernabek Saulojai awematajum, wi dita takastinum mamiktuawaitag nui wegag takastinme”, tiuwai.

³ Tiajam yujumkan ijagmawag, buuknum achikag Apajuin aujtusag awemajui.

⁴ Nunik Wakaní Pegkeji awemam yaakat Seleucia jegaa, botenum egkemag katigkaju nayantsa ajuntaijin Chipre tutainum. ⁵ Nunik yaakat Salamina tutainum jegawag etsejuidau Apajuí chichamen jega judío ijuntainum. Juan Marcos tutaya nunashkam yaimpakti tusag ayajui.

⁶ Nu ajuntainmag ashí wekaetus chichamnak etsejuk ukuinak, yaakat Pafos tutainum jegawajui. Nunikmá wainkajui judío aents Barjisis daagtin, iwishin Elimas tuuta awagmatai pujaun. Duka wainak Apajuin etsegtinaitjai tusa tsanumin aajakuí. ⁷ Nunú iwishnuk apu Sergio Paulo tutaijai pujau. Nunú apuk dekas yacha aajakuí. Nunú Bernaben Saulojai untsukuí, Apajuí chichamen antuktatus wakegau asa. ⁸ Nunittaman iwishin griego chichamaik Elimas tutaya nu, Apu Sergion utugchatan aputau: Chichaman antuk dekaskeapi ti tau asa. ⁹ Tutai Sauloshkam tikich daaji Pablo tutaya nu; Wakaní Pegkeji ajamu asa shiig emetug diis iwishnun chichajak:

¹⁰ —Amek tikima wait, pegkegchau, iwanchin uchijí, ashí pegkeg aina nuna shiwajiyaitme. ¿Wagka Apajuin chichame dekas pegkeja dusha, pegkegchauwa nuninush chichagme? ¹¹ Yamai Apajuí suwimkan amasmatai, wainmachu wajasam etsa etsanbaush waintsuk dukap tsawan pujustatme, —tiuwai.

Nunú tamawaik iwishnushkam wainmachu wajasá, aentsun egakú egkegsamtai wekaesatjai tusa. ¹² Dutikamtai apushkam, Apajuí chichame etsegbaunash puyatjus antuku asa, nuna wainak wajak dekaskeapi tiuwai.

Pablo Bernabejai yaakat Antioquia, Pisidia nugkanum awa nui chichagkagtukbau

¹³ Pablo ni kumpají aidaujai Pafos jegawag, botenum chimpimjag Perge shiyakaju, Panfilia nugkanum awa nui. Nui batsatbaunum Juagkak ditan ukuinak Jerusalén wakitkiuwai. ¹⁴ Nunikmatai ditak Perge ukuinak Pisidia nugkanum, yaakat Antioquia awa nui wegajui. Nui pujai, tsawan ayamtai tsawagmatai jega judío ijuntaijin wayawag ekeemsajui. ¹⁵ Nuniai chicham umiktin agagbauwa nuna, Apajuí etsegtin agagbau aidanash ashí aujus ashimkag, jega ijuntaiya nuna apuji chichajuinak:

—Yatsug aidauh, atumesh jutii tukagtumain chicham ajutjamkujaig tukagtitajum.

¹⁶ Tama Pabloskam wajakí, uwejen takuinu bitat asatnume tusa, nunik:

—Israel aents aidauh, ikaya aidautijum Apajuí puyatjusum umijin aidautigmeshkam antugtuktajum. ¹⁷ Israelan Apajujiya nu, iina muunji aajakajua nuna etegjauwai, dutikamu asa kuashat aents wajasajui eke Egiptunum pachiinas batsatiatak, imanikagmatai Egipto batsatun Apajuí niina senchijiin jiijuí. ¹⁸ Dutika yajuak uwegshunum cuarenta mijan batsas, dita pegkegchau takaagtaish katsunjauwai.

¹⁹ Dutika Canaán tutainum, siete nugkanmaya ditash chichaaku aidau batsamnun depeetuk ii muunji aidaun batsasuí. ²⁰ Nunak ditak cuatrocientos cincuenta mijan apugtuchu batsamsajui.

“Nunidaun Apajuí apu chichaman epegkin aidaun adaitujui, nunis batsataig makichik uchi Apajuin etsegtin atin, Samuel akiinawai. ²¹ Nunik pujusmatai, Samuelan segau ainawai: Iina apujish ajutjamti, tusag. Tiagtai Apajuí Saulan Cisa uchijin, Benjamín wegantun: Ju atumin apugmik atí, tusa susauwai, dutikam cuarenta mijan inamjauwai. ²² Dutikamun Apajuí idaimitkak Davitan: Ju apu atí, tusa adaikauwai. Dutika Apajuí chichaak: ‘David Isaí uchijiya juna wainkajai, jujú shiig awajtaiwai, wi wakejamunash betek umigtumaina nuna.’ ²³ Nunú David wegantunum akiinawai Jisus, Apajuí: ‘Israel aents aidautigmin uwentijamjatnun awetitnaitjime’, tusa anagta-mauwa nunú. ²⁴ Tujash Jisus eke jintinkagtutan nagkamtsaig, Juan ashí Israel aents aidaunak: ‘Tudau takat idaikujum yamimagtajum’, tusa chichajú wekagu. ²⁵ Nuniak Juan jakatnuji tikiju wegau asamtai chichaak: ‘Wika atum anentaimjutjum duchauwaitjai; tujash mina ukujui makichik minittawai, nunak wika niya imanchau asan niina sapatjinakesh atitmaitsujai’, tiuwai.

²⁶ “Yatsug aidauh Abraham wegantu aidauwah, nuigtú tikich nugkanmaya aidautijum Apajuí puyatjusjum umijin aidautigminash, Apajuí ju chicham etsegbaun antukag uwemjatnume tusa awetugmaje. ²⁷ Tujash Jerusalegnumia aidauk, ditá apuji aidaushkam, juka Jisusapi tichaju ainawai, nunisag Apajuin etsegtin agagbaun ashí tsawan ayamtai tsawautai jega ijuntainum aujuinakush, nuna takumpap tawa tusag dekainachu asag; Jisusan mantamnati tiaju ainawai, nuna dutikainak Apajuí nunikti tibauwa nuna umikajui. ²⁸ Ni bakumamainjig atsujai, Pilatun segajui maami tusag. Dutika mau ainawai. ²⁹ Nuna dutikainak umikajui agagbaunum chichaak: ‘Jisusak dutikam atinai’, tibauwa nuna. Dutikawag Jisusa iyashinak numinum achijam detaun akakí jukiag ukusú ainawai. ³⁰ Dutikawagmataishkam Apajuí jakaunak inankiuwai. ³¹ Dutikam kuashat tsawantai wantintukui Galilea nagkamas Jerusalegkash tuke niijai ijunag yujajakú aina nuna. Nunú ainawai yamai niina pachis, ashí aents aidaush antuinamunum etsejuina duka.

³² “Nuaduí jutiishkam yamajam chicham atuminish etsejuinaji: Apajuí ii muunji aajakajua nuna anagkuauwa nu, ³³ duka yamaik jutii ni wegantu ainag nui uminkae, Jisusan inankiuwa nuaduí. David Salmo2.7num agak tiuwai: ‘Ametme mina uchigmek, wi akiinati tima akiinaw asam, nuaduí pujutnash wiki amasjai’, tibauwa nunisag. ³⁴ Apajuí junak emtika etsegkauwai, Jisus inankim ajumaish tuke jakashtina nuna pachis: ‘Wi Davitan dekas pegkeg aidaun anagkuauwaitag nunak aminí umiktinaitjai’ tusa. ³⁵ Nuaduí tikich Salmonmash: ‘Ame uchijum pegkegma nuna iyashí kaugtí tusamek idaisashtatme’, tibauwai. ³⁶ Dekaskenmag duka David pachisa tichamui, nigka ni wegantu aina nuwig Apajuí dutikata tibaunak ashí imatiksag umik jakauwai, nunikmatai niina muunji ukumataijinig ukusam kaujuí. ³⁷ Tujash Jisusa iyashig kaugchawai, Apajuí inankimu asa. ³⁸ Yatsug aidauh, atumesh ju shiig dekaatajum: Jisusai tudau tsagkugnamuk awai, tusa etsejuinag nu, ³⁹ tuja Moisés chicham

umiktinun amasajua nunú umikmawaikish, bakumamaichau ainagme tamakesh asachuitjume; tujash ashí aents Jisusai dekaskeapi tusag sujumanaidaunak bakumamainchau emakajui. ⁴⁰ Kuitamamkatajum Apajuin etsegtin aidau agagbauwa nu atumin uminkai. Nunú agagbau tawai:

⁴¹ 'Antuktajum dushikkagtin aidauh.

Wi Apajuí asan,

atum puyatjusa diimainun iwaintamash dekaskeapi tichatnaitjume, tuja tikich aentskesh nuna ujpainakuish pachikchatin ainagme.

Nunidau asajum megkaejatnaitjume.' "

⁴² Juna tusa ashimak Pablo ni kumpají aidaujai, jega judío ijuntainmaya jijnjagmatai, judiuchu aidau:

—Tikich tsawan ayamtai atata duwishkam jutiksamek ujabatkata, —tusag segaidau. ⁴³ Nunú ijunbau ashimnakmatai, judío aidau, tikich judío atajai tumamiu aidaujai Pablon Bernabejai pataetukajui, nuniagtai:

—Atumek Apajuí anempaidau asag wait anenjamjau asagmatai, shiig ichichmamjajum pujustajum, —tusa chichagkajui.

Pablo Bernabejai Judío aidaujai pampandaijamu

⁴⁴ Nunú tsawan ayamtai jegau asantai, kuashat aents yaaktanun batsamin aidau ijunjajui Apajuí chichame etsegbaun antukagtat. ⁴⁵ Imaanik aents tuwakajun judío aidau wainkag senchi kakjegag, Pablok wainak tu wekaewai tusag pegkegchau chichajuidau. ⁴⁶ Tuinam Pabloskam Bernabejai puyatkas chichainak:

—Dekas dekatkauk atum mina pataag judío aidautijum Apajuí chichameg ujaktajum tibau asaja ujakmajime. Tujash atumek pujut tuke atina dushakam dakitau asagmin, yamaik judiuchu aina nui ju chichamak etsegkagtatji. ⁴⁷ Jutiinak Apu Apajuí: 'Wi aminak judiuchu aina nuwish tsaaptina numamtin emajame, mina chichamjun ashí nugkanmash etsegkati, nunitai ditashkam uwemjatnume tau asan', tujamajji.

⁴⁸ Nuna antukag, judiuchu aidauk shiig aneasajui, nuninak Apajuí chichamega juka dekas shiig pegkejai tuidau; nunikag ashí aents pujut nagkanchaun jukiagtinme tibau aina duka dekaskeapi tiaju. ⁴⁹ Nunikagmatai ashí nunú nugkanmag, Apajuí chichamenak dekawajui. ⁵⁰ Nudiagtai judío aidau, nuwa dekas Apajuin puyatjus umijin eme anentsá diitai aidaun, nuigtú aishmag dekas chichamesh antugtai aidaujai chichasag: Atum Pablo Bernabejai jikjum awematajum, tusag inajaju. ⁵¹ Nunú aaja tiajam ditá sapatjin ukuinak jukiag, nui tsuwat ayaun awatuk akaketuk ukukiajui yaakat Iconio weenak. (Nunak chichaman dakitjaju asagmatai, dita suwimak jukitnujin iwaintak dutikawajui.) ⁵² Nuna dutikawagmataish Jisusa nemajin aidauk, shiig aneasag dakunkut batsataidau, Wakaní Pegkeji ajamu asag.

14

Pablo Bernabejai yaakat Iconionum yamajam chicham etsegkamu

¹ Pablo Bernabejai yaakat Iconio jegawag tuke nunin asag, jega judío aidau ijuntajin wayawaju, nunikag Jisusan pachisag etsejagtai antukag kuashat judío aidau, judiuchu aidaushkam dekaskeapi tusag

Jisusan nemagkajui. ² Tujash judío dekaskeapi tuinachuk, tikich judiuchu aidau chicham dekaskechunak tsanuidau, Jisusa nema-juidau kajekatnume tusag. ³ Nuninaig Pablo Bernabesai dukap tsawan pujusajui, nunikag Apu Jisusai kajinmas chichagkagtuidau, nuniagtai Apu Jisus senchijin suwau aents dutikmainchaun iwainagtai wainainak, chichaman etsejuina nunash dekaskeapi titinme, tau asa. ⁴ Nunitai Iconionmaya aidauk wajumak aents kanakajui; nunikag judío dekaskeapi tuinachujai ijunainai, tikich wajumak Jisus chicham etsegtugkatajum tusa etegjamu aidaujai ijunaidau. ⁵ Nunidau asag judío aidau, judiuchu aina nujai, apu aidaujai chichaman umigkaju, Jisusa chichamen etsejuidaun waitkasag kayai tukuí tukuinakua kajegmí tusag. ⁶ Nunú tuinamun Pablo Bernabesai dekagmamawag, nugka Licaonia tutaya nui yaakat Listra, tikich Derbe, tutaya nui, nuigtú tikich yaakat tikijumamtin aidaunum jegawag, ⁷ nuwishkam yamajam chicham uwemta nuna pachis etsejuidau.

Listranmaya aidau Pablon kayai tukuagbau

⁸ Nu Listranum makichik aents yama akiinmawaik nagkam-nas, tuke wekaechau kagkajinash umushchau pujuttaman wainka-jui. Dushakam nui ekeemas, ⁹ Pablo chichagkagtutai antú eketun, Pabloskam esetus diikmá, dekas nigka etsaentumainapi tusa anen-taimá eketun wainkauwai. ¹⁰ Dutika senchi jiiká chichajak:

—¡Wajaim, shiig tutupit wajastá! —tiuwai.

Tamawaik tseke wajakí wekaetan nagkabau. ¹¹ Pablo dutikamun wainkag aents aidauk, Licaonia chichamai senchi untsumkag:

—¡Apajuí aidau aentsmaga jutiin akaetugmakiaje!

¹² Tusag Bernaben chichajuinak:

—Juka apajuí Jupiterai* —tuidau.

Tuja Pablon ni chichagkagtau asamtai:

—Juka apajuí Mercuriowai —tuidau.

¹³ Nunú yaaktanun niiniasuk apajuí Júpiter tutai ememattai jega au, nuna sacerdoteji toro aidaun jukiag, nuigtushkam iwagmamak yagkug aidaujai yajuak, kuashat aents aidaujai kaunkauwai. Nunikag nunú toron maa apeenak, Pablon Bernabesai emematta tuidau.

¹⁴ Nu nuniamun Pablo Bernabesai wainkag, jaanchjin tujit ichigkag aents tuwaká ijunbaunmak ditashkam eteena wajan senchi untsumkag:

¹⁵ —Muun aidauh, ¿wagka ancha aikagme? Jutiishkam atum ainajum annuketji. Atum wainkajum aikajum aanú idaikujum, dekas Apajuí iwaaku pujú nayaimpin, nugkan, nayantsan, ashí nui ayaa nuna najankauwa nu nemagkatajum tusa, chicham yamagma nu etsejin ainaji. ¹⁶ Yaunchuk tsawan aajakua duwik Apajuik ashí aentsun: Dita wakejuinamunak takastinme, tusa idaisauwai. ¹⁷ Dutikauwaitkush: Wi Apajuyaitag nuna dekajuatnume, tau asa yumin yutumtikawai, ajakshakam shiig tsapaidiag nejeawagmatai, nuna yuwinak shiig dakujustinme tujamu asa.

* **14:12** 'Júpiter', 'Mercurio' tawa nunak versión Reina-Valera (RV) tawai. Tikich versión Dios Habla Hoy (DHH) takug: 'Zeus', 'Hermes' tawai. 'Zeus', 'Hermes' aina juka griego aidau apajimtaiji aajakajui. Nuna romanmaya aidau tuinakug 'Júpiter', 'Mercurio' tujakajui nunak tuinayatak.

18 Tusá ujainamash, aents aidauk nunú toro maa apeaku dita ememattanak kakajus idaimainchau dekapedau.

19 Nuninai wajumak judío, Antioquianum batsamin aidau, tich Iconionum batsamin aidaujai kautuawag, aents tuwakú aidau-nak anentaimtan yapagtuawaju, dutikawajam Pablonak kayai tukuí tukuinakua: Maajistai, tusag japikí jukiag, yaaktan ukumtiksg aipkiajui. 20 Dutika aipkiagmatai, Jisusa nemajin aidau tentea apakag batsamtuinai, Pabloshkam anean nantakí, ataktú yaaktanum wayaa, kashinia duwi Bernabejai Derbenum wegajui.

21 Nui jegawag yamajam chichama nuna etsejiagtai, kuashat aents nuna antukag Jisusa nemagkagmatai ukuinak, Listra, Iconio, Antioquía aina nuní waketjajui. 22 Nuanuí jegawag Jisusa nemajuidaun anentai ichichtuinak:

—Atum Jisusai dekaskeapi tiuwaitjum nuwig anentaimsajum pujustajum, dekaskenum Apajuí inamtaijin wayata takuik, dekatkauk kuashat waitmainaitji, —tiaju. 23 Nunikag Jisusa nemajin aidau makí makichik yaakat batsata nui, nuna diin agtinun adaitug, yujumkan ijagmawag batsamsag, ashí Jisusai sujumankau aidaunak: Ni kuita-mkati, tusag Apajuin aujtusag ukukiaju.

Pablo Bernabejai Siria nugkanum Antioquía awa nui wakitkimu

24 Nuna dutikawag ukuinak Pisidia nugkan nagkaikiag Panfilia nugkanum jegawajui. 25 Nunikag yaakat Perge jegawag chichaman etsegkag ukuinak, Atalianum jegawajui. 26 Nui nagkaemakiag botenum egkemawag Antioquía wegajui, nuwiya aidau yama nagkamchak Pablon Bernabejai, Jisusa chichame etsegkatajum tusa awemainak Apajuin aujtusajua nui, takatan ashimkag jegawajui. 27 Nunik Antioquía jegawag, ashí Jisusa nemajin aidaun ijumag, Apajuí dita takainamunum shiig kuashat yaigkagbaun pachis ujakaju, judiuchu aidaush wajuk Apajuin dekaskeapi tiaje nunashkam. 28 Nunikag Pablo Bernabejai kuashat tsawantai nuwig Jisusa nemajin aidaujai ijunag batsamsajui.

15

Jerusalegnumia aidau ijunjamu

1 Nunú tsawantai wajumak Judeanmaya aidau Antioquía jegawag, Jisusa nemajin aidaun jintintuinak: “Atumek Moisés chicham umiktinun agajua nui, pakamaktajum tibauwa nu umiachkugmek uweemain ainatsjume”, tuidau. 2 Tuinamun Pablo Bernabejai antukag, ditajai senchi pampandaijajui. Nu aatus au asamtai Antioquianmaya aidau: Pablon, Bernaben, nuigtú tikich Jisusa nemajin aidaujai etejajui Jerusalén wetinme, nunikag nunú yaaktanum Jisus chicham etsegtugkatajum tusa etegjamu aidau, nuigtú Jisusa nemajuidaun diin batsata nujai, nuna pachisag chichastinme tau asag.

3 Dutika awemajam, Fenicia nugkanum tuja Samaria nugkan-mashkam nagkaemainak: “Yamaik judiuchu aents aidaushkam duwik umitaijinak idayinak Apajuin nemajuinawai”, tusa etsejiagtai ashí Jisusa nemajin antukag shiig aneedau.

⁴ Pablo Bernabesai Jerusalén jegawagmatai Jisusa nemajin aidau, Jisus chicham etsegtugkatajum tusa etegjamu aidaujui, Jisusa nemajuidaun diin aidaushkam shiig anentus jukiajui, dutikawajam ditashkam Apajúi yayasam dita takasbaujinak imatiksag ditanash ujaidau. ⁵ Tiagtai wajumak fariseo aidau, Jisusan dekaskeapi tusag nemagkaju aidau wajaidiag chichainak:

—Dekas judiuchu aidau Jisusa nemajuina dushakam, Moisés chicham umiktajum tibauwa nunash umiktinme nuninak pakamain ainawai, —tuidau.

⁶ Tuidau asagmatai Jisus chicham etsegtugkatajum tusa etegjamu aidau, Jisusa nemajuidaun diin aidaujui ijunjaju: Dusha dekas wajuk amainkita, tusag dekawagtatus. ⁷ Kuashat nuna pachisag chichá chichamjamunum, Pedro wajakí chichaak:

—Yatsug aidauh, atumek shiig dekagme, Apajúi atum ainajum anuiyatigmin mina etegtuauwa duka, aents judiuchu aidaunash yamajam chicham uwemta nuna pachis etsegtai antukag, ditashkam Jisusan dekaskeapi titinme tujutu asa. ⁸ Apajúi anentaibaunash ashí dekauwa nunú, wi ditanash uwemtijatasan wakegag nunash dekaatnume tau asa, jutiin Wakaní Pegkejin sujamsagmaya dutiksag ditanash Wakaní Pegkejin egketjagmayi. ⁹ Apajuik jutiinash, tikich judiuchu aina nunashkam, ditash aentsua nunin diigmatsuk, ashí betek Jisusaig kajinas anentaibiagtai, ditá anentainash pegkemtikiajui. ¹⁰ Nunin aish ¿wagka atumesh dusha Apajúi ekajmainush, iina muunji aidaukesh umikchaju, yamaikish jutiish umimainchauwa dusha, Jisusa nemajin aidau umiktinme tusagmesh wakegagme? ¹¹ Duka nuninchauwai, yamaik jutii Apu Jisus dekaskeapi tabaunum uwemainag nunisag ditashkam uwemainawai, —tiuwai.

¹² Timatai ashí itatjag Bernabé, Pablojai Apajúi yayasam aents dutikmainchaun, judiuchu aidaunmash iwainagbaun etsejiagtai, ekeemsag antú pekajuidau. ¹³ Chichaamun ashimkagmatai Jacobo wajakí chichaak:

—Yatsug aidauh, minash antugtuktajum. ¹⁴ Apajúi wajuk judiuchu aidaunash yamaik wait anentug, mina aentsug agtinme tusag etegjae, nuna pachis Simón ujakakaje. ¹⁵ Nunak Apajúi etsegtin agagbauwa nujai betek nunikaje, nu agagbaunmag Apajúi chichaak:

¹⁶ ‘Ju junikmatai wi David wegantu aidau jega tegaekauwa numamtuk wajakaja nuna,

ataktú jegamaina numamtuk awajkattajai, agkan batsamsatnume tusan.

¹⁷ Dutikam ashí tikich nugkanmaya aidaush imá minak egatuinak, mina aentsug aina nujai betek agtinme tau asan, tiuwai.

¹⁸ Apu Apajúi yaunchuk nagkamas jujú chichaman dekamtijamauwa nu yamaish aatus tawai.’

¹⁹ “Nuaduú wika aents judiuchuitak, Apajuin nemagkaja duka ju dutikatajum tusaik waitkaschagmi tajai. ²⁰ Dekas ayatak papí agatjagmi: Ashí apajimtai aidau anagkuamu aina duka yuwawaigpajum, tsanijimtach tsanijinawaigpajum, kuntin ayatak pempeaja maamu aina nuna nejesh, kuntin ayatak jakaw aina nuna nejeshkam, numpashkam yuwawaigpajum, tusa duke tiagmi. ²¹ Yaunchuk nagkamas awai ashí yaaktanum Moisés chicham umiktajum tusa agagbauwa nuna

etsejuidauk, duka tsawan ayamtai tsawagmatai jega ijuntainum tuke aujtayai”, —tiuwai.

Judiuchu aidau papi agaja awetimu

²² Tutai Jisus chicham etsegtugkatajum tusa etegjamu aidau, Jisusa nemajuidaun diin aidaujai, ashí Jisusa nemajin aidaujaishkam shiig chichasag dita aina nuwiyan, Pablo Bernabesai Antioquianum wegagtai awemagtatus etegjajui. Dutikainak Judas tikich daaji Barsabás tutaya nuna Silasjai etegkawajui, nunú aina nui dekas eme anentsá diitai aidau, ²³ Dita wegagtai papiin agatuinak:

“Jutii dekas Jisus chicham etsegtugkatajum tusa etegjamu aidauti, Jisusa nemajuidaun diin aina nujai ijuntsan, atum Jisusa nemajin aidautijum judiuchu Antioquia, Siria nugkanum, Cilicia nugka aina nuwish batsatainajum nunú aidautigminash shiig anentsan kumpamjime.

²⁴ Wajumak aents juajuiya, jutii wetá tichamaitak atumiin midiang tajutjamawag, anentaimtagminish pachimjamkag ukugmakiaju tabau dekaamji. ²⁵ Nunikaja ashí ijunja chichasá, jimag aents etegka, jutii aneetaiji yatsug Bernabé, Pablojai anuí atumin ijagtamsatatus mininakui awemainaji. ²⁶ Bernabé, Pablo aina juka, ditak Apu Jisukristu chichamen etsejuidau asag, maata tuina-mash ditá pujutjinak puyatjuinatsui. ²⁷ Dita mininakui Judasan, Silasjai awetajime, dita anuí tajutjamawag shiig igkumpasag, ashí juna pachisajag ujakaktinme. ²⁸ Wakaní Pegkejiya duka atumnak atum umikchamna imannak tujamtsugme, jutiishakam aikasaik anentaimtuidau asaja ayatak: ²⁹ Ashí apajimtai aidau anagkuamu aina duka yuwawaigpajum, tsanijintash tsanijinawaigpajum, kuntin ayatak pempeaja maamu aina nuna nejesh, kuntin ayatak jakau aina nuna nejeshkam, numpashkam yuwawaigpajum tusa tajime. Jujú aina nujai kuitamamkugmek shiig imagnisjum pujuttage.”

³⁰ Jujú aatsa agatja susam sujuktatus Antioquianum wegajui. Nunikag jegawag ashí aentsun ijumjag, nunú papi agagbaun susajui. ³¹ Dutikawajam Jisusa nemajin aidau nuna papi ausag dita tiagbaun antuinak, shiig senchi shiig aneasaju, anentai ichichtuinamu asag. ³² Judas, Silas aina dushakam Apajui etsegtin asag, nuwiya Jisusa nemajuidaunash ujaak, anentai ichichtujag wakemitkakaju. ³³ Nui dukap tsawan batsamsag Judas wakettai, Jisusa nemajin aidau shiig anentsag akateg awemajui. ³⁴ Tujash Silasak kumpají waketiagtaish juwakui. ³⁵ Pablok Bernabejaig Antioquiak juwakag, tikich aidaujai ijunjang Apu Jisusa pachis yamajam chichaman jintinkagtuidau.

Pablo ataktú Apajui chichame etsegku webau

³⁶ Wajumak tsawan batsamsag Pablo Bernaben chichajak:

—Ataktú Jisusan nemagkaju aidau ijagsami, ashí yaaktanum Apu Jisusa chichame etsegkabiag nui wajuk ditash batsatainawak nu diiyaku, —tiuwai.

³⁷ Nu tabaunum Bernabé, Juan tikich daaji Marcos tutaiya nuna ayatatus wakegau. ³⁸ Tujash Pablok nunak ayamainchau dekaeau, wagki Marcosak Panfilianum ditan ukuak, ijunas takatnum wechau asantai. ³⁹ Nunitai kuashat jiya jiyanutuinakua mai kanakaju. Nunik

Bernabek Marcosan juki Chiprenum weuwai. ⁴⁰ Nuniai Pablok Silasan juki, Jisusa nemajin aidau:

—Apu Jisus yaimpamunum wekaesatajum, —tusa shiig akatjajam, nuwiya jiinkiag, ⁴¹ Siria nugkanum, Cilicia nugkanmashkam Jisusan nemajuidaun anentain ichichtukiag nagkaemaidau.

16

Pablo Silasjai Timoteojai igkunikagbau

¹ Pablo yaakat Derbenum jegaa nagkaemaki Listranmashkam jegau. Nunikmá makichik datsauch Timoteo Jisusa nemagnun wainkau, nuna dukujig judío nuwa Apajuí nemajin, untsu apají griego aents aajakuí. ² Jisusa nemajuidau Listranum, Iconio batsataidauk, Timoteon pachisag pegkejan chichajuidau. ³ Tuidau asagmatai Pablo Timoteo uyuntusti tusa wakegau asa, pakaji ajapjuatajum tima pakajiajui, judío nui batsamin aidau pegkegchaun anentaimtinum tau asa, apají griegon ashí dekaidau asagmatai. ⁴ Nunikag ashí yaaktanum nagkaemainak, Jisusa nemajin aidaun ujaidau, Jisus chicham etsegtugkatajum tusa etegjamu aidau, nuigtú Jisusa nemajuidaun diin aidau Jerusalén batsamas agagbaun pachisag. ⁵ Aatus nunidau asagmatai, Jisusa nemajin aidau dita kajintsá anentaibaujinish nuní nagkaemas ichich-mamaidau, nuninak Jisusa nemajuidaushkam kashí kashinig ayatak kawedau.

Macedonianmaya aents Pablon kashi wantintukbau

⁶ Wakaní Pegkejiya nunú Asia nugkanum etsegekatajum tusa awe-mashbau asag, Frigianum jegaa Galacia jegaashkam nagkaemakiag, ⁷ Misia nugkanum jegawag, Bitinia nugkanum wegagtatus anentaimaidau; tujash Wakaní Pegkeji wetinme tusag idaisachui. ⁸ Nunikag Misianak tutupnik nagkaikiag Troas jegawajui. ⁹ Nunikag Pablo nui kintamtatman kashi paan Macedonianmaya aents wajantun: “Juwi Macedonia katigkam minash jintinjuata”, taun wainkauwai. ¹⁰ Pablo nuna wainkamtai, dekas Macedonia wegagmi tusa umintsabaiji, junak Apajuiyap yamajam chichaman awi etsegekati tujamu asa jutikawa tusaja.

Pablo Silasjai Filiposnum chichaman etsejiagtai Lidia sujumankamu

¹¹ Nunikaja Troasnum egkemjá tutupnik wega wegakua ajuntai Samotracionum jegaa, kashinia duwi Neapolisnum jegabaiji. ¹² Nui pujusá, Filipos Macedonianmaya yaakat dekas iman, Romanmaya aidau batsamtainum jegawabaiji. Nunika nui machik tsawan pujusabaiji. ¹³ Nuniamunum tsawan ayamtai tsawagmatai, yaakat ukuaku namaká uwet jegawabaiji, jutii anentaimsaik judío aidau Apajuí aujtaijig awis awatai tau asaja. Nunika jegaa pekaamsaja nuwa aidau ijunjaju chicham ujabaiji. ¹⁴ Nunú nuwa aidaunum nuwa Lidia daagtin Tiatiranmaya, jaanch yamakaitkau dekas pegkeg aidaun sujin, Apajuinash emematin asa ekeemas antú ekeemayi. Nunittaman Apajuí anentaimtijabi Pablo etsegbaunash shiig antukti tusa. ¹⁵ Dutikamu asa Jisusan nemagkamtai, ashí niina patayijai yamigbaiji. Nu dutikam:

—Atumesh, wi dekas Jisusan nemagkau waitkugmek, mina jegajui kaunajum kanagtajum, —tujamkui ni pujamunum wegabaiji.

Pablo Silasjai achiká aents achikbau chimpitainum egkeamu

¹⁶ Nunika pujusá Apajuí aujtainum wegajin, nuwa inak wakan pegkegchau dekamtikam etsejin igkumpaktatus jüintugmakmayi. Nunú nuwa dutika takatai niina apuji aidauk kuashat kuichkin juwidau. ¹⁷ Nunú nuwa, jutii Pabloyai wegajin pataetugmak minis senchi untsamak:

—Jü aents aina juka Apajuí nayaimpinmayaya nuna umijin asag, nuwiya chicham uwemtikagtina nuna atumnash ujakagatatus minit-jamainawai! —wajau.

¹⁸ Nunak kuashat tsawantai imatú wekaetai, Pablo kajejuk, ayam-patua wakan pegkegchau nuwauchinum pujaun chichajak:

—Jisukristu daajin tajame, aanú nuwauch ukuakum jüinkim wetá, —tiuwai.

Nunú tusa tamawaik wakan pegkegchaush wamkes jüinki wegak nuwanak agkan ukukiuwai.

¹⁹ Tujash nuna apuji aidau ni dekamamtai kuichik jutaijin dutikashmin wajasmatai, Pablon Silasjai achiká jukiag, chicham dekatasa ijuntainum apu aidau emtin ejegawaju. ²⁰ Dutika chichaman epegkin aidaunum ejeyag chichainak:

—Jujú judío aents ainayatak iina yaaktajin taawag dapamkagtu-inawai, ²¹ nuninak ditá pujutjin jutii Romanmaya aidautik makichkish dutikmainchauwaitag nuna jintinjamainawai, —tuidau.

²² Nuna tiagtai aents aidauk Pablon Bernabejai pampantug wajatki-agmatai, apu chichaman epegkin aidaushkam:

—Awikjum numí suwimatajum, —tusa inamjau. ²³ Timatai senchi suwí suwimainakua, achikbau chimpitainum egkeawag, achikbaun kuitamin aidaun:

—Wejum shiig kuitamkatajum, —tusa awemajui. ²⁴ Nunú tusa tima, achikbau kuitamnushkam juki, jegá awayaa imau nagkatkamunum ejegan, taapna dawé dekapasa agtukbaunum nawen wegajug shiig chanuag kuwakchamin ema ukukiuwai.

²⁵ Imatika ukukim, Pablo Silasjai aehaet Apajuin aujuinak, kantamtan kantam wajagtai, tikich aents achigbau chimpijushkam antú batsatu. ²⁶ Imatú batsatai pachiachmau senchi uujak, jega aents achiká chimpitai ajigbau aidaun senchi pegau, imatiktai ashí waitig ujanjauwai. Tuja aents achiká jiju ikagmauwai jigkakbaushkam tsujinag kakekaju. ²⁷ Imaniai achikbau kuitamin kanag tepaushkam shintaak diistakamá, ashí waitig ujanag aun wainak, aents achigbau aidauk shiyakeapi tusa, espadajin ukuini juwakug maamata tau.

²⁸ Nunitai Pablo senchi untsuká:

—Maamawaipa, jutiik ashí betek batsatji, —tiuwai.

²⁹ Tutai achikbaun kuitamnushkam:

—Jii ekemakjum sujustajum, —tau.

Tutai jü ejentuntam juwakug, sapí sapigjai tupikaki Pablo Silasjai wajamunum kujaukmaikia wayakug tikishmatjau. ³⁰ Dutika juki agaa jüikí:

—Muun aidauh, ¿wisha wajukmainaitja uwemjata tusanush? —tusa iniau.

³¹ Tusa iniinam dita aainak:

—Apu Jisukristuig dekaskeapi tita, nu nuniakum amek ashí amina pataim aidaujai uwemjattame.

³² Nuna tusa Jisukristu chichamenashkam niina ujaak ashí niina patayijai ujakuí. ³³ Dutikam aehaet aig, achikbaun kuitamnushkam Pablon Silasjai suwimku tsupigbau numpa waigkun nijatkau. Dutikam nuaduí ditashkam ashí nuna patayijai yamikuí. ³⁴ Nu dutikawajam ditá jeen jukiag yujumkan ajamsajui. Nu aentsuk ashí ni patayijai shiig aneasaju, Apajuiyai dekaskeapi tusag sujumankaju asag.

³⁵ Kashikmas apu chichaman epegkin aidau, achijatin aidaun awetijaju, aents achikbaun kuitamnun ujaktí Pablon Silasjai jiiiktinme tusag.

³⁶ Tibau asa achikbaun kuitamnushkam Pablon chichajak:

—Apu chichaman epegkin aidau chichaman akupjutak akupkati tujutne, nunin asamtai jiiinkijum shiig aneasjum wetajum, —tiuwai.

³⁷ Tusa tama Pablo achijatin aidaun chichajak:

—Jutiik Romanmaya aents ainajinig shiig chichaman dekagtamsuk tuwakbaunum asutamawag aents achiká chimpitainum egkepawag-mae; dutijabau ainayatkush, ¿wagka yamaish tikich waipainatsaigkish uuká jigmakta tuinawa? Duka nunimaitsui, dekas dita taawag iinak jigmaktinme, —tuidau.

³⁸ Tusa timatai achijatin aidau apu chichaman epegkin aidaun jega-juawag, timae tusag ujaidau. Tama nuna antukag senchi ishamkaju, Romanmaya aentsuitjai tau asagmatai. ³⁹ Nunikag Pablon, Silasjai wejiaju:

—Wait aneasjum tsagkugtugtajum —tita tusag.

Dutikawag jiiikiag:

—Juig pujutsuk wetajum, —tusag awemaju. ⁴⁰ Tiajam jiiinkiang Lidia jeen shiyakaju, nui jegawag aents Jisusa nemajuidaun wainkag shiig anentain ichichtujag ukuinak shiyakajui.

17

Pablo Silasjai Tesalónica jegaamu

¹ Nunik ashinak yaakat Anfípolis, nuigtú Apolonijai nagkaikiag jegawajui Tesalonicanum jega judío aidau ijuntaijin. ² Pablok tuke nunin asa, jega ijuntainum wayauwai, nunik kumpatum tsawan ayam-tainum judío aidaujai Apajuí chichame agagbaun pachis tudayinau. ³ Dutikak, Kristuk waitkasa maam ataktú nantaktinai tusa agagbauwa nuna pachis jintias ujaak:

—Wi Jisusan pachisan atumin ujaajim, nuuwai Kristuk, —tiuwai.

⁴ Nuna tutai wajumchik judío aidau Jisusan dekaskeapi tusag sujumankaju, nunik ditashkam Pablo Silasjai wekaebaunum ditajai ijun-jajui. Tuja kuashat griego Apajuí emematin aidau, nuigtú kuashat nuwa puyatjusa diitai aidaushkam, Jisusan dekaskeapi tusag nemagkaju.

⁵ Tujash judío dekaskeapi tuinatsu nu kajeenak, aents pegkegchau, nuigtú daki aidaun ipaa ditajai ijun-jag aentsun dapampainak ashí yaaktanmayanak ekaajaju; nunikag Jasogkan jeen jetekaju, Pablo Silasjai pujatsuash, pujakuig japikí jukiaja aents dekas tuwakbaunum ejegami tusag. ⁶ Tujash Pablonak Silasjai wainkachag, Jasogkan, tikich Jisusa nemajin aidaujai jukiag yaaktanum dekas apu pujamunum ejegawajui. Dutikawag:

—Ju aentsua ju, jimag aents ashí nugkanum wekagas dapamkagtú wekaenuwe nunú juwi iinashkam tajutjamamtai, ⁷ Jasón niina jeen awayaa apusae, ashí ju aina juka Roma apujiya nu chicham umiktin

najanamua nunak dakituinawai, ditak tikich apu Jisus daagtin awai tuidau asag.

⁸ Nunú tabaun aents aidauk, ashí apu aidaujai antukag, senchi pampaidau. ⁹ Imatiagtai Jasón tikich Jisusa nemajin aidaujai apu aidaun chichajuinak:

—Jasta, dekas jutii yajá wetajum tusa awemanti, nu tau asá kuichik ukuaji, iina yaaktajin jijnjagmataig ataktú awagtugkitajum, untsu jijnjashmataig kuichkik tuke jukitajum, —tiaju.

Nuna tiagmatai apu aidau Jasogkan, tikich Jisusa nemajin aidaunash akupkajui.

Pablo Silasjai Berea jegawagbau

¹⁰ Dutikawajam wamkesag kashi aig, Pablonak Silasjai Bere-anum awemajui. Dutikam jegawag judío aidau ijuntaijin wegajui. ¹¹ Bereanmaya aidauk Tesalonicanmaya aidaun nagkagas shiig anentaimkau asag, wakegas chicham etsegbaunash antujuidau, nuninak kashí kashinig Apajuí chichamen shiig kuitamas aujuidau, nu tawa dusha dekas ajampashit tusag dekawagtatus. ¹² Imanidau asag kuashat judío aidauk dekaskeapi tuidauk Jisusan nemagkajui, tuja griego aidau, nuigtú nuwa eme anentsá diitai aidaushkam dekaskeapi tusag Jisusan nemagkajui. ¹³ Nuniagtatman judío Tesalonicanmaya aidau, Pablo Berea wekagas Apajuí chichamen etsejui tabaun dekaawag, shimutkag nuwishkam aentsun dapampakaju. ¹⁴ Nudiagtai Jisusa nemajin aidau Pablon: Amek nayants anunjukam wekaesam wetá tusag awemaju, nuniai Silas Timoteojai juwakajui. ¹⁵ Pablo uyunaidauk Atenas ejegawag ukukiaju. Nunú waketiagtai Pablo, Silasan, Timoteojai chichaman akupjak: “Waamak juwi taatnume, juwi ditajai igkuniktajai”, tiuwai.

Pablo Atenas pujusbau

¹⁶ Pablo Atenas jegaa, Silasan Timoteojai dakak pujus, shiig kuashat anentain idajtus diyau, ashí yaakta nuanuig imá ditá apajimtai aina duke ayau asamtai. ¹⁷ Nuniau asamtai jega judío aidau ijuntaiya nui wayaa judío aidaujai kuashat tudayu, tikich Apajuin umijuidaujaishkam, nuniak kashí kashinig yaakta ejapeen aents tuwakbaunmash dutiksag tudayu. ¹⁸ Nunisag, aents Epicuro daagtin jintinkagtuamun aujin aidau Epicúreos tutai, tikich aents Zenón daagtin jintiamun aujin aidau Estoicos tutai aidaujai kautkag, Pablojai tudayinau. Nuniagtai tikich aidau:

—¿Au aentsush wajina pachisaya imá chichawa? —tuidau.

Tiagtai tikich chichaidau:

—Auk tikich nugkanmaya apajuujimtain pachis etsejin aina numamtinai, —tuidau.

Nunak Pablo Jisusan pachis yamajam chichaman etsejak ni mantamna nantakbaujai etseju asamtai, tiajui. ¹⁹ Tusag Pablon, Areópago tutainum, apu aidau ijuntaijin ejegawag iniinak:

—¿Jutiish ame yamajam jintinkagtam nunú tukagtumainchaukaitam? ²⁰ Ame jintinkagtam duka jutii antushtai jintinkagtame, nuniau asamin jutiish nunash wajina takug tawa tusa dekatasa wakegainaji, —tuidau.

²¹ Ashí Atenas batsamin aidauk, nuigtú tikich ikaya kaunkau nui batsamin aidaushkam, yamajam chicham etsegbaun antuinakjag tikichnak uyumatsuk, nuna shiig dekawagtatus wakeyin asag tuidau.

²² Nuna tiagtai, Pablo Areopagonum* jegau asa, nuwi ejapeen wajantá chichaak:

“Atenasnumia aidauih, atum apajimjum duka dekas pujawapi tusajum anentaimtin ainajum nunak wainjime. ²³ Atumi apajuijum emematku ijuntaigmin diyakun wekaesan, altarnum ‘iApajuí wainchatai!’ tusa agaja adujkamun wainkamjai. Nunú ‘Apajuí wainchatai’ atumesh waintsuk emematin ainajum nuna wishakam pachisan etsegjai.

²⁴ “Apajuí nugkan najana, ashí nugkanum ayaa nunash najanauwa duke, nayaimpin nugkanashkam apujig. Nigka aents juga Apajuí ememattai atí tusa jegamkamunmag pujuchui. ²⁵ Tuja aents takagtusmatai pujustajai tusag atsumchauwai. Niiyai pujutnash, mayainash ashí waji aina nuna sukagtinuk.

²⁶ “Tuja makichik aents najanamua nuanuiyag yujak ashí nugkanum batsamsatnume tiuwai. Dutika mamiktujui tsawantan tuja nugka dita batsamsatnunashkam, ²⁷ nui batsamas mina egatkatnume nuninak dekajuatnume tusa. Tujash dekaskenmag jutiijaig atushtak at sui. ²⁸ Apajuí senchijin pujuidau asá buchituinaji; nunisag atumin muunjum dita anentaibaujinian agau aidaushkam: ‘Jutiik Apajuin uchijí ainaji’, tiajui. ²⁹ Apajuin uchijí ainakuik, makichik aents nigki anentaimas, ni anentaimtamun dakumak oroikish, jiju platayaikish, nuna dutikachkush ayatak kayaikesh najanamu aina nunintsukaitai Apajuik tusaik anentaimtumaitsuji. ³⁰ Nunak aents dekachu asa nuniagtaish, Apajuí pachitsuk idaisau akushkam, yamaik aents ashí nugkanum batsamin aidaush, dita tudau takaamujinak idayinak, minak nemag-tuktinme, tawai. ³¹ Apajuik makichik tsawantan mamikiauwei, nunú tsawan jegatai ashí nugkanmaya aidaun, Kristu Aentsmaga Akiinau mantamna ataktú nantakiuwa nuna, yamaik aents pegkegchau aidau, pegkeg aidaujai etegjam akankam ijumjata titin asa”, tiuwai.

³² Mantamdauwaitak aneantu tabaun antukag tikich aidauk ayatak dushikinai, tikich chichainak:

—Dekas imá pegkeg ju tame duka tikich tsawantin antakuish antukagmi, duwi etsegkata, —tiaju.

³³ Tiagmatai Pabloskam ukukiuwai. ³⁴ Tujash wajumak aents Apajuin dekaskeapi tusag nemagkajui. Nuanuí pachitkau Dionisio daagtin, Areopagonum ijunin, tuja makichik nuwa Dámaris daagtinchakam, nuigtú tikich aidaushkam.

18

Pablo Corinto jegaamu

¹ Pablo nuna dutika ukuak, Atenas jiinki yaakat Corintonum weuwai.

² Nuanuí jegakmá makichik judío Pontonmaya Áquila daagtin niina nuwe Priscilajai Italianmaya tau asantai, Pablo ijagsatatus weuwai. Nunak apu Claudio ashí judío aidau Roma batsata duka jinjatnume

* **17:22** Areópago tawa nunak, yaaktanmaya apu aidau chichaman dekawagtatus tuwakua nuna tawai. Nunak nunijká ainawai, aents ikaya taantai chichaman antugkagtatus.

tau asamtai nunikui. ³ Nunik jegakmá duwapen apijug jegamin asag, duwapen apijainak batsamtatman wainak, niina takataijijai ditashkam betek takaidau asamtai, Pabloshkam nui juwakui, ditajai ijunag takastatus. ⁴ Tuja ashí tsawan ayamtai tsawautai, jega ijun-tainum jegaa, judío aidaun, griego aidaunashkam, Kristun dekaskeapi tumamtikiagtatus tuke ujasagké au.

⁵ Silas Timoteojai Macedonia pujau taawagmatai, Pablok imá chicham etsegbauwa nunak takau, dutikak judío aidaunak: “Apajuí etegkam Kristu, atum dakajum nunuke Jisusak” tusa chichagkagtau. ⁶ Tujash judío aidauk Pablonak shiwagmaidau, nuninak pegkegchaun chichajuidau. Imatjuinamu asa Pabloshkam niina nugkutaijin pegajá wajantá chichaak:

—Atumek bakumajum megkaekatin ainagme, wika nunak uyumamaitujai. Yamaya juwi nagkamsanuk wika tikich aents judiuchu aidaunum wetatjai, —tiuwai.

⁷ Nuna tusa ukuak jega ijuntainmaya jiinki, Justo Apajuí umijin nui ayaumas pujaunum jegau. ⁸ Tuja Crispo, jega ijuntaiya nuna apuji ashí niina patayijai Jisusan dekaskeapi tusag nemagkaju. Tikich Corintonmayashkam kuashat aents nunú chichaman antukag dekaskeapi tusag yamimakaju. ⁹ Nuniku ai Apu Jisus Pablon kashi paan wantintuk chichajak: “Sapigmakaipa, chichagkagtam duka idaitsuk chichagkagtukta. ¹⁰ Wi amijaig wekaejai, makichkish amina pegkegchau awajtamkatasag achigmamaitui. Ju yaakta juwishkam mina aentsug aidauk kuashat ajutui”, tiuwai. ¹¹ Nunú tima Pablok Corintonmak makichik mijan jimaituk, nuwiya aents aidaunash Apajuí chichamen jintintak pujusú.

¹² Nunú tsawantinig Galión Acayanmaya apuji we pujai judío aidau ijunag, Pablon shimutuk achiká jukiag, apu pujamunum ejegawag, ¹³ apun chichajuinak:

—Ju aentsua ju ashí aents aidaun ni wagagki dekas Apajuiya duke emematmain ainagme tayatak, Moisés chicham umiktajum tibauwa nunak umiatsui, —tuidau.

¹⁴ Tiagtai Pabloshkam chichtatus nagkamata taig, Apu Galión judío aidaun chichajak:

—Ju aents pegkegchau takasbau, nuniachkush magkagtuamukesh pachisjum takugminig atum judío aidautijum tajum nunak antug-mainaitjime; ¹⁵ tujash ayatak chichama nunak, aentsun daaji aidaun pachitus, atumin chicham umitajum aidaujai chichawai. Nuniau asamtai imá atumek juka iwajatajum, wika aanin aidau epegkeata tusanuk wakegatsjai.

¹⁶ Tusa chicham epegkeaku ijuntainmayan agaa jijjú. ¹⁷ Dutikawajam ashí aents aidauk jijnag Sóstenes, dekas jega ijuntain apujiya nuna achikag, apush wajasá dii wajataig suwimaidau. Dutikiagtaishkam apu Galiogkak shiig pachikchau.

Pablo Antioquianum wakitkimu

¹⁸ Pablo Corinto Jisusa nemajuidaujai kuashat tsawan ijunag pujus, Áquila Priscila aatus Siria nugkanum ashinkauwai. Tujash Crenca wetatus botenum egkemtsuk, Pablo awamajui, ni duwik nuniktajai tibaujin umikta tau asa. ¹⁹ Nunik yaakat Efeso anumkamunum, Pablo

Aquilan Priscilajai ukuak nigka jega ijuntainum weu, nunik judío ijunjamunum Jisusan pachis chichasú. ²⁰ Nunikmatai Pablon:

—Wait aneasam juwi dukap tsawan pujusam wetá, tusa segaidau, tujash nigka dakitjauwai, ²¹ nuniak:

—Jerusalén jista atata nui pujuta tusan wegajai, Apajuish wakegakuig ataktú waketjukin tajuattajime atumin wainkatasan, —tiuwai.

Nuna tusa botenum egkemag Efeson ukuak weuwai. ²² Cesarea jegaa Jerusalén weu, nuwiya Jisusa nemajuidaun kumpamatatus; nunik Antioquía weuwai.

²³ Nui jegaa dukap tsawan pujus ataktú jinki, Galacia, nugkanum, Frigia nugkanmash ashí Jisusa nemajuidaun makí makichik anentain ichichtugtatus.

Apolos Efesonum chichagkagtukbau

²⁴ Nunika wekaebaunum makichik judío Apolos daagtin, yaakat Alejandrianmaya Efesonum jegauwai. Nunú aentsuk Apajuí chichame agagbaunashkam shiig dekau asa, imatiksag shiig chichagkagtin aajakuí. ²⁵ Nigka, Apu Jisus pachisaish jintintuamu asa, wakekegat shiig paan antumainun Jisusan pachisashkam jintinkagtau, tujash nigka imá Juan Yamijatak jintinkagtuamunak dekau. ²⁶ Apolos jega ijuntainum wajantá shiig machikish puyatkas wajas chichamujin Priscila Aquilajai antujuk, ajum chichamujin ashimkamtai akanak jukiag, Jisusan pachis shiig juní awai tusag ujakajui. ²⁷ Apolos Acaya nugkanum wetai, Efesonmaya Jisusa nemajin aidau papiin agatjaju, nuwiya Jisusa nemajuidaush shiig anentus jukitnume tusag. Dutikam Apolos Acaya jegaa, Apajuí yayasam Jisusan dekaskeapi tiaju aidaun kuashat yaigkuí. ²⁸ Aatus nuniau asamtai judío aidaushkam, Jisusak Apajuí awemachbauwai tumainchau dekapedau. Wagki duwik Apajuin etsegtin aidau Jisus pachisa agagbaun iwaintug: “Ju Jisus taji duke Kristuk”, tau asamtai.

19

Pablo Efeso pujusbau

¹ Apolos Corinto pujai, Pablok mujanmanini tsupina Efesonum jegakmá, kuashat aents Jisusa nemajuidaun wainkauwai. ² Nunik:

—¿Atumesh Jisus nemagkugmesh Wakaní Pegkejish jukiuk ainajum? —tusa iniau.

Tama dita aiinak:

—Jutiik Wakaní Pegkeji awai tabauk machikish antuchuitji, —tiaju.

³ Tiagtai awentsag iniak:

—¿Atumnash ya yamigmajuitjume?

Tusa tama dita aimainak:

—Jutiinak Juan yamigmajui, —tuidau.

⁴ Tiagtai Pablo ayaak:

—Juagkak ayatak aents aidau tudau takatan idayagtai yamijakuí, nuniakush mina ukujui minitta nunú dekaskeapi titajum, —tiuwai Jisusan pachis.

⁵ Nunú tabaun antukag Apu Jisusa daajin yamimakajui.

⁶ Nunikagmatai Pablo ditá buuken achikmatai, Wakaní Pegkejishkam ditanash egkemtujajui. Dutikawajam ditashkam tikich chichaman

chichaidau, nuninak Apajuí tabaunash etsejuidau. ⁷ Nuna nunidauk ashí ijumjamak doce aents aajakú ainawai.

⁸ Pablok kempatun nantua imajin juga ijuntainmag wesag pujau, nui jegaa chichagkagtakush ishamkagtsuk chichau, nuniak aents aidaunash Apajuí inabaujin pachis shiig dekamtikau. ⁹ Tujash wajumak aents aidau antumtikmainchau aidauk dekaskeapi tuinachu. Nunidau asag tikich aents aidaush antuinamunum, yamajam chicham etsegbaun pegkegchau chichajuidau. Nudiagtai Pablok Jisusa nema-juidaunak ashí yajuak, makichik aents Tirano daagtinun jintinkag-tutaijin jeganum utsaa, ditanak kashí kashinig Apajuin chichamenak jintintu. ¹⁰ Dutika takaak jimag mijan pujusuí. Nuniiau asamtai ashí aents Asia nugkanum batsamin aidauk, judío aidaujai, tikich judiuchu aidaushkam Jisusa chichame etsegbaunak antukajui. ¹¹ Apajuishkam Pablon yayau dutikam kuashat aents dutikmainchau aidaun iwaidau. ¹² Imatikau asamtai pañuelo aidaun jukiag, jaanchikish Pablo iyashin antigkag aents jaun ejeti, nunash antigkag etsagaidau, dutikam wakan pegkegchau aidaushkam jiinaidau.

¹³ Dutikiagtai wajumak judío aidau jintá yujasag, wakan pegkegchau aentsun egkemtuaun jiiuidau asag, Apu Jisusa daajin adaisag jiihta tuidau; nuninak wakan pegkegchaun chichajuinak: “Pablo Jisusan etsegta nuna daajin jiinkitajum”, tuidau.

¹⁴ Nunak sacerdote aidaun apuji Esceva daagtin judío aentsua nuna uchijí siete aajakajua nu dutikaidau. ¹⁵ Nuna tiagtai, wakan pegkegchau ayaak: “Wika Jisusnak wainnujai, tuja Pablos yaita nunak shiig dekajai; tujash atumesh ¿ya ainagme?”

¹⁶ Nuna tusa tamawaik, aents wakan pegkegchau egkemtua-mua dushakam tupikatki achikag, ashí ditanak wagagkiag senchi suwimaidau, imatikainam jegan ukuinak shiig wisú, tikich upu upujukim wegauke asajui.

¹⁷ Nu nunikbaun judío aidau, judiuchu aidaushkam Efesonum bat-samin aidauk ashí antukag, senchi ishamkajui. Imaninak Apu Jisusan pachisag emematuidau. ¹⁸ Nunisag kuashat Jisusan dekaskeapi tusag nemagkaju aidauk, kaunawag ashí antuinamunum dita pegkegchau takataiji aidaunak ashí etsegtumaidau.

¹⁹ Nuigtushkam kuashat aents iwanchin papijin aujus takajakú aidaushkam, papijin ikaunmak, ashí aents wainainamunum apekaju. Nunú papí aina nuna akikeg cincuenta mil kuichik tumain aajakuí. ²⁰ Aatus Apu Jisusa chichameg niina senchijijai, ashí tikich nugkan-mash pampag wegau.

²¹ Nunú nunik nagkaemakui ai, Pablo:

—Macedonianmaya aidaun, Acayanmaya aidaujai ijagsatjai, nunikan Jerusalén jegatjai, —tiuwai. Nuigtushkam:

—Jerusalén jeganuk Roma wemainaitjai, —tiuwai. ²² Nuna tusa jimag niina yain aidau Timoteon, Erastojai Macedonianum awemajui, nunik nigka machik tsawan Asia pujustatus juwakui.

Efesonum pampandaijamu

²³ Nunú tsawantai Yamajam chicham pachisa kuashat pampandayamu asauwai. ²⁴ Nunak Demetrio daagtin, jiju plata tutain takau asa, juga Diana ememattain dakumas najanu, dutika sujuk niijai

takau aidaujai kuashat kuichkin juidau. ²⁵ Nuniak aents niijai takau aidaujai, nuigtú tikich ditajai betekmamtuk takau aidounash ipaa ijunjag chichainak: “Muun aidauh, atumek dekagme, iik jujú jutika sujaku shiig pujú ainaji. ²⁶ Tujash atumesh wainjume, antutash antugjume, jujú Pablok apajú aidau aents najanamu aina duka apajuichu ainawai tusa, kuashat aents aidoun, dekaskeap nuninaita tumamtikui, nunak imá Efesowa juwig tatsui, ashí Asia nugkanmayanashkam tu wekaetawai. ²⁷ Juna jutika juka shiig puyatjumainai, jutii sujuinag juna sujumainchau etamkamtaig megkaemainaitji, tujash imá duke nunimaitsui, jega iina apajuiji Diana* daagtina nuna jeeshkam pachikchamu atatui, nunitai Asia nugka juwiya, ashí tikich nugkanmaya aidoush emematin agma nunak dakitug idaisagatui.”

²⁸ Tiagtai antukag, senchi kajekag untsumainak: “¡Diana Efesonmayanua juke dekas imanuk!” wajaidau.

²⁹ Imataidau asag ashí yaaktanmayag shiig dekaashmin wajasag wainak pachimdaekaju. Nunikag jimag aents Macedonianmaya Pablon uyunaidaun, Gayo daagtin, Aristarcojai pujuttaman achikag jukiag, japí japinakua dekas jega shiig muun aents aidau tuwatain ejegawaju. ³⁰ Nuna dutikawagmatai Pablo nui wayaa aents aidoun ausatatus weta tutaishkam, Jisusa nemajin aidau: Weepa, tusag emetuawajui. ³¹ Asianmaya apu aidau, wajumak Pablo kumpají aidoushkam nigka aina aanina awig pachinkaigka, tusag chichaman akupjukajui. ³² Nuniai ijunjamunum wajumak aents makichik wajiin pachisag senchi untsumaidau, nuniai tikich aidauk tikichin pachisag untsumaidau, aents aidauk kuashat pachimdagaidau, nuniai kuashat tikich aidauk dekainachu, wajina pachisag ijunjaje nunak. ³³ Imadiagtai judío aidau Alejandron shitakiag emaidau, ame tikich aidoush shiig ujaktá tusag, dutikam Alejandroshkam uwejen takuinu bitat asatnume tusa, judío aidoun ayamjus ashí aents antuinamunum chichaktatus. ³⁴ Nu chichatai diikmag judío aentsun wainkag, senchi untsumkag: “¡Diana Efesonmayanua juke dekas imanuk!” wajai wajainakua jimag hora amainun ejesattak wegagtai,

³⁵ nunú yaaktanmaya apu chichatai agatin wajantá, imatuidaun itatmitkak chichaak: “Efesonmaya muun aidauh, ashí tikich nugkanmaya aidoush dekainawai, jujú yaakta juwiya aidau, apajú Diana ememattaiya nuna jeenak kuitamkati tibauwai, ashí niina niimejai betekak nayaimpinmaya iyaajua nunashkam. ³⁶ Imaan dekaidau asag, junak wainkayai tumain ainatsui. Dekas bitat asatajum, wainkajum shiig anentaimtsuk pegkegchauk dutikawaigpajum. ³⁷ Jujú aents atum juwi itaujum juka, atumi apajuijum ememattai jega nunakesh pegkegchauk ematsui, apajuigminakesh pegkegchauk chichagtsui. ³⁸ Demetrio, niijai takau aina nujai, tikich aentsjai chichaman tudaitatus wakegainakug, apu chichaman epegkin aidau batsata nui ditak wegag, makí makichik ditanua nunak tudaimain ainawai. ³⁹ Untsu atum tikich tumain ajutjamainakuig, nunú pachisjumek dekas ijunjamunum tumain ainajume. ⁴⁰ Yamai pampandaibau asa juka puyatjumainnum pujaji, apu Romanmaya dekaa waji pampanjume

* **19:27** “Diana” tawa duka griego aidau apajuijimtaji aajakuí. Tikich versiognumak “Artemisa” tawai Diana tawa nunak tayatak.

tujamkuish tumainnum batsattsuji.” ⁴¹ Nuna tusa aents aidaunak ishiakui.

20

Pablo Macedonia Greciashkam webau

¹ Nunú pampandayamu nagkankamtai, Pablo Jisusa nemajin aidaun untsukú. Dutika chichá chichagkawa ashimak, ditan pagkuk akateg ukuinak, Macedonia weuwai. ² Nui wekagas ashí Jisusa nemajuidau-nash ijajus anentain ichichtug ukuak Grecia jegauwai. ³ Nui kampakum nantu pujus: “Siria nugkanmag lanchanum wetajai”, tusa pujukmá dekauwai, judío aidau Pablo maami tusag uminas dakainamun:

—Nunik dekas kukag Macedoniaya atú nagkaemaktajai, —tiuwai. ⁴ Tusa wetai saetukajui Bereanmaya aents Sópater daagtin Pirro uchi-jiya nu, Aristarco Segundojai Tesalonicanmaya aidau, Gayo Derben-maya dushakam tikich Timoteo, nuigtú Tíquico, Trofimojai Asianmaya aina dushakam. ⁵ Ju yatsut aina juka ditá eemag yaakat Troasnum jegawag dakagmagmayi. ⁶ Ditak nuninai jutiik ukunum juwakaja pag lewaduragtuchu inajuamu yuwaku jistamtai tsawagmatai, nunú inagkeaki Filiposnumiati botenum jiinki, cinco tsawan Troasnum jegaa, nui makichik tumig inagkeakiabiaji.

Pablo Troasnum ijasbau

⁷ Tumig tsawagmatai ijunjabiaji Jisus jakamu anentaimtusa pag yuwawagtasa, nuniamunum Pablo kashinia duwi jiinkitin asa, Jisusa nemajin aidaun jintí jintintai ahaet wajasuí. ⁸ Jutiik jega yakí tesamunum kuashat lámpara ekemagbaunum ijunja batsamiaji. ⁹ Nuniamunum makichik datsauch Eutico daagtin, ventananum eketu. Pablo chichá chichagkagtakua ayatak emau asamtai kaja achikuí, dutikam shiig initjau kanag yakí kampakum jega ekenbaunmaya juwaki nugká iyawabi. Nunikmatai inankamag jakaun inankiajui. ¹⁰ Nunikmatai Pablo akaetuki, uchin pagkuk inankiabi. Dutika Jisusa nemajuidaun chichajak:

—Puyatkaigpajum iwaakui, —tiabi.

¹¹ Nuna tusa Pablo ataktú yakí waka, Jisus mantamnamujin anentaimtusag pagkan puug yuwa chichá chichagkagtakua, tuke tsawampag weuwai. ¹² Nunitai uchin iwaakun jukiag shiig aneasag juwakajui.

Pablo Mileto webau

¹³ Jutiik iiyá emka lanchanum juwaki Aso wegabiaji, nuanuí Pablo igkugka jukitasa, nigka: “Kukag wetasan wakegajai”, tiu asamtai. ¹⁴ Nunika Pablo Aso taamtai igkunika nui niish egkemjamtai Mitilene jegabiaji. ¹⁵ Nunika wega wegakua kashinia duwi ajuntai Quío tutainum diiká nanamsabiaji, nui juwaki kashinia duwi Samos anum-tainum anumkabiaji. Nunika Trogilio kanaja kashinia duwi Mileto jegawabiaji. ¹⁶ Nunak Pablok Asia nugkanum dukap tsawan pujutan dakitau asa, Efesonum wetanak dakitjauwai, waamak Jerusalén jegá niishkam jista Pentecostés pachinkata tau asa.

Pablo Efesonmaya Jisusa nemajuidaun diin aidaujai akatdaijamu

¹⁷ Pablo Mileto pujus, Efesonmaya Jisusa nemajuidaun diin aidaun untsukabi kautjuktinme tusa. ¹⁸ Tima kaunkamtai chichajak: “Atumek

dekagme wi yama nagkamchakun, juwi Asia nugkanum taawabiag duwi nagkamsan wajuk pujusja duka. ¹⁹ Ashí tsawantai atumjai ijunja pujusan, Apu Jisusan umigkunchakam emematsuk pujusan, kuashat negayai Apajuí augbaijai, tuja mina pataag judío aidaushkam imanik pegkegchau aidaun egatjuinak waitkajianume. ²⁰ Nuna imatjuinakuish, wika chicham pegkeg atumin yaimpamaina nunak tuke ujabiajime. Jintinbaijime iwainajan aents tuwakbaunmashkam, tuja atumin jeeminchakam dutiksanuk jintinbaijime. ²¹ Mina pataag Judío aidaunash, judiuchu aidaunashkam tudau takatak idaikujum, Apajuí nemagkujum, Apu Jisuschakam dekaskeapi titajum tusan, ujayajime. ²² Yamaik Jerusalén wegajai, Wakaní Pegkeji awetau asamtai, awish utugtukagtig nunash dekatsuk wegajai. ²³ Untsu Wakaní Pegkejiya nunú, ashí wi yaaktanum wegamunmag chichagtak: 'Aminak achigmakag egkepatatus dakagmainawai, waittash imanik kuashat waittsattame', tusa ujatbaunak dekaujai. ²⁴ Tujash wika nunak puyatjuchujai, wika mina pujutjunak uyumasnukesh diichujai, wi wakegag nunak Apu Jisus yamajam chicham Apajuí anempa nunú etsegkata tujutbauwa nuna betek umikan, nagkankatasan wakegajai.

²⁵ "Yamaik dekas atumnash tajime, wi atum aidautigmin Apajuí nuní inapaji tusan ujakjim anuiyatigmekesh minak waitkashatin ainagme. ²⁶ Nuaduí yamaya juwik titasan wakejajime, minak atumiin bakumainuk makichkish atsugtawai. ²⁷ Wagki wika Apajuí tawa nunak makichkish uugká idaitsuk, ashí iwaintusan ujakjim nuaduí. ²⁸ Nuaduí atumek kuitamamkatajum, ashí aents Jisusa nemajin aidaun, Apu Jisus niina numpeen akikmak sumakua nuna, Wakaní Pegkejiya nu atumin, uwijá kuitamin aidau uwigjin kuitamajama imatikas, shiig kuitamkatnume tusa aputamsajua duwi. ²⁹ Dekajai wi wemataig, tikich aents aidau kuntin kajen uwijan amuwama numamtuk, Jisusa nemajin aidautigmin emegkapakagtatus kautjamkagtatui. ³⁰ Atum ainajum anuiyag, dekaskea nunak jintinkagtutsuk, waita nuna jintinkagtaush agtatui, Jisusa nemajuidaush wi jintiag junak umiktinme tusag. ³¹ Nu nunikaijum aneaku atajum; adeagtajum wi kauptamum mijadai tuke kashi tsawaishkam, nagá makichik atum aidautigmin nuní pujustajum tusan chichagkun, meká negajai imatjimijajim nunú.

³² "Yatsug aidauh yamaik Apajuyai idaijime, ni anejatbaunum chichaman sujamsauwa nujai juwaktajum, nu chichamak senchigtinai, iman asa atum Jisusai aan nagkaemasjum kajintsá anentaimtanum yaimpaktatjume, nunitai Apajuí ni aentsji aidaun jukitnun anagkuauwa nunash imatiksag amastatjume. ³³ Wika tikichdau kuichik, jaanch, oro aidaunakesh wakeejuk wekaechabaijai. ³⁴ Nunak nunitsuk wika mina uwejuig takasbaijai, wi atsumamun juwakun tikich wijai yujaidau atsumainamunash yaigtasan. ³⁵ Tuke jintinbaijime aajam takamain ainagme, nuniakjum tikich atsumaidaush yaimainaitjume tusan. Adeagtajum Apu Jisus chichaak: 'Ni juwak shiig anea nuní nagkaemas shiig aneawai tikichin suwa duka', tiuwa dushakam."

³⁶ Juna tusa idayak, Pablo ashí tikich aidaujai tikishmajag ditajai ijunas Apajuin aujsajui. ³⁷ Nuna nunikag ashí buutuina, Pablon pagkukag kugkuyanume akatdayinamunum. ³⁸ Senchi wake besemag dekapianume, Pablo chichaak: Ataktú awenagmek waitkashti-

naitjume, tau asamtai. Nunikag botenum egkematatus wetaishkam saetusag ejegawajabi.

21

Pablo Jerusalén webau

¹ Jisusa nemajin aidau ukuinaku lanchanum chimpimjá, tutupit Cos wegabiaji, nunika kashinia duwi Rodas jegaa, nagkaemasaik Pátara jegawabiaji. ² Nui jegakmá lancha Fenicia wegau wainká, nui egkemjá weyaji. ³ Nu nagkaiki wesá ajuntai Chipre wainkabiaji; duka menanmanini ukuaku Siria wegabiaji. Nuniamunum lanchanmayan wajiin jiigta tuinakui Tiro anumkabiaji. ⁴ Nui jegakmá Jisusa nemajin aidau wainkaja, nui makichik tumig ditajai batsabiaji. Nuniamunum Wakaní Pegkeji dekamtikamu asag, Pablon chichajuinak: “Jerusalegkak we-maitsume”, tiajabi. ⁵ Tujash tibau aig, makichik tumig nagkaemakmatai jiinjabiaji. Nunika wegajin ashí Jisusa nemajin aidauk, ditá nuwe uchijí aidaujai uyuntamas miniyanume yaaktan ukukiag, nunikagmatai nui kaamatkanum utsanawaja ashí tikishmakaja Apajuí ausabiaji. ⁶ Nunú nunika pagku pagkuní ukunikiaja lanchanum egkemjin ditashkam jeen waketjajabi.

⁷ Tironmayati juwakiaja nayants wegamuk, Tolemaidanum jegaa, nui jiinkí Jisusa nemajuidau batsatbaunum jegawaja, chichai chichainakua makichkia kanaja ukukiabiaji. ⁸ Kashinia duwi jiinkiaja Cesarea jegawabiaji. Nunika Jisus chicham etsegugkatajum tusa etegjamu aina nuna yain siete aajakajua nuwiya, Felipe wekagas chichagkagtina nuna jeen jegaa kanajabiaji. ⁹ Felipe nawanji cuatro agkanjam Apajuí etsegtin batsabianume.

¹⁰ Nuanuig kuashat tsawan pujajin Apajuí etsegtin Judeanmaya Agabo daagtin taawabi, ¹¹ nunik Pablo akachumtaijin juki, uwejen nawenishkam jigkamag chichaak:

—Wakaní Pegkeji chichaak, Jerusalén jegamtai judío aidau juna akachumna nuna achikag jigkajag, judiuchu aents aidanum sujukagtatui tawai, —tiabi.

¹² Nuna takui antukaja jutii, Cesareanmaya aidaujai ijuntuja, Pablo chichagku:

—Dekas Jerusalegkak weepa, —tibaiji. ¹³ Nunú tajinchakam Pablo ni aigmak:

—¿Wagka buutkugmesh minash wake besemjash anentaimtijagme? Wika ayatak jigkagbau atasanuk umintsan wekaetsujai, wika Apu Jisusa chichame etsegbaunum Jerusalén mantuinakuish jakatasaanush wakegajai.

¹⁴ Taku depetmain wegachkui, tujinká:

—Apu wakegamu atí, —tusa idaisabiaji.

¹⁵ Nu tusa idaisa pujusá, chimpiima umintsá Jerusalén ashinkabi-aji. ¹⁶ Nu wegajin Cesareanmaya wajumchik Jisusa nemajin aidau uyuntamsagmayi. Nunikag Chiprenmaya Mnasón daagtin nigka duwik nagkamas Jisusa nemajin pujaunum etetamawagmayi, niina jeen ikapagti tusag.

Pablo Jerusalén jegaamu

¹⁷ Jerusalén jegaa ajin nuwiya Jisusa nemajuidau shiig anenjamsag ujamkiagmayi. ¹⁸ Kashinia duwi Pablo: Jacobo ijagsami takui, niijai ashinkabiaji. Nui jegakmá ashí Jisusa nemajin aidaun diin batsatbaunum jegawabiaji. ¹⁹ Nunika ajin Pablo ditan kumpamá, duwi makí makichik ni wekaesamunmayan, judiuchunum wekaebaunmash Apajuí nuní yainkame tusa ditanash ujabi. ²⁰ Nunú tabaun antukag Apajuin emematiagmayi. Nunikag Pablon chichajuinak:

—Dekas yatsujuh pegkejai ame tame duka, tujash amesh wainme dekapamainchau iina patayí judío aidau Jisukristun dekaskeapi tusag nemajuina duka. Nuna nuninakush ditak, Moisés chicham umiktinun ukugtambimua duka tuke idaitsuk umigmainai tuinawai.

²¹ “Tujash amina chichagtamainak, auk nigka ashí iina patayí judío aidaun, nuigtú judiuchu aidau batsatina nunash jintintak: ‘Moisés chicham umiktajum timawa duka umigmaitugme, uchi aishmagkuch akiinkuish, pakagkagmek ajapjumaitugme, iina muunji takajakua dushakam atumek idaisatajum’, tusa tawai tujamaina nunash, ²² ¿wajuk asamtaiya tujamainawa? Nunú tabaun antú batsata nunidau asag, ame juwi taamugmin dekgamainakug kautjamkagtatui. ²³ Nunin asantai ju dutikmainaitme: Jutii ainag juwi, cuatro aents yamai umiktatus batsatainawai Apajuí anagkuamun. ²⁴ Nunú yajuakam wetá nunikam ditajai pegkeeta, dutikam ju aents diwimkagtukagmataish ame akikmatkata, dutikawamin ditá intashin tsupigtinme. Nunú nunikamin ashí waipakag amina augmatjamsag tujamiagbaunash wainkampap tuinawa, niish dekas Moisés tibau ii umiinag nunash imatiksagkeap umiawa, tujabiagtatui. ²⁵ Judiuchu aidau Jisusan dekaskeapi tusag nemajuina dushakam, ashí apajimtai aidau anagkuamu aina duka yuwawaigpajum, tsanijintash tsanijinawaigpajum, kuntin ayatak pempeaja maamu aina nuna nejesh, numpashkam yuwawaigpajum tusa agatjabiaji”, tiaju.

Pablo achikbau

²⁶ Tusa tima cuatro aentsú yajuak we, kashinia duwi ditajai pegke-diag, jega Apajuí ememattainum Pablo wayaa, sacerdoten chichajak:

—Jutii pegkeemu tsawan umintaik makí makichik kuntinun sumakag, Apajuin anentag susatasag taawagtatui, —tusa ujakajui.

²⁷ Nuna tusa tuke duti dutikakua siete tsawan ejetatak wajamunum, wajumak judío Asia nugkanum batsamin aidau, Pablo jega Apajuí ememattainum pujaun wainkag, ashí aentsun ujakag dapampakaju. Dutikawag Pablon achikag, ²⁸ senchi unsumjukag: “¡Israel aents aidauwah, yainkatajum! Ju aentsua juuwai ashí nugkanum wekagas, aentsun jintintak: Jutii judío aidauti umigtaiji aidauk umigkaigpajum taku, Moisés chicham umiktajum tiuwa nunash pegkegchau chichajak, jega Apajuí ememattaiya junash aikasag pegkegchau chichajú wekaenuwe duka. Nuigtú yamaishkam griego aents aidaun jega Apajuí ememattai pegkegma juwi utsaa pegkegchau awasae.”

²⁹ Nunak, Tróximo Efesonmaya nujai Pablo yaaktanun wekagun wainkaju asag, jega Apajuí ememattainmash awayaestai tusag tiajui.

³⁰ Nuna antukag ashí nu yaaktanmayag pampaidau. Nuninak pisajag kautuawag, Pablonak achikag jega Apajuí ememattainum wajaun japikí agaa jiyamuik, wamkesag waitinak epetiagmayi. ³¹ Ayatak maata tiagtai, wamkes Romanmaya suntaja comandantejin, ashí aents

Jerusalegnumia aidauk senchi maaninawai, tusa ujakam, ³² suntag aidaun ijumag, ashí tikich suntajá apuji aidaunash yajuak pisajag aents tuwaká abaanum kautkagmayi. Nuna wainkag Pablon suwimaid-aushkam idaisagmayi. ³³ Nunikagmatai comandante jegantun, Pablon achiká juki jimag jiju ikagmauwai, jigkagtajum tusa sujuk idayas ajuma duwi jegantun: ¿Amesh dekas yaitpa? ¿Wají chichamaiya aikagmainawa? tusa iniibi. ³⁴ Tujash wajumak aents aidau, tikich wajiin pachisag untsumainai, tikich aidaushkam dutiksag tikichin tuidau, imatuidau asagmatai comandanteshkam shiig dekamainchau dekapeau asa:

—Suntajá batsamtain jukitajum, —tiuwai. ³⁵ Tiajam Pablon juki, suntag aidau ditá batsamtain awayatasag, papajá iwakbaunum jegantag yanakiag jukiajui, aents aidauk Pablon achiktatus imatikaidau asagmatai. ³⁶ Ashí aents aidauk saegas wesag senchi untsumkag: “¡Ayatak mantamnatil!” awajiagmayi.

Pablo aents tuwakbaunum ayamjumaku chichakbau

³⁷ Suntajan batsamtaijin awayattaku emam, Pablo comandanten iniak:

—¿Wisha machik augmaitsujamek? —timayi.

Tusa iniam comandante ayaak:

—¿Amesh griego chichamash dekamek? ³⁸ ¿Ame yamaipat, Egiptunmaya aents Romanmaya apun shiwagmá, chichaman tsuwapá cuatro mil maanin aidaun yajuak uwegshunum jiihua duchaukaitam? —tau.

³⁹ Tama Pablo ayaak:

—Wika judiuwaitjai, mina pujutaijuk yaakat muun Tarso, Cilicia nugkanum awa nuwiyayaitjai. Wait aneam ayú tujutta, aents aina juna machik ausatasan wakegajai, —timayi.

⁴⁰ Tusa tutai comandanteshkam ayú tima suntajan batsamtaijin wayatasa watai papajá iwakbaunum wajas, uwejen takuiniabi, aents pampaun itatmitkak ausatatus. Dutikam aents itatjagmatai hebreo chichamai ditan aujak:

22

¹ “Israel wegantu yatsug aidauwah, ashí muun aidautigmesh wait aneamsum antugtuktajum, wi chichaakui.”

² Tusa Pablo hebreo* chichamai chichattaman antujuk chichatsuk takamtak asagmayi. Nunikagmatai Pablo chichaak:

³ “Wika judiuwaitjai, yaakat Tarso Cilicia nugkanum awa nui akiinawaitjai, nunikuikun juwi Jerusalén tsakajuitjai, papiinashkam Gamaliel jintinjuauwai, iina muunji aajakaju chichaman umijakajua dutiksag. Dutikamu asan, atum yamaya juwish Apajuiya duke takagsatasajum wakegainajum, imatiksasuk wishakam imá niinak takagsatasan wakejinaitjai. ⁴ Wika duwikik yamajam chichama juna umiktatus wakegaidaunak egakan maatasan, ashí nuwaí nuwaima yajuakan aents achiká chimpitainum chimpiyajai. ⁵ Sacerdote apuji aidauk, ashí apu aidaushkam nunak shiig dekagtuinawai. Dita papí agag sujusajui, Damasco iina yachi judío aidau batsatbaunum jegá

* **22:2** Tikich papinumag “arameo” tuinawai. “Hebreo” chichamak arameojaig betekmamtin aajakui. Jutii chichame Wampisdauijai betekmamtina anmamtin.

nuna inakmas, Jisusa nemajin aidaun egak achijá, juwi Jerusalén ikaunmamtai, suwimak susami tusag.

Pablo ni yapajinamu etsegtumamu

(Tak. 9.1-19; 26.12-18)

⁶ “Nuna dutika sujusagmatai, nuna jukin Damasco jegattakun jintá wegai, etsa tajiastatak wajasú ai, nayaimpinmaya senchi etsantug egketkamtai, ⁷ nugká iyaagbaijai. Nunikan chichaman antukbaijai: ‘Saulo, Saulo ¿wagka minash waitkajame?’ ⁸ tujutkui wi iniakun: ‘¿Apu amesh yaitpa?’ tibaijai. Tusan tai ni aijak: ‘Wika Jisus Nazaret-numiayaitjai, ame ya waitkame nuuwaitjai.’ ⁹ Wijai yujaidaushkam tsaaptinun wainkag ishamkagmayi, nuninayatkush mina aujtaunak nuna takumpap tawa tusag dekaachagmayi. ¹⁰ Nuna tujutkui: ‘Apuh, ¿wajukati tusamea wakejutame?’ tusan iniasbaijai. Nuna tai Apu Jisus chichagtak: ‘Nantaktá nunikam wegam antsamek Damasco jegata, awi jegawamin ame dutikmainnak ujakagtatui’, tusa tujutmayi. ¹¹ Tsaaptina nu wainmachu etimtai, wijai yujaidau egkeksag Damasco ejetiajabi.

¹² “Nuanuí makichik aents Ananías daagtin, Apajuí puyatjus umijin, Moisés chicham umiktajum tibaunash umin asamtai, ashí mina pataag judío Damasco batsamin aidauk niina pachisag pegkeg chichagtai pujubi. ¹³ Nunú Ananías mina tajutí chichagtak: ‘Yatsug Sauloh, yamaik ataktú wainmakta, tujutmayi.’ Nuna tusa tujutmawaik niimin wainmakbaijai. ¹⁴ Nuna nunika ai chichagtak: ‘Tina muunji aajakajua nuna Apajuí, duwik nagkamjamas aminak wi wakegmunash dekaatin atí tusa etegtanjau asa, yamai dekas Pegkeja nunash wainak, ni chichamujinash antugkati tusa aikagmaume. ¹⁵ Dutijabau asamtai yamai nagkamsamek, ame ni pachisam ashí nugkanum wekaesam etsegkattame, nuniakum ame wainkamugmesh, ame chicham antukbaugmijai tuke etsegsamké atatme. ¹⁶ Yamaish nu nuniktinaitkumesh, ¿wají dakame? Wajaktá nunikam imá Apu Jisusa duke anentaimtusamin yamigtajame, dutikam tudaugminish tsagkugnagminum’, tujutmayi.

Pablo judiuchu aidaunum awemamu pachisa etsegtumamu

¹⁷ “Nuna ashí umikan Jerusalén wakitkin jegaan, jega Apajuí ememattainum Apajuin aukun pujusan, ¹⁸ Apu Jisus paan wantintujun wainka ai chichagtak: ‘Jerusalegka juwig pujutsuk juka ukuakum wamkesam jiinkita, juwiyag ame mina pachittsam etsegtaish antugtamakchagtatui’, tujutmayi. ¹⁹ Tujutkui wi chichaakun: ‘Apu minak dekajuinawai, wi jega ijuntainum wekaetusan nuwiya aents amina dekaskeapi tusa umigtamaidaun, achiká jukin aents achikbau chimpitainum chimpiaakun suwimduweg nunak. ²⁰ Esteban, amina inakem amina pachipas chichaun mainakuish, wishakam chichaman ijutkan, nuna maidaun jaanchjinashkam wiki kuitamjuyag nunash shiig dekagtuina jama.’ ²¹ Tusa tai Apu Jisus chichagtak: ‘Tutsuk wetá, wi aminak atushat tikich nugkanum aents judiuchu aidau batsatbaunum awemattajame’, tujutmayi”, tiuwai.

Pablo Romanmayayaitjai tibau

²² Pablo tusa chichatai antú antujuinakua ashimtai, aents aidauk senchi pampajag: “Ju aentsua juka ayatak mantamnati, mauteskek

idainaschati", tusa imatuinak, ²³ jaanchjinak japikí tujit ichigkag waja-
ntag, nugka yukuukuntun atsaaki jukiag yakí nagkimawag wajagtai,
²⁴ comandante suntajin:

—Anuí atum batsatbaunum awayajum asutiatajum, wajuk asam-
taig aents aidaush imatjuinawa nuna etsegkati, —tusa awemabi.
²⁵ Dutikawajam Pablonak jigkagbautak awasag asutiata tama, nui
capitán wajau asamtai chichajak:

—¿Atumesh Romanmaya aentsush shiig chichame dekagtsuk asut-
tanmash inagbaukaitjum? timayi.

²⁶ Nunú tama capitán antuk, comandanten wejí jegaantun chichajak:
—Ame asutiatajum tusam aents awemaum duka Romanmaya
aentsui, nunin asamtai dutikmaitui, —tiyabi.

²⁷ Nu tima comandante Pablon jegaantun iniak:

—¿Dekas ame Romanmaya aentskaitam? —tau.

Tama Pablo ayaak:

—Ehé, wika Romanmayaitjai, —tuuyi.

²⁸ Tutai comandante chichaak:

—Wi Romanmaya aents wetasanuk kuashat kuichkin akikmakuitjai,
—timayi.

Apu tutai Pablo ayaak:

—Wika Romanmaya aents asan Romanmayaketjai, —tuuyi.

²⁹ Nuna timatai Pablon asutiatatus ijunjaushkam ukukiagmayi. Co-
mandanteshkam "Romanmaya aentsuitjai" tutai antuk, ni jigkagtajum
tusa inamjau asa senchi sapigmakmayi.

Pablo judío dekas apuji aidau ijunjamunum awayamu

³⁰ Kashinia duwi comandante Pablonash: ¿Wagkag judío aidaush
imatjuinawa? tusa shiig dekajuata tau asa, jiju ikagmawai jigk-
agbaunak atitug sacerdote apuji aidau, tikich dekas apu aidaujai
ijunjatnume tusa ipaa, ashí ijunjamtai, nuaduí Pablon ejapeen awaan-
tagmayi.

23

¹ Dutika awaantam Pabloskam apu aidau ijunjaun shiig esetug diis
chichaak:

—Yatsug aidauh, wika Apajuí umijin asan pegkeg anentaiyai pu-
juwaitjai, nunisnuk yamaya juwishkam, pujajai.

² Tusa tutai sumo sacerdote Ananías, aents Pablon adijis ijunun:

—Aanú tawa nu weni awatita, —timayi. ³ Tutai Pablo nuna
chichajak:

—¡Aentsun tsanuwah, amina dekas Apajuí awatamtatui! Chicham
umiktin tawa dutiksamek dekagtuatasam eketiakumesh, ¿wagka
weni awatitajum tusamesh tujutme?

⁴ Nuna tutai nui pekaju Pablon chichajuinak:

—¿Aajamesh Apajuí sumo sacerdotejish pegkegchaush chichagka-
mum? —tiyajabi.

⁵ Tama Pablo ayaak:

—Yatsug aidauh, wika sumo sacerdotenak dekachu asan tajai.
Apajuí chichame agagbauwa nu chichaakshakam: 'Atumin apujum
aidauk pegkegchau chichajigpajum', tawai.

⁶ Nuna ti saduceo aidau, fariseo aidaushkam ijunjamunum pachitjaun wainak senchi jiiká chichaak:

—Yatsug aidauh, wika fariseowaitjai, mina muuntug fariseo aajakú aina nu akiiamuitjai, nunin asan wika: ‘Aents aidauk jakag dekas nantakiagtin ainawai’ tau asantai, nuna dekagtuawagtatus imatijuinawai, —tuuyi.

⁷ Nuna Pablo timatai fariseo aidau, saduceo aidaujai ijunag aidau, ditak pampá pampandayinakua kanakajabi. ⁸ Saduceo aidauk: “Jakau aidauk tuke nantagchatin ainawai, nayaimpinmaya aentsush atsuinawai, wakanchakam shiig atsawai” tuinai, fariseo aidauk ashí nunak awai tinu asag nunikagmayi. ⁹ Nunikag kajekag senchi untsumiagtai, wajumchik aents dekas Moisés chicham umiktajum timawa nuna jintinkagtin fariseo aidau asag, wajakiag chichainak:

—Ju aentsua juka makichik pegkegchaunakesh takaschae, dekatsji wakankesh nuniachkush, Apajú aentsji nayaimpinmaya aina dukesh ausau amainai.

¹⁰ Tusa senchi jiyaniagtai, comandanteshkam puyati, nuniak Pablon achikag jiikiag maawainum tusa, suntag aidaun chichaman awetiabi:

—Kaunawag jiiktinme, dutika ataktú dita batsatbaunum ejegawagti —tusa.

¹¹ Dutika ejegam kanittaman, kashi Apu Jisus Pablon wantintuk: “Pabloh, anentaim ichichiagta, Jerusalegka juwi mina pachittsam etsegkaum antsamek, Romanum ejetamawagmataish etsegkata”, tiuwai.

Pablo maami tiagbau

¹² Kashinia duwi, wajumchik judío aidau ijunag chichasag, Pablok dekas maami, tusa chichaman umigkag, wainka tunai, dekas yujumak yutsuk, umutash umutsuk batsamsá, Pablo maa nuaduú yujumkak yuwawagmi, maashkuik yuwachagmi, tusag shiig chichasajui. ¹³ Nuna tuidauk cuarentan nagkaesau aajakajui. ¹⁴ Imaan aina nu sacerdote apuji aidaun, nuigtú tikich apu aidaun jegajiag chichajuinak:

—Jutii aidauti Apajú adaisaja, Pablo mautskek yujumkak makhichish yuwachagmi tusaja chicham umikji. ¹⁵ Yamaik atumesh, ashí tikich aidautigmijai comandante segatajum, atum pachimasjum jutii batsatbaunmash itatajum, jutiiishkam shiig kuitamsa chicham dekajuami tusajum, dutik unupiajagmin atumiin eke taachuk jutii maawagmi, iik umintsá atatji, —tiagmayi.

¹⁶ Nu tuinamun Pablo umayin akiinau uchi antuk, suntajan batsamtaijin diichji pujau asantai jegajua ujakmayi. ¹⁷ Dutikam ni Pablo capitainin untsuk itan:

—Ju uchi jukim comandante pujamunum ejegata, dutikam ju uchi ni ujamain awa nuna ujaktí, —tusa timayi.

¹⁸ Tima capitanchakam uchin juki, comandante ejeti:

—Pablo achikam puja nunú untsujuk, jujú uchi jukim comandante ejetita, ni ujamain chicham awai tawa nuna ujaktí tujutmatai, juna uchin jukin itaajai, —tiuwai.

¹⁹ Tama comandante uchin uwegnum achiká juki, niinak akanki ema:

—¿Wají ujatkata tame? —tusa iniau.

²⁰ Tama uchi niina ujaak:

—Iina patayí Judío aidau chichaman umikagmae, amina pachipasag: ‘Kashin Pablo jukim dekas apu batsatbaunum itata, dutikawamin waji chichamak ajawa nunú shiig kuitamsa dekajuami tusa segatá’, tujabi-agmae. ²¹ Nuna tujamainakuish kakajus ‘ayú’ tiipa. Cuarentan nagkae-sau aents uumkag dakainawai: ‘Jutiik Pablo maachkuik yujumkak yutsuk umutash umutsuk batsamsagmi’, tusag; nuní chichaman umikag, yamaik amina utusag ayú tiya tusag nunak dakagmainawai, —tusa ujakmayi.

²² Nunú ujakam comandante uchin chichajak:

—Wetá, nunikmesh mina ujatkaum duka makichik aentskesh ujakaipa, —tusa awemabi.

Pablo apu Félix pujamunum awemamu

²³ Nunú ujaká ukukim jimag capitanin untsuká itan:

—Doscientos suntag dawé wetin aidau ijumjam nuigtú setenta suntag caballonum wegagtin aidaushkam ijumjam, dutiksamek doscientos suntag nagki tinamkam dushakam ijumjata, kashi a las nueve jegai Cesareanum wetinme.

²⁴ Nuna tusa, nuigtushkam makichik caballo shiig umiktajum Pablo entsamkatin, dutikajum nui ekenjum iwaakuk shiig kuitamsajum apu Félix pujamunum ejegatajum, tusa awemak ²⁵ juna papiin agatug awetiuwai:

²⁶ “Wi Claudio Lisias, amina apu Félix chichame antugtaiyah, juna papiin agajan awetakun kumpamjame.

²⁷ Judío aidau, ju aentsua juna achikag maata tuidaun, wi mina suntajujai shimutkan ayamjukjai, Romanmaya aentsui tabaun antukan. ²⁸ Wajinmak imatjuinawa tusan dekajuatasan wakegau asan, judío apuji aidau ijunbaunmash ejegamjai. ²⁹ Nunikman dita chicham umitaiji aidaun pachisag nuna umiatsui, tuidaun antugkamjai; tujash ni achinak egkemainnakesh, maam amainnakesh waitkashmajai. ³⁰ Tuja judío aidau maawagtatus chichaman umigkagbaun ujatkgamatai dekaan, anuí amina awetajame; dutikakun chichaman aputuidaunashkam segamjai ame antaminish niina pachisag titinme, waggag kajejuinawa nunash tusan, duwi wainiami.”

³¹ Tuja suntag aidauk apu nuniktajum tibaunak imatiksajag Pablon caballonum ekeni jukiag, kashi we weenakua Antipatrisnum jegawajui. ³² Nunikag kashinia duwi suntag dawé ashinuk ditá batsamtaijin waketuinai, suntag caballonum shibauk Pablojai wegagmayi. ³³ Nunik Cesarea jegawag papi agagbaun apun suwinak, Pablonashkam ejegawagmayi. ³⁴ Nunú papi agagbaun aujus diisá, Pablon apu iniak:

—¿Amesh tuwiyampaitpa? —tau. Tama ni ayaak:

—Wika Cilicianmayayaitjai —tutai dekajua ³⁵ chichajak:

—Jasta, amina chichaman aputugmaina nu kaunak chichainakui, duwi dekajuatjame.

Tusa achijatatin aidaun:

—Jukijum Herodesan pujutaijiya awi ejegajum, atum shiig kuita-mkatajum, —tusa awemabi.

24

Pablo Apu Felisai ejegam ni ayamjumaktinji chichakbau

¹ Cinco imajin kanaja tsawamunum sumo sacerdote Ananías, tikich wajumak judío apuji aidaujai, makichik abogado Tértulo daagtinun ayasá Cesareanum kaunawajui, chichaman Pablon tiagta tusag. ² Pablon itawagmatai Tértulo wajakí apu Felisan aujak:

—See tajame apuh amina, ame inamu asamin agkan batsatainaji, nuigtushkam amina yachagminig kuashat wají iina nugkeenish iwagnaka duwi. ³ Ashí nu dutikamua nunak ashí yantamnum shiig aneas juwainawai, nuaduí apu Felisa eme anentajame. ⁴ Tujash kuashat tsawantan atankijam tau asan, wait aneasam jutii chichamush machik antugkagtukta tusan segajame. ⁵ Ju aentsua ju, judío aidau nak tuke chichaman tsuwapjin asa, ashí nugkanum wekagas judío aidau batsatbaunmash ni dapamkagtú wekaenai, niyai dekas Jisus Nazaretnumia pachis waitá etsejin agma nuna chichamjú wekaetinuk. ⁶ Nuigtushkam jega Apajuí ememattaiya nunashkam, tikich aentsun awaintua pegkegchau emau asantai, achikaja jutii chicham umiktin agagbauwa dutiksaik dekajuami tajin, ⁷ comandante Lisias suntajin utsanjama, senchi kakantus juki, ⁸ aents juna chichaman tuina juka dekas au apu puja awi wetinme, tujamaji. Nunin asantai imá ameketme ju ashí jutii pachisa etsegtuinag nu dekamainmek.

⁹ Nuna tutai judío aidau nui ijunushkam:

—Ni tawa duka dekaske, —tuidau.

¹⁰ Nuna tiagmatai Pablon apu iwijau chichaktí tusa. Dutikam Pabloskam wajakí chichaak:

—Apuh, ame kuashat mijanai jujú nugka juwi apu wajasam chicham epegkeakum pujau asamin shiig aneasan wi ayamjumamainun tita-jame. ¹¹ Ameketme dekas ju shiig chicham dekamainaitam duka. Wika Jerusalén Apajuin ememattasan taanuk, ayatak doce tsawanchik pujumajai. ¹² Nuanuí makichik aentsjai jiyaniaigkish, nuniachkunush jega Apajuí ememattainum, jega ijuntainmagkesh, tikich yaaktanmagkesh chichaman aentsun tsuwapjuan dapampá wekagaigkish waitkachagmae. ¹³ Jujú aents aidau mina chichaman tujutiagtatus kaunawaja juka, dekas wi nunikbaugnak aminak nuna nunikmae tusagkesh ujamamain ainatsui. ¹⁴ Wika iina muunji aajakajua nuna Apajuijin umigjai, nuniau asan Yamajam Jinta juna etsegjai, dita waitai tuina nuna. Wagki wika chicham umiktin agagbauwa nuna, Apajuí etsegtin aidau agajajua nunash dekaskeapi tau asan. ¹⁵ Wishakam dita aidau, Apajuik aents pegkeg aidau, pegkegchau aidau jinawajunash inanjatnapita tuina dutiksanuk tajai. ¹⁶ Nuaduí Apajuí emtinish mina anentaimtajuish pegkeg, antsanuk aents aidanmash pegkeg atasan kakanmamjai.

¹⁷ “Wika wajumak mijadai tikich nugkanum wekagun, mina nugka-jui aents waituidaun anenjauch suwakun, Apajuinash anentag susatatan taamjai. ¹⁸ Nunikan pegkeenu asan, jega Apajuí ememattainum pujumjai, tujash nuwig kuashat aentsuk atsuagmae, nuigtú pampandayamukesh atsume, nuniamunum wajumak mina pataag judío Asianmaya aidau tajutuawag waitkagmae. ¹⁹ Nunú mina tujutuidau aminí kaunawag, mina pegkegchaujush ajutuash nuna tujamain ainawai. ²⁰ Nuniachkush, ju kaunak ijuna jujú aidaukesh, mina pataag judío aina nuna apuji batsatbaunum mina ejetiagmataish, wi bakumamainnash dekagtuawagmasha nuna ujamamain ainawai.

21 Untsu nui ejetiagmatai senchi jiikan chichaakun: ‘Yamai mina jutijajum juka, wika jakau aidaush nantajagtinai tau asamtai, nu dekagtuatasajum jutijagme’, tusan imá nunak timajai.”

22 Nuna tutai Apu Félix, nigka duwik nagkamas yamajam chicham etsegbaunak shiig dekau asa, chicham dekagbaunak nu tsujig idayak:

Comandante Lisias taamtai, nuaduí atum chicham etsegbaunak dekajuatjime, —timayi.

23 Nuna tusa idayak capitanin:

—Pablok jukijum achikbautak apusatajum, dutikakjumes machik agkan idaisatajum, niina kumpají aidaush kautuawag wainkatnume, nuninak yaigtinme, —timayi.

24 Dukapech tsawan pujus Apu Félix, niina nuwe Drusila judío nuwa nujai taa:

—Pablo jikjum juwi itatajum, —tima, Jisukristuwa duke dekaskeapi tumainai tusa etsegbaun antuku. ²⁵ Tuja nuigtushkam Pablo, pegkeja duke takatan pachis, iik kuitamamtan, tsawan dekas nagkanbaunum Apajuí aentsun etegjatna jujai pachis etseju. Imattai Apu Félix ishamak:

—Yamaik wetá, wi tikich tsawantin, agkan ajutkui duwi taan untsuktajame, —timayi.

²⁶ Apu Felisak, Pablonak kuichkin sujusmatai akupkatjai tau asa, tuke untsusagké au, nijai chichastatus. ²⁷ Tuke duti dutikakua jimag mijanan inagkeakiuwai. Nunik Félix jiantai, Porcio Festo yapajinauwai. Nuniak judío aidaujai shiig juwakta tau asa Pablonak achikbautak Felisak ukukiuwai.

25

Pablo apu Festu í ejegamu

¹ Nunik Festo apu we kumpatumchik tsawan pujus Cesareanmaya jiinki Jerusalén weuwai. ² Nunik jegaamtai sacerdote apuji aidau, judío apuji aidaushkam, dekas chichame antugtai aidaujai ijunag, Pablon pachisag apun ujaidau. ³ Nuna dutika ujainak: Wait aneamam ame Pablo juwi Jerusalén itatajum tusam, chicham awetí itaata, tusag segaidau. Nunak juki inibiagtai, jintá dakak maata tuidau asag, tiajui. ⁴ Tiagtai Festo ditan chichajak:

—Tujash Pablo Cesareanum achikam pujajama. Nuniau asamtai wi juwi wajumak tsawan pujusan wejitan anentaimjai. ⁵ Nuaduí dekas atum aidautijum, yaita chichame antugtai aidaush, nunú aidautijum wi wegakui minijum, nunú aents dekas pegkegchaun takasuitkuig awi etsegtuktajum, —tiu.

⁶ Nuna tusa Festok Jerusalén ocho tsawan pujus Cesarea jegaa, kashinia duwi dekas apú ekeemtaijin ekeemas, Pablon itatajum, tusa aentsun ishitkauwai. ⁷ Tusa ishiakam Pablon jukiag awayawagmatai, judío Jerusalegnunia kaunkajuk, Pablon jegaantag adijis ijunas, juka aents nuninai, tusag wainak eketkiag tikima pegkegchaun etsegtuidau, waintanakesh wainkachu ainayatak. ⁸ Imatjuinam Pablo ni ayamjumaktatus chichaak:

—Wika makichik pegkegchaunakesh takaschamjai. Chicham umiktajum timawa nuna pachisnukesh, jega Apajuí ememattaiya nunakesh, Roma apujinakesh pegkegchawk chichagkachmajai, —timayi.

⁹ Nuna tusa taig, Festo judío aidaujai shiig juwakta tau asa, Pablon iniak:

—¿Amesh Jerusalén wetasamesh wakegatsmek? Jerusalén jegawamin wisha awi taan chichaman dekajuatjame, —tau.

¹⁰ Tama Pablo niina ayaak:

—Wika dekas Roma apuji inabaunum pujau asantai, awi minak chichamnash dekagtumain ainawai. Amek minak shiig dekagtame, wika makichkish mina pataag judío aidaunak pegkegchounak takagsachmajai. ¹¹ Wi dekas pegkegchou takasú asan maam amainaitkunuk, mantuawai pajum tumamait sujai, tujash mina pachitus wainak tujutuina aniaigkik, makichik aentskesh ditaig sujutmain ainatsui. Wika dekas Roma apujiya duke chichaman dekagtuati tusan segajame, —timayi apun.

¹² Nuna tutai, Festo niina ijunja chichataiji aidaujai ijunag chichasag, Pablon chichajak:

—Dekas Roma apujiya nu dekagtuati tame nuniau asam, Roma apuji pujamunum wetatme, —tiabi.

Festo apu Agripajai chichasbau

¹³ Wajumchik tsawan asa, apu Agripa, Berenicejai Cesarea jegawajui Feston kumpamawagtatus. ¹⁴ Nui jegawag kuashat tsawan batsataidau asag, Festo nunú apun Pablo pachis ujaak:

—Juwi makichik aents Pablo daagtin Félix achiká ukukbau pujawai. ¹⁵ Jerusalén pujai sacerdote apuji aidau, judío apuji aidaushkam niina pachis dekas mantamnati tita tusag segatiagmayi. ¹⁶ Tujutuinakui wi ayaakun: ‘Romanmaya apu aidautik aents chicham tsuwapjuamua nunú, tikich aents chichaman tuina nujai igkumtikamash, ayamjuma-mainjin taigkik mantamnati tusaik tuchau ainaji, tibaijai. ¹⁷ Nuna ti ai, ditashkam juwi kaunawagmatai, wishakam kashinia duwik chicham dekaata tusa ekeemtainum ekeemsan: ‘Nunú aents itagtuatajum’, ti ai ¹⁸ itawagmataish, chichaman tsanumjuidaushkam, ni pegkegchou takasbaujin tuinatsuash tusa anentaimtusmayag nuninnakesh tichagmayi. ¹⁹ Imá ditá muunji Apajuin umijin aina nunak, tikich Jisus daagtin maamu, yamaik anean nantakiu asa iwaaku pujawai, Pablo tibaujinak pachisag etsegtiagmayi. ²⁰ Tuinakui, wika nuna pachisnuk imatikan shiig dekachu asan, utugkajak tuutun, Pablon, amesh dekas Jerusalén jegatasamesh wakejatsmek, awi chichaman dekajuatjame tusan tibaijai. ²¹ Nuna tai, wika dekas Roma apuji Augusto chichamnak dekagtuati tajai, tujutkui, yamaikik untsu junismek pujustá, wi aents ejetamain akui awematjame tusan idaisamjai, —tau.

²² Tusa tutai Agripa chichaak:

—Wishakam wakegajai ni chichaakui antugkatasan.

Timatai Festo ayaak:

—Kashin dekas ni chichaakuig antugkata, —tiuwai.

²³ Tusa idaisam kashinia duwi, Agripa, Berenicejai shiig iwagmamjag, ashí suntajan apuji aidau, nuigtú nunú yaaktanmaya dekas chichame antugtai aidaujai, chicham dekaatasa ijuntainum utsanawagmayi. Imanikagmatai Festo:

—Pablon utitajum, —tima itawajui. ²⁴ Dutikawagmatai Festo chichaak:

—Apu Agripah, ashí muun aidautijum jutiijai juwi ijunjaujum nu aidautigminash tajime, ju aentsun juwi itaag juna, ashí judío aidau chichaman aputusaje Jerusalén nagkamsag, nunisag juwi Cesareanum taamtaish: ‘Juka ayatak mantamnatí’, tusag segatuinawai. ²⁵ Tujash wi diismak ju aentsua juka, ni pegkegchau takasbaunum mantamnamainjig atsujui. Dutikau asan niishkam Roma apujiya nu chichaman dekagtuati tujutu asamtai, niini untsu awematjame, timajai. ²⁶ Tujash wi mina apug Roma puja nunash, junak dekaskun asamtai jutikainawai tusan papiinash agatmainchau dekapeau asan, juwi atumní itaajai, tuja dekaskun apu Agripah, amina niish inias dekajua, dutikamtaí wajintig nuna wisha antugkan papiinash agatjatjai, tajai. ²⁷ Aents jutika achikbau, nuna dutikau asamtai jutikainawai, tutsuk awemamuk shiig dekamaitsui, —tiabi.

26

Pablo ni utugchatji pachisa apu Agripa ujakbau

¹ Nuna timatai Apu Agripa Pablon chichajak:

—Yamai ame nunikbaugmek etsegtumakta, —timayi.

Tama Pabloskam: Jasá asajum antugtuktajum, taku uwejen takuí, wajaí chichaak: ² “Shiig aneasan amesh antugtamin, mina apug Agripah chichaajai, mina pataag judío aidau mina pachittsag etsegtujuina nuna pachisan wishakam etsegtumaktasan. ³ Amek judío aidauti dutikatai aina duka ashí dekame. Nuniau asamin minash shiig emamkesam antugtukta tusan segajame.

⁴ “Ashí mina pataag judío aina juka minak shiig dekagtuinawai, wi mina nugkajuish, Jerusalegkash datsauch asanush wajuk pujujukuitja nunak. ⁵ Nuigtushkam wi datsauch asanuk, fariseo asan dekaskun chicham umiktin tibaunash uwaetsuk imatiksasuk umin ayag nunak dekainawai, nunidau asag nuniyi tusag wakegainakug ujpamain ainawai. ⁶ Yamai mina juwi itajuawaja nunak, Apajuí iina muunji aajakajua nuna anagkuauwa nuna wishakam dakau asamtai, nuna dekagtuawagtatus itajuawaje. ⁷ Israela uchijí doce aajakajua nunú wegantuk imanisajag Apajuí anagkagtuamua nunú umintai wainkagtatus dakaidau asag, tuke kashish tsawajai Apajuinak emematuinak umijuinawai. Nuna apu Agripah, amina ujaagam nuaduik mina pataag judío aidauk yamaish chichaman aputujuinawai. ⁸ ¿Wagka atumesh, Apajuí jakau aidanash inanjatna dusha dekaskapepi tatsugme?

Pablo Jisusa nemajuidaun waitkajakbaun pachis etsegtumakbau

⁹ “Wishakam duwikik Jisus Nazaretnumian pachis chichaidaunak senchi kajejakun kuashat waitkabajai. ¹⁰ Jerusalegnumshakam imatiksasuk takabajai. sacerdote apuji inatjagmatai Jisusa nemajin aidauak kuashat achijá ikaunmakan, achijatka chimpijattainum chimpibijai, mainakuish wisha inamkagtibijai. ¹¹ Kuashtá aents aidau suwibajai, dita umijuinamujin idaimitkastasan. Nunak wika ashí jega judiuti ijuntaiji aidauum wekaesan dutikajai, imatikau asan, ditanak senchi kajejakun, tikich yaakat aidauum batsatunash imatiksasuk wekaetan egasan yajubijai.

¹² “Nuna dutikatasan yaakat Damasco webajai, sacerdote apuji aidau dutikata tusa awetuinakui. ¹³ Mina apujuh, nunikan wekaman,

etsa tajiaju ai, nayaimpinmaya tsaptin etsa etsanbaujin nagkaesau, minak ashí wijai minidaujaí ijumag egketkabi. ¹⁴ Dutijamantai ashí nugká kakekabiaji. Nuniamunum hebreo chichamai nayaimpinmaya chichagtak: 'Saulo, Saulo ¿wagka minash waitkajame? Amek baka kajaká jagkin dajag beseakush dekaptsama numamtuk amek pegkegchau wegakum imaniame', tujutmayi. ¹⁵ Tujutkui: '¿Apuh amesh yaitpa?' tusan iniai: 'Wika Jisusaitjai, ame ya waitkame nuuwaitjai. ¹⁶ Tujash nantakim, wajantá. Yamaik mina inakeg atí tusan wantintukjame, nuniau asam ame wainkaum nu etsegtugkata, ataktushkam jutiksanuk wantintuktatjame, dutikamash dushakam dutiksamek etsegtugkata. ¹⁷ Wi judío aidau, tikich judiuchu aidaujai, amina kajegtamainakuish ayamjuktatjame, dutikau asan judiuchu aidaunum awemajame, ¹⁸ ame awi weme mina chichameg etsegbaun antukag shiig dekaawag, pegkegchaun takainak suwenum wajukmaina numamtuk wajaidau asag, iwanchin inatai yujá nunak idayinak, dekas pegkeja nuna takainak, tsawai wekaemaina numamtuk wajainak Apajuin umigkat-nume. Nuna nuninak mina dekaskeapi tujutuinak, ditá tudaujinash tsagkugnagtinme, nunikag Apajuí pegkemtikbau aidau jukiagtina nuna ditashkam jukiagtinme', tujutmayi.

¹⁹ "Aatus tujutiu asamtai, Apu Agripah, mina nayaimpinmaya tujutunak intimjutsuk betek umigkabiajai. ²⁰ Dutikau asan dekatkauk Damasconmaya aidaun nunú chichamnak ujakbaijai. Nui nagkaematkin Jerusalegnumianash, nuigtú ashí nugka Judeanmayanash ujakan, nuigtushkam judiuchu aidaunash: 'Tudau takat idaikujum, Apajuí nemagkatajum, nuniakjum dekas Apajuí nemajuidau takamaina nunú takaakjum iwainmamkatajum', tusan. ²¹ Juna wi tau asamtai, jega Apajuí ememattain pujai, mina pataag judío aidau achigkag mantuata tiagmae. ²² Tujash Apajuí yaintsamtai ichichmamsan imanishuk yamaish wekaesan, Apajuin pachisan, ashí aents imanchauch aidaunash, apu aidaujai ijumjan ujasnuké ajai. Wika uwaesanuk chichatsjai, Apajuin etsegtin aidau, Moiseschakam nuniktinai tusag juna againak: ²³ 'Kristuk juwi taa waitkasa maam atinai, nunikash aents jakaush nantashainum ni nagkamchak nantaktinai, nunik chicham dekas tsaptin uwemtikagtina nuna ashí judío aidaunash, judiuchu aidaujai ujaktinai' ", tiuwai tuuyi.

²⁴ Pablo ni ayamjumak nuna tutai, Festo senchi chichaká:

—¡Pabloh, imaanjachumek! Imanikam papí au aukkawam imaanjaume, —timayi.

²⁵ Tama Pablo ayaak:

—Apu Festoh, dekas chichame antugtayah, imaanjachjai. Wi chichaag duka kuashat anentaimtumainai, tuja dekasketnash dekaske. ²⁶ Anuí apu Agripa eketa dushakam junak shiig dekawai, nuniau asamtai ni antaish shiig kajintsan wishakam chichaajai, niish junak ashí dekawapita tusan, juka uuká takatsuk ashí iwainaja takasbau asamtai. ²⁷ ¿Amesh apu Agripah, Apajuin etsegtin tiajua dusha dekaskeap tiuwaita tamek? Wika ame dekaskeapi tame nunak dekagjame.

²⁸ Tama Agripa ayaak:

—Machikiuch nu pachisam tame duwikik, minash Jisusan nemagkati tusam wakejutam, —timayi.

29 Tutai Pablo chichajak:

—Wi tikima kuashat etsegetsuk, machik etsegetaish Apajuik, aminak mina nemagtukti tujamui. Tujash imá aminakek tujamtsui, ashí aents juwi wi chichaamun antuina jujai nemagtukti tau asamtai, wi wajuakeag junimain ainagme, tujash mina jiju ikagmauwai jigkatjagmatai wajag junitsuk.

³⁰ Juna Pablo timatai, nuaduí Apu Agripa, tikich apu Festo, Berenice, ashí nui aents ijunujai agaa jiinkiagmayi, kanakiag nuna pachisag chichasagtatus. ³¹ Nunikag nui chichainak:

—Ju aentsua juka ni pegkegchau takasbaunum mantamnamainjig atsujui, junin aigkik achikbautkek egkeemait sui, —tusa,

³² Agripa Feston chichajak:

—Ju aentsua juka akupmainaitji, niish dekas Roma apujiya nu chichamnak dekagtuati tichawaitkuig, —timayi.

27

Pablo Roma awemamu

¹ Chichai chichainakua dekas Italianum awemami tusag, Pablon ashí tikich achigbau aidaujai yajuak makichik capitán Julio daagtin apu Augusto suntajin diina nuna: Ame jukim ejegata, tima yajupakmatai, ² Adramitionum anumtainum, lancha Asianum wetatus uminas aunum chimpimjá ajin, Aristarco nugka Macedonianum yaakat Tesalónica awa nuwiyashkam nui egkemjau asamtai, ditajai ijunja ashí ashinkawa, ³ kashinia duwi Sidognum anumkabiaji. Nunika ajin Julio, Pablon wait anentau asa, ni kumpají aidaush kautua wainainak kuitamkatnume, tiabi. ⁴ Sidognumiati jiinkiaja wegajin, dase igku umpumpau asamtai, ajuntai Chiprek ukuaku, ashí ashinkawa, ⁵ nugka Cilicia, Panfilia aina nuna yantamen ijusa wega wegakua, nugka Licianmaya yaakat Mira tutaiya nui jegabiaji.

⁶ Nui jegaa ajin capitán lancha Alejandrianmaya Italianum wegauw jegajua, iinashkam nui egkepagmai nagkaemaki webaiji.

⁷ Kuashat tsawantai diipasa we batsabaiji, nunisa ashintsá senchi takai takainakua Gnidonum jegaa, nuwiyati nagkaemaki wesá dase yajá umpumpau asamtai, Salmogkak tutupnik nagkaiki, ajuntai Creta tentea nagkaiki, ⁸ wai waitiakua tugkitak anuasa ashí ashinkawa yaakat Lasea tikijunum, Anumtai Pegkeg tutainum jegawabiaji.

⁹ Kuashat tsawan megkaekabiaji, yumi tepeau asa nayantsanum wetak ishamain asamtai, Pablo aents nui chimpijun chichajak:

¹⁰ —Muun aidauh, ju ii wegag duka dekas tikima ishamain atin deka-peajai, lanchashkam waji aidaujai utsagtatji, tuja jutii aidautishkam jinakuik jinumainaitji, —timayi.

¹¹ Nunú tamash suntajan capitanjiya duka, lanchagtina nuna, lanchá anunna nujai antujak, Pablo chichamenak antugkachajui. ¹² Nunú anumtaig yumi tepeamtaig pegkegchau weu asamtai, nui ashinuk dekas juka ukuaku Fenice jegasá dekapsagmi, anumtai Cretanum etsa akaetaiya nuní au asamtai, dasesh imanik atsawai, awi yumi tepeamtaish inagkeakiagmi, tiaju.

Nayants wegamunum senchi dasenkamu

¹³ Nuna tusag surnumia dase diipas dasentai: Dekas yajau juniatsui wegagmi, tusag nuwiyau pempegkiagmatai, ajuntai Creta tugkitken

tikiju wajasá wegamunum, ¹⁴ etsá minitaijiya atú ayaumas senchi dasentuk midau, ¹⁵ senchi umpumpak yajá pempempaki etamkui, dase depetki waketmainchau dekapeaku, junisaikish wemí, tusa idaisabiaji. ¹⁶ Dutika ajin dase jujamkintai wega wegakua, ajuntai yaijuch Claudia tutai ukujin dase imanik senchi umpuashbaunum nagkaemaku, bote yaijuch nenea minamu wai waitkainakua lanchanum patai ¹⁷ idaisabiaji, dutika ajin lancha muunta nuna shiig jigkajagmayi wewe ema idaisatatus dase ebesjai tuidau asag. Nuna dutikawag Sirtenum pajagkim awa nui patamig tuidau asag, jaanch ejaamunash kuwajag idaisagmayi, ayatak daseg umpug emati tusa. ¹⁸ Kashinia duwishkam daseg senchi dasentu asamtai, lanchanum waji chimpianunak jiig utsaidiagmayi. ¹⁹ Kampatuma juwi untsu ashí jutii aidautik lanchanum waji chimpianuk juki utsabiaji nayantsanum. ²⁰ Kuashat tsawantai etsag, yaya aidaujai waitnsuk yujau asaja, daseshkam imatijamsag ukapittak awajtamun asamtai:

—¡Jegashtatjiapi, jinattajiapi! —tiagbaiji.

²¹ Yujumak ijagmaka kuashat tsawantai yujanu asamtai, Pablo ejapeen wajantá chichaak:

—Muun aidauh, dekaw wi timajim nunú antugtumainus anka-mujumtaih, nunikuitkugminig Cretanmag dakasuitkuik, imanika waitiaku waji aidauh utsá yujamaitsuji. ²² Tujash jakashtajash tusagmek ishamkaigpajum. Lancha beseakuish makichkitigmekesh jakashtatjume. ²³ Yamai kashia juwi, wi Apajuí umijag nunú, ni aentsji nayaimpinmaya awemamu wantintujuk, ²⁴ chichagtak: ‘Pablo ishamkaipa, amek apu Roma puja nunú jegatasam wegama. Nuniau asamin, ashí ju lanchanum chimpia junak Apajuí kuitamkattawai, jinawainum tusa.’ ²⁵ Nuaduí muun aidauh shiig aneastajum, wika dekaw Apajuí tibaun nayaimpinmaya aents tujutma duka imanis-agkeap uminkattawa, tajai. ²⁶ Tujash makichik ajuntainum jegainaku patamtatji, —tuuyi.

²⁷ Nunika yujasá jimag tumig inagkeakbau ai, makichik kashi nayants Adriático nanamsabiaji, dase umpumpak mai ikatia mai ikatia awá awajtamkui wegamunum, lanchanum takau aidau aehaet ai, nugkan tikiju adijun dekapenak, ²⁸ kunajin dekaapa diikmag treinta y seis metros kunaji atatman wainkajabi, dutikawag nuní dukapech ekemsag dekapakmag veintisiete metros atatman wainkag, ²⁹ kaya tukuig tusag ishamainak, lancha ukujin cuatro ancla tutain jiijuí anagbaun nayants utsawajabi, lancha nanaamsati tusag. Dutikawag:

—¡Itusag waamak tsawaja!, —tuyanume. ³⁰ Nuniai lanchanum takau aidau, umkag wegagtatus bote yaijuch lanchanum pataimun ajuinak, lancha nujinchin ancla awa nunas ajuinatai tumain wajakiag ajugkajabi.

³¹ Nudiagtai Pablo capitainin suntag aidaujai chichajak:

—Ju aents aidau lanchanmak juwainashkuig atumek jijnashtatjume, —timayi.

³² Tutai suntag aidau bote yaigchia nuna anagken tsupijuk nayants ajejajui.

³³ Dutikawagmatai tsawamunum Pablo ashí aents aidau chichajak:

—Jimag tumig yujainaji yujumak yutsuk, wajukatjik tusa dakainaku, ³⁴ nuniau asajumin tajime, pipichikesh yuwatajum. Duka dekas atsumnawai nu ichichmamsa iwaaku jegatasaja, makichkish jakashtatjume, imagnisjumek jegattajume.

³⁵ Nuna tusa idayak, Pablo pagkan juki, ashí aentsush wainainamunum wajan, Apajuin see ti puuká yuwau. ³⁶ Nunitai tikich aidaushkam wakeesag anentainsag yuwawaju. ³⁷ Ashí ijumjamak nui lanchanum chimpijutik doscientos setenta y seis aents aajabiaji. ³⁸ Dita yapajuinamunak shiig yuwawag nuaduí trigonak nayantsanum utsagakjabi, lancha wampumniti tusag.

Lancha tsainkamu

³⁹ Tsawagmatai lanchanum takau aidau nugkanak wainkagmayi, tujash nunú nugkapita tusag dekachagmayi. Dutikainayatak nayants egkeentaunum kaamatak atatman wainkag: Awi dekas anuumkashpash, tusa tiagmayi. ⁴⁰ Tusag ancla anagkenak tsupijug nayantsanmag idayinak, kanait jigkamu aidaunak atiwaju. Dutikawag jaanch lancha nujiin jiitain nenantagmatai, kaamatak adijkatasa weyaji. ⁴¹ Nunikmá pajagkim kaamatak wajas aunum chichijam tukuniagbaunum, lanchak patamatai, lancha nujinchig shiig initak upukuma umushmainchau wajas tepesabi. Nunia lancha ukujinak ichipig inibi nayants senchi tsukatu asa.

⁴² Nunikmatai suntag aidauk aents achigbau aidaunak ayatak kajegta tuyanume, yukuak jiinak pisajainum tusa. ⁴³ Tiagtai suntajan capitanji Pablon uwemtijatatus wakegau asa:

—Nu dutiktak dutikawaigpajum, dekas ya imá senchi yukumnaita nunú niyá eemak yukuak kukag jiinkitnume. ⁴⁴ Nunikagmatai nuaduí tikich aidauk taapna, lancha chipajá juwikish patabiag katigtinme, —tiabi. Nuna aatus tiu asamtai ashí jinutsuk jiinjajabi.

28

Pablo ajuntai Maltanum pujusbau

¹ Nunika jinutsuk jiinjaja ijuntsaja, juka ajuntai Maltayapi tusaja dekaawabiaji. ² Nuwiya aents aidauk shiijuch kuitamjamainak, senchi tsetsek, yumish yutu wajau asamtai, jiin ijumjag nuna ekeemainak: Atumesh tantajum anamatajum, tusa ipapawajabi. ³ Nuniamunum Pablo numi pegkeg buku kukajú atatman juki apeeyi. Dutikamunum nuwiya dapí jii sukuam jiinak, Pablon uwegnum esai nemajuawabi. ⁴ Dutiktatman nui tuke batsamin aidau wainkag pempentunisag chichainak: “Ju aentsua juka dekas magkagtintsukaitai, nunin asamtais nayantsanum jakegchamtaí, juwi dapí esai maatatus aikataih”, tuyanume.

⁵ Tujash Pablok dapin pegajá jiinum jiyawabi, nunikash machikish wajuktsayi. ⁶ Nunitai uwejenish iyagchatpash, nuniachkush wajupa asag jaka iyaajat tusag dakayanume. Nunik makichkish wajukchatai, dita nunikchatpash tusa anentaimtamujinak idayinak: “Auk apajuit-skaitai”, tiajabi.

⁷ Nunú ii anumka batsatbaunum tikiju, aents ajuntainum batsatun apuji Publio daagtina nuna nugke aayi, nunú niina jeen jujamki kampatun tsawantai shiig kuitamjamkajabi. ⁸ Nui Publio apajá numpa shiip achikam tsuweak pegaknum tepeeyi. Nunittaman Pablo wejí

Apajuin aujus, uwejen antig etsagajabi. ⁹ Nuna dutikamtaí tikich nunú ajuntainum batsamin aidaushkam kaunkamtaí, ditanashkam etsagakabi. ¹⁰ Nuna dutikamtaí aents aidauk shiig anenjamsajabi. Dutijamaidau asag nuwiyati juwaki tikichnum wegajinchakam ashí ii jintá wesá atsumainnak imatiksag sujamsagmataí, nu jukí lanchanum chimpimjá shiakabaiji.

Pablo Roma jegaamu

¹¹ Nunika kampatum nantu ajuntainum pujusá inagkeakiaja, Alejandrianmaya lancha niishkam nui pujus tsetsek nagkaemakmataí wegakuí egkemjabiaji, nunú lancha nujinchin ditá apajimtaiji Cástor* nuigtú Pólux dakumjuka anujtukbau aayi. ¹² Nunika ashí ashinkawa Siracusa anumtainum anumkabiaji, nunika nui kampatum tsawan pujusabiaji. ¹³ Nuwiyati juwaki anuasa ashí ashinkawa Regio jegawabiaji. Nunika kashinia duwi wegamunum dase surnumia senchi umpumpakuí, jimagchik tsawantaik Puteolinum jegawabiaji. ¹⁴ Nui jegamunum wajumak Jisusa nemajuidau batsatu:

—Wait aneasam juwi jutiijai makichik tumig pujusam wetá, — tusa ipapainakui: —Ayú, —tusaja nui batsamsá, nu tsawan tibau jegakuí nuwiyati Romanum jegatasa jiinkiabiaji. ¹⁵ Romanmaya Jisusa nemajuidauk jutii minamunak chichamnak antukaju asag, iina igkumpaktatus Foro† de Apio tutainum, nuigtú Kampatum Jega tutainum kaunawajabi. Pablo ditan wainak Apajuin see ti, niishkam shiig anentaímsabi. ¹⁶ Romanum jegaa ajin, tikich aents achigbau aidaunak capitán yajuak, achijatnun dekas apujin ejeti susabi. Dutikak Pablonak niinash akanak makichik suntag kuitamkati tusa apusajabi.

Pablo Romanum pujusbau

¹⁷ Kampatum kanag tsawaag, Pablo Romanum batsamin judío aidaun apujin untuká ijumag ditajai chichaak:

—Yatsug aidauh, wika mina pataag judío aidaunakesh pegkegchounak takagsachu aig, iina muunji umitaiji aina nunakesh pegkegchau chichagtsaig, achigkag Jerusalén dekas Romanmaya aents aidaunum sujutkagmae. ¹⁸ Ditak minak kuashat inintsag wi bakumaku mantamnamainnak dekagtuinachak akupjuktatus wakejutiagmayi. ¹⁹ Tujash mina pataag judío apuji aidau dakituinakui: Minak dekas Roma apujiya nu dekagtuati tibaijai, wi mina nugkajuiyanak pegkegchau etsegtumainush atsugtaig. ²⁰ Nunú ajutu asamtaí atumin untujukjime, atumjaishkam wainiakununa pachisan chichastasan, jutii Israel aents aidaulik Kristu dakaku pujuinag nuaduí, wishakam jutika jiijuí jigkajam wajajai, —timayi.

²¹ Tutai dita chichajuinak:

—Jutiik makichik Judeanmaya papikesh amina pachipas agagbauk jukishmaji, tuja awiaya Jisusa nemajuina nunú tainakushkam amina pegkegchaugmin pachitjamsag ujapakchagmae. ²² Dekas ame wajuk anentaime nunú chichaktá, ashí tikich nugkanmaya aidaush, ju

* **28:11** Cástor, Pólux tawa duka, Alejandrianmaya apajimtaiji daaji, jimagmamú taku tawai.

† **28:15** “Foro” tawa nunak waji ijumja sujutai taku tawai, tuja “Apio” tawa nuuwai nunú waji ijumtaiya nuna nugká daaji, nuanuí kampatum jega pujujakuí kajiiitai, nuanuí Pablon igkugkajui yatsut Apajuí nemajin aidau. Duka jimajá kanaja Roma jegamainnum aajakui.

ame yamajam chicham etsejam juna dakituinak, kuashat augmatus chichaidau antuidau asaja taji, —tuidau.

²³ Nuna tiag: Nu tsawantin dekas aents ijunjagtinme, tusag tsawantan dekapawaju. Nu tibau tsawan jegamtai, Pablo pujamunum aentsuk tuwakaju, imanikmatai Pabloskam kashik nagkamas: Apajuik nuní inajatui, tusa chichaa chichakua tuke etsanak akapabi. Nuna imatjak Moisés chicham umiktajum tibau, tikich Apajuin etsegtin aidau tibaujai pachis ujabi, ditashkam Kristu Jisus taatnai timawa nunashkam dekawag dekaskeapi titinme tusa. ²⁴ Wajumak aents Pablo nuna etsegtai dekaskeapi tuinai, tikich dekaskeapi tuinachush aidau. ²⁵ Nunidau asag, dekaskeapi tuinai, tikich dekaskeapi tuinatsu nujai shiig juwamainchau dekapenak jiinag shibiagmayi, nunitai Pablo chichaak:

—Wakaní Pegkeji chichamtikam Apajuí etsegtin Isaías aajakua nu atumi muunjumin chichajak:

²⁶ ‘Ame weme au aents aidau ujaktá:

Chicham etsegbaun kuashat antiagtinai, tujash dekachagtinai, kuashat pegkeg takaamunashkam wainiagtinai, nuninakjash dekaskeapi tichagtinai.

²⁷ Juka aentsuk anentainish dekaskeapi tichamin utugchatan anentaimaidau asag,

antuinakushkam wainak antuinawai.

Jiinchkam epetkamua numamtin asag, wainmachu wajukmaina nuninawai; tujash ditá jiin wainak,

ditá kuwishin antukag, anentainish dekawag,

tudau takatan idayinak mina nemagtuinakuig tsagkugmainaitjai, Apajuí tawai’, tiuwai.

²⁸ Yamai atumesh dekaatajum, yamai nagkamsa Apajuí uwemtikagta nunú pachisa etsegbaunak, ashí aents judiuchu aina nu antukagtatui.

²⁹ Nuna Pablo timatai, judío aidauk ditak pempeentunikiag pampá pampandayinakua shiyakagmayi.

³⁰ Nunikagmatai Pablok nuwig jimag mijan pujusuí. Nuniak niina wainkatatus midiagtaishkam ni jega ikamka pujamunum awaimayi.

³¹ Shiig agkan machikish waitkascham pujus Apajuí inabaujinak etsejak, Apu Jisukristu pachisashkam aents aidaunak jintinmayi.

PABLO PAPI AGAJA ROMANMAYA AIDAU AWETIMU

Pablo Romanmaya aidau kumpabau

¹ Wika Pablo, Jisukristu inakegaitjai. Apajuí minak yamajam chichama nu etsegtugkata tusa etegka awetiuwai.

² Jujú yamajam chichama junak, Apajuí yaunchuk anagkagtuamua nuna niina etsegtin aajakajua nunú etsegekajui, dutikak agaju ainawai.

³ Duka niina uchijí Jisukristu iina Apuji, apu David aajakua nunú wegantunum Aentsmaga Akiinawuwa nu pachisa agagbauwai; ⁴ nigka Aentsmaga Akiinawaitak Apajuí pegkegma imanuk aajakuí, iman asa maamu anean nantaak Apajuí Uchijí senchigtina nunak iwainmamkauwai.

⁵ Nuniku asamtai, Apajuí jutiinak wait anenjamag Jisusan pachis etsegtukti tusa etegtamjauwai, ashí nugkanmaya aents aina nunú niini kajinas anentaimaidau asag, imá niinak umijuinak shiig anemtiksatnume tau asa. ⁶ Atumnashkam ashí nugkanmaya aents aidau, dekaskeapi tiaja nuninuk asagmin, atumnak Apajuí Jisukristunu etamkaje. ⁷ Ashí atum aidautigmin Apajuí anempau asa, midau atinme tusa etegkam aidautijum Roma batsatutigmin agatjime: Apajuí iina Apajiya nunú, iina Apuji Jisukristujai wait anenjamag, shiig agkan anentaimsa pujutnum yaimpaktinme.

Pablo Romanmaya aidau ijagsatasa wakekamu

⁸ Dekatkauk mina Apajuijun see tajai ashí atumin pachisan, Jisukristu jakamunum Apajuijai agkan chichamain ajutu asamtai, nuigtú atum Jisukristui kajintsá anentaimjum nunash tikich nugkanmayash dekaidau asagmatai. ⁹ Apajuí shiig dekagtawai wi atumin kajimattsuk Apajuí aukun tuke aneas nuké ajim nunak. Wika niinak wakejusan takagjai niina Uchijin pachisan etsegtakun. ¹⁰ Nuigtushkam Apajuí dekagtawai wi atumin minitasan shiig senchi wakegau asan tuke segas nuké aja nuna, niish wakegakuig tsawantan mamiktujuamtai atumin tajan wainkatan. ¹¹ Senchi wakegajai atumin tajan, atum Jisukristu nemagtanum utugchat dekapeamu akuish, Wakaní Pegkeji dekamtijuamua nuna shiig jintintuatasan, atumesh shiig ichichmamjum pujustajum tusan. ¹² Nuniakjumin, wi Jisukristui kajintsá anentaimag nuninuk atumesh asagmin, pempentunisaik anentai ichichtunijagmi tabaunum.

¹³ Yatsug aidauh, ubag aidauh, atumshakam wi anuí atumin tajan wainkatan kuashtá wakegamua nunú shiig dekaatajum, tujash yamaikish tuke tujajai nuniau asan minimain dekapeatsjai. Wika tikich nugkanmaya judiuchu aidau Kristu nemagkagmaya nunisjumek atum ainajum anuyatigmesh Kristu nemagtanum atumin yaimpamainnash jintintuatasan wakegajai. ¹⁴ Wika ashí aents aidau papi unuimajush, unuimagchaush, yachash, yachachu aidauh jintintuata tusa awemamu asan, diwimkagtau anentaimaina imaniajai jintinkagtuata tusan. ¹⁵ Imaniau asan atum Roma batsamin aidautigminash yamajam chichama nuna ujaktajime tusan wakeesan pujajai.

Chicham yamagma nu pachisa etsegbau

¹⁶ Wika chicham yamagma nu Kristu pachisa etsegbaunmag dat-samatsjai, wagki ashí aents nuna antukag dekaskeapi tuidaunak Apajuí senchigtina ibau asa uwemtikau asamtai, dekatkauk mina pataag judio aidauná uwemtikak, duwi judiuchu aidaunashkam uwemtikatin asamtai. ¹⁷ Ju chicham yamagma ju dekamtijamui, Apajuish wajina dutikawa jutiin pegkeja iman diigmastatkush, nunak imá niinig kajintsá anentaibaunum dutikawai. Aatus agagbaunmash: “Apajuí aentsun pegkejaitme tibauwa nunú imá niinig kajinas anentaimaidau asag, tuke pujustinai”, tawai.

Apajuí aents dakituinamu asa dita wakegamun takastinme tusa idaisamu

¹⁸ Apajuí nayaimpinum pujusag dekamtijamji, ashí aents niina ajantus diitsuk pegkegchaun takaidaunak kajejuk suwimkan suuwa nuna, wagki dita pegkegchau takatinig tikich aidaush dekaskea nuna dekamainchau dekapedau asagmatai. ¹⁹ Ditak dekainawai ashí aentsí Apajuinu dekamainaitag nunak, wagki ashí wainainag duka Apajuí najankamua nuna dekaidau asag. ²⁰ Apajuí wajukuíta duka wainmaitsuji, tujash ni takasbauji wainainag nu anentaimtusa diyaku, nuigtú ni nugka yama nagkamchaku najanamua ashí wainainag jujú dekamtijamui, ni dekas Apajuíya nuna, nuigtú ni senchiji tuke atina nunashkam. Nuaduú aents pegkegchau aidauk, wika Apajuínak dekat-samjai tusa ayamjumamainjig atsawai. ²¹ Apajuí wajukuíta nuna shiig dekainayatak, niinak eme anentus see tutsuk, wainak anentaimaidau asag, ayatak nuninnak ane anentaimainakua pegkeg aina nunak dekamainchau wajasajui. ²² Ditak yacha ainaji tumamainawai, tujash dekachu waigkaje. ²³ Nunin asag dekas Apajuí ajumaish jakashtina nu emematmainun idayinak, aents jinin aina nuna, chigki, kuntin, dapi aidau dakumkamun emematuinak Apajuínak idaisajui.

²⁴ Nuniagtai Apajuishkam aents aidaunak, ditá iyashí pegkegchau wakejuinamun takastinme tusa idaisajui; dutikawajam tikima datsanmainun pempé pempeentunisag takanidau. ²⁵ Nuninak Apajuinu dekaskea nuna idayinak waita nuna antujuinawai. Nunidau asag Apajuí najankamu aina nuna emematuinak umijujakajui, dekas Apajuí najankagtina nuna ememattsuk. Imá nigki tuke ememattai atí. Aatus ati.

²⁶ Nuniagtai Apajuishkam idaisajui, tikima datsanmainun takastinme tusa. Dutikamu asag, Apajuí nuwanak aishmagjai pujustinme tibauwa nuna idayinak, mai nuwak pempeentunikiag takanijakajui. ²⁷ Nunisag aishmag aidaushkam mai aishmagkuk pempeentunikiag takanistasag imá senchi wakegainak, nuwajai pujutan idayinak datsantainchau waigkag, mai aishmagkuk pempeentunikiag takanijakajui. Nunidau asag dita pegkegchau takasbaujin suwimkanak egatmamkag ditak waituinawai.

²⁸ Apajuik aents aidau dakituinamu asa, pegkegchau anentaimta nui idaisauwai. Dutikam pegkegchau dutikmainchau aina nunak takastinme tusa. ²⁹ Dutikamu asag nunú aidauk ayatak pegkegchaunak takainak, nuigtush pegkegchau, ashí wajiin waké wakegakua wegau, yajau, tikichdaun pegkejan wakegak kajejin, magkagtin, jiyanita wekaetin, tsanumin, chichama wekaetin, ³⁰ augmatkagtin, Apajuí

shiwaji, datsantan chichaaku, eme anentaimtubau, ni wagaaku chichagmamin, pegkegchaush wajuk takamainaita nuna jintiag anentaimin, apajinash dukujinash chichaman umigchau, ³¹ anentaimtajish pegkegchau, ni tibaujinash umichu, makichik aentsnakesh shiig anentus diichu, tsagkugkagtuchu, wait anenkagtuchu ainawai. ³² Ditak Apajuí aents nuninun takauk suwimkan junak jakatin atinme tiuwa nunak shiig dekainawai. Nunin aigkish ditak pegkegchauwa nunak takainak, tikich pegkegchaun takaagtaish shiig anentus diinawai.

2

Apajuik dekas aents takasbaujiya dutiksag susatnai

¹ Nuaduí ameshkam, yaki ainme nunin akugmesh, jutiik pegkeg ainaji, tikich aidau pegkegchaun takainawai tusa ayamjumamainuk at-sugtamjume. Tikich pegkegchaun takainawai takugmesh atumshakam bakumajume, dita takaina nujai betekak takau asajum. ² Dekaji aents nuninun takaidaunak, Apajuí suwimkan suwakug dekas dita pegkegchau takaamujiya dutiksag suuwa duka. ³ Nunin asamtai amesh tikich pegkegchau takainakui augmatkum, dita takaina nunismek pegkegchau takau asam, Apajuik minak suwimkanak sujuschatnapi tusamek anentaimaitsume, duka makichkish nunikchatnai. ⁴ Nuigtushkam Apajuí shiig kuashat wait anenjamu asa, suwimkan sujamsuk emamkes dakagma dushakam wainkaya nuninuk anentaimtumaitsume. Atumek dekamainaitjume Apajuik imá pujutinak yapajiati tabaunmag wait anenjamaina duka. ⁵ Tujash atumek, dekas nuninapi tusajum pujutjum yapajiachu asajum suwimkak ayatak ikauntugmagme, nuaduí tsawan jegatai Apajuí kajeká, aents pegkegchau takasbaujiya dutiksag suwimkan suwak, atumnashkam suwimkan amastinaitjume. ⁶ Apajuik, makí makichik aents wajuk takasaje, nuna diijus dutiksag susatnai. ⁷ Pujut nagkanchaunak susatnai ya aidauwa Apajuin egakaje, ni pegkeja imanuk eti pegkeg takasume tusa pujut tuke atina nuna sujusú tabaunum, pegkegnak takainak kakanmamsaju aina nuna. ⁸ Tujash aents imá nigki anenmamin aina nunak Apajuí kajejuk suwimkan susatnai, wagki pegkeg takatan dakituinak pegkegchauwa nunak wakejus taká batsatu asagmatai. ⁹ Ashí aents pegkegchau takatnak batsamtuidauk, waituinak senchi anentaimainak waittsagtin ainawai. Dekatkauk mina pataag judío aidaunmaya pegkegchaun takaidauwá nunikagmatai, duwi judiuchu aidaushkam nunikagtinai. ¹⁰ Untsu ashí aents pegkejan takasú aidaunak, Apajuí ni pegkeja imanuk emaktinai. Dutika atumek pegkeg takasugme tusa, Apajuí shiig agkan batsamsatnume tusa idaisatnai. Dekatkauk mina pataag judío aidaunmaya pegkejan takasú aidauwá nunikagmatai, tikich judiuchu aidaushkam nunikagtinai. ¹¹ Apajuik aentsnak juka jushá aentsui, tuja juka tikich aentsui tusash tuchauwai.

Chicham Umiktinun Moisés agajua nu

¹² Ashí aents chicham umiktinun Moisés agajua nunú atsugsamu tudau takasú aidauk, Apajuiyaig tuke kanaak kanakú ainawai. Nunú aidaunak Apajuik chicham umiktina nuna diisá pegkeg takasume, pegkegchau takasume tichatnai. Untsu chicham umiktina nunú

ajamaitak tudau takasú aidaunak, Apajuí chicham umiktina nuna diisá wají suwimkana jukittawa nunak titinai, ¹³ wagki Apajuí emtinig chicham umiktina nunú dekamuikik pegkeg wantinainatsui. Ayatak chichaman umiina nunak Apajuik pegkeg ainagme tawai. ¹⁴ Judiuchu aina nuwiya chicham umiktina dusha atsugmaitak, tuke nunin asag dita dutikaina duwi umiinawai chicham umiktá tibauwa nuwiyan, nuninak iwainmamainawai dutikmainchaunash, tuja dutikmainnash dekaina nuna. ¹⁵ Nunidau asag iwainmamainawai chicham umiktina duka ditá anentaimtajin ajuina nuna. Juka pegkegchawapi, juwap dekag pegkejaita tusag shiig dekaina dushakam iwainawai, chicham umiktin dita anentaimtajin ajuina nuna, dita aaja anentaibaujiya duke ayamjuktinai nuniachkush, bakutnai, ¹⁶ Apajuí ashí aentsun amek pegkegchau takasume, nuniachkush pegkeg takasume titina duwi. Nu tsawanta duwi Apajuí ni Uchijí Jisukristun, aents aidau ashí takasbauji anentaimesamujish, nuigtú tikichish dekachbaunum anentaimjamujishkam diigsam dita takasbaujiya dutiksam mek susata titinai, wi yamajam chicham Kristu Jisusdaun pachisan ujajum dutiksag.

Judío aents aidau chicham umiktin umiachbau

¹⁷ Atum ainajum anuiya, wajumak iinia pachitkajum nunú aidautijum, judiuwaitji tusajum ememautigmesh ainagme, nuigtush chicham umiktin ajutjamaina duwi Apajuíjaish shiig ijutkauwaitji tusajum ememagme. ¹⁸ Atumek dekagme Apajuí wakegamua dushakam. Tuja chicham umiktina nu dekamtijamjume, dekag pegkeg aina duke etegja takatnashkam. ¹⁹ Atum anentaimesagmek, aents wainmachu uwegnum egkesá emamaina numamtuk awajkagtin ainaji, tajume. Nuigtushkam suwenum yujaidau jii ekeemattayama numamtuk awagbau ainaji, tumamjume. Atum anentaimesagmek aents Apajuí dekachu aidau, Apajuin dekaatnume tusa yain ainaji, tajume. ²⁰ Atum anentaimesagmek aents Apajuí chichamen dekainachush jintintin ainaji, dutikaku imaanis anentaimainchaush unuidau ainaji, chicham umiktina nu ajutjamu asamtai wajuk shiijash pujumainaita, nuigtú dekaska dushakam ashí dekainaji, tajume. ²¹ Atum aaja tikich jintintin ainayatkugmesh ¿wagka atumek jintinmamtugme? Tikich chichagkujum: Kasamchatia, tayatkugmesh ¿wagka kasamjume? ²² Tsanijinchatia, tayatkugmesh ¿wagka tsanijinme? Atum apajimtai dakumkamu dakitayatkugmesh, ¿wagka nu dakumkamu ememattainum wayagmesh, nuwiya wají aidaush kasamjume? ²³ Chicham umiktin ajutjamaina duwi ememajume, nuniyatkujum nu betek umiatsjum nuaduí Apajuik eme anentsagmek diyatsjume. ²⁴ Atum aaja nuniajum duwi yaunchuk agagbau aajakua nui: “Judiuchu aidauk, atum pegkegchau takatigmin Apajuin pegkegchaun chichajuinawai” tawa nu uminui.

²⁵ Jutiik judío aents asaja pakamainag duka pegkejai, tujash chicham umiktinum tawa nu ashí umiinaku aaninakuik pegkeg amainaitji. Tuja pakamaku* akugmesh chicham umiachkugmek, pakamakchau aina nujai betekak ainagme. ²⁶ Tuja aents pakamachu aina nunú, chicham umiktajum tibauwa nuna umiagtaik, pakamakua imanuk Apajuik diyawai. ²⁷ Aents aidau pakamakchau akushkam, chicham

* 2:25 “Pakamaku” tawa duka diistá Gén. 17.10-25.

umiktina nuwiyán umiidau asagmatai atumek bakumatnaitjume, atum pakamaku ainayatkujum, nuigtú chicham umiktinush deokay-atkujum umikchau asajum. ²⁸ Judío aents aidautik wajuku ainaji nu diigsaikish, nuniachkuish pakamaku asajaikish dekas judío aents tamak amaitsuji; ²⁹ dekaskenum judío aents aina duka ditá initkenish yapajidau aina nuuwai. Nunú ainawai initkajinish yapajidau asag dekaskenum pakamakaju aina duka, nunak Wakaní Pegkejiya nunú dutikawai, junak chicham umiktinun Moisés agajua nu dutikatsui. Nunú aidaun Apajuí pegkeg ainagme tawai, ditak aents eme anenjit- nume tusag egainatsui.

3

¹ Atum aidautijum, untsu judío aents atak wainkampapi, pakamamush wainkampapi tujutmainaitjume. ² Atsá, makichkish nun- inchauwai, Apajuik kuashat pegkeg aina nuna jutiinu amainnak dutikauwai: Nunú pegkeg aina nuwiyán dekas imá pegkeja nunak, jutii judío ainag nunutin, Apajuí ní chichamen agagbaun kajinas sujamsauwa nuuwai. ³ ¿Tujash wajukuíta wajumak iina patayí judío aidau Apajuí tibaujin umikchajua duwiká, Apajuí jutii anagkagtuamua nunak umimainchauwait? ⁴ Nunak makichkish nunimaitsui, Apajuik ní tibaujinak dekas imatiksag betek uminai, aentstí waitjin ainajink- ishkan. Nunin asamtai Apajuí pachisa agagbauwa nu:

“Ame tibaugmek betek umin asamin betek uminai tama atatme, iman asam pegkegchaun aikawai tujamainakuish, bakumamainkesh atsugtamú asamtai, tuke depetmaktinaitme”, tawai.

⁵ Jutii pegkegchau takaamuji, Apajuí pegkeg takaamujin nuní paan iwainaiash ¿wagka Apajuish suwimkanash saktutumainaita, pegkegchau takau asag nunimainait? (Junak tikich aents aidau wajuk chichainawa nuna dutiksanuk tajai.) ⁶ ¡Duka makichkish nuninuk anentaimaitsugme! Apajuik pegkegchaunak takachui. ¿Apajuish wajuk ashí aents aidaunash suwimkanash sumainaita, niish pegkegchaun takauwaitkush? Nunak dutikmaitsui.

⁷ Makichik aents: Wi waitjamua nu, Apajuí tibaujin imatiksag betek umina nuna imá paan iwainaiash ¿wagka wisha tudau tamash aja? tumainai. ⁸ Wajumak aents aidau waitjuinak: Pegkegchau takamainai pegkeg ajutjamti takuik tusa jintinkagtawai, tujutuinaawai, ¿Dekas aajanuk jintinkagtag? Makichkish nuninchauwai, nunú aents mina pachitus tu chichaina duka suwimak jumainun tu yujainawai.

Ashí aents aidautik tudau ainaji

⁹ ¿Wajinmainaitji? ¿Jutii judío aidautika tikich judiuchu aidau nagkaesau imá pegkeg ainag? ¡Makichkish nuninchauwaitji! Timajim nunisag judío aidautish, judiuchu aidaushkan tudau ainaji. ¹⁰ Nunin asamtai Apajuí chichame agagbauwa nui:

“¡Makichkish aents pegkejak atsawai, shiig makichkiuchikesh atsawai!

¹¹ Makichkish Apajuí pegkejan wakeja nuna takaukesh atsawai, aantsag Apajuyiyai anentaimush atsawai.

¹² Ashí aentsuk Apajuinak tupankaju asag atsumainchau waigkajui, nunin asag ashí pegkegchau ainawai.

¡Makichik aentskesh pegkejan takauk atsawai!

¡Shiig makichkiuchikesh atsawai!

¹³ Aentsú suwenig,

aents jakau ukusbau ashiimu tsumaina iman ainawai,
waitjuidau asag;

ditá weninig dapí tsaagkega iman ajuinawai,

¹⁴ nunidau asag, kuashat kajeamujin aentsnash pegkegchaun chichajuinawai.

¹⁵ Wamkes kajedau asag aentsun maatus yujain ainawai;

¹⁶ dita tuwí yujainawa nuninakush pegkegchaun dutikainak,
tikich aents aidaunak waittanum ukuinawai.

¹⁷ Dekainatsui tikichjaish agkan pujutnak.

¹⁸ Apajuinash ajantus diinachu asag,
umigtanash dakituinawai”, tawai.

¹⁹ Yaunchuk Apajuí chichamen agagbaunum: “Ashí pegkegchaun ainagme”, tawa nunak, jutii judío aidautin Apajuí chicham umiktinun sujamsau asa tujama duka dekainaji. Nunú chicham umikchamunum, chichamjumaka ayamjumamainchau juwakuitji. Nunin asamtai jutii judío aidautish, nuigtú judiuchu aidaushkam wí bakumamainuk atsugtawai tumainuk atsustinai, wagki Apajuí diismak ashí aentstí bakumamainuk ajutjamaidau asagmatai. ²⁰ Chicham umikbauwaikish pegkeg ainagme tamak makichkish achagtinai umikchaju asag, chicham umiktina duka ayatak jutii tudauwaitag nunak dekamtijamui.

Apajuik Jisukristui kajintsá anentaibaunum uwemtijamui

²¹ Tujash yamaiya juwi iwaintugmake, chicham umiktina nu umiatsjinkish dekaskenmash Apajuish wajuk dutijamua nuna. Juna pachisag chicham umiktina nuwish, Apajuí etsegtin aidaushkam etsegkaju ainawai. ²² Nunú aidau dekamtijamawajui ashí aents Jisukristui kajinas anentaimaidaunak Apajuí pegkeg ainagme tawa nuna. Aatus Apajuik ashí Jisukristui kajintsá anentaimaidautinak yaá aentsuk ainta nunin ataish nunak pachitsuk, ashí betekak pegkeg ainagme tujamji, ²³ wagki ashí aentstik betekak tunamakaju asaja, Apajuí diismak pegkejak wantinkachuitji. ²⁴ Nunin ainajinig iina anempau asa, anenjauch pegkeg ainagme tujabiuwai, Kristu Jisus iina tudaujin esakatjamag agkan etamkau asamtai. ²⁵ Apajuik ashí aentsun dekamtikauwai, aentsú tudaujin tsagkujata tau asa, Jisusan mantamnati tusa etegkauwa nunak. Nunak niina numpe ukaejamunum imá niinig kajinas anentaimainak aentsú tudaujish tsagkugnagtinme tusa dutikauwai. Yaunchuk tudau takasbaunak Apajuik pachitsuk idaitugmasui, tujash yamai Kristu jutii tudaujin juki mantamnamunum, Apajuí dekaskenum tudaun suwimkan suwa nunak iwainmamkae. ²⁶ Nunak Apajuik waugtuk dutikchauwa nunin asa, yaunchuk tudau takasbaunak pachikchauwai. Tujash yamaya juwik aentsú tudaujinash wajuk dekaskenmash dutikawa, nuna dutikak Apajuí dekas pegkejan taká nuna iwainmamkae. Jutii Jisusai kajintsá anentaimaidautinak: Atumek pegkeg ainagme tujama duwi.

²⁷ Nunin asamtai jutii ememamainuk makichkish atsawai. ¿Dusha wagka nunikuita? Nunak imá Jisukristuig kajintsá anentaibaunum Apajuí pegkeg etamkauwa duwi nunikui. Nunak chicham umiktina nu umikú asajinkish dutijamachui. ²⁸ Apajuik Jisukristui kajintsá

anentaibaunum pegkeg ainagme tujama nunak, chicham umiktajum tibauwa nu umikbauwaikish dutijamtsu duka dekaji.

²⁹ Atsa ¿Apajuik imá judío aina nuna Apajuijigke, tajumek?, atsa ¿ashí aents aina nunash Apajuijinchukai? Dekaskenum ashí aents judiuchu aina nunashkam Apajuijiyai. ³⁰ Apajuik makichkiuchi, nigki imá Jisukristuig kajinas anentaimaidaunak judío aents ataish, judiuchu ataishkam pegkeg ainagme titinai. ³¹ Nunin asamtaig, ¿Jisukristu kajintsá anentaimtamunum chicham umiktina duka iman-chau juwaka? ¡Makichkish nuninchauwai! Nunisag awai, ayatak nuní nagkaemas paan awajsaji, chicham umiktinush wajinma yaijatua duka.

4

Apajuish wajuk pegkejash diigmawa nuna Abraham iwainakbau

¹ Yamai dekawagmi Abraham iina muunji aajakua nudau. ² Abragkak ni takasbauji diigsá aents pegkejai tibau akug, nigki emematmamain aajakuí, tujash Apajuiyaig ememamain ajakchauwai. ³ Apajuí chichame agagbauwa nuwig: “Abragkak Apajuiyai kajinas anentaimajakuí, nuniau asamtai Apajuí Abragkan pegkeg diisú”, tawai. ⁴ Aents ni takagsamunum akiakug: Junak anentag amajame, tumaitsui, diwibaunum akiau asa. ⁵ Tujash aents pegkejan takaschau aig, Apajuí aents tudaun agkanmitkauwa nui kajinas anentaibiagtai, nunú kajintsá anentaibauwa duwik aents pegkeg ainagme tawai. ⁶ Davidchakam aikasag agajui. Aents pegkeg takasbaujish atsujai, Apajuí pegkeg ainagme tima shiig aneastinjin pachis agajua duka. ⁷ Aatus tawai:

“¡Shiig aneasagtinaí aentsú pegkegchauji tsagkujamu aidauk, tuja tudaun yaunchuk takasbaujish tuke idaiku pachitsuk idaitusbau aidaushkam!

⁸ ¡Shiig aneasagtinaí

Apajuí aents aidau tudaunin anenjachbau agtina duka!”

⁹ Juna tibauwa jusha ¿Imá jutii judío aidautik shiig aneastinnak tiuwait, atsa judiuchu aidaush shiig aneastinin tichaukaih? Nunak ditanashkam tiuwai. Yaunchuk timajime Apajuik Abragnak imá ni kajittsá anentaimtamua duwik, aents pegkeja iman diisú tusan. ¹⁰ Tujash nunash ¿wajukamtaiya dutikauwaita? ¿pakamakmataig dutikauwait, atsa pakamatsaigkik dutikauwait? Nunak pakamakmataí dutikachui, eke pakamatsaig dutikauwai. ¹¹ Abragkak pakamakui ayatak Apajuí kajintsá anentaimtamunum pakamakchau aigkish, Apajuí pegkeg diijata nuna dekaatnume tau asa. Nuniku asa pakamakchau ainayatak, Apajuiyai kajinas anentaimaina nuna muunji wajasuí, ashí nunin aidaunak Apajuik betekmas pegkeg diyawai. ¹² Nuigtushkam pakamaku ainakush, Abraham eke pakamatsuk Apajuiyaig kajinas anentaimajakua nunisag anentaimaina nuna muunji wajasuí.

Apajuik Abraham kajinas anentaimajakua nunin aidaun pegkeg ainagme tawai

¹³ Apajuí Abragkan anagkuak: Ju nugka juka amina uchijum wegantu akiinak wegagtina nudau atin atí, tiuwai. Nunak Moisés chicham umiktajum tibauwa nuna umikú asamtaigkish tichauwai. Ayatak niiní kajinas anentaimu asamtai pegkeg diisá tiuwai, ¹⁴ wagki

jutii judío aidauti chicham umiktajum tibauwa nunú umiaku jumainaitkuig, Apajuiyai kajintsá anentaibauk ni anagkagtuamua nujaí wainak juwamainai. ¹⁵ Moisés chicham umiktajum tiuwa duka ii umiachbaunum Apajuí suwimkan sujaimana nuna itagtamji. Tujash chicham umiktina nunú atsugtamkuig intimjumaitsuji, wagki atsau asamtai.

¹⁶ Nunin asamtai Apajuí Abrugkan anagkuawa nunak, ni we-gantu aidaush kajintsá anentaibaunum anenjauch uwemjatnume tiuwai. Apajuí anagkagtuamuk, jutii judío aidauti chicham uminag nudaukechuí, Abraham Apajuiyai kajinas anentaimajakua nunisag, ashí aents kajinas anentaimaina nudauwai. Aatus asamtai Abrugkak ashí jutii aidauti muunjiyai. ¹⁷ Nuaduí Apajuí chichame agagbaunum: “Wi aminak kuashat aents aidau muunji emajame”, tawai. Abrugkak Apajuí emtin abaujinak wainmamkauwai, nunik ni tabaujinash dekaskeapi tiuwai. Nunú Apajuí jakaunash inanki ataktú pujatan suwak, atsamunmayanash ashí wajiin najanna nuanuí Abrugkak kajinas anentaimajakuí.

¹⁸ Nunin asa Abrugkak uchijish atsugmaitak, kuashat aentsun muunji atag tau asa, dekas nuniktinapi tusa kajinas dakasui, Apajuí chichajak: “Amina uchigmiin akiinak wegauk, yaya dekapamainchauwa ibau atinai”, tibau asa. ¹⁹ Abrugkak cien mijan tumain ajamu asa uchinak akiimainchawapitja tiuwai, nuigtush Sarashkam muuntuch wajasú asa uchinash ejapjumainchau asamtai, tujash dekaskeap duka uminkattawa tusa kajintsá anentaimtanmag mijakchauwai. ²⁰ Nuigtush Apajuí niina anagkuamunash utujimsag anentaimtsuk, nuní nagkaemas kajinmas dekas nuniktatuapi tabaujinak ichichmag Apajuin see tiuwai. ²¹ Abrugkak: Apajuí ashí senchigtina ibau asampap ashí ni anagkagtuamujinash imatiksag umiktatua, tiuwai. ²² Nunú aaja kajintsá anentaibaunum Apajuik Abrugnak pegkeg diisui.

²³ Tujash Apajuí Abrugkan niini kajinas anentaimu asamtai pegkeg diisua duka, imá Abrugdak pachisa agagchamui. ²⁴ Jutii pachipasash agagbauwai: Ii kajintsá anentaibaunum pegkeg ainagme tama atinaitag nunú. Duka jutii ainaji iina Apuji Jisukristun jakaunak inankiuwa nunú, Apajuiyai kajintsá anentaimaidautik. ²⁵ Apajuí Jisusnak iina tudaujin mantamnati tusa idaisauwai, nunik maawagmataish ataktú nigki inankiuwai jutiin pegkeg ainagme tujamta tau asa.

5

Yamaik Apajuí wait anenjabaunum pujaji

¹ Apajuí Jisukristui kajintsá anentaibaunum pegkeg ainagme tujabiu asamtai, niijai shiig aneasa agkan pujamu ajutjamji. Iina Apuji Jisukristu, jutii Apajuijai shiwag aajakbaun epegtugma kumpantijamauwa nuaduí. ² Kristu jutiini mantamnamunum Apajuí wait anenjamjauwai. Yaunchkek Apajuik wait anenjamajakchauwai, tujash yamaik Jisukristui kajintsá anentaibaunum wait anenjamui. Aaja yamaik Apajuí wait anenjabaunum pujaji, nuigtushkam jutiik Apajuí tsuwatan antiakchauwa imanuk iishkam wajasaja, atak niijai ijunja pujustinaitag nunú dekainaku shiig aneamu ajutjamji. ³ Imá duwikik shiig aneatsji, kuashat waitiamu ajutjamkuish shiig aneasa batsatji, waitiamua nu utugchat emamkesa katsunjá nagkaetan unuitama

duwi, ⁴ aaja emamkesa utugchat nagkaebaunum Apajuí pegkeg anigme tujamji, nuna aatus tujamatai atakeap niijai pujustinaitji tusa dekaidau asa shiig aneasa pujuinaji. ⁵ Nu dekau asaja shiig aneasa pujuidautik tsanugbauk achatnaitji, wagki Apajuí Wakani Pegkejin amasua nunú Apajuí senchi anejata nuna dekamtijama Apajuí aneen etabiu asamtai.

⁶ Jutiik Apajuí shiwaji wajasá pegkegchau takat idaimainchau waigká batsatjin, Apajuí tsawan mamikiamu jegamtai, Kristuk jutiiní mantamdauwai. ⁷ Makichik aentskesh tikich aentsun dekaskenum pegkejan takau asamtai ayamjakun mantamnatjai tumainuk atsawai, ¿aents pegkegnum yaigbau asampash: Wi mantamnatjai, tumainait? ⁸ Tujash Apajuik ni anenkajinak iwaintugmakui, ii tudau ainajinig Kristu jutiiní mantamdauwa duwi. ⁹ Kristu niina numpen Apajuiyai iwainakmatai pegkeg ainagme tujabiuwai. Nuaduí aan nagkaemas dekas Kristu iina Apajuí suwimak sujamainnak ayamjutpakmatai waittsashtinaitji. ¹⁰ Yaunchkek aents aidautik Apajuin shiwaji ainajinig, ni Uchijí iina ayamjutpak mantamna ni Apajijaish epegtugma kumpamtijamauwai. Yamaik Apajuí kumpají waigkú asajin, Kristush iwaaku pujau asa dekas aan nagkaemas ayamjutpaktinai. ¹¹ Imá dukechui jutií Apajuiyai shiig aneenag duka, iina Apuji Jisukristu Apajuijai epegtugma kumpamtijama duwish shiig aneenaji.

Adán Kristujai pachisa tibau

¹² Adán tunamagbaunum aents aidauti tudau takaamush nagkamdauwai, aaja tudau takaaku ashí aentstik jinin wajasuitji, wagki ashí tunamaku asaja. ¹³ Apajuí eke Moisesan chicham umiktinun suwatsaig aents aidauk tudaunak yaunchuk nagkamas takajakajui, tujash Apajuik aents tudaun takaagtaish pachikchauwai, chicham umiktinun eke susachu asa. ¹⁴ Nunin aigkishkam Adán pujujakua duwi nagkamas Moisés pujaishkam jinujakú ainawai, Adán Apajuí intimjukbaunum tunamajua nuninachiatak. Adán intimkimunum ashí aentsuk tunamakaju ainawai, nunisag Kristu pegkeg dutikamunum ashí aents aidauk uweemain ainawai.

¹⁵ Tujash Adán tunamagbauwa duka Apajuí anenjauch sujamsamua nujai apatkaish tumaitsui. Makichik aentsú tudaujinig ashí jinin wajasuitji. Tujash Apajuí wait anenjamag anenjauch iinu ashí pegkeg aina nunak dutikauwai, Kristun awetugmauwa nuaduí. Makichik aents emesjamua nuna, tikich aents Jisukristuwa nunú wait anenjamag kuashat aentstinun iwajauwai. Aatus Apajuí wait anenjamag nunú aents tunamajua nuna nagkagas pegkejan dutikauwai. ¹⁶ Adán tudau takasbauwa duka Apajuí anenjauch sujamsauwa nujai apatkaish tumaitsui. Adán tudaun takasua duwi ashí aentstik Apajuí emtinish bakumamain wajasuitji. Tujash kuashat aents tunamaku aigkish, Apajuí kuashat aentsun anenjauch pegkeg ainagme tawai, nunimainchau aigkish. Aaja dekainaji Apajuí jutií wait anenkagtam shiig muunta duka. ¹⁷ Makichik aents tunamagbaunmag jaamuk asauwai, nunikmatai ashí aentstí jakaig tusa ishamat nagkamdauwai. Tujash nuna nagkaesau makichik aents Jisukristuwa nu pegkejan dutikauwa nu yaimpasmatai depetmaka pujuinaji. Ashí jutiin Apajuí shiig senchi wait anenkagtak anenjauch pegkeg ainagme tibau aidautik see tusaja kajintsá anentaimainaji.

18 Makichik aents Apajuí intinjukbaunum nunisaik ashí aentstish intimainaku, Apajuí atumek suwimak juwakjum jakattagme tama asauwaitji. Tujash makichik aents ashí aentstinun pegkejan dutikak waittsauwa duwi, Apajuí ashí aentstinak pegkeg ainagme tusa pujut nagkanchau suwam amainaitji. 19 Makichik aents Apajuí intinjukbaunum ashí aentstik yupichu tudau takamain waigkuitji, nunika tunamakuitji. Tuja makichik aentsua nu Apajuí umigkamunum, ashí aents aidauk yupichu pegkeg ainagme tama amain asamtai, kuashat aents pegkeg ainagme tama agtinai.

20 Aents aidauk tudaunak taká batsatai Apajuí chicham umiktinun susauwai. Tujash chicham umiktina nunak dekainayatak, aentsuk nuní nagkaemas tudaun takajakú ainawai. Imanik tudaun taká batsatai, nuna nagkaesau Apajuí wait anenkagtujui. 21 Yaunchkek ashí aentsuk tudau takatan nagkamawag takainak idaimainchau batsamajakajui, jinin waigkaju asag. Apajuish anmamtuk, yamaik ashí aentsuk shiig aneasag agkan niinig kajinas anentaimas pujuinak, tuke pujustin atinme, wait anenjá pegkeg ainagme tibaw asag, tusa wakegawai. Nunú pujuta nunak iina Apuji Jisukristu sujamui.

6

Jutiik tudau takatnumag jakauwa numamtuk juwakuitji

1 ¿Dusha wajak anentaimtagme? ¿Apajuí senchi wait anenjamjati tusaik tudauk taká batsaamainait? 2 ¿Duka makichkish nunimaitsui! Jutiik tudau takatnumag jakauwa numamtuk juwakuitji, nuniku asaja tudauk taká batsamtumaitsuji. 3 Atumek shiig dekagme, juti Kristu Jisusai kajintsá anentaibaunum yamimainakuik, ni jakauwa numamtuk wajainag duka. 4 Nunin asaja yamimainakuik Kristun ukusajua numamtuk wajainaji, nijai betek jakauwa numamtuk wajaidau asá. Nuniku asaja Kristu Apají niina senchijí imana nujai inankiuwa numamtuk wajainaji yamajam pujutnum pujuidau asaja. 5 Nijai jamaina numamtuk wajakú asá, ni nantakiuwa nunisaik jutiish nantaktinaitji.

6 Yaunchuk aajakuitag duka Kristu achijá maamua nujai betekak maamua duka dekainaji. Apajuí wakejukui yaunchuk pegkegchau takastasa katsunmainchau senchi wakejukbauwa nunú wainak juwakti tusa, nunikmatai tudau takata nunak idaimainchau batsamtishtinme tujamu asa. 7 Aents jakauwa duka tudaunak taká pujuchui agkanmagau asa. 8 Numamtuk jutiishkam iina tudau takataiji aidauk Kristujai jakau asamtai agkantaitji. Nuaduí Kristujaimpap pujutnaitji tusa kajintsá anentaimainaji. 9 Dekainaji Kristu jakaunak Apajuí inankimu asa ataktuk jakashtina duka. Kristuk jatanak depetkau asa ataktuk jamaitsui. 10 Aents tudaun takaagtai Apajuí suwimkan susatjai tiuwa duka, Kristu waitus jakauwa duwik ashí nagkankauwai. Yamaik nantakí puja nunak Apajuí shiig anematikak pujawai. 11 Atumshakam nunisjumek tudau takatnumak jakauwa nunin anentaimtumastajum, tuja iwaaku anentaimtumastajum, ii Apuji Kristu Jisusjai ijutkau batsatkujum Apajuí shiig aneemtiksata tabaunum.

12 Nuaduí atumek tudauk taká batsaamaitsugme, atumi iyashim pegkegchaun takastatus wakega nunú takaakjum. 13 Atumi iyashmiin

ashí ajutjamaina dukesh, makichik wají pegkegchau dutikatasa takatia nuninuk awasaigpajum. Dekas Apajuiyaig idaimamsatajum jakauti nantamaina numamtuk wajakú asajum, ashí iyashmiin ajutjamaina nunak Apajuí pegkegnum takamtiksati tusajum. ¹⁴ Atumek aents aidau, chicham umiktajum tibauwa nuna umikchan suwimchan jukig tusag umiktatus batsamtumaina nunitsuk, Apajuí wait anenjabaunum batsatu asajum, tudauwa duke taká batsamtutsuk idaisatajum.

Aents yana umigkatjai tawa duka nuna umijin wegawai

¹⁵ Makichik aentskesh: Chicham umiktajum tibauwa nuna umikchan suwimchan jukig tusag, nuna umiktatus batsamtuina nunitsuk, Apajuí wait anenjabaunum pujau asayap tudau takamainaita tusa anentaimainai. ¡Tujash duka makichkish nunimait sui! ¹⁶ Atumek dekagme, makichik aents wika parjugkan takagkun umijin atajai tumamkug, nuna inake wajasá parjugji wakegamujin umigna duka. Numamtuk aents ayatak tudaunak takau atajai takush, nuniachkush Apajuin umigkatjai tumamainai, tudaunak takau atajai tumamiu asa idaitsuk taká pujauk jatan egatmamak nuniawai. Untsu Apajuin umijin atajai tumamiuk niinak umijak pegkeg aina nunak takaak pujumainai. ¹⁷ Apajuin see tajai yaunchkek tudau achikbauwa nunin batsatutijum, Jisukristui kajintsá anentaimat pachisa jintiamu antukjum wakesajum umijin waigkujum nuadú. ¹⁸ Tudau takatnum achikbauwa nunin batsatutijum agkanmitkam asajum, pegkeg aina nunak takau atajai tumamiuwaitjume, nunikjum pegkeja duke takaakjum batsatjume.

¹⁹ Atumek Apajuinu pegkeg aina duka kakajus antumainchau ainagme, nuadú yamai aentstinujai apatkan shiig antumtikatjime. Yaunchkek ashí atumi iyashmiin ajutjamaina duka, ashí iyashnum takanitai pegkegchau aina nunú, nuigtú ashí tikich pegkegchau aidau takat aina nuig idaimamsau aajakuitjume. Numamtuk ashí atumi iyashmin ajutjamaina nujai, Apajuí pegkeg diyamu aina duke takatnum idaimamsatajum, Apajuí uchijí aidau wajuk pujumainaita nunitsumek pujakjum.

²⁰ Atumek tudau takatnum idaimamsau asagmin, Apajuí pegkejan wakega nunú takagsatajum tumainchau aajakuitjume. ²¹ Tujash ¿wají pegkeja jukiwaitjume, yamai datsantan itagtamaina nunú takasuitjum duwish? Duka ayatak jatanmag ejetamjume. ²² Tujash atumek tudaunum agkanmitkam Apajuí takajin wajasujum nuadú, yamai dekas pegkeja duka ajutjamjume, nunú pegkeja duka Apajuí uchijí asajum, Apajuí pegkejan wakega duke takaajum nuuwai niijai tuke pujutnum ejetamjum nunú. ²³ Tudau takaamuk Apajuiyai ayatak datumkagtawai. Untsu iina Apuji Kristu Jisusjai ijutkau pujamunum juwamuk Apajuí anenjauch niijai tuke pujuu etamtina nuuwai.

7

Chicham umiktajum tibauwa nunú nuwenbauwa nujai apatka dekanu

¹ Yatsug aidauh, ubag aidauh, atumek chicham umiktin aina nu dekau asagmin tajime. Atumek dekagme chicham umiktin aina nunak, ayatak aents yamai iwaaku puja duke umimaina duka. ² Chicham umiktina dusha, nuwenbaujaish wajukuita nu apatka dekawagmi: Nuwa nemakua duka aishi pujaigkik tikichnumag nemamait sui tawai

chicham umiktina duka. Untsu aishi jakamtaig chicham umiktin tawa nunak, nuwak agkan juwawai tawai. ³ Nunin asamtai aishi pujaig tikichjai nemakug ekagmawai, untsu aishi jakamtai chicham umiktin nuwenbaun pachis tawa nunak agkan juwaku asa, tikichnum nemakug ekagmatsui. ⁴ Mina yatsug aidauh, mina ubag aidauh, atumesh jumamtuk Kristujai ijunkujum jakauwa numamtuk juwakitjume, wagki Kristu jakau asamtai. Aaja atumek chicham umiktin tawa nuwig agkan juwakitjume tikichdau ata tau asajum. Yamaik Kristu jakaunak Apajuí inankiuwa nudau wajasugme, Apajuin pegkejan takagsatjai tusajum. ⁵ Yaunchkek aents Apajuí dekachujai betek batsamsá, ii pegkegchau takastasa senchi wakegamu aidau ajutjamajakua duke takajakuitji. Chicham umiktina nunú dekyatku pegkegchau takastasa nuní senchi wakekauwaitji. Ashí pegkegchau takajakbauwa duka nuní nagkaemas Apajuiyaig datumtamjauwai, dutijamamtai tudau takaamu Apajuiyai tuke kanaaku kanamaina nui jegantuitji. ⁶ Tujash yamaik chicham umiktajum tibauwa nunú umitnumag jakauwa numamtuk wajakú asaja, agkanmagawaitji achikbauwa numamtin aajakuitag duka. Nuniku asa yamaik Apajuik takagji, Wakaní Pegkeji yaimpasmatai. Jutiish yaunchkek aents aidau chicham umiktajum tibauwa nuna umikchan suwimkan jukig tusag umiktatus kakanmaina imaanijakuitji; tujash yamaik Apajuí takajuinakuik yaunchuk wajukejakuitag nuninatsji.

Pegkegchau wakegamu minai ajuta nu

⁷ Nunin asamtaig ¿chicham umiktina duka pegkegchauwai tumainait? ¡Duka makichkish nuninchauwai! Chicham umiktina nunú atsakuig wika wajimpaya pegkegchau wakegamush nunak dekaachu amainaitjai, chicham umiktina nui: Tikichdau aidau wakejukaipa tawa dusha atsakuig, tikichdau aidau wakejutnak dekaachu amainaitjai. ⁸ Tujash chicham umiktajum tibauwa nui tawa nuna dekaakman, ashí tikichdau aidaunak wakemainchauwaitag nunú wakeetan nagkamauwaitjai. Yaunchkek chicham umiktina nunash eke dekachu asamtai, minai pegkegchau wakegamu ajuta dushakam atsauwa numamtin aajakuí. ⁹ Wika yaunchkek chicham umiktina nunash dekatsuk pujajakuitjai; tujash chicham umiktina nuna dekaakman, pachiachmau pegkegchau takastasa senchi wakegamunak nagkamauwaitjai. ¹⁰ Nunikan wainmamkauwaitjai chicham umiktina nuna umiatsug nuna, nuniau asan Apajuiyai kanakbaujua nunash dekauwaitjai. Chicham umiktina duka pujut tuke atinum ejetumaina nuna, Apajuiaig tuke kanaaku kanamaina nuwí ejetiuwa nuna. ¹¹ Chicham umiktina nui tawa nuna dekaakman, ashí wakegamu aidaunak wakemainchauwaitag nunú wakeetan nuní senchi wakemitkajuk tsanugkui, pegkegchaun takau asan. Pegkegchauwa nuna pegkegtsukaitai tusa takaamujun, chicham umiktina nuanuí, pegkegchau takauk suwimkan juwawai tabaun dekaakun, chicham umiktin tawa nunisnuk suwimkan juwakun, Apajuiyai kanakbaujun dekauwaitjai. ¹² Aajan dekajai chicham umiktina duka Apajuiyap tibauwaita tusan. Tuja Apajuí ashí aents aidau umiktajum tawa nunak, ayatak dita dutikmainjin diijus tiuwai. Ashí dutikatajum tibauwa duka pegkejai.

¹³ ¿Tujash nu iman pegkeg ayatkush, wagka Apajuiyai tupaut-numash ejekagtawa? tautigmesh amainaitjume. Duka nunin-chauwai. Nuninaitak minai pegkegchaw wakegamu ajuta nu tudaunak takamtijawai. Chicham umiktin pegkeja nuna antakun, nuní senchi pegkegchaw wakegamujui tudau takaamunum Apajuijai kanakú asan, jakaujai betek aajakuitjai. Tudauk nuní iwainmamkauwai dekas tudauwa nuna. Aatus nunú chicham umiktina nui dekanauwai pegkegchaw wakegamua duka, pegkegchaw takaamua dushakam dekaskenum shiig pegkegchawapi tusa.

¹⁴ Dekaji chicham umiktina duka Apajuinu asa nayaimpinmayaya nunú. Untsu wika ju nugkanmaya asan kakakchawaitjai. Nunin asan inak apujin umijama numamtuk, pegkegchaw wakegamujun umijag nunak dutiktsuke idaimainchau dekapeajai. ¹⁵ Wika dekamain dekapeatsjai, wi wakegamujua nuna takatsuk, dekas wi dakitamujua nuna takaag duwi. ¹⁶ Nuniau asan wi dutikag nunak, dakitamujua nuna takau asan, chicham umiktina duka dekas pegkejapita tajai. ¹⁷ Nuaduí wichauwaitjai dekaskenum pegkegchaun takaunuk; minai pegkegchaw wakegamu ajuta nu takamtijakui nuniajai. ¹⁸ Nunin asan wikik pegkejan takamainchauwaitag nunak shiig dekagmamjai. Wi pegkejan anentaimesan takastasan wakegag nuna senchintijumainuk minaig atsugtawai, wagki pegkeja nuna takastasan wakegayatkun takamainchau dekapeau asan. ¹⁹ Pegkeg takastasa wakegamua nunak takatsuk, pegkegchaw takat dakitamujua nuna imá takaajai. ²⁰ Tuja wi dakitamujua nuna takaaknuk, wi takaakun nuniatsjai, minai pegkegchaw wakegamu ajuta nu takamtijawai.

²¹ Dutijau asamtai pegkeja nuna takastasan wakegayatkun, pegkegchaw minai awa nunú tuké takamtija nuna dekagmamjai. ²² Mina anentaijui shiig aneamu ajuta duwi tajai: Chicham umiktin Apajui sujamsamu umiktina duka pegkejai; ²³ tujash wi umigmain tikich minai ajuta nunash dekajai, duka wi pegkeg wakegamujua nuna umigkata taig, pegkegchaw nu dakitmitkajak, pegkegchaun takamtijak achigkauwa nunin eti ajuta nuuwai.

²⁴ ¡Wajukawajak tajai! ¿Ya agkanmitkagmainaita mina iyashig pegkegchaun takamtijak Apajuiyai datumta nunash? ²⁵ Apajuin see tajai, wagki ni ii Apuji Jisukristua nuna awetugma agkanmitkagmawua duwi. Wi timajim nuna ataktú awentsanuk tajime: Wika dekaskenmag Apajuinu chicham umiktina nuna umiktasan wakegajai; tujash wikik tudau takatnak idaimainchau dekapeajai.

8

Wakaní Pegkeji wakega dutiksag takamtijusti tusa idaimamau

¹ Tujash yamaik Kristu Jisusai ijutkau aidau suwimak jumainuk shiig atsujinawai. ² Duka dekaske, Kristu Jisusjai ijutkau pujuidau-nak Wakaní Pegkeji yamajam pujutan susa agkanmitkawajui. Dutikamu asaja yaunchuk pegkegchaw wakegamu dakitayatku takainaku tuke achikbaujai betek pujujakbauwa nunisaikik pujuinatsji, nuigtú pegkegchaw takasbaunum jaká Apajuijai tuke kanaaku kanamaina nuwishkam agkanmitkamu ainaji. ³ Chicham umiktina duka tudau takaamu idaitanmag yaimpamainchau aajakua duka dekinaji, wagki kakakchaw asaja pegkegchaw wakegamua duke takaaku pujuidau

asaja. Nunin asamtai Apajuí nigki yaimpakui niina Uchijin jutii tudaujin mantamnati tusa awetugbauwa duwi. Apajuí Jisusnak aentstijai betek ema awemauwai, dutikamu asa jutii pegkegchau takastasa senchi wakegainag numamtinuk aajakuí. Apajuí Uchijiya nu pegkegchau takaschauwaitak, jutii tudau takaamunum suwimak juwaku waitmainun Jisus niina iyashiin waittsauwa duwi, nunú pegkegchau wakegamua nunak depetkauwai. Aatus Apajuik aentsnum tudau najaneauwa nunak, Kristun suwimkan suwak, ii tudaujin suwimak jumainaitag nunak inagnakui. ⁴ Nunak Apajuik jutii pegkegchau wakegainag nunak takatsuk pujuinak, Wakaní Pegkeji wakega dutiksag takaak batsataidauk, ashí chicham umiktina nunak dutiksag umiktinme tujamu asa dutikauwai. Nunú umiktá tujamauwa duka pegkeg asamtai dutiksaik umimainaitji.

⁵ Aents aidau dita ashí pegkegchau wakegaina nunak takaa pujuidauk, imá dita pegkegchau wakegaina nunak takaina duka jutiiik dekainaji. Untsu Wakaní Pegkeji tabauwa nuna umiidauk, Wakaní Pegkeji wakega nunak wakegas takainawai. ⁶ Aents ni wakegamua nunak wakegas takaa pujauk, nigki jatan egatmamui; tujash Wakaní Pegkeji wakega nunak umiak puja nunú Apajuijaig tuke pujustinai. Nuigtushkam Apajuijaish epegtumau asa, ashí aents aidaujaish nunisag shiig agkan pujawai. ⁷ Tujash aents ni pegkegchau wakegamua nunak takastatus anentaimtú pujuidauk, Apajuí shiwaji ainawai, wagki Apajuí wakegamua nu takatnak dakituidau asag, Apajuí wakegamua nuna dutikatatus wakegainakush dutikmainchau dekapenawai. ⁸ Aents ni pegkegchau wakejamua nunak taká wekaguk, makichkish Apajuinak shiig aneemtikmaitsui.

⁹ Tujash atumek, atum pegkegchau wakegamua nu takaakjum pujatsjume, Wakaní Pegkeji wakega duke takaakjum pujagme, Wakaní Pegkeji atuminish pujugtamu asamtai. Untsu Wakaní Pegkejin Kristu sujama nu atsugbau aidauk Kristunuchu ainawai. ¹⁰ Jutiiik tunamakaju asajin iina iyashig jakatin ainawai. Tujash Kristu jutiií pujau asamtai, Wakaní Pegkejiya nu dekas pujuta nuna sujamsajui, wagki Apajuí pegkeg ainawai tujabiau asamtai. ¹¹ Apajuí Jisukristu jakamtai inankiuwa dutiksag, nigki iina iyashinash pujutan susatnai, Wakaní Pegkejiya nunú iini pujau ataik. Nunak Apajuik ni Wakaní Pegkeji sujamsamu atumiin pujugtama nuaduí dutikatnai. ¹² Dutijamatin asamtai yatsug aidauh, ubag aidauh, pegkeg aina duke takamain ajutjamji, iina iyashí tudau takatan wakega duke taká yujatsuk. ¹³ Jutii ii wakegamua duke taká yujakuik, tuke waittsatin ainaji; untsu ii wakegamu takata nu, Wakaní Pegkeji yaimpasmatai idayutik Apajuijai tuke pujustinaitji.

¹⁴ Ashí aents Wakaní Pegkeji wakega dutiksag takamtijusti tusa idaimamaidauk, Apajuí uchijí ainawai. ¹⁵ Atumek wakan inajatak waitkagkagtina nu jukichuitjume, ataktú sapig batsamtita tusagmek. Atumnak Wakaní Pegkejiya nu Apajuí uchijí etamkaju asamtai, nunú Wakania nu ichashtamkui: "Mina Apag" tuinaji. ¹⁶ Wakaní Pegkejiya nunú iini pujau asa iina anentain dekamtijamji, Apajuí uchijí ainagme tusa. ¹⁷ Apajuí uchijí asaja, ii jukitnun Apajuí anagtabauwa dusha betek jukitnaitji, tuja dekasenum ju nugka juwi Kristu waittsauwa numamtuk waittsajaik niina imanjiya imanuk atinaitji.

Apajuí anagtamamua nui kajintsá pujuidau asaja ichichmamja batsatainaji

¹⁸ Ju nugka juwi yamai waituinag duka imanchauwai, Apajuí pujut pegkeg tuke atinun sujamsatna nujai apattsa anentaimtamak. ¹⁹ Ashí Apajuí najankamu aina duka wakegas dakainawai, tsawan jegatai jutii Apajuí uchijí aidautin ashí wainainamunum niina imanjiijai iwaintamkatna nuna wainkagtatus. ²⁰ Ashí Apajuí najankamu aina nunú, ditanu pegkeg aajakajua nunak megkaekaju asag, makichkish atsumashbauwa nunin waigkua duka dekainaji. Nunak dita wakegainak nunikchajui, Apajuí aatus nunikti tibau asag nunikajui. Dutikamu asag Apajuí makichik tsawantai yapajiatin asa dutikauwa nuna dakainawai. ²¹ Ashí Apajuí najankamu aidauk jinin atí tibau asag, tuke achikbaujai betek aina nunak, Apajuí agkanmitka shiig pegkeg ematnai. Nunak Apajuí uchijí agkatmitkam agtina nujai betek Apajuí ditanashkam agkanmitkawagtinai. ²² Nunin asantai yamaya juwikish Apajuí najankamu aidauk, dita agkanmagawagtinjin dakainak najaimaku ejettayama imatuinawai, nuninak nuwa uchin uchigmaktatus najaimama imanina duka dekainaji. ²³ Nunak imá ditakek waituinatsui, jutii atak Apajuí amastina nu jukitin asaja emtika Wakaní Pegkeji jukiu aidautishkam waituinaji, iina iyashin yapagtugma ni uchijí etamak jujamkitna nu wakeesa dakainaku batsamsaja. ²⁴ Jutiinak Apajuí uwentijamjauwa duka dekainaji. Tujash ni nuna dutijabauwa nuaduí ni anagtabauwa dutiksag sujamsatna nu dakainaku kajintsá pujuinaji. Apajuí anagtamamua nunú jukiu akuik, atakeap jukitnaitji tusaik kajintsaiak daká pujumaitsuji, wagki ni dakamujiya nuna jukiu asa jukittajapi tusag kajinas daká pujumaitsuí. ²⁵ Tujash ii dakainamua duka ii wainchamua nu dakainaji, nuniau asá emamkensa dakainaji.

²⁶ Nunidau asaja ichichmamja batsatainaji, Wakaní Pegkejiya nu ii kakakchau wegajinish yaijatu asantai. Jutii kakakchau ainag duka, Apajuish wajuk aujmainaita duka dekachu asá nunin ainaji, tujash Wakaní Pegkejiya nu jutiin pachipas Apajuin aujtugmawai, anentai senchi idajka chichamai tumainchau dekaptayama imatikas. ²⁷ Nunitai Apajuí aents anentaibaujin shiig dekaju asa, Wakaní Pegkejish wajina tawa nunak Apajuik shiig dekajui, wagki Apajuí wakega dutiksag niina aentsji aidaunak segatu asantai.

Jisukristu anempau asa ashí utugchatan depetkatnume tusa yaimpaji

²⁸ Jutii Apajuí aneen aidautik, ii pujutjin ashí nagkaetama duka pegkegnum yaijata nunú dekainaji. Nunú aidautik Apajuí yaunchuk anentaimas midau atinme tusa ipaamu ainaji. ²⁹ Apajuí jutii niinií kajintsá anentaimsagtin aidautinak yaunchuk emtika waipakuí, nunú aidautin etegtamjauwai mina Uchig Kristua imanuk atinme tusa. Dutijamau asa niina Uchijinak, niina yachi, umayí kuashat aina nuwig ni iwai atí tiuwai. ³⁰ Dutika yaunchuk anentaimas midau atinme tibau aina nuna etegjauwai. Ni midau atajum tama ayú tiaju aina nuna atumek pegkeg ainagme tiuwai. Nunú pegkeg ainagme tibauwa nuna Apajuí pegkeg emakuí, wijai pujuinak pegkegnak iwainmamtinme wi pegkejaitag imannak tusa.

³¹ Ashí wi tajim nuna anentaimsa diisan tajai: Apajuí jutiin ayamjutpak, nuigtú yaimpau asamtai pachiatjsi iina shiwaji kuashat ainakuishkam, wagki dekas pegkegchau awajtamkatatus wakegaina duka, jutiinak ayatak pegkegunap yaimpainawa, tau asan. ³² Apajuik makichkish sujtjamtsuk ni Uchijin awetugmauwai ashí jutií tudaujin mantamnati tusa. Apajuí ni Uchijin awetugmauwa dutiksagkeap dekaskenum ashí pegkeg aidaun jutiin sujamsatatus wakekauwa nunash wakesampap sujamsatnaita tusaish dekainaji. ³³ Jutií Apajuí etejamu aidautinak, makichik aentskesh Apajuí emtin iina pegkegchaujin etsegugmakush, makichkish bakugmashtinai, wagki Apajuiya duke iina pachipas, juka pegkeg ainawai tujamu asamtai. ³⁴ Jutií Apajuí etejamu aidautinak, makichik aentskesh suwimkan jukitnume tujamainuk shiig atsawai, wagki Kristu Jisus jutiinií mantamdau asamtai. Tujash nuna nagkaesau Jisukristuk Apajuí inankim aneantu asa, yamaik Apajuí untsujiin dekas eme anentsá diitainum pujusá, Apajuin aurtugmaji. ³⁵ Jutií Apajuí etejamu aidautinak, wajig iina nagkaetaminta nuniakush, Jisukristu iina anempa nuna datumtijamainuk makichkish atsawai. Waitiamukesh, utugchatkesh, waitkagmainakugkesh, yapajamukesh, mamuamukesh, ishamainkesh, jaamukesh makichkish Jisukristu iina anempa nunak datumtijamait-sui. ³⁶ Dutiksag Apajuí chichamen agagbauwa nui jutiin pachipas: “Apajuiyah, jutiik aminu asaja, tuké puyatjumainnum pujuinaji mantamata tuidau asagmatai;

uwig mautainum jukí ematiama numamtuk awajtamainawai”, tawai.

³⁷ Ashí nunú aidaunum tikima senchi waitiajinchakam Jisukristu anempau asa yaimpaktatji, ashí utugchat ataish depetin atí tusa. ³⁸ Wika junak shiig dekau asan tajai: Jaamukesh, iwaaku pujamukesh, nayaimpinmaya aents aidaukesh, iwanch wakan pegkegchau senchigtin aidaukesh, ii yamai pujag nuwiyagkesh, atak atina dukesh Apajuí jutiin anempa nuna datumtijamainuk makichkish atsawai. ³⁹ Nunisag agkajunum batsamas inamin aidaukesh, nugká batsamas inamin aidaukesh, nugká initken batsamas inamin aidaukesh, nuniachkush ashí Apajuí najankamu aina nuwiyagkesh, Apajuí jutií anempa nuna datumtijamainuk atsawai. Apajuik ii Apuji Kristu Jisusan awetugmauwa duwi iwaintugmakui, iina senchi anempamujiya nuna.

9

Apajuí mina aentsug atinme tusa etegkamu aidau

¹ Jisukristun dekaskeapi tinu asan dekas tajai, Wakaní Pegkeji mina anentaimtija dushakam dutiksag tujutu asamtai. Aatsa dekaskea nuna dekau asan, ² shiig kuashat wake besemag dekapeakun anentaijun tuke idagmasnuké ajai. ³ Mina yatsug aidau, mina ubag judío aidau senchi aneamunum, wajukanuk yapajintaitkuig wi Kristui kakanan, Apajuí suwimkajin wi juwai, dita dekas wi wajukeyag junin wajasaja tajai. ⁴ Ditashkam Israel aajakua nunú wegantu asag wijai betek ainawai, Apajuí midau atí tusa etegkamu asag. Ditak Apajuí mina uchig atinme tusa anentaimtusbau ainawai. Ditanak Apajuí niina imanjiya nuna iwaintukajui. Ditajai Apajuik chichaman apakuí. Ditan susajui chicham umiktinun Moisés agajua nuna. Ditanak Apajuí

wajuk emematjitnume tusa wakegawa nunashkam shiig ujakajui. Ditanak Apajuí atumnak kuashat yaigtinaitjime tusa anagkuauwai. ⁵ Ditashkam ii muunji Apajuí etegkamu jutii uyujtamkatin aajakajua nu wegantuk ainawai. Nunú ii muunji aajakajua nui Jisukristuk egkemak aentsmaga akiinawwai. ¿Kristuí ashí wají aina nuna diyauk, niyai Apajuik, nigki tuke ememattai atí! Aatus atí.

⁶ Apajuí chichamega duka, mina pataag dekaskeapi tuinachu asam-tai umintsuk juwaktin asagkesh aniatsui, ashí Israel wegantu ainag nuwiyatik Apajuí diismak ashí betek etegjachbau ainaji. ⁷ Nunisag ashí Abraham wegantu aina nuwiya aidautik, Apajuí diismak ashí betekak Apajuí aentsjig ainatsji, wagki juna Apajuí Abragkan tiuwai: “Dekas ame wegantu atina duka Isaaka uchijin akiinkau agtinai”, tusa. ⁸ Juwi dekainaji, Abraham wegantu asaikish Apajuí aentsji ainatsug duka, ayatak Apajuí ni Uchijin anagtabauwa nuanuú kajinas anentaimaina nunú dekas Apajuí aentsjig ainawai. Apajuí diismak nunú ainawai dekasenum niina aentsji aidauk, nuigtú Abraham wegantu aidashkam. ⁹ Apajuí Abragkan anagkuak tiuwa duka juuwai: “Tikich mijantin ataktú tajuattajam duwi, Sara uchijí ajittawai.”

¹⁰ Jushakam anentaimustajum, iina muunji Isaac aajakua duke aajakuí Rebeca jimagma uchigmakbau aajakajua nuna apají. ¹¹⁻¹² Nunin aig Apajuí ni wakegamujin uchin etegkauwa nunak nunisag atí tau asa, Apajuí tiuwai: “Iwaiya nunú ekeuwa nuna umigkatnai”, tusa. Nuna Apajuí tiuwa nunak, uchik eke akiinainatsaig, nuigtú pegkejan pegkegchauwa nunash takainatsaig tiuwai. Aatus Apajuí etegkeamua duka uminui, ni wajuk wakegawa nunisag, uchi takainamujin diijus dutikachui. ¹³ Dutiksag agagbaunmash: “Jacopan aneakun, Esaunak dakitajai”, tawai.

¹⁴ Ashí wi tajim nuna anentaimas diisag, Apajuí makichkin etegkeak, tikichin idaya nunak pegkegchaunap takawa taushkam amainai. Tujash makichkish Apajuik pegkegchaunak takachui. ¹⁵ Apajuí Moisesan chichajak: “Wika, wi wakegamujun wait anenjatnaitjai”, tiuwai. ¹⁶ Apajuik nunin asa aents etegtuati tusa wakegaidau asamtaigkish etegkeatsui, nuniachkush niina shiig awajkatatus senchi takau asamtaigkish etegkeatsui; Apajuik nigki nagkami ni aents wait anenjata tabaujiya nuna wait anentawai. ¹⁷ Nunisag Apajuí chichame yaunchuk agagbauwa nuwishkam dekamtijamji. Nu agagbaunum Apajuí Egipto apujin chichajak: “Wi aminak apu emamjame, atum dutikashminun atumi nugkemin iwainakun, wi shiig senchigtinaitag nunak aents aidan iwaintukta tau asan. Nuna dutikattag nunak ashí aents nugkanmaya aidash mina dekajuatnume tabaunum dutikattajai”, tibau awai. ¹⁸ Nuaduú dekainaji Apajuik ni wakegamun wait anenta duka. Tuja aents intimkiti tusa wakegakush dutiksag intimtikawai.

Apajuik judío aents aidan tuja judiuchu aents aidanash wait anentawai

¹⁹ Tujash atum tujutmainaitjume: “Apajuí ni aatus nuna dutikayatkush ¿wagka aents pegkegchaun takaagtaish anmainchau anigme tusash tawa? ¿Ya Apajuí wakegak dutikaunash, aikawaipa tumainaita?” ²⁰ Atum nunin anentaimutigmin tajime: “Makichik aentskesh Apajuin: ¿Wagka jusha jutikame?”, tudaimainuk atsawai. Duwe jukí ichinak najanamush, aentsun pempeentuki: “¿Wagka juní

najatuaume”, tumainkaih? Nunak makichkish tumaitsui. ²¹ Aents duwen takauwa duka, ni wakegamujin diisá najanmainai, nunú duwea duwik amamuk jistatin takastinun najanak, tikichnak ichinak wainka takastinun najanmainai.

²² Nunin asamtai ame Apajuijai tudaimainuk makichkish atsawai. Ni Apajuí wakegakug aentsun suwimkan suwak niina senchijin iwainakta takug dutikmainai. Apajuí, aents suwimkan juinak megkaejatin aina nuna emamkes dakastatus wakegakush dutikmainai. ²³ Apajuik aatus emamkemas aentsun dakak, niina imanji anentai jegagmainchauwa nunak iwainmamui. Nunak ni aents wait anenjatasa wakejukbau aina nunú wait anentamunum dutikawai. Nunú aidaun Apajuí wijai pujustinme tusa wakegau asa, niina imanji tuke atina nui pujustinme tusa emtikak etegjauwai. ²⁴ Dutikamu aina nuwiyag jutii ainaji. Jutiinak Apajuí midau atinme tujabiu asa niinu etamkajui. Tujash jutii ainag nuwiyag, imá judío ainag nuwiyagkek ainatsji, atum judiuchu aents aina nuwiyatigmeshkam ainagme. ²⁵ Juna pachis yaunchuk Apajuí tiuwa nuna, Apajuí etsegtin Oseas agagbaunum:

“Yaunchkesh mina aentsjuchu aajakú aidaunash: ‘Mina aentsjuitme’ titinaitjai,

duwikish aneeshtaijua nuna: ‘Mina anetaijú’ titinaitjai”, tawai.

²⁶ Junashkam Apajuí tibaun Oseas agajui:

“Nunú nugka nui Apajuí: ‘Atumek mina aentsjuchu ainagme’, tiuwa nu nugkanmag batsatunak makichik tsawantai:

‘Atumek, Apajuí tuke pujuwa nuna uchijí ainawai’ tama atinaitjume”, tiuwai.

²⁷ Nuigtushkam Isaías ii muunji aajakajua nuna tiuwai Israel aidautin pachipas: “Israelan uchijí wegantu aidauti shiig kuashat nayantsa kamatkajiya ibau ainakuishkam, ayatak wajumketi ayamjuka uwentikjamu agtinaitji, ²⁸ wagki Apuk, ni tibaujiya nunak waamak ashí nugkanum umiktatui”, tiuwai. ²⁹ Nunak Isaías duke makichik tsawantai nuniktinun yaunchuk nagkaemakiuwa nunin ema junash agak:

“Apu ashí senchigtina nu,

jutiin wait anenjamjachuitkuig,

yamaikiuchia juwik Sodomamaya aentsun,

Gomorranmaya aents aidaujai ijinauwa numamtuk awajam amainaitji.

Tujash nigka wait anenkagtau asa,

jutiiní akiina yujaktina nuwiyan

iwaaku pujustinme tusa idaisauwai”, tiuwai.

Apajuí dutikamua nuwi aents kajinas anentaimaina nuna, Apajuik pegkeg ainagme tawai

³⁰ Ashí wi tajim nu anentaimsa diisaik, judiuchu aidauk Apajuí emtin pegkeja iman wantinkatasag kakanmamjachu aina, nunap Apajuí diisag pegkeja iman diisajuita tumainaitji. Ditak Apajuí dutikamujiya nuwi kajinas anentaimaidau asag pegkeg diyaam asajui. ³¹ Tujash mina pataag Israel aents aina duka, chicham umiktin aina nuna ausajui umiktatus wakegaidau asag, nu nuniamunmas Apajuí pegkeg diigmasajainta tuidau asag. Aatus kakanmamainakush chicham

umiktina nuwiyanak egaidau asag, nunú chicham umiktina nu yai-jatmainjig atsuju asamtai, Apajuí emtinig pegkeg diyamak asachajui. ³² Tujash ¿Wagka nunash nunikajuita? Nunak Apajuí dutikamujiya nuwi kajinas anentaimtsuk, dita takasbaujin Apajuí emtin pegkeg diyaam atasag wakegaidau asag nunikajui. Nunidau asag Kristuk dita diismak kaya tukumká iyaumain tutitag aama numamtuk aajakui. Niina dakituidau asag, aents jintá kaya pujaun tukumama numamtuk wajakajui. ³³ Aatus Apajuí chichame agagbaunum Kristu pachis Apajuí tibau tawai:

“Shiig puyatjusjum antuktajum,
wi Siognum* apusattajai makichik aentsun,
kaya aputua jega jegamkatasa atsumtayama numamtin atinun.
Nunú kaya nunak kuashat aents tukumak iyajagtinaí.
Tujash nuanuí kajinas ekeemsaju aidauk
dita kajintsá anentaimtusbaujinak
makichkish wainkag juwakchatnai.”

10

Apajuik ashí aents Jisukristui kajinas anentaimaina nuna pegkeg ainawai tawai

¹ Mina yatsug, ubag Kristui dekaskeapi tiu aidauwah, wika mina pataag Israel aents aidau dekaskeapi tuinatsu nunú uwemjatnume tusan senchi wakegau asan Apajuinash senchi aujtuinajai. ² Wika ditanak shiig wainin asan tajai: Ditak Apajuí umigkagtatus kakanmamainawai, nuninayatak Apajuinu dekaskea nuna shiig dekainatsui. ³ Ditak shiig dekainatsui, Apajuish niina emtin aents pegkeja iman, bakumamainchau wantinkati takush utugkeawa nunak. Ditak, chicham umiktina nu umiktasa kakanmabaunum Apajuí emtin pegkeg diyaam atajai tau asag, Apajuí pegkeg atinme tusash wajuk dutikawa nunak dakituinak pachikchajui. ⁴ Apajuik yaunchkek chicham umiktinnak susajui nuna umiagtai pegkeg ainagme titatus. Tujash duka Kristu tauwa duwi nagkamas chicham umiktina nuna umiagtai, pegkeg ainagme titag tiuwa duka nagkankauwai. Yamaik ayatak Kristu dutikauwa nuwig kajinas anentaimaidau pegkeg ainagme tama agtatui, tiuwai.

⁵ Chicham umiamunum, Apajuí pegkeg diiyam amaina nuna pachis Moisés juna agajui: “Aents chicham umiktina nuna imatiksag umiauk, nu umiamua duwik tuke pujutnai” tusa. ⁶ Tujash Apajuí dutikamua nuwi kajinas anentaimaidau, Apajuí pegkeg diiyá nuna pachis agakug tawai: “Makichkitigmekesh wainkajum: ‘Yanak aents nayaimpinum wamainun wakata’, tiag tusagmek tiigpajum” tawai. Nunú aaja anentaimainakuik, “Iina uwemtijamjatin Kristu yakí pujau wajuká nugká itawagmi”, tumaina nunin asamtai. Tujash Kristuk nugká tauwai. ⁷ Nuniachkugmesh makichkitigmekesh wainkajum: “Yaki jakau aidau batsamtain akaikia tiigpajum” tawai. Nunú aaja anentaimainakuik, “Aents jakau batsamtainum Kristu pujau jegají, jukí iwakagmi” tumaina nunin asamtai. Tujash Kristuk aneantui. ⁸ Nunú Apajuí chichame agagbau tawa duka dekaske, duka aatus tawai:

* **9:33** “Sión” tawa duka: 1. Jega Apajuí ememattai Jerusalén aajakua nuna tawai. 2. Yaakat Jerusalegkan pachisashkam tawai.

“Apajuí chichame etsegbau atumek antuku asajum, wajuk Apajuí chichamen antukag tumainuk atsugtamjume, wagki atumi wenimin adaibaunum, atumi anentaimin anentaibaunum awai”, tawai. Nunú chichama nuuwai, jutii pachisa etsejuinag nu. Nunú chichamak, Apajuí dutikauwa nuwi kajintsá anentaimainai tawai. ⁹ Ame tikich aents aidau ujaakum: Jisusai mina Apujuk, tusam kajintsam Apajuiyap Jisusnak jakau aidaunmayanash inankiuwaita takumek uwemjau atinaitme. ¹⁰ Ayatak Jisukristui kajintsá anentaimtamunum Apajuik pegkeg ainagme tujamji. Tuja, Jisusak mina Apujui, tabaunum Apajuí uwemtijamainaji.

¹¹ Aikasag Apajuí chichame agagbauwa nui: “Ashí aents niini kajas anentaimaidauk dita kajintsá anentaimtusbaujinak makichkish wainkag juwakchatnai” tawai. ¹² Nunak jutii judío aidautin, judiuchu aents aidaunashkam betek taku tawai, wagki Apuk makichkiuchi ashí aents aidau Apujiya duka. Nigka shiig pegkeg senchigtina ibau asa, ashí aents aidaunak yaimainai. Nunin asa ashí ya niina segawa nunak shiig anentus yayawai. ¹³ Duka agagbau: “Ashí aents Apu Jisukristun uwemtijugta tusa segauk, uwemjagtin ainawai”, tawai. ¹⁴ Tujash aents juna taush amainai: ¿Wajuk segatnumki uwemtijugta tusash, Jisukristui kajas anentaimainachush? Tuja ¿Wajuk niinish kajintsash anentaimsatnumki, chicham ni pachisa etsegbau antukchajua aniaush? ¿Nuigtush wajuk antuktinmegki niina pachis etseju atsa aniaish? ¹⁵ ¿Wajuk etsekatnumki Kristu pachisa etsegkata tusa awemachbau aidaush? Apajuí chichame agagbaunum: “Tikima shiig pegkejai, chicham pegkeja nuna pachis etsejak taa duka”, tawai.

¹⁶ Aents nuna aatus tuidaunak, wika aatsan tumainaitjai: Kristu pachis chichagkagtuktinuk aentsuk awemamui, tujash aents nu chichagkagtamun antukaja nuwiyag ashí betekak dekaskeapi tuinat-sui. Dutiksag Apajuí etsegtin Isaías yaunchuk pujujukua dushakam anentain idagmas: “Apuh, jutii chichagkagtamun antukaja nuwiyag imaanik dekaskeapi tauk atsawai”, tiuwai. ¹⁷ Nunú dekamtijamji, chicham etsegbau antuka Jisukristui kajintsá anentaimat nagkamna nuna. Tuja nunú chicham antamua duka, Jisukristu pachisa etsejuinamu antag nuuwai.

¹⁸ Tujash wi iniastajime: Nunash ¿dekaskek chichamnash antukchaju aina, tikich aidau antukchaji tuina nunash? ¡Dekaskenum antukaju ainawai! Wagki Apajuí chichame agagbauwa nuwig: “Chichamak ashí nugkanum etsegkamui”, tawai.

¹⁹ Ataktushkam iniastajime: ¿Dekaskek mina pataag Israel aidaush dekaachu aina tikich aents tuina nunisag? Duka nuninchauwai. Dekatkauk Moisés yaunchuk pujujukua nu jutii Israel aents aidautin pachipas Apajuí tujabaun agak tujamui:

“Israel aentschau nu nugkanmag batsamchau aidaun yayakun atumnak akasbau emattajime.

Atum aents dekachu aidau tajum nuna yayakun kajemtikattajime”, tiuwai.

²⁰ Dutiksag Isaías Apajuí etsegtujukua dushakam, uminkatnun pachis Apajuí tibaun tutupit tiuwai:

“Aents mina egatú wajakchau aidau, waitkaju ainawai.

Tuja aents mina pachitus iniimjutú wajakchau aidaunum, iwainmamkauwaitjai”, tusa.

²¹ Junashkam Apajuí jutii Israel aents aidautin pachipas:

“Ashí tsawantái dakasjai
mina aentsug intimkiu ai aimtau aina nuna,
wajukag pujutjin yapajiawaja
nunikagmatai shiig anentsan jukiag tusan”, tiuwai.

11

Israel aents aina nuwiyán niini kájinás anentaimaidaun Apajuí etegkauwai

¹ Nuna Apajuí tujamiuwa nuna anentaimtusan tajime: ¿Apajuish niina aentsji Israel aidautinash idaitamsau asamtaig, tikich aents aidaush, Apajuik idaisauwai tujamain aina? ¡Duka nuninchauwai! Wagki witjai Abraham wegantu, Israela uchijí Benjamín aajakua nu wegantu asan, Israel aents aina nuwiyánuk. ² Apajuik jutii Israel aents aidautinak yaunchuk, juka midau atinme tusa etegtamjau asa, ni aentsji aidautinak idaitamsachui. ¿Atumek eke dekatsjumek Apajuí chichame agagbaunum, Elías Apajuí etsegtin aajakua nu, Israel aents aidau pegkegchau dutikamujin Apajuin ujaak: ³ “Apuh, chichamjumin etsejin aidaunak ashí kajekgag, ame altarjumnash yumpuajag, wiki juwakmatai minashkam mantuatus aintuinawai”, tiuwa duka? ⁴ Tama Apajuí ayaak: “Wi siete mil aents mina umigtin aidaun ayamjukan uwemtijajai, apajimtai Baal tutaya nuna eme anentus tikishmatug emematchaju aidaun”, tiuwai. ⁵ Yamaishkam nunisaik wajumketi juwakji jutii Israel aents aidauti, Apajuí wait anenjamag, jujú uwemkatnume tusa etegjamu aidauti. ⁶ Nunú wait anenjá etegjamu aidautik, jutii pegkeg takasbaujinig etegjamu ainatsji, wagki aents pegkeg takasbaujin diigsá etegtaiyaitkuig, Apajuí wait anenkagtutajig atsumainai.

⁷ Nunin asamtaish ¿wajintu anentaimtumainaitji? Ashí Israel aents aidauti Apajuí emtin pegkeg wantinkagtasá jutii kakanmamajakú aidautik nuwig jeganchau ainaji; tujash wajumak Israel ainag nuwiyatin Apajuí etegjamu ainag nuuti Apajuí emtinig pegkeg wantinkaju ainaji. Tuja nuniai ashí tikich aidaunak ditá anentaimtaji yapajitnash wakegainachu asagmatai, Apajuishkam dutiksag wakegainakush makichkish yapajinmainchau agtinme tusa idaisauwai. ⁸ Juna pachis Apajuí chichamen agagbaunum:

“Apajuí, Israel aents aidaunak
ditá wakaninia egamujinak
anentaimtuja dekaachmin emakui,
dutikamu asag yamaikish nuninuk ainawai,
jiinish wainmachua nunin,
antuinakush antakchauwa nunin atinme”, tawa nunisag.

⁹ Aikasag Apu David aajakua nu agagbaunmashkam:

“Dita shiig aneasa juwakta tuinamua duke ditanak,
iwagtukbau dawenum jigká emetmaina numamtuk awajkatnume.
Nuniachkush suwenum jigká maumaina numamtuk wajainak
suwimkan jukitnume.

¹⁰ Ditá anentaimtajinish

aents jiin bushapaju asa
 shiig wainmatsama numamtuk
 shiig antumainchau wajastinme,
 nuninak ashí dita waitiamujin
 aents kijinun yanakí punus wekaemaina numamtuk
 tuke waitin atinme”, tiuwai.

Apajuí judiuchu aents aidaunash uwemtikui

¹¹ Ashí jutii Israel aidauntinun pachisan tija nuanuish ¿Wajintu anentaimtumainaita? ¿Mina pataag aidautigmin pachipas kaya tukumtayama numamtuk wajakaje tawa nunash, numamtuk Apajuijaish tuke tupagkijaju asagminig tikich aents aidaush tujamainait? ¡Makichkish nunikchauwai! Mina pataag Israel aents aidaun intimainak Kristun dakituidau asagmatai, Apajuí atum judiuchu aidautigmin uwemtijamtan nagkabauwai. Nuna dutikak Apajuik mina pataag aidaunak akasmatjukti tusa wakegawai. ¹² Nunú mina pataag aidaun intimkimunum, Apajuí ashí aents judiuchu aidaun pegkegnum yaitan nagkabauwai. Dutikau asa: ¡Dekaskenum mina pataag aidaun ashí Apajuin umijagtaik, aan nagkaemas pegkegnum yaigtinai!

¹³ Nuaduí atum judiuchu aidautigmin tajime: Apajuí minak judiuchu aidaun chicham ujaktá tusa awetiuwai. Nunin asamtai wi takaag junak, Apajuin see takun shiig aneasan takaajai. ¹⁴ Wi judiuchu aidaunum aatus takaamun wainainak, mina pataag aidaun Apajuí akasmatchajaintash nuninak wajumkesh uwemjatneme tusan wakegajai. ¹⁵ Mina pataag judío aidaunak Apajuí idayak, nigki ashí aents judiuchu aidaunajish epegtuniauwei. Nuna aatus dutikauwa nuniau asa, makichkish anentaimtusaish tumainchaun ashí aentsdaun pegkejan dutikatnai, Apajuí ataktú mina pataag aidaun niina aentsji emaktina duwi. Dutikamu asa jakau ataktú nantamaina numamtuk wajakagtinai. ¹⁶ Ajak nagkamchak nejekaja nuwiya juuká Apajuí suwaji. Nunú dekamtijamji ashí juuktatag dushakam Apajuinua nuna. Aantsag Apajuinun pegkejan takastajai tusa ajak ajaamua dushakam kagkapeshe, kanaweshkam ashí Apajuinuk ainawai.

¹⁷ Nunú ajaka nuna kanawe aidaun wajumak tsupija utsagka, ikamia numí kanawe jukí dekas ajaknum ikakmau asa, nuna kagkapienian puwajin juwa numamtuk, Apajuí awajtamkaje atum judiuchu ainajum nuna jutii judío ainag nujai. Apajuí wajumak mina pataag aidaun idayak atum judiuchu ajuminig wait anenjamjaja duwi. Dutikamu asajum Apajuí duwik ashí pegkeg aidaun Abrangkan ashí ni wegantun anagkuauwa dushakam ditajai betekak jukiagtin ainagme. ¹⁸ Apajuí dutijamawaju asagmatai atum judiuchu aidautigmek, mina pataag judío aidaun nagkaesau pegkeja iman anentaimtumasjum ememaigpajum. Atum imá pegkeg anenmamkugmek adeagtajum, ikamia numi kanawe jukí ajaknum ikakmauwa nuwiyanak ajaka nuna kagkapeg puwajinak jumait sui. Ajaka nuna kagkapienian puwajinak ikamia numi kanawe ikakmauwa nunú juwawai.

¹⁹ Atum anentaimsagmek: “Tujash Apajuí judío aidaunak ajaka kanawe nejeashkui, tsupika ajaptayama numamtuk ditanak ut-sagkuajama, jutiiin ajaknum ikamaina numamtuk awajtamak”, tumainaitjume. ²⁰ Dekaske, ditak Kristu dekaskeapi tachamunmag dutikam asajui, tujash atumek imá kajintsá anentaibauwa duwik

uwentikamu ainagme. Dutikamu asajum emematsuk dekas ayatak kuitamamkatajum. ²¹ Mina pataag judío aidau dekas ajaka nuna kanawega numamtin aina nuna, kanawe tsupika ajaptayama numamtuk Apajuí awajkauwa nunin asa, atum ikamia numi kanawe ajaknum ikakmauwa numamtin ainajum, nunutijum ni umigchamak pegké idaitamsattagme. ²² Apajuí ashí dutika nu anentaimtustajum. Nunú ni dutikamua nu dekamtijamui nigka shiig wait anenkagtina nuna, nuigtú pegkegchau takaakjuminig suwimkan amastatjime tibaujinash betek umina nunashkam. Apajuik mina pataag judío aidau tupanjamu asa ditan idaisauwa duwi iwainmamkauwai ni pegkegchau takaakjuminig, suwimkan amastatjime tibaujinak betek umina nuna. Atum judiuchu aidautigminak Apajuí ni wait anenkagtamujin iwaintugmainawai. Nunak atumek Apajuiyai kajintsá anentaimkujum pegkeja duke takaakjum pujuagtai, Apajuí tuke wait anenjabiagti tusan tajime, nuniachkugmek numi kanawe tsupika ajaptaya numamtuk awajam aijum tusan. ²³ Tuja judío aents aidaushkam dita dekaskeapi tuchataijiya nuna idayagtaik, numi kanawe tsupika ajapamu juki duwik aajakbaunmag ikamaina numamtuk awajkagtinaí. Apajuik nunak dutikmainai, wagki shiig senchigtina ibau asa. ²⁴ Atumek judiuchu asajum ikamia numi kanawe tsupika juki, dekas ajaknum ikashtai aig ikamaina numamtuk Apajuí awajtamkaje, niina aentsji aina nui ijumjamak. Aan nagkaemas Apajuí mina pataag judío aidau ajak pegkejan kanawega iman aina nuna, ataktú niina aentsji aidaujai ijumjatnai. Numi kanawe tsupikbau aajakú ataktú niina numijinig ikamaina numamtuk awajkatnai Apajuí mina pataag judío aidaunak.

Apajuí niina aentsji Israel aidaunak uwemtijatnai

²⁵ Yatsug, ubag Jisusa nemajin aidauwah, Apajuí dutikatnuijn yaunchuk anentaimtusbau dekachbau aajakua nuna dekaatajum tusan wakegajai ememaijum tusan. Mina pataag Israel aina nuwiya Kristuwai kajinas anentaimainachu asagmatai, atum imá pegkeja iman dekapmamijum tusan tajime. Wajumak mina pataag Israel aidau Jisukristui kajinas anentaimainachu asagmatai, Apajuí machikish kajinas anentaimainchau emakui. Nunisag batsamas yaunchuk Apajuí judiuchu aina nuwiya midau atinme tusa emtika wainkamuji aidau ashí niinig kajinas anentaibau tsawan jegatna nuna ejeyagtinaí. ²⁶ Nu nunikmatai ashí Israel aidaunak Apajuí uwemtijatnai, nunú pachisa agagbaunum:

“Agkanmitkagtinuk Sión yaaktanum taa, Jacopa uchijí wegantu aidau pegkegchaujinak utsankatnai” tawai.

²⁷ Juna pachis chicham agagbaunum Apajuí:

“Jujuwai wi ditajai yamajam chicham umigdaikatnun dutikatnaitag duka, ditá tudaujin tsagkujatnaitag nu”, tawai.

²⁸ Yamaikishkam kuashat mina pataag judío aidauk yamajam chicham etsegbauwa nuna dakituidau asag, Apajuí shiwaji ainawai. Nunak atum uwemjatnume tabaunum nuninawai, tujash Apajuik ditanak etegkau asa aneawai, jutii muunji anagkauwa nuna anentaimtus. ²⁹ Apajuik shiig yupichu dutikmainun anenjauch sukag-tusbaujiya nunak awakchauwai, tuja aents ni etegkamuji aidaunash dakitjag idaichauwai. ³⁰ Atum judiuchu aidautigmek yaunchkek

Apajuí chichameg umigchau aajakuitjume, tujash yamaik mina pataag judío aidau Apajuí chichamen umijuinachu asamtai, Apajuí atumin wait anenjamjaje. ³¹ Atum umijakchauwaitjum nunisag yamai kuashat mina pataag aidaush Apajuinak umijuinatsui, nuniagtai Apajuí atumin wait anenjamjaje. Apajuí umijuinachbau asa idaisauwa nunak, atumin wait anenjamjauwa nunisag mina pataag judío aidaunash wait anenjata tau asa dutikauwai. ³² Apajuik ashí aentsnak umigtukchat- nume tusa idaisauwai, nunikagmatai ashí ijumag wait anenjata tau asa.

³³ ¡Apajuí dutikamua duka shiig muuntai, ni yachajiya dushakam nagkanmaitsui! ¡Nigka ashí wainnai, Apajuí anentaimejtajiya nuna wajuk dutikattawa, wagka dutikattawa, itugkatasaya dutikattawa nuna anentaimejtug ejemainuk makichkish atsawai! ¡Ni takaamujish anentaimejtuga ejeyi dekagmaitsui! ³⁴ Juna taja juka Apajuí chichamen agagbauwai: “¿Ya dekagmainaita Apu anentaibaujinash, nuniachkush, ya ju jutikata tusash jintinmainaita? ³⁵ ¿Ya yaunchkesh Apajuinash makichik wajiinash susauwaita minash aikasag sujustí tusash?” tawai. Makichkish atsawai. ³⁶ Ashí ni najankamu aina duka Apajuí aatus wakegau asamtai ainawai, nunú aidauk ashí ni shiig aneastinji ainawai. Nunin asamtai: ¡Ashí imá Apajuinak tuke ememattinme! Aatus atí.

12

Yamajam pujut

¹ Yatsug aidauh, ubag Jisusa nemajin aidauwah, Apajuí wait anenjamjau asagmatai atumi iyashmik Apajuí susatajum, Apajuí anentag sutaiya numamtuk, tusan segajime. Nunikjum imá nigki umigkujum, ashí ni wakeja duke imatiksagmek takaakjum pujustajum. Jutiik nuní Apajuik umigmajin ainaji. ² Atumek aents Apajuí nemagchau pujuina nujai betekak pujusaigpajum. Imá pegkeg Apajuiyai idaimam-satajum, nigki anentaimejtagmin yapagtugmak, pujutjumnash yapagtugmatnume. Dutijamawagmatai dekaattagme Apajuí wakegamujiya nu, pegkeg aidau, Apajuin shiig awagma nunú, nuigtú Apajuí pegkeg atinme tusa dutikauwa dusha wajuku amainaita dushakam.

³ Junak Apajuí wait anenjug chicham etsegkata tujutiú asamtai, ashí atumin tajime: Atumek tikich aidau nagkaesau anenmamigpajum. Duka nunitsuk ayatak atum dekaskenmash wajuku ainagme nuwig anentaimejtumastajum, atum kajintsá anentaibaunum Apajuí shiig yupichu dutikmainun anenjauch sujamsamu ajutjamaina nunisjumek. ⁴ Jumamtinai: Iina iyashig makichkitak kuashat akanjamu ajawai, tujash makichik takata nunakek takainatsui. ⁵ Anmamtuk jutiish, Jisusa nemajin aidauti kuashat ainayatku, Kristui ijunainakuik makichik iyashia nunin wegaji. Makichik iyashnumiag kuashat akanjamua nu pempentunisag atsumdayina numamtuk, makí makichkiti tikich aidaujaish pempentunisaik atsumdayinaji.

⁶ Makí makichik aidauti yupichu dutikatnun, Apajuí ni wajuk susatai tiuwaita dutiksag anenjauch amasajua, dutiksaik dutikawagmi. Ni Apajuí tabajin yupichu etsegtanum anenjauch susamuk, wajuk Apajuiyai kajintsá anentaibaujish awa, dutiksag dutikmainai. ⁷ Tuja tikich aentsun yain atí tusa Apajuí wakegat susamuk, dutiksag

shiig yaimainai. Apajuí yupichu jintinkagtuati tusa susamushkam, dutiksag jintinkagtumainai. ⁸ Aantsag anentai ichichkagtin atí tusa Apajuí yupichu dutikatin susamuk, nunisag ichichkagtugi. Aents atsubaun yaigtí tusa Apajuí wakegat susamushkam, wakegas dutikati. Kristu nemagnun apuji aidaushkam shiig puyatjus takastinme, aents waitiaun wait anentauskam aneas dutikati.

Kristu nemajin aidau umimainji

⁹ Tikich aidaujaish dekaskenum pempeentunikjum aneenitajum, dekas aneeniachiatkujum aneeninau wajukmaina nunitsuk. Pegkegchauwa duka shiig dakitakjum, pegkeja duke wakejusjum takau atajum. ¹⁰ Yatsut Kristu nemajin aidaujaig senchi aneenitajum. Nuigtushkam pempentunisjumek ajantusa niiniakjum aan nagkaemas ajantusa niiniamu iwaintuniktasajum kakanmamtajum.

¹¹ Senchi kakanmamsatajum Apajuí wakejusa takagsata tabaunum, dakik aigpajum.

¹² Shiig aneasjum pujustajum atum jukitin dakakjum pujau asajum. Waitiakjumesh Apajuiyaig emetmamjajum pujustajum. Apajuishkam tuke aujsagmeké atajum.

¹³ Jisukristu nemajin aidau atsumamuji waitkugmek, yaigtajum. Aents amina ijagtamsatatus minakuishkam, shiig anentsam awayata.

¹⁴ Aents waitkagmainakuish, Apajuí yaigtí tusajum segattajum. Pegkegchau chichagtsuk ayatak Apajuí yaigtí tusajum segattajum.

¹⁵ Aents shiig dakunkut pujaujaig, atumshakam ditajai dakujustajum, untsu aents waituinak buutuidaujaig, atumshakam ditajai ijuntsajum buuttajum.

¹⁶ Tikich aidaujaish eme anendaisajum niinistajum. Ememau aigpajum. Aantsagmek takatnumash betek yaimkatajum. Tikichin nagkaesau yacha imanuk anenmamigpa.

¹⁷ Amina pegkegchau awajtamaidaush dutiksamkek iikaipa. Duka nunitsuk, ashí tikich aidaush pegkejai tuina duke dutikatasajum kakanmamsatajum. ¹⁸ Senchi kakanmamsatajum, ashí tikich aidaujaish utugchat akuish, epegtunijum shiig agkan pujusta tabaunum.

¹⁹ Aneetaig yatsug aidauh, ubag aidauwah, atumkek iikmakaigpa, Apajuí idaitusta ni suwimkanak susati. Aatus Apajuí chichame agagbaunum: “Witjai aents tikichin pegkegchau awagbaun suwimkan suwaunuk, nunin asan aents pegkegchaunak wi suwimkan susattajai”, Apu Apajuí tiuwai. ²⁰ Atum dutikmainaitjum duka, Apajuí chichame agagbaunum:

“Amina shiwajum yapajakuish

yutai ajamsata,

kitamakuishkam umutaish ajamsata.

Ame aajam dutikamin,

amina pegkegchau awajtamin asa datsagtatui”, tawa juuwai.

²¹ Makichkitigmekesh pegkegchau takatnumag idaimamsaigpa, pegkegchauwa duka dekas pegkeg takaakjum depetkatajum.

13

Apu aidau umigkatajum

¹ Ashí jutiik apu aina nui sumimain ainaji. Makichik apukesh nigki nagkami: Wi apu atajai, tusa apu weuk atsawai. Ashí apu aina nunak Apajuí apu emakui. ² Nunin asantai nunú apua nui sumimtan dakituidauk, Apajuí apu atinme tawa nuna shiwagmainak nuninawai. Nuna dakitauk suwimkan jukiagtin ainawai. ³ Apu aina duka aents pegkejan takaidau ishamkati tusaik adaikashbau ainawai, untsu pegkegchau takaina nu apunak ishamainawai. Apu ishamkats pujustasam wakegakmek, shiig pujustá. Nuniamin apu aidaushkam eme anenjamas chichagtabiagtatui. ⁴ Ditak pegkeja nuna takastinme tusa Apajuí apusamu asag, aminak pegkegnum yaimpamainai. Untsu ame pegkegchau takaakmek, dekas apuk ishamainaitme. Wagki apuk, wainak suwimkan sukagtusti tusaik adaikashbau asag, pegkegchau takaina nuna suwimkan suwau asantai. ⁵ Pegkegchau takasbaunum suwimkan sujusai tamawaikik apuk umigmait sui. Nunitsuk jutiik apu umigmaitnuk dekaidau asaja dutiksaik umigmaitnuk. ⁶ Nuaduí apunu kuichik atin tibauwa dushakam dutiksagmek suwajume, apu aidauk Apajuí takat susamua nuna uminak Apajuin takajuidau asagmatai.

⁷ Makí makichkitijum dutikmain aina juka betek dutikatajum, wajuk akikmankati tibauwaita dutiksagmek akikmaktajum, tikich nugkanum waji aidau juki wayaamunmash, wajupa akikmakta tujamtatua duka dutiksagmek akikmaktajum, apu aidaush eme anentsajum ajantusjum diitajum.

Pegkegchau takat idaikujum tikichjaish aneenitajum

⁸ Makichik aentskesh diwimkaigpajum, diwimkagtukmesh akikmatskek idaisaigpajum. Imá makichki diwimkagtamú akikmamainchauk, pempeentuniki aneenita nuuwai. Nuaduí diwimkagtamú akikmamainchau asantai akikmá pujumaina numamtuk, tikich aidaujaish pempeentunikjum tuke aneenitajum. Wagki tikich aidau aneamua duwi chicham umiktajum tibauwa duka uminu asantai. ⁹ Apajuí chicham umiktajum tiuwa duka: “Tsanijinawaigpa, magk-agtuawaigpa, kasamkaigpa, tikichdauk wakejukaigpa”, tawai. Nuigtushkam kuashat tikich aidau umimain awai. “Amek anenmamsam tikich aidaushkam aneeta”, tawa nunú imatiksaik umiamunum, ashí chicham umiktinun tawa duka uminui. ¹⁰ Aents aneenit ajamuk, tikichnak pegkegchaunak takagmait sui. Nuniau asantai chicham umiktajum tibau umiamua duka, aneeniamua nuuwai.

¹¹ Nunin asantai jujú tawa duka umiktajum. Wagki atumek dekagme Kristu juwi taatnuji tsawantak namput wajaschae, jutii yama Kristu nemagkau aayag duwik imá dukap aayi. Tujash yamaik tsawantak tikima shiig jegawai, Apajuí uwemtijamjatna duka. Nuniau asantai atumshakam kajinkagmek batsamigpajum aneaku batsamsatajum. ¹² Kristu juwi ataktú tataik, kiyag au tsawauwama numamtuk wajaktinai. Nuaduí pegkegchau aidau takaakjum suwenum wekaemaina numamtuk wajainajum duka idaisatajum. Suntag aidau tsawai maaniatatus wegak maanitaiji aidau juki maania depetmaktatus uminama numamtuk umintsatajum, Apajuí wakega duke takaakjum. ¹³ Nuaduí yamai nagkamsaik shiig pujusagmi, aents tsawai wegaku shiig diis wekaemaina numamtuk. Ijunag yuwinamu wekaetusjum ayatak yuwa yuwakua wegakjum nampet batsamtajum duka idaisatajum, iyashnum takanit tunamatja pujugtash, jiyaniit yujagku tikichdau

diigsá iish imanuk atajai tukamá kajegtashkam. ¹⁴ Duka nunitsuk, Apu Jisukristu nemagkaju aidaush wajuk pujumaina ainawa nunisaik pujuinaku, iina iyashí pegkegchau takamtikta dushakam idaikuja, Apajuí wakeja duke umijuinaku pujusagmi.

14

Yatsut chicham patatmainchau

¹ Tikich aidau Kristui shiig kajinas anentaimainachu asag: Juna dutikaknuk pegkegchauwap wemainaitja, tuidau wainkugmek, atumesh niijai betek anenmamsam shiig antugkatajum, dita tuina nunú pachisjum jiyansuk. ² Awai aents: Yutái aidaunak ashí yumainaitjai tuidaush, nuniai tikich imatikas Kristui kajinas anentaimainachu asag nejenak yuwinatsui, nuninak ayatak ajakmamunmayanak yuwinawai. ³ Nuniau asamtai ashí yutai aidaun tinamag yuwina duka, tikich nuna yuwinachunash dakitmaitsui. Nunisag ashí tinamag yuwinatsu dushakam chichamnak patatmaitsui tinamag yuwina nunak, wagki Apajuí nunú aidaunak ashí niina aentsji emaku asamtai. ⁴ Nunin asamtai Apajuí ina nuuwai shiig takataish, tuja shiig takashtaish, tumaina duka, nunin aish ¿amesh ya asamea tikichi takagna dusha chichamash patatú wekaemainaitme? Apajuik senchigtina ibau asa niini kajinas anentaimaidaunak shiig pujustinme tusa yayamu asag pegkegnum iwainmamkagatui.

⁵ Tikichnashkam titajime: Aents tsawantan mamikis puyatjus diyau awai, nuniai tikich aidauk: Tsawantak ashí betekajama tuidaush ainawai. Makí makichik aents aidauk dita tsawantan wajuk anentaimtuinawa nunak dita anentaimtusbaujiya nunisag emetmamjati. ⁶ Makichik aents tsawantan mamikia: Wika jujú tsawantin Apajuin ememattajai, takug betek umiktí, nuna dutikak Apajuinak ememattatui. Nunisag ashí tinamag yuwina dushakam dutikatnume, nuna dutikainak Apajuinak ememattatui, wagki Apajuin see tusa yuwidau asag. Ashí tinamag yuwinatsu dushakam dutikatnume, nuna dutikak Apajuinak ememattatui, wagki ditashkam Apajuin see tusag yuwidau asag.

⁷ Wagki jutiik iík shiig awagmamkatasaiik pujatsji, jaakuishkam shiig awagmamkatasaiik jainatsji. ⁸ Nuaduí iwaaku pujakuik Kristu shiig awajkata tabaunum pujuinaji, jaakuishkam Kristu shiig awagmainaji. Nunin asaja iwaaku pujakuish, jaakuishkam imá Kristunuk ainaji. ⁹ Wagki Kristu maamuitak ataktú nantakiuwa nunak aents iwaaku aina nuna, nuigtú jakau aidaunashkam Apuji wajastatus nunikui.

¹⁰ Nunin asamtai tikich aidau amijai betek Kristu nemajuina duka, amek Apajuik shiig umigtsume tumaitsugme, nuigtush amijai betek Kristu nemajuina duka wainkaya nuninuk anentaimtumaitsugme, wagki ashí aents aidautik Apajuyai tuwaká ajin ni tujamtin asamtai. ¹¹ Wagki agagbaunum chichaak:

“Witjai dekas tuke pujuunuk’, Apajuí tawai.

Nuaduí ashí aents aidauk, tikishmatjucag emematjuinak: ‘Ametme dekas Apajuimek’, tujutiagtinaí.”

¹² Ashí jutii aidautik makí makichik iina Apajuí inimpakui, wajuk takasuitji dutiksaik ujaktinaitji.

*Tikich Kristu nemajuidau pegkegchau awajkaig tusa kuitamamain
(1 Co. 8.1-13)*

¹³ Nuaduí pempentunisaikik: Amek Apajuik shiig umigtsume, tudaimatsui. Dekas ayatak kuitamamkatajum amina tudau etamainchauwa nunin diisam takaamugmin tikich Kristu nemajuidauk: Juka tudau wemainapi, tuinayatak ame takaamun waipaku asag, niishkam dutiksag takakmá tudau wemainna duka takasaipa. ¹⁴ Wika Kristujai ijutkau asan dekas nunina nunak shiig dekajai, makichkish yutai aina duka pegkegchauchi. Untsu makichik aents ashí tinamjá yuwamuk pegkegchauwai takug imá niinigki nuninuk. ¹⁵ Makichik yatsut: Juna yuwaknuk tudauwap wemainaitja tusa anentaimtamu ame yuwamin waipak, anentaimak waitmaina duka dekas yuwawaipa, nuniachkumek anejatkum nuniatsme. Yatsum nuna waipak, niishkam dutiksag takakmá tunamag Apajuiyai tuke kanaak kanamaina nuninuk dutikawaipa, Kristu niinishkam mantamdau asamtai. ¹⁶ Nu atum: Ju yutai yuwakuish tudauk wemaitsuapi, tayatkugmesh yatsut Apajuin tupanmain wainkugmek idaisatajum, nuna diis tikich aidau pegkegchaun chichagtamkainum. ¹⁷ Apajuí jutii pujutin inajata nunak, wájí yuwaji, wájí umaji nuniajinkish dutikatsui. Nunak Wakaní Pegkeji jutiini puja nu yaimpasmatai pegkeg takaaku, agkan tikich aidaujaish shiig epegtunia pujaku, dakujusa pujag nuna inajatui. ¹⁸ Juna ashí imatiksag Kristu wakejamun umiidauk, Apajuin shiig awagmainawai. Nunidau asagmatai, tikich aents aidaush pegkeg ainawai tumain ainawai.

¹⁹ Nuniau asamtai ashí tikich aidaujaish agkan pujuinaku, pempentunisaik Kristuwai kajintsá anentaimat ichichtunimainaitji. ²⁰ Apajuí aentsnum pegkejan dutikauwa nunú, yutanum utugchat apujmaunum wainkaya nunin juwakai tuidau asaja. Dekaskenmag ashí yutai aina duka pegkeg ainawai, untsu pegkegchauwa duka aents ju yuwamuk tudauwapi tayatak yuwa nuuwai. ²¹ Nuaduí dekas nejek yumaitsume, umutaish nampemain kajiauk umumaitsume, nuniamin yatsum waipak, niishkam dutiksag takakmá pegkegchau we tau asam. ²² Ame: Wika ashí yutai aidaunak kajintsan yumainaitjai, tame duka Apajuí emtinish pegkejai. Aents juna yuwanush pegkegchawk wemaitsuajapi tusa anentaimtutsuk yuwaushkam, shiig aneas yumainai. ²³ Tujash utujimiatak yuwa duka, nigki suwimak jumainnak egatmamui, wagki juka tudauk ekagtumaitsuapi tusa kajinas anentaimas yuwachu asa. Ashí jutii dutikamu aina nunú: Pegkegchawk ekagtumaitsuapi, tusa kajintsá anentaimtsuk dutikamua duka tudauwai.

15

Tikich Kristu nemajuidaush pegkeg diiyamu aina duke dutikatajum

¹ Nuaduí jutii Apajuí wakega nunú shiig dekau aidautik, iik shiig aneasta tabauk egatmamtsuk, tikich aidau Apajuí wakegamun eke dekainachushkam shiig jintinmainaitji. ² Nuniaku tikich Kristu nemagkau aidaush shiig awajkatasa wakemainaitji, pegkegnum yayaku ditash Kristui kajintsá anentaimtanum ichichmamjatnume tusa. ³ Wagki, Kristukesh imá nigki shiig awagmamkatasag wakekachui, Apajuí chichame yaunchuk agagbauwa nui: “Apajuiyah, aents amina pegkegchaun chichagtamaina nunak, mina tujutuinaawai”,

tawai. ⁴ Wagki yaunchuk Apajuí chichame agagbauwa nui agakbauwa duka, jutiin jintinjamatin asamtai agakbauwai. Nunú chichama nujai ichichmamku, emetmamsa pujamunum Apajuí dakamuk ajutk-agtawai. ⁵ Apajuí emetmamja pujutan sukagtak ichichkagtina nu atumnash yaimpaktinme shiig anendaisa batsamtanum, Kristu Jisus jintinjamawajua nunisjumek pujusminjum. ⁶ Nuniakjum ashí betek ijuntsajum, Apajuí, iina Apuji Jisukristu Apajiya nunú ememattajum.

Judiuchu aidau yamajam chicham ujakbau

⁷ Nuniakjum pempentunisjumek shiig anendaisajum judaitajum, Kristu atumin Apajuin ememattinme tujamu asa, shiig aneas jujamkiajua nunisjumek. ⁸ Juna tajime: Kristu Jisusak judío aidautin yaimpaktatus tauwai, Apajuí iina muunji aidaun anagkauwa nuna umiktatus. Ni nuniak iwainakui Apajuí ni anagkaguamujinak betek umina nuna. ⁹ Nuigtushkam Kristuk tauwai, judiuchu aidaush Apajuí wait anenjamu asag, ditash Apajuin ememattinme tusa, agagbaunum: “Nuaduí Apajuiyah, wika judiuchu aidaujai ijuntsan amina emematkun, daagmin pachisan kantamjuatjame” tibauwa duwi.

¹⁰ Tikich agagbaunum tawai:

“Judiuchu aidautigmesh, judío Apajuí etegjamu asag Apajuí uchijí aina nujai dakujustajum.”

¹¹ Nuigtú tikich agagbaunmashkam:

“Ashí aents judiuchu aidautigmeshkam Apajuí emematkujum, ni imanjiya duke pachisjum chichastajum”, tawai.

¹² Tuja Isaías agakshakam:

“Isaí wegantunmaya atinai, ashí aents judiuchu aidaunmash inamjatnuk, nunitai ashí aentsuk imá niinak jintan niimjusagtinai”, tiuwai.

¹³ Apajuí niini mijamtsuk dakatan sukagtina nu, atum dekaskapi tautigminak shiig dakunkut pujutan amaaak, shiig agkan anentaimsa pujutnashkam amastinme. Dutijamainak Wakaní Pegkeji senchijiya nujai shiig senchi wakeesa Apajuí dakamaina nunash sujamsatnume.

¹⁴ Mina yatsug aidaush, ubag aidautigmeshkam, atumek pegkeg takaakjum tikich jintinmainush dekau asajum, pempentunisjumek chichagdaimain ainajum nunak shiig dekajai. ¹⁵ Nuniayatkun ju papiin agatjime, dekaskenum atum dekamtikata tabau ajuta nuna, tuke aneakuk atinme tau asan. Apajuí minak wait anenjuju asa, ¹⁶ judiuchu aidaush Kristu Jisus pachisam ujaktá, uwemjatnume tusa awetiuwai. Tibau asan yamajam chicham Apajuinua nuna judiuchu aidaunash ujaajai. Wakaní Pegkeji ditai takau asa pegkeg emakam, tudaugtuchu pujuinakui, Apajuí anentag suwamu pegkeja iman, Apajuí emtin ditanash pegkeg iwainakta tau asan.

¹⁷ Nuaduí wi Apajuí takaju asan eme anenmamainuk ajutui, Kristu Jisusan pachisan chichagkagtag duwi. ¹⁸ Wika tikichdaunakesh pachisan chichatsuk, Kristu judiuchu aidaush Apajuin umigkatnume tujutiwa nunak chichagkagtakun takasmajai. ¹⁹ Wakaní Pegkeji senchijin aents dutikmainchaunash iwainajan takaakun, Jerusalén nagkamsan etse etsekgawan Iliria nugkanmash Kristu pachisnuk ashí etsejajai. ²⁰ Aajan wika wekaesan takasjai, tuwí Kristu pachis

etsegekachaje nuwi, wagki tikich etsegekamunum wisha nuwig pataká chichagkagtutnak dakitau asan. ²¹ Ju chicham agagbau:

“Uwemtikagtin minawai tabaun aents tikich nugkanmaya tuke antukchaju,

nuigtú uwemtikagtinun chichamegkesh pachisa etsegbaunash antuchu aidau imapam antukagtinai,

uwemtikagtinun chichame etsegbaunak”, tawa jutiksanuk.

²² Nuna etsegekun pujau asan, atumin wainkatasan minitá takunush minimain dekapjachmaijai. ²³ Tujash yamaik juwi takamainuk atsugtau asantai, kuashat mijadai atumiin minitasan wakegá pujau asan, ²⁴ España wegakun atumin wainkatasan minittajai, nunikan atumin wainkan shiig aneasan nagkaemakuí, atum yainkatajum wi wemaina duka.

²⁵ Tujash yamaikik Jerusalén wegajai, Kristu nemajuidau waituidau yaigtin awa juna ejetuatasan. ²⁶ Junak yatsut Macedonianmaya, Acayanmaya aidaujai, Jerusalegnumia Jisukristun nemajuidau waituina nu yaigmí tusag wakeesag anenjauch ijumjaje. ²⁷ Juna wakegas pegkejan jutikaina junak, mina pataag judío Jisusa nemajin aina nu uwemtan pachisag judiuchu aidaunak ujakaje, dutikamu asag ditashkam mina pataag judío aidaunak dita atsumiagtaik yaimain ainawai. ²⁸ Nuna jukin Jerusalén jegaan, atsumaidaun susan ukuakun, España wegakun atumiin minittajai. ²⁹ Wika shiig dekajai, anuí atumiin taattag duwik shiig kuashat Jisukristu yaimpaktata nunak.

³⁰ Yatsug aidauh, ubag aidautigmeshkam, atumek Jisukristu iina Apujiya nu nemagjume. Nuniau asajum tikich aidaujaishkam pempeentunikjum aneeniajume, Wakaní Pegkejiya nunú yaimpasagmatai. Nunidau asagmin atumin segajime, mina pachittsagmesh Apajuí ajutgsatajum, ³¹ Judeanmaya pegkegchau aidau batsata nu utugchatan aputugmainnash agkanmitkajuati, tuja anentag ijumjamun Kristu nemajuidau Jerusalén batsataidaun ejetuattag nunashkam shiig anentus jukitnume tabaunum. ³² Wisha Apajuí wakegakuig, shiig aneasan atumiin taan ayamjatjai. ³³ Apajuí shiig agkan anentaimsa pujamu sukagtina nu atumjaish atí. Aatus atí.

16

Kumpamkagtamu

¹ Iina umayí Febe, yaakat Cencreanum Jisusa nemajuidau batsata nuanuí, niishkam dita atsumiagtai yaimna nuna awemag nunú,

² Jisukristu nemajin asantai, shiig anentsajum jukitajum. Jisukristu nemajin aidautish utugdaimainaita dutiksagmek, ashí ni atsumakuish yaigtajum. Nigka tikichnash kuashat yainai, nigki minash yaintui.

³ Priscila, Aquilajai kumpamjutuatajum, wi Kristu Jisusan pachisa etsegtaku wekagai yainkau aina nu. ⁴ Ditak, mina ayamjutuinaak pujutjin ishamainnum jegantaju aina duwi see tajai, imá wikik see tatsujai judiuchu aidau Jisusa nemagkaju aina dushakam see tuinawai. ⁵ Tuja niina jeen Jisusa nemajin aidau ijunaina dushakam kumpamjutuatajum, aiksagmek Epeneto mina aneetaijua dushakam, niyai Acayanmaya nagkamchak Jisusan nemagkauwa duka. ⁶ María atumin senchi yaimpakua dushakam kumpamjutuatajum, ⁷ aikasmek Andrónico, Juniasjai kumpamjutuatajum, ditak mina pataag ainawai,

nuigtush wijai betek achinkajui. Ditanak Jisusa jintintaiji aajakú aina dushakam shiig anentin ainawai. Wika eke Kristun nemagtsuk pujai, ditá Kristunak nemagkaju ainawai.

⁸ Dutiksamek Amplias, mina aneetaig iina Apuji Jisukristun nemaja dushakam kumpamjutuatajum. ⁹ Kumpamjutuatajum Urbano, wi Kristu Jisusan pachisan etsejai kuashat yainkauwa nu, tuja mina aneetaig Estaquischakam. ¹⁰ Aikasmek Apeles, Kristu dekas takag-tusti tibauwa nu, tuja Aristóbulo jeenia aidaush kumpamjutuatajum. ¹¹ Mina pataag Herodiogshakam kumpamjutuatajum, Narciso jeenia Apu Jisukristun nemajuina dushakam. ¹² Aikasmek Trifena, Trifosajai Jisukristu takatjin takainak batsata nu, tuja iina aneetai ubag Pérsida Apu Jisusdaun shiig senchi takasua dushakam kumpamjutuatajum. ¹³ Nuigtú Rufo, Apu Jisus etegkamua nu, tuja niina dukují minashkam tikima dukujua imana dushakam kumpamjutuatajum. ¹⁴ Aiksamek Asíncrito, Flegonte, Hermes, Patrobas, Hermas, nuigtushkam ashí yatsug ditajai ijutkau batsatina dushakam kumpamjutuatajum. ¹⁵ Dutiksamek Filólogo, Julia, Nereo, niina umayijai, Olimpaschakam, tuja ashí aents Jisukristu nemajin aidau nijai ijunag batsatina dushakam kumpamjutuatajum. ¹⁶ Atumek pempeentunijkum shiig anendaisajum kumpamdayatajum. Ashí Jisusa nemajin aidau kumpamjamainawai.

¹⁷ Yatsug aidauh, ubag aidautigmesh diiyaku atajum, atum Jisukristu chichame jintinkagtamú antukuitjum nuna yapajiwag jintinjamainakui kanakajum, nunin aidaujaig atumek ijunjaigpa. ¹⁸ Nunú aents aidauk ii Apuji Jisukristunak takajainatsui, dita wakejuinamun tuidau asag, chicham pegkegchi aujuinak shiig tsanuinawai imanisanentaimainachunak.

¹⁹ Ashí dekagtamainawai atum Jisukristu umigjum nunak, nuaduí shiig anejai. Nuniau asan utusajag pegkegchaunak takatsuk, aan nagkaemas pegkejan takainak pegkegnumak iwainmamkanum tusan wakegajai, ²⁰ nuniagmin Apajuí shiig agkan anentaimsa pujutan sukagtina nu waamak yaimpakatjume, iwanchin depetkatnume tusa. Dutijamsag iina Apuji Jisukristua dushakam wait anenjamag yaimpakatinme.

²¹ Timoteo, mina takatnum yainta nunú atumnash kumpamjamainawai. Tuja mina pataag Lucio, Jasón, Sosípater aina dushakam aikasag kumpamjamainawai.

²² Wika Terciowaitjai, wi agajai jujú papiinak, nuniau asan wishakam Apu Jisukristu daajin kumpamjime.

²³ Gayo wi niina jeen pujag dushakam kumpamjamainawai, ashí aents Jisusa nemagkau atsumiagtaish yaina nu. Erasto ju yaaktanum kuichkin kuitamna dushakam, iina yachi Cuartojai kumpamjamainawai. ²⁴ Iina Apuji Jisukristu wait anenkagtutaijiya dushakam ashí atumin ajutjamtinme. Aatus atí.

Inagnaku Apajuí emematbau

²⁵ Apajuí emematiagmi, wi yamajam chichama nuna Jisukristu pachisan jintintuauwaitjim nuwig pujustinme tusa kuitamjamaina nunú. Jujú yamajam chicham etsegbauwa juka, Apajuí nugkash najannatsaig yaunchuk dutikatjai tibau dekaachbauwa nuna Apajuí

iwainaka nuuwai. ²⁶ Yamai iwaintugmakji Apajuí etsegtin aajakajua nunú agajajua nunak, nuigtush Apajuí tuke pujuwa nuna ashí aents aidauk imá Jisukristunak kajinas anentaimtuinak umigkatnume tibauwa nunashkam.

²⁷ ¡Apajuí imá nigki yacha, ashí wajiin dekauwa nu emematiagmi Jisukristu daaji pachisa!

Aatus atí.

PABLO NAGKAMCHAKU PAPI' AGAJA CORINTONMAYA AIDAU AWETIMU

Pablo Corintonmaya aidau kumpabau

¹ Witjai Pabloitjai, minak Apajuí Kristu Jisusan etsegtukti tusa wakegau asa etegtua awetiuwai, yatsug Sóstenesjai pujusan, ² atum Jisusa nemajin yaakat Corinto batsatutigmin papiin agajan awetakun kumpanjime. Atumnak Jisukristu pegkemtijabijai mina aentsug atinme tusa, ashí tikich nugkanmaya aidaush Jisukristu daajin adayidau asamtai, ditanash, jutiinashkam Apujiya nunú. ³ Ii Apaji Apajuiya nu, iina Apuji Jisukristujai wait anenjamag, shiig agkan anentaimesa pujutan atumnash amastinme.

Pablo Apajuí see tabau

⁴ Tuke Apajuí see tusanké ajai atumin pachisan, atum Kristu Jisus nemajuidau asagmin, Apajuí wait anenjamajau asamtai. ⁵ Apajuik, Jisukristu dekaskapi tuidau asagmin, ashí pegkeg wakannumia aina nuna amasajui: Ashí chicham dekatan, yachametrnashkam. ⁶ Dutikamu asajum wi Kristu pachisan atumin jintintuawaitjim dushakam imanisag juwatjamkajui. ⁷ Nuniku asajum iina Apuji Jisukristu taatnuji dakakjum batsatjum duwik, Apajuí yupichu dutikmaina nuna sujústí tusagmek atsumatsjume. ⁸ Apajuí nigki kuitamjamkattagme, ii Apuji Jisukristu minitta duwish bakumamainchau agtinme tujamu asa. ⁹ Apajuik ni anagkagtuamujinak betek umina ibau asa, niina Uchiji Jisukristu iina Apujiya nujai ijutkau pujustinme tusa untsugmakajui.

Jisukristu nemajin kanainamu

¹⁰ Yatsug aidauh, ubag aidauh, iina Apuji Jisukristu wakega dutiksanuk segajime, wait aneasjum makichkia duke chichatajum, tupandaikajum batsamtsuk shiig ijutkau batsatkujum, makichkia duke anentaimektajum nuní nuninuk anentaimekau atajum. ¹¹ Mina yatsug aidauh, ubag aidauwah, atum ayatak pampandayá batsatbaun, Cloé patayí ujatkaaju asamtai tajime. ¹² Atumek makí makichkitijum chichaakjum: “Wika Pablon nemagnaitjai”, tajumin, tikich: “Wika Apolosan nemagnaitjai”, tai, tikich: “Wika Pedro nemagnaitjai” tuinai, tikich chichaidau: “Wika Kristu nemagnaitjai”, tajume. ¹³ ¿Kristush imaní kuashtak aajakuit? ¿Pablok atumin ayamjutpaktatus numinum achinag mantamdauwait? ¿Nuniachkugmesh Pablo daaji adasagmek yamimaju ainajum? ¹⁴ Wika atumnak yamigchauwaitjim duwi Apajuin see tajai, imá Crisponak, Gayojaig yamigmajai. ¹⁵ Nuaduí atumek, Pablo yamigbau asan niina nemagjai, tusagmek tujutmain ainatsjume. ¹⁶ Nuigtú Estéfanasa patayinash yamigmajai, nuigtuk dekatsjai tikichnash yamijuashitag nunak. ¹⁷ Minak Kristuk yamijatjata tusag awetichui, minak yamajam chicham etsegkata tusa awetiu asamtai, aents yachameagbaujin etsejin aina nuniatsjai, Kristu numinum achijam jakauwa nuna wainkaya nunin diisainum tau asan.

Apajuí dekatjiya duka aentsú dekatjiiaig betekchawai

¹⁸ Aents megkaejatin aina duka, Kristu numinum achinag mantamdauwa nu pachisa etsegbaunash wainak diinawai; tujash jutií uwemkaju ainag nunutinak, chichama duka Apajuí senchijiyai. ¹⁹ Ju aaja agagbauwa nui:

“Wi yacha aidaunak yachachu emaktatjai, dutikakun dekataijinash emegkatjattajai”, tawai.

²⁰ Apajuí dekatjiya nu, aentsú dekatjiya nunak imanchauch emae. Dutikamu asa, aents yacha aidau, chicham umiktinash jintinkagtin aidaush, tikichjaish chicham ataish imaakas chichau aidauk wainak juwaje. ²¹ Nunin asamtai aentsuk niina yachajin Apajuin dekatasag wakekachui, Apajuí niina yachajiya nuna iwainak, aentsuk chicham etsegbaun antukag dekaskeapi tuinak uwemjatnume tibau chicham etsegna nunak, ditak wainkaya nunin diinawai.

²² Mina pataag judío aidauk wainchatai iwainamun, nuigtú aents dutikmainchau iwainamun wainkatatus wakegainawai, nuninai judi-uchu aidauk yacha atatus wakegainawai. ²³ Tujash jutiik Kristu numinum achinag mantamdauwa nu pachisa etsejuinaji, nunak mina pataag judío aidauk pegkegchau diinawai, nuninai judiuchu aina duka, wainak chichama nunin antuinawai. ²⁴ Tujash Apajuí etegja uwemtikamu judío, griego aina nuwig; Kristuk Apajuí senchijí, nuigtú Apajuí yachajiya nuuwai. ²⁵ Kristu chichame etsegna duka, aents diismak imanchauwa nuninai, tujash aentsun dekatjiya nuna nagkaesauwai. Imanchauchia nunin wantinkushkam, ashí aents senchigtin aidaun anentaimtajin nagkaesauwai.

²⁶ Yatsug aidauh, atumek aents aidau diismak, yacha wajakin, apu chichame antugtai aina iman, eme anentsá diitai ainatsjum duka dekaamagme. ²⁷ Nunin ainagminig Apajuik, aents yacha aidaun inatsakta tau asa, aents wainkauchia nuna etegkauwai. Dutiksag aents chichame antugtai aidaun inatsaktatus, aents imanchauch aina nuna etegkauwai. ²⁸ Apajuik aents imanchauch anentaku jujú nugka juwig dakitjamu aidaun etegjauwai, aents eme anentai aina nuna imanchau emakta tau asa. ²⁹ Nunak Apajuik, ditak eme anenmaminum tau asa dutikauwai. ³⁰ Tujash Apajuí atumnak Kristu Jisusjai ijupajajui, dutijabau asamtai Kristui iina yachajig, nigki pegkeg etamak, pegkemtijami agkanmitkagbauwai. ³¹ Nuaduí, Apajuí chichamen chichaak: “Makichik aentskesh emematatus wakegawk, dekas Apu Apajuin ememattinme”, tibau awai.

2

Kristu achigbauwa nu pachisa etsegbau

¹ Yatsug aidauh, ubag aidauwah, wi atumin Apajuinun pachisan ujaktasan tauwaitag nunak, aents yacha shiig jintiag chichaman chichaaku aina imanun iwainmamkatasanuk taachbaijai. ² Wika atumjai pujubiag duwik, tikichnak pachisan chichatsuk, imá Jisukristu numinum achigbauwa nunak pachisan ujakbaijime. ³ Wika ejapeen wajantan atumi emtin chichaktakaman, sapigmakun chichamainchau dekapeakun puyatkan kujaibiajai. ⁴ Mina chichamjuk, wi chicham etsegbaushkam, aents yachameagbaujijai tikichin dekas nuninapi tumamtiktatus chichau aina nunitsuk, Wakani Pegkeji dekamtijamunum chichagkagtakun, senchijinash iwainakbaijai. ⁵ Atum Jisukristui

kajintsá anentaimauwa nunú, aentsú yachajiya duwi dekamtikamu aijum, dekas Apajuí senchijiya nujai dekamtikamu atinme tau asan.

Yaunchuk dekachbau aajakua nunak Wakaní Pegkeji dekamtijamauwai

⁶ Nuniyatku aents yaunchuk Apajuin nemajuk imagnis pujus Jisukristun umijuidauk, jutiishkam kuashat jintiaja ujaaji. Tujash duka jujú nugkanmaya aents aina nuwiya unuimagchamui. Apu inamaina nudaukesh atsui, duka waamak megkaejatin ainawai. ⁷ Jutiik Apajuí yachají yaunchuk dekachbau uukbau aajakua nu chichaji, nunak Apajuí nugkanash najantsuk ii shiig aneastinjin dutikauwai. ⁸ Nunak ju nugka juna apuji aidauk makichkish dekaachaju ainawai, nuna dekau ainakug iina Apuji dekas imana nunak achijag maachaju amain ainawai. ⁹ Tujash chicham agagbauwa nuanuig:

“Apajuik niina aneena nudaun umigkauwai, makichik aentskesh wainkachbaun, antutkesh antukchamun, anentaimtutkesh anentaimtuschamun”, tawai.

¹⁰ Tujash jutiinak Wakaní Pegkejiya nu dekamtijamauwai. Wakania nuuwai ashí shiig ejegag dekauk, Apajuinu makichkish shiig deka-mainchauwa nunashkam.

¹¹ ¿Tujash aents aidautikesh wajupatiya tikich anentaibaush deka-mainaitji? Aentstik makí makichkiti ii anentaibaujiya duka imá shiig dekainaji. Numamtuk Wakaní Pegkejiya duke dekawai Apajuí anentaibaujinak. ¹² Jutiik ju nugka juwiya aents unuimaina nu unuimatak ajutjamtsuji, Wakaní Pegkejiya nu jintinjamji, Apajuí wait anenjamag ashí amasbau aina nuna dekaati tujamu asa. ¹³ Jutii nunú pachisa chichainag duka, aents jintinjamamu unuimagbauk chichatsji, Wakaní Pegkeji jintinjamamu chichainaji. Nunidau asaja Apajuinu pachisaja jintinkagtuinag duka, Wakaní Pegkeji jintinjabauwa duke jintinkagtaji.

¹⁴ Tujash aents wakanin akiinachu aina duka, Wakaní Pegkejiya nuwiya pachisa chichamunak dakituinawai, wainkaya nunin diidau asag, nuigtush antumainchau dekapenawai Wakaní Pegkeji atsugbau asag. ¹⁵ Wakaní Pegkeji ajamua duke ashí jintinkagtamunak dekaskeapi tusag dekamainai; tujash nunú aentsnak makichkish nuninchauwai tumain ainatsui. ¹⁶ Chicham agagbaunum: “¿Ya Apu Apajuí anentaibaujinash dekagmainaita? ¡Makichkish Apajuí jintinmainuk atsawai!” tawai. Tujash jutiiyaitji Kristu anentaimtaiya nu anentaimkau aidautik.

3

Jutiik Apajuí takajin ainaji

¹ Yatsug aidau, ubag aidauh, wika atumnak Wakaní Pegkeji ajamu kuashat chichagmaina imatiksankek chichagmaitisujime. Aents Kristun nemagchau aina nujai betekak chichagmainaitjime, atumek Kristu nemagta nuwig uchuchia nunin asagmin. ² Ayatak jintintuabaijime shiig yupichuchin, uchi kuwijuch katsugman yumainchau asamtai muntsu amutiama numamtuk. Wagki atumek yutai katsugmak yumainchauwa nunin asagmin, yamaikishkam nuninuk ainagme. ³ Atumek tikichi pujutí diigsajum kajejagme, nuniakjum

maanitash maaniakjum, tupandaikajum batsatjume. Ju nuniakjum aents nayaimpinum wechatin aina nujai betekak pujutjum yapajitsuk batsatjume. ⁴ Atum: “Wika Pablon nemagnaitjai” tajumin, tikich chichau: “Wika Apolosan nemagnaitjai” tuinajum duka, eke Kristu nemagchau wajukmaina tu yujagme.

⁵ ¿Wisha wajimpaitja, Apolosash wajimpaita? Jutiik ayatak Apajuí takajin ainaji, nunin asá jutii chicham etsegbaunum, atuminish Kristui kajintsá anentaimat ajutjamsajui, duka Apajuí makí makichik dutikata tujabauwa dutiksaik takasaju ainaji. ⁶ Wi atumin Apajuí chichamen ujakuitjim nunak, ajak ajatiama numamtuk atumí anentaiminig egketuauwaitjime. Wi dutikamunum nui Apolos patagak chichaman ujakajua nunak, ajak ajamu yumi jukí ukattayama numamtuk awajtamkajui, tujash Apajuiyai ashí ajakan tsapapauk. Nunin asa nigki atumnashkam Kristuig dekaskeapi tumamtijabiuwai. ⁷ Nunin asamtai ajakan ajau, yumii ajakan ukatjau aina duka wainkayai, Apajuiyai dekas ashí ajakmakbaun tsakapa duka. ⁸ Wika Apolosjaig mai betekaitjai, nunin asajin Apajuí iina takatjin diigtamas makí makichik akigmaktinai. ⁹ Apajuí takatjiya nunú takagtanmag Apolosak minak kumpajui; tujash atumek Apajuí ajakji, nuigtú Apajuí jeega numamtin ainagme. ¹⁰ Apajuí wait anenjug, Kristu chichame etseg-tukta tujutiwa duwi, wika aents jega jegamtan yacha jegamkatatus nagkamak shugkú ajiyama numamtuk, wi Kristu pachisan nagkamsan atumnak jintintuauwaitjime. Tikich nui ekeniag emainawai, tujash makí makichik kuitamas jegamaina numamtuk, Apajuí chichamenak shiig jintinjamain ainawai. ¹¹ Jisukristu pachisa etsegkamua duka, jega jegamkatasa nagkamku ajitiama numamtuk awajkamua asamtai, patakaik tikichik ajimaitsu numamtinai. ¹² Nunú jegamkatasa ajiagbauwa nui ekenag aents jegá jegamak, ayatak oroik, dutikashkush kaya pegkeg aidauwai, numiikish, tagkanaikish, dukaikish jegamkamua numamtin aidauk, ¹³ makí makichik takasbau dekabau tsawan atina duwi, ashí paan wantinjatnai, wajiyai jegamkamuita nunú. Ashí takasbau aidauk jiyai apetiama numamtuk dekaeamua agtinai. ¹⁴ Tuja jegamkamua nunú esakchamtaig, nuna jegamkauwa duka akiam atinai. ¹⁵ Tuja ni takasbauji esagkamuk wainak juwaktinai; nuniaigkish niig uwemjatnai, jega esatai jiiinmaina numamtuk.

¹⁶ Atumek dekaagme Apajuí jeega nunin asagmin, Wakaní Pegkeji atumin pujugtama nunú. ¹⁷ Makichik aentskesh chicham dekaskechun jintinjamawag, jega tegamaina numamtuk awajtamkajunak, Apajuí suwimkan susatnai. Wagki, atumek Apajuí jeega numamtin asagmin, Apajuí Pegkegma nu atumin pujugtamjum nuaduí.

¹⁸ Makichikitigmekesh tsanuam aigpajum. Atum ainajum anuiyatijum, ju nugkanmaya unuimatai aina nu ashí dekauwa iman dekapmamutigmek, dekachua nunin atajum, dekas yacha atasa wakegakjumek. ¹⁹ Ju nugkanmaya yachameta duka, Apajuí diismak shiig wainkayai, agagbau aatus tawai: “Apajuik aents yacha aina nuna yachajiin ebetjawai, dita dutikatatus anentaimtuina nuna dutikawainum tusa.” ²⁰ Junashkam David agak: “Apu Apajuí diismak yacha aidau anentaimtajig tikima wainkayai”, tiuwei. ²¹ Nuaduí makichik aentskesh, tikich aentsun pachisag: Wika nuna nemagnaitjai, tusag ememamain ainatsui. Wagki, jujú aidauk ashí atumdau ainawai: ²² Wishakam,

Apoloschkam, Pedroschkam, nugka dushakam, pujutash, jaamushkam, atum yamai pujajum dushakam, atak atina dushakam. Ashí ju aidauk atumdau ainawai, ²³ tuja atumetjume Kristunu aidautigmek, untsu Kristuwai Apajuinuk.

4

Jisus chicham etsegtugkata tusa awemamu aidaun takatji

¹ Atumek jutiik Jisukristun takajin aina nuninuk anenkagtumain ainagme. Jutiinak Apajuí ni duwik anagkagtuamun iwainkag-tukchauwa nuna yamai etsekkata tusa awetabijui. ² Aents tikichin takaja duka, ju dutikata tibauwa nuna imatiksag umiak, kajittsá diyaam amaina nunak iwainmamainai. ³ Apu Jisukristua nu minak awetau asa, nigki mina takatjunashkam, dekas pegkejashit tusa diistatui. Atum mina anentaimjutjum nunak wika pachiamsjai. Dutiksanuk tikich aents aidau mina pachitus chichainakuishkam idajjai. Wikik: Wi dekas pegkejan takasjai, tumaitsujai. ⁴ Mina pegkegchau anentaimtamu atsugta nuniaigkish, pegkejaitme tamak amaitsujai, tujash mina tujutmaina duka, imá iina Apujiya duke. ⁵ Nuaduí atumek makichik aentskesh nuniktinai tusagmek tiigpa, ayatak dakastajum Jisukristu juwi taa, suwenum au tsaaptinum jitiama numamtuk, aentsú anentaimtajin aunak shiig paan iwainakui wainkatnaitji. Dutika Apajuí makí makichik aentsdaun diijus shiig aneastinjin susatnai.

Corintonmaya aidau ditak emematmamainamu

⁶ Yatsug aidauh, ubag aidauh, midaun, Apolosdaujai pachisan tajim junak, ditash Apajuí chichame agagbau tawa nuna ewagak anentaimtsuk, jutiinu diis unuimajagti tusan tajime. Atumin iwaintukmaijim nuna tajime, makichkia nu eme anentsá diiyakjum, tikichia nu junik diisajjum tau asan. ⁷ Atumnash ¿ya tikichin nagkaesau pegkejash etabiae? ¿Apajuí amaschamush waji ajutjamainawa? Ashí Apajuí amasajua nuniaish, ¿wagka atumek jukiwu nunin anenmamkugmesh ememagme?

⁸ Atum anentaimtumasjumek: Jutiik Apajuí chichameg shiig dekaidau asaja, tikich jintinjuati tusaik atsumatsji, tajume. Atumek apujai betek batsatu asajum jutiik atsumkagatsjume. Atumesh dekas apu waigkagminig, jutiish atumjai betekak inaamainaitji. ⁹ Jutii Kristu chichame etsegtugkatajum tusa ishiakbau aidautik, Apajuí idaitamsantais mantamnati tusa chichaman umigtamkaje dekapmamaji. Nunin asajin aents ju nugka juwiya aidauk, nayaimpinmaya aents aidaushkam, wakejumainun iwainakui diistasa wakejutiamanumamtuk diigmainawai. ¹⁰ Jutiik Kristu aneaku, ni pachisa etsegtamunum anentainkachua nunin diyaam ainaji, tujash atumek Kristu nemajuidau asajum, shiig anentaimkau ainagme. Jutii kakakchau ainajin, atumek chicham antugtai ainagme, jutiinak wainkauch diigmainak, atumin eme anenjammas diigmainawai. ¹¹ Yamaikishkam jutiik nujantai, kitakaish, nugkumain atsugtamuish suwinaji, aents aidaush tutitag awajtamainawai, ii emetnaja pujutaish atsugtmainawai. ¹² Jutii uwejenig takai takainakua pimpikiagji, pegkegchau chichagta-mainakuish pegkegnamak chichajuinaji, waitkagmainakuish katsuntuinaji. ¹³ Jutiin pachipasag pegkegchau chichagta-mainakuish, ayatak

wait anentsá chichajuinaji. Yamaikish ju nugka juwig ajapamua nunin diigmainak dakitjamainawai.

¹⁴ Junak idatsagtasankesh agattsujime, atumnak mina uchig aneetaig anentsan ichichjatasan agatjime. ¹⁵ Atum Kristu nemaju asagmin, diez mil jintinkagtin ajutjamkush apak kuashtak amaitsui. Atumi apanuk witjai, wagki yamajam chicham wi etsegbau antukjum, Kristu dekaskeapi tusajum nemagkau asagmin. ¹⁶ Nunin asagmin segajime, wi pujag junisjumek pujustajum tusan.

¹⁷ Nuaduí Timoteo mina uchijua iman aneetaig, Apajuin shiig umigna nuna awetajime, wi Jisusa nemajin asanush wajuk pujuwaitja, nuigtush wajuk jintinkagtinaitja ashí yantamnum wekaesan Apajuí nemajin aidau batsatbaunmash, nunashkam ujakpaktinme tusan. ¹⁸ Atum ainajum anuiya emebaush ainawai, mina auk atumnak tajutjamashitinaí tujutu asag. ¹⁹ Tujash wika Apu Jisukristu wakegakuig wamkes minittajai, nunikan wi anuí taakun dekaattajai, nunú aents ememak tu yujaina dusha dekas Apajuinun takainakpash tuina, atsa ayatak chichainak tuinatsush nuna. ²⁰ Apajuí jutiin inajata nunak, ayatak chichamaikik inajattsui, niina Wakaní wakega dutiksag takastinme tusa senchijijai inajatui. ²¹ ¿Wají wakegagme, taa suwimkan sujamsati, nuniachkush taa wait anenjamag shiig aujtamsatnume tajumek?

5

Kristu nemagkau pegkegchaun takaakuish itugmainaita

¹ Antukjai atum ainajum anuiya ni dukujimkamujinak tsanijima pujuju tabaun. Duka tikima pegkegchawai. Aents Kristu nemagchaukesh nunak nuninatsui. ² Nuniaig atumek ememá batsatjume. Dekas atumek wake besemag batsatkujum, aanú aents dukujimkamujin tsanijima pujuja anka jiiikjum awemamainaitjume. ³ Wi atumjai ijunja pujachkunush wakannumag ijutkajai, nunin asan wi anuí pujusan aents nunikun tumainaitag nuna tajai: ⁴ Atum Apu Jisukristu senchijiya nujai ijuntatjum nuanuig, wisha Apu Jisukristu senchijin mina wakanjuig atumjai ijutkau atatjai; ⁵ nu aentsuk jiiikí ajapeakjum iwanch idaitustajum, dutikam ni nuna iyashin suwimkan susam waitiak, pujutjin yapajia Jisukristu minitaish uwemjati.

⁶ Atumek nuninun takau pujaigkik ememasjumek anentaimtumamaitisugme. Atumek dekagme: “Pag najanayasa nanegbauwa duka, levadura piipich ajuntuamuitak ashí utujá wampushmitkama duka.” ⁷ Levadura pagkan itugmaina numamtuk, atumin aanú emestamaina duka jiiikjum ajapatajum. Atumek jista Pascuatin pag levaduragtuchu yutaya numamtin tudaugtuchu atajum tusa tajime, wagki iina Pascuaji Kristuk jutiini mantamdau asamtai. ⁸ Nunin asamtai ii yaunchuk pegkegchau takajakuitag nunisaik pujusá Kristu ememattsuk, pag levaduragtuchu Pascuatin yujakbauwa numamtuk, dekaskenum emematiagmi.

⁹ Wi duwik papiin agajan awetibiajim duwishkam, tsanijimtan idayinatsu nujaiig ijunjaigpajum tibaijime. ¹⁰ Wika junak: Anuí aents Kristun nemagchau aidau tsanijimtan batsamtin, ekagbau, suji, kasa, apajimatasa dakumkamun emematin batsataina nujai tupandaikatajum, tusanuk tichabiajime. ¿Wajuk tupandaijatagmeki ju nugka juwi batsamsagmesh! ¹¹ Nunak, Aents Jisukristu nemaju

asa: Yatsut ainaji, tayatak pegkegchau takaak, tsanijimtanak wekaetin, sujitnash suji, apajimtai dakumkamun emematin, tikichin wainak tsanumjin, nampen, kasamin aina nujaig ijunmaitsugme, tusan wika tibaijime. Nunin aents aidaujaig ijunjagmek yutakesh yumain ainatsjume. ¹² Wika Apajuí nemajuinatsu nunak suwimak susatajum tumaitsujime. Untsu Jisusa nemajin aidautik, tikich pegkegchaun takainakuig pempeentunikiaja suwimkak sudaimainaitji. ¹³ Apajuí nemajuinatsu nunak Apajuí titatui, nunin asantai atumiin pegkegchau takau puja duka jiiki ajapatajum.

6

Kristu nemajin aidauk chichamnak ditak epegmainai tibau

¹ ¿Wagka atumesh, mai Jisukristu nemagkauwaitkugmesh chicham aepjuniagmesh, tikich apu Jisukristun anentaimtuchu aina dusha, ni chichagtamkati tusagmesh wejagme? Dekas aents nunin wejutsuk, atum Jisukristu nemagkau aidautigmek, shiig chichasjum chichamak epegmain ainagme. ² Ashí Apajuinu aidauk atakea duwi apu waigkag, tikichin diitin ainawai tibau awai. Nunú iman waigtinaitag nuaduí, yamaya juwikishkam chicham imanchau ajutjamainakuig, atumek epegkeajum idaimainaitjume. ³ Jushakam adeagtajum. Jutiik tsawan nagkankatna duwi nagkamsaik, ii apu waigkaja, nayaimpinmaya aents aidauh jutiik diinaku inatin ainaji. Nunú iman aidauh dutikatnaitag nunin aish, ¿wagka atumin chicham machik ajutjamkuish shiig atumek epegkeatsjume? ⁴ Atumek ju nugka juwi maaniumu akuish, aents Jisusa nemagchau aidauk wejumaitsugme ni chichaman epegtujuati tusagmek. ⁵ Junak datsamas dekapsatnume tusan tajime ¿Atum Apajuí nemajin ainajum anuiyag, yatsut chicham epegtan yachak makichkish atsau asamtaig, ⁶ mai Apajuí nemagnuk pempeentunikiag, apu chichaman epegkin Apajuí nemagchau aidau emtinish jiyani yujaina?

⁷ Atum Jisukristu nemagkau aidautigmek pempeentunikjum maaniajum anka tikima pegkegchauwai. Maanitsuk chicham akuishkam ayatak katsunjá idaimainaitjume. Waitkagmainakuish pachitsuk idaimainaitjume, kasagtamainakuish jukiti tusam idaimainaitjume. Tujash nu aaja idaibauk pegkegchau amaina nuna nagkaesau pegkegchau aniagme. ⁸ Wi juna tajim juka atumek umitsuk, atum Jisukristu nemagkau ai aidautigmek pempeentunikjum maaniakjum, kasagdaitash imanik kasagdayajume.

⁹⁻¹⁰ ¿Atumek dekatsjumek aents nuna aatus takauk nayaimpinmag wayashtinai tawa duka? Shiig anentaimsajum diistajum pegkegchau takasaijum. Aents tsanijimtanak yujajin aidau, ekagbau aidau, mai aishmagkuk dutikdainushkam, apajimatasa dakumkamun emematin aidauh, kasamin aidauh, suji aidau, nampenchakam, chicham dekaskechunak tsanumnushkam, tsanumag kasamin aidauhkan Apajuí inamtaijinig wayachgtinai. ¹¹ Duwikik atumshakam nuna wi aentsun adaijag numamtinuk aajakuitjume. Nunintigminak atum Apu Jisukristu nemagkagmin, Wakani Pegkejiya nunú atumin egkemtugmajag pegkeg etabaijui. Kristu atumin tudaugminak ajapjutpau asantai, Apajuik atumnak pegkegma iman anentaimtugmajume.

Iina iyashig Apajuinui

¹² Ashí wájí aidaunak takamainaitjai, tujash ashí shiig awajtumain ainatsui, ashí wájí aidaunak takamainaitjai, tujash nunú depetukti tusanush idaimamaitsujai. ¹³ Jushakam: “Yutái aidauk wakenum egkematin ainawai, wakea duka yutai egkematna nuuwai”, tibauwa duka dekaske. Tujash nunak Apajuí mai emegkaktinai, iyashia duka nuwajai tsanijinati tusaik najanachbauwai, iyashik Apu Jisukristunui, tuja Apu Jisukristu iyashnak ni wakega dutiksag takamtiksatus wakegawai. ¹⁴ Apajuí niina senchijinig Apu Jisukristunak inankiuwa, dutijamsag jutiinashkam niina senchijinig inaantamkitnai.

¹⁵ Atumek dekagme, ashí jutii iyashí aina duka Kristu iyashí wegantui. Nuniau asamtai nuwa akiká takatai aina nuninjaig apatdaimaitsuji, ii nuniaku Kristu iyashí jukí, nunú nuwajai apatmáina numamtuk awagmamain asaja. ¹⁶ ¿Nuigtush dekatsjumek, makichik aentskesh nuwa akiká takatai aina nujai nuwenainakug, makichik iyashkea nunin wega duka? Apajuí chichame agagbaunmash aikasag: “Aents nuwenkujag makichik iyashia nunin wegawai”, tawai. ¹⁷ Jujai betekak, Apu Kristun nemajushkam makichik iyashkea nunin wegag, nunú wakannak juwinawai.

¹⁸ Tupanjatajum nuwajai tsanijimat, iyashnashkam pegkegchau etugtamna duka. Tikich pegkegchau aina duka iyashnak imatikag pegkegchau etugtamsui, tujash nuwajai takata nu imatijamui. ¹⁹ Atumin iyashmik Apajuin jeega numamtinai, nunin asamtai Wakaní Pegkejiya dushakam atumin pujawai. Nuaduí iyashmia duka atumdauchui. ²⁰ Apajuí ni Uchijí iina ayamjutupaktatus mantamdauwa nuna numpeen sumagmaku asamtai, yamaik niinu ainaji. Iina iyashin takaag duka, ii wakanin takaag nujai imá Apajuik emematbau amainai, ju jimaja juka Apajuinu asamtai.

7

Corintonmaya aidau nuwenbau pachisa iniibau shiig ujakbau

¹ Jukimjai atum mina papí awetugkujum nuwenbau pachisam inintsamujum nunashkam. Nuna pachisnuk dekas imá pegkejak nuwenmainchau ainawai tajai. ² Nunimain aig kuashat tsanijinaidau asamtai, makí makichik nuwentin amain ainawai. Nuwashkam nunisag makí makichik aishintin amainai. ³ Aishmag nuwentin aidauk, imá niina nuwejaig tsanimain ainawai; nunisag nuwa aidashkam, imá ni aishijaig tsanimainai. ⁴ Nuwa aishidau aina nuna iyashig, ni aishin iyashijai betek we; aishmagkun iyashiya dushakam, nuwe iyashijai betek ainawai. Nunin asag nuwá iyashig aishmagdauwai, tuja aishmagkun iyashí nuwanui. ⁵ Aishmagkush nuwentin, nuwash aishintin aidauk iyashnum tsanitnumag pempeentunikiajag dakitdaimain ainatsui. Untsu Apajuin aujsatasag mai shiig chichasag, nunikmi tusag, duwi machik tupandaimainai. Nuna nunikajash, iwanchia nu pegkegchaun takamtijusai tuidau asag, wamkes ataktú ijunmain ainawai.

⁶ Wika yatsug aidauh, dekas ju umiktajum tusanuk tumaitsujime, ayatak nunimain ainagme tusan tajime.

⁷ Wika ashí aishmag aidautigmek, wi nuwenchauwaitag junin atajum tumainaitjime; tujash Apajuí makí makichik wakeetanak

anenjauch amasajui, nuwena pujutnash, nuwenchau pujutnashkam; dutikamu asa makí makichik niimtin ainawai.

⁸ Tuja datsa, muntsujut, nuigtú nuwa waje, aishmag waje aidaunak, wi nuwenchauwaitag juninuk atajum tumainaitjai. ⁹ Tujash aents nuwajai takanitsuk shiig pujuschamin dekapeauk nuwenmainai, nuwajai takanita nunak anentaimtak waitú pujuig tau asa.

¹⁰ Untsu nuwedau aidaunak idaidaisainmegka tajai, tujash junak wi tatsujai, junak Apu Apajuí tibaun wishakam tajai. ¹¹ Tuja nuwa aishin ukuakug nematsuk pujustí, nunimainchauwaitkug aishijai chichaman iwajug pujustinme; aishmagkuk nuwenak idaimaitsui.

¹² Nuigtú tikich aidaun wi tajai, nunak Apajuí tatsui: Makichik yatsut Kristu nemajin, nuwa Apajuí nemagchaun ayaakuk, nuwa niijaig pujustatus wakeetaig, idaitsuk niijaig pujumainai. ¹³ Tuja nuwa Apajuí nemajin, aishi Apajuí nemagchauwaitak niijaig pujustatus wakeetaik ukukinmegka. ¹⁴ Wagki aishmag Apajuí nemagchauwa duka, niina nuweg Apajuí nemajin asamtai, niinashkam Apajuí yaimainai. Nunisag nuwa Apajuí nemagchauwa dushakam, aishmag Apajuí nemajin asamtai, niinashkam Apajuí yaimainai, nuninchau agtaik uchiji aina duka Apajuí nemagchau aina nuninu uchiji amain asagmatai. ¹⁵ Untsu Kristun nemagchaujai nuwenamu, idaidaisami tusa imatjamak idaimainai, nunik agkan juwamainai Kristun nemagnushkam, Apajuik shiig agkan batsamsatnume tusa etegjamu asag. ¹⁶ Nuwa Apajuí nemajin aishmag Apajuí nemagchaujai pujakush, nunú yaigmash pujutiin yapajia uwemainashit, duka dekamaitsui. Nunisaik aishmag Apajuí nemajin nuwa Apajuí nemagchaujai pujusash, ni nuwesh pujutiin yapajiash uwemainashit dushakam dekatsji.

¹⁷ Nunin asamtai makí makichkitigmin Apajuí wajuk wakeetan anenjauch amasajuita nunisjumek pujustajum. Atum wajuku pujautigmea Apu Jisus nemagkauwaitjume, duka nunisjumek amainaitjume. Junak wika tikich Jisusa nemajuidaunash ashí ujaajai. ¹⁸ Aents uchuchik pakaji ajapjuamu aidaushkam, nunisag pakaji ajapjuamu amainai, tuja ni dutikashbaushkam nuninuk amainai. ¹⁹ Wi pakaji ajapjuamuitag jama tusag anentaimtú pujumaitsui, pakaji ajapjuashbaushkam nunisag: Wi pakagkashmawaitag jama, tusa nunak anentaimtú pujumaitsui. Imá senchi anentaimtumaina duka, Apajuí wakejamu umikta tabauwa nuuwai. ²⁰ Makí makichik aentsuk, ni wajakunak Apajuish mina nemagtukta tusash etegjabi nuninuk amainai. ²¹ Wainka inaku waitkatai pujautijum Apajuí nemagkauwaitkumek, duka anentaimtú pujuigpa. Untsu ame agkan wemain akuig, duka dekas kakanmamsata jiinkitasam. ²² Atum wainka inaku waitkatai batsamin aidautigmin, Apajuí midau atajum tibau aidautigmek, yamaik agkan ainagme. Nunin asajum Apu Kristu wakega duke umiju asajum niina inake wajasugme. Antsagmek agkan pujautijum untsukbau aidautigminash, Apu Kristu inake awajtamsaje. ²³ Atumek Kristu niina numpen ukajua nuaduú sumakbau asajum, yamaik Apajuinu ainagme; Nunin asajum Kristua duke umigbaunum aentsú inaku waitkataiya nuninchau ainagme. ²⁴ Yatsug aidauh, ubag aidauwah, atum wajuk pujautigmea Apajuí nemagkauwaitjume, duka nuninuk amainaitjume.

²⁵ Untsu muntsujut, aishmag datsauch aidau dita chicham umimainji Apu tujutbauk atsugtawai; tujash wi anentaibaun tajai, Apajuí wait

anenjuju asamtai, imagnisa wekaesan taja juka antugtumain ainagme. ²⁶ Jutiik yamaya juwik tikima ishamaimum pujuiag juniau asá, máki makichik jutií aidautish wajuk pujajiki duka nunisaik pujumainaitji. ²⁷ Amina nuwem akuig idaisaipa. Nunisjumek nuwem atsakuishkam nuwem atinuk egá wekayipa. ²⁸ Tujash ame nuwenbaushkam pegkejai, nuwa agkanjam aishinbaushkam dushakam pegkejai, pegkegchaun takainakug nuniatsui. Nunin aig wi atum nuwenagmek imá senchi utugchatnum pujakjum waitmain asagmin, dekas nuna tujanjatnume tusan tajime junak.

²⁹ Yatsug aidauh, ubag aidauh, juna tita tajime: Tsawantak tikijuch wajasé, nunin asamtai nuwentin aidauk nuwenchau pujumaina nunisag pujumain ainawai, nuwen imá senchi uyumak Apajuin takatjin takatsuk idaitsuk. ³⁰ Atum wake besemag pujakjumesh, nuniachkugmesh shiig aneasjum pujakjumshakam, tuja wajijum imá senchi uyumakjumkesh, Apajuí takatjiya duka takatskek idaimaitsugme. ³¹ Aents ju nugka juwiya takatan takas kuichkin ju aidauhkam, imá nunak takaak Apajuin takatjinak kajimatkgid idaimaitsui, ju nugka juwiya waji aina duka ayatak megkagaidau asagmatai.

³² Wika wakegajai atumek nuwenat uyumá batsamtigpa tusan, aents nuwenchauk imá Apajuí takatjinak takastatus wakemainai. ³³ Nuwainaina duka niina nuwen shiig aneemtiksata tau asa, ju nugkaya takat aina nunak imá senchi uyumainawai. ³⁴ Nuwashkam nunisag ni aishintsuk agkanjam pujakug, ashí ni takaamunak niina pujutjijai Apajuin anagkua, niinak shiig awajkatatus Apajuí takatjiya nunak takainawai. Nunidau aishinawag aishin shiig aneemtiksatus, niina aishi wakejamunak takainak Apajuí takatjiya nunak imatikas puyatjatsui.

³⁵ Wika junak nuwenmaitsugme tusanuk tatsujime, ayatak pegkegnum yaigtasan, shiig eme anentsá diyaam Apajuish umigmmain aminum tusan tajime.

³⁶ Aents nawanjintin niina nawanjin: Nawantug tsakajé, nuwena imá shiig pujumainai, takug dekas sujumainai. Duka pegkegchauchi, pegkejai nu dutikamushkam. ³⁷ Tuja tikich aents ni chichaak: Wika mina nawanjunak aentsnum sujutsuk agkanjaman apusatai, takug nunashkam dutikmainai, ju dutikamush pegkeg asamtai. ³⁸ Nawanjin aentsnum sujauk pegkejai, tuja ni nawanjin aentsnum sujatsu nu imá pegkejai.

³⁹ Nuwa aishidau aina duka aishi iwaaku pujaigkik, aishi idayak tikichjaig aishinmaitsui. Aishi pujaigkik nuwak agkanchawai, untsu aishi jakamtaí agkanmagawai, nunik aents ni wakejuniamujaish nemamainai. Tujashkam aents Kristu nemagnujaig, nuninchaujaig nuwentsuk. ⁴⁰ Tujash wi diismak, nuwa wajemeag ataktuk nematsuk pujak imá shiig aneas pujumainai. Juka wi anentaibauwai, tujash Wakaní Pegkejiya, dushakam jutiksag anentaimu diyajai.

8

*Apajimtai aidau yutai anagkuamush yumainashit tusa iniimsamu
(Ro. 14.13-17)*

¹ Yamai juna agatjime, atum mina ininkujum: Apajimtai aina nunú yutai anagkuamu aina dusha yumainashit, tujutmaujum nuna ujaakun. Atumek juka dekainaji tuinajume. Duka dekaske, dekata duka pegkegchauchi, pegkejai dekatak, tujash dekata duka ayatak emematan sukagtawai. Nunimain asamtai, dekas emematsuk ayatak aneenita nuuwai imá pegkejak, nu nuniamu Apajuin takatjiya nuwish emtikagtau asamtai. ² Makichik aentskesh yacha iman anenmamuk eke dekatsui, tu dekas dekamainaita nunak. ³ Tujash aents Apajuin anea nunak, Apajuí shiig dekawai.

⁴ Yamai anentaimsagmi, apajimtai aina nu yutai anagkuamush yumainashit. Dekaske apajimtai aina duka wainkayai, pujutishkam atsujui. Nigka makichik aentsnakesh pegkegchawk emamaitsui. Duka dekas Apajuí ainatsui, Apajuia duka imá makichkiuchi. ⁵ Tikich aents aidauk: Ju nugka juwig kuashat apajuí ayawai, nayaimpinmashkam imanisag ayawai. Nu imaan apajuí ayau asamtai, apu jutiin diigmaku inapa dushakam imanik ayawai, tuinawai. ⁶ Tujash jutiik dekainaji, imá makichkiuchi iina Apají, iina najapa mayain egketjamak in-aantamkiuwa duka. Nuniau asamtai iina Apujiya dushakam imá makichkiuchi, duka Jisukristua nunuwai. Ni juwi ashí ayaa nunak najanak, pujutnash suwak, jutiinashkam sujamsauwai. Dutikamu asá iwaaku ainaji.

Aneenitajum tawa dusha wajukuita

⁷ Tujash ashí dekainatsui dekaskea nunak. Wajumak Apajuí nemajin aidau, apajimtai aina nu ememattan unuimatkaaju aajakaju asag, apajimtai yutai anagkuamun dekainayatak yuwinak, ditá anentaim-tajin: Apajimtai emematku yuwatsjiash tuidau asag, pegkegchauptap juniaja, tuinawai. ⁸ Apajuik ii yuwamua nuna diisag imá pegkejak diigmatsui, tuja yutai yuwakuish nuní pegkejak wemait-sui, yuwachkuish nuní pegkegchawk wemait-sui. ⁹ Tujash atum agkan anentaimkujum dutikajum nuna, tikich imanis kajinas anentaimainatsu nunú, pegkegchauptapita tayatak yuwak tudau weenum tusajum kuitamamkatajum. ¹⁰ Ame nunú dekayatkum apajimtai ijuntutainum ekeemsam yutaik, makichik yatsut imanis kajinas anentaimtsu nunú waipak, niish nunú apajimtai yutai anagkuamuk yumait-su nunin aig, nuna wakeejuk yumainai. ¹¹ Ame dekay-atkum nuniamin, yatsum Kristui imanis kajinas anentaimtsu nunú megkaemainai, Kristu niinish mantamdau aig. ¹² Yatsum shiig dekainatsu nu aaja nuniakjum pegkegchauptap emakjumek, atum Kristu tudau takagkujum nuniagme. ¹³ Nunin asamtai wi yuwamujun diis mina yatsug aidau, ubag aidashkam imanis kajinas anentaimchauptap asag pegkegchauptap wemainaitkuig, nejenak ajumaish yumait-sujai, mina yatsujun pegkegchauptap ejeentaig tau asan.

9

Pablo ni pujutjin Corintonmaya aents aidau iwaintamu

¹ Wika Kristu chicham etsegtugkata tusa awemamu asan agkantait-jai, Jisus iina Apujiya nunash wainkauwaitjai, nunin asamtai atumesh wi chicham etsegbau antukjum, Apu Kristuwai sujumankau ainagme. ² Tikichik minak: Kristu chicham etseggkata tusa awemamuchui

tujutuinaawai. Tujash atuminig nuninchauwaitjai, wika dekas Kristu awemamuapitja tumamjai, atumek wi chicham etsegbaunum Apu Kristujai ijutkau pujajum duwi.

³ Mina pegkegchaun tujutuina nuaduí ayamjumakun juna tajai: ⁴ Jutiishkam yutai, umutai atum sukagtamuk jumain ainaji. ⁵ Jutiish nuwennaitkuik, Pedron Jisus chicham etsegtugkatajun tusa awemamu, tikich Jisusa yachi aidaujai ditak nuwentin asag, chichaman etsegkatagtus mininakush nuweshkam Jisusa nemajin asagmatai, nuwejai miniina anmainaitji. ⁶ ¿Wikik, imá Bernabejaig atumek yaigchamu amainaitag? ⁷ ¿Yaá suntaja ditak akikmakash yu yujaame? ¿Yaita ajakan ajakma nejetaish yutsuk idainush? ¿Yaita uwijan kuitamiatak muntsujin umutsuk idainush?

⁸ ¿Junash wi aentsun anentaimesanuk taja? ¿Juna pachis chicham umiktina nui tatsuak? ⁹ Chicham umiktin Moisés agagbauwa nuwig: “Toro trigon dajag pakak wekaga nuna nuwig jigkatuawaipa”, tawai. ¿Apajuí toron puyatjau asag tiuwait, ¹⁰ jutiin pachipas taku tichaukaih? Nunak jutiin pachipas tu agajui. Jushakam anentaimesa shiig diistajum. Aents ajan ajama duka, ajakan juwaa dushakam dekas ajuttatuapi tabauwai takainawai. ¹¹ Jutiik aents ajakan ajakbau ajamaina numamtuk, Kristu chichamega dushakam atuminig etsegkauwaitji. Nunú chicham antukuitjum nunú atumí pujutjumin esetugmawag pegkeg etugtabiajui. Atumek ju chicham imag jintintuamu ainayatkujum, jutii yumainkesh sukagtuinatsjume. ¹² Tikich aidau atsumainakui atum yayajum dutiksaik jutiish yayam amainaitji.

Tujash jutiik duka: Yainkatajum tichabiajime, ashí waitiakuish katsunbaiji, yamajam chichaman Kristu pachisa etsegbauwa nuna shiig antumainchau ainum tabaunum. ¹³ Atumek shiig dekagme, jega Apajuí ememattainum takaidauk, aents ditá tudaujin tsagkug-nagtasag kuntin itaamun maawag altarnum apeenak, nuwiyanak nejeen yuujakú aina duka. ¹⁴ Dutiksag Apu Kristushkam yamajam chichama juna etsejuidauk, nunú chicham etsegbaun antujuina nunú yaigtinme tiuwai. ¹⁵ Wika nu tibau aigkish: Yainkatajum tichabiajime, juna agatjim junashkam kuichkin awetugtinme tusankesh agattsujime. Nunin asan wekaesan chichá chichagkagtakuan nujantai jakachain-jash tusanuk segajatchatnaitjai.

¹⁶ Wi yamajam chichama juna etsegkun ememamainjuk atsugtawai, wagki juka dekas atsumamu asantai umikta tabau ajutui, tuja yamajam chichama nuna etsegtsuk idaikunuk, shiig pegkegchaun nunimainaitjai! ¹⁷ Wi mina waketajuig takasuitkunuk akiam amainaitjai, tujash Apajuí inatkui takau asan, Apajuí dutikata tibauwa nuna umiakun dutikajai. ¹⁸ Nunin asan wi shiig juwamujua duka, yamajam chicham etsegbaunum akijuinatsaig wekaesá takata nu-uwai, nuaduí wika shiig aneasan wekaejai, wi chichagbau aidau akijuinachkuishkam.

Yamajam chicham etsegbaunum kakanmabau

¹⁹ Nuaduí tikichi inataigkesh achayatkun, ashí aentsun inakega nunin wajasjai, kuashat aents Kristun nemagkatnume tabaunum. ²⁰ Mina pataag judío aidaunum pujaknuk, wishakam nuninuk wegajai, tuja chicham umiktinun umí pujachiatkunush chichama umiina nunin wegajai, ditashkam Kristun nemagkatnume tabaunum, nunak

wika Kristu chicham umiktajum tibauwa nuna umiayatkun nuniajai. ²¹ Antsanuk judiuchu aidaujai pujaknush wishakam nuninuk wegajai, ditash Kristu nemagkatnume tabaunum, Apajúi chicham umiktajum tibauwa nunash umiayatkun, dekaskenmag Kristu chicham umiktá tibauwa nuna umiajai. ²² Aents Kristui imatikas kajinas anen-taimtuinachujai pujaknushkam, nuninuk wegajai, ditashkam nunisag Kristun wajumkesh nemagkag uwemjatnume tabaunum. Wi ashí nuniag nunak, wajumkesh Kristu nemagkag uwemjatnume tabaunum nuniajai. ²³ Junak yamajam chicham etsegkata tabaunum juniajai, wishakam atak ditajai betek ijunjatasan.

²⁴ Atumek dekagme, dekapdayamunum tupikainakug ashí betek tupikainayatak, makichik wagaktata nu wajinak juwame. Atumesh nunisjumek shiig pujusta tabaunum, waji jukitasa tupikaku wajuk-maina imanitajum. ²⁵ Makichik aents tupikamunum dekapdaisatin akug, kijin aidaun entsakig tupikaumaitsui. Ditak nunak atsejutai duka kagama nuna jukiagtatus imanin ainawai. Untsu Kristun nemajuinak kakanmamaina duka, atsejutai atakesh tuke atina nuna jukiagtinai. ²⁶ Nuaduí wika waji abaunum niiyá jegan jukitatus tupikauwama imaniajai. Nuniau asan mina iyashig pegkegchaun takamtijustatus wakegakuish, aents maanitan yacha, wainak iyatsuk shiig ijuwama imatikajai mina iyashjun suwimkan suwakun. ²⁷ Imatikau asan mina iyashjunak wi depetkin, ni wakejamunak takamtiktuk, wi wakejamunak takamtikjai. Wi chichaman etsejukturkun, wainka juwakaig tabaunum.

10

Israelnumia pachisa Kristu nemajuidau jintintuamu

¹ Yatsug aidauh, ubag aidauh, iina muunji aajakajua nunú, ashí yujagminum ijiam nayants kapantu tutainum katiajua nunú kajimatki-ijum tusan dakitajai. ² Nunikagmatai nayants katiamunmash, Moisesjai ijumag yujagkim ijikajui yuminum yamimatiamama numamtuk. ³ Nuigtushkam ashí ditak Apajúi yutai nayaimpinmaya awemamun yuwawajui. ⁴ Tuja umutnashkam kaya muunnumia yumi pukuni jiinkimtai, ashí umujakajui. Kristua duke ditajaishkam tuke aajakuí, nuniau asa niina Wakaninig dita yujainamunmash uyunajakuí. Nunú kayak Kristun iwainawai. ⁵ Tujash nuwiya kuashat aidau Apajuin shiig awajkachajui, nunikaju asag uwegshunum jinaa utsankajui.

⁶ Nunak jutii iwaintugmak nunikajui, dita waji pegkegchaun wakegajakú aina nunin ainum tusa. ⁷ Nuaduí atumek dita wajukawajua nunikjumek apajimtai dakumkamuk emematigpajum. Nuna pachis agagbau tawai: "Ashí aentsuk yuwinak, umuinak pekaamsajui, nunikag wajajag nantsemawajui." ⁸ Nunin asamtai atumek Pegkegchau Apajúi dakitamuk takasaigpajum, ditak tsanijinainak, nuigtú apajimtai aidaun emematú yujasag makichik tsawantaik veintitrés mil aents jinawajui. ⁹ Apu Kristush ekajkatag tusagmek wakejigpa. Yaunchuk wajumak aents Apajúi yutai suwamun kajejú yujas, Apajuin ekajek dapí ijinam asajui. ¹⁰ Apajuish pegkegchaunmag augmatigpajum. Yaunchuk wajumak aents Apajúi ashishmatú yujakmá, Apajúi awemamu nayaimpinmaya aents ijinam asajui.

¹¹ Nunú iina muunji nunikajua duka, jutiin iwaintugmaji. Nuaduí yamai tsawan inagnamunum batsatainag nunú aidautin, ditash nunikainum tusa anemtijamak agagbauwai. ¹² Nunin asantai atum shiig pujajai tuidautigmesh kuitamamkatajum, pegkegchau takasajum. ¹³ Atum pegkegchau takastasa wakegamu ajutjamkujai nagkaik-itasajum waitiajum nunak, ashí tikich aidaush nunisag waituinawai. Tujash imá Apajuyiaig kajinmasjum anentaimsatajum, nigka utugchat atum katsunmainchaunmag waittsati tusag idaitamsachagtatui, ayatak ame utugchatnum jegataish, Apajuí ame wajuk katsunjam nagkae-mainaitme nunak amastatui.

¹⁴ Nuaduí aneetaig yatsug aidauh, ubag aidauh, apajimtai dakumkamu emematta duka idaisatajum. ¹⁵ Juna tajim junak, atumek shiig antumain asagmin tajime. Juka shiig anentaimsajum atumek dekaatajum. ¹⁶ Copanum umutai awa nu, Jisukristu numpe ukaejamunum kuashat pegkeg jukiu ainag nuna iwaintugma nu, Apajuí see tusa umuinakuik, tikich Jisusa nemajuidaujaish ijunsa, Kristu numpe ukagbaunum ashí pegkeg aidau jukiu ainag duke anentaimtuinaku nuninaji. Tuja pag puuká yuwinag dushakam, Kristu mantamnamua duwi uwemat jukiu ainag nu, ashí ijunsa anentaimtuinaku nuninaji. ¹⁷ Kuashat aentsuitku makichik paagak ijuntuja puuká yuwinag duka, jutiik makichik iyashkea nunin ainaji tusa iwainmamku nuninui.

¹⁸ Israel aents aidaushkam uwijan maawag Apajuí tudaun tsagkug-tamjati tusag altarnum apeenak, nuwiyanak nejen ijuntug yujakaju ainawai. ¹⁹ Junak apajimtai aidauk wainak ainatsui, nuniachkush kuntinun maawag apajimtaiji aidaun anagkuina duka, tikich neje aidaun nagkagas pegkeg ainawai takunkesh tatsujai. ²⁰ Judiuchu aidau apajimtaiji aidaun kuntinun anagkuina nunak, wakan pegkegchauwa nuna aikainawai, Apajuinak aikainatsui. Nunin asantai atumesh nunú dutikakjum, wakan pegkegchaujai ijunjaijum tusan dakitakun tajime. ²¹ Nuaduí atumek, umutai copanmaya Apu Kristu anentaimtusa umutia nuwiya uwagjum, ajuma duwi umutai copanmaya wakan pegkegchau aina nudau umu wajamaitsugme; antsagmek yutai Apu Kristu anentaimtusa yuwatin mesanum awa nuwiya yuwajum, ajuma duwi wakan pegkegchau aina nudau mesanum awa nu yu wajamaitsugme.

²² ¿Apu Jisukristu ekajkata tusaik nunimainait? ¿Jutiish ni senchia ibaukaitag ni suwimkaji katsunmainnumash?

Ashí ii takaamuk Apajuí shiig awajkatasa takamainaitji

²³ Ashí takamainaitjai, tujash nu takaamua duka minak pegkejak etumaitsui. Ashí takamainaitjai, tujash duka tikich Apajuí nemajin aidaunak ashí yaimaitsui. ²⁴ Makichkish imá niinunak egatsuk, tikichin pegkegnum yaimaina nuna egamain ainawai.

²⁵ Ashí neje sumaka yuwakjumesh, apajimtai anagkuamuchukait tusagmek iniimsaigpa, wainka anentaimsajum; ²⁶ wagki, ju nugka juka, nuigtú ashí nugkanum ayaa dushakam Apajuinu asantai.

²⁷ Makichik aents Kristun nemagchau yutain ajamjamsatatus ipapamtai jegagmesh, ashí yutai amainamuk yuwatajum: ¿Apajimtai anagkuamuchukaih? tusá iniimtsuk, wainka anentaimsajum.

²⁸ Nuniagmin, tikich chichagtamak: Ju nejea juka apajimtai anagkua-mui tujamkuig yuwawaigpa, nu etsegkamtai dekau asam wainka anentaimsaikum. ²⁹ Junak atumnak tatsujime, tikich wainak anentaimsai tusan tajime.

Wi shiig agkan anentaimsan nuniamujun tikich aents pegkegchau anentaiyai diyamak amainchawaitjai. ³⁰ Wi yuwakun Apajuin see tusan yuwaig, tikich aidauk pegkegchaunak chichagtumain ainatsui, wi Apajuin see tusan yuwau asamtai.

³¹ Ashí junin aidauk, yuwakjumshakam, umakjumes ashí tikich waji aidau takaakjumes, ashí Apajuí ememattsajum dutikatajum. ³² Makichkish tikichik pegkegchawk iwaintukaigpa, mina pataag judío aidaukesh, judiuchu aina dukesh, Jisusa nemajin aina dukeshkam. ³³ Wika atumnak, ashí wi takaamujua nuaduí, ashí shiig awajkatasan wakejajime, mina shiig awajta nunak dutiktsuk, tikichin pegkegnum yaimaina nuna dutikajai, ditash uwemjatnume tau asan.

11

Nuwa aidaush jega Apajuí ememattainum wainakush wajukmainaita

¹ Wi Kristu pujutin diisan niina nemajag antsagmek, atumshakam mina pujutug diisjum Kristu nemagkatajum.

² Mina yatsug aidauh, ubag aidauwah, shiig anentajime, tuke minash kajimatjutsuk, wi jintintuabijim dutiksagmek betek umiidau asagmin. ³ Tujash wakegajai ju shiig dekaatajum tusan, ashí aishmag aina duka Kristui sumitkau amain ainawai, nuwa aina dushakam aishin sumitkau amain ainawai, untsu Kristui Apajuiyai sumitkauwa duka. ⁴ Ashí aishmag Apajuí aujak, nuniachkush Apajuí chichamen etsejak buuken dukuauk Kristun eme anentus diiyachu asa nuniawai. ⁵ Tuja ashí nuwa aidau Apajuí aujak, nuniachkush Apajuí chichamen etsejak buuken dukuachuk, aishin eme anentus diiyachu asa nuniawai, intashin ashí awaju asa wajukmaina numamtuk wajau asa. ⁶ Nuwa buuken jaanchi dukuachuk, dekas imá pegkeg ashí intashinak awag ajapati. Untsu nuniamu datsan ataik jaanchi dukumakti.

⁷ Aishmag aidauk Apajuí niya numamtinuk najanamu asa, nuna senchijin iwaintukta tau asa, jaanchik buukenak dukumaitsui. Untsu nuwa aishmagnumia najanamu asa, niijai betekmamtinuk asa buukenak jaanchi dukumainai. ⁸ Apajuik aishmagnak nuwanmayan jukig najanachui, untsu nuwan aishmagnumian juki najanauwai. ⁹ Apajuik aishmag nuwan atsumau asamtai nuwanak najanauwai, nuwa aishmagkun atsumau asamtaig aishmagnak najanachui.

¹⁰ Nunin asamtai nuwak, Apajuí aentsji nayaimpinmaya aidaunash aishin sumimká pujamun iwaintukta tabaunum buukenak dukumain ainawai. ¹¹ Tujash Kristu nemagtanmag aishmagkuk nuwajainchuk amaitsui; aantsag nuwashkam aishmagjainchuk amaitsui. ¹² Apajuí nuwan aishmagnumian najanauwa nunisag, aishmagshakam nuwanmag akiinkauwai. Tujash duka ashí Apajuí najankamu ainawai.

¹³ ¿Atumesh pegkejai tumainkaitjum nuwa buuken jaanchi dukutsuk wajas Apajuin aujkuish? ¹⁴ Aishmag intashí esagmaitkush datsanmaitsui, ditak buuké jaanchi dukumaina nuna intashí esagmaitkush datsanmaitsui, ditak buuké jaanchi dukumaina nuna intashí ejatkati tibau asa. ¹⁶ Ju taji juna pachis makichik aentskesh shiig dekaashmin dekaapeau akuig,

ju pachisjum juka Apajuí emematku ijunku tuke aikatia tusajum ujaktajum.

Jisukristu mantamnamuji anentaimtusa yuwamu shiig dutikashbau

¹⁷ Tuja juna tikichin tajim junak shiig anentsan tatsujime, wagki dekas pegkegnum ijunmaina nu pegkegchaunum ijunu asagmin. ¹⁸ Antukjai, atum Jisusa nemajin aidautijum ijunjum nuwiyatijum, atú atumek tupandayinamun; nunak dekas nuninawapita tajai. ¹⁹ ¡Duka dekas tupandaimain ainagme, nuniamunum dekamainai yaita dekas Jisusa nemajin aidau nuninun anentaimainatsu dusha! ²⁰ Aaja tupandaika batsatiakujum, Apu Jisus anentaimtusa yuwawagmi tusajum ijunjum duka dekas nunimain nuniatsjume. ²¹ Apu Jisus anentaimtusa yuwawagmi tusa ijunbaunmag, makí makichik ni yuwatnuji itaamujin ditá eemak yuwinai, tikichik yapajayatak juwawai, nuniai tikichik nampedaush ainawai. ²² ¿Atumin jeemik atsugtamainawak, nui yuwajum umutaish uwagjum minimainuk? ¿Wagka Jisusa nemajin yumainji atsugbau aidau imanchau diyakjumes idatsagme? ¿Aniajum duwish wajintajimki? ¿Ememattsanuash anentaimtitijum? Aanú dutikajum nuwig ememattsankesh anentaimtumaitujime.

Jisus mina anentaimjutsajum yuwakjumek juni dutikatajum tibau
(Mt. 26.26-29; Mr. 14.22-25; Lc. 22.14-20)

²³ Wika Apu Jisus tujutbauwa dutiksanuk atumnash jintintuabiamjime: Apu Jisusak sujam asauwa nunú kashik, ²⁴ pagkan juki Apajin see ti puuká chichaak: “Jujú jukijum yuwatajum, juka mina iyashjua numamtinai. Ju iwainawai atumní wi mantamnattag nuna, juka tuke jutiksagmeké atin atajum mina anentaimjutkujum”, ²⁵ tusa ashí yuwawag vino copanum yajaam ekeemtatman juki: “Ju vino copanum awa juka, mina Apag yamagman mina numpajuí atum uwemkatnun anagamawajua nunú uminkatnun iwainawai. Ju tuke jutika umakjumek, mina anentaimjutsajum jutikatajum.” ²⁶ Nuaduí atumek pag yuwakjum, umutai copanmaya umakjumes, ni mantamnamujiya nu etsegtakjum dutikattagme, nunú dutikamua duka Apu Jisus taakui idaisatin asajum.

Jisukristu mantamnamuji anentaimtusa yuwamu imanchau diyamu

²⁷ Tuja nuna makichik aentskesh imanchau diyayatak pagkan yuwak, umutain copanmayan umauk, Jisusa iyashí, nuigtú niina numpe anentaimtusa dutikamu asamtai nigki bakumawai. ²⁸ Nuaduí eke pagkan yutsuk, umutnash umutsuk makí makichik pujutjin diimain ainawai. ²⁹ Apu Jisusa iyashí tawa nuna shiig dekatsuk, anentaimkas yuwak, umutnash umakug, ni suwimak juwaku waittsatnujin yuwak nunimainai. ³⁰ Atum ju betek umishtigmin kakakchau, jamantin waigkugme, ni jauk jakaje. ³¹ Nuniau asamtai: Wi pegkegchau takaamush atsugtawash, tusa shiig niimasa pujakuik, Apajuí suwimak suwamak amaitsuji. ³² Tujash Apajuí suwimkan sujamkug, aents Apajuiyai kajinas anentaimchau aidau atak suwimkan susatnaitag duwi, ditak suwimkan juki tabaunum unuimagti tusa aikagmamainai.

³³ Nuaduí mina yatsug aidauh, ubag aidauh, yuwatasa ijunkugmek dakanistajum. ³⁴ Ni yapajauk niina jeenig yuwa minimainai, ijunku shiig takaachbaunum Apajuí suwimkan sujusai tau asa. Tikich atum inintsamujum nunak anuí taan ujaktajime.

12

Yupichu dutikatnun Apajuí anenjauch sukagtusbau

¹ Yatsug aidauh, ubag aidauh, Apajuí yupichu dutikatnun sukagta nu dekaatajum tusan wakegajai.

² Atumek Kristu nemagtsuk batsamsagmek, wainmachu wajuk-maina nunikjum, apajimtai najanamu chichachu aina nunú emematu-jakuitjum duka dekagme. ³ Nuaduí yamai dekaatajum makichkish jun-inun tumain ainatsu nunú: Wakaní Pegkeji chichamtikbauk Jisusnak pegkegchauk chichagmait sui, “¡Jisusak dekas Apui!” taushkam nigki tatsui, Wakaní Pegkeji chichamtikam tawai.

⁴ Yupichu dutikatnun Apajuí anenjauch sukagtamuk makí makichik niimtin ainawai; tujash Wakaní Pegkejiya duke nunak dutikawai. ⁵ Takatash makí makichik niimtin ainawai; tujash duka Apu Jisusa duke takajiatku nuniaji. ⁶ Apajuik kuashat takatan makí makichik niimtinnun takamtikagtumainai. Dutikau asa aents aidaunak etegkeg makí makichik niina takatjin takamtikui. ⁷ Apajuik makí makichikitin Wakaní Pegkeji takamtikagta nunak sukagtawai, tikich aidaujaish pempeentunikiag yainikti tabaunum. ⁸ Wakaní Pegkeji sukagtawai shiig jintiaja chichatan, kuashat unuimata nunashkam; ⁹ tikichin suwawai shiig kajintsá anentaimtan, tikichin jau aidau etsagautan, ¹⁰ tikichin suwawai aents dutikmainchau iwainaktinun, tikichin Apajuí tabauji shiig etsegтанum, tikichin wájí wakan ajamak jintinkagtawa tusa dekatan, tikichin ii chichashtai aidau chichatan, tikichin nunú chichatai nuna taku tawai tusa etsegтutan. ¹¹ Tujash ashí ju aina junak, Wakaní Pegkejiya duke niina senchijin dutikawai, nuniau asa makí makichik aentsnak, Wakaní Pegkeji ni wajuk wakegawa dutiksag suwawai.

¹² Iina iyashí, kuashat akanjamu akushkam makichik iyashke, anmamtinketji jutiish Kristujaig. ¹³ Nuaduí ashí judío, judiuchu, tikichi takajin, agkan batsamin ainakuish Kristu nemajuinaku makichik Wakanik jukiaju asaja, makichik iyashia nunin wajasuitji. Ashí nunú aidautinak Wakaní Pegkeji pujugtamainawai.

¹⁴ Iyashik kuashat akanjamu ajawai; ¹⁵ nunina nuwiya dawe chichaak: “Wika uwejchau asan iyashnumiachuitjai”, takush ¿Iyashnumiachu asag tumainait? ¹⁶ Tuja kuwish chichaak: “Wika jiichu asan iyashnumiachuitjai”, takush ¿Iyashnumiachu asag tumainait? ¹⁷ Nuniachkush ashí iyashia ju, aya jiiketkuish ¿utusaya antumainaita? Tuja ashí iyashia ju ayatak kuwishik akuish ¿utusaya kugkuaush dekapmainaita? ¹⁸ Tujash Apajuí, ashí ju aidaunak, ni wakegamujin diis shiig batsakuí. ¹⁹ Ayatak anentaik ataish ¿Tuwí iyashish amainaita? ²⁰ Tujash kuashtai akanjamuk, nuninaitak makichik iyashke.

²¹ Jiik, uwegnak: “Wika aminak atsumatsjame” tumaitsui. Aantsag buukshakam, dawenak: “Wika atumnak atsumatsjime” tumaitsui.

²² Iina iyashinia ayaa nunú, imanisa atsumachbauwa nunin diyamu imá senchi atsumnawai. ²³ Iyashnumia imanchauwa nunin diyamua nu imá shiig kuitamnawai, tuja iyashnumia paan iwainamainchauwa duka shiig ejaká kuitamnawai, ²⁴ untsu iyash paan iwainamain aidauk dutiknatsui. Apajuí, iyashia nuwiya imanchauwa nunin diiyamua nuna dekas puyatjus diistinme, ²⁵ nuninak shiig ijunas atinme, nuniau

asag ashí pempentunisajag yainiktinme tusa dutikauwai. ²⁶ Aatus asamtaí iyashnumia akanjamu aina nuwiya makichik waittaik, ashí iyash waitiawai, tuja iina iyashinia waitia nunú puyatjusa kuitamjinig, ashí iyashik shiig najaimakas ainawai.

²⁷ Jumamtuk, atumek Kristu iyashí asajum, makí makichkitijum atum takastin akantugmauwaitjume. ²⁸ Apajuik adaijauwai Jisusa nemajin aidaunum takasagtinun, dekatkauk: Jisus chicham etsegtugkata tibau aidaun, Apajuí etsegtin atinun, jintinkagtuatnun, aents dutikmainchaun iwainaktinun, jau etsagagtinun, atsumamunum yaimkatnun, takatnum inamjatnun, chicham chichashtain chichaktin aidaunashkam. ²⁹ Ashí aentsuk beté betekak ainatsui: tikich nugkanmash yujas chichagkagtuktinush ainai, ni Apajuí etsegtuktinush awai, jintinkagtinush ai, ni aents dutikmainchaun iwainaktinush ainawai. ³⁰ Ni jau aidau etsagagtinush, tikich chichaman chichaktinush, nunú chichatai etsegtuktinush ainawai. Apajuí ni wakegamujin dutikatnume tusa aentsun akaantug susauwai. ³¹ Apajuí yupichu dutikatnun sukagtamu dekas imana nu jukitasajum kakanmamsatajum.

Tujash wi dekas imana nuna jintintuattajime.

13

Dekas anenka nu

¹ Wi ashí chicham aidaun chichau, Apajuí aentsji nayaimpinmaya aidau chichatainash chichau akunush anentak atsugtakuig, jiju nuniachkush awattai platillo tutai awatim tsantsantuwwama numamtuk wajamainaitjai. ² Wi Apajuí tabaujin shiig etsejin, tuja Apajuinu dekamainchauwa nunash shiig dekau, kuashat unuimaju, Apajuiyai kajintsá anentaibaunum ashí dutikmainush ajutu asamtaí, muja aidau-nash yajá inagkemain akunush, anentak atsugtakuig wainkayaitjai. ³ Ashí mina wajiig aidaun ujunauch ayujata tabaunum sujaknush; Kristu nemaju asan apea ajapeam akunush, anentak atsugtakuig wainkayaitjai.

⁴ Aents anejatnuk waitiakush katsuntug pjuuwai, wait anenkagtinai, tikichdau diisá wakegak kajé wekaechauwai, ni wagaaku atasash wakechauwai, ememachui; ⁵ dutikmainchau aidaun taká wekaetuchui, imá niinunak anentaímtú pujuchu, kajeta pujugchau, kajegkagtukbautak pujuchu; ⁶ tikich pegkegchaun takaagtaish shiig aneechu, untsu pegkejan takagtaik shiig aneas dakunkut pujawai. ⁷ Waitiakushkam tuke anejatnai, tikichin pegkegchajinak pachittsag chichatsuk pegkeginak pachitus chichagnai, dekaskeashit tusa kuitamas dekauwai, ashí pegkeg aidaunak dakauwai, pegkegchau awagmaku waitkamash katsunnai.

⁸ Apajuí chichame etsegbauk nagkankatnai, tikich chicham chichat aidaushkam nagkankatnai, unuimat aina dushakam nagkankagtinai. Tujash anenka duka tuke ashimnakchatnai. ⁹ Yamaiya juwik Apajuin chichameg machikiuch dekainaji, etseguish machik etsejuinaji. ¹⁰ Tujash tsawan jegatnai ashí dekamu atina nu, nunikmatai shiig dekaatnaitji yamai machik dekainag duka.

¹¹ Wi uchuch asanuk, chichaaknush, anentaímkunush, nunimainai takunush uchi wajukmaina nuniyajai. Tujash yamaik muun wenu,

uchí anentaimtainak anentaimtsuk, muunta anentaimtajin anentaim-jai. ¹² Yamaikik ispijunum diyaku tuujin waintayama numamtuk wainji, tujash tsawan jegamtai, Apajuijai shiig igkunisa wainiaktinaitji. Yamaikik machik dekainaji, tujash tsawan jegaku Apajuí jutiin shiig dekagma imatiksaik niiishkam shiig dekatnaitji.

¹³ Kampatum yamaik awai: Shiig kajintsá anentaimat, Apajuí dakamu, anenka dushakam. Ju kampatuma juwiyag anenka nuuwai imá senchi wagaakuk.

14

Apajuí chichame chichagkagtuta nu chicham antushtai chichamua nuna nagkaesauwai

¹ Anentak ajuttí tusajum kakanmamsatajum, nuniakjum atum yupichu dutikatnun Wakaní Pegkeji sukagta dusha jukitasajum wake-jitajum, imá senchi Apajuí tabau etsegta nunú. ² Chicham antushtain chichaina nunak, aentsun aujuinatsui Apajuin aujak tuinawai, nuaduí antujuinatsui Wakaní Pegkeji chicham antushtai tabaun chichau asamtai. ³ Untsu Apajuí tabaun etsejuina duka, ashí aentsun wakanin yayawai, dutikak pegkegnun wakemitkak anentainash ichichtawai. ⁴ Chicham antushtain chichaa duka, imá nigki jintinmamui; untsu Apajuí tabaun etseja nunú, Jisusa nemajin aidau wakanin yayawai.

⁵ Wakemainaitjai atumesh chicham antushtain chichaktinme tusan, tujash imá senchi wakegajai Apajuí tabaun etsegkatnume tusan. Juuwai dekas chicham antushtai chichata nuna nagkaesauk. Tikich chichaman chichaina duka atsumainawai nunak taku tawai tusa etsegtugkatnume, dutikiagtai Jisusa nemajuina dushakam antukag wakanin shiig ijutkau atinme tusa.

⁶ Yatsug aidauh, ubag aidauh, wi anuí taan chicham antushtaiyai Apajuí chichamen etsegmainaitag duka atumnak yaimpamaisui, dekas Apajuí mina iwaintujuk jintinjuauwa nuna, dekaskea nu shiig dekatan, Apajuí tabaun pachisan, ashí Apajuin chichamega nuna, juuwai dekas pegkejak tusa jintinmainaitjim nu atumnak yaimp-mainaitjume. ⁷ Kantamku awattai guitarra, umputai quena aina nunú wainak pachimkamun shiniagtaik, nunú kantamtainap makí makichik aina nuwig tawa tusag dekamaisui. ⁸ Nunisag trompetan umpua dushakam, maaniamunum shiyaktin umintsatnume tusa umputaiya nuna umpushtaik, maaniasag uminmain ainatsui. ⁹ Atumshakam nunisjumek chicham antushtaiyai augmash, ¿wajuk dekaagmek nunap tujutua titagme? Nuniakuik wainka tu wekaemainai. ¹⁰ Ju nugka juwi makí makichik chicham kuashat ayaa duka, ashí ajuinawai wajintu taku tutaimpaya nunú. ¹¹ Tuja mina aujta nuna, wajina takug tawa nuna dekachkunuk, tikich nugkanmayaya nunin wantinmainait-jai, aantsag mina aujtaushkam minaig tikich nugkanmayaya nunin wantinmainai. ¹² Aatus asamtai atumek, yupichu dutikatnun Wakaní Pegkeji sukagtamuk jukitasajum wakegautigmek, Jisusa nemajuidau yaimaina nu jukitasajum kakanmamsatajum.

¹³ Nunin asamtai chicham antushtain chichauk Apajuin aujak segamainai, ni tabaujin: Junak takun tajai, tusa etsegmainun paan dekantijuati tusa. ¹⁴ Wí chicham chichashtaiyai Apajuin aujtaik, mina wakanjua duke Apajuinak aujui, tujash wika nunak wajinkunuk

taja nunakesh dekatsjai. ¹⁵ ¿Tujash wajukmainaitja? Apajuin mina wakanjuí aujkunchakam, nunap taja tusan antukan aujmainaitjai, aikasnuk kantamkunchakam nunap taja tusan antukan kantamainaitjai. ¹⁶ Tuja ame wakanmin Apajuí see tabaun tikich antuidauk, nu ame tame nuna dekachu asa “Aatus atí” tusag tumaitsui. ¹⁷ Ame Apajuí see tabauk pegkeg amainai; tujash tikichnak wakannum tsakatnak yaimaitsui. ¹⁸ Wika atumin nagkaesau chicham chichashtain chichaag duwi Apajuinak see tajai. ¹⁹ Tujash Jisusa nemajin aidau ijunainamunmag, ayatak cinco chicham jutii chichataiya nujai jintinkagtuatasan wakemainaitjai, winkan diez mil chicham chichashtaiya nujai jintinkagtumaina nuna.

²⁰ Yatsug aidauh, ubag aidauh, uchi anentaimuk wajaigpajum, uchi anentaimu wajamainaitji pegkegchau takashtanum, tuja pegkeg anentaimta nuanuig muun anentaimu wajamainaitji. ²¹ Chicham umiktinnum: “Ju aents aina junak, ditá chichamechui ausattajai, dutikamu asag minak antugtukchagtatui”, tiuwai Apu Apajuí. ²² Nuaduí chicham antushtai chichamua nuna Apajuí nemagchau aina nu antuinak, Apajuinuapi tusag anentaimtustinme tusa iwaintak nuniawai. Tujash Apajuí tabau jintinkagtamua nunú imá kuashat Apajuí nemajuina nunak yayawai. ²³ Ashí Jisusa nemajin aidau ijunag batsamas chicham antushtain chichagtaik, Apajuí nemagchau aidau, nuniachkush Apajuí chichamen dekadachu aina nu wayaa antuinakug: Imaanuk tu batsatajama, tujamainai. ²⁴ Untsua Apajuí tabaun ditá chichamenig etsejiagtaik, Apajuí nemagchau aidau, nuniachkush Apajuí chichamen imatikas dekadachu wayaa antukag: Dekaskeap tawa, tusa niina pujutjinash diimainai niishkam shiig antau asa. ²⁵ Nuniak ditá tudauji uukbaunash Apajuin ujaak niinak emematak tikishmag pujus, dekas atumiin Apajuí awai tujamainaitjume.

Apajuik niina emematuinak ijunag wainak pampamunak dakitnai

²⁶ Nuaduí yatsug aidauh, atum ijunku utsanamunum tiagtatui: Wi kantamatjai tai, tikich wi jintiatjai tai, tikich, wi Apajuí iwaintugka nuna etsegkatjai tai, tikich wi chicham chichashtain chichaktajai tai, tikich wi chichakbaun nuna taku tawai tusan etsegkatjai tumainai. Tujash duka ashí betek yainikta tabaunum nunimainai. ²⁷ Aents chicham chichashtain chichaidauk jimagchikish, nuniachkush kampa-tumkesh chichamainai makí makichik; tujash aents ni chichakbaujin taku tawai tusa etsegtumainush atai. ²⁸ Nuna taku tawai tusa etsegmain atsutaik, Jisusa nemajin ijunjamunmag chichamaitisui, imá nigki Apajuin aujak chichamainai. ²⁹ Aantsag Apajuí tabaun etsejush jimagchik, nuniachkush kampa-tumkesh chichamainai. Nunitai tikich aidauk dekaskeash Apajuí tabaunash etseja tusa diimainai. ³⁰ Tuja nui aents antak pekaja nuwiya, Apajuí dekamtikam makichik wajakí chichataik, nagkamas chichá duka itatmainai. ³¹ Nuniau asamtai makí makichik niyá ashimkamtai, duwi tikitchakam chichamainai. Nuniagmin abai tikich aidauk unuimagtus wakeemain ainawai. ³² Apajuí tabaun etsejuidauk nigki chichatsuk, tikitchakam chichaktí tusa idaitumainai. ³³ Wagki Apajuik, makichik aents chichaa nuwá

ashimkamtai, duwi tikich chichakmatai aatus takastinme tusa wake-jawai, wainka pampamunak dakitin asa, nunak ashí Jisusa nemajin aidauk nunimain ainawai.

³⁴ Jisusa nemajin aidau ijunjamunmag, nuwa aidauk chichatsuk takamtak pekaamain ainawai. Moisés chicham umiktin agagbaunum: “Nuwak aishin sumitkau amainai”, tawa nunisag. ³⁵ Nuwa dekaata-tus wakegakug, niina jeen jegá aishin iniasti, nuwa ijunjamunum chichamua duka maakchau amain asamtai. ³⁶ Atuminigkik Apajuí chichame etsegbauk nagkamnachui, nuigtush imá atumkechuitjume Apajuí chichame antukutigmek.

³⁷ Makichik aentskesh Apajuí tabaun etsegna iman anentaimtumak: Wakaní Pegkeji dekamtijawai tauk, wi Apu Jisus umiktajum tibaun agatjim juna dekaati. ³⁸ Tuja juna Apajuí tichamui tauk, wainak tawai.

³⁹ Nuaduí yatsug aidauh, atumesh kakanmamsatajum Apajuí tabau yupichu etsejin atasajum. Nuniakjumesh tikich chicham chichashtain chichaina duka chichamait sui tiigpajum. ⁴⁰ Atum ijunbaush pegkeg tikichish wakejumain atí, shiig kuitamamsajum ijunjatajum.

15

Kristu nantakbau

¹ Yatsug aidauh, ubag aidauh, junashkam tajime: Wi yamajam chichaman atumiin etsegbau shiig aneasjum antukuitjum nuwig emetmamkauwaitjume; ² nunikuitjum nu, wi chichaman ujakabiajim dushakam dutiksagmek umiakjumek uwemjattagme; nuniachkugmek dekaskeapi tiuwaitjum duka wainkayai.

³ Nagkamchaknuk wi dekauwaitag dutiksanuk atumnashkam jintintuauwaitjime, Kristuk iina tudaujin jakauwai, agagbau tawa nunisag tusan dekamtikatasan; ⁴ dutika ukusam kampakatum tsawanta juwi nantakiuwai, nunashkam agagbau tawa nunisag; ⁵ nunik Pedron wantintukui, nui pujus ni jintintaiji doce aajakajua nuna wantintukui. ⁶ Duwi pujus quinientos inagkeas yatsut aidaun juú wantintamuik wantintukui, nuna wainkajuk kuashat yamaikish batsatui, untsu wajumchik jakaje. ⁷ Duwi pujus imá Jacobonak wantintukui, nunik ataktú ashí chichaman etsegtugkati tusa etegjamujin wantintukui. ⁸ Nunik minash inagnamunum wantintugkauwai, uchi duwik akiinauk niiyá wainkamun, tikich uchi awan akiinu imapam waina numamtuk wika wajakuitjai.

⁹ Nuaduí wika Kristu chicham etsegtugkata tusa etegjamu aina nuwig wika imanchauwaitjai, wagki wika Jisusa nemajin aidau aintujakú asan Kristu chicham etsegtugkata tusa awemamainchau aajakuitjai. ¹⁰ Tujash Apajuí wait anenjujua duwi, yamaik wi yaitja nunuwaitjai, ni wait anenjak jutijuaauwa duka minaig wainkachui, nuaduí wika Apajuí yaintsamtai dita aina nuna nagkaesan takasjai, wikik imatikmainchau ayatkun. ¹¹ Wi etsegbau, nuniachkush tikich etsegbaukesh antukjum, dekaskeapi tusajum Kristuk nemagkauwaitjume.

Jakau aidau nantajagtin

¹² Jutii Kristu maa ukusbau nantakiuwai tusa etsegjinish, ¿Wagka atumesh jakaik nantagchatnaitji tuinagme? ¹³ Jakau nantagchatin

ataik, Kristushkam nantakchau amainai. ¹⁴ Kristu nantakchauwaitkuig, chicham etsegna juka wainak amainai; nuigtush Kristui kajintsá anentaibau ajutjamaina dushakam wainak amainai. ¹⁵ Kristu maa ukusbaun Apajuí inankiuwai, nunin asamtai tikich aidau jakaush nantagtin ainawai tusa etsejuinag nu, atum dekaskechui tuinajum nuniakuig, untsu jutiik Apajuik wainka etsegtukji. Atum jakauk nantagchatnai tajum dutsu dekaskechui. ¹⁶ Jakau aidau nantagchatnaitkuig, Kristush nantakchau amainai. ¹⁷ Kristu nantakchauwaitkuig, atum niini kajintsá anentaimejum dushakam wainkayai, nunin asajum tudaunumag batsatjume. ¹⁸ Nunin ataik Kristu nemagkau jinawajua duka megkaejajuskaitaih. ¹⁹ Jutii Kristu dakainag nunú, imá juwi pujag duwik yainkati tabaunum nuninakuik, tikich aents aina nu nagkaesau wait anenmain batsaamainaitji.

²⁰ Tujash dekaskenmag Kristuk nantakiuwai. Niiyai dekas jakau nantashainmaya nagkamas nantakiuwa duka. ²¹ Makichik aents Apajuí intimjukbaunum jata nagkamdauwa nunisag, makichik aents mantamna nantakbaunmag ashí jinawajua aidash nantajagtinai. ²² Adán tunamagbaunum ashí jainag nunisag, Kristu nantakbaunum pujut tuke atina nu ashí jukitnaitji.

Nantaamuk juní atinai

²³ Tujash juka juní atinai: Nagkamchakug Kristu nantakiuwai; Kristu ataktú juwi minitta duwik, niina nemajin aidau jinawajua nunuwá nantakiagtinai. ²⁴ Inagnamunum ashí senchigtin aina nuna senchijin, iwanchin senchijinashkam Kristu atankitnai. Nuna dutika ni aents uwentikamu aidaun yajuak, Apajuin: “Ame ashí kuitamkam inata”, tusa susatna duwi nugka nagkanbau atinai.

²⁵ Kristu Apu wajas inamak pujai, ashí niina shiwaji aidauk depetkamun atinai. ²⁶ Tuja Kristu niina shiwajin inagnak tsaktina nunak, jinin ainag nuna emegkak jachatai ematna nuuwai. ²⁷ Apajuí Kristunak: “Ame ashí inamjata”, tusa idaitusui. Juna tiuwa nunak Apajuinash nigki Kristuk inawai tusag tatsui, wagki Apajuí ashí wajinak Kristun idaitusui. ²⁸ Ashí Kristu idaitusbau atina duwi, Kristu Apajuí Uchijiya duke Apajuiyai sumimkatnai, ni ashí waji aidauk idaitusbau asa. Nunikmatai Apajuik ashí nigki diistinai.

²⁹ Atum jakauk nantagchatnai tayatkugmesh, ¿tujash wagka atumesh jakau pachisjumes yamimagme? ³⁰ Atak nantaamu atsutin aish, ¿wagka jutiish ashí tsawantaish ishamainnumash yujainaji? ³¹ Atumek shiig dekagme, wi ashí tsawantai mantamnamainnum wekaekunush, atum Kristu Jisus nemajuinajum nuna anentaimejum shiig aneasan dakunkut wekagag duka. ³² Wajumak Efesonmaya aidauk, kuintin kajena iman shiwag ajutuina duwish ¿waji pegkegna jukiuwaitja? Dekasenum aents jinawajua nantagchatnaitkuig, tikich chichainak: “Yuwawagmi, uwajagmi kashin jaakuik nunichattaji”, tuina iish tumainaitku, atak nantainamu atinuk shiig dekaing duwi, kuashat puyatjumainnum yujainakuish, ju takatak idaitsuk wejuinaji.

³³ Atumek: Atakek nantagchatnaitji, tuina nunú tsanuamak aigpajum. Juna makichik aents tiuwai: “Aentsú pujutji pegkeja nunak, aents pegkegchaujai kumpaniamua nu emestawai.” ³⁴ Dekas aneaku

pujakjum tudauk takasaigpajum. Atum ainajum anuiyatijum, Apajuinu dekaskea nu wajumketijum shiig dekachutigmesh ainajum nuna datsaagtinme tusan tajai.

Jakau aidaush wajuk nantajagtina ainawa

³⁵ Atum ainajum anuiya: “¿Jakau aidaush wajuk nantajagtinuk ainawa? ¿Wajuku iyashimkag midiagtinaita?”, tautigmesh amainaitjume. ³⁶ Anentainkachuh, jigkai ajaamua duka kaumainai nunikmatai nuwiya ajak tsapamainai. ³⁷ Trigo ajakmakuik dukekgkau ajatsuk, jigkayí ajataiyai, tikich ajakshakam dutiksaik dutiktaiyai. ³⁸ Dutikamun Apajuí wajuk wakegawa dutiksag tsapapawai, dutika makí makichik jigkainak wají jakaita dutiksag suwawai.

³⁹ Nunisag tikich kuntin aina dushakam betekak ainatsui, aentsun iyashishkam kuntindaujaig betekchauwai, chigkinushkam nunisagke, namakshakam aushá ainawai. ⁴⁰ Aantsag nayaimpinmayash ai, nugkayash awai. Tujash nayaimpinmaya aina nuna shiigmajish awai, nuniai nugkanmaya aina nuna shiigmajish nunisagke. ⁴¹ Nunisag etsá etsantaijish ai, nantú etsantaijishá awai, tuja yaya aidau etsantaijish awai; yatak yayakeshkan betekak etsantuinatsui.

⁴² Numamtuk atinai aents jinau nantajagtina dushakam. Aents jakau nantainakug, iyash atakek kaugchatnun iyashimak nantakiagtinaí. ⁴³ Iyash kakaakchau ukusbau aajakua nu nantaak, shiig pegkejan iyashimak nantakiagtinaí. Aents jakauk iyashí atsumnachu asamtai ukusbauwa duka, senchigtin waigkag nantakiagtinaí. ⁴⁴ Nugkaa yutuna duka, nugkaya iyashia nuuwai; nantaktina duka, nayaimpinum pujustina nuuwai. Awai nugkaa pujaku iyashimtai aantsag awai nayaimpinum pujaku iyashimain.

⁴⁵ Aikasag agagbaunum: “Apajuí nagkamak Adagkan najanauwa nunak ju nugka juwi pujumainun iyashin najanauwai.” Untsu inagnak Adán aajakua duka Kristu aajakuí. Nunú iyash nayaimpinum pujaku iyashimkatna nuna iyashimak nantakiu asamtai, iishkam nu iyashik jukitnaitji. ⁴⁶ Yamaikik iyash jauwa nu ajutjamainaji, duwi dekas iyash jachauwa duka ajutjabiagtinaí. ⁴⁷ Adagkak nugka juki najanamua asa nugkaya aajakuí, tuja Kristuk nayaimpinmayayai. ⁴⁸ Jutii iyashí aina juka, Adán nugka najanamua nunú iyashik ajutjamainawai. Untsu atak iyash jukitnaitag duka, Kristu iyashimkawa nujai betekak ajutjamtainai. ⁴⁹ Nugkaya iyash iyashimkau ainag antsaik, nayaimpinmaya iyash iyashimkatnaitji.

⁵⁰ Yatsug aidauh, ubag aidauh, juna tajime: Neje numpajai pachimja najanamua duka, Apajuí inamtaijinig wayashtinaí. Iina iyashí jauwa juka, ajumaish tuke jachataiya nuwig waimaitsui. ⁵¹ Tuja Apajuinu yaunchuk dekaachbau uukbau aajakua nuna ujajime: Jutiik ashí jinashitnaitji, tujash ashí yapajinkau agtinaitji, ⁵² waamak piit tsuwi-saik niimtayama numamtuk, trompeta inagnaku umpuamu antamuik jakau aidauk nantajagtinaí, ajumaish tuke jakachagtinun; nuniai jutii iwaaku aidautik iyashí yapagtam agtinaitji. ⁵³ Dekas atumnawai iina iyashí kaujá megkaena ju, ajumaish kauchu atinme tusa; yamai iyash jinin aina jushakam, ajumaish tuke jachau atinme tusa.

⁵⁴ Nunik iina iyashí ajumaish kaugchatnun, ajumaish jakashtinun iyashimkagmataig, chicham agagbaunum:

“Jaamua duka depetkamu juwake,
⁵⁵ yamaik jaamua duka jutiinak mantamaitsui.
 Depetkamu asamtai jaamush atsutnai,
 ukumamushkam atsutnai”,
 tibauwa nu uminkatnai.
⁵⁶ Yaunchkek Moisés chicham umiktinun agajua nu
 ii umishtin tunamainaku jinujakuitji.
⁵⁷ Tujash Apajuí see taji,
 ii Apuji Jisukristu jaamunak depetkau asamtai,
 jutii niini dekaskeapi tuidautik
 jaamuk ishamainatsug duwi.

⁵⁸ Nuaduí atumek aneetaig yatsug aidauh, ubag aidauh, emetmamja-
 jum pujusjum Apu Jisusa takatjig mijattsuk ematajum; wagki atumek
 dekagme, jutii Kristunu takainag juka wainkaik takainatsji.

16

*Jerusalemia Kristun nemajuidau susatin kuichik anentag ijum-
 jamu*

¹ Jisusa nemajuidau yaigtin kuichik anentag ijumkugmek, Gala-
 cianmaya Jisusa nemajin aidaun wi jintintuauwaitag dutiksagmek
 atumesh dutikatajum. ² Ashí tumigtin makí makichkitijum atum
 takasá wajupa jukiugme, nu akantsajum ukú pujutajum. Dutikamu
 asamtai wi taattag nuaduik kuichik ijumjata tabauk atsutí. ³ Wi
 anuí taan atum aents etegkawagmin cartan agajan susan Jerusalén
 awematjai, atum kuichik anenjauch ijumjaujum nuna dekaatnume
 tusan. ⁴ Nuna dutikachkunush, wisha wemainaitkunuk ditajai ijuntsan
 wemainaitjai.

⁵ Tuja wi atumiin minaknuk, Macedonia nugka atú minittajai.
⁶ Nuniknuk atumjai wajumak tsawan pujusta tajai, nuniachkunush
 yumi tepeatta nunak anuí pujusnukeash inagkeakintag tajai, nunikan
 wegakuish atum yainkamnujum tusan. ⁷ Nuniau asan ayatak nagkae-
 maku wainká ukutnak dakitajime, dukapech tsawan atumiin pujusta
 tau asan, Apu Jisusash aatus wakegakuig. ⁸ Yamaikik Efeso pujuttajai,
 jista Pentecostés inagkeakta tau asan. ⁹ Nu jistatin imá kuashat
 tuwaidau asagmatai, Apu Kristu chichamen etsegkatjai tajai, kuashat
 aents aidau kajegtuinaigkishkam.

¹⁰ Timoteo anuí taakuishkam shiig anentsajum jukitajum, niishkam
 wi Apu Jisukristun takajag aunak takaju asamtai. ¹¹ Nunin asamtai ma-
 kichkitigmekesh imanchau diisaigpajum, dutiktsuk shiig anentsajum
 yaigtajum ni minai minakuish, wagki wika tikich yatsug aina nujai
 dakaku pujaji.

¹² Atumin ijagtamsati tusan yatsug Apolosan, tikich yatsug aina
 nujai wetá tusan kuashtá segajai; tujash yamaikik anuí minimainjig
 wakegamuk atsujui, tuwig minimainji ajit duwi minittawai.

Inagnaku akatmabau

¹³ Atum Jisukristui kajintsá anentaimjum nunisjumek aneaku pu-
 jakjum, aishmag wajasjum kakanmamsatajum. ¹⁴ Ashí atum takaajum
 duka, anenkai takastajum. ¹⁵ Yatsug aidauh atumek dekagme,
 Estéfanas nugka Acayanmaya nu niina nuwejai, uchijí aidaujai

dekatkauk Apajuí nemagkajua duka, nunikaju asag Kristu nema-
juidaun senchi yainawai. ¹⁶Nuaduí atumek ju aents yaimainak takaina
junin aina nu tabau antugkatajum.

¹⁷ Shiig aneajai Estéfanos, Fortunato, Acaico aatus tajutuawag atum
dutikmaina nuna dita kuashat yaintuidau asagmatai. ¹⁸ Dita mina
wakanjuí ichichtujajui, aikasag atumnashkam ichichtamjajui. Aents
junin aina nunú atumek puyatjusjum diimain ainagme.

¹⁹ Jisusa nemajin aidau Asianmaya kumpamjamainawai. Aantsag
Áquila ni nuwe Priscilajai, ditá jeenig ijunaina dushakam Apu
Kristu daajin kumpamjamainawai. ²⁰ Ashí yatsug aidauh, ubag
Kristu nemajin batsatana dushakam kumpamjamainawai. Antsagmek
atumesh makí makichkitijum pempentunisjumek shiig anendaisajum
kumpamdayatajum.

²¹ Wi Pablon ju kumpamdayamunak mina uwejuí agatjime.

²² Makichik aentskesh Apu Jisukristun aneachuk, ¡nigki suwimkan
jukittawai! Wagki Apu Jisusak waamak taattawai.

²³ Atumnash Apu Jisukristu wait anenjamjatnume. ²⁴ Wika atumnak
Kristu Jisusan aneag dutiksanuk aneajime.
Aatus atí.

PABLO AWENTSAIK PAPI AGAJA CORINTONMAYA AIDAU AWETIMU

Pablo Corintonmaya aidau kumpabau

¹ Witjai Pabloitjai, minak Apajuí Kristu Jisusa chichame etsegtukti tusa wakegau asa awetiuwai. Yatsug Timoteojai pujusan atum Jisus nemajutijum yaakat Corinto batsatutigmin papiin agajan awetakun kumpamjime, nuigtú Acaya nugkanum batsata nunashkam kumpamjai. ² Ii Apají Apajuiya nu, iina Apuji Jisukristujai wait anenjamag, shiig agkan anentaimesa pujuta nuna atumnash amastinme.

Pablo waitiamuji

³ Emematiagmi Apajuí, ii Apuji Jisukristun Apajiya nu, niyai jutii Apají tuke wait anenjamna duka, nigki Apajuí ichichkagtina dushakam. ⁴ Nigki ichichmamtanash sujamui ashí ii waitiamunmash, ditash tikich waitiagtaish dutiksag ichichkagtugtinme tujamu asa. ⁵ Kristu waittsauwa nunisaik jutii ni nemajuidautish kuashat waituinaji, nuniakuish imá niinig kuashat ichichmamainuk ajutjamainaji. ⁶ Jutii Apajuí chichame etsegjin, tikich aents waitkagmainakuish shiig anenaji, jutii nuniamu diisjum atumesh ichichmamajum uwemjatajum tabaunum. Tuja Apajuí jutii waitiajin ichichmamtan amakuishkam atum aidautigmesh: Jutii waitiajinish aikasagkeap Apajuí ichichtamjattaji, tusajum dekamainaitjume. ⁷ Jutiik atuminig kajinmasa anentaimeinaji, wagki atumek jutii waituinag nunisjumek waitiakjumesh, Apajuí ichichmamtan sujabaujai ichichmamaidau asagmin.

⁸ Yatsug aidauh, ubag aidauh, jutii Asia nugkanum batsamsaja kuashat utugchatnum waittsabiag nu dekaatajum tusan wakegajai. Jutiik tikima atsanja nagkaemainchaunum jegantú asaja: Iwaakuk jijnashtatjiapi, tibaiji. ⁹ Nuniaku: Mantamnati, tujamainakui anentaimeina imanika anentaibiaji. Tujash nu dekamtijamabi iik anenmamtsuk, Apajuí aents jakaunash inanna nui kajintsá anentaimeitan. ¹⁰ Nuniau asajin Apajuí agkanmitkagmabi, dutijamsag ii jamain ishamain ataish ayamjutpaktatui. Nunin asantai nigkiap ayamjutpaktatui tusa imá niinig kajinmasa anentaimeinaji. ¹¹ Atum jutii pachijattsajum Apajuí augjumin, tikich aidauh jutiin pachijattsag Apajuin aujiagtaig, kuashat tikich aidauh Apajuin see tumain ainawai, Apajuinumia pegkeg juwamua nuna wainaidau asag.

Pablo Corinto wechamu

¹² Aents aidau ditá yachajinig anentaimesa yujau aina nunitsuk, jutiik Apajuí wait anenjamantai pegkeg aina duke anentaimeinaku, tikich aidaujaish kuitamamka imagnisa yujaidau asaja, atumjaig nuní nagkaemasa kuitamamka yujasmayag duwi eme anenmabauk ajutjamainaji. ¹³ Wi papiin agatjamjim nuwig, tikich waji pachisaik atum aujukgumesh antukchamnukesh agatjashbaijime, nuniau asantai shiig ausampap dekawagtatua tajime. ¹⁴ Atumek yamaik ii kuitamamsa yujasmayag duka shiig dekatsjume, tujash Apu Jisusa

emtin ijunjatnaitag nunú tsawantinig dekajuatnaitjume, jutii wajuk pujusuitji nunú. Nunikjum shiig aneakjumin jutiishkam nunisaik atum dutikamua nu diísá shiig aneastinaitji.

¹⁵⁻¹⁶ Wika Macedonia nagkaemakun atumi tajaan wainkan ukuakun, nuwiya waketkunchakam ataktush wainkan ukuktajime tusan anentaimsabiagai. Nuna nuniakui atum minashkam wi Judea nugkanum wegakuish, atum yainkamnujum tau asan. ¹⁷ Wi nuna nuniktajai tiuwaitag nunash ¿anentaimtsukek tiuwaitag? ¿Atumek minishtinaitkumpap wainak minittajai tawa tujutjume? ¹⁸ Tujash Apajuí ni tibaujinak betek umina nu dekagtamui jutii wainka atum tsanuachbaunak. ¹⁹ Wi, Silvano, Timoteo, jujú aidauti Jisukristu Apajuí Uchijiya nunú pachisaja atumnak ujakbajime. Jisukristuk: “Yamaiya juwi dutikattajai” ti, ajuma duwi “dutikashtatjai” tujakchauwai. Nigka ni chichakbaujinak imatiksag umijakuí. ²⁰ Wagki Apajuí ashí anagkagtua-mua duka, Kristui ashí uminkauwai. Nuaduí Apajuí emematuinakuik: “Aatus atí”, tuinaji Kristu Jisus pachisa. ²¹ Tuja Apajuiyai jutii atumnashkam Kristu nemaju asajin ashí ijupag niinu etamkajua duka. ²² Dutijamak: Juka midau atinme, tujamu asa emtikak Wakaní Pegkejiya nuna sujamsajui. Nuna dutijabau asamtai dekainaji, atakeap pegkeg aina nuna sujamsatnaita tusa.

²³ Tujash wi Corinto minitjai tusa anentaimsamun minichag nunak Apajuí dekagtawai. Tuja wi minitjai taja nuna dekass tuchataik Apajuí suwimkan sujustí tajai. Wi anuí minichag nunak atumin kakaakan chichagkun wake ebeskaijim tau asan minichmajai. ²⁴ Jutiik atum kajintsá anentaimjum duka: Ii wakegamu dutikatajum, tusaik tumaitsujime, atumek Kristui kajintsá anentaimu asagmin ayatak yaimkatasa wakegaji dakujustinme tau asaja.

2

¹ Nuaduí: Dekas wechatjai, ditan wake besemag anentaimtiká wekayig, tusan juwakkabajai. ² Atum mina shiig anentijumaintigmin wake besemag anentaimtiktaish, ¿yaki minash shiijash anemti-justi? ³ Nuaduí ayatak agatjabaijime, atum mina shiig anentijumain aidautigmin wake besemag anentaimtiktan dakitakun. Wika shiig dekajai, wi shiig aneakuig, atumshakam shiig aneemainaitjume. ⁴ Tujash wi papiin agatjabaijim nunak, senchi uyumaka waitiamunum buutkun pujusan agatjabaijime. Tujash atumin wake besemag anentaimtijatasanuk agatjashbaijime, ayatak wi atumin senchi aneajim nuna dekaatnume tusan agagabajai.

Pablo tsagkugkagtugbau

⁵ Tuja mina makichik aents wake besemag anentaimtijujua duka, imá minakek dutijuache, ashí atumesh nunikugmeapi tajai. (Junak wika nunú aents dekass pegkegchau takasbaujiya nunak awagkinuk chichaa wekaechattajai). ⁶ Atum ainajum nuwiya imá kuashtatijum nu aents suwimak susauwaitjum duka: Maake, anuig atí. ⁷ Yamaik atumek tsagkujajum anentai ichichtugtatum, wake besemag pujak shiig pujuschamin dekapí. ⁸ Nuaduí, atum yaunchuk ni aneekujitjum dutiksagmek aneetatum tusan segajime. ⁹ Duwik juna pachisan agatjabaijime, dekass wi tabanash umikagtimpush tusan dekapsatasan. ¹⁰ Nuaduí atum tsagkujattatum nunak, wisha tsagkujattajai. Wi

anuí atumjai ijuntsan pujusan Kristu emtin tsagkugmainaitag dutik-sanuk. ¹¹ Nu aaja dutikaku jutiik iwanch tsanujati tusaik agkantak idaitumaitsui, wagki dekaji ni pegkegchaun takamtijamsatatus wajuk anentaimnaita duka.

Pablo yaakat Troas jegá shiig juwakchamu

¹² Yamajam chichaman Kristu pachisan etsegkatasan yaakat Troas jegaa ai, kuashat aents Apajuí chichamen dekawagtatus wakeyagmayi; ¹³ tujash yatsug Titun wainkachu asan wakeesan takamainchau deka-peakun, ditanak ukuakun Macedonia nugkanum webaijai.

Kristui depetmatak awai

¹⁴ See tajai Apajuin, Kristu depetmakua imanuk etamu asamtai, jutii ni chichame etsegbauwa dushakam pegkeg kugkuina iman, ashí yantamnum etsegbaun wakejus antuidau asagmatai. ¹⁵ Jutii Kristu pachisa etsejuinag duka, Apajuin shiig awagmawai. Juna antuk umiidaunak Apajuí uwemtikainawai. Jujú chichamak pegkejai chichaman umiina nuwig, tuja megkaejatin aina dushakam jujú chichamnak antuinawai. ¹⁶ Megkaejatin aina duka Apajuí chichame-nak pegkegchauwa nunin antuinawai, dita megkaejatnujin pachis tau asamtai. Apajuí chichamen antukag umiina nunak Apajuí uwemtikui. Tuja nu chichaman umiina nujag Apajuí chichamega juka pegkejai, duwi dekainawai: Nayaimpinmap pujustinaitji, tusag. Makichik aentskesh, Apajuí yayachmak shiig dekamaitsui, jujú chichama ju etsegtanak. ¹⁷ Jutiik, tikich aidau kuichkin jukitasag wainak tsanumag chichaman etsejin aina nuninatsji, jutiik Apajuí awetabiu asagmatai dekaskenum ni emtinish etsejuinaji, nuigtush Kristujai ijutkau asaja.

3

Yamajam chicham apakbauwa nu pachisa etsegbau

¹ Wi juna pachisan chichaakuig, atumek: Ni eme anenmamkumpap tu wekaewa, tusagmek tujutmain ainatsjume. Atsa tikich wajukena nunikaik, ¿Jutiiin pachijatus papiin agajagbau jukí atum iwaintu-mainaitjim? ² Jutii anentaimesa papiinum agamaina numamtuk awajkamutigmek atumetjume, nunin asagmin ashí aents papiin aujus shiig dekamaina numamtuk, atumnak shiig dekagmainawai, atumi pujutjum yapajidaun wainaina nuaduí. ³ Kristuk, jutii chicham etse-juinag jujai ni pegkejan dutikauwa nuna aents aidaush wainkatnume tusa wakegawai. Tujash nigka jujú chichamnak aents aidau wainkati tusag papinumag agagchauwai. Nuigtushkam Apajuí chichaman kayanum agag Moisesan susauwa dutikag agagchauwai. Dekas atumnak Apajuí tuke pujuwa nunú Wakaní Pegkejiya nujai atumi pujutjuminig yapagtamawaju asamtai, tikich aidaush Kristu atumin yapagtabauwa nunak wainkagtatui.

⁴ Apajuyai kajintsá anentaimainaku, Kristu atumiin dutikauwa duka dekaskeapi tuinaji. ⁵ Juka imá jutiik imatiksa takainaji tumamaitsui, ashí jutii takainag duka Apajuí yaimpasmatai takainaji. ⁶ Nigki mina takagtin agtinme tusa jutiinak ni inake etamkauwai, yamajam chicham apakbauwa nuna etsejin atinme tujamu asa. Jutii chicham etsejuinag duka chicham umiktin aajakua duchauwai, juka Wakaní

Pegkeji takaamua nuuwai. Wagki chicham umiktin aajakua nu umi-achbaunmag Apajuijai tuke kanaaku kanatnum ejekagtiuwei, tujash Wakani Pegkejiya duka pujut tuke atinun sukagtawai.

⁷ Chicham umiktin kayanum agagbau aajakua nunú, Apajuijai tuke kanaaku kanatnum ejekagtiuwa nu, Moisesa yapiin winchamtin awajtusmatai, Israel aents aidauk Moisesa yapiinak diimainchau dekapjajui. Duka, dukap asa megkaekatnaitak ibau wajasuí. ⁸ ¿Dekas Wakani Pegkeji jutiini takaamua nuna tsaaptinji aan nagkaemas amainchaukaih? ⁹ Chicham umiktin bakujatmainaitak iman aajakua nuna nagkaesauwai, Apajuí: Aentsú bakumamainjig atsawai, tawa nu etsegbauwa duka. ¹⁰ Nu chicham umiktin iman aajakua duka, yamai yamajam chicham Kristu pachisa etsegna nujai apatkamak imanchauwai. ¹¹ Chicham umiktin megkaekatnaitak iman aajakua nuna nagkaesau atinai yamajam chichama juka. Jujú chichamak ajumaish megkaekashtinai, tuke atinai.

¹² Nuaduí nunú dekaidau asaja jutiik shiig kajintsá chichagkagtuinaji. ¹³ Moisés yapiin winchamtin wajasú asa, ju megkagun Israel aents aidau wainkainum tusa, jaanchi juki yapiin ejakua numamtukek jutiik wajainatsji, wagki Kristu chichamega juka tuke megkaekashtin asamtai. ¹⁴⁻¹⁵ Tuja Israel aents aidauk Moisés chicham umiktinun agajua nunak, shiig antumainchau dekapjajui. Nunijakajua nunisag yamaikishkam, nuna chichaman aujuinakush antumainchau dekapenawai, jaanchi ejakbau asa shiig wainmainchauwa numamtin juwakaju asag; tujash imá Kristuig kajintsá anentaibaunum shiig antumainaitji. ¹⁶ Ashí aents Apu Jisukristui sujumankaju aidauk, ni dekamtikbau asa shiig paan dekainawai. ¹⁷ Iina Apuji Jisukristuk wakani, nunin asamtai Wakani Pegkeji jutiini pujus chicham umiktajum tibau umiktasa waitujakbauwa nunak agkanmitkagbauwai. ¹⁸ Dutijabau asamtai yaunchuk iina yapiin jaanch ejatkamua numamtin aajakuitag nunak, yamaik Kristu pachisa dekainag nuaduí, Wakani Pegkejiya nu anentaimitam yapagtugma Kristu anentaimitajiya imanuk etamji. Dutijamu asamtai Kristu wajukuita nuninuk weenaji. Nunak ni Apu Jisus dutijamu asamtai nuninaji.

4

¹ Jutiinak Apajuí wait anenjamag, yamajam chichama ju etsegkatum tujabiu asamtai, mijattsuk chichagkagtuinaji. ² Nuniaku uuká takaamu nuigtú tikich datsanmain aina duka ashí idaisau asaja, tsanumsaish chichatsuk, Apajuí chichamesh yapajiasa etsegsuk, imá dekaskea duke ashí aents aidaush pegkeg diiyamua nu Apajuish dekamunum chichakagtuinaji. ³ Tujash yamajam chicham etsejuinag juna dekamainchau dekapena nunak, aents megkaejatin aina nu nuninawai. ⁴ Dita dekaskeapi tuinatsu nunak, iwanch ju nугká apujiya nu antumainchau emamu asag nuninawai. Nuaduí yamajam chicham Kristu pachisa etsegbauwa junak dekamainchau dekapenawai, Apajuish wajukuita nunak, Kristu iwainawai tusa pachisa etsegbauwa juna. ⁵ Chichagkagtuinag duka iinu pachisaik chichatsji, Jisukristu dekas Apua nu pachisa chichagkagtuinaji; tujash jutiik Jisukristu aneamunum, atumí inataigmia nunin ainaji tumamainaji. ⁶ Wagki Apajuiya duke suwen tsaaptin emati tima, tsaaptin emauwa

numamtuk, jutii anentainish Apajuí imanjiya nu shiig dekaatnun, tsaaptina numamtinun amasuí. Ditash tikich aidaun Apajuin pachis shiig dekamtikatnume, jutiiin Jisukristu Apajuí wajukuíta nuna shiig dekamtijamauwa dutiksag tusa.

Kajintsá anentaibauwai pujamu

⁷ Jutiik duwe jukí ichinak najanamunum, nuna initken waji wake-jumain pegkeg egketiama numamtuk awajkamu ainaji, Apajuí ni senchiji sukagtamua nunú iini au asamtai. ⁸ Nuaduí utugchat ajut-jamkuishkam epegsaiki auwaitji. Uyumamu imanik ajutjamkuishkam, wajukawajak tusaikish tuinatsji. ⁹ Iina shiwaji aidau waitkagmagtaish imá iinakek Apajuik idaitamtsuji, suwimjamainakush mantamtanak mantamainatsui. ¹⁰⁻¹¹ Jutii tuwí wegaji nuwig, Jisusan maatatus itujujakú aina imatijamainaji. Jisus imatikajakbauwa nuna tikich aidaush jutii pujutinish betek nagkaema nuna diisag, Jisusap ditanak maam amainnash kuitamainawa tusag dekaatnume tabaunum. Nunin asamtai jutiiik, Jisus pachisa etsegbaunum ni mantamdauwa nunisaik mantamnatasa umintsá yujainaji. ¹² Jutii mantamnamainnum yujasá chicham etsekkamunum, atumesh pujut tuke atina nu jukiú ainagme.

¹³ Tujash agagbauwa nui: “Kajintsá anentaibau ajutu asamtai chichagkagtajai”, tibau awai, nuaduí jutiishkam nunisaik kajintsá anentaibau ajutjamu asamtai chichagkagtuinaji. ¹⁴ Apajuí, Apu Jisus maamunak inankiuwa dutiksagkeap jutiinash inantamkiag, atumjai ijupag niina pujutajin jujamkiagtinaita tusa dekainaji. ¹⁵ Duka atum aneamunum imanikaik waituidau asajin, Apajuí aents aidau-nashkam yaigtatui. Dutikainam juni kuashat Kristun nemajuinak, Apajuinashkam ni wait anenkagtugbaunum see tuinak imá niinak emematiagtatui.

¹⁶ Nuaduí iina iyashí muuntuch wegak mijamkuishkam, iina wakaniya nu kashí kashinig ayatak senchimeakui mijamtsuji. ¹⁷ Ju nugka juwi yamai waituinag duka, Apajuí pujut pegkeg tuke atinun sujamsatna nujai apattsá anentaimtamak wainkayai. ¹⁸ Aatus asamtai jutiiik ju nugkanmaya wainainag juka puyatjutsuk, dekas nayaimpin-maya ii jukitin wainchamua nu imá senchi puyatjusa anentaimtiagmi. Ashí wainainag juka megkaejatin ainawai, tujash eke wainainatsug nuuwai ajumaish tuke atina duka.

5

¹ Jutiik, ju nugka juwi jega jegamkamú aina nunin ainaji, aak tuke pujuchua numamtin. Tujash iina iyashí aak mamumaina numamtuk wajataishkam, Apajuí tuke atinun nayaimpinum umigtamkamú amastin ajutjamui. Duka aents takasbauwa nunin achatnai. ² Nuaduí wajukaik yamajam iyash nayaimpinum pujustina nu waamak jukiag tusa anentaimtuinaku, shiig aneasa pujumain dekapenatsji. ³ Nunú yamajam iyashia nu iina wakaninak, wisú aig tusa nugkutinama numamtuk awajkatnai. ⁴ Ju nugka juwi batsamsaik tuke shiig aneasa batsatainatsug duka, jakata tau asaik nuniatsji, yamajam iyashin Apajuí nayaimpinum umigtamkawa nu jukita tau asa nuniaji. Wakegainaji ju iyash waitin aina ju ukuaku, yamajam jukí nu iyashimka waitkas pujustasaja. ⁵ Apajuí umigtamkauwai nunú iyash ii jukitna nunak. Nuna jukitnume tujamu asa emtikak Wakaní Pegkejinak amasuí.

⁶ Nuaduí tuke kajinmasa anentaimauk ajutjamainaji, wagki iina iyashiya jujai pujakuik, tikich nugkanum batsatu wajukmaina numamtuk, Apu Jisusjai atushat pujuinag nu dekaidau asaja. ⁷ Yamaik duka wainchayatku, jukitnapitji tusa kajintsá anentaibaunum batsatji. ⁸ Duwi wake besemjak batsattsuji, jujú iyash idaiku Apu Jisusjai pujustasa wetinaitag nu imá senchi wakegau asaja. ⁹ Nuaduí iwaaku pujaknush, nuniachkunush ni pujamunum wakanush, niina shiig awagma nunak takagsamig tabaunum kakanmamainaji. ¹⁰ Tsawan jegatnai ashí aentstí Kristu emtin ijunjatnaitag nunú, nunikbaunum makí makichik aents nugká pujusá takasbauji pegkeg ataish, tuja pegkegchau ataishkam dutiksag susatnai.

Pablo pujutji

¹¹ Nu nuniktin dekau asaja, puyatjusa tikich aents aidaush Kristu nemagkatajum tusa imatjuinaji. Nunak Apajuik shiig dekgatamui, nuniau asamtai atumshakam shiig dekamain ainagme. ¹² Juka ataktú juti emematmamsa chichaaku tatsuji. Tujash juti pegkeg tuinag nunú atumesh dekaatajum tusa wakegainaji. Nunikjum aents aidau pegkejan takaak wajukmaina numamtuk wajaina nu, wi dutikag nuna dekainatsu dushakam shiig ujakminjum tau asan. ¹³ ¿Atumesh jutiik pachimasa chichau asajinig, auk imaankau asag tu yujainawai tukagtuinajum? Imaankau asaja, juka Apajuí ememattasa taji, tujash imaankau asajaik chichagkagtuinatsji, juka atum yaigkagtasaja etsejuinaji. ¹⁴ Kristu senchi anempa nu dekaidau asaja, niina chichameg wakeesa etsejuinaji. Nigka ashí aents aidauunum mantamdauwa duwi, ni nemajuinaku ashí pegkegchau takatak idaisau asá jakaujai betek ainaji. ¹⁵ Kristuk ashí aentsun uwentikatatus mantamdauwai. Nunin asamtai aents niina nemajuidauk, dita wakegamun taká batsamtsuk, Kristu ditai mantamna nantakiuwa nudaun takamain ainawai.

¹⁶ Nuaduí juti Kristu nemajin aidautik Apajuí nemagchau anentaimaina nuninuk anentaimainatsji. Yaunchkek Kristu nemagchau anentaimaina nunin aajakuitji. Tujash yamaik nuninuk anentaim-tuinatsji. ¹⁷ Nuaduí aents Kristun nemajuidauk duwik pujutinak idayinak, yamajam pujutan jukiaju asag, dekas yamajam aents ainawai. ¹⁸ Ashí nu aina nunak imá Apajuik dutikawai. Nigki ni Uchijin awetugmauwa duwi niijaish igkunikuitji, dutijabau asa jutiinashkam, tikich aents aidaush, Apajuijai pujutjum iwajatajum tusa ujaktajum tujabiuwai. ¹⁹ Nunak Apajuí ni Uchijin awemauwai, ashí aents aidauk epegtumatnume tusa. Dutikamu asa, iina tudauji aidauunash pachitjamtsuk idaitugmasui. Tuja jutiinak: Apajuijai pujutjum iwajatajum, tusa chichagkagtuktajum tujabiuwai. ²⁰ Nunin asamtai jutiin, Kristu mina chichameg wi tumainaitag dutiksagmek etsegtugkatajum tusa awemamu asaja, Apajuí atumin tujaamaina nunak jutiin tujamiu asamtai Kristu tawa dutiksanuk tajime: Pujutjum Apajuijai iwajatajum. ²¹ Kristuk makichkish tudau aina nunak takaschauwai, nunikunak Apajuí juti tudaujin niinak aents tudaujai betek emauwai. Ni nunikbaujin iishkam uwemja niijai ijunjau asajin, yamaikish tudau ainajinig, tikima pegkegma iman diigmaji.

6

¹ Jutiik Apajuí chichame etsegbaunum yaimin ainaji. Nunin asaja segajime: Apajuí wait anenkagtamun iwaintugmakua nu shiig dekaajum, ni chichamesh ayatak antukjum idaitsuk unuimagtajum tusan.

² Wagki agagbaunum chichaak:

“Tsawan wi antugmainaitjam nu jegau asamtai untsugkumin antugkan aikmajame,

dutikan uwemainjum tsawanjum jegagtamatai yaigmajame”, tawai.

Nu tsawantak yamaiya juuwai Apajuí aigmamainuk. ¡Yamaiyai tsawan uwemaina dushakam!

Pablo waittsamuji

³ Tikich aidauk pegkegchaukesh iwaintuinatsji, ii takainag nuna pegkegchau chichajinum tuidau asaja. ⁴ Ayatak dekas Apajuin inakempap ainawa tusa dekagmatnume tabaunum, waitiakuish, atsumakuish kuashat katsuntuinaji. ⁵ Iinak achigmakag asu asutamainakua egkepawagmayi, jetepainakuish waittsabiaji, takatash imanik takabijaji, kanutskesh tuke tsawampabiaji, yujumak yutsuk yujasaishkam imanik waitbajiji. ⁶ Nu imaninakuish shiig pujuidau asá: Dekas Apajuí inakempap ainawa, tama agbajiji. Apajuin chichamega duka shiig dekainaji, nuniau asaja tikichjaish shiig anendaisa, uyumat aneakas pujuinaji. Wakaní Pegkeji jutiiní puja nu yaimpasmatai, tikich aidaush dekas aneamunum emamkesa shiig takasbajiji. ⁷ Chicham dekaskea dushakam, Apajuí senchijí iiní ajutjama nujai takasbajiji. Nunin asajin jutii shiig pujamujiya nunú, ii shiwaji aidaunum ayamjumamaina nuwishkam yaijatkauwai. ⁸ Aents wakejutpas eme anenjamas jujamainai, tikich aents dakitjamaidaush ainawai. Aents pegkegnun chichagtamainai, tikich aents pegkegchaun chichagtamainawai. Tikich chichagtamaidau: Waitjin agmae tujamainai, tikich chichagtamaidau: Waitjuchu agmae tujamainawai. ⁹ Tikich aents waipachu utugtamaina numamtuk awajtamainai; tikich aentsuk shiig waipau utugtamaina imatijamainawai. Mantamattak awajtamainaigkish, iwaaku pujaji. Suwimkan imatijama sujamainakush mantamachajui. ¹⁰ Kuashat utugchat ajutjamkujaish, tuke shiig aneasa pujuinaji. Ujunauchitkuish tikichik senchi yainaji, Apajuinu tuke atina nuna jukitnume tusa. Tikichin ajuina imatiksag ajutjamchakush, ashí ajutjamainawai.

¹¹ Yatsug aidau, ubag Corintonmaya aidauwah, jutiik dekaskea duke ujakbajijime, ii anentaibaujiya duka uusá tutsuk, ashí ujakbajijime.

¹² Jutii aaja nuniajinig, atumek uusá anentaimjume. ¹³ Nunin asagmin (muun uchijí aidaun chichajama dutiksasuk tajime), wait aneasjum minash atum anentaibau ujatkatajum, wi atumin uutsuk tajim aikasjumek.

Jutiik Apajuí jega numamtin ainaji

¹⁴ Jisusa nemagchau aina nujaig nuwenawaigpa. Aantsagmek pegkegchau dutikainamush atuetukaigpa. Wagki, dita anentaimaina duka jutii anentaimainag nujaig betekchauwai. Ditak Kristunak umijuinatsui. Nuaduí pegkegchaun takaina duka, pegkejan takaina nuna kumpajig amainchauwai. Suwea duka tsaptinjaig apatdaimaitsui. ¹⁵ Kristuk iwanchjaig makichkish apatdaimaitsui. Nunisag Kristun nemajuidaushkam Kristun nemagchau aina nujaig ijunmaitsui.

¹⁶ Atum ainagme dekas Apajuí pujutai aidautigmek. Apajuí jeega duka apajimtai aina nuna jeeg amaitsui. Apajuí chichaak:
 “Ditai pujustajai, nunikan ditajaig wetajai. Dita mina aentsug atinme, nuninakuí wi dita Apají atajai”,
 tiuwai. ¹⁷ Junashkam Apajuí chichaak:
 “Tupandajatajum aents pegkegchaun takaidaujaig,
 nuniakjum ashí tunamamain aidau takasaigpajum, nunikagmin wi atumnak jukitjime,
¹⁸ dutikan wi atumin Apa atajai, tuja atum mina uchig, mina nawantug atajum, tiuwai Apu ashí senchigtina nunú.”

7

¹ Nuna aatus anagtabau asamtai aneetaig yatsug aidauh, ubag aidauh, shiig kuitamamsa pujaku iina iyashin, wakannumash pegkegchau etamaina duka ashí idaisa pujumainaitji. Apajuí ajantusa diinaku, ni pegkegma ibauk atasa kakanmamainaitji.

Pablo shiig aneamu

² Dekaskenum anejattsa dijattsatajum, wagki makichik aentskesh pegkegchauk takagsachmayag nuaduí. Jutiik atumin pegkegchau etamainuk jintintuachuitjime. Makichik aentsú wajiji atankitasaikish wainkaik tsanugchabiaji. ³ Wika junak atumek nunin ainagme tusan augmatkun tatsujime. Yaunchuk tibaijim nunisnuk, wika atumnak aneajime ijuntusan pujustasan, jaaknush atumjaig jakatatan wakegajai.

⁴ Dekaskenmag ii anentaibaujiya duka uusá tutsuk ashí ujakbaijime. Atumin anentaimtaknuk ememasan anentaimjai. Waitiaknush atumiin anentaimkun shiig aneasan dakunkut pujajai.

⁵ Macedonia taawabiag duwi nagkamsa waitiag nunisaik yamaikish ayamsaik batsattsuji. Ashí yantamnum utugchatak igkuibiaji, tikich aidau jutii etsegbaunak dakituidau asag pampanjamainakuí ishank-agtaku. ⁶ Tujash Apajuí aents waituidaun anentain ichichtina nunú, Titun awetugma jutiinash anentain ichichtamjabi. ⁷ Tujash imá ni taa duwikik nunikchamjai, ni atumin waipak ichichmamjau asa, atum jutii waijatkatasa wakegamun, nuigtú wi waitiamu antukjum kuashat wake besemag batsatkujum, uyumatjuinajum nuna ujatkamtai antukan, nuní nagkaemasan shiig aneasmajai.

⁸ Tuja wi papí agaja awemamu ausajum, imá senchi wake besemag anentaimsamugmin ujatkamtai antukan, wishakam kuashat wake besemag dekapjabiajai. Nuniknush nunakek anentaimtuk pujatsjai. Dekas awemamainchauna awemayag tusankesh anentaimtatsjai.

⁹ Yamaik shiig aneajai, tujash atum wake besemag batsamsaujum duwi nuniatsjai. Atum wake besemag batsatkujum Apajuiyai ataktú wakitkiujum duwi. Duka Apajuí dutijamkui nunikugme, nuaduí atumin pegkegchau awagmamaina duka dutikashjiapi taji. ¹⁰ Apajuí wake besemag anentaimtijama nunak, iina pujutin yapajia uwemjati tusa dutijamui, nuniau asamtai nu anentaimtaku waitú pujumainuk atsawai. Untsu Apajuí nemagchau aidau wake besemag dekape-nayatak pujutjin yapajinashkug, Apajuijai tuke kanaak kanamain ainawai. ¹¹ Atumek wake besemag pujakjumesh Apajuí wakega dutiksagmek katsunjaugme. ¡Nunú yamai diistajum waji ajutjamsaje! Nunak atumiin utugchat awa nuna shiig dekamtijamak, minashkam

ayamjutkatatus dutijamawaje. Kajeamush, nuigtushkam ishamamush ajutjamsaje, nunikjum mina waitkatasajum wakekaugme, nunikjum ya pegkegchaun takaawa dusha suwimak susaugme. Nu dutikaujum duwi iwainmamkaugme, atumesh dekas nunú pegkegchau dakituina-jum duka. ¹² Wi papiin agagmayag nunak imá aents pegkegchaun takasua nuna yaigtasanuk agagchabiajai. Nuniachkunush pegkegchaun takasua nuna apajin yaigtasankesh agagchabiajai. Ayatak atum jutii puyatjusjum antugkagtajum nuna iwaintuktasan agatjamjime. ¹³ Ashí nu atumin nagkaetamkiuwa duka jutiinak ichichtamjauwai.

Tujash nunú ichichmamjamua nuní nagkaemas shiig aneasmaji. Tito shiig dakujus pujau wainku, duka ashí atum aidautigmeap daku-jutak egketuaugme taji. ¹⁴ Wi atumin ememattsan anentaimtamun Titunash ujakmajai. Nuna tija nunak pegkegchauk juwakchajai. Ii ashí dekaskea nu pachisa atum ememattsata tibaijim nunisag Titushkam waipakaje. ¹⁵ Nigka atumnak senchi anempajume, ni atumin segapakuish betek umijujakbau asa. Nuigtushkam eme anentsá jukimu asa. ¹⁶ Wika atumiin shiig kajinmamsan pujag duwi shiig aneajai.

8

Jerusalegnumia Kristun nemajuidau kuichik susatin anentag ijum-jamu

¹ Yatsug aidauh, ubag aidauh, Jisusa nemajuidau Macedonia batsata nuna Apajuí wajuk wait anentamujin ditan iwaintuke nuna pachisan ujaktasan wakejajime. ² Ditak senchi waitiamunum batsatiatak, shiig aneasag dakunkut pujusag ujunauch ainayatkush, wiyakuch wajukmaina imanisag wakejus tikichin anentag yaigkaje. ³ Wi dekas wainkamujun ditanak etsegtajai, dita dutikmainji ajamun diisag wakejus, dita anentaimtusbaujin inagkeasajashkam anenjauch susagmayi; ⁴ ditak nagkabiag, yatsug aidau, ubag aidau, Apajuí nemajuidau Jerusalén batsata nunú yaigmí taji tusag segatiagmayi. ⁵ Wi anentaimtusbauwa nuna inagkeasag dutikawagmayi. Dekatkauk ashí ditá pujutinak Apu Jisukristun idaitusag, nuaduí wi Apajuí wakegamun taja dutiksag umikagmayi. ⁶ Nuaduí Tito chicham susá awemaji, ni anuí taa, atum tikich wait anenjamin ijumkujum nagkabauwaitjum nuna jukiti tusa. ⁷ Atumek ashí wagaagme, Kristui dekaskeapi tusa nemagtanmash, tikich chicham dekatnumash, dekaskea nu shiig dekatnumshakam, atum jutiiní unuimajuitjum dutiksagmek, tikich aidaushkam aneasjum yayajume. Antsagmek atum tikich wait anentsajum yayajum nuwishkam wagatajum.

⁸ Wika ju dekas umiktajum tusanuk tatsujime. Tikich aidau dekaskenum anenkai wajuk shiig wakejus aikainawa nuna wainkat- nume tusan tajime. ⁹ Atumek shiig dekagme, Apu Jisukristuk wiyakchaitak atumin wait anenjamin asa, ujunauch wajas tauwa duka. Nunak ni anentag sujamsauwa duwi, atumnashkam dekas shiig pegkeja nuna jukitnume tusa dutijabauwai.

¹⁰ Wika junak atumin shiig awajtamaina nuna pachisan tajime, tikich mijan nagkaemakmaya duwi kuichik anentag ijumkujum nagka-mauwaitjum duka, dekaskenum dutikatasajum wakekauwaitjume. ¹¹ Atum wakeesa dutikami tusa kuichik ijumamat nagkamauwaitjum duka, yamaish wajupa kuichkish ajutjamainawa nunú ijumjajum

idaisatajum awemanti. ¹² Wagki, aents wakejus sukagta nuna Apajuik shiig anentus jujawai, wajupauchia anenjauch suwawa nuna. Apajuik aents shiig atsuja nunak segatsui.

¹³ Junak tikich yayakjum atum waittsatajum tusanuk tatsujime. Mai betekak atum atsumamua dusha ajutjamtinme tusan tajime. ¹⁴ Yamaik atum dita atsumainakui yaimainuk kuashat ajutjamainawai; tikich tsawantin atum atsumtaish dita yaimpamain ainawai. Junak mai betekak atum atsumamua dusha ajutjamtinme tusan tajime. ¹⁵ Apajuí chichame chichaakushkam: “Kuashat jukiwa nudaush ampinjachui, tuja machik jukiunush tagagchauwai”, tawai.

Tito kumpajijai awemamu

¹⁶ See tajai Apajuin, wi atumin yaigtasan wakegag nunú wakeetanak Titunashkam susau asamtai. ¹⁷ Wi awemag juna juki, niishkam atumiin minitatus wakegau asa, wakejus minawai atumin waipaktatus.

¹⁸ Titujai awemajai makichik yatsutan, ashí tikich Jisusa nemajin aidaush chicham yamagma juna shiig jintinkagtawai tusag wakejin agma nuna. ¹⁹ Niinak Jisusa nemajin aina nu jutijai minití tusa wakegainawai. Ujunauch aidau Jerusalén batsata nu kuichik susami tabaunum. Jutii aaja dutikamunum ditak Apajuin see tuinak, tikich Jisusa nemajin aidau yaigtasa wakegag nunash dekaawagtatui. ²⁰ Nunú yatsut atsumaidau yaigtinun, anentag kuashat kuichik ijumjamu juwinag nuna pachisag, wainak augmatjamsainum tuidau asaja tuke kawemak yujainaji. ²¹ Nuniaku itusaik pegkeja duke takasag tusa kakanmamainaji. Imá Apajuí emtinig iwainmamkatasa nunitsuk, aents aidaush jutii shiig takainamun wainkatnume tabaunum.

²² Ditajai awemajai tikich iina yachí ashí wajiinun kuashtá dekap-samua nuna, nigka shiig kuitamas takauwai, yamai atuminish shiig kajinmas anentaamin asa wakegas minawai. ²³ Titun pachisan tajime: Nigka wijai atuegak atumi yaipaktatus takauwai. Tuja tikich yatsug jimaja nunak, Jisusa nemajin aina nu awemainawai. Ditashkam Apu Kristun emematin ainawai. ²⁴ Jisusa nemajin aidau dekaatnume tabaunum, atum dita aneamugmish iwaintuktajum, jutiik atum eme anentaingtuidau asa tajime.

9

Jisusa nemajuidau yaigtasa kuichik ijubau

¹ Wika Jisusa nemajuidau yaigtinuk kuichkik ijumjau asagmin, ataktú ijumjatajum tusanuk agatmaitsujime. ² Wagki, wika atum wakesajum dutikamugminak shiig dekagjime, nuniau asan Macedonia nugkanmaya aidaun ujaknush, atumí eme anentsan ujainajai. Nuniakun Acaya nugkanmaya aidaush tikich mijanae duwi nagkamas, dita yaimkatnujinak umintsaje tajai. Nunú atum wakejusa dutikamun, Macedonianmaya antukag senchi wakekagmayi. ³ Atum imaniagminig yatsug aidaun awetajime, wi atumin ememattsan chichaag nuna wainak tu wekaguwa nunin diigsainum tusan, wi etsegtajim nunisjumek umintsajum asatajum tusan tajime. ⁴ Macedonianmaya aidau wijai anuí takamá, wi tajim nuninchaun waipainakuig, atum datsamain aig, ii atumiin kajinmasa chichakú asaja jutii datsamainaitji. ⁵ Nuaduí nunin ai tau asan, ju yatsug aidaun: Atum emkajum wetajum,

nunikjum tikich mijan nagkaemakmaya duwi yaimkatnun wakejus nagkamawagmaya nuna ijumjatnume yaigtajum, tusan awemajai. Aatsa ijumja umisjum asatajum sujimayatku dutiktsuk, wakejusampap jutikainawa tumain ati.

⁶ Jushakam adeagtajum: Ajakan machik ajauk machik juwaawai, kuashat ajakmakushkam kuashat juwaawai. ⁷ Makí makichkitijum atum wajuk susatjai tusagmae anentaimsaugme, dutiksagmek susatajum, junik anentaimiatkujum, nuniachkugmesh tikich apusata tujamainakui dutiktsuk. Apajuik ya wakejus suwawa nuna imá shiig aneawai. ⁸ Apajuik ashí pegkeg aina nunak amainawai, dita atsumaina duka imanisag ajitnume, nunitai tikich aents atsumaina nunash yaigtinme tau asa. ⁹ Agagbaunum chichaak:

“Ujunauch aidaun kuashat susaja nunak,

Apajuik kajimatjukchatnai dita pegkeg dutikamujiya nunak”, tawai.

¹⁰ Apajuiyai ajak ajakmatnun, nuigtú yuwatnunash sukagtinuk. Nunin asa ajak ajakmamunash nigki tsapapak kuashat nejepitka numamtuk, atum wakesajum yaimjum nunak, nuni nagkaemas kuashat sujamsattagme, tikichin pegkegnum yaigtinme tusa. ¹¹ Dutikamu asajum, ashí atum tikich yaimainush ajutjamtatjume. Atum kuichik ijumjajum jutiini awemattajum nuna, yatsug aidau, ubag aidau waituidau jukiag, Apajuin see tiagtatui. ¹² Yatsug aidau, ubag aidau yaigtin juwinag duka imá atsumamujinig yaigtasaik juwinatsji, duka Apajuinashkam see titinme tabaunum dutikaji. ¹³ Ditak Apajuin emematiagtatui, atum yaigtatjum duka Kristui dekaskeapi taji tau asajum umigjum nu iwainmamkujum dutikattajum duwi. Nuigtushkam ditak Apajuinak eme anentus diisagtatui, atum dita wakejusjum yayakjum, tikich aidaush yaigtatjum nuaduí. ¹⁴ Nuninak atumin anempas Apajuin aultugmagtatui, Apajuí shiig kuashat wait anenkagtamujin atumin iwaintugmakaja duwi. ¹⁵ ¡See tajai Apajuin, chichamaikish tumainchaun shiig kuashat anenjauch sujamsauwa nuaduí!

10

Pablo ni takaamuji ayamjusa chichaamu

¹ Witjai Pabloitjai, Kristu kakagchauch nuigtú wait anenkagtin aajakua dutiksanuk segajime. Mina chichagtuinak: Pablok jutuijai pujusag senchi ajankagtinuwe nuninaitak atushat kanaká kakaakan chichagkagtawai tujutuinawai. ² Duwi segajime: Wi atumin wainkatasan taakun, jutii pachijatus aents wakegamun takainawai tukagtuina nuna, shiig titajai tusan umintsan pujag nuna kakaakan tiig tusan. ³ Dekaske, jutii aents ainaji, tujash pegkegchaujai maaninag duka shiig aentsjai maanimaina nunikaik maaninatsji.

⁴ Wagki, maanitai takuinakag duka ju nugka juwiya ainatsui, duka Apajuí senchijí ashí pegkegchau aidaunash tsaimaina nu ainawai. ⁵ Nunú senchia duwik, ememainak wainak chichagkagtuina duka itatmitkamainaitji. Dutiksaik aentsú anentaimtajishkam yapagtumainaitji, Kristu umigkatnume tusaja. ⁶ Ashí atum Kristu chichame shiig umigkugminig, wishakam atum ainajum anuiya chichaman uminachunak suwimkan sumainaitji.

⁷ Atumek mina niimjuí diigsagmek, paan kakakchauwa nunin diigjume. Atum ainajum anuiya, wika dekas Kristunuitjai tumamuk,

minashkam niish Kristunuapi tujutmainai. Wishakam Kristunuketjai. ⁸ Atum tumamjum nuna nagkaesau ememasan, witjai chicham etseg-tugkata tusa awemamunuk tumamkunush, Apu Apajuí atum yaigtinun sujamsamu tajim nuaduí datsamatsjai. Atum dekaskeapi tuinajum nuna emegkatkati tusa awetichui. Ayatak atum dekaskeapi tuinajum nuna yaigtí, dutikawajam nuní nagkaemas Kristui kajinas anentaimt-inme tusa awetiu asamtai. ⁹ Wi papiin agajan awetajim junak, uwaktamkatasampap awetugmawa tujuttinme tusanuk wakegatsjai. ¹⁰ Tujash awai mina pachittsag: Pablo papiin agag awetugmakug najamnun tujamji, tujash taa pujakug chichamesh puyatjusa antug-mainchauwe tujutuinaawai. ¹¹ Nuna aents aatus tujutuidaushkam dekaatnume: Wi papiinum agakun timayag nunak, anuí taaknushkam imatiksasuk umiktatjai.

Aents pegkejak nigki pachimasag chichachui

¹² Wika aents ditak emematmamas chichau aina nujai betekak chichamait Sujai, ditak wainak tumainchaun ditak pachimasag, tikich aina nunin achainjiash tusag tu yujainawai. ¹³ Tujash jutiik ii takaschamunum emematak shiig dakitin ainaji. Apajuiyai jutiish wajuk dutikmainaitji nuna tujamuk. Nigki jutiinak atum Corinto batsatjum anuish takastí tusa wakejutpaji. ¹⁴ Iinak Apajuí atumiin awetabiau asamtai, atum Corintonmaya aidautigmijaig takasbaiji. Jutiyyaitji dekas atumiin taa tikichish etsegchamunum Kristu pachisa etsegkautik. ¹⁵ Jutiik ii takaschamu aig, tikich takasbaunmag emema-maitsuji. Ayatak wakeesa dakainaji atumjai aan kuashat takastasa. Atum Kristui kajintsá anentaimjum nu aan nagkaemas ajutjamti tusa. Jutiik Apajuí dutikata tujabauwa duka dutiksaik takainaji. ¹⁶ Nuniaku tikich atushat batsataidau yamajam chicham ujakchamu aina nunú ujaktasa wakegaji, tujash tikich chicham etsegkamunum waitsuk, tikich takasbaunum ememaig tuidau asaja.

¹⁷ Jutiikek eme anenmamait suji, ayatak Jisukristu takaamujiya nunú eme anenmainaitji. ¹⁸ Aents pegkejan takaajai tumama duka wainkayai, dekas Apajuí aentsun pachis, pegkejan takaawai tawa nuuwai dekas imanuk.

11

Waitá etsejin aidaun pachis Pablo tibau

¹ Wi imanjau chichamaina numamtuk wajakuish, katsuntsajum antugtuktajum. ² Wika Apajuí akasmataijiya nuna juki u asan atumnak akasmainaitjime. Kristuig wi atumnak jukin ejeentauwaitjime, niinig pujusjum imá nigki umigkujum, nuwa aentsun adjkachu ni nemakt-injiijaig dakaniyama nunisjumek pujustajum tusan. ³ Tujash dapi Evan tsanujua numamtuk atumnashkam tikich waitan jintinkagtin aidau tsanugmainakui, Kristu aneakjum nigki umigjum nunú idaisaijum tusan imá puyatjajime. ⁴ Atumek, jutii Jisus pachisa etsegkamua nuna tikich aents yajupia chichagkagtuinak, Wakaní Pegkeji juki uwait-jum nunash pachitsuk, yamajam chicham etsegkamua nunash yajá jintinjamainakuish, shiig antugkatasajum wakegajume. ⁵ Tujash wi anuí taan wakitkiu ai, Jisus awemamu ainaji tusag kautjamawaja nu dekas iman anenmamaina nuna nugkaanik anenmamtsujai. ⁶ Wi

shiiig chichachkunush dekatjuig nuninchauwaitjai. Nunak ashí ii dutikamunum tuke iwaintibiajime.

⁷ Atumin Kristu pachisan ujaknush kuichkinak segachuitjime, ayatak yaigkan emtikata tau asan. ¿Nuna dutikauwaitag duwiká minak pegkegchauwai tusajum dakitjajum? ⁸ Wika tikich nugkanmaya Kristu nemajin aidau kuichkin akigkagmatai, nunú kuichkia duwik atumin yaigtasan wekaeyajai. ⁹ Wi atumiin pujubiag duwi atsumaknush makichkitigminakesh waitkaschabiajime, yatsug Macedonianmaya aidau taawag ashí wi atsumamunak sujusagmayi. Atumin waitkasaig tusan senchi kuitamamaijai, dutiksanuk atakea duwish wika atumnak tuke waitkaschatnaitjime. ¹⁰ Kristui dekaskeapi tau asan dekaskea nunak chichaaajai. Nunin asan tajai, Apajuí nemajin Acaya nugkanum batsamin aidaunak makichkish kuichik sujustajum tusanuk segashitnaitjai. ¹¹ Juna wi atumin wakejachu asanuk ¿tu chichagjim? Wi atumin senchi wakejajim nunak Apajuí shiiig dekawai.

¹² Wi chichaag jutiksanuk mina takatjunak emattajai. Imaniakun tikich aents waitan jintinkagtin ainayatak, dekas jutií Apajuí awemamu ainag imajuk anemamaina nunak imijkattajai, aentsun tsanujainum tusan. ¹³ Ditak waitá etsejin tsanumin ainayatak, Kristu awemamu wajukmaina numamtuk wajainawai. ¹⁴ Dita nunina duka wainchataiya nuninuk anentaimtumaitsui, iwanchakam dita wajukena numamtuk, Apajuí aentsji nayaimpinmaya aina iman weeta wajauwai. ¹⁵ Nuaduí iwanchin takajin aina duwi, aents pegkejan takauwa iman wantinainawai. Tujash nu aents aidauk dita takasbaujiya dutiksaik suwimak suwam agtinai.

Pablo waittsamu

¹⁶ Awentsanuk tajime: Wait aneasjum imaanjauwa nunin anentaimjutkugmesh ayatak diigsatajum, wishakam shiiig agkan ememasan chichastajai. ¹⁷ Wi chichaag nunak, Apu Jisus titá tujutbaun tatsujai. Nuaduí imaanjaujai betek chichaaajai wi emematmamsan chichaag nunak. ¹⁸ Tujash tikich ainawai ditak emematmamas chichaidaush. Nunin asantai wishakam wiki emematmamsan chichaaajai. ¹⁹ Atumek shiiig anentaimkau asajum, tikich anentainkachu chichaman etsejuinakui shiiig antujuinagme. ²⁰ Atumek ashí aentsuk antujuinagme. Tsanugmajag ditan inake etamkatatus wakejutpaidaushkam antugjume. Kuichkin jujutjamaina dushakam imatiksagmek antugjume. Aikasjumek pegkegchau chichagtamainak, yapiminish awatamaina dushakam shiiig anentsajum antugkujum umigjume. ²¹ Datsamayatkun tajime, jutiik tikima kakakchauch asaja nu imanuk nunikchabaijai.

Tujash tikich ditak emematmamaina nunisnuk wishakam emematmamjai (imaanjau wajukmaina nuniaknush). ²² Dita hebreo aina nunisnuk, wisha hebreowaitjai. Dita Israel aents aina nunisnuk, wishakam Israel aentsuitjai. Dita Abraham wegantu aina nunisnuk wisha Abraham wegantuitjai. ²³ Kristu inakegaitjai tumamainawai, tujash witjai dekas ditan nagkaesaunuk. (Imanaitkun imaanjaujai betek chichaaajai.) Wika takatnashkam ditan nagkaesau takasuitjai. Ditá nagkaesan achinkamunush egkemauiwaitjai, ditá nagkaesau asutnauwaitjai. Kuashtá mantumain awajtukaju ainawai. ²⁴ Cinco imaniá mina pataag judío aidau achigkag, treinta y nueveya imaniá asutuawaju ainawai. ²⁵ Kampatuma imaniá numí suwimjuawajui. Makichkia

kayai kuashat aents tukujiaju ainawai. Kampatuma imaniá lancha wi wegamu tepeauwai, nunikmatai jakemain wajakan, makichkiá nayantsa ejapeen tsawampajuitjai. ²⁶ Kuashat wekaesauwaitjai, namak ishamainnum, kasa ishamain ayamunmash, mina pataag judío aidau, tikich aents Apajuí nemagchau aidaujai kajegtuinakui. Nuigtú ishamain aidau yaaktanun, uwegshunum, nayantsanun wegakun, tuja Kristu nemagnaitjai tusa tsanumaidaunum wekaekun. ²⁷ Senchi takasan yaweakun, kuashtá kanutsuk tsawaakun, yapajakun kitamakun, kuashtá yujumkan yutsuk wekaekun, tsetsekai waitiakun, jaanch atsgtakuishkam waittsauwaitjai.

²⁸ Juna imaniaknush, kashí kashinig Jisusa nemajuina nu uyumamuk tuke ajutui. ²⁹ Makichik aentskesh Jisusa nemajin waitiakui, wishakam waitiajai. Pegkegchaun takasagmataishkam, ditan yayakun nuna pegkegchaun takamtikaun kajejajai.

³⁰ Wi ememamainaitag nunak, Apajuí wi kuashat ishamainnum wekaekun kakakchau anentaimtaish yainkauwa duwi ememamainaitjai. ³¹ Apajuí, ii Apuji Jisukristu Apaji nigki tuke ememattaya nu dekagtawai wi dekas taja nunak. ³² Damasco jegaa ai, Apu Aretas tutaya nujai takau aidau, ashí yaakta waitijin achijatin aidan dakamtijagmayi mina achigkag jujuktatus. ³³ Tujash Kristu nemajin aidau chagkinnun egketuawag, yaakat peegmagbau ventanajin detuawag ajuntuawagmatai, uwemjauwaitjai achigkata tuinamun.

12

Apu Jisus Pablo iwaintukbau

¹ Dekaskenmag wiki emematmamtak shiig awajtatsui, tujash Apu Jisus mina iwaintugkamun wainkauwaitag nuna tajai. ²⁻³ Wainjai makichik aents Kristu nemagnun, catorce mijan nagkaemawai kampatum nayaimpia nui iwakbau aajakua nu. Shiig dekatsjai ashí iyashijai jukimpash iwakabia, atsa nuniachkush wakaninakeash jukiabia, nunak imá Apajuik dekawai. ⁴ Duka nayaimpinum iwakam wajasá, chicham antushtain antukui makichik aentskesh ujamainchaun. ⁵ Nu aentsua nuna wika emematmainaitjai, tujash wika makichkish emematmamaitsujai, ayatak wi kakakchamujua nuwi emematmamjai. ⁶ Tujash wi emematmamntasan wakegaknush, tikima wainkanuk tumaitsujai dekaskea nuna tau asan, nunin aig nunak tatsujai, mina imá eme anenjutsuk pujutjun diigtusag, wi chichaamug-nash antugtuktinme tusan wakegau asan.

⁷ Apajuí mina dekas imanun iwaintugkauwa duwi, ni imá wagaaku anenmami tujutu asa Apajuí jatan sujusuí, nunú jatak mina iyashjunak jagki ijuam najaamaina imatijauawai, nunak iwanch dutijauawai mina waitkagsatatus. ⁸ Dutijuaantai Apajuin kampakumá segajai: “Wi waitiag nuna emegkatjukti”, tusan. ⁹ Tujash Apu Jisus chichagtak: “Amek wi aneamu asam, ashí ame atsumamugmea dushakam imanisag ajutjamtatui, wagki mina senchijua nunak aents kakakchauwa nui iwainajai”, tujutmayi. Tujutiu asantai shiig anejai wi kakakchauwaitag duwi, Kristu senchijiya nunash dekaatnune tau asan. ¹⁰ Nuaduí shiig anejai kakakchau asan. Pegkegchaun chichagtuinakuish, atsumaknush, mantuatatus aintuinakuish, utugchat ajutkuish Kristu nemagbaunum imanikan waitiajai.

Kakakchauwa nunin dijuinakuishkam, wika Kristu senchijí ajutu asantai, wishakam senchigtin dekapmamjai.

Pablo Kristu nemajuidau Corintonmaya uyumasa anentaimtamu

¹¹ Wi imaanjaujai betek mina pujutjun pachisan chichakmayag duka, atum chichamtjukmaugme. Wagki, atum mina pachittsajum pegkeg-num chichagtumaina nu, tikich waitá jintinjamainak, jutií ainaji dekas chicham antujam amaintik, tuina nu antujuinakjum, minak iman Chau diju asagmin. ¹² Wi atumiin pujusnuk shiig emamkesan kuitabajime. Dutikakun atum wainkashbau aidaunashkam imanik iwaintakun, jaunash etsagauyajai. Imá jaunak dutiktisaijai, ashí tikich aidaunashkam imatiksasuk dutikiajai, atumshakam wi dekas Apajuí awemamuitag dusha dekajuatajum tau asan. ¹³ Atumek imá makichik waji dutikachbaunmag, tikich Jisusa nemajuina nujai betekak juwakchaugme, wi atumin: Yainkatajum, tusan segachuitjim duwi. Tujash wi atumin wake besemag egketuauwaitjim duka tsagkugtugtajum.

Pablo kempatuma junash ijagsatjime tibau

¹⁴ Kempatuma junash ijagsatjime tusan umintsan pujajai. Ya-maishkam wi atumamu sujustajum tusanuk waitkaschattajime. Wika atumin ajutjamaina nunak egatsjai, imá atumnak wainkatasan wake-jajime. Aents uchigtin aina nuuwai uchijinu atinun kuichkin ijumaina duka, uchi aina duka apajinu atinnak dutikmait sui. ¹⁵ Nunin asantai wakeesan ashí wi dutikmainaitag nunak yaigta tajime. Nunisnuk mina iyashjuish waittsattajai, atum wakanmiin megkaekaijum tusan yayakun. Wi atumin imá senchi anejime, dutikamaitkujum atumek minak imatikajum anentsugme.

¹⁶ Wi atumin segakun waitkaschauwaitjim nuna shiig dekajuinayat, wainak ajankas tsanugmagtatus tu wekaewai tujutuínawai. ¹⁷ ¿Wisha tikich yatsug aidaun awetibiajim duwiká tsanugbaijim? ¹⁸ Titun atumiin awemakun nijai tikich yatsutan awemabijai, ¿Duká tsanugmajagmaya kuichkin sujustinme tusa? Tituk wijai betekai, wagki atumin yaimpektatus wijai betek takau asa.

¹⁹ Aneetaig yatsug aidauh, ubag aidauwah, atum anentaimsagmek, tuke aneas ayamjumakagtatus tuinatsuash tautigmesh amainaitjume, tujash nuninchauwai. Jutiik ayatak Kristu nemajin asaja, Apajuish dekamunum shiig pujustinme tau asá yaigtasa taji. ²⁰ Wagki, wi atumin wainkatasan takaman, atuminian pegkegchau wainkata tachamun atum jiyaniakjum, wainka kajegkagtakjum, kajeakjum tupandaikajum, pegkegchau chichagdayakjum, chicham patatdayakjum, ememakjum, wainka pachimdaekajum batsatjumin jegashtajash tusan puyatajai. Nunú nuniakjumin wi atumin kajegkan jiyaka ai, atum minai pegkeg dekatasa dakagbauwa nu nuninchau diigsaijum tau asan. ²¹ Nuigtushkam puyatajai wi ataktú ijagsattajim duwi, atum ainajum anuiya yaunchuk nagkamas tudau takainak, pegkegchau takataijinak idaitsuk, tsanijimtanak tunamatjag batsamtau asagmatai, Apajuí atumiin datsamtan sujusmatai buutig tusan.

13

Anemtikaku inagnaku kumpamkagtamu

¹ Yamai minittag nuuwai kampakuma juna ijagsattajim nu. Aents pegkegchau takaun wainkau, jimag nuniachkush kampakumkesh etsegtuinakui, atum wajuk dutikattagme duka tumainaitjume. ² Yaunchuk wi jimaja juwi ijagsatasan tajuawabiajim duwi, pegkegchau takaajum duka idaisatajum tiuwaitjime. Tuja nui pujus tikich pegkegchau takaunash suwimkan susattajai tiuwaitjim nunak awentsanuk tajime: Wi anuí atumin ataktú ijagsatasan minittag nunikman, pegkegchau taká batsatjumin wainkan suwimkan amasajim tusan. ³ Nuna dutikakui, Kristu nigki niina takatjin inata duka shiig dekaattagme. Kristuk atumin dutijamatta duka kakakchauchi; niina senchijinak atumiin iwainaktatui. ⁴ Dekaske nigka senchigtuchua nunin wajasuí, nunikmatai yupichu achijaju ainawai, tujash yamaik Apajuí senchijjai pujawai. Jutiishkam nunisaik ni kakakchau aajakua nuninuk ainaji, tujash Apajuí senchijin Kristujai ijunja pujuinaji, atum chicham ujakta tau asaja.

⁵ Atumek niimastajum dekas pegkejash takaajum, atsa pegkegchawash takaajum nunú. Atum pegkeg takaakjumek Jisukristu atumiin pujau asamtai nuniagme. Tujash Apajuiyai kajintsá anentaimchakjumek, pegkegchau takaakjum nuniagme. ⁶ Atumesh itusagmek jutii kuashat dekapsamu asaja, dekas Kristu chicham etsegtugkata tusa awemamu ainag dusha dekaawajum tusan wakegajai. ⁷ Nuniau asan atumshakam pegkegchau takasajum tusan Apajuin aujtajime, wi Apajuin aujag nunak, wi Kristu chicham etsegtugkata tusa awemamuitag nuna dekaumatnume tusanuk tatsujai. Nunak ayatak pegkeja nuna takastinme tusan tajime, atum jutii Kristu awemachbauwa nunin diijatjuminig. ⁸ Jutiik dekaskea nuna shiwagmamaina duka makichkish takamaitsuji, chicham dekaskea duke takamainaitji. ⁹ Atum shiig ichichmamajum pujajum duwi, wi kakakchawaitkunush shiig aneasan pujajai, nuniau asan pegketnume tusanush Apajuinak tuke aujtajime. ¹⁰ Nuniau asan eke atumiin minitsuk, juna papiin agajan awetajime, wi atumiin taakun najam tiijim tusan, Apu Jisusak atumin waitkasti tusag senchijinak sujuschauwai, ayatak atumin yaigtí tusa sujusuí.

Ashimku akatmabau

¹¹ Yatsug aidauh, ubag aidauh, juna inagnakun tajime: Pegké pujakjum dakujusa pujustajum, nuniakjum ichichdaitajum, makichkia duke anentaimtuinakjum shiig agkan anentaimsa batsamsatajum, Apajuí atumin anempau asa pegké pujutan sujamsawa nunú atumiin atí. ¹² Makí makichkitijum pempentunisjumek shiig anendaisajum kumpamdayatajum. Jisusa nemajin juwi batsata dushakam ashí kumpamjamainawai.

¹³⁻¹⁴ Apu Jisukristu wait anenkagtamuji, Apajuí anenkajiya nu, Wakani Pegkejiya dushakam ashí atum aidaujai atí.

Aatus atí.

PABLO PAPÍ AGAJA GALACIANMAYA AIDAU AWETIMU

Pablo Galacianmaya aidau kumpabau

¹ Witjai Pabloitjai, aentskesh awemashbauwaitjai, wika Jisukristu maamu aajakunak ni Apají Apajuí inankiuwa nunú awemamuitjai. ² Nunin asan wi juwi ashí yatsug aidau, ubag aidau Jisusa nemajin batsata nujai kumpamkun papiin agatjime, atum Galacia nugkanum batsatjum nuna. ³ Apajuí iina Apajiya nunú, Apu Jisukristujai wait anenjamag, shiig agkan anentaimsa pujutan atumnash amastinme. ⁴ Jisukristuk nigki jutii tudaujin mantamnatatus tsagakamankauwai, yamai ju nugka tudaunum batsatainag nui agkanmitkagmata tau asa, ii Apají Apajuí wakega nunisag. ⁵ Nuaduí ¡Apajuiya duka tuke ememattai atin atí! Aatus atí.

Atsawai tikich chicham uwemtan sukagtumainuk

⁶ Atum Kristu wait anenjamjamtai Apajuí nemagkauwaitjum nunú, tikich aidau yamajam chicham uwemtan sukagta nuna yapajia etsejuinamu antukjum, Apajuí tujanjujum nuaduí anentai jegatsjai. ⁷ Dekaskenmag tikich yamajam chicham etsegbau asamtaigkish tuinatsui. Nunin aig tikich aidau tsanugmainakui nuniagme, nu aidau Kristu chichamen emesjatatus wakegainawai. ⁸ Tujash jutii pegkeg chichaman atumin ujakuitjim nuna, nayaimpinmaya aentskesh yapajia jintinjabiagtaik, Apajuí suwimkan sumainai. Minashkam wi tibaujun yapajian jintiitaik nigki suwimkan sujumainai. ⁹ Duwik timajim nunak awentsanuk tajime: Makichik aentskesh, yamajam chicham antukuitjum nuna yapajia jintinjabiagtaik Apajuí suwimkan sumainai.

¹⁰ Wi juna tajim nunak aentsun shiig awajkatasanuk tatsujai, wika Apajuí shiig awajkata tabaunum takaajai. Aents aidaujai shiig juwakta tusanush egatsjai, wi aentsun shiig awajkatasan nuniaknuk Kristu inakechu amainaitjai.

Pablo takatji

¹¹ Yatsug aidauh, ubag aidauh, ju shiig dekaatajum: Wi chicham yamagman etsejag junak aents anentaimsa tibaunakesh etsegtsujai. ¹² Wika aentskesh jintinjuamtaig dekaachuitjai, imá Jisukristua duke minak dekamtijuauwai.

¹³ Atumek wi yaunchuk mina pataag judío aidau takataijin umiakun wajuk pujujukuitja duka antukuitjume, Jisusa nemajin aidaun ainjan, dita chicham antuinamujin emegkatkatasan wekaetuyag nunú. ¹⁴ Wika mina nugkajuiya aents wijai betek tsakakú aidaunak ashí wagagsan, mina muuntug judío aidau umitaiji aina nunak imatiksasuk umikuitjai. ¹⁵ Tujash Apajuí wisha akiintsaisg, wait anenjug minak etegtuauwai. Dutijuau asa, ¹⁶ niina Uchijinash iwaintugkauwai, judi-uchu aidaunash Kristuk dekas Apajuí Uchijiyai tusa ujaktí tujutu asa, dutijuamtaish aents aidaunak: Wajukattaja, tusasuk iniaschabijai. ¹⁷ Mina, Jisus chicham etsegtugkata tusa eke etegtatsaisg, yaunchuk etegjamu aidau Jerusalén batsatunakesh gegajuan iniasta tusankesh

wetsuk, tutupnik Arabia nugkanum wenu wakettsanuk Damasco jegauwaitjai.

¹⁸ Jisus wantintugkamu kumpatum mijan nagkaemai, Jerusalén Pedro wainkatanan jegaan, niijai quince tsawan pujusuitjai. ¹⁹ Tujash nuwig Jisus mina chichameg etsegtugkata tusa etejamu aina nunak tikichnakesh wainkashbaijai, imá Jacobo Apu Jisusa yachiya nunak wainkabiajai. ²⁰ Wi juna agatjim junak, Apajuí emtinish waitjutsuk dekaskea nunak agatjime.

²¹ Jerusalén pujusan Siria nugkanum nagkaemakiuwaitjai, Sirianmayan weuwaitjai Cilicia nugkanmashkam. ²² Yatsug aidau, ubag aidau Jisusa nemajuidau Judea nugkanum batsatuk, minak igkuntus waitujakchaju ainawai. ²³ Nunin asag: “Yaunchkek jutiin aintamak yamajam chicham etsegbaunash emegkaktatus wakeyin aaya nunú, yamaik niishkam Kristu chichamen etsegtawai”, tujutuina mun antugtuinak, ²⁴ Apajuin emematiajai.

2

¹ Catorce mijan inagkeakin, ataktú Jerusalén wegakun Bernaben, Titujai ayauwaitjai. ² Tujash nunak Apajuí wetá tusa dekamtijuamtai wegabiajai. Nunikan, wi judiuchu aidaunum yamajam chicham etsegbauwa nuna etsegekabiajai. Nuigtushkam Jisukristu nemajin aidau apujinash ujakbaijai, wi takaag nunash wainka takaatsjash tau asan. ³ Tujash Tito wijai wekagush, griego aents aig pakamakti tichajui. ⁴ Nuninaig tikich dekas Kristu Jisusa nemajuinachiatak, uumak wisha Kristu Jisusan nemagjai, tusag jutiiní wayaa dekamatus yujasajui, jutii Jisusai agkanmagauwaitag nuna, ataktú awagtamki judío aidau umitaijiya nui aputamsagtatus. ⁵ Tujash jutiik machikish ditak antugkashbaiji, yamajam chicham dekaskea nu jutii etsegbau antukuitjum duka, atuminish nunisag atí tuidau asaja.

⁶ Jisukristu nemajin aidau apuji aidauk, nuigtuk yamajam chichanakesh ujakchagmayi, (wika dita wajukuk aajakú ainawa nunak puyatjatsjai, wagki Apajuí diismak ashí betek ainag duwi). ⁷ Apajuí Pedron judío aidau ujaktá tusa awebauwa nunisag, minashkam yamajam chichama ju judiuchu aidau ujaktá tujutbauwa nunak dekgatuawajui. ⁸ Apajuí Pedron: Judío aidau yamajam chicham ujaktá, tusa awebauwa duke minash: Judiuchu aidau ujaktá, tusa awetiuwai. ⁹ Apajuí dutijuamua nuna Jisukristu nemajin aidau apuji Santiago, Pedro, Juan aina nunú dekajuawag, minak Bernabejai apatukag uwegnum achigmatak shiig anenjamsagmayi. Dutijamawag jutiinak: Judiuchu aidaunum takastajum, tujamak ditak: Judío aidaunum takasagtati, tiagmayi. ¹⁰ Dutijamawag: Ujunauch aidau Jisukristun nemajuidau Jerusalén batsata nunú yaigtajum, tujabiajai. Nunak wishakam shiig kuitamsan takastasan kakanmamsabiajai.

Pablo Antioquía pujus Pedro jiyakbau

¹¹ Tujash Pedro yaakat Antioquía taa, yatsut bakumamainun nuniau asamtai, tikich Kristun nemajin aidau emtin jiyakbaijai. ¹² Yama nagkamchakug judiuchu aidaujai ijunag yu pujayatak, Jerusalegnunia aidau Jacobo awemamu kaunkamtai, ditak pakamaku asagmatai, nuna ishamak tupaag wekagas, ijunja yutanash idayas wekagu asamtai. ¹³ Pedro nuniaun wainainak, tikich judío Jisukristu nemajuidashkam,

judiuchujai ijuntuja yutanak dakitjajui. Nu nudiagtai Bernabeshkam judiuchujai ijunja yutanak dakitjabi. ¹⁴ Tujash pegkeg chicham dekaskenum etsegna nuna betek umiinachun wainkan, aents tuwakbaunum Pedro chichagkun: “Ame judiuchuwaitkum judiuchu wajukmaina nunimum dusha, ¿wagka judiuchu aidaush judío wajukena nuninuk emaktasamesh wakejame?”, tibaijai.

Judiuchu aidaush judío aidaushkam Jisukristui kajinas anentaimainak uwemkajui

¹⁵ Jutiik dekas judío ainaji, nunin asaja chicham umiktina dushakam shiig jintintuamu ainaji, judiuchu aidau chicham umiktinnash dekachu aina nuninuk ainatsji. ¹⁶ Iman ainayatkuish chicham umikmawaik pegkejaitme tama amainchauwa nu dekaidau asaja, jutiik imá Jisukristuig kajintsá anentaimainaji. Jisukristui kajintsá anentaibaunum Apajuí, pegkeg ainagme tujamtin asamtai, chicham umiktá tibauwa nu umiamunmag, Apajuik pegkejaitme tujamchatnai. ¹⁷ Nunin asamtai Kristu dekaskeapi tabaunum pegkejaitme tama atasaja egainag duka, jutiish tudaugtin asaja nuninaji. Tuja Kristuig kajintsá anentaimainaku chicham umiktajum tibauwa nunú uminatsug dushakam, tudau weenaku nuninatsji. ¹⁸ Wi aents aidaun Jisukristui kajintsá anentaimkujum uwemainaitjume tiu ayatkun, dekas chicham umiktajum tibauwa nu umiakjum uwemainaitjume takunuk, wiki bakumamainaitjai. ¹⁹ Chicham umiktinun umiktasan pujaknuk, jakaujai betekak wenu pujubiajai. Tujash yamaik chicham umiktin aidauk, ashí mina tudaugjai Jisukristu achinag mantamdauwa nui nagkaanjamtai agkanmagan tsagagjai. Nunikan Apajuuijai pujajai. ²⁰ Nuniku asan wichauwaitjai iwaaku pujag nunak, Kristu minai puja nu iwamtijawai minak. Wi yamai iwaaku pujag nunak, Apajuí Uchijí mina anentu asa, minai mantamdauwa nuanuí kajintsá anentaibauwai pujajai. ²¹ Apajuí aents uwemjatnume tusa wait anenkagtak dutikamujiya nunak wika dakitatsjai, tuja chicham umiktina nu umiamunum Apajuí pegkeg ainagme tujamainaitkuig, Kristuk wainak mantamdau amainai.

3

Wakaní Pegkejiya duka Jisukristui kajintsá anentaibaunum junawai

¹ ¡Atum Galacianum batsamin aidautigmek anentainkachu ainagme! Wi anuí pujusan, Jisukristu achijam jakauwai tusan etsegkui, paan achigbau wainkajum anentaimtumainaitjum imatiksajum anentaimtibiujum nunash, ¿ya atumnash chicham dekaskea nuna umikainum tusash tsanugmajaje? ² Juna aigkatnume tusan wakegajai: ¿Wakaní Pegkeji jukiwaitjum dusha, chicham umiamunmag jukiwaitjum, atsa Jisukristui kajintsá anentaibaunum jukichukaitjum? ³ Atum Jisukristui kajintsá anentaibiagtai, Wakaní Pegkeji niina senchijin amasajui, Apajuí wakegamun takastinme tujamu asa. Tujash ¿wagka: Jutiik kakanmamainaitji Apajuí wakegamu takasta takuik, tajume? ⁴ ¿Kuashat pegkeg takaidau asajum waitkam asauwaitjum duka, wainkagmek waittsauwaitjum? ⁵ Apajuí Wakaní Pegkeji sujamsau asa, atum wainkashbaun iwaintugma nunash ¿chicham umiktajum tibauwa nu umiamunmag dutika, atsa Kristu pachisa etsegbau antukjum kajintsá anentaimu asagmin dutikatsuak?

Apajuí Abrajai chicham apakbau

⁶ “Abragkak Apajuiyai kajinas anentaimu asamtai, Apajuishkam pegkeg diisuí.” ⁷ Jujú atumek shiig dekaatajum, dekaskenum Abraham wegantu aina duka, Apajuiyai kajinas anentaimin aina nu ainawai. ⁸ Tuja yaunchuk chicham agagbau aajakua nuwig, judiuchu aidaunash dekaskeapi tabaujinig Apajuí pegkeg ainawai tama agtin dekau asa, emtika Abraham pegkeg chicham ujakbau aajakuí: “Ashí nugkanmaya aents aidauk imá aminig pegkegnum yaigbau agtinai”, tiuwai. ⁹ Nu aatus asamtai Jisusai kajinas anentaimaina dushakam, Abrajai betekak pegkegnum yaigbau ainawai.

¹⁰ Ashí aents: Chicham umiktin yaunchuk agagbauwa nunú umiaku uwemainaitji, tuidauk dita bakumamainnumag batsatainawai. Wagki, agagbaunum chichaak: “Ashí aents chicham umiktin agagbauwa nuna imatiksag umiinachuk, suwimkan jukitnume”, tibauwai. ¹¹ Dekas duka paantai, makichik aentskesh chicham umiktin agagbauwa nuna umiak Apajuí pegkeg diiyam amaitsu duka. Ni chichame agagbaun-mashkam: “Aents pegkejan takaa duka, imá Apajuiyai kajintsá anentaibauwa duwik ajumaish tuke pujustinai”, tawai. ¹² Chicham umiktina duka Apajuiyai kajinas anentaimu tuke pujutnai tatsui. Chicham umiktina duka: “Aents chicham umiktina nuna imatiksag umiauk, nu umiamua duwik tuke pujutnai”, tawai.

¹³ Chicham umiktina nuna umiinachuk suwimkan jukitnume tibau aajakua nunak Kristu agkanmitkagbauwai, iina ayamjutpakta tau asa ni suwimkan juwak mantamdauwai, nunisag agagbaunmashkam: “Aents maamua nu numinum nenam awa duka, Apajuí aents tikima katsek tudaugtin dutikatajum tibau asa dutikam awai”, tawai. ¹⁴ Nunak Apajuí Abragkan pegkejan anagkuauwa nunash, judiuchu aidaush Kristu Jisusai dekaskeapi tabauwai, Apajuí Wakaní Pegkejin anagtamauiwa nunash jukitnume tabaunum nunikui.

Chicham umiktina duka Apajuí anagkagtuamuiya nunak emegkau-maitsui

¹⁵ Yatsug aidaush, aents aidauti nunitaijiya nuna pachisan tajime: Makichik aents tikich aentsjai chichaman umiinak papiinum agajag nuní atí tusa firmamunak,* makichkish nuna esaktumainuk, nuigtú eketus dutikmainush atsawai. ¹⁶ Numamtuk Apajuí Abragkan anagkuak: “Wiki yaigtinaitjame, dutiksanuk amina tijajumnash yaigtinaitjai”, tiuwai. Tuja agagbauwa nui Apajuí Abragkan anagkuak: “Tijajumin kuitamkatnaitjai”, tibau awa duka: “Kuashat tijajum aidaun kuitamkatnaitjai”, tatsui, “makichik” tawai, nunak Kristun taku tiuwai. ¹⁷ Wi tajim duka juuwai: Apajuí Abrajai Kristun pachisag chichaman apakú aina nunak dutiksag kuitamkauwai, dutikamu asamtai cuatrocientos treinta mijan nagkaemai, Moisés chicham umiktinun agajua nuwish, Apajuí anagkagtuamuiya duka nunisag juwakui. ¹⁸ Apajuí anagtamauiwa nunú chicham umiktina nu umiaku jumainaitkuig, ni anagtamauiwa duka wainak amainai. Tujash Apajuik Abragnak: Wi wait anentau asan yaigtinaitjame, tusa anagkuauwai.

¹⁹ Aatus aish, ¿wajinma atumnawa chicham umiktina dusha? Chicham umiktina duka ayatak aents aidau tudaujin dekaatnume

* **3:15** Chicham firma tawa juka iina chichamenig tumainchau asamtai, nuigtush yapajiash tumainchauwa duwi jutiksaik ukuaji.

tabaunum dutikamui, nunú nuniai Apajuí Abrugkan: “Tijajumin yaigtinaitjai”, tusa anagkuauwa dushakam akiinauwai. Chicham umiktin aajakua nunak, Apajuí nayaimpinmaya aentsun aweti Moisesnak ujakam, niishkam aents aidaun ujakuí. ²⁰ Abrugkak tikich chichamjutkati tusag atsumjachui, imá Apajuik niina igkuas dutikatnaitjai tusa anagkuauwai.

Chicham umiktina duka Kristu dutikauwa duwi nagkankauwai

²¹ Apajuí Abrugkan anagkuauwa duka, Moisés chicham umiktinun agajua nujai mai pegkejai iina yaimpau asa. Tuja chicham umiamunum aentsuk uwemkatnume tibauwaitkuig, nu umiamunum pegkeg ainawai tama amain ainaji. ²² Tujash agagbaunmag ashí aentsuk tudau achikbauwa nunin ainawai tujamji, ya aidauwa Jisukristui kajinas anentaimiagtatua, nu aidau Apajuí anagkagtuamua nunak jukitnume tujamu asa.

²³ Nu ii kajintsá anentaimtumaina nu eke taatsaigkik, achijatin aidau aentsun achig chimpia pujuja numamtuk chicham umiktina duka aputamajakuí. ²⁴ Chicham umiktina duka, inak uchin kuitamak jintintama numamtuk kuitamjamajakuí, Kristu taamtai niini kajinas anentaimaidaunak, pegkejaitme tama agtinme tujamu asa. ²⁵ Tujash yamaik yaayai kajintsá anentaimainaji, nuaduí yamaik chicham umiktinuk atsumainatsji.

²⁶ Yamaik ashí Apajuí uchijí ainaji, Kristu Jisusai kajintsá anentaimaidau asaja. ²⁷ Nunikaju asaja yamimakagji Kristujai ijutkau pujamu iwainmamkatasa. Nuniku asaja ni wajuksa numamtuk wajainaji. ²⁸ Dutikamu asaja juka judiuwai, griegowai, inataiyai, inashtaiyai, aishmagkui, nuwai tabauk atsawai, wagki Kristu Jisusai ijutkau ainag nuwig ashí atum aidautigmek makichkia nunin ainagme. ²⁹ Atumek Kristunu asajum Abraham wegantu ainagme, nunin asajum Apajuí Abrugkan anagkuauwa dushakam imatiksagmek jukiagtin ainagme.

4

¹⁻² Juna augmattsan ujaktajime: Aents makichik uchigtin asa, ni jaak nuna uchin: Ashí midau waji aina duka aminu atí, tinu ainawai. Uchijin tayatak, duka tikima uchuch asamtai, tikich aentsun: Ame kuitamsam muumpagmatai sujuttsatin atá, tinai. Apaji aaja tibau akush uchik, wajiik dekas niinu aigkishkam, nunú aentsun inakega nunin we pujus, tsakaak niinu emawai. ³ Numamtuk jutiinash nagkaetamui, yaunchkek jutiish dekachu asaja uchijai betek aajakuitag duwi, chicham umiktina duka jutii judío aidautinak inak itugmaina numamtuk achikam batsamajakuitji. Nuniajin atum judiuchu aidautigmek, ju nugka juwiyen pegkegchau pachis jintinamu umijujakuitjume. ⁴ Nuní batsatjin Apajuí tibauwa nunú tsawan uminkauwai, nunikmatai niina Uchijin awetugmauwai, dutikam makichik nuwanum egkemak akiinauwai, nunikmatai chicham umiktinum tawa dutiksag dutikawajui, niishkam chicham umiktin tawa nunak dutiksag umikuí. ⁵ Chicham umiktajum tibauwa nu umiktasa waitú batsatutin, Kristu agkanmitkagmamtai, niini kajintsá anentaibaunum Apajuí uchijí waigtinme tujamu asa. ⁶ Kristu agkanmitkagmau asamtai, Apajuí Wakaní Pegkejiya nuna awetugmauwa nu ichashtamkui: “Mina Apag” tuinaji. ⁷ Nunin asamtai yamaik inaku waitkataiya nuninuk ainatsjume, Apajuí

uchijí ainagme, nunin asajum atum Kristu nemagbaunum Apajuí sujamsatna dushakam jukitnaitjume.

Pablo Kristu nemajuidau pyyatjusa anentaimtamu

⁸ Atumek yaunchkek Apajuik dekachu asajum, wainka apajimtai aina nu umigkujum waitujakuitjume. ⁹ Tujash yamaik Apajuí atum-jaish ijutkau asamtai, yaita Apajuish duka shiig dekajume. Apajuishkam aikasag atumnash shiig dekagmajume, atumesh ya ainagme nunak. Nunin aish ¿wagka atumnash yaimpamainchau, nuigtush uwemtijamainchau, Apajuiyai ayatak datumtamain aina dusha, ataktú waketjukum umigkatasagmesh wakegagme? ¹⁰ Atumek Jisukristui kajintsajum anentaimiatkujum, mina pataag judío aidau Kristun kajinas anentaimtuchu aidau wajukena nuniagme. Nuniakjum yaunchuk Moisés agagbaunum: Tsawan, nantu, mijan aina juna pachis tibauwa nu, jutsu Apajuin shiig awagmatai tusajum umiktasajum takaagme. ¹¹ Atum ju dutikakjume, wi atumin jintintuamijim duka umiatsjume. Nuniakjumin wi atumin jintintuamijim nunak, wainkanuap jintiaja tusan uyumajai.

¹² Yatsug aidauh, wi wajukauwaitag nuniktajum tusan segajime, wisha atum wajukeyajum ankauwaitjai, chicham umiktin aidau umiakun pujusan. Atumek minak makichkikesh tutitag awajtukchauwaitjume. ¹³ Atumek dekagme, wi yama nagkamchakun yamajam chichaman ujayajim nunak, jaakun senchi waitiyatkun wekaesan ujayajime. ¹⁴ Nunú jata mina waitkajia nunú, atumnak shiig antumainchau awajtamianume. Nuna imaniakuish dakitjugum idaitutsuk, nayaimpinmaya aents nuniachkush Kristu Jisus taamtai kuitamainaitjum imatijusjum kuitamjukuitjume. ¹⁵ ¿Nunú imanika shiig aneejakbaush, yamaish wajukagmea sakapakugme? Atum wi mina jijuí waitiakui, jiish ukuintaitkuig atumi jiim ukuinka sujumain awatuyujum nuaduí tajime. ¹⁶ ¿Wi atumin dekas chicham dekaskea nuna ujakuitjim duwiká minak dakitjajum?

¹⁷ Aents atumin senchi yaigtasa wakejajime tusa imatjutpaina nunak, jutiiní datumtamjag, dita waitan jintinjamaina nunak jintinjamatasag imatjutpainawai. ¹⁸ Dekas tikich yaigtasa wakegamua duka pegkejai, tujash pegkeg anentaiyai dutikamua nu. Nuna aatus dutikauk, tuke nuninuk amainai, imá wi atumjai pujuttag duwi nunitsuk.

¹⁹ Mina uchig aidauh, wika nuwa uchin najaimak waitama imanikan ataktú atumiin waitiajai, atum Kristu umigkujum nijai ijutkau pujachu asagmin. ²⁰ Wakegajai, utugkanuk yamaya juwik atumiin taan tikichin yapajian ujakajim tusan. Atumiin kuashat anentaimtakun, wajukawajak anentaimjai.

Agar Sarajai augmathau

²¹ Atum chicham umiktina nu umiktasajum wakegautijum tujuttajum, ¿Atumek antukchaukaitjum chicham umiktin juna tawa duka? ²² Nu agagbaunmag, Abragkak jimag uchi ajujakuí tawai, makichik uchijiya nu ni inakenia aajakuí, tuja tikich uchijiya duka dekas niina nuwe inakchauwa nuwiya ajakuí. ²³ Agar inak aajakua nui uchi akiinawua nunak, Abraham Sarajai wakegau asamtai akiinawuai. Untsu Sarai akiinawua duka, Apajuí anagkuauwa nu uminbaunum akiinawuai. ²⁴ Jujú jimag nuwa aina juka kuashat anentaimtusa

dekamain ajawai, makichik nuwa nu Apajuí Abrugjai chichaman apakajua nuna iwainawai. Tikich nuwa nunú Apajuí muja Sinaí tuta-num chicham umiktinun Moisesan suwak, niijai chichaman apakua nuna iwainawai. Agarai akiinaidauk inak agtina nunú akiinkauwai. ²⁵ Tuja Agar anentaimtakuik, muja Sinaí tutai Arabia nugkanum awa nuanuí Apajuí Moisesan chicham umiktinun susauwa nu dekaji. Tuja nuigtushkam dekanui niini akiinau aina duka inak aina nunú. Nuigtú Agar anentaimtakuik dekanui, yamai yaakat Jerusalén batsamas chicham umiktajum tibauwa nuna umiktatus waituina duka inaku waitkataiya nunin asag, Apajuí dekas uchijí ainatsui. ²⁶ Untsu Sara inakchau aajakua nunú, nayaimpinmaya Jerusalegka nuna iwainawai, nuna uchijí aidauk jutii aidautiyaitji, dekas Apajuí uchijí aidautik. ²⁷ Chicham agagbauwa nuwishkam:

“Nuwa uchin uchigmachuh,

shiig aneasta,

uchijum atsugtamu asamtai.

Shiig aneamugmin untsumkata,

amek uchi uchigmaku

najaimatash dekapasachu asam.

Nuwa idaisamu aina nunú

imá kuashat uchigtin atin ainawai,

nuwa aishintin aidaun nagkaesau”, tawai.

(Junak kuashat aents aidau Kristui kajinas anentaimaidau Apajuí uchijí agtinai tusa tiuwai).

²⁸ Yatsug aidauh, ubag aidauh, atumek Apajuí Isaac akiinatnai tima akiinauwa numamtuk akiinau asajum, Apajuí uchijí ainagme.

²⁹ Tujash yaunchuk Abraham Sarajai wakegau asamtai, Agarai uchi akiinauwai. Tuja Apajuí akiinati tibau asa Isaac Sarai akiinauwa nuna,

Agarai akiinauwa nu kajejuakua numamtuk, yamaishkam chicham umiktajum tibaun umiina nu, Jisukristui kajinas anentaimaina nuna kajejuinawai. ³⁰ Apajuí chichame agagbauwa nui, Apajuí Abrugkan

chichajak: “Nuwa inaku waitkatia anka niina uchijijai jii kim awemata,

wagki Sarai uchi akiinauwa nu juwamunak, Agarai akiinauwa duka jumainchau asamtai”, tiuwai tawai. ³¹ Jutii Jisukristui kajintsá

anentaimaidautik, Agar inatai aajakua nuna uchijiya nuninuk ainatsji. Jutiik Sara Abrugkan nuwe inashtai aajakua nuna uchijiya numamtin

ainaji.

5

Kristu agkan etabijua nunisjumek pujustajum

¹ Atumek chicham umiktajum tibauwa nu umiktasajum waitú batsatutigmin, Kristu agkanmitkagmawajua nunisjumek agkan pujustajum. Ataktú chicham umiktin umiktasajum waitiujum duka waketjukigpajum.

² Shiig antugtuktajum, wi Pablon tajime, atum pakamakjumes Kristu yayamak achattagme. ³ Ataktú awentsanuk tajime: Aents

pakamauk chicham umiktin agagbauwa nunak imatiksag umimainai.

⁴ Atum: Jutiik chicham umiktajum tibauwa nu umiinau, Apajuish pegkeg diyaam amainaitji, tuidau asajum Kristuk tupanjaugme. Imá Kristuig kajintsá anentaimjumin, pegkeg ainagme Apajuí tujamaina

duka atumek dakitjaugme. ⁵ Tujash jutiik Wakaní Pegkeji jutiiní pujau asamtai, Kristu dekaskeapi tau asajin pegkeg etamkauwa duwi, Apajuijai pujustinaitag nu dakainaji. ⁶ Wagki pakamaku akush, pakamakchau akushkam Kristu Jisusaig wainkayai, dekas Kristu Jisusai kajintsá anentaimku Apajuí aneamunum, tikich aidaujaish aneniamua nuna Apajuik wakegawai.

⁷ Duwik shiig pujubiujum nunash, ¿ya chicham dekaskea duka umikaigpa tujabiaje? ⁸ Aannak Apajuí aikagmachaje, nigka ay-atak mina aentsug atinme tusa etegtamjajui. ⁹ Nunin aig atumin waitan jintinjamawaju aina duka, levadura piipich ajuntuamuitak, ashí nanegbauwa nuna wampushmitkama numamtuk awajtamkaje. ¹⁰ Tujash antsagkeap batsamtatua tatsujime, Jisukristu ataktú aannak idaimitkagmak, duwik batsabaijum nuninuk etabiagtaiyap, Apajuí atumin tsanugmaju aidaunak suwimkan susattawa, tajai.

¹¹ Yatsug aidauh, tikich aidau mina pachittsag: Pabloshkam Jisukristu kajinas anentaimaidaunash pakamaktajum, tusa jintintui tujutuinawai. Nunú dekas ataik mina pataag judío aidauk waitkagmainchau ainawai. Wika: Jisukristu achijá maamua nuanuig kajintsá anentaimkujum uwemjau asajum pakamamaitsumge, tusan etseju asamtai waitkajuinawai. ¹² Aents aidau atumin chichagtamainak: Pakamakjum uwemainaitjume, tusa jintinjamá yujaina duka, dekas ditak juú tamawaik ashí tsupik ajapmain ainajama tajai.

¹³ Yatsug aidauh, ubag aidauh, atumnak Apajuí etegtamag, chicham umiktajum tibauwa nu umiktasa pujutnumag agkanmitkagbau ainagme. Tujash agkanmitkamuitjai tusa ii pegkegchau wakegamu takata duchauwai. Apajuik wakegawai agkanmagau aidauk, tikichjai pempeentuniki aneemis yainikagti tusa. ¹⁴ Chicham umiktin agagbauwa duka: “Amek anenmamsam amejai ijutkau aidauh aneeta”, tawa nu imatiksaik umiamunum ashí chicham umiktinum awa duka uminui. ¹⁵ Tujash kuitamamkatajum, pegkegchau chichagdayakjum, nuigtú pegkegchau takagdayakjum pempeentuniki anenita nunú atumek megkaekajum.

Wakaní Pegkeji wakega nunisaik pujumain

¹⁶ Nuaduí tajime: Wakaní Pegkeji wakega duke takaakjum, atum pegkegchau wakegamu takata duka idaisatajum. ¹⁷ Pegkegchau wakegamua nunak Wakaní Pegkeji dakitawai, nunisag aentsnum pegkegchau wakegamu awa dushakam Wakaní Pegkeji wakegamua nunak dakitawai. Aatus dakitjunidau asamtai, ii wakegamua nunú takaa, Wakaní Pegkeji wakegamua nunú takaa wajamait sui. ¹⁸ Tujash Wakaní Pegkeji jintinjamkuí ni wakega duke takau asajum, chicham umiktajum tibau umiktasagmek anentaimtumaitsumge.

¹⁹ Pegkegchau wakegamu takaamu paan wantiina duka ju ainawai: Ekagmam, tsanijinbau, Apajuí tsuamain diyamu aina nu takaamu, ii pegkegchau wakegamua duke tunamatja pujugbau, ²⁰ apajimtai dakumkamu emematbau, wawejatbau, kajegkagtukbautak pujamu, tsuwat chichamtin, akasmamu, waa waamak kajeamu, shiwagmatkagtamu, datumkagtamu, niish kanaktatus imá anentaimin, ²¹ pegkejan takaidau kajejamu, nampeamu, yuwa yuwakua wegamu, nuigtú tikich jumamtin aidaunashkam tibaijime. Tuja juna pachisan yaunchuk

tibaijim nunak awaksanuk anemtikjime, jujú aidaun takaa batsatuk Apajuí inamtaijinig wayaachagtin ainawai tusan.

²² Untsu aentsnum Wakaní Pegkeji pujugbau aidauk: Anejatnai, shiig aneenai, shiig agkan anentaimas pujuwai, waamak kajeakchau, shiig awakagtin, wait anenkagtin, ni tibaujinak betek uminai, ²³ tikichin nagkaesau anentaimtumachu, niina pujutinak kuitamak pujuwai. Ashí junin amain ainawai chicham umiktajum timawa nuwish, jujú aidauk dutikmaitsui tachau asamtai. ²⁴ Pegkegchau takatnak idaisatnume tusa Kristu Jisus jutiiní achinjau asamtai, jutiik Kristu Jisusai ijutkau pujuuidau asaja, jakau pegkegchaun takamaitsu nunin anenmamainaitji. ²⁵ Yamai Wakaní Pegkeji pujugmautik, nu Wakan takamtijusti tusa idaimamainaitji.

²⁶ Emebau achagmi, shiwagmaetash shiwagmaetsuk, tikich pegkejan takainamu diisá pempeentuniki kajegdayá batsamchagmi.

6

Tikich aidaujaish pempeentunikjum yainiktajum

¹ Yatsug aidauh, ubag aidauh, atum ainajum anuiya pegkegchaun takau dekagkugmek, atum Wakaní Pegkeji wakega nunú takautijum yaigtajum esemamati. Tujash anejasum dutikatajum, nuniakjumesh atumesh kuitamamkatajum, dita pegkegchaun takaina dutiksagmek takasajum. ² Atumek utugchat ajutjamainakuish pempeentunikjum yainiktajum, aaja dutikdayakjum Kristu timawa nu umiktatjume.

³ Makichik aentskesh imanchauwaitak eme anenmamá wekaguk, tsanuamak tu wekaewai. ⁴ Tikich pujamujinak diigtsuk, makí makichik ditá pujutjinak diimainai, nuniau asag pegkejan takainakjag shiig aneemain ainawai. ⁵ Wagki, makí makichik Apajuí wakegamunash wajuk takainawa nunak diimain ainawai.

⁶ Kristu chichame atumin jintinjamuk, atum jintinbautijum ashí ni atsumamujig yaigtajum.

⁷ Wainkajum anentaimigpajum. Apajuinak makichkish tsanumain ainatsui. Aents ni ajakmamujin juu aina numamtuk, makí makichik dita takasbaujin dutiksag jukiagtinaí. ⁸ Aents ni wakejamujinak takasuk, nuwiyanak juwak waittanum wegagtinaí. Untsu Wakaní Pegkeji inam nunak umigkau aidauk, ditashkam nuwiyanak pujut tuke atina nuna jukiagtinaí. ⁹ Nunin asamtai pegkeg takata duka mijatkachagmi. Imani batsatu asá, iish imanisaik batsatkuik tsawan jegakui, ajak ajakmabau juutia numamtuk Apajuí pegkeg aina nuna sujabau jukitnaitji. ¹⁰ Tsawan eke awa juwik ashí aentsuk tutit awajtsuk pegkegnum yaigtajum, tujash Kristu nemajuina nujai imá senchi yainiktasajum wakeetajum.

Inagnaku ujaniamu

¹¹ Wi yamai junak mina uwejuí letra muuntai agatjim ju diistajum. ¹² Kristu numinum achijá maamua nuna pachisa etsejai waitkagsainum tuidau asag, pakamagtajum tujamainawai, aents aidauh shiig anenjustinme tusag. ¹³ Tujash dita pakamaku aina dukesh chicham umiktina nunak betek umiinatsui. Nuninayatak atumin pakamaktajum tujamainawai, atum nunikagmin wi tima ankaje tusag ememagtatus. ¹⁴ Tujash wika wiki eme anenmamtanak wakegatsjai.

Wakegajai ii Apuji Jisukristu numinum achinag mantamdauwa nunak ememattasan. Kristu minai numinum achinag mantamdau asamtai, wika ju nugkanmaya aidaunak uyumatsjai. ¹⁵ Wagki Kristu diismak pakamaku akush, pakamakchau akushkam wainkayai. Dekas imana duka Wakaní Pegkeji yamajam pujutan sukagta nuuwai. ¹⁶ Atum Apajuinu aidautijum, jujú tawa jutiksagmek batsatutigminak, nuigtú Kristu nemajin mina pataag Israel aidautigminash, Apajuí wait anenjamag shiig agkan anentaimesa pujutan amastinme.

¹⁷ Yamai nagkamsanuk utugchatan aputugsatnume tusanuk wakegatsjai, wagki mina asutuawagbau iyashjuí esamkamu ajutuina nuna diisan: Wika dekas Apu Jisukristun inakempapitja tumamjai. ¹⁸ Yatsug aidauh, ubag aidauh, ii Apuji Jisukristu wait anenkagtamujiya nu atumi wakanminish uyuntamsagti.

Aatus atí.

PABLO PAPI AGAJA EFESONMAYA AIDAU AWETIMU

Pablo Efesonmaya aidau kumpabau

¹ Witjai Pabloitjai, minak Apajuí etegtua Jisukristu chichame et-segtukti tusa wakegau asa awetiuwai. Atum Kristu nemagkujum Apajuí aentsji waigkú aidautijum Efeso batsatutigmin kumpamjime. ² Atumnash iina Apají Apajuiya nu, ii Apuji Jisukristua nujai wait anenjamaidau asag, shiig agkan anentaimsa pujutan amastinme.

Jisukristu nemagka pegkeg pujut juwamu

³ Apajuí emematiagmi, iina Apuji Jisukristun Apajiya nunú, nigki ashí pegkeg nayaimpinmaya aina nunak sujamsauwai Jisukristu nemagkaju asajin. ⁴ Apajuik nugkanash najantsuk jutiinak etegtam-jauwai. Dutika: Mina Uchijun Kristun awematjai, dutikam aentsun ayamjak mantamnamtai, wi ditan tudaugtuchu emaktajai, dutikam mina emtijuish imanisag wantintinme tujamu asa. ⁵ Apajuik duwik nagkamas imá niina anejattajinig: Wi ju aidauwak, atak mina Uchig Jisukristu ditai mantamnamtai imá niinig kajinas anentaimainakui, uwemtikan mina uchig emaktin atajai, tiuwai. ⁶ Nunak Apajuik jutii wait anenjabaunum, niina Uchijí anetaiijya nunú jutiiin mantamnamunum tuke emematjitin atinme tusa dutikauwai. ⁷ Nuna dutikau asa Kristu numpe ukaejamunum agkanmitkagma tudaunash tsagkug-tamjauwai, nunak imá niina anenkajinig dutijamaui. ⁸ Dutijabau asa jutiinak shiig kuashat dekatan amasú. ⁹ Duwik nagkamas Apajuí nigki anentaimas mina Uchig Kristun awematin atajai tibaun dekamtijamachua nunash yamai shiig iwaintugmak dekamtijamaji. ¹⁰ Nuniku asa ashí nayaimpinmayan, nugkaya aidaujai ijumjattawai ni tibaujiya dutiksag, dutikamtai Apushkam imá Kristuk tuke atinai. Nunak ni tsawan tibauji jegatai, uwaetsuk dutikatnai.

¹¹ Apajuik yaunchuk nagkamas jutiinak etegtamjauwai, dutijabau asamtai Kristui ii jukitnuk ajutjamainaji, nunak yaunchuk Apajuí ni wajuk dutikatatus wakejukaya anentaimtujuita, dutiksag dutikatnai. ¹² Nunak dekatkauk jutii judío aidautin Kristui kajinas anentaimainakui uwemtiatjai, dutikam minak emematjitnume tujamu asa dutikauwai. ¹³ Kristu chichame dekaskea nu etsegku, uwemat awai tabau antukjum, atumesh Kristui kajintsa anentaimu asagmin, Apajuí niinu etamak Wakaní Pegkejin awetitnaitjime tusa anagtabauwa nunash amasajui. Dutijamau asamtai yamaik niinuap ainaji tusa dekainaji. ¹⁴ Nunú Wakania nuuwai, Apajuí sujabau jukiagtin asajin emtika amasmauwa nu, jutiiin ashí agkanmitkagma niina aentsji etamkatna duwi, dutijamamtai ashí jutiiik Apajuí senchigtina nu ememattinaitji.

Pablo Apajuí see tibau

¹⁵ Nuaduí atum imá Apu Jisukristuk kajintsa anentaimtakjum ashí tikich Apajuí nemajuidaujaish aneeniamugmin pachis chichainamun antukan, ¹⁶ Apajuinak mijattsuk see tusanké ajai atum nuniajum

nuaduí, nuigtú Apajuí aujkuunush atumin pachisan tuké segattsanké ajime. ¹⁷ Iina Apuji Jisukristun Apají dekas senchigtina nunú dekatan amasagmatai, atumesh Jisukristush shiig paan dekaatajum tusan. ¹⁸ Anentaimta nunú iina jiiya numamtina nunashkam tsauptin etugtamtinme tusan Apajuin segajai, dutijamamtai atumshakam niina aentsji asajum, nayaimpinum atumdau ajutjamtin dakainajum dushakam shiig dekaatajum tusan. Apajuik niina aentsji etegjamunak tikima shiig wakejumainun pegkejan suwawai. ¹⁹⁻²⁰ Junashkam shiig dekamtikatasan wakejajime: Apajuik tikima senchigtinai, ni utujimainjig atsujui, nigka ashí dutikmainai. Iman asa ni nemajuidautinashkam nigki ayamjutpawai. Kristun maawag ukusagmataishkam nunú senchiik ataktú inankiuwai. Dutika nayaimpinum iwakuí, niijai pujus inamjatatus. ²¹ Apajuí Kristunak, nayaimpinmaya senchigtin aina nuna nagkaesau, iwanchi senchijinash, nugkaya apu dekas senchigtin aina nunash, ashí najankamu aina nuna nagkaesau senchitikauwai, yamaya juwish atak atina duwishkam. ²² Dutika ashí najankamu aina nunash, nuigtú niini sujumankau aidaunashkam Apuji ema idaisauwai, ni diísti tusa. ²³ Dutikamu asá ni nemajuidautik Kristu iyashiya nunin ainajin, ni jutiiní ashí jajutua pujau asamtai machikish agkau atsa nunisag, ashí ni najankamunmash awai.

2

Apajuí anenkajin uwemkau ainaji

¹ Atumek yaunchkek Kristui kajintsá anentaimainachu asajum, Apajuí pujutan sukagtina nujaiğ tupagkiu aajakuitjume. Nunin asajum jakaujai betek batsamajakuitjume pegkegchau takaakjum, Apajuí umigchau asajum. ² Ju nugkanmaya pegkegchau takat aina nuna, wakan pegkegchau apuji iwanch, aents Apajuin anentaimtuchu aidaun takamtika, nunuke takajakuitjume. ³ Jutiishkam duwikik antsaik, ashí ii pegkegchau takastasa wakejamuk, ii pegkegchau anentaimtamujig wakejusa takainaku batsamajakuitji. Nunijakú asajin, Apajuik tikich aents pegkegchau takaidaun suwimkan suwakug jutiijai suwimkanak sujamaín aajakuí. ⁴ Tujash Apajuik shiig senchi wait anenkagtina ibau asa, imá niina anenkajinig anempajui. ⁵ Jutiik iina tudaujinig jakaujai betek batsatjinig, Kristu maamu aajakuitak, ataktú nantakiuwa duwi pujutnak amasuí, imá niina wait anejattinig uwemtikam asauwaitji. ⁶ Wagki, Kristu Jisusjai ijutkau asaja Kristujai betek nantakiu ainaji, nunikaja niijai betek nayaimpinum inamjatasaja. ⁷ Juna jutikauwa nunak atak ashí aents aidaun iwaintuktatus dutikauwai. Ni shiig senchi wait anenjabaujiya nunak, jutii Kristu Jisusai ijutkau pujuinajinish, wajuk wait anenjamsaya yaimpaji nuna iwainawai.

⁸ Imá niina wait anenkagtutinig, nuigtú niina Uchijinig kajintsá anentaimu asagmin uwemtijamjajui. Nunak atum pegkeg takasbaugmin dutikachui, imá Apajuik anenjauch uwemtijamjauwai. ⁹ Jutiik pegkeg takasbaunum uwemkachu asaja, makichkish ii emematmainuk atsugtamji. ¹⁰ Jutiik Apajuí najankamu ainaji, nuniautin Kristu Jisusjai ijutkau pujajin yamajam pujutan amasajui, ni yaunchuk wakekamujiiya dutiksag, pegkejan takastinme tujamu asa.

Kristu nemajuinaku agkan pujamu

11 Nunin asamtai adeagtajum, atum judiuchu aidautigmek, mina pataag judío yaunchuk pakamakaju asag, atumnak Apajuí aentsjinchua nunin diigmajakú aina nunú. 12 Nunú tsawantinig atumek Kristu dekachu asajum, Israel aents aidaujaish ijunmainchau aajakuitjume. Apajuí ditajai chichaman apaak anagkuauwa dushakam dekachu asajum, nuní uwemainapita tusa dakamukesh atsugtamaidau asagmatai, Apajuigtuchu ju nugka juwig pujujakuitjume. 13 Tujash Kristu Jisus atumin ayamjutpak numi yapajiamunum numpen ukajua nuaduí, yaunchkek Apajuijai atushat batsamajakuitkujum, yamaik tikijuch ijutkau wajasugme.

14 Jutii judío aidauti, judiuchu aidaujai kajegdayajakuitag nunak, yamaik Kristu Jisusjai ijutkau pujuuidau asajin, nigki agkanmitkagbauwai. Nunú kajegdayamua duka tanish ejatkatga numamtin aajakuí. Nunú nunin aajakua nunak tsaik ajapeak makichik niina aentsji etamkajui. 15 Judío aidautik yaunchuk Kristu nemagsukek, Apajuí chicham umiktajum tiuwa nunú, chicham umiktinun Moisés agajua nujai umiaku uwemjagtasa kakanmamajakuitji. Nunijakuitag nunú yamaik jutii judío aidautish imá Kristuig kajintsá anentaimjin, ashí tikich judiuchu aidauish imá Kristuig kajinas anentaimaidau asagmatai, mai yamajam aentsua numamtin etamkauwai. Dutik shiig agkan anentaimsa pujutnak amasajui. 16 Jisukristu numi yapajiamunum achinag mantamnak judío aidautin judiuchu aidaujai ijupajui, Apajuijai epegtuniatnume tusa, dutijama Kristu makichik iyashia nunin etamkauwai.

17 Kristu ju nugka juwi taa, pegkeg chicham shiig agkan anentaimsa pujutan sukagtina nuna, atum yaunchkek Apajuí anentaimtuchu aidautigminash, jutii Apajuí chichame dekau aidautijai ujakajui. 18 Aatus Kristu dutikau asamtai, jutii judío aidauti, atum judiuchu aidautigmeshkam, Wakaní Pegkeji yaimpasmatai Apajuí adigmaitijai.

19 Nunin asajum atumek tikich nugkanmayaya nuninuk ainatsjume. Kristu nemajuidau Apajuí aentsji aina nuninuk wajasú asajum, atumshakam Apajuí aentsji ainagme. 20 Atumnak jega jegamkatasa shugku ajitiamana numamtuk awajtamkajui, Jisus chicham etsegtugkata tusa ishiakbau aidau, nuigtú Apajuí etsegtin aajakajua dushakam Kristu pachis jintinjamawajua nuaduí. Tuja Jisukristuke kaya dekashí jegan ichichia numamtina dushakam. 21 Jega shugkunum chichigká buchitmainchau wajas aama numamtuk, jutii Kristu nemajuidautish niinig sumimkau asaja, niijaig kanamainchau wajasuitji. Nuniku asaja jega Apajuí ememattai pegkegma iman ainaji. 22 Nunin asamtai atum judiuchu aidautigmeshkam, ashí niinig ijunainakjum, jega Apajuí ememattaiya numamtin ainajume, Apajuí sujamsamu Wakaní Pegkejiya nu pujugtamu asamtai.

3

Pablo judiuchu aidanum takasbau

1 Atum judiuchu aidautigmin yamajam chicham ujaktá tusa Kristu Jisus awetiu asamtai, ni pachisa etsegbaunum yamai juwi achinkan pujajai. 2 Atumnak Apajuí atumin wait anenjamu asa, mina: Ame jujú shiig ujaktá, tujutiua duka machikish utujimtsuk dekamaitjume. 3 Apajuí duwik anentaimas nuna dutikatin atajai tibau dekaachuitag nunak, yamai mina ashí shiig dekamtijuae. Dutijauu asamtai,

atumnashkam nuna pachittsan ujumak agatjan awetimjime. ⁴ Nunú aujkujum shiig dekamainaitjume, Apajuí yaunchuk anentaimas Kristu pachisa tibau dekaachbauwa nuna mina dekamtijua nunú. ⁵ Nunak aents yaunchuk batsamajakua dukesh dekaachaju ainawai, tujash yamaik, Jisus pachisam chicham etsegkata tusa Apajuí ishiakbau, nuigtú Apajuí etsegtuidaush imá Apajuinak takajujakú aina nunash Wakaní Pegkeji dekamtikawaje. ⁶ Nigka juna tiuwai: Judiuchu aidaushkam yamajam chicham uwemat awai tusa etsegbaun antukag, Kristu Jisusai kajinas anentaimainak, judío aidaujui betek uwemtan jukitnume. Wagki makichik iyash wajasaju asag, Apajuí Kristu nemajuidaun anagkuauwa nunash jukitnume tujabiuwai. ⁷ Minak Apajuí wait anenjug yamajam chicham etsegkata tusa awetiuwai, dutijuau asa niina senchijinash sujusuí.

⁸ Wika ashí aents Apajuin nemajuina nujai apatkamak imanchau-chitjai. Tujash nunin aig Apajuí mina etegtua, judiuchu aidaunash yamajam chichaman ujaktí, dutikak Kristu wiyakchaji nagkanmainchauwa nuna pachisash etsegkati tusa, awetiuwai. ⁹ Nuigtushkam Apajuí ashí wájí aidaun najankauwa nunú, yaunchuk ni anentaimsamuji umkauwa nunin aajakua nuna mina dekamtijauwai, aents aidaun ujaktí tusa. ¹⁰ Junak nigka Kristu nemajin aina nui niina yachajinak kuashat niimtinai iwainmamkauwai. Juna dutikauwa nunak, ashí dekas wakan pegkegchau aidaun agkajunum batsamin, nu wakan aina nuna apuji senchigtin aina dusha: Nigkiap dekas ashí yachaita, tujuttinme tusa dutikauwai. ¹¹ Apajuik junak jutikauwai, ni yaunchuk anentaimtugbau tuke atinun ii Apuji Kristu Jisus dutikauwa nuna. ¹² Ni nunikbaunum imá Kristuig kajintsá anentaimaidau asaja, kajinmasa Apajuiyai jegamaina duka agkan ajutjamji. ¹³ Nuaduí, wi atum judiuchu aidautigminash Kristu pachisan jintintu asan, juwi achinkan pujusan waitiag nu antakjumesh mijakaigpajum tusan segajime. Duka dekas atum ayatak eme anenmamainaitjum nuuwai.

Pablo Apajuí aujku emematbau

¹⁴ Wika Apajuí juna dutikatjai tibaunak ashí dutikauwa duwi, iina Apuji Jisukristun Apajiya nunak tikishmatjan emematjai, ¹⁵ nigka ashí niina aentsji aina nuna Apajiyai, nayaimpinum batsata nunash, nugká batsata nunashkam. ¹⁶ Wika Apajuinak segatjime, ni ashí pegkeg aidaun ajá nuna amastinme, dutijamawagmatai Wakaní Pegkejiya nunú yaimpasagmatai, atumesh ichichmamjatajum tusan. ¹⁷ Nuniakjum atum Kristui kajintsá anentaimaidau asagmin, ni atumiin pujugtamu asantai, aneenisa pujakjum shiig emetmamjatajum tusan. ¹⁸ Nu nuniakjum ashí Apajuí aentsji aidautigmek shiig dekatagme, wajuk Kristu iina senchi anempaji nunú. Ni anejatbaujiya nunú nagkatkamujig atsuuwai. ¹⁹ Nuigtushkam segajai, nunú Kristu imaanika anejatbau ashí dekamaitsu nuna dekamtijamatnume, dutijamawagmatai Apajuí anentaima imanuk atumesh anentaimkau aminjum tusan.

²⁰ See tajai Apajuí senchigtina nuna, nigka ii wájí pachisa dutikata tusaya segaji nuna nagkagas ashí pegkejan iinun dutika nuaduí. Iman asantai jutii anentaimtajiya duka, ni dutika nunú dekatnumag jegatsui. Nuna pegkeja dutika nunak Wakaní Pegkeji jutiiñi puja nujai dutikawai. ²¹ ¡Jisus nemajin aidaulik Apajuí emematiagmi, Kristu

Jisusan sujamsau asamtai! ¡Ajumaish tuke ememattai atin atí! Aatus atí.

4

Wakannum ijutkau pujamu

¹ Wika Apu Jisukristu chichamen etseju asan achigkagmatai juwi pujujai, nunin asan atumnashkam Apajuí pegkejan takastinme tusa etegtamjaju asagmatai, ni etejamu aidaush wajuk pujumain ainawa nunisjumek shiig pujustajum tusan segajime. ² Atumek kakagchauch, shiig awajkagtin, waamak kajeche atajum. Nuniakjum tikich aidau shiig dutikachu wainkugmesh, pempeentunisjumek aneenidau asajum katsunajum dakanistajum, emamkesa iwajamu atí tusajum, ³ nuniakjum Wakaní Pegkeji tikich aidaujaish, shiig agkan ijutkau pujutan amainajum duke kuitamkatajum. ⁴ Jutiik makichik iyashia nunin ainaji, Wakaní Pegkejiya dushakam makichki, ni jutiiní pu-jugtamú asamtai, Apajuí pujut tuke atinun amastinaitjime tujabi-uwa duke ashí dakainaji. ⁵ Apushkam imá Jisukristuke, niinig kajintsá anentaimainaji, nuniaku imá niinig anentaimsa yamimainaji. ⁶ Apajuishkam makichkiuchi, ashí aents aidau Apajiya nunú, nunin asa ashí Apajuí nemajuina nui inamui.

⁷ Tuja Kristu wait anenjamu asa, makí makichik aidautin dekamtijamauwai ni wakejamu pegkeja nu takagsatnun. ⁸ Nuaduí agagbaunum chichaak:

“Nayaimpinum wakae ni shiwajin depetuk achijá yajuak, nunik aents aidau dita yupichu dutikatnunak tinamkae”, tawai.

⁹ Depetmak “wakae” tiuwa nunak, nayaimpinmaya juwaki nugka taa, maam nantakí ataktú wakatin asamtai tiuwai. ¹⁰ Nu yakiya tauwa duke ashí nayaim aidau nakagag wakauwai, nunik ashí najankamu aina nuanú inamui. ¹¹ Nigki adaijauwai: Chichaman etsegkatnume tusa etegka ishiakua nunash, Apajuinun etsegtuktin aidauash, yamajam chichaman etsegkagtin aidauashkam, Jisusa nemajuidau jintintuatnunashkam. ¹² Junak Apajuí adaijamua nunú aidau, tikich aents aidau yaigtinme, dutikam Apajuí wakegamun takajuinak, aan nagkaemas Apajuin dekaskeapi tusag Kristu nemajuidaush kawegtinme tusa dutikauwai. ¹³ Nunú aaja nunikaja Apajuí Uchijí yaita nuanuig kajintsá anentaimainaku, nuigtú niijaig ijutkau pujuidau asa muun anentai jukiaja, Kristujai betek agmi iina anentaimtajinish, aents aidaujai shiig awagdayinaku.

¹⁴ Nuninaku uchi kakajus tsanumaina nuninuk achagmi. Nunidau asaja tikich aidau aentsun tsanuinak waitan jintiina dushakam kakajus tsanumainchau agmi. ¹⁵ Nuninaku Apajuinu dekaskea duke chichainaku, tikich aidaujaish pempeentunisaik aneeniagmi. Nunú aaja nuninaku, jutiishkam Kristu iina Apujiya imanuk wajasagmi. Kristu nemajin aidautinak niyai jutii buukega numamtinuk. ¹⁶ Kristu nemajin aidautik Kristujaig iina iyashí ashí shiig ijunag awa numamtin ainaji. Nunú iyash akanjamua nuanuiya makí makichik dita takamainjinak takainak jamamtuchu tsaká numamtuk jutiishkam, Kristui kajintsá anentaimaidautik kuashat ainaji. Tujash Kristuk inapau asamtai makichik iyashia nunin ainaji, nunidau asaja aneenisa

pepmentunisaik tikich aidaujaish yaininaku, aan kuashat Apajuí wakegamua duke takasagmi.

Kristu nemagku yamajam pujut juwamu

¹⁷ Tuja juna tajim nunak, Apu Kristu wakega dutiksanuk tajime: Atumek aents Apajuí nemagchau aidau wainak anentaimaina nunit-suk batsamsatajum. ¹⁸ Ditak suwe ejatkamua nuninun anentaimaidau asag, yamajam pujut Apajuí sukagtusbauwa nunú anentaimtutnash dakituinawai. Ditak Apajuí umigtan dakituidau asag, dekachu weenawai. ¹⁹ Nuninak datsantainchau waigkag, ashí pegkegchau aidau takatan idaimainchau dekapedau asag, nunak wakejus tuke taká batsamin ainawai. ²⁰ Tujash atum Kristu nemagkautigmek aan pujutak unuimagchawaitjume. ²¹ Atumek dekasenum Kristu pachisa etsegbau antukuitjume, nunikjum ni wajuk pujusti tusaya wakejupawa nunisjumek pujakjum, niiniya unuimajuitjume dekaskea dushakam. ²² Nuaduí atumek, yaunchuk wajuk pujujakuitjume duka idaikujum, duwik aajakuitjum dusha yapajinmainaitjume. Wagki ashí atum nunijakuitjum duka, anentaim tsanugmakui pegkegchau wakegamunum dutikau asagmin emestamkajui. ²³ Atumek Apajuiyai idaimamsatajum, yamajam aents etamtinme. Dutijamawagmatai atumesh yamajam anentaimat jukimnujum. ²⁴ Apajuí yamajam anentaimtan amasajui jutiinashkam ni anentaimka imanuk anentaimkau agtinme tujamu asa, nuninak Apajuí wakegamu pegkeg aina nunak takastime, ni chichame tawa dutiksag, tusa.

²⁵ Waitjuta duka idaikujum, tikichjai chichaakjumesh dekaskea duke chichatajum, wagki jutii Kristu nemajin aidautik makichik iyashkea nunin asaja.

²⁶ Kajeakjumesh, tunamajaigpajum, kajeakjumesh tuke etsa akapakigpajum, ²⁷ iwanch yunumtugmak pegkegchaun takamtijamsainum.

²⁸ Yaunchuk kasamajakú akush, yamaik kasamkaigka, dekas takastí pegkeg aina nunak, nuniak tikich atsumaidaunash yaigta tau asa. ²⁹ Chicham pegkegchawk chichakaigpajum, dekas chicham pegkeg tikichnash yaimaina duke, tikich antuidaushkam wakejus antumaina duke chichaktajum. ³⁰ Wakaní Pegkejiya nu pegkegchau takaakjum wake besemag anentaimtikigpajum. Apajuí niina aentsji etamkamua nuna iwaintugmakta tau asa Wakaní Pegkejin amasajui. Dutikamu asa nigka jutijaig pujutnai, uwemkau aidautin Apajuí nayaimpinum iwagmak, ashí pegkegchau aidauunum agkanmitkagmatna nuwishkam.

³¹ Tikich kajejsá anentaimtut, tikich kajejut, kajejá shinut, tikich pegkegchau chichajut, nuigtú ashí pegkegchau aina dushakam idaisatajum. ³² Nuniakjum dekas pegkeja duke, tikichjaish wait anendajakjum, kajejdaikamu akuish pepmentunikjum tsagkugdaijatajum, Apajuí atumin Kristu nemajin aidautigmin tsagkugtamjauwa dutiksagmek.

5

Apajuí uchijí aidaush wajuk pujumainaita nunisaik pujumain

¹ Atumek Apajuí uchijí aneetai asajum, niinya ibau atasajum kakanmamsatajum. ² Ashí tikich aidaujaish, Kristu jutiin anempajua nunisjumek, pepmentunikjum aneenitajum, nigka nigki niina

iyashinak sujukui, jutii tudaujin mantuatnume tusa. Kristu mantamdauwa duka Apajuinu anentag kuntin itaamu maamua nu shiig awagmajakua imanuk aajakui.

³ Atumek Apajuí aentsji asajum, tsanijinmain ainatsjume, nuigtú tikich ashí pegkegchau aina dushakam, tuja wají aidaushkam imá midauk atí tusagmek anentaimainchau ainagme. ⁴ Pegkegchau aidau augmatut, wainka anentainkas chichat, pegkegchaunum iwajut aidau idaisatajum, wagki nunú aina duka chichaa yujamain ainatsji, dekas Apajuí emematjukum chichatajum. ⁵ Atumek shiig dekagme, tsanijimtan yujajin aidauk, ashí pegkegchau aidaunak takaa pujú aidaushkam, tuja itugsanuk wajiijinawag tusa imá nunak anentaimtú pujauk (duka apajimtai emematmaina numamtinai), Kristu inamtaijinig pujuschagtinai. Nuigtush Apajuí jutiin wají sujabaunashkam jukichagtinai.

Wakaní Pegkejiya nujai ijutkau pujaku dutikmain

⁶ Aneaku atajum, wainak chichamai tsanugmajainum. Nunú pegkegchau aidau timajim nuna takaidauk, suwimak tikima ishamainun jukiagtinai, wagki Apajuí umigtsuk tu yujaidau asag. ⁷ Nuaduí atumek dita takainamukesh takasaigpajum. ⁸ Atumek duwikik pegkegchau takaakjum, suwenum pujumaina numamtuk pujujakuitjume. Tujash yamaik Apu Kristujai ijutkau pujakjum, ni pegkejan wakeja duke takaakjum, tsaaptinum pujumaina numamtuk wajagme. Nuniau asajum Kristu aentsji aidaush, wajuk pujumainaita nunisjumek pujustajum. ⁹ Wagki, Wakaní Pegkejiya nujai ijutkau pujaku dutikamuk: Ashí wait anenkagtut, Apajuí pegkeg aidaun wakega duke takat, nuigtú chicham dekaskea nunú umiamu aina nu ainawai. ¹⁰ Nunin asamtai Apu Kristun shiig awagma nu takastasajum kakanmamsatajum. ¹¹ Aents Apajuí nemagchau aidau pegkegchaun takaina duka takasaigpajum, dekas pegkegchaun takaina nunú idaimitkastajum, dutikam ditash pegkejan takainak, tsaaptinum waimaina numamtuk wajaktinme. ¹² Dita pegkegchaun uuká takaina nu pachisaik tumaitsui, tikima shiig datsan asamtai. ¹³⁻¹⁴ Tujash Kristu nemajuina duka Kristu iwaintamu asag, dita pegkegchau takainamujinak shiig dekamain ainawai. Papí agagbaunum:

“Ame kanam duka shintagta, aents jinaw aidaunum pujaumesh nantaktá, nunikamin Kristu tsaapmitkagmati”, tawai.

¹⁵ Nuaduí atumek senchi kuitamamkatajum, anentaimkas batsamsuk shiig anentaimsa pujustajum. ¹⁶ Tsawantash wainka megkayigpa, wagki yamai tsawan batsatag juwik, pegkegchau takaamu ayau asamtai. ¹⁷ Anentainkachu wajukmaina numamtuk wajatsuk, kakanmamsajum Apajuí wakejamua dusha tuwita nu dekaatajum. ¹⁸ Nampekaigpajum, nampeamua duka anentainkachua nunin ekagtau asamtai, duka nunitsuk dekas Wakaní Pegkeji takamtijusti tusajum, niniig idaimamsatajum. ¹⁹ Nuniakjum tikich Kristu nemagkau aidaujai chichaakjumesh, Wakaní Pegkeji tujabauwa nunú Apajuí kantamjutai kantamjukum, shiig dakujusjum Apajuí ememattajum. ²⁰ Nuniakjum Apajuí iina Apajiya nunú, ashí pachisjum tuke see tusagmeké atajum, iina Apuji Jisukristui kajintsá anentaimaidau asajum.

²¹ Kristu eme anentamunum, pempeentunisjumekek shiig aneasjum sumimdaikatajum.

Aishmag nuwentin nuwa aishintin aidau batsaamain

²² Nuwa aishintin aidauk imá niina aishinak umigmáin ainawai, Kristun nemagkau aidau, imá Kristunak umijuina nunisag. ²³ Aishmagkui nuwá apujiya duka, Kristuwai niina nemajuina nuna Apujiya duka. Tuja jutii ni nemajuidautik niina iyashiya numamtin asajin, niyai iina buukega numamtinuk. Nunin asajin nigki uwentijamui. ²⁴ Jisusa nemajin aidauti Kristu umijuinag nunisag, nuwa aidauhkam imá niina aishinak umigmáin ainawai.

²⁵ Kristu jutii ni nemagkau aidautin anempau asa iini mantamdauwa nunisjumekek, nuwentin aidautigmekek atumi nuwem aneetajum. ²⁶ Kristuk nunak minaig kajinas anentaimaidauk Apajuí aentsji waigtinme tujamu asa dutikauwai. Ni jutiini mantamdauwa nuaduí, jutiik niina emtinish bakumamainush atsugbau wantinkauwaitji. Jutii aidautik Apajuí chichame antaku: Wika imá Kristuig kajintsan anentaimjai tajin, tikich yamigmaju ainaji. ²⁷ Niina nemajin aidautinak tudaugtuchu etamak, imanisag pegkeg iwaintamkata tujamu asa nunikui. ²⁸ Nunisag nuwentin aidauhkam niina nuwenak aneemáin ainawai, niina iyashí anentus. Ni nuwen aneak niina iyashinash dutiksag aneawai. ²⁹ Wagki makichkish niina iyashinak kajegchau ainawai. Ayatak shiig kuitamak ayujin ainawai, Kristu niina nemajin aidautin kuitamjama dutiksag. ³⁰ Wagki, jutii Kristu nemajin aidautik niina iyashiya nunin ainaji. ³¹ Yaunchuk agagbaunmashkam: "Aishmag nuwenkug niina apajinak dukujinash ukumainai, nunikag nuwajai ijunak makichik iyash wegawai", tawai. ³² Jujú Apajuí yaunchuk anentaimsamu dekaachbau aajakua duka, niini kajintsa anentaimaidautik Kristujaig makichik iyashkea nunin weenag nuwajai. ³³ Junin asamtai makí makichik atum aidautigmesh nuwem aneetajum atumi iyashim anentsajum, tuja nuwashkam niina aishinak eme anentus diimainai.

6

Uchi aidau apajin umigmáin

¹ Uchi aidauh, atumin apa umigkatajum Apu Kristun shiig awagma dutiksagmekek, nuwajai dekas pegkejak. ²⁻³ Chicham umiktina nuwiyán, Apajuí jujú umiakum kuashat tsawan shiig aneasam pujutnaitme tusa anagtabauwa duka: "Amina apa dukujai eme anentsam diistá", tawai.

⁴ Atum uchigtin aidautigmeshkam uchijum takaamujinkish, jintinbaunmagkesh kajemainuk chichagkaigpa, dutiktsuk shiig chichagkam jintintuata Kristu wakega dutiksamek.

Inamin aidau ni inake aidaujai dutikmain

⁵ Inak aidauh, atumi apujum inapakuig shiig umigkatajum, tujash dekaskenum ajantusa diyamui dutikatajum, ayatak wantinkata tabauwai dutiktsuk, Kristu takagmainaitjum imatiksajum takagsatajum. ⁶ Takaakjumesh inapau wajasá diigmakui shiig anenjusti tusajum takatsuk, Kristu inake asajum tuké wakejusjum Apajuí wakeja dutiksagmekek takastajum. ⁷ Shiig aneasjum dakunkut takastajum, aentsdau takaatsjapi, Apu Kristununap takaja, tusajum. ⁸ Aents inashtai agkan

aidaun, inaku waitkatali aidaunashkam, dita waji pegkeg takasbauwa dutiksag, pegkegnum Apu Kristu betek akiktina nunu adeagtajum.

⁹ Inamin aidauh, atumshakam atumin inakem aidauk shiig kuita-mkatakajum, wainkajum uwakajum takamtiksaigpajum. Adeagtajum atumin inapaushkam, Apu Kristu nayaimpinum pujus diigmá puja nunu. Kristu diismak ashí aentsuk betekai. Nunin asantai nigka dita takasbaujinak betek susatnai.

Kristu nemajin aidau wakan pegkegchau aidaujai maaniamu

¹⁰ Yatsug aidauh, ubag aidauh, junashkam tajime: Atumek imá Apu Kristujaig ijuntsajum pujakjum, niina senchiji dekas imana nunu jukitasajum wakejitajum. ¹¹ Apajuí nagki ejamatai sujama nujai iwanch tsanugmakuishkam ejamaktajum, nuniakjum ichichmamta-jum. ¹² Jutii aidautik aents aidaujaig maaniatsji. Jutiik dekas wakan pegkegchau aidau agkajunum batsamin, nu wakan aina nuna apuji senchigtin aidau, ju nugka suwea juwi pegkegchaun inamin aina nujai maaniaji. ¹³ Nuaduí ashí Apajuí ii ejamamainun sujama nunu jukitasajum kakanmamsatajum, nu jukiú asajum pachiachmau iwanch waitkagmakuish atsanjatajum. Atum iwanch tsanugmakuish, ashí atsanjagmek duka tuke depetbau atinaitjume.

¹⁴ Apajuí chichame dekaskea duke anentaime tuta nuuwai, maaniaku wegaku suntajan akachumtaijiya nujai betekak. Suntag jiijuí detsepeen ejabau aina nunisjumek atumshakam ejamaktajum, pegkeja duke takaaku pujamunum. ¹⁵ Maaniamu epegnati etsegkata tusa suntag awemam, sapatjin wegaamak shiig jigkajá umina numamtuk atumshakam umintsatajum, Apajuí agkanmaetan sukagtawai tusajum etsegkatasajum. ¹⁶ Ju aina nuní nagkaemasag imá Kristuig kajjitsá anentaibauwa nunu ajutjamainai, nuuwai atumin tantagjumik, iwanch akentaijin ekeemak aketjamkui ikagnaktinuk. ¹⁷ Kristu iina uwemtikagtujua nunuwai, atsejutai suntajan buuken ejata numamtuk atumin ejapauk. Apajuin chichamen, Wakaní Pegkeji sujamsauwa nuuwai iina tuke nagkijig. ¹⁸ Duka kajimattsuk tuke Wakaní Pegkeji wakejamua dutiksagmek Apajuí ausatajum. Machikish mijamtsuk aneaku pujakjum, ashí Kristun nemagkau aidauh Apajuí aultustajum. ¹⁹ Atum nuniakjum minashkam segatjitajum, Apajuí minash yainkati, wishakam ishamkagtutsuk yamajam chichaman Apajuinu yaunchuk dekaachbau aajakua nuna uwemat awai tusan etsegkatjai. ²⁰ Apajuí minak ju chicham etsegkata tusag awetiuwai. Dutijauu asantai nuna chichagkagtakun wekagai juwi achigkagmatai pujajai. Nuni-aigkishkam minash segatjitajum, sapigmakas Apajuí chichamenash etsegtuktajai.

Akatmabau

²¹ Tiquico iina yachi anetai jiya nunu minakui juna papiin agajan awetajime. Nigka minak Apajuin chichame etsegbaunmag kuashat yainkae, nuniku asa ni anuí mina pachittsashkam ujakagtinme. ²² Junak wika, ni iina pujutjin pachis ujakap atumin anentaime nash ichichtugmagtinme tusan awetajime.

²³ Apajuí iina Apajiya nunu, Apu Jisukristujai, ashí atum anuiyatijum Kristu nemajuinajum nunak shiig agkan anentaime sa pujutan sujamsatnume, shiig aneenisag pujuinak, imá Jisukristuig kajinas

anentaimtinme tusa. ²⁴ Aents aidau Apu Jisukristun tuke aneedaunak
Apajuishkam tuke yayasagké atinai.
Aatus atí.

PABLO PAPI' AGAJA FILIPOSNUMIA AIDAU AWETIMU

Pablo Filiposnumia aidau kumpabau

¹ Witjai Pabloitjai, Timoteojai Kristu Jisusa inake aidauti, ashí Apajuí aentsji aidautijum, nuigtú Jisusa nemagnun diin aidau apuji, tuja Jisusa nemajuidau atsumamujin diin aidautijum Filipos batsatjum nuna ashí ijumjan kumpamjime: ² Apajuí iina Apajiya nunú, Apu Jisukristujai wait anenjamag shiig agkan anentaimsa pujutan atum-nash amastinme.

Pablo Jisukristu nemajin aidau Apajuí aujtusbau

³ Atumin anentaimtaknuk tuke see tusanké ajai mina Apajuijun. ⁴ Apajuin aujkunush ashí atum aidautigmin pachisan shiig aneasan tuke segattsanké ajime. ⁵ Wagki, atum yama nagkamchakjum Jisukristu nemagkauwaitjum duwi nagkamsajum, Jisukristu chichame etsegbaunum yaintiujum nunisjumek, yamaikish tuke yaintú batsatjum nuaduí. ⁶ Apajuí atumiin takat pegkejan nagkabauwa nunak, dutiksagkeap takamtiká atua Jisukristu minitai inagnaktatus tajai. ⁷ Ashí atum aidautigmin aajan anentaimtajim nunak, senchi aneau asan dutikajime. Apajuí chicham yamagman etsegkati tusa sujusua nuna etsegkui yaintu asajum, atumek mina kumpag aajakuitjume. Yamaishkam atumek mina kumpagketjume, wi juwi achigkagmatai pujag duwishkam. Wi yamajam chicham etsegbauwa nuna dekag-tuawagtatus, apú emtin inintainakuish, ju yamajam chicham Kristu pachisa etsegbauwa juka dekaske tusa chichamunmash, ashí atum aidautigmek yainjume. ⁸ Wi atumin aneajime tajim nunak, Apajuí shiig dekagtawai, Kristu Jisusa anenkajiya nunú sujusbauwai aneajim nuna. ⁹ Nuniakun Apajuí aujkunush: Atum aneeniajum nunú aan nagkaemas ajutjabagi, tuja pegkeg pegkegchaujai akanjá dekatnash Apajuí amastinme, nuigtushkam Apajuinua nu dekatnash amastinme tusan segatjime. ¹⁰ Dutijamawagmatai pegkeja nunú etegket unuimagjum, atumi pujutjuminish imagnisjum shiig pujuinakjum, Kristu taakuish pegkegchaush atsugbau bakumamainchau atajum tusan. ¹¹ Nuniakjum Jisukristu yaimpasagmatai pegkeg takaamu iwainagtai, nuna wainainak tikich aidaush Apajuin eme anentus ememattinme tusan.

Wika imá Kristuk umigku pujusta tabauwa nuuwai

¹² Yatsug aidauh, ubag aidauh, mina waji nagkaetukiagma nunú, yamajam chicham etsegbaun aan senchi yainkama nunú dekaatajum tusan wakegajai. ¹³ Ashí suntag, apú jeen kuitamin aidau, nuigtú tikich suntag mina kuitamjuina dushakam, wi Kristu umiju asan achinkan egketag nunak shiig dekagtuinawai. ¹⁴ Wi junika achinká egketbaun waitkag, kuashat yatsug aidau, ishankagtutsuk imá Jisukristuig kajintsá anentaimsa chicham etsegta nuna wakekaje.

¹⁵ Duka dekaske, wajumak aents niina nagkaesan takaakun aents aidaush shiig takainawai tama atajai tamaunum Kristu pachis etsejuinaush ainawai. Untsu tikich aidau Kristun shiig anentus etsegtuinawai. ¹⁶ Nuninai wajumak aidau Kristu aneamunum etsegtuinawai, Apajuí yamajam chicham dekaskea nuna aents aidaun iwaintukti tujutmatai, juwi achinkan pujag nuna dekagtuidau asag. ¹⁷ Nunú mina nagkaetus takasta tuina duka, pegkeg anentaiyai tuinatsui, imá ditanunak anentaimtus dutikainawai. Nuna dutikainak, wi achinkan yamai egketag nuna aan nagkaemas utugchatan aputugsatasag wakegainawai. ¹⁸ Tujash nunak puyatjatsjai, dekaskenum pegkeg anentaiyai etsejuinakush, imá Kristunak pachis etsejuina duwi shiig anejai.

Nunú nagkaemas shiig aneamuk ajuttatui, ¹⁹ atum mina pachittsajum Apajuí aultugjum nuna dekakun. Wagki, wika shiig dekajai atum Apajuí aultugjum duwi, Wakaní Pegkejiya nu yaintsamtai achikam egketag junak waamak jiinkittag nunak. ²⁰ Duwi juwi pujusnush shiig emetmamjan, mina inastumaina nunak takatsuk pujuta tusan wakegajai, wi aaja pujamun waituinak, tikich aents aidaush minaiyan unuimajag Kristu imanjiya nunash shiig dekaatnume, mina iwaaku jigkiagmataish, nuniachkush mantuawagmataishkam tusan. ²¹ Wagki, minaig pujuta duka Kristu umigku pujuta nuuwai, tuja jaamushkam Kristujai pujuta nuuwai. ²² Wika iwaaku pujutnash wakemainaitjai, tuja jatanashkam wakejumainaitjai, nuniau asan shiig etegmain dekapeatsjai. ²³ Minaig shiig utugchatai jimaja juwiya etegkata tabauk: Wakegajai jakan Kristujai pujustasan, nunú imá pegkeg asamtai; ²⁴ tujash atum mina atsumjuinajum nuna dekau asan, ²⁵ dekas iwaakuap atumjai ijunjan pujuttaja, nuniaknuap atum Kristui kajintsá anentaimjum nuaduí shiig aneastinme tusan yaigtatjime tajai. ²⁶ Tuja wi ataktú atumiin wakettsanuk tattag duwi, aan nagkaemas Kristu Jisusai dakujamu ajutjabiagtinme tusan tajime.

Yamajam chicham Kristunu tawa nunisaik pujut

²⁷ Ayatak segajime, atumi pujutjuminish yamajam chicham Kristunu tawa nujai betek pujustasajum kakanmamsatajum tusan. Nuniakjummin wi atumiin taaknush, tuja atushat pujaknush, ditak makichik anentaiyaik shiig ijuntsag Kristu uwemtikagtamun pachisag etsejuinawai tabaun antuktasan wakegajai. ²⁸ Nuniau asamtai yamajam chichaman dakituina duka ishamkaigpajum, nunú atum nuniamua nunú, Apajuí ditanak suwimkan suwak, atumnak uwemtijamjatna nuna iwaintuinawai. ²⁹ Apajuik ayatak Kristuig kajinas anentaimsatnume tusag wakegatsui, Kristu nemagbaunmashkam waittsatnume tusa wakegawai. ³⁰ Nuaduí atumesh wijai betek waituinagme. Atumek minak waitkauwaitjume wi wajupa waittsajai duka, tuja yamaishkam antugtajume wi wajupa waitiatsja nunú.

2

Shiig aneenisa batsatbau

¹ Atumin Kristu niina senchijin aents wakemitkaktinun sujamsajua nunak, wika shiig dekajai. Nunú dekas asamtai, wi titatjim nunú

dutikakjum minash shiig aneemtijustajum. Nuniakjum atumek pempeentunisjumek aneeniakjum anentaish ichichtunigtajum. Atumek Wakaní Pegkeji ajutjamu asagmatai, tikich aidaush wait anentajum nunashkam dekajai. ² Nunú nuniakjum, ashí shiig anendaisajum pempeentunikjum aneeniakjum, makichik anentaimitamua duke ijuntusjum anentaimitakjum, minash shiig aneemtijustajum. ³ Atum ememamugmin, nuniachkugmesh shiwagmagata tabauwai takatsuk, ayatak imanchauch anentaimitumakjum makí makichkitijum, tikich aidaun imá pegkeg diitajum. ⁴ Makichkish imá niinu pegkeg amaina nunak egatsuk, ashí tikich aidaunash shiig awagmamaina nuna egaktinme.

Kristuk Apajuiyaitak ni imanjinak idayak aentstijai betekak wajasuí

⁵ Atumesh Kristu Jisus anentaimitajakua nuninuk anentaimitkau atajum.

⁶ Nigka Apajuí aajakuitak nugká taag imanuk atasag wakekachui.

⁷ Ni aajakbauwa nunak idayak jutijai betek wajas, ashí aents aidaun inataijiya nunin wajasuí.

⁸ Aentstiyaitag nuninuk wajasú asa, Apajuí umigbaunum mantuatumeme tusa idaimamsauwai, nunik numi yapajiamunum achijam jakauwai.

⁹ Nunikmatai Apajuí ataktú inanki, yakí nayaimpinum iwak, ashí aents aidaun Apuji emauwai.

¹⁰ Dutikamtaí nayaimpinum batsamin aidaush, nugkanmaya aidaush, ashí Apajuí nemagchau jakau aidaushkam imá Jisukristunak tikishmatug ememattinme tusa.

¹¹ Nuninak Jisusai Apuk tiagtinme, dutikainak iina Apaji Apajuiya nunak ememattinme tusa.

¹² Nuaduí mina aneetaig yatsug aidaush, ubag aidaush, wi atumjai pujatsaigkish tuke umigtin agmaujum nunisjumek, yamai wi atushat pujag juwi aan nagkaemasjum umigtuktajum. Makí makichik aidauijum Apajuí ajantusa diiyamunum niinig sumimkajum, ashí uwemkau aidaun takamaina duke takastasajum kakanmamsatajum. ¹³ Apajuiya nuuwai atumin pegkeg anentaimit aidaun sujamak, ni wakejamu wakejusa umitnumash yaimpauk.

¹⁴ Ashí atum dutikajum duka chicham patatdaitsuk, jiyanitash jiyanituk shiig takastajum, ¹⁵ atumin makichkikesh pegkegchau takaawai tujaminum. Atumek Apajuí uchijí asajum aents pegkegchau katsek aina nuwish, pegkeg iwainmamkatajum. Atum nuniakjum aents pegkegchau aina nuwish, yaya etsantak suwen tsaptin emama numamtin atajum. ¹⁶ Chicham dekás pujutan sukagtina nuanuig emetmamatajum. Nuniau asagmin Kristu minakuish, atumiin ememasan anentaimitatjai, tikima wainkanuk imanikan wekaesan, Apajuí chichamenak ditanash ujachawapitja tau asan. ¹⁷ Atum Kristui kajintsá anentaimitu asajum umigjum duka, Apajuí anentag sumaina numamtinai, mina mantuawagmataish, wi jaamua dushakam, Apajuí anentag suwamua nuninuk atatui. Nunú nunikmatai shiig aneestatjai, nunikmatai atumesh wijai shiig aneestajum. ¹⁸ Nuaduí atumshakam wijai shiig aneakjum dakujustajum.

Pablo Timoteon awetittajime tibau

¹⁹ Apu Jisus wakegakuig, Timoteon waamak atumiin awemata tajai, atum batsatbaugmin dekaan shiig aneastasan. ²⁰ Timoteowa juuwai dekas wijai betek atumin uyumatjamuk. ²¹ Wika junak ashí tikich aidauk Jisukristu wakegamunak egatsuk, dita wakegamunak egaidau asagmatai, tajai. ²² Tujash Timoteo wajuk pujusuita duka atumek shiig wainjume, nigka yamajam chicham etsegbaunmash, uchi apají inam yaiyama imatijusag yaintui. ²³ Mina utugtukagtig nuna dekagmaman niinak awetittajime. ²⁴ Wika imá iina Apujinig kajintsan anentaimjai, nigkiap waamak atumiin awetittawa tusan.

Epafrodito

²⁵ Tujash yatsug Epafrodito, atum mina takatan yainkati tusajum awetujiu ainajum nunak, ataktú awagtusnuk awetajime. Nigka yamajam chicham antutan dakituina nui etsegbaunmash shiig senchi yainkae.

²⁶ Nigka ashí atumin waipakagtatus senchi wakejutpajume. Nuniy-atak atum, ni jaawai tabau antugkauwaitjum nuna senchi uyumawai. ²⁷ Dekaskenmag jamayi, jatanak namput wajaschami, tujash Apajuí niina wait anenja nunak, imá niinakek dutikache, minashkam wait anenjuje, wake besemag pujag nuna, nuní nagkaemas wake besemag pujusai tujutu asa. ²⁸ Nuaduí wamkesan awetajime, atumshakam ni wainkajum shiig aneastajum, nuniakjumin wishakam wake besemjak pujushtajai. ²⁹ Shiig anentsajum jukitajum, Apajuí dutikatnume tusa wakega dutiksagmek, tuja tikich aents junin wainkugmesh tuke dutiksagmek atajum. ³⁰ Nigka Kristu takajak pujus jamain wajakmayi, ni pujutinak uyumatsuk ishamainnum pujus, atum mina yainmainchauwa nuna ni yainkabi.

3

Dekas imana duka Kristu dekaata tabauwa nuuwai

¹ Yatsug aidauh, ubag aidauh, atumek Apu Jisusai ijutkau asajum dakujusjum pujustajum. Wi agatjabiajim nunak awaksanuk tajim duka minaig tutitjakesh atsugtawai, juka dekas atuminish atumnawai. ² Aents aidau yawá pegkegchau tsumaina numamtin yujas: Uwemjata takugmek pakamaktajum, tu yujaina nujaig kuitamamkatajum. ³ Dekaskenum jutii ainaji Apajuí aentsji aidautik, Wakaní Pegkeji yaimpasmatai, Apajuí emematuinaku Kristu Jisusdau asaja shiig aneenaji, nunin asaja jutiik yaunchuk dutikajakbauwa duka puyatjuinatsji. ⁴ Nunú imá jutiik kakanmamsa uwemainaitkuig, wi dekas imá mina takatjuig uweemain aajakuitjai. Witjai dekas tikich aidau nagkaesan ashí chichamnash umikunuk. ⁵ Wagki, witjai dekas yama akiinan ocho tsawan wegai pakaji ajapjuamunuk, nuigtushkam Israel wegantuitjai, Benjamigka uchijí aajakua nu wegantunum akiinaw asan hebreo aentsuitjai. Tuja judío chicham umiktin aajakua nunú pachisa tabaunmag fariseowaitjai. Nunin asan ashí tikichin nagkaesau chicham umiktin ajakua nunak uwaetsuk betek umikuitjai. ⁶ Nunin asan chicham umiktinum pegkeg takamainun tawa nuna umiau asan, Jisusa nemajin aidauwash waitkayajai. ¡Minak makichik aentskesh chicham umiktinuk betek umikchauwaitme tujutmain ainatsui! ⁷ Tujash yaunchkek ashí nunú aidauwak dekas iman

dii wajakuitjai. Tujash nunak yamaik, Kristu nemagbaunum wainka diiyajai. ⁸ Ashí nunú aidaunak idaisauwaitjai, dutikakun pasuamu ukajá ajaptayama nunin anentajai, Kristu Jisus mina Apujua nunú shiig dekaata tabaunum, ⁹ nunikan niijai ijutkau pujau asamtai, Apajuí pegkeg diigsauwai. Nunak chicham umiktina nuna umiakun pegkeg takasbaujui dutijuachui, ayatak Kristui kajintsá anentaibaunum Apajuí pegkeg diigsauwai. ¹⁰ Wika Kristun shiig dekaatasan wakegajai, ni maamash Apajuí senchijinig nantakuwa, wisha nunú senchinak niina nemagkun jukin, ni waittsauwa nunisnuk waittsan, jaaknushkam Kristu Apajuí wakegamun umiak jakauwa nunisnuk, wishakam Apajuí wakegamun umiakun jakatasan wakegajai, ¹¹ jakau aidau atak nantainakui, wisha nantakmig tau asan.

Pablo takatji

¹² Wi nuna tajim nunak, wi ashí dutikajai takun tatsujai, nuigtushkam Apajuí mina wajuku atí tujutua duka, minai ashí uminkae tusan tatsujai. Wika Kristu Jisus dekatkauk mina egatkauwa nunú wakejamun umiakun, ayatak emtuktasan wegajai tumamjai. ¹³ Yatsug aidauh, ubag aidauh, eke wi jegantina nuwi jegatsug nunak, wika shiig dekajai. Nuniau asan dekas yaunchuk takasbaujua nunak pachitsuk idaikun, yamai wi jegantasan wegag nuna imá senchi anentaimtajai, ¹⁴ Kristu Jisus umigbaunum waji shiig pegkejan anentag jukitnime Apajuí tujabiuwa nuwi jeganta tau asan. Nunú waji shiig pegkeg anenjauch jukitnaitag duka, pujut tuke atina nuuwai.

¹⁵ Ashí jutii imá Jisusaig kajintsá anentaimtanum emetmamjau aidautik, nunisaik anentaimain ainaji. Tuja atum ainajum anuiya yajupias anentaimu ataishkam, Apajuiya duke shiig paan iwaintugmaktinme. ¹⁶ Tujash dekas nunimainaitag duka, jutii dekauwaitag ditiksaik umiaku pujumainaitag nuuwai.

Dekas iina nugkega duka nayaimpinum awai

¹⁷ Yatsug aidauh, ubag aidauh, mina pujutug diisjum atumesh nunisjumek pujustajum, nuigtushkam tikich aents aidau, jutii pujuinag nunisag pujuina nuna pujuti diigsajum nunisjumek pujustajum. ¹⁸ Kuashat aents pegkegchaun takaina nunú, Kristu iina tudaujin juki numinum jakauwai tusa jutii etsejuinag nuna shiwagmainawai. Nuna pachisnuk kuashtá tajime, yamaishkam awentsanuk negá negajai tajime. ¹⁹ Tujash nunú aents aidauk Apajuijai tuke kanaak kanakagtin ainawai. Wagki, ditak ayatak yuwamunmag, umamunmag iwaaku pujuinawai, nuninak dita takaamujiya nu datsantan iwaintumaina nunak takainak shiig aneenawai, nuigtush ju nugka juwiya pegkegchau aina nunak imá anentaimtuinawai. ²⁰ Tujash jutii aidautik nunin ainatsji, jutiik dekas nayaimpinmaya waji aina nunú wakegainaji. Dekas iina nugkega duka nayaimpinum awai, nunin asamtai, nuwiya uwemtikagtin taati tusa dakainaji, ii Apuji Jisukristua nunú. ²¹ Ni jutii iyashí wainkauchia nuna yapagtugma, niina iyashiya imanuk etamkatnai. Nunak nigka tikima senchigtina iman asa, nayaimpinum nugkaash ayaa nunak imá nigki diyawai.

4

¹ Nuaduí mina aneetaig yatsug aidauh, ubag aidauwah, wika atumnak senchi aneajime. Wi atumiin shiig aneamu ajuta duka, waji shiig pegkejan jumainaitag imanai. Nunin asamtai, atum Apu Jisusjai emetmamjajum pujajum nunisjumek pujustajum.

² Evodia, Sintiquejai Apu Jisusa nemajuidau asag jiyansuk batsamsatnume. ³ Dutiksanuk ame mina kumpag takatash betek umin asamin segajame, aanú ubag aina nunú yaigtá jiyansuk batsamsatnume, ditak wijai betek yamajam chicham etsegbaunum senchi takasagmayi. Clemente, nuigtú tikich mina yaintin aidaujai aents pujutan jukitin agattaiya nui ditá daajig papiinum agatkamu ainawai.

Imá Apu Jisusaig tuke dakujustajum

⁴ Imá Apu Jisusaig tuke dakujustajum. Awaksanuk tajime: ¡Dakujustajum! ⁵ Atum tikichjaish shiig pujamugmin ashí aents aidauash waipaktinme. Apu Jisus taatnuk namput wajaschae.

⁶ Makichkish uyumá pujuigpajum, nu uyumá pujutsuk Apajuí aukujum segatajum, nuniakjum see titajum. ⁷ Atum aaja nunitaik, Apajuí ashí agkan etamtatjume atum uyumajum nunak, nunak aents Apajuí nemagchau aidauk dekamain ainatsui. Nunú agkanmaeta nunak, Apajuí atumin anentaiminish, anentaimtagminish ajutjamtinme tusa amasagtatui, Kristu Jisusjai ijutkau pujau asagmin.

⁸ Yatsug aidauwah, ubag aidauh, junak inagnamun tajime. Atumek ashí pegkeg aina nuwig anentaimin atajum, tikich waji pegkejan takainakui pegkegnap takainawa tusa anentaimtin, Apajuí waji pegkeg diiyamu aina nunash pegkegnum anentaimtin, aents pegkeg takainamun shiig anentus diin atajum.

⁹ Wi atumin jintintuawaitjim duka ashí dutiksagmek umiktajum, wi chichaamu antukuitjum nunú, nuigtú wi wajuk pujamu waitkauwaitjume dushakam imatiksagmek umiktajum. Atum aajajum nunitai, Apajuí shiig agkan anentaimesa pujutan sukagtina dushakam atumjai atatui.

Filiposnumia aidau kuichik anentag ijumja Pablo awetimu

¹⁰ Shiig senchi shiig aneajai, duka tsawan asajum, Kristu nemajin aidautijum, ataktú mina yainkujum kuichik awetujiujum nuaduí. Wika kajimatjukuiwap ainawa tatsujime, ayatak yupichu dutikmainjimpap atsugsaje tajime. ¹¹ Wika junak atsumjan pujau asankesh tatsujime. Wika ajuta nujai shiig aneasa pujutan unuimajuitjai. ¹² Wika ujunauch pujutnash dekjai, antsanuk kuashat ajutkui pujutnashkam dekjai. Nunin asan wajukunmag pujuinja nunak ashí nunimainaitjai, shiig yuwan pujaknush, yumain atsuktakui yapajaknush, shiig kuashat ajutkuish, tuja shiig atsuktakuish. ¹³ Ashí nunak nunimainaitjai, Kristu ni senchijin sujau asamtai. ¹⁴ Tujash atumek shiig pegkegnum minak yainkaugme, mina utugchatjua nuanuí.

¹⁵ Wi Macedonia pujaun yamajam chicham uwemtikagtina nuna etsegkatasan jiinkibiag nuwig, atum Jisusa nemajin Filiposnumia aidautijum imá atumek yainkau ainagme. ¹⁶ Nuniau asajum wi Tesalónica pujaish awetugbaijume, tuja awentsagmeshkam awetugbaijume mina atsumamug dekgtau asajum. ¹⁷ Juna tajim nunak wika sujú pujutajum tusanuk tatsujime, wi wakegag nunak atum

takasbauwa nuaduí aan nagkaemas Apajuí amastinme tusan tajime. ¹⁸ Atum Epafroditowai awetugbaijum nunak ashí imatixsanuk jukibiajai, yamaik wi atsumamun nagkagas ajutui. Atum mina yainkabiujum duka, Apajuí anentag anagkuamu kugkuin incienso apeamu Apajuin shiig awagmajakua imanuyi. ¹⁹ Nuaduí mina Apajuijua nu, ashí atumin atsgtamjum nunak, niina wiyakchaji dekas imana nuna imatixsag Kristu Jisusai amaamu jukitnaitjume. ²⁰ Apajuí iina Apajiya nu imá nigki tuke ememattai atí. Aatus atí.

Inagnaku akatmabau

²¹ Ashí yatsug aidau, ubag Jisukristu nemajin aidau anuí batsata nunú kumpamjutuata. Tuja yatsug wijai batsatana jushakam aikasag atumnash kumpamjamainawai. ²² Dutixsag yatsug Jisukristun nemajin aidau juwi batsata dushakam kumpamjamainawai, imá senchi Roma apujiya nuna jeen takau Kristu nemajin aina nunú.

²³ Iina Apuji Jisukristu atumnash wait anenjamag niina anenkajiya nunash amastinme.
Aatus atí.

PABLO PAPI' AGAJA COLOSASNUMIA AIDAU AWETIMU

Pablo Colosasnumia aidau kumpabau

¹ Witjai Pabloitjai, Jisukristu chichame etsegtukti tusa Apajui wakegau asa awetiuwai. Yatsug Timoteojai pujusan, ² atum Kristu nemagkautijum, nigki umigkujum imagnisjum yaakat Colosas bat-satjum nuna kumpamjime. Atumnash iina Apaji Apajuiya nu, ii Apuji Jisukristua nujai wait anenjamjag shiig agkan anentaiksa pujutan amastinme.

Pablo Jisusan nemagkau aidau Apajui aujtusbau

³ Atum pachisa Apajui aujtakuik tuke see tusaiki aji, iina Apuji Jisukristu Apajiyana nunu, ⁴ atum Kristu Jisusai kajintsa anentaimeidausa asajum, ashí tikich yatsut aidaush aneajum nuna antugkau asan. ⁵ Duka atumek yamajam chicham dekaskea nu etsegbau antukuitjum duwi nagkamsajum, atum jukitnun Apajui umigtamkamu nayaimpinum ajutjamaina nu dakaidau asajum nuniagme. ⁶ Atuminish nunu chichamak tajutjamawajui, duka ashí tikich nugka aina nuwish etsegnajui. Nunitai nuna antuidaush dekaskeapi tuinawai, atum Apajui wait anenjabau chicham antukjum, niina dekaskejiya dushakam wainkauwaitjum nunisag. ⁷ Epafra iina aneetaiji jutiijai takauwa nu, Kristu aneasu asa imatikas umigna dushakam junak jintinjamawajui. ⁸ Nigki jutiinashkam, atumin Wakaní Pegkejiya nu egkemjutpawagmatai aneniajum nunash ujakmayi.

⁹ Nunu yama nagkamchaku antukmayag duwi nagkamsaik, atumnak idaitsuk Apajui tuke aujtajime. Nuniakun aujtajime: Apajui wakejamu takatan dekamtijamatnume, nuigtush Wakaní Pegkeji jintinjabauwa nunash shiig dekainak, ¹⁰ Jisukristu nemagkau aidaush wajuk pujumaina ainawa nunisag pujuinak, ashí Kristu wakegamu aina nuna takainak shiig aneemtiksatnume, nuninak Apajuinashkam shiig dekaatnume tusan. ¹¹ Nuniagmin niina senchiji imana duwi senchitjamawag ichichtamjatnume, dutikamu asajum kuashat utugchat ajutjamkuish katsunjajum, emamkesjum shiig aneasjum pujustajum tusanush segatjime. ¹² Wika Apajuinak segajai, atumesh shiig aneasjum iina Apaji see titajum tusan, ni nayaimpinum inama nui, niina umijuidau aidaun umigkamua nuanu, jutiinashkam pujustinme tusa umigtamkau asamtai.

Jisukristui dekas wagaakuk

¹³ Iik iwanchi inatai batsatjin, Apajui agkanmitkagma, niina Uchiji aneetaijiya nuna inamtaijin pujustinme tusa jujamkiajui. ¹⁴ Kristu jutiini mantamna ni numpen ukajua duwi agkanmitkagma, iina tudaujinash tsagkugtamjauwai.

¹⁵ Kristuke Apajui wainmainchauwa nuna iwaidauk, nigka uchi iwaiya numamtin asa, ashí najankamu aina duka atsaig Apaji inamtaijin tuke pujujaku. ¹⁶ Nunin asa nigki najankauwai nayaimpinum, nugkanum ayaa nu wainainag nunash, tuja wainmainchau

aina nunashkam. Ashí wakan senchigtin inamaina dusha Jisukristu najankamu asa niinuk ainawai. ¹⁷ Kristuk nigka yaunchuk nagkamnas ju wájí aidaush atsuinamunum pujujakuí, nunin asa ashí wájí aina junak nigki shiig nunisag atinme tusa diiyakui. ¹⁸ Nuigtushkam nigki, niina nemajuina nuna Apujishkam, nigki jakau nantashainmaya nagkamas nantakiuwa dushakam, nunin asa nigki wagaaku juwakui. ¹⁹ Apajuik niina Uchijí Aentsmaga Akiinauwa nunak, ni senchigtina ibauk atí tusa wakekauwai. ²⁰ Apajuí Kristunak awetugmauwai jutiin uwemtijamjati tusa. Dutikamu asag ashí nugkanum, nayaimpinmash batsata dushakam ataktú wijai shiig anendaisag pujustinme tusa dutikauwai. Junak niina Uchijí awemam numinum achinag jaak numpen ukajua duwi dutikauwai, dutikamu asag yamaik Apajuyiaig ashí agkan amain ainawai.

Duwikik Apajuí shiwaji aajakuitku yamaik niina aentsji waigji

²¹ Duwikik atumshakam Apajuí adijkachu aajakuitjume, ni anen-taimtutsuk pegkegchau takatak batsamtuidau asajum, Apajuí shiwaji aajakuitjume. ²² Tujash yamaik Apajuyiaig shiig chichamak iwajamui. Nunak Apajuik niina Uchijí Aentsmaga Akiina iini mantamdauwa nuaduí, niina aentsji aidauk niina emtinish bakumamainchau atinme tusa dutikauwai. ²³ Tujash nunak imá Jisusaig kajinas anentaimainak, nuigtú yamajam chicham Jisusai uwemna nunú pachisa etsegbaun antukajua nunak dakak pujuina nu, iman amain ainawai. Nunú chicham ashí tikich nugkanmash etsegnakua nunak wishakam etsegjai.

Pablo Jisusa nemajin aidau yaigtá tusa awemamuitjai tibau

²⁴ Kristuk waittsauwai ashí niini minidaun uwemtijata tau asa, niini jegaidauk niina iyashijai betekak weedau asamtai. Wishakam duwi shiig aneasan pujajai atumiin waitiaknush, Kristu waittsamua nuna umiakun. ²⁵ Apajuik minak niina aentsji aidau yaigtá tusa awetiuwai, atumiin mina chichamjun ashí wekagas etsegtugkati tujutu asa. ²⁶ Apajuik yaunchuk anentaimas dutikatjai tibauji dekaachbau aajakua nunak, yamai niina aentsji aina nuna dekamtikawai shiig dekaatnume tau asa. ²⁷ Nunú pegkeg dekas iman Apajuí anen-taimtusbau aajakua nuna, ashí aents aidau dekaati tusa wakekauwa duka: Kristu atumin pujau asamtai, niijai pujustin asajum dekas iman dakajum nuuwai.

²⁸ Jutiik Kristu pachisa etsegtakuish, ashí aents aidauk shiig pujustajum tusa chichagji, jintinkagtakuish ashí pegkeg aina duke jintinkagtuinaji, Kristu emtinish shiig pegkeg iwainakta tuidau asaja. ²⁹ Nuaduí wika niina senchijí sujusbauwa duwi shiig senchi takaajai.

2

¹ Wika atumesh, Laodicea batsamin aidounash, nuigtú ashí tikich mina waitchau aina nunashkam yaigta tabaunum, ashí wi uyumasan dutikag nunú dekaatajum tusan wakegajai. ² Wika nunak atumin anentaiminish ichichmamajum tikich aidaujaish pempentunisjumek aneeni pujakjum, Apajuí yaunchuk Kristun pachis tiuwa nunú dekaachbau aajakua nunash shiig dekaatnume tusan wakegau asan imaniajai. ³ Imá Kristuig ashí pegkeg, yachamet, shiig dekat aina duka awai.

⁴ Junak wika, chicham pegkeja imanun ujpainak tsanugmag, anentaimin yapagtugmawainum tusan tajime. ⁵ Wi anuí atumjai ijuna pujachkunush, mina wakanjuig atumjaig ijutkau asan shiig anejai, atum Kristui kajintsá anentaimkujum niinig emetmamjajum, ashí betek makichkinmag anentaimkujum, imagnisjum shiig batsatu asagmin.

Yamajam pujut

⁶ Atum Apu Jisukristui sujumankau aidautigmek pegkeg takamain ainagme, Apajuí aentsji aidaush wajuk pujumainaita nunisjumek pujakjum. ⁷ Nuniakjum numí kagkapé initak akajau asa, kakajus katumainchau wajas aama imanikjum, atum Jisukristui kajintsá anentaimjum nuanuish atajum. Tikich aidau Kristu pachisag jintinjamawagmatai, Apajuí atumiin pegkejan dutikauwa duwi see titajum.

⁸ Aneaku atajum, makichik aentskesh dita unuimagbaujin dekaskea imanun jintinjamainak tsanugmajainum, ditak Kristui kajinas anentaimainak uwemjatnume tusag jintiinatsui, ditak yaunchuk ditá muunji takaajakbauwa nunak jintinawai.

⁹ Kristuk Apajuiya nujai shiig betekai, niishkam Apajuik asa. ¹⁰ Atumnak ashí ajutjamjume Kristujai ijutkau pujau asagmin. Apajuí Kristunak, nayaimpinmaya senchigtin aina nuna nagkaesau, iwanchi senchijnash, nukkaya apu dekas senchigtin aina nunash, ashí najankamu aina nuna nagkaesau senchintikauwai. ¹¹ Mina pataag judío aidau pakamajakú aina numamtuk, atumesh Jisukristui kajintsá anentaimkujum, Apajuí aentsji waigkugme. Nuniku asagmin Apajuí, atum pegkegchau takastasajum anentaimtujukuitjum nunak utsanjamkauwai. ¹² Atum yamimakjum yuminum yaunchmajum duka, Kristu ukuntsauwa numamtuk wajagme, jinkugmesh Kristu nantakiuwa numamtuk wajagme, Apajuí ni senchijin Jisusan inankiuwa nuanuig kajintsá anentaimu asajum. ¹³ Atumek yaunchkek Kristui kajintsá anentaimainachu asajum, Apajuí pujutan sukagtina nujai tupagkiu aajakuitjume, pegkegchau takat aina nu ukuinachu asajum. Tujash yamaik Apajuí pujutan amasajui atum Kristujai ijutkau pujau asagmin, dutijama ashí iina tudaujinak tsagkugtamtajuwai. ¹⁴ Yaunchuk chicham umiktin aajakua nu, jutii umiashbaunum bakumamain aajakuitag nunak Apajuí juki, Jisukristu numinum achinjauwa nui esakajui. ¹⁵ Dutikak ashí wakan pegkegchau senchigtin aina nunash depetek senchigtuchu emak, ashí wainainamunum iwainaku.

Tikichkesh juu umiktajum tujamain ainatsui tibau

¹⁶ Makichik aentskesh: “Juka yuwawaipa, jusha uwajaipa, judío jistamtaiji jistamatajum, nantu taa taakuí jistamtajum, tsawan ayamtai tsawaakuí ayamtajum, tudau weejum”, tujamainakuish antugkaipajum. ¹⁷ Ashí ju jista aina junak Kristu taachu asantai aikajakú ainawai, jujú jutikamunum dekaajakú ainawai, atak tikich minitna nuna. ¹⁸ Makichik aentskesh: “Atumek nayaimpinmaya aents segachkugmek uweemaitisugme”, tujamkuish antugkaigpa, nunak wainkachu ainayatak wainak ememak, ememachuchia imanis tu wekaewai. ¹⁹ Tujash Kristuk niini kajinas anentaimaina nuna Apujiyai, nunin asa makí makichik yayawai ni wakega nunisag pujustinme tusa. Nuaduí niina

dekaskeapi tuina duka Kristu iyashiya nuninai, tuja Kristuwai ditá buukega numamtinuk.

²⁰ Kristu jutiiní mantamdauwa nunisjumek, atumesh niijai betek jakau ainagme, nuaduí atumek aents Jisusai kajinas anentaimchau aidau takaina nunú umiktasagmek wakejumain ainatsjume, ²¹ nunin asajum: “Juka yuwawaigpa, apasmesh dekapsaigpa, antitash antigkaipa”, tujamainakuish antugkaipajum. ²² Nunú umiktajum tibauwa duka aents jintiaku tibau asag, megkaejatin ainawai. ²³ Nu aents jintiamu aina duka, dekas dutsukaitai yaijatmainuk tusa umi-main ainawai. Wagki jintiinak: “Wainkauchia nunin anenmamsata takuik, iyash senchi waitkamainai”, tuina duka dekaskechui. Tujash nunú aents aidau jintiina duka, dita anentaimsajag pegkeja nunin, dekaskea nunin diinawai: “Juna aaja umiaknuap aents pegkejam, tudaugtuchu, kakagchau amainaitja”, tuidau asag. Tujash wainak iyashinak waitkainawai. Nunin asa nu jintiamu aina duka iina iyashí pegkegchau wakegamu idaitanmag yaijattsui.

3

¹ Atumesh yamaik Kristujai nantakiu asajum, nayaimpinum Kristu Apajuí untsujin inamjatatus eketa nuwiya waji anentaimtustajum. ² Nayaimpinmaya waji imá senchi anentaimtitajum, nugkanmaya waji aina duka anentaimtú pujuigpajum. ³ Atumek Kristujai jakau asajum, Kristujai pujau asagmin yamajam pujut ajutjamjum nunak, aentsuk wainmain ainatsui. ⁴ Kristuwa duke iina pujutan sujamsajua duka, nunin asa ataktú juwi minak wantinkatna duwi, iishkam niiya imanuk betek wajasagtinaitji.

Yaunchuk pujujukbaush Kristu nemagkuish wajuk pujumainaita

⁵ Ju nugka juwiya wakejut atumiin awa duka maa emegkaumaina numamtuk awajkatajum: Tsanijinawaigpajum, pegkegchau aidaush takasaigpa, atum pegkegchau katsunjashmin wakegamush takasaigpa, pegkegchau aidaush wakekaigpa, imá midauk atí tusagmesh wakeyigpa, nuniakjumek nunú apajimá pujumain asamtai. ⁶ Jujú aidaun takainak, Apajuí chichamenash intimjukiag yujaina nunak, Apajuí senchi suwimkan susatnai. ⁷ Atumesh yaunchkek ju aina juka takaajakú ainagme. ⁸ Tujash yamaik ju ashí waji aina duka idaisatajum: Kajegdaika nemasdaika pujut, waamak kajet, pegkegchau takat aidau, pegkegchau chichagkagtut aidau, chicham pegkegchau chichat aina dushakam. ⁹ Yaunchuk junin pegkegchau takat aidau ukukiu ainayatkujum, pempeentunikjum tsanunijaigpajum. ¹⁰ Yamaik yaunchuk pujujukbau betek pujatsjume, dekaskenmag atumek yamajam aents ainagme, nunin asajum Apajuí atumin najapauwa imanuk wegagme, nuniakjum niishkam aan kuashat shiig dekagme. ¹¹ Nuaduí judio, judiuchu akush, pakamaku, nuna dutikachu akushkam yamaik wainkayai, nuigtushkam unuimaju, tuja unuimagchau akush, inatai aidau, inashtai agkan ainakush wainkayai. Kristuk ashí nigki najankau asa, ashí niini kajinas anentaimaina nuwig awai.

¹² Mina aentsug pegkejam atinme tusa Apajuí anempas etegtam-jau asamtai, dekaskenum wait anenkagtin, shiig anentaimkau, kakagchauch, ememachu, utugchat akuish katsunjajum pujakjum, ¹³ pempeentunisjumek tsagkugdaijatajum. Tikich aidaujai wake

besegdaikamu ajutjamkuish, iina Kristu tsagkugtamjauwa dutiksagmek atumshakam tsagkugdajatajum. ¹⁴ Dekatkau dutikmainaitjum duka anenimainaitjum nuuwai, nuuwai dekas shiig ijuntsa pujutan sukagta duka. ¹⁵ Kristu shiig agkan anentaimesa pujutan amaamu atumnash ajutjamtinme, Apajuik nuna aatus dutijamata tau asa, makichik iyashik etamkauwai, nuaduú atumek see titajum.

¹⁶ Kristu chichame pegkeg shiig kuashat jintintuamuitjum duka, imatiksagmek aneaku atajum, nuniakjum Apajuí wait anenjamjau asamtai see titajum. Pempentunisjumek jintindayakjum, chichagdaikugmesh shiig anentaimesajum dutikatajum. Apajuí chichame agagbau aina nuwiya kantamkujum, ni emematku kantantai aina nuwiyashkam kantamkujum, Wakani Pegkeji wakeetan amaa nujaishkam kantamatajum. ¹⁷ Ashí atum takaamu chichaamu aina dushakam Apu Jisus wakega dutiksagmek dutikatajum. Nuniakjum Apajuí iina Apajiya nunú see titajum, Jisukristu jutiini dutikauwa nunú pachisjum.

Jisukristu nemajin aidau nunimainji

¹⁸ Nuwa aishintin aidautigmek imá aishumek umigkatajum, Apu Jisusa nemajin aidau wajukmaina ainawa nunisjumek. ¹⁹ Aishmag nuwentin aidautigmeshkam nuwem aneetajum, nuniakjum nuwem kajemainuk chichajigpa.

²⁰ Uchi aidautigmeshkam, atumin apa dukujai inapainakuish betek umigkatajum, aatus wakegawai Apu Jisusak. ²¹ Atum uchigtin aidautigmeshkam uchijum takaamujinkish, jintinkumkesh kajemainuk chichagkaigpa, junik anentaimá pujuinum.

²² Inak aidauh, atumin apujum inapakuig shiig umigkatajum, tujash imá apujum wajas diigmakui shiig anenjusti tusa takatsuk. Dekaskenum duka tuke shiig takau atajum. ²³ Ashí atum takaamua duka, aentsdau takamainaitjum nunitsuk, Apu Jisusdau anentsajum shiig wakejusum takastajum. ²⁴ Wagki atumek dekagme Apajuí ni anagtamamujinak amastina duka, Apu Kristua nudau takagsau asagmin. ²⁵ Ni pegkegchastu takasuk nu pegkegchauwa nuwiyanak jukitnai. Wagki Apajuik betek susatnai dita takasbaujinig dutiksag.

4

¹ Atum inamin aidautigmesh atumi inakem shiig awagmakjum, inamin pegkeg atajum. Wagki nayaimpinum Inamin puja nunú atumnash shiig waipaina nu dekau asajum.

² Apajuí mijattsuk aukjum aneaku batsamsajum, see tusagmeké atajum. ³ Nuniakjum juti pachijattsagmeshkam Apajuí aukjagtustajum, Apu Jisusa chichame shiig agkan etsegtuta nuanú jutiinash yaimpakti. Dutijamantai shiig dekamtikawagmi, Kristu pachisa yaunchuk dekaachbau yamai etsejuinag dushakam, nuna etseju asan juwi achinkan pujajai, ⁴ nunak wisha shiig etsegkun paan antumainun dekamtikagtuatjai tusan tajime.

⁵ Apajuí nemagchau aina nujai wekaekugmesh, wainka tsawan megkaetsuk, shiig anentaimesajum ausatajum. ⁶ Nunika aukjugmesh chicham wakejusa antumain ausatajum, tuja dita inimpainamush wajuk aimainaita dushakam shiig dekau atajum.

Inagnaku kumpamkagtamua

⁷ Ashí midaun pachisag iina aneetaiji yatsug Tíquico, dekas imatikas niishkam wijai Jisusa takatjin takagna nu ujakpaktajume. ⁸ Duwi niina atumiin awemajai, jutii wajuk pujuinaji nuna ujpainak, anentaim-nash ichichtamjatnume tusan. ⁹ Jutii aneetaiji iina yachi Onésimo betek umina nunú niijai minawai, niishkam atumjai betek Jisusan nemagna nu. Dita anuí taawag ii wajukenaji nuna ashí ujakpaktatui.

¹⁰ Aristarco, wijai achikam puja dushakam kumpamjamainawai, Bernabé iká yachi Marcosa dushakam aikasag kumpamjamainawai, wi niina pachisan tibaijim dutiksagmek atumiin minakuish jukitajum. ¹¹ Nuigtú Josué Justo tuuta awagmataiya dushakam kumpamjamainawai. Imá juke ainawai mina pataag judío aina nuwiya wi Apajuí inama nunú pachisa etsegbaunum yaintuina duka, ditak mina anentaighash shiig ichichtujagmayi. ¹² Dutiksag Epafras Kristu Jisusan inakega nu, atumjai ijunakua dushakam kumpamjamainawai, nuniak Apajuin shiig senchi aujtugmainawai, shiig imagnis emetmamag pujuinak, ashí Apajuí wakegamua nunak takagsatnume tujamaidau asag. ¹³ Wi niinak atumin puyatjutpaina nuna wainu asan tajai, aantsag Laodicea batsata nunashkam, tuja Hierápolis pujuina nunash uyumawai. ¹⁴ Aantsag aneetaig Lucas ampijatna dushakam, Demasjai kumpamjamainawai.

¹⁵ Tuja yatsug aidau, ubag aidau Laodicea batsata nunú, nuigtú Ninfas niina jeen Apajuin emematuinak ijunaina dushakam, Pablo kumpamjamjume tusajum ujatjuktajum. ¹⁶ Ju papiin awemag ju ausagmek, Jisusa nemajin Laodicea batsata dushakam awetitajum ditash ausatnume, tuja dita awetimun atumin awetugmainakuish aikasjume ausatajum. ¹⁷ Arquiposhkam ujaktajum, niish betek umiktí Apu Kristu takat susamua nuna tujamui tusam.

¹⁸ Ju kumpamkagtamua junak wi mina uwejuí agatjime, Apajuí aukgumesh wi achinkan pujag ju anenjatajum, Apajuí atumnash wait anenjamjatnume.

Aatus atí.

PABLO NAGKAMCHAKU PAPI' AGAJA TESALONICANMAYA AIDAU AWETIMU

Pablo Tesalonicanmaya aidau kumpabau

¹ Witjai Pabloitjai, Silvano, Timoteo aajan ju papiinak agatjime atum Jisus nemagkau aidautijum yaakat Tesalónica batsamin aidautigmin. Ii Apají Apajuiya nunú Apu Jisukristujai wait anenjamag, shiig agkan anentaimesa pujutan amastinme.

Tesalonicanmaya aidau Apajuí dekaskeapi tabauji iwainmamkagbau

² Apajuí iina Apajiya nu aujkuish atum pachisa see tusaiki ainaji, ³ nuniaku ashí atumek tuke mijattsuk pachisaiki ainaji. Wagki, atum ii Apuji Jisukristuig kajintsá anentaimeaidau asajum pegkeja duke takaajum nuaduí, Jisukristu aneamunum tikich aidau yayakjum, waitiakjumesh katsunjajum ichichmamja pujusjum, ni minakuish wainkatasajum dakaidau asagmin. ⁴ Yatsug aidauh, ubag aidauh, Apajuí atumnak anempajume, nunin asa atumnash ni etegtamjawa duka dekaji. ⁵ Ii Kristu uwentikagtawai tusa chichagkagtukbauk, ayatak chichamaik chichagkagtukchamui. Wakaní Pegkejiya nuna senchijin, chichamak dekaske tusa etseggamui. Jutii atum aneau asaja, atumjaish wajuk batsamsamiaji duka shiig dekagme.

⁶ Atumek jutii wajuk pujaku iwaintukuitjime, nuigtú Jisusa pujutí digsgmeshkam nunisjumek pujuinagme. Chicham etsegbaush, tikima senchi waitiamunum pujakjumesh uyumatsuk antukuitjime, Wakaní Pegkeji dakujutan amainau asantai. ⁷ Nu atum nuniakjum ashí Apajuí nemajin Macedonia nugkanum, Acaya nugkanum batsataina dushakam iwaintukugme. ⁸ Apajuí chichame etseggauk atumiin nagkamna, Macedonianmash, Acayanmashkam, nuigtú ashí tikich nugkanmash pampagké. Atum Apajuiyai kajintsá anentaimejum nunak, ashí yantamnum augmatuidau asagmatai, jutii anuí chichagkagtumainaitag duka atsumnatsui. ⁹ Jutii atumiin taantai, atum wajuk jukagtukiwaitjime, nuigtú dakumkamu apajimá batsatutijum idaikujum, Apajuí iwaaku dekas tuke pujuwa nunú umigkujum, ¹⁰ Jisus Apajuí Uchijí, Apajuí inankim nayaimpinum weuwa nunú taatnuji dakainajum nunash ujaninawai. Jisusai, suwimak ishamain atina nui ayamjupakua duka.

2

Pablo Tesalónica pujusá takasbau

¹ Yatsug aidauh, ubag aidauh atumek dekagme, iik atuminig tikima wainkaik ijaschabaiji. ² Yaakat Filiposnum pujusá Jisus pachisa etsegjin kajegtamaidau asag, aentschau chichagtamainakui senchi waittsauwaitag dushakam atumek dekagme. Tujash Apajuí yaimpasmatai ishankagtutsuk, Jisukristui uwentikagtau tusaish, tikich antutan dakituinaigkish atuminchakam chichagkagtukbaiji. ³ Ii anuí chichagkagtukmayag duka dewakbaukesh atsawai, nuniachkuish pegkegchau anentaiyaikish, tsanumkuikish tichamui. ⁴ Apajuí jutii

anentainash ashí diigtamas, ni takatjinak Kristu pachis etsegtukti tusa sujamsauwa nu etsegtuinaji. Duka aents shiig awajkatasaikish takaatsji, Apajuí wakegamu takainaji, nigki jutii anentaibaujijnash shiig dekawai. ⁵ Jutiik pegkejan chichai shiig anenjustinme tusa chichachuitag duka atumek dekagme. Jutiik atum tsanujá kuichik jujuktasaikish chichachuitji. Junak Apajuishkam shiig dekawai. ⁶ Atumkesh, nuniachkush tikich aidaukesh eme anenjitnume tusaikish wakegatsji. ⁷ Jutii dekas Jisus chicham etsegtugkatajum tusa awemamu asaja, atum yayatkatajum tumainaitku duka tutsuk, nuwa uchijin kuitamama numamtuk, atumnak shiig anentsan puyatjusan kuitamk-abiajime. ⁸ Imatika aneedau asaja, yamajam chichama duke ujaktasa wakeetsuk, atum aneamunum bakumatasaish wakegainaji.

⁹ Yatsug aidauh, ubag aidauwah atumek aneakjume, atum waitkat dakitau asaja wajuk takaayaji duka. Jutiik tsawai kashishkam takai takainakua yawejaish, Apajuí chichameg etsejiaji.

¹⁰ Atumetjume jutiiinu dekautigmek, Apajuishkam aikasag degagtamji, atum Apajuí nemagkau aidautigmijai jutii pujubiag duwik, pegkegchau aidauk takaachu asaja, makichik aentskesh tujamainchau shiig imagnisa pujusbaiji. ¹¹ Jushakam dekagme, uchigtin uchijin utuja numamtuk chichagkun, makí makichkitigmin anentaimnash ichichtuyajime. ¹² Dutikakun, Apajuí nemajin aidaush wajuk pujumainaita, nunisjumek shiig pujustajum, niina inamtaiji dekas pegkeja nui pujustinme tusa untsukbau asajum, tuyajime.

¹³ Nuaduí jutiishkam Apajuik mijattsuk see taji, atum ii chichagkag-tamu aentsdauchuapi Apajuí chichamempapi tusajum, shiig antuku asagmin. Duka dekas Apajuin chichamegai. Nu chicham atumesh dekaskeapi tau asagmin, pujutjumnash kuashat yapagtugmawajui. ¹⁴ Yatsug aidauh, ubag aidauwah, atumshakam jutii waittsauwaitag nunisjumek waitiajume. Judeanmaya aents aidau Jisusa nemajuk Apajuin umijiagtai, ditanbaunak pempeentukiag waitkajakua numamtuk, atumnash atumin pataimik waitkagmainakui waitiagme. ¹⁵ Nunú mina pataag judío aina duke Apu Jisusnash maawajui. Yaunchuk Apajuí etsegtin aajakajua nunashkam ditak maawajui, nunisag jutiinashkam jügmakiag ajapjamawagmayi. Nunidau asag Apajuinak shiig awagmainatsui, ashí aents aidau nak shiwagmainawai. ¹⁶ Judiuchu aidau uwemjatnume tusa, Kristu pachisa ujakta tajinish dakituinawai, nunidau asag nuní nagkaemas tudaunak ikauntumainawai, nunidau asagmatai Apajuí shiig senchi suwimkan susatnai.

Pablo ataktú Tesalónica wetasa wakekamu

¹⁷ Yatsug aidauh, ubag aidauh, jutiik ujumak tsawantai atumjai wainitsuk pujakuish, tuke pachisaikí pujau asá, atum wainkatasa senchi wakeeyaji. ¹⁸ Nuniau asan wika atumin ijagsatasan dekaskenmag kuashtá wakekabajai, tujash iwanch utugtamtam tai minichabajai. ¹⁹ Apu Jisus ataktú juwi minakui, wi niina igkuaknush datsamamuk atsugtitnai, ayatak shiig aneakun emematnaitjai, atum imá Kristuig kajintsá anentaimaidau asagmin. ²⁰ Atumiin jutiik eme anenmamku shiig aneastinaitji.

3

¹ Nuaduí atumin kajimatmainchau dekapeau asan Atenas wiki juwakun, ² iina yachi Timoteon awemabiajai, Apajuí takagku Kristu pachisa etsegbaunum yaimna nuna, atum Kristui kajintsá anentaimjum nunash, ni chichagtamak nuní nagkaemas ichichtamjatnume, ³ makichkitigmekesh waitiakjum Kristu nemajut idaisaijum tau asan. Atumshakam dekagme jutiik aaja waitmainaitag duka. ⁴ Nuigtushkam wi atumjai pujusan emtiksan ujayajime, jutiik waitiamu igkugtin ainaji tusan, duka nunisag nagkaetamjume yamai wainjum nunú. ⁵ Nuaduí atumin kajimatmainchau dekapeau asan, ii takasbau wainak megkaekai tusan, Timoteon awetibiajime. Nunak atumin kuashat puyatjakun, Jisukristui kajintsá anentaimtan, iwanch pegkegchau takamtikainam idaisainum tusan dutikabiajai.

⁶ Tujash Timoteo atumiin pujau jutiiní taa ujakji chicham shiig pegkejan, atum Kristui kajintsá anentaimkujum aneniamugmin. Nuigtushkam ujakmae, atumesh jutii shiig anenkagtusjum wajatkatasajum wakegainamunash, jutii atum wainkatasa wakegag nunisjumek, atumesh jutiijai ijunjatasajum anentaimjum nunashkam. ⁷ Yatsug aidauh, ubag aidauh, nuna antukan kuashat utugchatnum waitiaku pujamun ichichmamjamjai, atum Kristui kajintsá anentaibauk nunisjumek batsatjum nuaduí. ⁸ Atum Kristu nemagkujum shiig emetmamjajum batsatbaun antukan ichichmamjamjai. ⁹ Nunikan shiig senchi shiig aneamug ajutui Apajuí emtinish, nuniakun Apajuinashkam imatiksasuk see tajai, atumin pachisan. ¹⁰ Tsawai kashijai Apajuin tuke augjai, atumiin taan wainkata tabaujún pachisan, nunikan atum imanisa kajintsá anentaimmainchau deka-peamu ajutjamkujaish shiig jintintuatasan.

¹¹ Ii Apají Apajuiya nu, Apu Jisukristujai jutiinash yaimpakagti atumiin minimaina nunash. ¹² Ii Apujuiya nunú sujamsatnume, ashí tikich aidaujaish pempeentuniki anenita nuna, jutii atum aneamug aikasag. ¹³ Apajuiya duke atumi anentaimnash ichichtugmagtinme, aan nagkaemasa kajintsá anentaimkujum, Apu Jisus niina aentsji pegkejam aidaujai minakuish, iina Apají Apajuiya nuna emtinish bakumamainchau wantinkamnujum tusan.

4

Shiig pujaku Apajuí shiig awagmamuu

¹ Nuigtushkam yatsug aidauh, ubag aidauh, Apu Jisus wakega dutiksasuk segajime: Wi jintintuabiajim nunisjumek, aan nagkaemasjum Apajuí wakega duke takaakjum shiig anemtiksatajum.

² Atumek Apu Jisus tibauwa nuna jintintuabiajim duka dekagme. ³ Atumnak Apajuik imá midau pegkeg aina nunak takainak, tsanijintsuk pujustinme tusa wakejutpagme. ⁴ Maki makichik nuwentin aidauk niina nuwenak eme anentus diiyak, pegkegchau takagtsuk pujumainai, ⁵ aents Apajuin anentaimtuchu aidau ditá iyashí pegkegchaun takastatus wakega nuna takainak nuween waitkaina nunitsuk. ⁶ Tuja makichkitigmekesh tikich Kristu nemajuina nuna nuwejaig pegkegchau takasaigpa, nuigtush yatum tsanujam pegkegchau takagsaipa, atum nunitaik Apu Kristu suwimkan senchi amastatjume, nunak duwikishkam tibaijime. ⁷ Apajuik iinak ashí

pegkegchau aina nunak takatsuk, pegkee pujustinme tusa etegtam-jauwai. ⁸ Tuja ju jintinkagtamun dakitauk aentsnakesh dakitak nuniatsui, Apajuin dakitak nuniawai, ni Wakaní Pegkejin sujamsauwa nuna.

⁹ Tujash Kristu nemagkau yatsut aidauti pempeentuniki aneenita nunak agatjashtatjime. Wagki pempeentuniki aneenitnak Apajuí jintinjamawaju asagmatai. ¹⁰ Duka nunisjumek aneniajume, ashí aents Kristu nemagkau Macedonia batsata nujaiishkam. Tujashkam yatsug aidauh, ubag aidauh tajime: Atum aneeniajum nuni nagkaemasjum aneenitajum. ¹¹ Atumek itugsanuk tikichin waitkatsuk pujusag tusajum kakanmamkujum, makí makichik atumin takatjum takastajum, jutii nuni takastajum tibaijim dutiksagmek. ¹² Aatsa takau asajum atsumkas pujutai, tikich aents aidauh eme anenjamás diigmastinme.

Apu Jisus wakitki taatnuji

¹³ Yatsug aidauh, ubag aidauh, Jisusa nemajin jakaush wajukatnuita nunú atumesh dekaatajum tusan wakegajai, aents Apajuí nemagchau aidau, jakau aidauh wajukatnaita nuna dekachu asag, wake besemag anentaimá pujuina nunikaijum tusan. ¹⁴ Jisus jaka nantakiuwa nuanuig kajintsá anentaimainaji, Jisusan nemagkau jinawajua nunashkam, Jisus ataktú juwi minitaiyap Apajuí inanjatnaita tusaja.

¹⁵ Nuaduí Apu Jisus tiuwa dutiksaik taji: Jutii iwaaku batsatutik Jisus minitta nuaduik, jakau aidau ukuakuik emjashtinaitji. ¹⁶ Apu Jisus nayaimpinmaya minitai, senchi untsuubau atinai jakau aidau nantagtinme tusa, tuja nayaimpinmaya aents aidau apujiya dushakam senchi untsumkatnai, nunitai tikich nayaimpinmaya aents trompetajin senchi umpuagtinai, nunikmatai Kristu nemajin jidau aina nunú nantajagtinai. ¹⁷ Nunikmatai iwaaku aidauti ditajai ijunja yakí takuntinaitji, agkajunum Apu Jisus yujagminum igkugtasa, nunika ii Apujijai atakea duwish tuke pujutnaitji. ¹⁸ Nuniktin asantai jujú chichama jujai tikich aidaujaish anentai ichichtunigtajum.

5

¹ Tuja tsawantash wajukeyaig, jutiiish wajukeyajinig taati nuna pachisnuk agatmaitsujime. ² Wagki, atumek shiig dekagme Apu Jisus minamu tsawagtina duka, kasa kashi pachiachmau waiya numamtuk wajaktinai. ³ Wajutiya aents aidau: Yamaik shiig agkan anentaimsa, nuigtush kajintsá batsatainaji, tiagtin ainawa nuniamunum pachiachmau dita waittsatnujig minittinai. Nuwa ejamtin uchigmatjí jegamtai najaimamun ishamak, emegkakta takush emegkaumaitsu numamtuk, aents duwik uminkachu aidauk, nunú waitiamun emegkakta takush emegkakchagtinai.

⁴ Tujash yatsug aidauh, ubag aidauh atumnak uwaktamkashtatjume, kasa wajukeya numamtuk minakush, wagki atumek tikich dekainatsu nuninchau asagmin. ⁵ Wi juna tajim junak, atumek Jisukristu aentsji asajum pegkeg takaakjum, tsaaptinnum pujumaina numamtuk wajaidau asagmin tajime. Jutii Jisukristui kajintsá anentaimaidautik, iwanchdau aidau suwenum yujaina nuninuk ainatsji. ⁶ Aents Apajuin nemajuinatsus duka, kashi kanaku wajukmaina numamtuk wajainawai. Tujash jutiiik shiig umintsá aneaku batsamsagmi. ⁷ Wagki,

aents kanuina duka dekainatsui waji nagkaemaktatua nunak, nam-pena dushakam wajukeya nunak dekatsui. ⁸ Tujash jutiik tsawai batsaamaina numamtuk batsatu asaja aneaku batsamsagmi. Sungat aidau maanitnum weenak jiju najanamun detsepen ejaktatus nugku ainawai, numamtuk jutii Jisukristui kajintsá anentaimaidautik, ni aneamua duwi pempentunisaik aneeninaku, nuigtú jutii uwemjau asaja dakainag nu atsejutai suntajan buuken ejata numamtina nujai ejamakagmi iwanch pegkegchaun takamtijamsainum. ⁹ Apajuik iinak suwimkan jukitin atinme tujamchauwai. Ayatak Apu Jisukristui uwemtan jukitnume tujabiau. ¹⁰ Jisukristuk jutiiini jakauwai, iwaaku batsatkush, jakau akushkam imá wijaig ijunas pujustinme tujamu asa. ¹¹ Nuaduí pempeentunikjum wakegat egketdayakjum ichichdaitajum, atum takaajum dutiksagmek.

Pablo Kristu nemajin aidau chichagbau

¹² Yatsug aidauh, ubag aidauh junashkam segajime: Atumin jintinjainak Apu Jisus nemagtanum chichagtamaina duka eme anentsá diitajum. ¹³ Dutikakjum shiig anentsajum aneetajum, dita takaamujin eme anentsajum diyakjum, ditajai ijuntsajum shiig agkan anentainsajum batsamsatajum.

¹⁴ Yatsug aidauh, junashkam tajime: Aents takatan dakitauk jiyaktajum, junik dekapedaush wakemitkaktajum, yainkatnume tusa atsumaidaush yaigtajum, nuniakjum tikich aidaujaish kajegdaisuk pujustajum.

¹⁵ Pegkegchaun takagtamainakuish, pegkegchaunmak ikmakaig tusajum kuitamamkatajum. Dekas pegkeja duke ikdaikajum takas-tasajum kakanmamtajum, imá atumek dutikdaitsuk ashí tikich aidaujaish dutikatajum.

¹⁶ Tuke shiig aneasjum pujustajum. ¹⁷ Nuniakjum Apajuishkam tuke aujsagmeké atajum. ¹⁸ Ashí pachisjum see titajum, jujuwai Apajuí jutii Kristu Jisus nemajin aidautin nuniktinme tusa wakejutpa duka.

¹⁹ Wakaní Pegkeji anentaimin aujtabau antugtsuk idaisaipajum. ²⁰ Apajuin etsegtuidaush, wainkaya nuninuk diisaigpajum. ²¹ Ayatak ashí ni chichaamujish shiig kuitamsajum antugkatajum, Wakaní Pegkeji tamash tawa tusajum, nunikjum pegkejan takuig antugkatajum. ²² Idaisatajum ashí pegkegchau takatak.

²³ Atumnash Apajuí shiig agkan anentaimsa pujutan sukagtina nunú pegkeemtijamiagti. Nigki kuitamjutpagme atumi wakanminash, atum anentaibaunash, atumi iyashminashkam, Apu Jisukristu tataish bakumamainchau atinme tujamaidau asa. ²⁴ Apajuí dekas betek umina nunú atumnak etegtamjauwai, dutijabau asa nigki nunak dutikatawai.

Inagnaku kumpamkagtau

²⁵ Yatsug aidauh, ubag aidauh, jutii pachijattsagmeshkam Apajuí aujkgatustajum.

²⁶ Yatsug aidauh, ashí Kristu nemajin aidautigmek aneenisjum kumpamdayakjum pagkuniktajum.

²⁷ Ju papi awetajim juka Apu Kristu wakega dutiksagmek ausatajum, ashí yatsug aidauash antuktinme.

²⁸ Ii Apuji Jisukristu atumnash wait anenjamjatnume.

Aatus atí.

PABLO AWENTSAIK PAPI AGAJA TESALONICANMAYA AIDAU AWETIMU

Pablo Tesalonicanmaya aidau kumpabau

¹ Witjai Pabloitjai, Silvano, Timoteo aajan pujusan jujú papiin agatjime. Dutikakun atum iina Apají Apajuiya nunú, Apu Jisusa nemajin aidautijum, yaakat Tesalónica batsatjum nuna kumpamjime. ² Apajuí iina Apajuijiya nunú, Apu Jisukristujai wait anenjamu asa, atumnash shiig agkan anentaimesa pujutan amastinme.

Pablo Tesalonicanmaya aidau Apajuí aujtusbau

³ Yatsug aidauh, iik Apajuí aujuinakuik atum pachisa see tusaiki ainaji. Jutii pegkeg dutikmaina duka juuwai, wagki atumek aan nagkaemasjum Kristui kajintsá anentaimkujum, pempentunisjumek aan nagkaemasjum aneenidau asagmin. ⁴ Tikich nugkanmaya Jisusa nemajin aidaunum chichaakuish, atumin eme anentsan etsegtajime, ditak utugchatnum pujuinak waituinakush, imá Kristuig kajinas anentaimas pujuinak, shiig nemajuinawai tusa. ⁵ Atum Kristui kajintsá anentaimu asajum ashí waitiajum duka, Apajuí dekaskenum pegkejan takaa nuna iwainawai. Nunú aaja Kristui waittsau asagmin niina inamtaijin awaintamawagtinai.

⁶ Apajuik pegkeja nunak takauwai, nuniau asa yamai atumin waitkagmaina nunak suwimkan susatnai. ⁷ Tuja atum waitkam batsatjum nunak, jutiijai betek agkanmitkagmatnai. Nunak Apu Jisus, nayaimpinmaya ni aentsji senchigtin aina nujai, jii kegmunum egketkau minitna duwi dutikatnai. ⁸ Nuniak, Apajuí pachisa dekatnash dakituinak, Apu Jisusa chichame yamajam etsegbaunash antugkachaju aidaun suwimkan susatnai. ⁹ Ditak suwimkan juwinak Apajuijaig tuke kanaak kanakiag pujusagtinai, nuninak Apu Jisusa imanjiya nunash, senchijinash waintsuk batsamtinai. ¹⁰ Apu Jisus ni aentsji aidau emematam atina nunú tsawantinig, atumshakam ditajai ijunjatnaitjume, wagki atumesh jutii chicham etsegbau dekaskeapi tiu asajum.

¹¹ Nuaduí atum pachisa Apajuí tuke aujtuinajime, Apajuí atumnash, wajuk pujustinme tusaya etegtamjauwa ainawa nunisjumek pujustajum tusaja. Nunin asamtai Apajuí atumnash, atum ashí pegkeg aidau dutikatasajum wakegajum nunash niina senchijin amastinme, iina Apuji Jisukristui kajintsá anentaimaidau asagmin. ¹² Atum nuniamunum, tikich aents aidauh Apu Jisukristunash eme anentus diistinme, nuniagtai atumnash nigki wait anenjamjau asa, iina Apajuiji, Apu Jisukristujai eme anenjammas diigmastinme.

2

Jisukristu taatnuji

¹ Yatsug aidauh, ubag aidauh, yamai iina Apuji Jisukristu ataktú juwi minakui nijai ijunjatnaitag nuna tajime: ² Ishamkaigpajum makichik aentskesh chichagtamainak, "Apu Jisusak tae" tujamainai,

tikich chichau “wakan tujutne” tai, jutii pachijattsagkesh ni tujamaji, papí agag awetugmamji tujamainakuish, kakajus anentaimik yapajawaigpajum. ³ Makichkish tsanuamak aigpajum, Kristuk eke taatsui. Kristu taattak wajataik, kuashat aents Apajuin nemagtanak idaisagtinai, nuninai makichik aents dekas pegkegchau wantinkatnai. Nu aentsuk jii ajumaish kajinchaunum pujus waittsatna nunú atinai. ⁴ Nunú aentsua duka Apajuí shiwaji asa, Apajuí nemajin aidaunash shiwajiyai, aantsag wainak apajimin aidaunash shiwajiyai. Nuniau asa jega Apajuí ememattainum wayaa ekeemas: “Witjai Apajuinuk”, titinai.

⁵ Wi atumjai pujubiag duwi juna pachisan ujakbaijim nunú kajimatkgipa. ⁶ Nunú aents pegkegchau tsawan eke jegatsaig, yamaya juwik wantinkai tusa makichik emeteau awa duka dekamge. ⁷ Tujash yamaikishkam inamui pegkegchau takatnak, nuniayatak eke iwainakag takaatsui, nuna emetea nu agkasti tabaunum. ⁸ Nunikmatai dekas aents pegkegchauwa nu wantinkatnai, nunittaman Apu Jisukristu, nu aentsua nunak “jakati” titinai, tama jakatnai. Dutika Jisukristu ashí niina senchijijai inamjatna nuniak, nunú aents pegkegchauwa nuna senchijinak emegkaktinai. ⁹ Jisukristu eke nuna dutikatsaig, aents pegkegchaun takau wantinkatna duka, iwanchi senchijijai takau asa, aents dutikmainchau aidaun kuashat iwainak takaak aentsun tsanutnai. ¹⁰ Nuniak ashí pegkegchau aina nuna takatnai, aents suwimkan jukiagtina nuna tsanugtatus, wagki ditak Jisukristu chichame dekaskea nunú, aents aidaun pujut tuke atinun suuwa nuna dakitjaju asagmatai. ¹¹ Nuaduí Apajuik, nunú tsanumna nuna dekaskeapi titinme tusa idaisatnai. ¹² Nunak ashí aents aidaun, ni chichame dekaskea nunú etsegbaunash dekaskeapi tutan dakituinak, ayatak pegkegchaunak wakejus takasú aidaun, Apajuí suwimkan susata tau asa dutikatnai.

Uwemjatnume tusa etegjamu aidaun nunimainji

¹³ Tujash yatsug aidaun, ubag aidaun, atum Kristu aneetai aidautigmin pachisan Apajuí see tajai. Ni duwik yama nagkamchatinig etegtanjauwai uwemjau atinme tusa. Duwi Wakaní Pegkejiya nu, Apajuí wakeja nunak takastinme tusa yaimpakajui, wagki atumek chicham dekaskea nunú, nuigtú Jisukristui kajintsá anentaimu asagmin. ¹⁴ Apajuik jutii ni chichame etsegkauwaitag duwi atumnash untugmakajui, atumesh Apu Jisukristu eme anentam awa nunisjumek eme anentam aminjum tujamu asa.

¹⁵ Nuaduí yatsug aidaun, ubag aidaun imá niinig shiig emetmamja pujakjum, ii atumin jintintuamu unuimajuitjum nu, tuja papí agaja awetimajim dushakam aneaku atajum. ¹⁶ Iina Apuji Jisukristua duke, iina Apají Apajuiya nujai anempaidau asag, wait anenjamag ichichmamtan ajumaish nagkankashtinun, pegkeg dakainag nuna amasajua nujai ¹⁷ anentaiminish ichichtamjatnume, shiig anentaimtijamak ashí pegkegnak chichainak, takatnash pegkegnak takastinme tujamu asa.

3

Jutii pachijattsajum Apajuí segatkagtijatum

¹ Yatsug aidaun, ubag aidaun, junak inagnakun tajime: Jutii pachijattsajum Apajuí segatkagtijatum, jutiiish Apajuí chichame ashí

yantamnum etsegkagmi, dutikamunum shiig aneas antuktinme atumiin wajukabia nunisag. ² Dutiksagmek Apajuí segatkagtitajum: Aents pegkegchau aidau, Kristui kajinas anentaimainsu nunú jutiin waitkagmamain aina nunash agkamitkagmati tusajum. ³ Tujash ii Apuji ni tibaujinak betek umina nunú, nigki ashí pegkegchau aidauunmash ayamjutpak kuitamjamkatnume. ⁴ Apu Jisukristuig kajinmamsa anentaimji, ii dutikatajum tibau takaajum nunak, dutiksagkeap takasagtatua tusan. ⁵ Ii Apuji Jisus yaimpakti Apajuí anejata antsaik anejattanum, nuigtushkam waitiakuish Kristuig ichichmamta nunashkam.

Kristu nemagkau aidau takasá pujumain

⁶ Yatsug aidauh, ii Apuji Jisukristu wakega dutiksanuk tajime: Ashí Apajuí nemajin aidau takasá pujutan dakitak, ii jintintuabaijim nunash betek umiinachuk tujanjatajum. ⁷ Atumek, ii atumiin wajuk pujusbaiji nunisjumek atumshakam pujumainaitjum duka dekagme: Jutii atumiin pujubiag duwik takatskek pujuchbaiji, ⁸ yuwakuish akikmatskek yuchabaiji. Tsawai kashijai takaaku yawebaiji atum waitkat dakitau asaja. ⁹ Atum jutii yaijatkatajum tumainaitku, ii takaamun wainainak ditashkam takastinme tusa nunibaiji. ¹⁰ Tuja wi atumjai pujubiag duwik juna tibaijime: Ni takatan dakitauk yutanash yuwashti, tusan. ¹¹ Tujash antukmaji atum ainajum anuiya, ditanunak uyumas takatsuk, tikich takaidaun waitká yujaidau tabaun. ¹² Nunú aents nunin aidauinak Apu Jisukristu dutikatnume tawa nuna tajime: Dita yuwatnujin takainak takamtak batsamsatnume.

¹³ Yatsug aidauh, ubag aidauh, pegkeg takat aina duka yawetjaigpa. ¹⁴ Makichik aentskesh wi ju papí agagbauwa juna antutan dakitau wainkugmek tsanigkaigpa, ijuntakesh ijunjaigpa, nigki pujak datsaamas dekapsati. ¹⁵ Tujash shiwagmá pujusaigpajum, ayatak shiig ujaktajum yatsum anentsajum.

Inagnaku kumpamkagtamú

¹⁶ Ii Apuji shiig agkan anentaimsa pujutan sukagtina duke, atumnash ashí tsawantai shiig agkan anentaimsa pujutnum yaimpaktinme ashí tikich aina nuwishkam. Apajuiya duke ashí atum ainajum nuwish atí.

¹⁷ Atumi kumpamkun agatjim nunak, wi mina uwejuí achikan agatjime, ashí wi papiin agajan awemaknuk tuke jutiksanké ajai.

¹⁸ Ii Apuji Jisukristu ashí atumnash wait anenjamjatnume.

Aatus atí.

PABLO NAGKAMCHAKU PAPI AGAJA TIMOTEO AWETIMU

Pablo Timoteo kumpabau

¹ Witjai Pabloitjai, Kristu Jisus chicham etsegtugkata tusa etegkamuitjai, Apu Kristu Jisus pegkejan sujabau jukitasa dakainaku niini kajintsá anentaimainag nunú. Apajuí ii uwentijamna nunú Kristu Jisusjai minak awetiuwai. ² Timoteoh, juna papiin agatjame, wi chicham etsegbau antukam, Apu Kristu Jisusai kajintsá anentaimat jukiú asam, amek dekas mina uchijua imanaitme. Wakegajai Apajuí iina Apajiya nu, Jisukristu iina Apujiya nujai, wait anenjamag aminash shiig agkan anentaimsa pujutnash amastí tusan.

Waitá jintinkagtin aina nujai kuitamamkatajum tibau

³ Wi Macedonia nugkanum wegakun, amek Efeso juwakam, makichik aentskesh waitan jintinkagtuawainum diiyaku atá tibaijam dutiksanuk yamaish tajame. Anuí aents waitá jintinkagtuina duka: Jintinkagtuawaipajum, tita. ⁴ Dutikakum ujaktá, wainka augmattsamu aidaun, nuigtú ditá muunji aajakú ejechamnun augmatú yujainak tsawantan megkagá batsata nuna idaisatnume tusam. Nuna dekaataus wakejuidauk wainak jiyanitú yujau ainawai, tujash duka makichkish Apajuiyai kajintsá anentaimtanmag yaijattsui.

⁵ Wi juna taja nunak, Kristu nemajin aidauk pempentunisag aneenitnume tusan tajime. Nuna aatus aneeninak iwainainawai dekaskenum Kristui kajinas anentaimainamun, dekaskes Kristui kajinas anentaimainatai tumain wajatsuk. ⁶ Tujash wajumak aents nuna idayinak, kanakag wainak chichaa yujainawai. ⁷ Apajuí chicham umiktá tibauwa nuna jintiin atatus wakegainawai, ditakesh dita chichainamuji, tuja dita jintinkagtuinamujinakesh shiig dekainachiatak.

⁸ Chicham umiktinun Apajuí tibaun Moisés agajua nunú, imatiksaik umiamuk pegkeja duka dekainaji. ⁹ Chicham umiktina duka aents pegkejan takau aina nunú umiktinme tichamui. Ju chichama juka aents intimkiu aidau, chichaman umichu, tudau takau, Apajuinash ajantus diichu, chichamenash dakitin, pegkegchaunak takau, patayinak pempeentuki main, apajinash dukujinash main aidau, ashí aents magkagtin, ¹⁰ tsanijimtan wekaetin, mai aishmagkuk pempeentuniki dutikdayin, aentsun kasamak sujin, waitjin, tikichin tsanuak Apajuí daajin adayin, nuigtushkam chicham pegkeg Apajuí pachisa jintiamua dutiksag takatan dakitin aina nudauwai. ¹¹ Pegkeg chicham jintinkagtamua duka, Kristu pachisa jintinkagtamua nuuwai. Apajuí shiig eme anentsá emematam pujuwa nunú, minak: Uwemat awai tusam etsekkata tusa awetiuwai.

Pablo Jisukristu see tibau

¹² Iina Apuji Kristu Jisusan see tajai, mina betek umimainun waitu asa, takagtusti tusa niina senchijin sujusua duwi. ¹³ Duwikik wika Jisusan pegkegchaun chichagkun, niina nemajuidaunash aikasnuk pegkegchaun chichagkun waitkau ayajai. Tujash nunak Jisusak

Apajuí Uchijimpapita tusan dekachu asan, dekaskeapi tumainchau dekaapekun nuniyajai, nuni pujai Apajuí minak wait anenjujui. ¹⁴ Dutijuau asa shiig kuashat wait anenjug tsagkugtug, Kristu Jisusai kajintásá anentaimtan sujusuí, nuniak pempeentuniki anenitnash, Apajuí aneetnashkam sujusuí.

¹⁵ Juka shiig dekaske, ashí dekaskeapi tumain ainawai: Kristu Jisus ju nugka juwí tauwa nunak, aents tudau aidaun uwemtijatatus tauwai. Nu tudau aina nuwiyag dekas imá senchi tudaunuk witjai, tikich aidaun nagkaesaunuk. ¹⁶ Tuja wi iman aigkish, Jisukristu wait anenjug tsagkugtujui, ni waamak kajeachbaun tikichin iwaintukta tau asa. Juna wainak tikich aidaush: Jisukristu minash wait anenjawapita, tusag niini kajinas anentaimainak pujut nagkanchaun jukitnume tusa. ¹⁷ Nuaduí Apu tuke pujuwa nu, ajumaish jakashtin, waintash wainmainchauwa nunú, Apajuí makichkiuch ashí dekauwa duke eme anentsá tuke ememattai atí. Aatus atí.

Pablo Timoteo chichagbau

¹⁸ Uchuchi Timoteoh, jujú umiktá tajame: Apajuí etsegtin aidaun amina pachipas, Apajuí chichamen etsejin atinai tujabiuwa nunismek, shiig anentaimsam pujusam imá Kristuig kajintsam anentaimkum senchi takastá, waitan jintinkagtuina nunú depetkata tabaunum. ¹⁹ Ame Jisukristui kajintsam anentaimam duka dutiksam shiig anentaimsam pujustá, tikich aidaun pegkegchaun takainak Kristu kajintásá anentaibaujin megkaekaja nunikaim. ²⁰ Nunak Himeneo, Alejandrojai nunikaje. Nunikmatai iwanchin idaitusmajai, ni waittan susati, dutikam Apajuí pegkegchau chichagchau atinme tusan.

2

Apajuí aujut pachisa tibau

¹ Dekatkauk jujú dutikatajum tajime: Apajuí aujukgumek, ashí tikich pachisjumesh segattajum ni wait anentug yaigtí tusajum, nuniakjum see titajum ashí ni yaibau pachisjumesh. ² Ashí apu aidaun pachisjumesh Apajuí aujtustajum, shiig agkan pujuinaku, tutitag atsamunum Apajuí wakegamuk umigku batsamsami tusajum. ³ Ju aaja augbau Apajuí iina uwemtikagtina nunak shiig awagmawai. ⁴ Nigka ashí aents uwemjatnume, nunikag dekaatnume dekaskea nuna, tusa wakegawai. ⁵ Apajuik makichki, nunisag aents aidautin Apajuikai epegtugmaushkam makichki: Duka Kristu Jisusai. ⁶ Nigka ashí aentsun uwemtijata tau asa mantamdauwai. Tsawan ni tibauji umintai Apajuí iwaintugmakui ashí aentsun uwemtijatatus wakejukua nuna. ⁷ Nuaduí wika chicham etsegkata tusa etegka awemamuitjai, nuigtushkam Jisukristun kajinas anentaimtustinme judiuchu aidaush jintintuata tibauwaitjai. Wi juna taja juka dekaske, waitjatsjai.

Aishmag aidaun tuja nuwa aidaun nunimainji

⁸ Nuaduí ashí yantamnum Apajuí ausami tusag ijunjamunum, aishmag aidaun Apajuin aujuinakug, tikichjaish shiig anendaisag kajetsuk batsamas, Kristu shiig nemajuinak batsamsatnume tusan wakegajai. ⁹ Tuja aantsag nuwa Kristu nemajin aidaushkam Apajuí ememattasa ijunbaunmag, nuwa shiig anentaimkau iwagmamaina nunisag iwagmamjatnume tusan wakegajai. Nunisag intashinash

shiiig iwajug tikich aents aidau anentaimtuja diimain wajas yujatsuk, patakumtai oronash, peetai akik aidaun peeká, jaanch pegkeg akik aina imanun puyatjus iwagmamjatatus wakegá yujainmegka tusan. ¹⁰ Ayatak pegkejan takainak aents aidaush pegkegnum chichajam atinme, nuwa Apajuí wakegamun umin wajak pujumainaita nunisag pujuinak. ¹¹ Nuwak tuwakbaunum aishmag jintinkagtutaik takamtak pujus shiiig antumain ainawai, ¹² nuwa aidaunak ijunjamunum wajakí jintinkagtuati tatsujai, nuwak aishmagkun wagagkig dutikata tumait-sui, takamtak jintiamunak antumainai. ¹³ Apajuik dekatkauk Adagkan najana, duwi Evan najanauwai. ¹⁴ Adagkak iwanch tsanuamak asachui, Eva tsanuam asauwai, dutikamu asa Evak tudaun takasuí. ¹⁵ Tujash nuwa aidaush uwemjatnai, Jisukristu nuwanum akiinau asamtai. Tuja dita: Jisukristuapi uwemtijumainuk, tusag niina aneenak, tudaujin idayas pujuinakug uwemjagtinai.

3

Jisusa nemajuidaun diin aidaush wajuku amainaita

¹ Jisusa nemajuidaun diin atatus wakejuina duka, dekas pegkeg takata nuna wakegainak tuinawai. ² Tujash aents nunú takatan wake-jauk pegkegchauji diigsaishtai amainai: Makichik nuwentin imá nuwejaig pujustatus wakeyin, emetug shiiig esegag anentaimkau, eme anentsá diitai, jeen minitash shiiig aneas jukagtin, Apajuí chichame jintinkagtutnash dekau, ³ nampechu, maanitnash wakeechau, kuichk-inash imá nigki kuashat ajuttí tusa wakeechau, wait anenkagtin, kakagchau. ⁴ Nuigtushkam niina jeenish shiiig chichas pujú amainai. Uchijí aidaush apajinash umijin, eme anenkagtu diijatin amainai. ⁵ Tuja ni jeenigkish shiiig chichas pujachush, ¿itugsaya Jisusa nemajin aidaunash kuitamainaita? ⁶ Tujash Jisusa nemajuina nuna diinuk yamá sujumankauk amaitsui, ememak iwanch wajukauwa numamtuk wajak suwimkan jumain asamtai. ⁷ Nuigtushkam Apajuí nemagchau aidaush eme anentsá diitai amainai, pegkegchau chichajinum tau asa. Nunishtaik iwanch pegkegchau takamtiksamtai, Apajuí chichameshkam eme anentsá diiyam amainchau asamtai.

Jisusa nemajuidau atsumamujin diin aidau

⁸ Nunisag Jisusa nemajuidau atsumamujin diin aidaushkam ajantusa diimain amainai, ni chichakbaujinash imatiksag umin, nampechu, takat pegkegchau aina nujai kuichkijinatatus wakegá wekaechau. ⁹ Nuigtushkam chichaman Apajuí iwaintugmakua nunash utujimtsuk dekaskeapi tinu amainai, nuniak dita dekaina nunisag pujumain ainawai. ¹⁰ Jisusa nemajuidau atsumamujin diin agtina duka, eke adaitsuk wajak pujawa nu diigmain ainagme, dutikam utugchatkesh atsugkui duwi adaimain ainagme. ¹¹ Nuna nuweshkam aantsag ajantusa diitai amainai, chichama wekaetuchu, emetug shiiig anentaimkau, ashí betek umin. ¹² Nunisag Jisusa nemajuidau atsumamujin diin aidaushkam makichik nuwentin, niina uchijinash shiiig jintintin amainai. ¹³ Jisusa nemajuidau atsumamujin diin aidau takatan shiiig takainakug pegkegnum augmatam amain ainawai, dutikam niishkam kajinmamas, Kristu Jisusai kajintsá anentaimta nunashkam etsegmainai.

Apajuí wait anenjamjamu pachisa tibau

¹⁴ Amina wainkatasan minita tayatkun juna papiin agajan awetajame, ¹⁵ wi yajá aneasan megkaekuish Jisusa nemajin aidau ijunjamun-mash, wajak pujumainaita nunú dekaata tusan. Jutii Jisus nemajin aidautik, niina uchijí waigkú asaja, Apajuí tuke pujuwa nuna aentsji ainaji. Nunin asaja jutii ainaji dekaskea nunú etsejin aidautik. ¹⁶ Dekas Apajuí iwaintugmakmawa nunuwai dekas ashí wagaakuk: Kristu aentsmaga wantinkauwai, Wakaní Pegkejishkam pegkegchaujish atsujui tiuwai, nayaimpinmaya aents aidaush wainkamu aajakuí, ashí nugkanum chichamesh etsegnakmatai, dita dekaskeapi tuidauk dekaskeapi tiaju ainawai, nunikmatai ataktú nayaimpinum jukimu aajakuí.

4

Jisukristu nemagkaju waitan antujuinak tupaajagtinaí tibau

¹ Wakaní Pegkeji shiig paan antumainun tawai: Tsawan nagkankatak wajataik, kuashat aents Kristu Jisusai kajinas anentaimtanak idayinak, wakan pegkegchau dekamtikam waitan jintinkagtuina nunú etsegbaun antujuinak. ² Aents wainak tsanumaidaun antugkagtin ainawai, tujash duka datsantainkachu asag pegkegchau takainakush, pegkegchaunap takaja tusag dekapmamchagtinai. ³ Nuninak: Nuwenmait sui, yutai yuwakuish ashí tinamjaik yutai aina duka yumait sui, tiagtinaí. Tujash jutii Jisus dekaskeapi tuidau asaja dekaskea dusha dekau aidautik, Apajuí ashí najankamua duka see tusa yumainaitji. ⁴ Ashí Apajuí ni najankamujinak pegkejai tiu asamtai, ashí yutaig dakittsuk see tusa yumainai. ⁵ Duwi Apajuí see tusa ashí ii yuwamuk iinishkam pegkejai, ni pegkejai tiu asamtai.

Shiig takaaku Jisukristu takajin pegkeg amain

⁶ Jujú aajam yatsut Jisusa nemajuidau jintinkumek, Kristu Jisusan dekas shiig takajin atatme. Nuniakum Apajuí chichamega nu, nuigtú Jisukristui kajintsá anentaibau jintiam dushakam aan kuashat unuimagtatme.

⁷ Tuja wainak ju nugkanmaya imanchau augmattsamun augmatuina duka antujú wekayipa, amek Apajuí wakegamua duke puyatjusam umigkatasam kakanmamsata. ⁸ Iyash jamamtuchu atí tusa takamtikamua duka iyashnumag yaijatui, untsu Apajuí wakegamu puyatjusa umiktasa kakanmabauwa nu imá pegkejai, ju nugka juwi pujamun-mash, atak nayaimpinum pujustinaitag duwish yaijatu asa. ⁹ Juka shiig dekaske. Nuniau asamtai ashí aentsuk dekaskeapi tumain ainawai. ¹⁰ Nuaduí waitiakuish senchi takaaji, Apajuí iwaaku pujuwa nunú dakau asaja. Niiyai ashí aents aidautin uwentikagtumainuk, tujash imá Apajuyiaig kajinas anentaimaina nunak.

¹¹ Juna taja ju, umiktajum tusam shiig jintinkagtuata. ¹² Ame datsauch asamin imanchau chichagtainum, dekas Jisusa nemajuina nuanuish iwainmamkata pegkeja duke chichaakum, shiig pujakum, anejatkum, Jisukristui kajintsá anentaimu asam pegkegchaush takatsuk pujakum. ¹³ Wi amina ijagsatasan eke anuí minatsaig, ijunjamunum Apajuí chichame aukum, yatsug aidau, ubag aidau jintinkum

anentai ichichtugta. ¹⁴ Jisusa nemajuidaun diin aidau, Wakaní Pegkeji dekamtikam, ame yupichu dutikatnun Apajuí anenjauch amasbaun etsegkamtai, ashí wainbaunum buukmin achigmakag Apajuin aujtug-mainak, juuwai ame takatjumik tujabijua nunú idaisaipa.

¹⁵ Ju aina juka shiig kuitamsam takastá, nuniamin ashí aents aidaush ame ju takatnum shiig eebaun waipakagtatui. ¹⁶ Kuitamamkam pujakum tikichish jintintuata, Jisus dekaskeapi tiuwaitam nunismek pujusam. Aajam takaakum ame suwimak jumainaitam duka uwem-jattame, tuja tikich ame jintinbaushkam uwemjagtatui.

5

Jisusa nemajuidaujaish itugdaimainaita nu pachisa tibau

¹ Muun aidau pegkegchau takainakuish jiyakaipa, ayatak amina apa anentsam chichagkata. Datsauch aidaushkam amina yatsum anentsam chichagkata. ² Nuwa muunchakam duku anentsam chichagkata, tuja nuwa muntsujut aidaush ame umaim anentsam pegkegchau anentaimtutsuk shiig awajkata.

Nuwa waje yaigtin pachisa tibau

³ Nuwa waje aidau yaimainji atsujuina nu yaigtá. ⁴ Tujash nuwa waje uchijí ajuinamuk, nuniachkush tijajigkesh ajuinamuk, nunú uchi ditanak ashí atsumamujinash yaimainai, uchuch asamtai ditan kuitamkamun asa. Nunuwai Apajuí emtinish pegkeja duka, nigka nuna dutikatnume tusa wakegawai. ⁵ Tujash nuwa waje yaimainjish shiig atsugbau, imá Apajuinak dakak pujus tsawai kashishkam Apajuinak aujak puja nu yaigtajum. ⁶ Tujash waje ni iyashí pegkegchau wakegamun taká pujauk, tuke jakauwa nuninai iwaaku pujakush, nunin aidauk yaimaitsui. ⁷ Wi tajar nuna ditash betek dutikatnume tusa ujaktá, pegkegchauji diigsakish tumainchau atinme. ⁸ Aents Jisusa nemajin niina patayí yaitan uyumatsuk, niina jeenianakesh uyumatsu duka, Kristui kajinas anentaimchau wajukmaina nuniawai. Nuniakug aents makichkish Jisusan anentaimtuchu aina nuna nagkas pegkegchau wegawai.

⁹ Tuja nuwa wajemeaun Jisusa nemajin aidau yaigmí tusa papiinum agatuinakug, sesenta mijan ajamua nui nagkamas agatmain ainawai, makichkia aishintin aajakajua nuna, ¹⁰ nuigtushkam ni pegkeg takaa-mujish waitujakbau, uchijinash pegkeja jintintua tsakapaku, ijagnash shiig aneas ni jeenish ju wajakú, Kristu nemajin aidaunash nigki anenmamtsuk kuitamajakun.

¹¹ Tuja nu yaigtin agatbauwa nuwig nuwa uchi wajemeauk agat-jaigpa, dita wakegamun takainak Kristun tupantug aishinatatus wakegainawai, ¹² nuninak dita wajemeawag, wika aishintsuk pujusan Kristu nemajuidaun yaigtajai tumabaujin umiachu asa, ditak suwimak jumainnum jegantainum. ¹³ Nuigtushkam ditak dakí unuimajag ijagka yujajainawai. Tikich chichamunum ditash chichaman patakai wajainak, chicham chichamainchau aidaun chichá yujainawai asamtai. ¹⁴ Duwi nuwa uchi wajemeau aidaunak, aishinawag uchijinatnume tajai. Nunik shiig pujusag uchijin kuitabiagtai, Jisusan dekaskeapi

tuinachu kajekagtuina nunú pegkegchaunum chichagtamkachagt-inne tau asan. ¹⁵ Tikich waje aidauk Kristui kajintsá anentaimtanak idaisaje, nunikag iwanchin umiujinawai.

¹⁶ Nuwa Jisusa nemagna nuna patayí wajemeau pujutaik ni yaimainai, nunitai Jisusa nemagkau aina duka, nuwa wajemeau aidau yaimainji shiig atsugbau aina nuna yaimainai.

Jisusa nemajuidaun diin aidau pachisa tibau

¹⁷ Jisukristu nemajuidaun diin aidauk eme anentsá diyaku, nuigtush yaigbau amainai, tujash Apajuí chichamen etsejuinak jintinkagtuina nunú aidau, ¹⁸ wagki agagbaunum chichaak: “Toro trigon dajag akaak wekaetauk, trigon yuwawai tusagmek nujig jigkatuawaipa, nigka taká duwi yuwawai.” Nuigtushkam: “Aents taká duka akiam auwai”, tau asamtai.

¹⁹ Tuja Jisukristu nemagnu diinun pachis jimag, nuniachkush kam-patum aentskesh, pegkegchau takaawai tuinachkuig antugkaigpa.

²⁰ Tuja pegkegchauwa nunak takaa weenakuig, Jisukristun nemajin ijunjamunum awayajum pegkegchauji iwainakjum etsegtuktajum, tikich aidash nuna wainak pegkegchau takatan ajantuktinme.

²¹ Junash tajame: Uchuchih, aents ajantusa diyamu aina nunú pegkegchau takaakui pachitsuk idaikum, aents imanchau diyamua nuna pegkegchauji etsegtin aipa, ashí betek iwaintukta. Apajuí, iina Apuji Jisukristu, ditá aentsji nayaimpinum batsamna nunuiya etegjamu aidash, ashí wainu asamtai betek umiktá.

²² Apajuí takatjin takastin adaikumek, waugtukumek uwegmin achikam Apajuí aultusaipa, nu aents tudaun takaakui ameshkam bakumaim. Tupanjata ashí pegkegchau aidauk.

²³ Aents tudau takaidau dekajuami tumainchaush awai, pegkegchau takaamujig paan waindau asamtai, tuja nuniai tikich uumak taká pujú imapam wantinkui dekagmaush awai.*

²⁴ Nunisag aents pegkeg takaamuji paan wainmainush awai, nuniai pegkeg takaamuji paan wainmainchaush awai. Tujash duka tsawan jegatai paan wantinkatnai. ²⁵ Amek wakemin beseakum waa waamak jaim nunin asam, yumik umutsuk machik vino uwagta.

6

¹ Jisukristu nemajin inak aidautigmesh, atumi apujum eme anentsá diyaakjum ashí ni tabaujig umigkatajum, aents aidau Apajuin pachis, nuigtú ni chichame jintiamua nunash pegkegchau chichajinum. ² Tuja inak Jisukristu nemaja nunú, niina apujishkam Jisukristu nemaju asa, Kristui kajintsá anentaibaunmag ni yachi asamtai imanchau diisaigka. Dutiktsuk nuní nagkaemas shiig takagsatnume, dekas yatsut Jisusan dekaskeapi tuina nunú imatika aneasa takajam amain asamtai.

Waitá jintinkagtin aidau

Jisukristun nemajin aidau, nuigtú diin aidashkam wi tajam juna umimain ainawai. ³ Tujash tikich aents dekaskea juna jintinkagtutan dakituidaush ainawai. Jutii iina Apuji Jisukristu pachisa dekas pegkeg jintinkagtag nunashkam dakituinawai. ⁴ Nunú aents nunin aidauk

* **5:23** Jujú versículo chichamega juka versículo 25num inagkeaji, apach chichamnum diyamak makichik wajin augmatiatatak tsujig emau asamtai inagmanunum ukuaji.

dekachiatak wainak ememainak tu yujainawai. Duka dita anentaimsa chichamujin pachisag jiyanitkatatus wakeyin ainawai. Nu jiyanitbaunmag kajegdayamu, shiwagmagamu, pegkegchau chichagdayamu, kajintsá anentaimtuniashbau, ⁵ nuigtushkam inagnamainchaun jiyanitú yujainawai, aents pegkegchaunak anentaimtin dekaskea nuna dekachu asag, Apajuí pachisa chichamunum wiyakchameautia nuni-nun anentaimainawai. Nunú nunin aidauk tupanjata. ⁶ Dekaskenmag Apajuí umigbauwa nuuwai, aents wiyakuch ashí wajiiji ajamu asa, shiig aneas pujuwa imanisa pujumaina duka. Tujash ni ajamua nujai shiig aneas pujá nunú nunimainai. ⁷ Iik akiinkuish wajiigtin aki-inachuitji. Nunisaik jaakuish wajiik jukiik wechatnaitji. ⁸ Duwi jutiik, yumain, nugkumain ajutjamkuig nujai shiig aneasa pujumainaitji. ⁹ Untsu wiyakuch wetatus wakejuidauk waamak tudau weenawai, waji imanchau pegkegchau ekagta nuna imá senchi wakejuidau asag. Nuniau asa, duka waittanum, megkaeta nuwi weenawai. ¹⁰ Kuichik itugsag kuashat ajutia tusa imá senchi wakejuta nuuwai dekas pegkegchau takatnum ekagta duka; nuniau asamtai kuichkin imá senchi wakejuidauk, nuna takainak Jisukristui kajintsá anentaimtanak idaisaje. Nunikag kuashat utugchatnum yujainak senchi waituinawai.

Kristui kajintsá anentaimam nujai senchi wajastá tibau

¹¹ Timoteoh amek, Apajuí takajin asam júj pegkegchau aidaun taja juka ashí tupanjata. Nuniakum pegkeja duke takastá, ame Kristui kajintsam anentaimam dusha mijattsuk ashí tikich aidaush aneeta. Utugchatnum jegakmesh katsunjam pujakum emematsuk pujustá. ¹² Amek Jisukristui kajintsá anentaimam nujai utugchat aidaush depetkata, nuniakum pujut nagkanchau jukita; Apajuí nuna jukiti tusa etegtamjau asamtai. Tuja, ame Jisukristuap uwemtijumainaita tabauk aents ijunjamunum iwainakam etsegtumakuitme. ¹³ Ashí wainainag nuna Apajuí pujutan suuwa nunú waipau asamtai, nuigtú Jisukristu ni inamtaijin pachis Poncio Pilatun ujakua dusha waipa duwi, ¹⁴ wi tajam ju betek umiktá. Pegkegchau takatsuk pujustá, tikich aidaush pegkegchau takaawai tujaminum, nuniakum ii Apuji Jisukristu minitta dusha dakasta. ¹⁵ Apajuí ni tsawan dakamuji uminkamtai ataktú Jisukristun ju nugka juwi awematnai. Tuja imá nigki Apuk, ashí apu aina nuna Apujishkam, imá nigki eme anentsá ememattaiya duka. ¹⁶ Imá nigkiuchi ajumaish jakashtina duka, nigka tsauptin makichkish adijmainchaunum pjuwai. Makichik aentskesh wainkauk atsawai, waintakesh wainmainchau asamtai. Niina senchijish, ni inabaujish tuke atina nunú tuke ememattai atí. Aatus atí.

¹⁷ Wiyakuch aidaush ememachu atajum tita, ditá wajiijinig kajinmas anentaimá pujuinum, ju nugka juwi wiyakchameamuk ashí megkaejatnai. Dekas Apajuiyai kajinas anentaimain ainawai, niyai ashí ii atsumamunash shiig aneas pujustinme tusa sukagtina duka. ¹⁸ Nuigtushkam wiyakuch asag kuashat waji ajuina nujai, kuashat aents atsumaidaun yayaak Apajuiyai wiyakchamemain ainawai. ¹⁹ Juna aatus takaidaunak Apajuishkam dita atak jukiagtinun nayaimpinum ukujui, nuigtú pujut nagkanchaunashkam jukiagtinai.

Pablo inagnaku akatmamjamu

²⁰ Timoteoh, Apajuí chichamen etsegkata timajam duka dutiksamek aents aidau ujaktá. Tikich chicham dekaskechun jintinkagtuidaujai jiyanitkaipa. Ditak dekaji tuinawai, tujash dekaskea nunak dekainatsui. ²¹ Nunú wait aina nuna etsejuinak, wajumak aents aidau Kristui kajintsá anentaimtan idaisaje.

Apu Jisukristu atumnash wait anenjamjatnume.

PABLO AWENTSAIK PAPI AGAJA TIMOTEO AWETIMU

Pablo Timoteo kumpabau

¹ Witjai Pabloitjai, Kristu Jisus chicham etsegtugkata tusa awe-mamuitjai, Apajuí wakejutu asa, Jisukristu nemajuidauk pujutan jukitnai tusa anagkagtuauwa nuna etsegkati tusa awetiuwai. ² Uchijuh Timoteoh mina aneetaiju, juna papiin agajan awetajame, Apajuí iina Apajiya nu, Kristu Jisus ii Apujiya nujai, wait anenjamag shiig agkan anentaimsa pujutan amastinme.

Pablo Apajuí aujku see tabau

³ Apajuin kashi tsawai aujkunuk tuke see tusanké ajai amina pachisan, mina muuntug aidau emematujakua nunak, wishakam mina anentaijuish shiig dekau asan niinak umigkun pujajai. ⁴ Timoteoh, ii kanaamunum ame buutium nuna tuke anentaimtajai, nuniakun amina wainkan shiig aneastasan wakegajai. ⁵ Ame dekaskenum Jisukristu kajintsam anentaimtjuitam nunashkam aneakjai. Dekatkauk amina dukuchjum Loida, duku Eunicejai Apajuiyai kajinas anentaimajakajua duke aminashkam ajutjamui.

Datsamait sui Jisukristu pachisa chichatnumag

⁶ Nuaduí anemtikjame: Wi amina buukmin achikan Apajuí segai, Apajuí ame yupichu dutikmainun amasbau ajutjama nunú shiig takamtiksata tusan. ⁷ Wagki, Apajuik wakan sapija sukagtina nunak sujamsachui, nigka Wakaní Pegkeji senchimetan, aneenitan, pegkeg aina duke anentaimtutnum yayijatna nuna sujamsauwai. ⁸ Nunin asamtai, iina Apuji Jisukristu pachisa etsegtanmag datsamipa, tuja mina pachittsameshkam datsanjujaipa. Wika Kristu chichamen etseju asan achinkan pujajai, nuaduí ameshkam waittsata pegkeg chicham etseju asam, ame waittaish Apajuí senchintijamattame. ⁹ Apajuí uwemti-jamjauwai dutijama mina aentsug agtinme tusa etegtamjauwai, niina aentsji aidaush wajuk pujumaina ainawa nunisag pujustinme tusa. Nunak ii takasbaunum dutijamachui, ayatak nigka anejatna ibau asa, yaunchuk nagkamas Kristu Jisusan awematjai, dutikam ditan uwemtikjatin atí tiu asa dutikauwai. ¹⁰ Apajuik ni anejatbaunak yamai iwaintugmakui, ii Uwemtijamin Kristu Jisusan awetugmak. Kristu jatanak depetkauwai, dutika yamajam chichama nui dekamtijamji pujut tuke atina nunashkam.

¹¹ Apajuí minak, ame chicham etsegkata ashí aents tikich nugkanum batsata nuwish tusa etegtua awetiuwai. ¹² Duwi wika ashí ju aidaunak waitiajai, nuniaknushkam datsamatsjai. Wagki, wi yaayai kajinmasa anentaimja nuna dekau asan, Kristuap senchigtina ibau asa eke ni minitnuji tsawan jegatsaig, ashí aents aidaun niina chichame pegkeja nuna ujaktí tusa kuitamjuktatua tau asan.

¹³ Timoteoh, chicham dekaskea nuna wi amina jintintuabiam nunú aents aidau jintintuata tajame. Kristu Jisusjai ijutkau asam, niini kajintsá anentaibau, nuigtú anentak ajutjama nujai tikich aidaujaish

aneenita. ¹⁴ Wakaní Pegkeji iini puja nunú yaimpasmatai, dutikata tiuwaitjam duka betek umiktá.

¹⁵ Juka amek dekame, ashí Asianmaya aidauk minak tupanjukaje; nuwiyag Figelo, Hermógenes ainawai. ¹⁶ Tujash Onesíforo patayí aidauk Apu Jisus wait anenjati, nigka wi achinkan egketaishkam datsamtsuk kuashtá ichichtugmayi. ¹⁷ Nuna nuniktatus Roma taa, ayamtsuk shiig senchi egá egatkawa waitkabi. ¹⁸ Apu Jisus waketsag taatta duwish, Apajuí niinash wait anenjati. Amek shiig dekame, ii Efeso pujajin wajupa yaimpakchabi duka.

2

Waitiakmesh katsunjata

¹ Uchijuh Timoteoh, Apajuí takatji wakejusam takagsata, amek Kristu Jisusjai ijutkau pujau asamin, Apajuí wait anenjamag yaimpau asantai. ² Kuashat aents antuinamunum wi jintintuauwaitjam nunú, aents kajittsá diitai, nuigtú shiig jintinkagtumaina nunú jintintuata, ditash tikich aidaun jintintuatnume.

³ Suntag pegkeg apujin umiju asa waitmaina numamtuk, ameshkam Kristu Jisus umigkum senchi waitiakmesh katsunjata. ⁴ Suntagmagak pujuina duka, suntagchau wajukena nunimaitsui, suntag aidauk dita wakegamunak takamain ainatsui, apuji shiig awajkata tabaunum. ⁵ Nunisag wasugkamin aidaushkam, dutik wasugkamata tibauwa dutiksag wasugkamchakug waji pegkegnak jumaitsui. ⁶ Ajanum senchi takaushkam, ajak uminkamtaig niyá ju ainawai, ni ajakbau asa. Nunismek ameshkam emamkesam senchi takastá, Apajuí akigmamu jukimnum. ⁷ Wi taja jujú shiig anentaimtusta, iina Apuji Jisukristua nu ashí junak dekamtijamattawai.

⁸ Adeagta, Jisukristu Apu David wegantu aajakua nu, jaka ataktú nantakiuwa nuna pachisan yamajam chichaman etsegnuweg nunú. ⁹ Nunú yamajam chicham etsegbauunum achigkagmatai pujusan senchi waitiaknush atsaneajai, magkagtin utugmaina dutijuawag jijuí jigkat-jagmatai pujusan. Tujash mína dutijuinakuish Apajuí chichamen tuke etsejag nunak kuashat aents aidauk antuinawai. ¹⁰ Nuaduí ashí katsuntajai Apajuí etejamu aidaush, pujut nagkanchau uwemat Kristu Jisusai awa nuna jukitnume tusan.

¹¹ Juka dekaske:

“Ii ni wakegamu takaaku pujauti jaakuik niijaig pujutnaitji.

¹² Juwi ni umigku pujusá waittsaish, niijai inamjatnaitji.

Ii ni dakitjautinak, niishkam dakitjamjatnai.

¹³ Tujash jutii ni tabaush betek umichu ainajinish,

nigka betek uminai,

ni tibaujinak umitskek idaichauwai.”

Timoteoh shiig pujusam tikichish jintintuata tibau

¹⁴ Tikich aidaush anemtikata Apajuí tabaujiya jujú, jiyani yujata nunak idaisatnume, duka makichkish yaijattsui, ayatak tikich nuna antuidauk chicham yamajam etsegbau antutnak dakitmitkau asantai. ¹⁵ Shiig kuitamsam takastam kakanmamsata, Apajuí emtinish pegkejan takau wantinkamnum, takatan shiig takasú datsamtsuk

iwainmama numamtuk, Apajuí chichame dekaskea nu shiig jintink-
agtakum. ¹⁶ Idaisata ju nugka juwiya imanchau chichatai aidauk,
nununin chichaidauk nuní nagkaemas pegkegchaunum weedau asam-
tai. ¹⁷ Tuja dita jintinkagtamushkam kuchap ayatak wegkag wegama
numamtuk awajainawai, nunak Himeneo, Filetojai dutikainawai.
¹⁸ Ditak chicham dekaskea nuna idaisag chichainak, jakau nantagtina
duka nagkaemakne tuinamun antukag, wajumak Jisukristu nemagkaju
aidau, tukita dekaskesh tusag dekamainchau dekapenawai. ¹⁹ Tujash
Apajuí tuke atinun tiuwa duka juwi agagbauwai: “Apu Apajuik yaita
niinu aidaush nunak shiig wainui”, nunin asamtai: “Ashí aents aidau
Jisukristu nemagjai tuidauk pegkegchau aidaunak idaimain ainawai.”

²⁰ Jega muunnumag aiyame kuashat takatai: Oro najanamuke,
jiju plata tutaiyai najanamuke, numi najanamuke, duwe najanamuke
aidaushkam. Tujash nunú pegkeg aina duka ijag aidau ajamtai
ainawai. Nuniai tikich aina duka yutai inagku takatai ainawai.
²¹ Jumamtuk aents Jisukristu atsumtai ata takug, pegkegchau takatsuk
shiig kuitamamak pujumainai. Takatai aidau pegkeg aina ibau
amainai, nunitai Jisukristushkam oro najanamun apu dekas pegkeg-
num takauwa numamtuk, niinashkam takat pegkegnum apusatnai.

²² Datsa asam iyashim pegkegchau wakegamu takastasam anentaim-
tujukitam duka idaisata. Nuniakum pegkeg aina nunú, kajintsá anen-
taimta dushakam, aneenit, nuigtú shiig agkan pujamua duke egaktá,
tikich Jisukristu emematin aidau pegkegchau takatan idaisau aina
nujai ijunja pujakum. ²³ Chicham imanchau amina yaimpamainchau
aina duka pampantú pujuipa. Amek shiig dekame, nunú tudaibauk
jiyanitnum ejekagtina duka. ²⁴ Apu Jisusa inake aidauk jiyanita
yujagmait sui. Dekas ashí tikich aidaujaish pegkegnum iwainma-
mainak, shiig jintinkagtuinak, waamak kajeche amainai. ²⁵ Chicham
pegkeja nuna antutan dakituidaush kakagchauch anentaiyai jintin-
mainaitji, Apajuí anentai yapagtuam dekaskea nuna dekaatnume tau
asá. ²⁶ Nuninak ditashkam iwanch ni wakegamu takamtikku achiká
emetkam batsata nunash dekawag iwanchnak ukuktinme tusa.

3

Tsawan nagkanbaunum atin etsegkamu

¹ Timoteo jushakam dekamainaitme: Tsawan nagkankattak wajataik
kuashat utugchat atinai. ² Aents aidauk imá niinunak anentaimtin,
kuichkinak anentaimtin, emebau, imá nigki eme anentaimtubau,
Apajuinash pegkegchaun chichajin, uchi aidaush apají chichame-
nash antugchau, see tukagtuchu, Apajuinash anentaimtuchu agtinai.
³ Anejattsash diijatchau, wait anenkagtuchu, chichaman tsanumin,
pegkegchau wakegamujinak wekaetin, yajau, ashí pegkeg aidaun shi-
wagbau; ⁴ ni patayinak unupiag sujin, pegkegchau takatnum setakchau
wajakin, nigki eme anenmamin, Apajuin egatsuk ditá wakegamun
yujajiagtinaí. ⁵ Apajuí umigna iman iwainmabiagtinaí, tujash dita
takaamujig dekas Apajuí nemagnush wajuku amainaita nujai betekak
achagtinaí.

Aents nunin aidaujaig ijunjaipa. ⁶ Wagki, nunú aents nunin
aidauk jeganum wayawag, nuwa shiig anentaimkachu tudau takau
aidau, niina iyashí wakegamunash kakajus depetmainchau aina nuna

tsanú yujajin ainawai. ⁷ Nunú nuwa aidauk tuke wakegainawai yamagman unuimagtatus, tujash tuke jegainatsui dekaskea nu dekata nuwig. ⁸ Iwishin Janes Jambresjai tsanumainak Moisesan utugchatan aputusu aina nunisag, nunú aents aidaush dekaskea nuna dakituinak, utugchatan apujtuinawai tsanumainak. Ditak imá pegkegchauwa nunak anentaimtuidau asag, Jisukristui kajinas anentaimainachu asagmatai, Apajuí ditanak idaisajui. ⁹ Tujash nunak emachagtinai, wagki ashí aents aidauk dita anentainkachu yujas nuní yujainamunak dekajuamu asag, jimag iwishin dita tsanumsá takaamujin emachajua nujai betek juwakagtinai.

Pablo Timoteon inagnaku ujakbau

¹⁰ Amek shiig dekame mina jintinkagtutajua nu, mina pu-jutjushkam, wi takastasan anentaimtutajua nu, utugchat aidau kat-sunjá nagkaetaijua nunú aidaush, nuigtú Jisukristui kajintsá anen-taibaujush, mina anejattajua dushakam. Nuniau asam amesh nunis-mek pujame. ¹¹ Nuigtushkam amek dekame, mina waitkajuinakui wajupa waittsaija yaakat Antioquía, Iconio, Listra aina nui pujusan; tujash ashí nunú aidau mag Apu Jisus ayamjutkauwai. ¹² Juka shiig dekainaji, ashí aents Kristu Jisusan nemagkag, imá niinak umijuinak pujustatus wakejuidauk, waitkam agtinai. ¹³ Tujash aents pegkegchau, nuigtú tsanumin aina duka, dita pegkegchau takaamujinak nuní nagkaemas pegkegchaun takaagtinai, tsanubiagtinai ditashkam tsan-uam yujasag.

¹⁴ Timoteoh, ashí ame unuimagbauwa duka, dekaskea nu asantai dutiksamek emata. Amek dekame yadawwa unuimajuitme duka. ¹⁵ Amek uchuch asamek Apajuí chichamega duka dekauwaitme, nunuwai amina pegkegnum jintinjamak Kristu Jisusai kajintsá anen-taimin uwemtanum etamainuk. ¹⁶ Apajuí chichamega duka, ashí Apajuí tabau agagbau asa atsumtaiyai, pegkeg aina nu jintinkagtuata takuish, esekagtuata tabaunmash, pegkegchau takatsuk wajuk Apajuí wakegamua nunash takamainaita nunú dekamtikata tabaunmashkam. ¹⁷ Nunin asantai Apajuí aentsji aidauk, Apajuí chichamega nujai unuinagbau asag, ashí pegkeg Apajuí wakegamu aina nunú takatan shiig dekau amain ainawai.

4

¹ Apu Kristu Jisus ju nugka juwi inamjatatus taatna duwi, ashí aents iwaaku aidau, tuja jakau aidauunash dita iwaaku pujusá takasbaujin diijus titinai. Nuaduí Jisukristu emtin tuja Apajuí emtinish juna ta-jame: ² Apajuí chichamega duka mijattsuk etsegkata, ju chichaman an-tutan wakegainakuish, tuja dakituinakuishkam chichagkagtumainuk tuke umintsau atá. Aents pegkegchau takaidaush najam chichagkam esegata, dutikakum emamkesam jintinkum wakemitkakta. ³ Wagki tsawan jegatnai, pegkeg jintinkagtamua ju antutan dakitjagtina nu. Nuninak egakagtinai kuashat jintinkagtin aidau, jutii pegkegchau wakegainag nuna jintinjamati tusag. ⁴ Nunidau asag dekaskea nu antutnak pachitsuk idayinak, duikmuun augmatbau aina nuna imá antiagtinai. ⁵ Tujash Timoteoh, amek shiig emetmamsam anen-taimu asam, waitiakmesh katsunjá pujusam yamajam chichama nu etsegkata, nuniakum amina takatjumik shiig umiktá.

⁶ Wi jakatnuk tsawantak ashí jegae; wi jakattag nuuwai Apajuí anen-tag anagkuamu sutayama numamtuk wajaktinuk. ⁷ Wika mina takatjunak, aents dekapdayamunum ni depetmaktatus senchi tupikauwama numamtuk, takat takagtusta tibuauwa nunak imatiksasuk umikjai, nunikan inagnaktinum jeganjai. ⁸ Wi jujú aaja takasbaunum Apu Jisus dekas Apu pegkeja nu, tsawan jegatna duwi minak dekas waji shiig pegkeja nuna sujustatui. Tujash imá minakek sujuschattawai, ashí aents niina aneas dakaina nunashkam susatnai.

Chicham ujaamu

⁹ Waamak taa waitkata. ¹⁰ Minak, Demas Tesalónica wegak ukugkine, ju nugkanmaya wajiin senchi wakegau asa. Crescentek Galacia nugkanum wemae, tuja Tituk Dalmacianum we. ¹¹ Wijaig imá Lucasak pujawai. Minakum Marcos ayaktá, takatnum yainkati tusan atsumajai. ¹² Tiquiconak yaakat Efesonum awemamjai. ¹³ Ame minakum mina jaanchjun Carpo jeen Troasnum ukukmayag nu, nuigtú papí aidaushkam imá senchi mina agataig pergamino aina nu takugtuka.

¹⁴ Alejandro jijú takauwe nu kuashat pegkegchau awajtuke; tujash mina utugtuka dutiksag Apu Jisus suwimkan susatnai. ¹⁵ Ameshkam aujaig kuitamamkata, nigka jutii chichagkagtamunak senchi dakitau asamtai.

¹⁶ Wi ayamjumaktasan yama nagkamchakun apu chichaman epegkin aidaunum wegaish, makichkish yainkachagmayi, ashí ukugki-agmayi. Nunikagmataish Apajuí suwimkan susati tusanuk wakegats-jai. ¹⁷ Tujash Apu Jisus yaintu asa senchintijuamtai chicham uwemtan sukagta nuna pachisan chichagkagtimjai, ashí aents judiuchu aidaush antukagti tusan. Dutikai Apu Jisus ayamjutkame león yuwawai tusa ayamjumaina numamtuk. ¹⁸ Dutiksag nigki ashí pegkegchau aidaun-mash ayamjutuk uwemtijugtataui, dutijua ni inamtaiji nayaimpia nui jujuktataui. Nigki tuke ememattai atin atí. Aatus atí.

Inagnaku kumpamkagtuamu

¹⁹ Prisca,* Áquila, nuigtú Onesíforo ni patayí aidaujai kumpamjutu-ata. ²⁰ Erastok Corinto juwakmae, untsu Trófimo jau asamtai Mileto ukukmajai. ²¹ Yumi tepeatsaig minisam dekapsata. Eubulo, Pudente, Lino, Claudia, nuigtú ashí yatsut aidaushkam kumpamjamainawai.

²² Apu Jisukristu aminash uyuntamsati, Apajuí wait anenkagtamujija nu ashí atuminish ajutjamti.

* **4:19** "Prisca" tawa nunak tayatak tikich papinmag "Priscila" tawai.

PABLO PAPI' AGAJA TITO AWETIMU

Pablo Tito kumpabau

¹ Witjai Pabloitjai, Apajúi inakegaitjai, Jisukristu chicham etseg-tugkata tusa etegka awemamuitjai. Apajúi etegjamu aina nuna ujaktí, ditash imá niinig kajinas anentaimainak dekaskea nu jintinkagtamua nunash dekaatnume, ² nuninak pujut tuke atin jukitnun Apajúi wait-juchua nunú yaunchuk nagkamas anagtamauwa nunash dakastinme, ³ ni dutikatnuji tsawan jegau asamtai, Apajúi iina uwemtijamna nunú yamai, ame etsegkata tusa mina awetiuwai. ⁴ Nuadúi Titoh, amek wijai betek Apajuiyaig kajintsá anentaimu asam tuke mina uchijuitme, aminash iina Apají Apajuiya nunú, Apu Jisukristu uwentikagtina nujai wait anenjamag shiig agkan anentaimsa pujutan amastí.

Jisusa nemajuidaun diin aidaush wajuku amainaita

⁵ Wi amina Creta ajuntaijin ukukbaijam nunak, utugchat iwagmain juwakmaya nu iwajam, Jisusa nemajin aidaun diin atinush, makí makichik yaaktauch aidaunmashkam wi tibaijam dutiksamek adaijam umiktá tibaijame. ⁶ Jisusa nemajuidaun diin aidauk, nuna nunikchama tusaish augmatchatai amainai, makichik nuwentin, uchijí aidaushkam Apajúi nemajin, chichaman intimkichaju, pegkegchaunum aug-matchatai amain ainawai. ⁷ Wagki Jisusa nemajuidaun diin aidauk, Apajuinun kuitamjin asag pegkegchauji diigsá jiyashtai amainai, ememachu, kajemtin wajaknuchu, nampetan wekaetuchu, maanit-nash wakeechau, takat pegkegchau aina nujai kuichkijinatatus wake-juchu, ⁸ niina jeenish shiig aneas jukagtin, pegkeg aidau takatnak wakeyin, pegkejan anentaimkau, aents pegkeg, pegkejam, shiig kuita-mamak pujú, ⁹ chicham dekaskea nunú jintintuamua nuna shiig dekau asa, tikich aidau chichaman dekaskehua nunin chichajuidaunash, dekas pegkeja nuna shiig jintinmainai.

Waitá jintiin aidau

¹⁰ Mina pataag judío aina nuwiyag kuashat antumtikmainchau ainawai, nunin asag wait chichaman chichainak aentsun tsanú yu-jainawai. ¹¹ Nunú aents aidauk dekas itatmitkaktajum, ditak kuichkin akigkatnume tabaunum, makichik jeganum batsatunak jintiimainchau aidaun jintintak, Kristui kajintsá anentaimtuinamujin datupainawai.

¹² Ajuntai Cretanmayaya nuwiya makichik Apajúi etsegtin aajakua nu tiuwai: Cretanmaya aidauk tuke waitjin ainawai, kuntin ikamiajai betek, ayatak yu batsamin, daki ainawai, tusa. ¹³ Nunak dekas tiuwai. Nuadúi nunú aidauk amek najam chichagkata, ditashkam duikmuun augmattan idayinak, dekas Jisukristunak kajinas anentaimtustinme. ¹⁴ Mina pataag judío aidau chicham dekaskea nu dekatan dakituinak, ditak anentaimsa augmatuinak, ju umimainai tuina duka antugkaigpa.

¹⁵ Aents anentaimtaji pegkeg aina duka, ashí ni takaamujishkam pegkejak ainawai. Untsu aents pegkegchau Apajuiyaish kajinas anentaimchau aina duka, pegkeg anentaimtak atsujuinawai. Nunin

asag anentaimtajinish pegkegchau ainawai. ¹⁶ Nu chichainak Apajunak nemagjai tuinawai, tujash dita takaamujin wainak tuina duka wainnawai. Ditak kajegkagtin, chichaman intimkiu yujasag, pegkeg aina nunash takamainchau ainayatak tu yujainawai.

2

Dekas pegkeg aina nunú pachisa jintinkagtau

¹ Amek dekas chicham pegkeg unuimagbaugmia duke jintinkagtuata. ² Aishmag muun aidauk, wake besemtin, ajantusa diitai, shiig anentaimkau, dekas Jisusaig kajinas anentaimkau, anejatbaujinish imanuk, ashí utugchatnumash Jisusaig kajinas anentaimin amainai. ³ Aantsag nuwa muun aidaushkam, Apajuí aneen, chichama wekae-tuchu, nampechu, pegkeg takaamujinak iwainau amainai. ⁴ Nuninak jintintuatnume nuwa muntsujut yama nemaku aidau aishi aneetan, uchijí aidau aneetan, ⁵ shiig anentaimkau atan, shiig kuitamamka pujutan, jeenia kuitamka pujutnash, nuwa pegkeg atan, aishinig sumitkau atan, Apajuí chichamen pegkegchau chichagkainum tau asá.

⁶ Aikasmek datsauch aidaushkam, shiig anentaimkau atajum tusam chichagkata, pegkegchau wakegamua nuna depetuk idaisatnume. ⁷ Tuja dekas ameshkam ame shiig pujamujum iwaintukta, amina waipainak ditashkam unuimajagtinme. Jintinkagtakmesh pegkeja duke puyatjusam jintinkagtuata. ⁸ Chichaakmesh pegkeg aina duke ame bakumamainchau chichatá, nuniamin kajegkagtuidaush datsajag jutiinash pegkegchaunak tujamchagtatui.

⁹ Dutiksamek inak aidaushkam: Atumí apujum inapamu ashí umigkatajum, wainka ai aintau aigpajum, tusam chichagkata, ¹⁰ kasamtsuk ashí waji aidaun ajantus diistinme. Nuniagtai tikich aidaushkam Apajuí ii uwemtijamna nuna chichamen wakejus diistinme.

Apajuí wait anenkagtaujuji iwainakbau

¹¹ Apajuí ni jutii wait anenkagtaujujinak iwaintugmakui. Nunú ashí aents aina nunak uwemtikatatus wakejawai. ¹² Apajuí wait anenjamak sujamsamua nunú, pegkegchau aidauk idaisatajum, ashí pegkegchau ju nugkanmaya anentaimtutai aina duka; nuniakum dekas ju nugka juwish shiig imagnisam pegkegnum pujakum, Apajuiya duke ememattajum tusa tujamji. ¹³ Nunika pujuidau asaja, iina Apuji Jisukristu jutiin uwemtijamin, iina Apajuiji dakaku pujuinag nu wantintugmakui shiig aneastinaitji. ¹⁴ Nigka nigki mantamnatatus tsagakamankauwai, ashí pegkegchau aina nuanuí agkanmitkagmatatus. Dutika pegkemtijami niina aentsji etamak, ashí pegkeg aina nuwig takamtijamsata tau asa.

¹⁵ Jujú jintinkagtakum tikichish wakemitkakta, pegkegchau takainakuish najam chichagkam idaimitkata, makichik aentskesh iman Chau diigmasainum.

3

Jisusa nemajin aidau nunimainji

¹ Aneemtikjata Jisusa nemajin aidauk apu inamin aina nui suminkau atinme, nuninak dita tabaunash umigkatnume, nuigtú ashí

takat pegkeg aina nunak dutikatatus wakeetinme. ² Makichik aentsnakesh pegkegchau chichagtsuk, maanitsuk batsamas dekas anejatin atinme, ashí tikich aidaujaish ditá kakagchajin iwainaktinme.

³ Yaunchkek jutiishkam anentainkachu intimkiu asaja, megkaeja batsamsá, ayatak pegkegchau anentaimta nuna waitkatai, nuigtú ashí ii wakegamuk takainaku, pegkegchauk batsamtaku tikichdau pegkeg diigsá kajejuinaku, wainka kajegdayinaku pempé pempentunisaik kajegdayá batsamin aajakuitji. ⁴ Tujash Apajuí iina uwemtijamna nu ashí aents aneamujin iwaintugmak ⁵ uwemtijamjauwai, jutii pegkeg takagsashbauwaitak nigki wait anenjamu asa. Dutijama ni chichame tawa dutiksag tudaun tsagkugtamag pegkeg etamak Wakaní Pegkejin sujamsauwai. Dutikamu asaja yamajam pujut jukiu ainaji. ⁶ Jisukristu jutiiin uwemtijamak mantamdau asamtai, Wakaní Pegkejinashkam sujamsauwai, ⁷ ni wait anenjamag bakumamainchau etamkamunum, ditash pujut tuke atinun dakaina nuna jukitnume tujamu asa.

⁸ Juka dekaske, nuniau asamtai jujú pachisam ujaktá Apajuiyai kajinas anentaimaina duka pegkegnak takastinme. Jujú jintinkagta-mua juka pegkeg asa ashí aentsnak yaimainai. ⁹ Tujash chicham imanchau aidaun, akiinka minimum pachisag kajegdayak jiyainanak, nuigtú chicham umiktajum tibaun jiyanituina duka amek jiyanitu wekayipa. Nunú aidauk wainak asag makichkish yaimpamait sui.

¹⁰ Makichik aentskesh nuninun augmatuinak, makichik anentaiyaik ijunja takamainchau wajakuig chichagkata, tuja ataktú tamash antugtamchakuig jiiiktajum. ¹¹ Dutikakjumek dekaatajum jujú aentsuk tunamajeapita nunin asamtaimpap niina tudaujiya duke suwimak jumainnum ejentattawa tusajum.

¹² Artemasan, Tiquiconakesh awetittajame, dutikamtaig waamak Nicópolis taam waitkata, yumi tepeatta nunak nagkaemakti tusan nui pujuttajai. ¹³ Ayamkagtin Zenas Apolosjai, anuí taa nagkaemainakuig, ashí dita atsumainamuk susajum awematajum waittsainum. ¹⁴ Atum dutikamun tikich Apajuí nemajin aina dushakam wainkag, pegkeg aidaunak takainak tikich atsumamu yaitan unuimagtinme, nuninak tuke atsumtai atinme.

Inagnaku kumpamkagtau

¹⁵ Ashí wijai batsata dushakam kumpamjamainawai. Apajuiyai kajintsá anentaibaunum yatsut anejatuidau anuí batsata dushakam kumpamjutuatajum. Atumnash Apajuí yaimpaktinme.

Aatus atí.

PABLO PAPI AGAJA FILEMÓN AWETIMU

Pablo Filemón kumpabau

¹ Witjai Pabloitjai, Kristu Jisusa takaju asan achinkan pujajai. Anetaiju Filemogkah, ameshkam wi Apajuin takajag junismek takau asamin, yatsug Timoteojai pujusan kumpamjame. ² Aikasruk iina umayí Apian, nuigtú Arquipo Jisukristun takajak jutíijai betek waitna nunashkam kumpamkun, amina jeemin Jisusa nemajin aidau ijunin agma nunashkam kumpamainajai. ³ Iina Apají Apajuiya nu, Apu Jisukristujai wait anenjamu asag, atumnash shiig agkan anentaimsa pujutan amastinme.

Pablo see tabau

⁴ Mina Apajuijun aujkonuk amina pachisan tuke see tusanké ajai. ⁵ Wagki antugkamjame, amek Apu Jisus aneakum niinig kajintsam anentaimkun, ashí Jisusa nemajuidaushkam aneam nuna. ⁶ Duwi Apajuinak aujtajame, amesh jutíijai betekak Jisusai kajintsá anentaimu asamin, ashí pegkeg aidau ame dutikmainaitam nunak Kristu ame aneam duwi ni dekamtijamati tusan. ⁷ Shiig aneakum ichichmamjai ame anejatbaun antakun. Yatsujuh, Jisusa nemajin aina dushakam aminig anentain ichichmamkaje.

Onésimo amina jeemin ataktú jukita tibau

⁸ Filemogka, wika Kristu awemamu asan, ju aaja dutikata tumainaitjame. ⁹ Tujash amina aneau asan ayatak segajame. Wika muun wajasuitkun Kristu chichamen etseju asan achigkagmatai egkemsan, ¹⁰ Onésimo mina uchijua imana nuna pachisan, wait aneam sam ju jutikata tusan segajame. Achigkagmatai pujusan Kristu pachisan etsejai antuk niishkam sujumankabi.

¹¹ Onesimok tikich tsawan aajakua duwik ame inagtasaik atsumainchau aajakuí. Tujash yamaik ameshkam, wishakam atsumtai wajasú asamtai, ¹² ataktú awagtukin awetajame mina aneetaijua nuna. Nunin asamtai mina itugtumainaitam dutiksamek jeeminish jukita. ¹³ Wika junak wijai pujustí tusan emetmainaitjai. Ame mina yamajam chicham etsegbaunum yainmainaitam dutiksag yainkati tusan. ¹⁴ Tujash wika ame dutika yaimpakti tusam tujuttsuminkik dutikmaitsujai, ame waketagminig dutikmainaitam nuna, wi segam dutikamua nunin ai tau asan.

¹⁵ Onesimok wajumak tsawantai kanakin pujusan, ataktú wakitkin tuke niinig pujustajai tiutskaitai. ¹⁶ Tujash inaku waitkataig achattawai, dekas inataiya nuna nagkaesau iina yachi aneemaina iman ajutjamtatui. Nunin asamtai amek Apu Jisus nemagbaunum yatsut anentsam aan nagkaemasam wakejusam diitá, wainak aents aina nunin diitsuk.

¹⁷ Dutikam ameshkam wi Jisusaig kajintsan anentaimag junismek anentaimu asam, mina itugtumainaitam dutiksamek jukita. ¹⁸ Amina pegkegchau takagtamsau akuish, nuniachkush diwimjamkuish mina idaitugsata. ¹⁹ Witjai Pabloitjai, junak wi mina uwejuí agatkun tajame: Wi akikmaktatjai, ameshkam wi chichagkagtamunum pujut jukiu

asam minashkam diwimjam nuniaminig. ²⁰ Yatsujuh, amesh ii Apuji aneau asamin segajame, ju jutikakum minash Kristu nemagbaunum yatsum anentaimjuttsam anentaijuish ichichtugta.

²¹ Junak kajintsan agatjame amek umin asamin, nuigtushkam dekajai wi segajam nu inagkeasmesh dutikattam nunak. ²² Wait aneasam wi kanumainchakam umigtukta. Wi anuí minitnunak atum Apajuí aultugjum duwi, ni awetakui minittajai atumin wainkatasan.

Inagnaku kumpamkagtamu

²³ Kumpamjamui Epafra niishkam Kristu Jisus nemagbaunum wijai betek achinak egketa nunú. ²⁴ Dutiksag kumpamjamainawai Marcos, Aristarco, Demas, Lucas aatus mina yaintin aina nunú.

²⁵ Ii Apuji Jisukristu wait anenkagtamujiya nunú atumí wakanminish uyuntamsagtinme.

Aatus atí.

HEBREO AENTS AIDAU PAPI AGAJA AWETIMU

Apajuí niina Uchijin awemauwai

¹ Iina muunji yaunchuk batsamajakajua nunak, Apajuik niina etsegtin aina nui kuashta imania ujakajui. ² Tujash yamaik, ju tsawan jutii batsatag ju tsawantaik niina Uchijin awetugma duwi aujtamui, ashí wají aidauk ni najankamu asamtai ashí niinuk atí tusa idaitusua nuna. ³ Niiyai Apajuí imanjiya nuna iwaina duka. Nigka Apajuí wajukuita niishkam imanke. Ni chichame senchigtina duwi ashí wají aidaunak emetuk awai. Nuigtú iina tudaujinash tsagkugtamag nayaimpinum Apajuí inamtaiji untsujin ekeemsauwai. ⁴ Niiyai nayaimpinmaya aents aina nuna wagagkauk, nigki dekás Apu wagaaku ashí nayaimpinmaya aents aina nuna nagkaesau eme anentsá adaitaiya dushakam.

Apajuí Uchijiya nuuwai nayaimpinmaya aents aidaun nagkaesauk

⁵ Apajuik makichkish nayaimpinmaya aents aina nunakesh: “Amek mina Uchijuitme, wi yamai aentsnum akiinati tima akiinaw asam”, tichauwai.

Nuigtush nayaimpinmaya aents aidaunak:

“Wi niina apají atajai, ni mina uchig atí”, tichauwai.

⁶ Tikichnumshakam jutiksag, niina Uchijí makichkiuchia nuna pachis nugkanum awemak:

“Apajuí aentsji nayaimpinmaya aina duka ashí niinak ememattinme, tiuwai” tawai.

⁷ Nayaimpinmaya aents aidaun pachisag:

“Apajuik niina aentsji nayaimpinmaya aidaunak tuke dasejai betekmamtin ainawai tawai, tuja mina takagtuinak tuke jii kegamujai betekmamtin weu ainawai”, tawai.

⁸ Tujash Apajuik niina Uchijin pachisag:

“Apajuiyah, amek ajumaish pegkeg aina duke takaakum tuke inamtinaitme.

⁹ Amek pegkeg aina nu aneakum, pegkegchau aina duka dakitjaume.

Nuaduí Apajuí, amina Apajuigmea nu shiig aneemtijamsae

kumpajum aina nuna nagkaesau”, tiuwai.

¹⁰ Junashkam Uchijin tiuwai:

“Apuh, amek yama nagkamtinish nugka najankum nayaimpishkam najankauwaitme.

¹¹ Nunú najankamujum aina duka megkaejatnai

jaanch mamujá megkagama numamtuk,

tujash amek tuke pujutnaitme.

¹² Jaanch ninutia numamtuk awajkattame.

Yapajiakmeshkam jaanch yapagmamtayama numamtuk yapajiattame.

Tujash amek imanismek atinaitme, amina pujutjumshakam nagkankashtinai.”

¹³ Apajuik makichkish nayaimpinmaya aents aina nunak:

“Ekeemsata mina untsujuí, nunikamin wi amina shiwajum aidaunak ashí depetuktajame, dutikan ikaunmamtai duwi ame diisminum”, tichauwai.

¹⁴ Wagki, ashí nayaimpinmaya aents aina duka wakan Apajuin takajin ainawai, aents uwemjatin aina nuna yaigtí tusa ishimtai ditak ainawai.

2

Uwemat pachisa etsegkamu

¹ Nuaduí Kristu chichame antukbauwa duka, puyatjusa shiig aneaku amainaitji, Kristu nemajut tupanjaig tuidau asaja. ² Yaunchuk iina muunji aajakajua nuna, Apajuí niina aentsji nayaimpinmaya aina nui chicham umiktinun awetim susauwa duka senchigtin aajakuí. Nunin asamtai nuna umitsuk tudaun takaidauk dutiksaik suwimak suujakbauwai. ³ Nunin aish jutiish ¿wajuk Apajuí suwimkajish uwemtumainaita, uwemat dekas imana nu pachitsuk idaikuish? Nu uwemtan pachis dekatkauk Apu Jisus etsegkauwai. Jisus etsegbaun antukaju aina nunú jutiinashkam dekaske tusag ujakakajui. ⁴ Apajuí nuna shiig dekamtijamata tau asa, niina chichamen etsejuidaunash yaigkú. Dutikam aents dutikmainchau aidaun iwainag takaajakajui. Dutiksag Wakaní Pegkejiya nunashkam, ni wakejamua dutiksag máki makichik jutiinak amasajui.

Kristu ashí apu aina nuna Apuji atinai

⁵ Nugka yamajam atak atin pachisa chichainag nunak, Apajuik nayaimpinmaya aents aina nunú diistí tusag idaituschauwai. ⁶ Jushakam aatus agagbauwai:

“¿Ju Aentsmaga Akiinauwa jusha ya asamtaiya imatikamesh emesh anentame? Apajuiyah ¿ya asamtaiya amesh jusha imá kuitamkatasamesh wakejame?”

⁷ Ujumak tsawantaik nayaimpinmaya aents aina nuní imanchauch emaume,

tujash ataktú imanuk emam eme anentsá diitai awajsaume.

Dutikam ame najankamu aina duka ashí nigki idaitusume.”

⁸ Nunú ashí idaitusbau asa makichkish Kristu diyachbauk atsawai, tujash eke ashí ni diyakbau amaina nuninuk waintsuji. ⁹ Tujash Jisus ujumak tsawantai nayaimpinmaya aents aina nuní imanchauch emamuitak, ni waittsa jakamunum eme anentsá diitai wajasua duka wainji. Nunak Apajuí jutiin wait anenjamu asa, ashí aents aidaunum waitus jakati tima nunikui.

¹⁰ Ashí waji ni najankamu ayaa duka niinuk ainawai. Nigka wakegawai ashí niina uchijí aidauk nayaimpinum pujustinme tusa. Nuna dutikata tau asa Apajuí Jisukristunak waittsati tiuwai, ni nunikbaunum ashí niina uchijí aidaunak pegkeg emak uwemtikata tau asa. ¹¹ Wagki ashí aents pegkeemtikamu aidauk, nuigtú pegkeemtikagtina dushakam ashí Apajuinuk ainawai. Nuaduí Jisus Apajuí Uchijiya duka, datsamatsui jutii aidautin pachipas, “mina yatsug ainawai” tujamtanmag. ¹² Nuna pachis agagbaunum chichaak:

“Apawah, amina pachisan yatsug aidaun ujaktajai, dutikakun ditajai ijuntsan kantamkun ememattajame”, tawai.

¹³ Junashkam:

“Wika imá Apajuinak anentaimtittajai”,
 ataktushkam:

“Wika juwig Apajuí uchijí aidaun sujusua nujai pujajai”, tiuwai.

¹⁴ Jutii aents ainag nuninuk Jisuschakam wajasá akiina, jutii ní mantamdauwai iwanch dekas senchigtin iina mantamatatus wakejut-pauwa nuna depetkatatus. ¹⁵ Ni jakamunum agkanmitkakbauwai ashí aents iwanchin inake waig batsamas, jaamun ishamá batsatushkam. ¹⁶ Duka dekaske, nigka nayaimpinmaya aents aidaun ayamjuktatus minichui. Nigka Abraham Apajuiyaig kajinas anentaimajakua nunin aidaun ayamjuktatus miniuwai. ¹⁷ Jutii niina yachi aidautin yaimpakta tau asa jutiijai betek wajasuí. Nunik ni dekas Sumo Sacerdote wajasú asa Apajuin betek umijak, jutiiinash wait anenjasmas Apajuinash segatjamui, jutii waitmaina nuna ni waitus mantamdauwa duwi, Apajuí aentsú tudaujinash tsagkujati tujamu asa. ¹⁸ Niishkam iwanch pegkegchau takamtiksatas dekapeam asau asa, iwanch dekapeam waituidaunak senchigtina ibau asa yaigtatui.

3

Kristui Moisesan nagkaesauk

¹ Nuaduí yatsug aidauih, ubag aidauiwah, atum Apajuí mina aentsug atinme tusa etejamu aidautigmek, Kristu Jisus Apajuí awemamu, nuigtú nigki Sumo sacerdoteya duke puyatjusjum anentaimtitajum. See tajai jutiiishkam niinig kajintsá anentaimu asaja ni pachisa etsegtuinag duwi. ² Nigka jutiiin yaimpakta tau asa, Apajuí takastá tibaunak imatiksag betek umikuí, Moisés aents aidaun yaigtatus Apajuí tibaunak betek takagsauwa dutiksag. ³ Nuaduí Moisesa nagkaesau eme anentsá diimaina duka Jisusai, jega jegamkamuk eme anentsá diitsuk, aents jegan jegamkauwa nu eme anentaiya nunisaik. ⁴ Ashí jega jegamkamui aina nunak aents jegamainawai, aantsag ashí waji aina dushakam Apajuí najankamu ainawai. ⁵ Moisesak dekaskenmag Apajuí aentsjin kuitamak, Apajuí jeen takamaina numamtuk shiig takagsauwai, Apajuí inake asa. Tuja ni takasua duka, Apajuí atak dutikatnujin iwaintamua nunin aajakuí. ⁶ Tujash Kristuk Apajuí Uchijiyai, nigka betek umina ibau asa, jutii Apajuí aentsji aidaulik niina jeega numamtin ainag nui pujus yaimpaji. Jutii niini dekaskeapi tiuwaitag duwi, uwemjatnapitja tusa wakeesa dakainag nuwi emetmamja pujau ainakuik, niina aentsjig ainaji.

Apajuí chichamen antugkachaju aina nu pachisa tibau

⁷ Nuaduí puyatjusjum Apajuí tibauwa nu antugkatajum, Wakaní Pegkeji tibau Apajuí chichamen agagbaunum tawa ju:

“Yamai Apajuí tabau antakjumek,

⁸ intimjukigpajum.

Aents intimkiu aidau: ‘Wajupa pegkegchau takaajinig Apajuish ka-jeawa’ tusag uwegshunum dekapjusaju aina nunisjumek.

⁹ Atumi muunjum aajakajua nunú pegkegchaunum dekapjusajui, wi ditan cuarenta mijadai yaigkan iniibaun wainainayatak.

¹⁰ Nuninakuí kajegkan: ‘Ditak wainak anentaimainawai, nunidau asag wi taja nu dekatnash dakituinawai.’

11 Nunidau asagmatai ditan senchi kajegkan chicham yapajimainchawai:

‘Ditak wi nugkan anagkuauwaitag nuwi ayamsatajum tiuwaitag nuwig wayaachagtatui’, tijai.”

12 Yatsug aidauh, ubag aidauh kuitamamkatajum, atum ainajum anuiyatijum pegkegchau anentaimat, Apajuiyai dekaskeapi tuchata nu ajutjamsamtaí, Apajuí tuke pujuwa nunú tupanjaijum. 13 Duka nunitsuk kashí kashinig makí makichik pempeentunikjum anentai ichichtunigtajum, “Yamai”, tibauwa nu tsawan eke au asamtaí. Atum ainajum anuiya: Jutiik Apajuí intimjuinakuish shiig batsamtatji tusa anentaimaídaush ainawai. Tujash duka dekaskechui. Nu aaja nuninakuik Apajuí tupanku nunimainai. 14 Jutiishkam Kristujai ijuntsa takainautik, yama nagkamchaku niini kajintsá anentaimajakuitag nuniisaik jaakuish jamainaitji.

15 Duwik agagbauwa nui chichaak:

“Yamai Apajuí tabau antakjumek, intimjukigpajum duwik wajukawajua nunisjumek”, tawai.

16 ¿Ya Apajuí chichaamun antukaju ainayatkush intimjukiaju ainawa? Duka ashí aents Egipto batsatun Moisés jiijá agkanmitkakua nunú nunikajui. 17 ¿Ya aidauna Apajuish cuarenta mijadaish kajegkash pujusuita? Nunak aents tudau takasaju uwegshunum jinawajua nuna dutikawajui. 18 ¿Ya aidauna Apajuish chicham yapajimainchawai, wi ayamsatajum taja nuwig wayashtatjume tiuwaita? Nunak aents chichaman intimkiaju nuna tiuwai. 19 Yamaik shiig dekainaji, ditak Apajuin dekaskeapi tuinachu asag, Apajuí ditan nugká anagkuauwa nuwig wayachajui.

4

1 Nuaduí, Apajuí ayamsatnume tusa anagtamamu eke ajutjama duwi, jutiik shiig kuitamamain ainaji, atum ainajum anuiyatigmekesh waimainchaunum juwakaig tabaunum. 2 Jutii aidautish yamajam chicham etsegbau antukuitji, dita antukajua nuniisaik. Tujash ditak antuinakush wainkaya nunin diisajui, wagki Apajuiyai kajinas anentaimaídaush chichaman umikajua nunikchaju asag. 3 Tujash jutii Apajuiyai kajintsá anentaimaídautik, Apajuí ayamsatajum tibauwa nui wayawagtinaitji. Nuna pachis Apajuí chichaak:

“Nunidau asamtaí ditan kajegkan chicham yapajimainchawai, ditak wi ayamsatajum tiuwaitag nuwig wayaachagtatui tijai”, tiuwai. Tujash Apajuik nugkan najanauwa duwik ni takatjinak ashimkauwai.

4 Apajuí chichame agagbauwa nui, siete tsawanta nuna pachis:

“Apajuik ashí ni takamainjinak ashimak siete tsawanta juwi ayamjauwai”, tawai.

5 Tuja agagbaunum awaksag chichaak: “Ditak wi ayamsatajum tiuwaitag nuwig wayaachagtatui tijai”, tawai. 6 Tujash nunú ayamnagtina nui eke wayachush ainawai, yama nagkamchak chicham uwemta nu etsegbau antuku aidauk, intimaídaush asag wayachajui. 7 Nunikagmatai, Apajuí ataktú makichik tsawantan mamikiae, yamagman “Yamai” tsawanta juna, yaunchuk David papiinum agak tibauwa nunak awaksag chichaak:

“Yamai Apajuí tabau antakjumek, intimjukigpajum”, tawa nuna.

⁸ Wagki Josué Israel aents aidaun, Apajuí ayamsatnume tiuwa nui utsau ataik, Apajuik tikich tsawannak mamikiachu amainai. ⁹ Nunin asamtai Apajuí aentsji aidautin, Apajuí ashí ni takamainjin ashimak si-ete tsawanta juwi ayamjauwa nunisjumek, atumesh ayamjatnaitjume tujabiuwa nunú eke dakaku pujuinaji. ¹⁰ Nuaduí jutii Apajuiyai ayamjatasa waidautik, ii takatjinish ayamjatnaitji, Apajuí ni takas ayamjauwa nunisajaik. ¹¹ Duwi kakanmamainaitji dekas ayamtainum wayatasaja. Duwik iina muunji aidau dita chicham umishtajin, Apajuí ditan nugkan anagkuauwa nui wayachajua nunikaig tuidau asaja.

¹² Apajuí chichamega duka senchigtina imau asa pujut tuke atina nuna sukagtawai, nuigtush espada mai yantamejai etsakamua nuna nagkaesauwai. Espada iyashnum shiig wayaa tikima initak tsupiyama imatiksag, Apajuí chichamega duka wakannumash, tuja iina anentaim-tajin pegkeg aunash, pegkegchau aunashkam dekamtijamji. ¹³ Apajuí najanamu aina nuwiyag niina uumjumainuk makichkish atsawai. Apajuí emtinig ashí waji aina duka shiig paan ainawai, nunin asamtai Apajuik ii takasbaujin diisá tujamtinai.

Jisusai Sumo Sacerdote

¹⁴ Jisus Apajuí Uchijiya nuuwai, jutii Sumo sacerdoteji dekas iman nayaimpinum wayauwa duka. Nuaduí niini kajintsá anentaimaid-autik emetmamjaja nunisaik pujumainaitji. ¹⁵ Wagki jutii Sumo sacerdotejiya nu, ii kakakchau wegajinish wait anenjamainai. Nigka jutiiyai betek pegkegchau takamtiksatasasa dekapeam asauwai, tujash nigka makichkish tudaunak takaschauwai. ¹⁶ Nuaduí Apajuí anempa duka ajantutsuk adijka ausagmi. Ni jutiinak wait anenjamag ashí ii atsumamunmash yaimpektatui.

5

¹ Ashí sumo sacerdote aidauk, aents aidau ditá tudaujin tsagkug-nagtatus, kuntinun anentag itaagtai maa apeak Apajuin segattí tusa, aents aina nuwiya etegja adaikamu aajakú ainawai. ² Tujash sumo sacerdotek nigkishkam pegkegchaun takamain asa, aents Apajuí umigtan shiig dekachu asag, wainak pegkegchaunum yujaidaunash wait anentus yaigtí, ³ dutikakush niina tudaujiná tsagkugnagtatus kuntinun maa apeati, dutika duwi aents aidau tudaujin tsagkugnagti tusa kuntinun maa apeati tibau aajakuí. ⁴ Jujú takat ajantusa diimaina junak makichik aentskesh nigki nagkamig wi sumo sacerdote atajai tumamig takamaisui. Junak Apajuí Aarogkan etegkauwa dutiksag etegkamu aina nu takamain ainawai.

⁵ Nunisag Kristushkam nigki wi sumo sacerdote atajai tusag naamkachui. Apajuí nu takata nunak dutikati tiu asa: “Amek mina Uchijuitme, wi yamai Aentsmaga Akiinati tima akiinau asam”, tiuwai.

⁶ Nuigtushkam tikich agagbaunmashkam tawai: “Ametme sacerdote dekas tuke atinmek, Melquisedec aajakua nujai betek”

⁷ Kristu ju nugka juwi pujusua nuaduik, shiig senchi untsamak buutak negá negajai Apajuin segauwai. Ni jamaina nunak Apajuí senchigtina ibau asa agkanmitkajuati tusa. Nunitai Apajuik ni umigbau asa ayatak antugkauwai. ⁸ Kristuk Apajuí Uchijiyaitak,

waitiamunum Apajuí wakegamu umigtanak unuimajui. ⁹ Ni juna imajtikas umikú asa, ashí aents Apajuin umijuina nuna uwemtikin wajasuí, nuniku asa pujut tuke atina nuna suwawai. ¹⁰ Tuja Apajuí niinak sumo sacerdote atí tusa adaikauwai, Melquisedec aajakua nujai betek.

Kristu nemajut idaisaijum tusa ujaniamu

¹¹ Jujú pachisa tumainuk kuashat ajutjamji, tujash juní tawai tusaik shiig tumaitsui, atumek waamak antumainchau asagmin. ¹² Atumek Kristu nemagkajum dukap tsawan pujau asajum, jintink-agtin amainaitkujum, ataktú awagkijum Apajuinun shiig jintias dekas yupichuchin jintinjamatnume tusa atsumagme. Nuniau asajum uchi yamá akiintsau yutai katsugman yumainchau asa, muntsunak muntsuwama nunin ainajum duwi, pegkeg nuigtú pegkegchauwa dushakam akanjá dekamainchau dekapeagme. ¹³ Ashí uchi muntsun muntsuaku aina duka, chicham pegkeg aidaunak jintiag chichaakuk amaitsui, wagki uchi asa. ¹⁴ Tujash pegkeg takaamua nuna, pegkegchau takaamua nujai akanag dekatan unuimatjau aina nuuwai, muun yutai katsugman yuwina numamtin aidauk.

6

¹ Nuaduí nagkamchaku Kristu pachisa jintiamu aajakua duka ukuaku, nuní nagkaemasa dekamain ainaji. Nunidau asaja pujut yapajita nu pachisa, tudau takaamu Apajuíjái tuke kanatnum ejek-agta nu idayat, Apajuíyái kajinmamsa anentaimta nu ataktú awagki dekaataasaik batsamtumaitsui. ² Yamimat pachisa jintinkagtamú, Jisusa nemajuidau buuknum achiká Apajuí segatut, jakau aidau nantajagtin, nuigtú Apajuí ii takasbaujin diisá tujamtina nu pachisa dekaata-saishkam batsamtumaitsui. ³ Ju pachisaishkam jintintuattajime Apajuish dutikati tujamkuig.

⁴ Wagki aents aidau Apajuí ni chichamen dekaskea nuna anenjauch sukagtusbauwa nuna, nuigtú Wakaní Pegkejinash tikich aidaujái betek jukiú aidau, ⁵ nuigtushkam Apajuí chichame shiig pegkeja nunash wakejus antuku, tuja Apajuí niina senchijiin ju nugka juwi inamjatna nunash shiig dekauwaitak, ⁶ Apajuí dekaskeapi tutan idayas, ataktú ni pegkegchau takaajakbaujinak waketjuki takaak, Kristu shiwagmaina duka, kakajus ataktú pujutinak yapajimatsui. Wagki dita nuna nuninak, dita dekas Apajuí Uchijin achijagmatai, tikich aidau Kristun dushikis chichagmaina numamtuk wajaidau asagmatai. ⁷ Aents ajak ajakmamujiya nuna yumi yutak nugkan uchupjamtai ajak tsapai pegkejan nejekmatai, nuna jakú juwaama numamtuk, aents chichaman antukua nu dutiksag pegkejan takagtaik Apajuishkam yaimainai. ⁸ Untsu aents aidau Kristu nemagtan idaisag jagki tsapaina numamtuk wajaidaunak, jagki jinum apetiama numamtuk Apajuí suwimkan susatnai.

⁹ Tujash aneetaig yatsug aidauh, ubag aidauwah, atumek aents megkaemainai taji nuninuk ainatsjume. Wika atumnak shiig degajime, dekas pegkeg atum uwemjamujum ajutjamaina nunak. ¹⁰ Apajuik pegkeja nunak takauwa ibau asa, atum ni aneau asajum tikich yaigkuitjum nunak, nuigtú yamaikish yaimainajum nunak kajimatkishtinai. ¹¹ Nuaduí atum wakesajum takaajum nunak, dutiksag

ematnume tusa wakegaji. Nuniku asajum atum dakainajum duka imatiksagmek jukitin ainagme. ¹² Duwi daki batsamtutsuk, Kristui kajinas anentaïmaidau emamkemas pujuinak, Apajuí anagkagtuamua nuna jukitin aina nunisjumek pujustajum.

Apajuik ni anagkagtuamujinak yapajichui

¹³ Apajuí Abragkan anagkuauwa nunak, niina nagkaesau adaisa tumain atsau asantai, Apajuí nigki adaimamas, chichajak: ¹⁴ “Dekaskenum kuashat yaigtatjame, dutikakun ame wegantu aidaunak shiig kuashat uyujkatnaitjai”, tiuwai. ¹⁵ Tima Abragkak emamkemas dakasu asa, Apajuí niina anagkuauwa nunak imatiksag jukiuwai. ¹⁶ Aents ni dutikatnujin anagdayinakug, ditá nagkaesauwa nuna adaisag anagdayin ainawai. Nunú iman antanunum tiu asag dekaskenmap dutikattawa tusag ukú ainawai. ¹⁷ Nuaduí Apajuí anagkagtuamujin jukitin aina nuna shiig iwaintuktatus wakekauwai, ni anagkagtuamua nunak makichkish yapajitsuk imatiksag umiktin asa, nigki adaimamas dekas umiktatjai tiuwa nuna. ¹⁸ Ni anagkagtak nigki adaimamas tiuwa nujaiyai jimag chicham yapajimainchauwai tiuwa nu. Nuaduí Apajuik waitjuchua ibau asantai dekas dutikattawapi tau asaja, shiig senchi ichichmamainaji Apajuí ayamjutpasmatai kajinmasa ni anagkagtuamua nu jukittajapi tusa dakaidau asaja. ¹⁹ Nunú dakamua nuuwai ii Apajuiyai kajinmasa anentaibaunum iina wakanin ichichtamuk, jiju ancla tutai lanchan buchitmainchau ema ebetama numamtuk. Nu kajinmasa anentaibauwa nunak Jisukristu sujamui, nigki Apajuí pujamunum wayauwa dushakam. ²⁰ Jisus eemak wayauwa nunak, jutii wayatnun jintan ujatjamtatus nunikui. Nuniau asa niyai sumo sacerdote tuke atin Melquisedecjai betekak.

7

Jisusak sacerdote Melquisedecjai betekai

¹ Melquisedecak yaakat Salemnumia apu, Apajuí nayaimpinmayaya nuna sacerdoteji aajakuí. Nuniau asa Abraham apu aidaujai maania depetmak wakettatman, Melquisedec jiiintuki igkug pegkegnum yumigsauwai. ² Dutikam Abragshakam maania depetmak waketak, ashí ni waji yajuakbaujinian diezmon susauwai. Melquisedec tawa nunak: “Apu pegkejan takau” taku tawai, nuigtú yaakat Salema Apuji aajakuí tawa nunashkam: “Shiig agkan anentaïmsa pujutan apuji” taku tawai. ³ Melquisedeca apajig, dukujish, ni weganbaujish, akiinamujish, jakamujishkam dekajuachbauwai, duka Apajuí Uchiji tuke sacerdotek pujutna numamtinuk aajakuí.

⁴ Anentaïmtusjum diistajum, Melquisedecak Abragkan nagkaesau aajakuí. Iman asantai Abragkak apu aidaujai maania depetmaka, waji yajuakbaujin diezmo susauwai. ⁵ Moisés chicham umiktajum tibauwa nuwig, sacerdote Leví wegantu aidaunak ditá patayí aina nunú diezmo susati tibau aajakuí, ditashkam Abraham wegantu ainayatak. ⁶ Tujash Melquisedecak Leví wegantuchuitak, Abraham Apajuí anagkuamun jukiuwa nunú, diezmo suwamash jukiuwai. Dutikam Melquisedecshakam pegkegnum yumigsauwai. ⁷ Juka ashí dekainaji, pegkegnum yumigkagtina duka, pegkegnum yumigsamua nuna nagkaesauwai. ⁸ Yamai jutii diezmo suwinag duka aents jinin aina nu suwinaji. Tujash

Apajuí chichamen agagbauwa nuwig, Melquisedec eke iwaaku pujauwa nuninun etsegtawai. ⁹ Nunin asamtai Abraham Melquisedecan diezmon susauwa duwi, sacerdote, Leví wegantu aidauhkam diezmon ditashkam susajua nuninai. ¹⁰ Melquisedec Abragkan igkugtatus jintukiwa nuaduik Leví wegantu eke akiinachu ainayatkush, Abragkai akiinkagtin asag, ditashkam nuwig batsatua nunin aajakajui.

Aarón wegantu takasbauwa duka pegkejak etamchauwai

¹¹ Moisés Israel aents aidau chicham umiktinun agatjauwai dutika susauwai Leví wegantu sacerdote aina nuna, aents aidanun chicham umitnum yaygintime tusa. Tuja nunú sacerdote aidauk Apajuí emtin aents aidanun pegkeja imanuk iwainamainchau aajakajui. Nuaduí atsumnajui tikich sacerdote Melquisedec aajakua ibauk, Aarón wegantua nuwiyachu. ¹² Wagki sacerdote takataijiya duka yapajiamu asamtai, chicham umiktinun sacerdote aidauk nuní takastinme tibauwa dushakam yapajinuwai. ¹³ Tuja agagbaunum iina Apuji Jisukristun pachis tawa duka, tikich Israela uchiji aajakajua nuwiya aajakuí. Tuja nuwiya sacerdote atí tusaik makichkish tichamui. ¹⁴ Shiig dekanui, iina Apuji Jisusak Judá wegantunmaya aajakuí, Moisesak sacerdote aidau takastinjin tiuwa nunak Judá wegantunmaya takamainnak makichkish tichauwai.

¹⁵ Ju dekas imá paan dekamainai, yamajam sacerdote Melquisedecjai betek wantinkau asamtai. ¹⁶ Chicham umiktinun Leví wegantu aina duke takastin atinme tibauwa nuwiyachui, nigka Sacerdote senchigtin pujut tuke aunum pjuwa nuwiyayai. ¹⁷ Niina pachis Apajuí: “Ametme Sacerdote tuke pujutnumek, sacerdote Melquisedecjai betek”, tiuwai.

¹⁸ Nuaduí yaunchuk chicham umiktin aajakua duka nagkankauwai, aents aidanun yaimainchau asa. ¹⁹ Moisés chicham umiktajum tibauwa duka makichik aentsnakesh pegkejak emachui, nunin asamtai Apajuí dekas tikich imá pegkejan amasti tusa dakaidau asaja Apajuiyai jagainaji.

Kristu dutikamua nuuwai tikich sacerdote takasajua nuna nagkaesauk

²⁰ Apajuik ni dutikatjai tibauwa nunak chicham yapajimainchauwai tiuwai. Tikich sacerdote aidauk imatika chichagkaik adaikashbau ainawai. ²¹ Tujash Kristuk chicham yapajimainchauwai chichagká tibauwa nunú agagbaunum tawai:

“Apu Apajuí nigki adaimas, mina chichamjunak yapajiashtatjai, ametme Sacerdote tuke atinmek”, tiuwai.

²² Dutikamu asa Jisus dekas imá pegkeg dutikamua duka yaunchuk chicham apakbau aajakua nuna nagkaesauwai. ²³ Sacerdote aidauk kuashat aajakajui tuke pujuchu asag. ²⁴ Tujash Jisusak tuke jakashtin asa, tikichnakesh ni takaa nunak inagkeatkishtinai. ²⁵ Nuaduí niyai tuke atinun uwemtikagtumainuk, jutii niini yunumka Apajuiyai shjegajinig. Nigka tuke pjuwa ibau asa Apajuin segatjamui.

²⁶ Nunin asa dekas Sumo Sacerdote ii atsumajakuitag duka Jisusai. Nigka pegkegmai, pegkegchaunash antiakchau, tudaugtin aidaujaish ijutkachu, iman asamtai Apajuí niinak dekas nayaimpia nuna yakiin iwakuí. ²⁷ Nigka tikich sacerdote aidau kashí kashinig kuntinun maa apeak, dekatkauk niina tudaujiná tsagkugnag, duwi tikich aents

aidau tsagkugnagtinjin apejakua nuninchauwai. Jisusak makichkia mantamdauwai ajumaish tuke jakashtinun, nigki tsagkamankauwai. ²⁸ Moisés chicham umiktinun agajua nuwiyam diisag sumo sacerdote atinun adayajakajua duka, aents pegkegmachu aajakajui. Chicham umiktina nu nagkaemakiu ai, Apajuí chicham yapajimainchauwai, niina Uchijin Sumo Sacerdote atí, tusa adaikamua nuuwai dekas tuke pegkejak atinuk.

8

Iina Sacerdoteji Kristu nayaimpinum pujawai

¹ Wi dekas imanun titasan tajim duka juuwai: Jutii Sumo sacerdotejig, Jisus nayaimpinum Apajuí inamtaijin untsujin eketa nuuwai. ² Awi nigka pujus sacerdotejai betek takaawai. Tujash nigka aents jegamkamunum wayaag takaatsui, Apajuí nu umikbaunum wayaa takaawai. ³ Ashí sumo sacerdote aajakajua duka, Apajuinu anentag itaamun maa apeati tusa adaikamu ainawai. Nunisag Jisuschakam jutiin tudaujin mantamnak niina iyashinak Apajuin anentag susauwai. ⁴ Nigka ju nugka juwi pujakush sacerdotek amaitsui, juwig kuashat sacerdote ayau asantai. Nunin asag Moisés Apajuí anentag susatajum tibauwa dutiksag takaidau asagmatai. ⁵ Tujash juwiya sacerdote aina duka, nayaimpinmaya waji aina nunú ayatak dakumká najanamunum wayaawag takainawai. Dakumkamu ainawai taji, wagki Apajuí Moisesan chichajak: “Ame mujanum pujamin jega Apajuí ememattain iwaintukbaijam nuna niimejai betekuch najanata”, tiuwai duwi. ⁶ Untsu jutii Sumo sacerdoteyiya duka, juwiya sacerdote aidaun nagkaesau dekas pegkejan takasui. Nunin asa ni chichaman apakua duwi, Apajuí jutii jukitnunak dekas pegkeja nuna anagtamui.

⁷ Nagkamchaku chicham apakbauwa nu pegkeg aajakú ataik, ataktú chicham apakmí tabauk atsusú amainai.

⁸ Tujash Apajuik nunú aents aidaunak pegkejak diischauwai, nuniku asa chichajak:

“Apu tawai: Tsawan jegatnai, Judea nugkanum, nuigtú Israel nugkanum batsatina nujai ataktú chichaman apaktinaitag nunú.

⁹ Duka wi ditá muunji aidaun Egipto batsatun jiijan, ditajai chichaman apakuitag nuna umikchagmatai idaisauwaitag nuninuk achattawai”, tawai Apu Apajuí.

¹⁰ “Nunú nunikaju asantai, yamaik juuwai yamajam chicham wi Israel aents aidaun taja nunú:

Wi atumin chicham umiktajum tiuwaitjim nuna shiig dekamtikatnaitjim nunú tsawan jegatnai.

Wi mina chichamjunak shiig machikish kajimatkishtinun aneemtijat-tajime.

Atum imá minak shiig anentaimtujuinakjuminig, wishakam atumnak shiig kuitamkattajime.

¹¹ Dutikamu asajum atum ijutkamukesh, yatsumkesh Apajuí dekaati tusagmek jintintuashtin ainagme.

Wagki ashí piipich, ashí muun aidau nagkamas shiig dekajuawagtin ainawai.

12 Wika ditá pegkegchaujinak tsagkujan, tudauji aidaunash ajumaish adeagchatnun kajimatkitnaitjai”, tawai.

13 Apajuí yamajam chicham apakbau pachis tawa nunak, nagkamku chicham apakbauwa duka muuntuch wajasú asamtai tawai, muuntuch wajasú asamtai atsumnatsu duka megkaekatin asa nuniawai.

9

Jega Apajuí ememattai nugkanmaya nayaimpinmayajai pachisa tibau

1 Yamai dekaami, nagkamku chicham apakbau aajakua nuwig, ju nugka jui jega Apajuí ememattai jegamkamua nuwish, Apajuish wajuk emematmainaita nu pachisa tibau aajakuí. 2 Nunú jegak juní umikbau aajakuí: Dekatkau tesamua nunak “Pegkejam” tujakajui, nuanuig candelero* jii ekemaja pekatai aajakuí, nuigtú pag Apajuí anagkuamu mesanum patagbau aajakuí. 3 Jaanch ejaamua nuna ukujin tesamu aajakua nunak, “Shiig Pegkejam” tujakajui. 4 Nuanuig altar ayatak orok najanamu kugkuin incienso patai apetai aajakuí, nuigtú kajun arca tutai ayatak orok epekbau aajakuí. Nunú arcaya nuna inítken egkemajakuí Aarogka ushujutaiji jeekú aajakua nu, chicham umiktin kayanum agagbauwa dushakam, nuigtú makichik ichinka nunin ayatak orok najanamunum maná chimpianu aajakua dushakam. 5 Nunú kajuna nuna awanken jimag aents nayaimpinmaya nanaptin dakumkamu, Apajuí nui pujamujiya nuna iwainajakajui. Nunú aidauk ditá nanapen kajun arca tutaiya nuna dukukag aajakajui. Tujash juna pachisnuk imatikanuk shiijak tichattajai.

6 Ashí ju ímatika umikbaunum sacerdote aidauk, kashí kashinig deatkau tesamu Pegkejam tutainum wajajakajui, dita takastí tibuauwa nuna umiktatus. 7 Tujash nuna ukujin tesamu Shiig Pegkejam tutaiya nuwig, imá sumo sacerdotek makichik mijantin makichkia wajakuí, kuntinun numpen takus. Nunik nunú numpa nuna Apajuin anagkuak, deatkauk niina tudaujin tsagkugnagtatus segatmami, duwi tikich aentsú tudaujinash segatujakuí. 8 Nuna Wakaní Pegkeji shiig dekamtijamui. Dekatkau tesamunum sacerdote takainaigkish, tikich ukunum tesamu Shiig Pegkejam tujakbauwa nuwig, tikich aents wayati tusaik tichamu aajakuí. 9 Ashí nuna dutikajakajua nunak, yamai tsawanta juwi nuniktinun iwainak dutikawajui. Nuniau asag nunú jeganum batsamsag, kuntin Apajuí anentag anagkuamun maa apeenak Apajuin emematuinakush, dita bakumamainjinig tuke agkanmagak agkanmagauwa nuninuk anentaimajakchajui. 10 Nu jeganum bat-samas chicham umiktajum tibaun umiinak, ayatak yutai aidau, umutai aina nuna, Apajuí ememattasag yumin ikigmajakajua nujai takasajui. Ashí nunú aidaunak Apajuí eke yapajiachu asamtai dutikajakajui.

Jisukristu waitus mantamnamua nuuwai jutiin bakumamainchau etamuk

11 Tujash Kristu juwi tauwa nuuwai yamaik Sumo Sacerdote, pegkeg aidau tuke atinun sukagtinuk. Ni sacerdotejai betekak jega Pegkegmanum wayaa takaa nuuwai dekas imá pegkejak. Duka aents aidau jegamkachbauwai, nunin asa ju nugka juwiyachui. 12 Kristuk

* 9:2 “Candelero” tachakuish “Candelabro” tumainai. Nunak jii ekemaja pekatain tawai.

jega tesamu Shiig Pegkejam nayaimpia nui wayauwai. Nigka chivo aidau, toro tsakat aina nuna numpen jukig wayaachui. Nigka aentsú tudauji tsagkugnagti tabaunum mantamdauwa duwi, niina numpen juki, Apajuí pujamunum makichkia wayauwai tuke atinun, nuniak jutiinash tudaunum bakumamaina nuna agkanmitkagbauwai. ¹³ Duwikik toro aidau, chivo aidau numpen jukiag, nuigtú baka tsakat apeamu yukujinashkam jukiag, aents pegkegchau waigkú aidaun yukujakú ainawai, Apajuí ememattasa uminbaunmag pegkeg atinme tusag. ¹⁴ Tujash Kristu achinag mantamdauwa duwi, jutiinak Apajuí emtinish bakumamainchau etabiuwai. Nigka makichkish pegkegchau-jig atsugmaitak, Wakaní Pegkeji tuke pujuwa nunú yayasam, nigki tsagkamankauwai mantamnatatus, ni jaak numpeen ukajua duwi aents aidau tudaujish tsagkugnagtinme, dutikamu asag Apajuí tuke pujuwa nuna ememattinme tusa.

Kristu yamajam chichaman apakuí

¹⁵ Nunin asa niyai yamajam chichaman apakuk, ni mantamnak aents yaunchuk chicham apakbaunum batsamas tunamaku aidaunash agkanmitkak, Apajuí tuke atinun anagkagtuauwa nunash jukitnume tujabiuwai. ¹⁶ Aents jaakug niina wajiijinak, nu aents jukiti tusa papiinum agag shiig umiká ukú ainawai. Tujash aents nuna agajua nu eke iwaaku pujaigkik juchau ainawai. ¹⁷ Aaja chicham umikbau aig, nuna umikú iwaaku pujaigkik nu chichama duka wainkayai. Untsu papiinum agag umikua nu jakamtaí, nu aents jukitin atí tibaujiya duka uminnai. ¹⁸ Nunisag Apajuí yamá nagkamchak chichaman Moisesjai apakua dusha, numpajaichuk dutikachbau aajakuí. ¹⁹ Dutika chicham umiktina nuna ashí aents aidaun Moisés ujaká, nuaduí toro tsakat maamu aidau numpeen, chivo numpe aidaun yumijai pachimag, uwijá uje kapantu emamun jukiag numi hisopo tutai kanawen jigkawag, numpanum uchupig, chicham umiktin agagbaun pegashmatug uchupik, aents aidaunashkam dutiksag dutikauwai. ²⁰ Dutika chichajak: “Jujuwai numpa atumjai chicham apamunum jutikag nu”, tiuwai. ²¹ Nuigtushkam Apajuí ememattai duwap apajá jegamajakbaunum, dekatkau tesaamu Pegkejam tutaiya nui takatai aidaunash numpan pegashmatujakuí. ²² Chicham umikbauwa nuwig: Numpajai dutika pegashmatjamu aina nuuwai Apajuinu atí tusa dutikamu aidauk tawai. Numpajaichuk tudau tsagkugnamainuk atsawai tibau aajakuí.

Kristu mantamnamua duwi tsagkugnamuk awai

²³ Nayaimpinmaya waji aidau diisá dutiksaik dakumká* najanamu aajakua duka, Apajuinu atí tusa dutikamui. Untsu nayaimpinmaya waji aina duka, kuntinu numpen dutikajakbauwa nuna nagkaesau dekas pegkejan atsumawai. ²⁴ Kristuk jega tesaamu Shiig Pegkejam tabaun aents umikajua nuwig wayachui, duka nayaim awa nu dakumká najanamu aajakuí. Nigka dekas nayaimpinum wayauwai. Yamaik awi Apajuijai pujus, jutiin Apajuin aujtugmaji yaimpakti tusa. ²⁵ Mija mijantin sumo sacerdotek jega tesamu Shiig Pegkejam tutainum wayakug, kuntinu numpen ditá numpechun takusag waijakú ainawai. Tujash Kristuk kuashta imaniag mantamnachui, aents aidau

* 9:23 Diistá Éxodo 26.30

tudauji Apajuí emtin tsagkujamu agtinme tusag. ²⁶ Nunin achataik niishkam yama nagkamchaku nugka najandauwa duwi nagkamnas, yamaishkam tuke mantamná pujumainai, tujash yamaik tsawan nagkanbau jegau asamtai Jisusak tauwai. Nunik tudaun depetkatatus ajumaish jakashtinun makichkia mantamdauwai. ²⁷ Tuja nunisag aents aidaushkam makichkia jakatin ainawai, nunikmatai Apajuí ii takasbaujin diisá tujamtina nu atinai. ²⁸ Nunisag Kristushkam kuashat aents aidau tudaujin utsankatatus makichkia jakauwai, tuja ataktú minitta duwik tudaunak pachikchattawai, niina dakak batsatun uwentikatatus minau asa.

10

Yaunchuk chicham umiktin aajakua duka aentsnak yaigchauwai

¹ Moisés chicham umiktinun agajua nunak dekas nayaimpinum atina nuna iwainak dutikauwai. Nuaduí chicham umiktina nuna uminak, mija mijantin kuntinun maawag apejakú aina duka, makichkish aentsnak pegkejak emachui. ² Chicham umiktina nu umiamunum, tudau tsagkugnajag Apajuí emtin bakumamainchau dekapenakug, kuntin mautnak idaisau amain aajakajui. ³ Tujash nunú kuntin maamua duka ayatak, ashí mijantin ditá tudaujinak anemtikajakuí. ⁴ Wagki toro numpe, chivo numpe aina nujaig aentsuk tudaujinig tsagkugnainchau asamtai.

⁵ Nuaduí Kristu nugká tatsuk Apajuin tiuwai:

“Kuntin maa apeamu, tuja anentag itamush dakitame.

Nuniau asam minak aentsú iyashijai betek etiume, aents aidau tudaujin mantamnak agkanmitkati tusam.

⁶ Kuntin maa apeamu, nuigtú tudau tsagkugnagtasa anentag itaamu aidaushkam dakitame.

⁷ Nuniau asamin wi amina chichagkun:

‘Apajuiyah, mina pachitus papiinum agajajua nuna, ame wakegam dutiksanuk umiktasan juwi pujajai’, tibaijame.”

⁸ Nuna nagkamas takug: “Apajuik kuntin maamu, anentag itaamu, tudau tsagkugnagtasa kuntin maa apeamu aina nunak dakitawai, shiig awagmatsui tawai. Chicham umiktina nui dutikatajum tibauwa nunin aigkish.” ⁹ Ataktú takushkam: “Wi ame wakegam nuna umiktasan minajai” tiuwai. Nunak yaunchuk kuntin maajakbauwa duka emegkakum, yamagmauchia nu apusata taku tiuwai. ¹⁰ Jisukristuk Apajuí wakegamunak imatiksag umiju asa, jutii tudaujin makichkia mantamdauwai ajumaish jakashtinun.

¹¹ Ashí sacerdote aidauk kuntin maa apeamua nunak kashí kashinig takajakú ainawai, tudaunash makichkish utsanjamainchau aig. ¹² Tujash Jisukristuk ataktú mantamnashtinun makichkia mantamdauwai tudau aidanum, nunik Apajuí inamtaijin untsujin ekeem-sauwai. ¹³ Nui yamaik pujawai, “ni shiwaji aidanak ashí Apajuí depetuk ikaunmakti” tusa dakak. ¹⁴ Nuna niina iyashin anentag Apajuin susauwa duwi, tuke atinun pegkemtijabiuwai, Apajuinu atinme tusa.

¹⁵ Dutiksag Wakaní Pegkejiya dushakam shiig dekamtijamji:

¹⁶ “Apu Apajuí yamagman anagkagtak: Wi atumin chicham imiktajum tiuwaitjim nuna shiig dekamtikatnaitjim nunú tsawan jegatnai.

Wi mina chichamjunak shiig machikish kajimatkishtinun aneemtijat-tajime.

¹⁷ Ditá tudauji aidaunash ajumaish adeagchatnun kajimatkitnaitjai, tawai.”

¹⁸ Aatus asamtai tudau tsagkujamu aidautik, Apajuí tsagkugtugti tusa kuntin mautak atsumnatsui.

Apajuiyai jegamainaitji

¹⁹ Nunin asamtai mina yatsug aidauh, ubag aidauh, Jisukristu mantamna numpeen ukajua duwi, jega tesamu Shiig Pegkejam tutainum sacerdote waijakajua nunisaik, Apajuí pujamunum waimainuk shiig agkan ajutjamsae. ²⁰ Yatsug aidauh, jutii Apajuijai agkan chichamain atsugtamajakua nunak, Kristu jaak numpeen ukajua duwi, Apajuí pujamunum shiig agkan waimainuk ajutjamsauwai. ²¹ Jisusai jutii Sacerdoteji dekas senchigtin Apajuí jeen puja duka. ²² Nuaduí Apajuik dekaskenum kajintsá anentaimtusa jegaantagmi. Wagki jutii: Mina tudaujuimpap suwimkan jukitnaitja, tusa anentaimaina nunak agkanmitkagma, iina iyashinash yumi dekas pegkejai dijagbau amaina iman etugtabiu asamtai. ²³ Nunin asamtai ni anagkagtuamua nu dakaku pujuidautik emetmamja batsamsagmi, dekaskeap uminkat-tawa tusaja, wagki Apajuí nunak imatiksag betek umiktin asamtai. ²⁴ Pempeentunisaikish wajuk yainimainaita nu egakagmi. Pegkegnum yaininaku nuní nagkaemasa aneemaimaina nu. ²⁵ Apajuí nemajin aidau kantamatasag ijunainamunmag, wajumak Apajuí nemajin aidau kaunchaush ainawai. Nuna nuní unuimatjau aidaush yaigtajum dekas Kristui kajintsá anentaimtanum, wagki Kristu minitnujiya duka tikiju wajasú asamtai.

²⁶ Aents Apajuí chichame uwemtikagtina nunú jintinkagtamun shiig dekau ainayatak, tuke aneas wakegak pegkegchauwa nunak takaak Kristu shiwagmawk, nuigtú nuna tudaujin tsagkugmainuk atsawai, wagki imá Kristua duke niina tudaujin mantamdauwa nuna dakitau asa. ²⁷ Nunú aentsuk jii shiig ishamainnum Apajuí niina shiwaji aidaun suwimkan susatna nuna dakainawai. ²⁸ Duwik makichik aentskesh Moisés chicham umiktajum tibaun umikchamtaig, jimag aentskesh, nuniachkush kempatumkesh apu aidaun jegajiang, nunú aents chichaman umitsuk wainak takaawai tusag etsegtukagmataig, wait anentug tsagkugtsuk maajakú ainawai. ²⁹ Tujash nuna nagkae-sau, aents Kristun dakituidau imá senchi suwimak ishamainun jukiagtina. Apajuí Uchijí jutiini mantamnak numpeen ukajua duwi, chicham apakbaunum uwemtijamag Apajuinu atinme tujabiuwa nuna dakituidauk, Wakaní Pegkeji jutiin wait anenjama nunash, pegkegchaun chichagmaina numamtuk awagmainawai. ³⁰ Apajuí chichaak: “Witjai suwimkan sukagtinnuk, nunin asan wi pegkegchau aidaunak suwimkan susattajai”, tawa duka dekaji. Tikich agagbaun-mashkam: “Apajuí niina aentsji aidaunak pegkeg ainawai titinai”, tawai. ³¹ ¡Tikima ishamainai, Apajuí tuke pujuwa nunú suwimak sukagtamak!

³² Tujash adeagtajum, yama nagkamchakjum Kristui sujumankajum, ashí utugchat waitiamu akuish, katsunjá ichichmamjajum depetkauwaitjum nunú. ³³ Wagki atum ainajum anuiyatijum, tuwak-baunum pegkegchau chichagku waitkasbautigmesh ainagme, nuni-

agmin tikich aidauk aents dutika waitkamu aina, nujai ijuntsan waittsatjai tusa anentaiksaush ainawai. ³⁴ Atumek Kristu nemajuidau achikam chimpijush wait anenjauwaitjume. Tuja atumi shiwajum wajiigmin yajutjamkagmataish, atumek shiig aneasjum pujagme, atum jukitnuak nayaimpinum dekas shiig pegkeg tuke atin ajutjamaina nu deka asajum. ³⁵ Kristui kajintsá anentaimejum nunú megkaekaigpa, wagki atum jukitna duka shiig pegkeg ajutjamu asamtai. ³⁶ Atumek atsumagme waitiakjumesch ichichmamja pujusjum, Apajuí wakegamua nu takaakjum, ni anagtamamua nu jukitasajum. ³⁷ Agagbaunum chichaak:

“Minitna duka, megkaetsuk waamak minittawai.

³⁸ Aents pegkejan taká duka, imá kajintsá anentaibauwa duwik ajumaish tuke pujustinaí.

Untsu mina nemagtukuitak idaitaunak shiig anentsashtinaitjai”, tawai.

³⁹ Jutiik aents suwimka jukiagtin aidau Kristu nemagtan idayina nuninuk ainatsji, ayatak kajinas anentaibaunum uwemtan jukiaju aina nuninuk jutiishkam ainaji.

11

Apajuiyai kajintsá anentaimeuwai dutikmain

¹ Apajuiyai kajintsá anentaibauwa duka, dekaskenmap jukittaja tusa kajintsá dakamua nuuwai. Pegkeg aina nuna pachis chichainakuish wainkachu ayatka dekas nuninapi tusa anentaimejuta nuuwai. ² Jutií muunji aajakajua duka, Apajuiyai kajinas anentaimeidau asag, Apajuí shiig anentam asajui.

³ Apajuiyai kajintsá anentaimeidau asaja, nugkanum, nuigtú agkajunum ayaa duka Apajuí chichamenkiap najaneakuíta tusa dekainaji. Paan wainmain aina duka waji atsaunmaya najankamu ainawai.

⁴ Apajuiyai kajintsá anentaimeuwai Abelak Apajuí wakegamua dutiksag takaak, kuntin dekas pegkejan maa apeak anentag Apajuin susauwai Caigdaun nagkaesau. Dutikau asamtai Apajuik Abelnak ni dutikamujija nujai pegkeg diisuí. Nunin asamtai Abel jakau aigkish, ni Apajuiyai kajintsá anentaimeajakua nunisaik jutiishkam nunimaina nuna iwaintugmawai.

⁵ Enocshakam Apajuiyai kajinas anentaime asamtai, Apajuí iwaakunak nayaimpinum jukiuwai, dutikamtaí aents aidauk nuigtuk wainkachajui. Chicham agagbauwa nui: Enoc eke juwacham nugká pujusag Apajuinak shiig awajkauwai, tawai. ⁶ Wagki Apajuí kajintsá anentaimeutskek Apajuik shiig aneemtikmaitsui. Nuaduí Apajuí-jai ijutkau atatus wakegauk, dekas Apajuí niina shiig dekaatatus wakegaidaun anentag sukagtina duka pujawapita, tumain ainawai.

⁷ Apajuiyai kajintsá anentaimeuwai Noeshkam, Apajuí chichajak: Dekas ishamain atatuí tusa ujakam, nigka wainchayatak Apajuí chichamen umijak arcan najanauwai ni patayí aidaujai uwemjatnun. Nunú Apajuiyai kajintsá anentaimeuwai duwi uwemai, ashí aents Apajuiyai kajinas anentaimeinachuk bakumajui. Tujash nigka bakumachui.

⁸ Apajuiyai kajintsá anentaimeuwai Abragkak, Apajuí nugkan amastajame tima, tuwí jegattawa nunak dekatsuk, Apajuin umijak tikich nugkanum weuwai. ⁹ Apajuiyai kajintsá anentaimeuwai Abraham,

Apajuí nugka anagkuamua nuwi, tuke ikayajai betek duwapen aakmak pujusuí. Nunisag nunikajui Isaac, tuja Jacobshakam, ditan Apajuí anagkuauwa nuwi batsamsag. ¹⁰ Nunak nayaimpinmaya yaakat Apajuí umikbau dekas tuke atina nuwi pujustinjin dakainak nunikajui.

¹¹ Apajuiyai kajintsá anentaibauwai Abragkak muuntuch wajasú akush, nuwe Sarashkam kaga aig, Apajuí anagtuama nunak betekap umiktatua tabaunum nuwe uchigmakui. ¹² Abragkak jamainjin jegas pujai, ni nuwe Sara makichkiuch uchigmakui, nuwiya wegantu aidaun yaya dekapamainchauwa iman, nayantsa kaamatkaji dekapamainchauwa nujai betek emakui.

¹³ Nunú aidauk Apajuí anagkuamua nunak jutsuk jinawajui. Tujash ditak Apajuiyai kajinas anentaimaidau asag: Duka jutii jaká ajinish uminkatnapi, tusag shiig aneejakajui, ditak ju nugka juwig tuke ijagka nuninap ainaji tusa dekaamaidau asag. ¹⁴ Nuna aatus anentaimajakajua duwi yamaik shiig dekaji, dekas ii pujumainuk nayaimpinum atina dukeap dakainaji tusa. ¹⁵ Tuja ditá nugke ukukbaujin anentaimtú batsatkug waketmain aajakajui. ¹⁶ Tujash ditak nayaimpinmaya dekas pegkeja nuna wakejuidau asag nunikchajui. Nuaduí Apajuí dita pujusagtinnak yaakat nayaimpinum awa nuna umigkauwai, dutikau asa Apajuik: Juka midau ainawai, tutanmak datsamatsui.

¹⁷ Apajuiyai kajintsá anentaibauwai Abragkak, Apajuí chichajak: “Uchi ajutjamtatuí” tusa anagkuauwaitak, dekaskenmash minaish kajinas anentaima tusa dekapeak: “Uchijum makichkiuchia nu maam emematjita” tamash dutikatatus wakekauwai. Apajuí Abragkan anagkuak: ¹⁸ “Ame wegantu aidauk, Isaac akiiamua nuwiya agtinai”, tibau ayatak. ¹⁹ Abragkak: Apajuik aents jakaunash inanmainapita, iman asampap Isaac jakamtaish nigki inanmainaita tiuwai. Abragkak uchijí mauwaitak, Apajuí ataktú inantukim jukiuwa numamtinai, nigka dekas mautnak maachuitak maatatus umiintusu asa.

²⁰ Apajuiyai kajintsá anentaibauwai Isaakshakam, Esaú jukitin atí tibaujinak Jacopan anagkuauwai.

²¹ Apajuiyai kajintsá anentaibauwai Jacob jakattak tepes, José uchijí aidaun makí makichik ditanu atinun anagkuauwai, nunik ushujutaijin ichichmamas wajas Apajuin emematiuwai.

²² Apajuiyai kajintsá anentaibauwai Joseshkam jaak: Israel aents aidau Egipto batsata juka jünjatnai tiuwai; nuniak: Mina ukunchjuk jujukitin atajum tiuwai.

²³ Apajuiyai kajintsá anentaibaunum Moisés akiinamtai, apají dukujijai kumpatum nantu uukajui uchi pegkejuch asamtai, nuninak apu uchi kajegtajum tibaunash ishamkachaju ainawai. ²⁴ Apajuiyai kajintsá anentaibauwai Moisés muun wajasash: Faraogka nawanjin uchijiyaitjai, tumamtanak dakitujakuí. ²⁵ Nigka Apajuí aentsji waitkam batsataidaujai waittsatatus wakegau asa, Egiptunmaya pegkegchaun takainayatak shiig anee batsatujai ijuntanak dakitjauwai. ²⁶ Nigka Egiptunmaya aidau nunitaijin takaak shiig aneastatus wakeetsuk, Kristu atak taa waittsatnujin betek waittsatatus wakekauwai, Apajuiyap dekas pegkejan sujustatua tusa dekau asa.

²⁷ Apajuiyai kajintsá anentaibauwai, Moisesak Israel aents aidaun yaigtatus imá senchi anentaimu asa, Egiptunmaya apu kajektinjinash ishamsuk jünkiuwai, Apajuí wainmainchauwa nunú niijai abaunash

dekapeau asa. ²⁸ Moisés Apajuiyai kajintsá anentaibaunum Apajuí nagkamak: Uwig maam yuwakjum Pascua jistamata tima jistamauwai. Dutikak uwijá numpeen ditá waitijin numpeajajui. Dutikamu asamtai nayaimpinmaya aents magkagtaushkam, makichkish Israela uchijí iwai aidaunak mautesuk ukukiuwai.

²⁹ Apajuiyai kajintsá anentaibauwai Israel aents aidaush, nayants kapantu tutainum bukunum katimaina nunikag katiyajajui. Tuja Egiptunmaya aidaush ditash nunisag katiagtakamag jakekajui.

³⁰ Apajuiyai kajintsá anentaibauwai Israel aents aidau, yaakat Jericon siete tsawantai tentea apainak, yaakat peegmagbaujin yumpuntua akaketkajui. ³¹ Apajuiyai kajintsá anentaibauwai nuwa Rahab daagtin, akiká takatai aajakua duka, tikich aents intimkiu aina nu jinutaish nigka jakachui, Israel aents dekamatatash yujaunash shiig anentus yajuak kuitamkau asa.

³² ¿Nuigtush wajinak titaja? Gedeogkan, Barakan, Sansogkan, Jefté, David, Samuel, nuigtú tikich Apajuí etsegtin aina nuna pachisa tita takunuk, tsawantan atsumainaitjai. ³³ Apajuiyai kajintsá anentaibauwai shiwajin depetkag ditá shiwaji nugken batsamawajui, Apajuí nugkan anagkuawajua nui, nunikag nui apu wajasajag pegkegunum inamjajui. Nuniagtai Apajuishkam ni anagkuauwa dutiksag yaigkajui. Dutiksag león batsatbaunum egkeawagmataish, leogkan yukagtumainchau emak kuitamajakajui. ³⁴ Jii senchi kegamunum egkeamush ainawai, tujash esachajui. Espadayai maata tamash pisajakajui. Kakakchau aidaunashkam senchi emakajui, dutikamu asag ditá shiwajijai maaniakush depetmajakajui. ³⁵ Nuwa patayí jajukbau ataktú inaantuki suujakbaush ainawai.

Tujash tikitchakam senchi waitus jakaush ainawai, ditak Apajuiyap wi jakamtaish inantuki dekash pegkeg pujutan sujumainaita tusa anentaimu asag. ³⁶ Nuigtushkam tikich aidauk, pegkegchau chichajam, asutiam, jiju cadenajai jigkajam, achiká egkeam waittsajui. ³⁷ Tuja tikich aidauk kayai tukua tukuakua maamush ainai, serruchui tsupika maamu, espadayai kajegbaush ainawai. Ditak jeenchau yujasag, uwan duwapen, cabra duwapejai nugkujakajui. Nuigtushkam ujunauch, senchi waitkainam wake besemag batsamajakajui. ³⁸ Nunú aents aidauk shiig pegkeg, aents pegkegchau aidaujai ijunag batsaamainchau aajakajui. Nunin asag senchi waitkainam, jiinag uwegshunum shiyak, mujanum wajag yujas, kayanum waa ayaunum utsanawag kanuu, nuigtú nugka waanum kanuu wajajakú ainawai.

³⁹ Tujash Apajuiyai kajinas anentaimainayatak, Apajuí anagkuawajua nunak juinatsui. ⁴⁰ Apajuik jutiinun dekash pegkejan umigtamkau asa, ditanak eke susachajui, jutiijai ijuntsa jukitin asamtai.

12

Jisus waittsamu diisá ichichmamain

¹ Yaunchuk Apajuiyai kajinas anentaimajakú kuashat aajakajua duka, Apajuiyai emetmamja pujamujiya nuna iwainmamkajui. Nu nunika takuik atumnawai ashí iina tudauji tutitag awajtamak pegkegchau etama nu idaisatasa. Nuniaku ii jegatasa wakegamunum tupikautiama numamut wajamainaitji. ² Jisus diisagmi. Niiniya Apajuiyai kajintsá anentaibauk minawai. Nigki Apajuiyai kajintsá

anentaimtan sukagtus Apajuiyai ejetamuk. Jisusak tikima datsamainnum numinum achijá maam waitiakush uyumatsuk atsanjauwai; nigka: Imanika waittsanush dekas shiig aneasnuap Apajuí inamtaijin untsujin ekeemsattaja tusa dekau asa.

³ Nuaduí Jisus aents tudaugtin aidau waitkam jutiini imanik waittsauwa nunú anentaimtustajum, nuniakjum pimpiakjumesch mijamt-suk nemagkatajum. ⁴ Atumek aents tudaugtin aidau mantamatasag waitkagmamainnumak eke jegatsjume. ⁵ Atumek jutii Apajuí uchijí asajin agagbaunum:

“Mina uchijuh, wi pegkegchauwai tusa tajam duka antugtukta, tuja wi amina Apujum asan jiyajam duwishkam wake besemag anentaimpa,

⁶ wagki Apua duka jiyaawai yana ni aneawa nuna pegkejan takastí tusa, suwimkanash suwawai ni uchijí emamujinak” tawa juka kajimatki-umek.

⁷ Nuaduí atumek Apajuí jintinjamu asamtai waitiajume, wagki Apajuik aents uchigtin uchijin itugmaina numamtuk awajtamui. ¿Ya aentsua uchijin pegkejan takastí tusash jiyatskesh idainaita? ⁸ Tujash ashí aents ni uchijin jintinta dutika, atumnash Apajuí jintinjamchakuig, dekas niina uchijí ainatsjume. ⁹ Nuigtushkam jutii uchuch aajakuitag duwik, iina apají jintinjamu asamtai ajantusa diijakuitji. Nuní nagkaemasa dekas iina Apají nayaimpinmayaya nunú shiig umigmaintaitji, pujut tuke atina nunú jukita tau asá. ¹⁰ Jutii apajig wajumak tsawantai batsamtinaitak, jutiin pegkegnum yaimpamaina nuna anentaimtusag jintinjamajakajui. Tujash Apajuik iina dekas pegkeg etamaina nuna jintinjamji, ni pegkegma ibauk atinme tujamu asa. ¹¹ Dekaskenmag suwinkak makichkish shiig awajkagtuchui najabau asa. Tujash Apajuí jintinjamak dutijama nu nagkaemakmatai, shiig agkan anentaimsa pujuta nunú, nuigtú pegkeja duke takatchakam unuimagtatji.

Apajuí wait anenkagtugbaun dakitin aidau

¹² Nunin asamtai, atum dekas junta pegkegma nu nemagtanum pimpikiujum nunú, nuigtú pujutjuminish kakakchau dekaepajum dushakam, kakanmamsajum ichichmamjatajum. ¹³ Nuniakjum Kristuig kajintsá anentaimsa pujakjum, pegkeja duke takastajum. Ashí pegkeg dutikmain aig, dutikatsjum nu takaakjum pegkeg wajasminjum.

¹⁴ Ashí tikich aidaujaish agkan pujakjum Kristunuk takaakjum pujustajum, wagki Kristu wakega nuna takainachuk niinak wainkashtin ainawai. ¹⁵ Nunin asamtai shiig kuitamdaikatajum, Kristu nemajin aina nuwiya makichkish Apajuí wait anenkagtamujiya nuna megkaekainum. Nuigtushkam atum ijunjum anuiya utugchatan apujak waitkagmasainum diiyaku atajum, aents nunina duka makichik ajak jatai asa, kuashat aentsun pegkegchau emamaina numamtinai. ¹⁶ Makichkitigmekesh nuwak tsanijimawaigpajum. Apajuinu pegkeg aina dushakam dakitjaigpa. Esaú ni iwai asa apají jakamtai, waji jumainjinak yapajak yachin susauwai yutain yuwak, numamtuk wajakajum. ¹⁷ Atumek duka shiig dekaagme, Esaú dutika sujukuitak Apajin jegaantun, niina pujutjin pachis pegkegnum chichagtukat tukamá

dakitam asauwai, dutikam senchi buutkush, nuigtú dutikmainuk atugsauwai.

Yamajam anagkagtuamu nayaimpinum jukitnaitag nunú imá pegkejai

¹⁸ Israel aents aidauk muja Sinainum jii kegaun, suwe wajasú, ikiyamjau, senchi dasentun adijkaju ainawai. ¹⁹ Nuigtushkam trompeta shinamun antuinak, Apajuí chichaamunash antukajui, nuninak Moisesan chichajuinak: “Apajuik ataktú awenag chichakaigka”, tusag segajui. ²⁰ Wagki ditak Apajuí ju dutikatajum tabaun dakituidau asag tiajui, Apajuí ditan chichajak: “Ju muja juna kuntinkesh najakuig kayai tukujum, nuniachkugmesh nagkikish maatajum”, tau asantai. ²¹ Nunú mujanmag tikima ishamain imaniau asantai, Moisés chichaak: “Senchi ishamakun kujajai”, tiuwai.

²² Tujash atumeke muja Sión Apajuí tuke pujuwa nuna yaaktaji nayaimpinmaya Jerusalegka nu adijkaugme, nuwig nayaimpinmaya aents aidau shiig kuashat Apajuin emematuinak ijunag ainawai. ²³ Nuigtushkam Jisusan nagkamas nemagkaju aidau ditá daajig papiinum agatkamu nayaimpinum ajuina dushakam, Apajuí aents takasbaujin diisá titina nunak ijuntug batsatui. Nunisag Apajuí nemajin initaik jinawajua nuna wakaní aidaushkam pegkeemtikawajam awig batsatui. ²⁴ Ditak Jisusai jegantaje. Apajuí yamajam chichaman atumjai apakua nunak, Kristu mantamnak numpeen ukajua duwi, Apajuí jutii tudaujinak tsagkugtamjauwa nu adeagtajum. Jisusan numpega duka Abela numpega nuninchauwai. Wagki Abel numpan ukajua nunak ni yachi Cain maam nuniku asantai, Apajuí Caignak suwimkan susauwai. Untsu Jisus mantamnak numpan ukajua duka, jutii tudauji tsagkugnagtinun nunikui.

²⁵ Nuaduú kuitamamkatajum, Apajuí aujtabauwa nu dakitajium. Apajuí jujú nugka juwi chicham umiktajum tibaun antugkachaju aidauk, suwimkanak uwemtutskek nagkankachajui. Nuní nagkaemasa jutii Apajuí nayaimpinum pujus, chicham umiktajum tujamawa nunú umiashkuik suwimkak pegké uwemtumaitsuji. ²⁶ Apajuí Moisesan chicham umiktinun suwak chichaamujig nugkan pegakuí, tujash yamai tujamji: “Ataktuk imá nugkanak pegatsuk, ashí nayaimpinashkam pegaktatjai”, tiuwai. ²⁷ Ju chicham “ataktú” tibauwa duwi, ashí tuke achatin najankamu aina juka, tuke atina nujaimpap yapajiam atinaita tusa dekainaji. ²⁸ Tuja Apajuí pujusá inamjatnujiya duka makichkish umuchiam achatin asantai, see tiagmi Apajuí ju pachisa. Nuniaku shiig puyatjusa, aneasa emematiagmi, niinak ju shiig awagbau asantai. ²⁹ Kajimatkgipa, jutii Apajujiya duka jiijai betek asa, jii tsajaun apek emegkauwama numamtuk awagbauwai ashí pegkegchau aidanak.

13

Apajuin shiig awagma nunú takaamu

¹ Yatsut anendaisa pempeentuniki aneenita duka idaisaigpajum. ² Aents atumi jeemin mindaush shiig anentsá awaita nunú kajimatkgipajum. Aatus nunidauk dekatsuk nayaimpinmaya aentsun shiig anentus jukiajush ainawai.

3 Aents achikam egketaidaush, atumin achigmakagmatai egkeemainaitam nu anentaimsam yaigtajum. Aents waitkam batsataidaushkam, atumshakam dutiksaik waitkam amainaitjum nu anentaimsajum yaigtajum.

4 Atum nuwenamua duka eme anentsajum diistajum, nuniakjum pegkegchau takagdaitsuk pujustajum; wagki pegkegchau takaidaun, nuigtú ekagmaidaunak Apajuí suwimkan susatnai.

5 Kuashat kuichkigtin atasagmek puyatjú pujuigpa, atumin ajutjamaina nujaig shiig anejasum pujustajum. Wagki Apajuí chichagtamak: “Makichkish idaisashtinaitjame”, tujabiu asamtai. 6 Nuaduí jutiik shiig kajintsá:

“Apajuiyai mina yaintuk, duwi puyatatsjai.

Aents aidau mina dutijumaina nunak ishamatsjai” tumainaitji.

7 Anentaimsa diistajum, atumin Apajuí chichamen jintinjamajakú aidau wajuk pujusajua ainawa nunú. Nuniakjum dita Apajuiyai kajintsá anentaibauwai, Jisusan nemajujakajua nunisjumek nemagkatajum. 8 Jisukristuk yauwa duwish, yamaya juwish, atakea duwishkam tuke nuninuk atinai. 9 Tikichin yapajia jintinjamaidauk antugkaipajum. Apajuí jutiin anempau asa, wakeetan sujamas yaimpa nuuwai, yutai pachisa tibauwa nuna nagkaesauk. Nunú tibau aina duka makichkish yaimpakchauwai.

10 Jutii tudaujin tsagkugtamjatatus Kristu mantamdauwa nuuwai, Moisés pujusmatai tudau tsagkugnagta tabaunum kuntinun maujakajua numamtinuk. Nuna nejeenak sacerdote aidau Apajuí ememattainum takaidauk yujakchaju ainawai. 11 Wagki kuntin maamua nuna numpeenak sumo sacerdote juki, Apajuin anentag suwinak jega Apajuí ememattainum wajakuí tudaujun tsagkugtugti tusag, tuja nejenak jukiag yaakta ukukí apejakajui. 12 Nunisag Jisuschakam yaakta ukukí waitus jakauwai, niina numpe ukaejamunum aents aidaun niinu emakta tau asa. 13 Nuaduí jutiik imá Jisusak nemagkagmi. Nuniaku Jisus aents aidau dakitjam waittsauwa nunisaik iishkam waittsagmi.

14 Jutiinak ju nugka juwig makichik yaakat ii dekas tuke pujustinuk atsugtamui. Ayatak dakainaji nayaimpinum Apajuí puja nui yaakat umikmawa nui wakagtasa. 15 Nuaduí Jisukristu yaijattsamtai Apajuiya duka tuke emematmainaitji. Apajuí iina wenin emematkuik, iina Apajuiji waji anentag sumaina numamtuk awagmaji. 16 Kajimatkgipajum, pegkeg takaaku tikich aidaujaish pempeentunikiaja yainita duka. Jutii pegkeg takaamua dushakam Apajuí anenjauch suwamua imanuk atinme. Nuniau asajin Apajuishkam jutiinash shiig anenjamsagtinme.

17 Kristu nemajin aidaun diin aina nu umigkatajum. Nuniakjum sumimkatajum, atum Apajuí dekaskeapi tusajum umijuinajum nuutigmin kuitamjamaidau asagmatai. Dita atumiin wajuk takasaje nunash Apajuí emtin etsegtugmaktin asamtai. Atum umigmak, ditashkam shiig aneas takasagtatui, tuja atum umigchamak wake besemag dekapiagtatui, nuniau asag shiig yaimpamaitsui.

18 Jutii pachitkagtusjumesh Apajuí aujkagtustajum. Shiig anentaimsa pujusá ashí pegkeg aina duke takastasa wakegainaji. 19 Apajuí imá senchi aujtugsatajum mina pachittsajum, wishakam ataktú atumiin taan wainkatjime. 20 Apajuí shiig agkan anentaimsa pujutan sukagtina nu, iina Apuji Jisusan maawagmataish inankiuwai, aents

uwijá kuitamin uwigjin kuitama nuna nagkaesau, ni aentsjinak shiig kuitamna nuna. Niina numpe ukagbauwa duwi ajumaish tuke atinun chichaman apakua nu, ²¹ atumnash pegkeg etamtinme ni wakega duke takasminjum. Nigki ashí jutiinash ni wakega duke takamain etamti. ¡Jisukristua duke ememattai atí! Aatus atí.

Inagnamu

²² Yatsug aidauh, ubag aidauh, wait aneasjum wi wajumak chichamai atumin ichichjatasan ju papiinum agatjajim jujú emamkesjum antuktajum tusan segajime. ²³ Atumesh dekaatajum: Yatsug Timoteo achikam egkemaya duka yamaik jiinkine, waamak taamtaig wi atumin wainkatasan minakun ayaktatjai. ²⁴ Ashí Jisusa nemajin aidau diin, nuigtú ashí Apajuí nemajin aidaushkam kumpamjutuatajum. Yatsug Italianmaya aidau atumnash kumpamjamainawai. ²⁵ Apajuí atumnash ashí wait anenjamjatnume.

SANTIAGO PAPI AGAGBAU

Santiago kumpamkagtau

¹ Witjai Santiagoitjai, Apajui nuigtú Apu Jisukristunashkam inakegaitjai. Israela uchiji doce aajakua nunú wegantutijum pam-pagjum, ashí tikich nugkanmash batsatutigmin agatkun kumpamjime.

Utugchat emamkesa depeteamu

² Mina yatsug aidauh, ubag aidauh, kuashat utugchatnum waitiakjumesh shiig aneasjum pujustajum. ³ Nuniakjum atum Apajuiyai kajintsá anentaimjum nunú, dekaskeashit tusa dekapjabaunum waitiakjumesh atsanjagmek, waitiakuish atsanja emamkesa nagkaeta nunú unuimagtatjume. ⁴ Aaja nuniakjum Apajui wakeja duke takat unuimagtatjume.

⁵ Atum ainajum anuiyatijum, Apajui nuní pujustinme tusa wakejutpa nu, dekaachmin utugchat dekapeakjumek Apajui segatajum, dutikam ni ashí shiig dekamtijamattawai kajegtamsuk. ⁶ Tujash dekaskeap jukittaja tabauwai utujimtsuk segatajum. Wagki aents utujima duka, nayants tsukatbauji dase umpuam tsukatuk weu, mai waket wajama numamtuk wajawai. ⁷ Nuna nuniauk, Apu Jisus sujamun jukittajapita tumain ainatsui. ⁸ Wagki ni anentaimtamujija nunak anentaimtutsuk, yamai tikichin anentaimtug, kashinia duwi tikichin anentaimtu wajau asag.

⁹ Yatsut ujunauchia duka shiig aneas pujumainai, Apajui eme anentsá diyaam atin asa. ¹⁰ Nunisag wiyakuch aidauk wajijjin megkayinakush, shiig aneas pujumainai. Apajuik ditá wajijjin diigsag eme anentatsui. Wagki wiyakchameamua duka, dupá yagkují wajukeama numamtuk wajakagtin asagmatai. ¹¹ Etsa jiinku senchi sukuam, dupa kagagmataig yagkujig kakegame, nunik niimé pegkejuch aajakuk megkagama numamtuk, wiyakchak ashí ni takasbaujinak megkaekatnai. ¹² Aents Apajuiyai kajinas anentaimu utugchat ajamash, nunisag emetmamag pujus utugchatan depeteauk shiig aneasagtinai. Nuna ashí depetkauk, Apajui niina aneedaun pujut tuke atinun susatatus anagkuauwa nuna jukiagtinai.

¹³ Makichkitigmekesh utugchatnum jeganjum pegkegchau takastasa wakegamu ajutjamkujaig, Apajuiyap pegkegchau takatan wakemitkajua tiigpajum. Apajuik waji pegkegchau takastasa anentaibaujig at-sugnai, nunin asa nigka pegkegchaun takamtiksatasag aentsnak anentaimtikchauwai. ¹⁴ Makí makichkiti pegkegchau takastasa wakegamu ajutjamaina duka, imá duke anentaimtaku senchi wakegamunum pegkegchauk takau ainaji. ¹⁵ Nunú pegkegchau takastasa anentaibauwa nu takasbaunum tudauk nagkamnawai, tudauwa duke taká pujamuk Apajuijai tuke kanaaku kanamainnum ejekagtawai.

¹⁶ Nunin asamtai mina aneetaig yatsug aidauh, ubag aidauh atumkek tsanumajaigpajum. ¹⁷ Ashí pegkeg aina duka Apajuinumia minawai, nigki nayaimpinmaya etsantin aina nunash najankauwai. Nigka yapajinbaujig atsuuwei, tuke imanisag auwai. ¹⁸ Niina waketajinig niina chichame dekaskea duwi pujut tuke atina nunak sujamsauwai.

Ni najankamu kuashta nuwiyanak, jutiin dekas eme anenjamas midau atinme tujabiajui.

Jisukristu nemajin aidau dutikmain

¹⁹ Nuaduí mina aneetaig yatsug aidauh, ubag aidauh, ashí aents chichainamuk shiig antugkatajum, nuniakjum waugká aimtsuk, nuigtú kajeká aimkatasagmesh wakeyigpa. ²⁰ Aents imanik kajeauk, Apajuí emtinish pegkejan takaak nuniatsui. ²¹ Nuniau asamtai pegkegchau takat ju nugka juwi kuashat ayaa duka idaisatajum. Nuniakjum yamajam chicham jintinkagtuamu atumin uwentijamaina nu un- uimatjatasajum takaajum duka, emematsuk dutikatajum.

²² Tujash chichaman ayatak antinuk amaitsugme, chicham anta- jum dutiksagmek takastajum, nuniachkugmek atumek tsanuumamain asajum. ²³ Chichaman ayatak antin umichu aina duka, aents ispijunum niimama nujai betekai, ²⁴ yamaikik niina niimen diisá, pempeenak kajimatama numamtuk wajainau asag. ²⁵ Tujash pegkegchau takatsuk pujutan, Apajuí chichame jintinjama nuna antuk, kajimattsuk dutiksag umiauk, ni pegkeg takaamujin shiig aneas pujumainai.

²⁶ Atum ainajum anuiya makichik aentskesh: Apajuin umignaitjai, tumamiatak wainak chichaaku akug nigki tsanuumawai, nunin asa ni Apajuin umignaitjai tumama duka wainkayai. ²⁷ Dekas Apajuí umigku, pegkegchau aidauh takatsuk pujusá, Apajuí iina Apajiya nuna emtinish dutikmaina duka: Bitaik aidau, waje aidau waituinakui yayamu, nuigtú ju nugkanmaya pegkegchau aina dushakam takatsuk pujamu aina nuuwai.

2

Wiyakchash ujunauchish betek diistajum

¹ Mina yatsug aidauh, ubag aidauh, atum Jisukristu iina Apuji dekas imana nui kajintsá anentaimaidautigmek, tikich imá eme anentakjum tikichik junik diimaitsugme. ² Ju anentaimsa diismí: Atum ijunja batsatbaunum, aents tsajam uwejen patakumtai oro najanamun patakumau, jaanch dekas pegkejan nugkuaju wayawaintai, nuniai aents ujunauch jaanch mamusuchin nugkuaju wayamtaig, ³ jaanch dekas pegkejan nugkuaja nu eme anentsajum: “Amek dekas pegkeja juwi ekeemsata”, takujum ujunauchik: “Amek anuigkish wajastá, nuniachkumesh wi eketag juwigkish nugká pujustá”, tumainaitjume. ⁴ Nunú wiyakuch eme anentsam juwakum, ujunauch wainkauch diiyakjume, aents aidau etegkeakjum dutikmainaitjume. Atum aaja nuniakjume, pegkegchau takaajume, ashí aents betek eme anentachu asajum.

⁵ Mina aneetaig yatsug aidauh, ubag aidauh antuktajum: Apa- juik ju nugkanmaya aents ujunauch aidauh etegkauwai, mina nemagtuinak, minaig kajinas anentaimainak, mina anentuina duka, nayaimpinmayan wi ditan anagkuauwaitag nuna jukitin atinme tusa. ⁶ Tujash atumek ujunauch aidauh inatsainagme. Wiyakuch aina nuuwai atumin pegkegchau awajtamainak, achigmak jujamkiag apu basatbaunum ejetamaina nunú. ⁷ Wiyakuch aina duke Apu Jisus eme anentsá chichagtaiya nunash pegkegchaun chichajuina duka.

⁸ Atum dekas chicham puyatjusa umimain Apajuinu agagbauwa nu dekaskenum umiakjumeq pegkeq dutikagme, duka ju agagbauwai: “Amijai ijutkau aidaush amek anenmamsam aneeta”, tawai. ⁹ Tujash atum tikich eme anentakjum, tikichia duka junik diiyakjumeq tudau takaakjum nuniagme. Nuniau asajum Apajuí chichame umiktajum tibauwa nu umiachbaunum bakumattagme. ¹⁰ Atum chicham umiktajum tibauwa nuwiya umiayatkujum, makichik umiachkugmek ashí umikchauwa nunin wegagme. ¹¹ Wagki Apajuí chichaak: “Tsanijinawaipa”, tiuwai. Tuja: “Magkagtuawaipa” tawa nunash nigki tiuwai. Nuaduí tsanijintsuk pujayatcum magkagtakmek, Apajuí chicham umiktá tibauwa duka umiatsme. ¹² Apajuí tsawan jegatai aents takasbaujin diisá titina duwik, chicham umiktin tudaunum agkanmitkagma nujai dutikatnai. Nuaduí shiig kuitamamsa pujaku, chichaakuish shiig kuitamsa chichamainaitji. ¹³ Apajuik tikichin wait anenjachu aidaunak, wait anenjashtinai. Untsu tikichin wait anenjau aidaunak, Apajuí tsawan jegatai, aents takasbaujin diisá titina duwi pegkeq diisbau agtinai.

Apajuiyai kajintsá anentaibauk ii takaamunum iwainamainai

¹⁴ Mina yatsug aidaush, ubag aidaush ¿wajinma pegkeq amainaita makichik aents: Minak Apajuiyai kajintsá anentaibauwa nu ajutuí, tayatak pegkeq takata nuna iwainachush? Nunú Apajuiyai kajintsá anentaimjai tawa dukek uwentikmait sui. ¹⁵ Makichik yatsutkesh, nuniachkush makichik umaakesh nugkumainji atsuju, tuja yuwá pujumainjish atsujag, ¹⁶ atum ainajum anuiyatijum suwachiatkujum, ayatak chichamaik: “Shiig aneasam jegaam, jaanch nugkujam, yujumak yuwata”, tumainaitjum dusha ¿wajinma pegkejaita? ¹⁷ Numamtuk Apajuiyai kajintsá anentaimjai tuinayatak pegkeja nuna takainachkug, Apajuiyai kajintsá anentaimjai tuinamujiya duka wainkayai.

¹⁸ Tujash makichik aentskesh tikichin chichajak, amek: “Apajuiyai kajintsá anentaibau ajutuí, tame duka wainkam tu wekaeme, tikich yaigtasam makichik pegkeq dutikachiatcum tau asam. Untsu wi tikich aidaun yaigtasan pegkeq aidaun dutikag duwi, wi dekaskenum Apajuiyai kajintsan anentaimag nuna iwaintuktajame”, tumainai. ¹⁹ Ame: Imá Apajuikeapi najankagtinuk, tusam dekaskeapi tame, nunisag wakan pegkeqchau aidaushkam dekaskeapi tuinak kujainawai. ²⁰ Anentainkachuh, makichik aents Apajuiyai kajintsá anentaimjai tawa nu pegkejan takaachkug, ni Apajuiyai kajintsá anentaimjai tawa duka wainkayai.

²¹ Apajuik Abragnak bakumamainchau diisuí, Apajuí dutikata tibaun betek umikú asamtai. Nuniau asa Abragkak uchijí Isaakan maa Apajuí anagtanak namput awajsachui, Apajuí tibauwa nuna umikta tau asa. ²² Yamai wainmainaitjume, Abragkak ayatak Apajuiyai kajintsá anentaimjai tujakchauwai, nigka dekas umigkauwai. Nigka Apajuí dutikata tibaun nunú betek umiamunum, ni dekaskenum Apajuiyai kajintsá anentaibaujiya duka pegkeq diijam asauwai. ²³ Ni aatus nuniak, agagbaunum tawa nunak umikuí: “Abragkak Apajuinak dekaskeapi tiuwai. Nunikbaunum pegkeq aentsua iman diyaam asauwai, nuigtush Apajuí kumpají” tutai aajakuí.

²⁴ Juajuí atumek dekagme, Apajuí aentsun pegkeja iman diyaa nunak, ayatak niini kajas anentaima duwikik dutiktsuk pegkeg takasbaujinish dutikawai. ²⁵ Nunisag nuwa akiká takatai Rahab daagtin aajakua dushakam, aents dekamatus yujaidaun ni jeen yajuak ikanag, tikich jintanum ishiakua duwi Apajuí pegkeja iman diyaam asauwai. ²⁶ Iyash wakan atsugbauk, jakau asa nuniawai. Nunisag Apajuiyai kajintsá anentaimjai tuina nunú pegkejan takamtikainachkug, aents jakau takatan takamaitsu numamtinai.

3

Chicham pegkegchau ekagta nu

¹ Yatsug aidauh, ashí aents wajuk takasaje nunak Apajuí diijus titinai. Dutikak aents ni chichamen jintinkagtuinayatak, betek umikchajun imá senchi suwimkan susatnai jintintuamu aina nuna nagkaesau. Dutikatin asamtai, atumek jintinkagtin atasagmek imanikjumek wakeemaitsumge. ² Ashí aentstik kuashat pegkegchau takau ainaji. Tuja makichik aentskesh ayatak pegkegnak chichau akug, nunú dekak aents pegkeg amainai, nunin asa ashí pegkegchau wakegamujinash depetmainai. ³ Aents caballonum entsamak wegauk umigtukti tusa wakegakug, caballo wenin makichik jijun apujtin ainawai itajaktinun. Dutikau asa ashí niina iyashinak depeetuk ni wakegamujin emauwai. ⁴ Jushakam anentaimtusjum diistajum, lancha shiig muun jaanch detua wekaetain, dase umpug yajá pempegki emata tutaishkam, ni anunna nu lancha tawagtai piipich aig, duwik tawajus ni dekak wakeesa wegamunum emauwai. ⁵ Numamtuk wajawai iina weniishkam. Iina iyashin wenu awa duka piipich aig, chichaakuik kuashat waji dutikmain chichanui. Jií kaiji piipichitak aja muun ajabaun apegama numamtuk wajawai. ⁶ Nunisag iina iyashiin wenu ajutjama duwi, pegkegchau chichaaku, tikich pegkegchau awagmaji. Nunidau asajin iina iyashinak pegkegchau etugtami. Maanit aina duka chichabai nagkamnawai, iwanchia nunú tikichjai maaniantneme tusa pegkegchaun chichamtijamu asamtai.

⁷ Ashí aents aidautik kuntin kajan aidau, nanamtin aidau, dapi aidau, namak nayantsanum batsamin aidau, ashí unuidau ainaji. ⁸ Iman ainayatkuish iina wenig unuinamait sui. Iina wenig tikima pegkegchauwai, dapi nain tsegasji pimutkamu asa, aentsun esai maina iman jutiinashkam ajutjamu asamtai, tikich aidau, ashí iina chichamenig pegkegchau ebau ainaji. ⁹ Ju wenua juwik Apu iina Apajiya dushakam emematin ainaji. Nu wenua duwik Apajuí aentsun niya numamtinun najanaauwa dusha pegkegchau chichajin ainaji. ¹⁰ Yatsug aidauh, ubag aidauh, juka aajag amait sui. Wenuik Apajuí emematku, nu wenuik tikich pegkegchau chichajuk wajamait sui. ¹¹ Yatsug aidauh, jushakam anentaimsatajum: Yumi pukuni jinbaunmag yumi yumiimitu, yumi yapaujaig jinmait sui. ¹² Tikitchakam anentaimtustajum. Bataega duka kamanchá nejeenak nejemait sui. Nuiqtushkam wee pajanbaunmag, yumi umumainuk jinmait sui. Nunisag aents pegkegchau aidau chichaina duka, chicham pegkegchaun chichayatku pegkegjaig chichamait sui.

Dekas yachameta nu

¹³ Atum ainajum anuiyash, ¿yaita dekas pegkejan pegkegchauwa nujai akanag shiig dekaush? Nunin akug emematsuk pujak, shiig kuitamamas pujamujin ni dekamujinak iwainamainai. ¹⁴ Atumek tikich nagkaesau atasa wakegamunum kajeagme. Nuniau asajum pegkeja imanuk anenmamaitugme, dekaskea duka shiig dekachu asajum. ¹⁵ Apajuí dekamtikbau aidauk tikichin kajejin, nuigtú emebauk amaitsui. Nuna nunia duka Apajuinumian deka nuniatsui, duka aentsnumia, nuigtú iwanchnumia minawai. ¹⁶ Nuniau asantai aents tikichin nagkaesau atatus wakegaidauk, shiig antugdaikag batsamsuk, utugchatan aputunisag maaninak, ashí pegkegchau aidaunash takau ainawai. ¹⁷ Aents Apajuinumian dekatan jukiú aidauk, pujutji pegkeg, tsuwat chichaman dakitin, kakagchauch, wait anenkagtin, pegkejan takau, ashí aentsun betek eme anentus diin, waitjuchu, ni anentaibaujiya nunash dutiksag dekaskenum chichau amainai. ¹⁸ Nuniak pegkeja nuna takainak, tikich aidaujaish shiig agkan anentaimesag pujuinak, maanitnak dakitin amainai.

4

Ju nugkanmaya pegkegchau aina duka tupanjatajum

¹ ¿Wagka atumesh ayatak jiyanitak batsamtakjumesh tutit chichamash batsamtajume? Duka pegkegchau anentaimat ajutjamu asantai nuniagme. ² Atumek atum wakegamu jukitakamajum jumainchau dekapeakjum magkagtagme, tuja tikichin wajiiji wakejakjum jujuktakamajum jiyaniakjum, maaniakjum chicham aepeajume, nuniakjumesh atum wakegamuk juwatsjume. Tujash atum juwatsjum duka, Apajuinumia segachu asajum aniagme. ³ Segakjumesh juwatsjum duka, Apajuí wakejamu takatsuk, atum wakejamu takaakjum, shiig aneasta tau asajum suwam ainatsjume. ⁴ ¡Aents Apajuí chichamen umigchau aidauh! ¿Atumek dekatsjumek, ju nugka juwiya wajiin imá senchi wakejauk Apajuin shiwaji wega duka? ⁵ ¿Atumek Apajuí chichame agagbaunum: “Apajuí chichaak: Wi susauwaitjai mina wakanjun ditai pujustí tusan, dutikau asan ditan aneakun akasmattsan kuitamjai”, tusa tu agagbauwa duka pyatjusjumek antuugsugmek? ⁶ Dekaskenmag agagbaunum tawa nunisag, Apajuik shiig senchi anempaji: “Apajuik aents imanchauch anentaimtumin aina nuna shiig anentus yayaak, aents emebau aidaunak shiwagmá yaitsuk idaiwai.”

⁷ Apajuiaig sumitkau atajum. Iwanch tsanugmainakuish antugkaipajum, nuniagminig wegak ukugmaktatjume. ⁸ Apajuiaj ijutkau atajum, nuniagmin niishkam atumjai ijutkau atatui. Atum tudaugtin aidautigmeshkam tudaujum idaisatajum, atum Apajuí umigkatasa wakegayatkujum, ju nugka juwiya waji wejuidautigmek, duka idaikum imá Apajuik nemagkatajum. ⁹ Shiig aneasjum dushit batsamtut-suk, atumi tudaujum pachisjum, Apajuí tsagkugtugti tusa segakjum, wake besemag batsamsajum senchi buuttajum. ¹⁰ Ame, amek anentaimtumasam: Wika dekas tudau asanuap Apajuí diismak tikima wainkayaitja, tutaik dekas aents iman etamtatui.

¹¹ Yatsug aidauh, ubag aidauh, tikich Jisukristu nemajin aidauk pegkegchaunmag chichagkaigpajum. Nuna nuniauk Apajuí chicham umiktajum tibauwa nunash pegkegchau chichajak nuniawai. Tuja

chicham umiktajum tibauwa nu pegkegchauwai tusam umiachkumek, apu chichama epegna nunin wegamae. ¹² Imá Apajuiya duke aentsun: Juuwai pegkejak, juuwai pegkegchauk tusa etegmainuk. Nigki chicham umiktinnashkam sujamsauwai, uwemtijamtanash nigki uwemtijamainuk. Tuja suwimkanashkam nigki sujamainuk. Aajaya nunin aish, ¿wagka amesh niya ibaunigkish aents aidaush: Auk pegkegchauwai, juuwai dekas pegkejak tusamesh etegkeame?

Wají sujin aidau chichagbau

¹³ Tujash yamai atum waji sujin aidautigmin titajime. Atum chichaakjumek: “Yamai, nuniachkunush kashinkesh tikich yaaktanum wetatjai, nui makichik mijan pujusan wajiin sujukan kuashat kuichkin ikaugkatasan”, tajume. ¹⁴ Tujash atumek aajagmek chichamaitsugme, wagki kashinish wajukattagmeki duka dekachu asajum. Iina pujutjiya duka, kashikmas yujagkim utsaana, machik asa megkagama numamtin asamtai. ¹⁵ Dekas atumek nu tutak idaikujum: “Apajui wakegakuig, iwaaku pujakuik nu dutikami”, tumain ainagme. ¹⁶ Tujash atumek ememasa chichaakjum: “Nuna dutikatjai, nunash dutikatjai”, tajume. Tusá ememasa aanin chichamuk pegkegchau ainawai. ¹⁷ Atum pegkeg takata nu dekau ainayatkujum betek umiachkugmek, duka tudau wegagme.

5

Wiyakuch aidau chichagbau

¹ Wiyakuch aidauh antuktajum, buuttajum nuniakjum senchi chajat-tajum, wajiijum megkaejamtai kuashat waittsagtin asajum. ² Atumin wajiigmik mamukagtinai, nunikmatai atumin kutujum dekas pegkeg aidaushkam kabau tsupiam agtinai. ³ Atumi orogmek, ashí atumi kuichkigmek pushugkaje. Nunú iwainaktinai atum tikich yaitsuk imá atumdauk anentaimitusjum ijumajakuitjum nuna. Nuniau asa atumi wajiigmea duke pempeentugmaki, jiiyai apemaina numamtuk awajtamkatnai tsawan jegatai, Apajui aents takasbaujin diijus titina duwi. ⁴ Aents takau aidau atum shiig akikchamu asag, kuashat pampaina nuna Apajui ashí senchigtin nayaimpinum puja nunú antawai. ⁵ Atumek ju nugka juwi pujusjumek, kuashat shiig pegkegnum pujusjum dakujuinagme. Atumek aents bakagtin bakajin maa sujuktatus udegama numamtin awajkamu asajum, Apajui suwimkajig jukitnaitjume. ⁶ Atumek aents pegkeg aidauk ayamjumamainchau emajum, maatnume tusajum inamin ainagme.

Waugtukaigpajum

⁷ Tujash atumek mina yatsug aidauh, ubag aidauh, Jisukristu minitnujiya duka waugtutsuk dakastajum. Ju shiig anentaimitusjum diistajum: Aents ajakan ajakbauk waugtutsuk dakauwai, yumi yutug nugkan iminkati tusa. Nunikmatai ajakan ajaká, shiig tsapai nejekmatai juukta tau asa. ⁸ Jumamtuk atumshakam Apu Jisukristu taatnujig waugtutsuk dakastajum. Niini dekaskeapi tiuwaitjum duka nunisjumek pujustajum, ni minitnujig namputchí wajaschae.

⁹ Yatsug aidauh, ubag aidauh, tikichnashkam titajime. Tikich aidaujaish kajegdayakjum augmatjunigpajum, Apajui suwimkan sujamsainum. Wagki Apajui aents takasbaujin diijus titina duka

namputchí wajaschau asamtai. ¹⁰ Mina yatsug aidauh, ju anentaimsa diistajum. Duwik Apajuí etsegtujakajua duka kuashat waituinakush, waugtutsuk pujusag, Apajuí chichamenak etsejajakajui. ¹¹ Dekainaji nu Apajuin waugtutsuk takajajakajuk, yamai shiig aneasag batsataina nu. Job pachisjumshakam atumek antin ainagme, nigka kuashat waitiakushkam Apajuiyaig anentaimajakuí. Nuniku asamtai, Apajuí ataktú ni duwik ajujakbaun nagkaesau susauwai. Juwi dekainaji, Apajuik jutiinash anempau asampap wait anenjamawa tusaja.

Suwimak jukijum dekaskea duke chichaktajum

¹² Yatsug aidauh, ubag aidauh, amina nagkaetamsau adaisam: Wi dekas dutikattajai taja nunak, ni diigkau atí tajume. Nu iman adaisa tachakjumesh nayaimpinmayagkesh, nугá pujuidaukesh, ashí tikich aidaukesh pachisjumek tiigpajum. Dekas imá pegkejak chichaakjumesh waitjutsuk, ehé takugmek ehé titajum, atsa takugmeshkam nunisjumek atsa titajum Apajuí suwimkan sujamsainum.

Apajuijai chichaamu

¹³ Aents utugchat ajamuk Apajuin augmainai, untsu ni shiig aneas pujauk, kantamak Apajuinak emematmainai. ¹⁴ Atum jaakjumek Jisusa nemajuidaun diin aina nu untsuktajum, dita tajutjamawag aceitiyai buukmin aputugmak Apajuin aultugmastinme. ¹⁵ Dita Apajuiyai kajinas dekas etsagagtatuapi tusa aultugmainamunum, Apajuí etsaentamjattagme. Tuja tudau takasbau ajutjamtaish, Apajuí tsagkugtamjattagme. ¹⁶ Nuaduí atumek pempeentunikjum pegkegchau awagdaikau akugmesh, tsagkugdaijami tusajum seganiakjum, pempeentunisjumek Apajuí aultunistajum. Aents pegkeja nunú Apajuí augbaujiya nunak dutiksag Apajuishkam antujui. ¹⁷ Ju anentaimtusagmi, Apajuí etsegtin Elías aajakua duka, jutiiya juninuk aajakuí. Nunú Apajuin aujsauwai kempatum mijan, nuigtú seis nantu yututsuk asati tusa. Nu segamujig imanisasg yututsuk asauwai. ¹⁸ Imaan mijadai yututsuk aun, Elías ataktú Apajuin aujsauwai yumin yutumtijati tusa. Tima Apajuí yutumtijamtai ajak aidaushkam nagkamdauwai nejetan.

¹⁹ Yatsug aidauh, ubag aidauh, makichik aentskesh shiig pegkegnumak pjuwaitak, nu pujutan idayak Jisukristun tupankuig, atum aidautijum yaimainaitjume, nuna nunitsuk shiig pujustí tusajum. ²⁰ Jushakam dekamainaitjume, makichik aentskesh tikich aents pegkegchaunak wekaetaun yaigká, ataktú pujut pegkegnum awaitaik, Apajuí nu aentsun tudaujinak ashí tsagkujug, ni wakanin megkaemainnashkam uwemtijatnai. Juka kajimatkiigpajum.

PEDRO NAGKAMCHAKU PAPI AGAGBAU

Pedro kumpamkagtau

¹ Witjai Pedroitjai, Jisukristu chicham etsegtugkata tusa awemamuitjai. Junak atum mina pataag judío aidautijum nugkem ukuakjum pampagjum nugka Ponto, Galacia, Capadocia, Asia, Bitinia aina nui batsatutigmin agatjime. ² Apajuí iina Apajiya nu, duwik nagkamas dutikata anentaimtusbaujiya dutiksag etegtamjajui. Dutijama Jisukristui dekaskeapi tabaunum Wakaní Pegkejin sujamsauwai. Jisukristu mantamnak numpen ukajua duwi, iina tudaujinig Apajuí emtinish bakumamainchau pegkeg etamkauwai, imá minak umigtuktinme tujamu asa. Atumnash Apajuí shiig senchi anempa ibau asa, shiig agkan anentaimsa pujutan amastinme.

Pedro Apajuí see tibau

³ Emematiagmi Apajuí, iina Apuji Jisukristua nuna Apají, iina senchi wait anenjama nuaduí. Ni yamajam pujutan sujamsauwai, iina Apuji Jisukristu maamuitak ataktú anean nantakiu asantai. Nuaduí pujut tuke atina nu juwaku ashí Apajuí nayaimpinum umigtamkamua dushakam jukitasa dakamu ajutjamui. ⁴ Nu ii jukitna duka tsaitash tsaimaitsui, mamutnash mamumaitsui, tsuwatash wechatnai, yagkug kagaama nunikchatnai. Ashí pegkejak agtinai nayaimpinum pujutak. ⁵ Nuigtushkam Jisukristui kajintsá anentaimaidau asajin, Apajuí niina senchijin kuitamjamui, tsawan nagkantina duwi Kristu wantintai, uwemat tuke atina nuna jukitin atinme tujamu asa.

⁶ Nuniktin asantai atumshakam ju nugka juwi wajumak tsawan pujuttajum duwi, kuashat waitiamu ajutjamainakuish shiig aneasjum pujustajum. ⁷ Atum aaja waitiamunum Apajuiyai kajintsá anentaimainajum nu dekapsamu asantai, Jisukristu taatna duwi dekas eme anentsá diyaaku, nuigtú ememattsá diyaam atinaitjume. Oronum pegkegchau peetkau ajapna ayatak orok juwakti tusa, jiiyai apeamu shiig pegkejama nuna nagkaesau wegawai, atum Apajuiyai kajintsajum anentaimjum duka.

⁸ Atumek Jisukristuk wainkachu ainayatkujum aneajume. Yamaikish wainchayatkujum dekaskeapi tabaunum shiig aneasjum dakunkut pujagme, nunú dakujamu iman ajutjamaina duka, nuní dakunkut dekapeamu ajutui tusaish chichamaik shiig tumaitsui. ⁹ Atum dakunkut pujuinajum duka, Apajuí uwemtijamjatna nunú dekau asajum nuniagme. Nuniau asajum niini kajintsá anentaimjume.

¹⁰ Duwik Apajuin etsegtujakajua duka: Apajuish aents tudau aidaunash wajuk uwemtijatnukita tusag, dekaatatus anentaimtujakajui. Ditak Apajuí atumin wait anenjamag uwemtijamjatna nunak dekaidau asag: Dusha uwemtash wajuk atinkita, tusag shiig dekaatatus wakegainak kuashat anentaimsau ainawai. ¹¹ Wakaní Pegkejiya nu dítai pujau asa ichachinam, Jisukristu waitus jaka nantaktinashkam pachis agajajui, ditak: Nunú aents waittsatnush yaki atinaita, dusha wajutik nunikti, tusag dekaatatus senchi wakegajakajui. ¹² Nudiagtai Apajuí dekamtikauwai, atum juwi pujagminig nunikchatnai, duka

atak tikich batsamtina nuaduí nuniktinai tusa. Nuna yamai Apajuí chichamen etsejin aina nu atumnak, Wakaní Pegkeji senchijin ujpainawai, Jisukristu nayaimpinmaya awemamua nunú uwemtijamainai tusag. Juka senchi wakejumainai, nayaimpinmaya aentskesh shiig dekainachu asag dekaatatus wakejuinawai.

Jisukristu nemajin aidau batsaamain

¹³ Ju dekaidau asajum, shiig umintsajum aneaku imagnisjum pujusjum Apajuí dakastajum, nigki wait anenjamu asa, Jisukristu minitai ashí sujamsatin asamtai. ¹⁴ Apajuí uchijí asajum umigkatajum, atum duwik Apajuí dekachu asajum pegkegchau takajakuitjum duke batsamtutsuk. ¹⁵ Duka nunitsuk, Apajuí atumin etegtamjawa duka pegkejam asamtai, atumshakam pegkejam amainaitjume, ashí atum wajuk pujagme nuwishkam. ¹⁶ Apajuí chichame agagbauwa nui: “Wi pegkejam asamtai, atumshakam pegkejam atajum”, tawa duwi.

¹⁷ Atumek Apajuiya nu: “Apawah”, tajume. Nuniau asajum, ju nugka juwi pujusjumshakam, nigka ajantusjum diimainaitjume. Apajuik aents aidau takasbaujinak betek dita wajuk takasuk ainawa dutiksag suuwai, makichik aentsun imá senchi wait anentsuk. Nuaduí shiig pujumain ainagme. ¹⁸ Atumek atumi muunjum wainak batsamajakua nuninuk batsatutijum uwemtijamu ainagme. Atumek, waji besen oro, kuichik aina nujaigkish akikmatka uwemtijashbauwaitjum duka shiig dekagme. ¹⁹ Kristu achinag jaak, uwig makichkish pegkegchauji atsujun maajakú aina numamtuk, niina numpe pegkegman ukajua duwi, akikmatka uwemtijamu ainaji. ²⁰ Nunak Apajuí nulkash najannatsaig, Jisukristu nunikti tusa tiuwai. Duwik tibaun imapam yamaya juwi nunak umiké jutiin anempau asa. ²¹ Atumek Kristui kajintsá anentaibaunum Apajuiyaig dekaskeapi tajume. Nigka jakau aig Apajuí inanki, niina inamtaijiya nui Apu ema apusauwai. Dutikau asamtai niini kajintsá anentaimekum dakaidautigmek, Apajuí anagtabauwa nunak dekas imatiksagkeap amastatua tumainaitjume.

²² Yamaik atumek chicham dekaskea nu umiau asajum, tudaush idaisau ainajum duwi, atumi yatsum aidaujaish dekaskenum aneeniamunum, pempentunisjumek aneeniajum duka nunisjumek aneenitajum. ²³ Apajuinu chicham pegkeja duka tuke atinai. Atum dekaskeapi tiuwaitjum duwi, pujut tuke atina nu ajutjamjume. Nunú pujut Apajuinumia jukimua duka nagkankashtin tuke atinai, iina apaji akimpauwa nu sujamsamua nuninchau asa. ²⁴ Apajuí chichame agagbau:

“Ashí aents aidauk tuke dupa ainawai,
aantsag aentsú imanjishkam yagkugjai betekai,
dupa kagatai yagkujishkam kagajá kakegama anmamtinai aentsú
pujutji aidauk.

²⁵ Tujash Apajuí chichamega duka nuninchauwai,
tuke atakea duwish atinai”, tawai.
Apajuí chichamega duka, Jisukristui uwemtijamainuk tusa etsegkamua nuuwai.

2

Kristuwai kaya tuke pujuwa imanuk

¹ Nuaduí idaisatajum ashí pegkegchau aidau: Waitjut, tikichdau diigsá wakejaku kajejut, wainka tsanumku pegkeja iman iwainmamat, tikich pegkegchau pachittsa augmatut aina dushakam. ² Nuniakum uchi yamá akiintsau muntsun muntsuatatus senchi wakejuwama numamtuk, Apajuí chichame shiig pegkeja nu wakejitajum. Nujai wakanmin tsakaakjum uwemat jukimnujum. ³ Atumek Apu Apajuí pegkeg asa yayijatna duka, dekapsau asajum shiig dekagme.

⁴ Kristu “Kaya tuke pujuwa imana” nujai ijutkau atajum, nunú kaya numamtina nuna Apajuí tikichin nagkaesau emauwai, tujash aents aidauk dakitug idaisajui. ⁵ Atumshakam Jisukristu aentsji wajasugme, Wakaní Pegkeji jukiú asajum. Nuaduí Wakaní Pegkeji wakega duke takaakjum, ashí Kristu nemajin aidaujai ijuntsajum Apajuiyai sumitkau atajum, Apajuí ememattai jega* jegamkamua numamtin atasajum. Nunú aaja nuniakjum Apajuik shiig awagmamainaitjume. ⁶ Apajuí chichame duwik agagbauwa nuwishkam:

“Shiig puyatjusum antuktajum, wi Siognum† apusattajai makichik aentsun,
kaya dekas shiig pegkeg etegka, jega jegamku aputuatasa atsumtayama iman atinun.

Nuanuí kajinas ekeemsaju aidauk, dita kajintsá anentaimtusbaujinak makichkish wainkag juwakchatnai”, tawai.

⁷ Atum niini kajintsá anentaimaidautigminig, Jisukristui dekas ashí aents aidau nagkaesauwa duka. Tujash niini kajinas anentaimainatsu nunú aidau mag, agagbaunum ditan pachis tawa nunis-agke:

“Aents jegá jegamin aidau kayá ajapawajua nunú, kaya dekas jegá ichichkatin apujtutia iman wajasé. Nunú dutika dakitjamua nu atatui ashí tikich aents aidau nagkaesauk.”

⁸ Tikich chicham agagbaunmash juna pachis chichaak:
“Nunú kaya nunak kuashat aents tukumak iyajagtinaí” tawai. Nunak dita Apajuí umijuinachu asag, suwimkan jukiagtin asag nunik-agtinaí.

⁹ Tujash atumek Apajuí mina uchig atinme tusa etegjamu ainagme. Atumnak ni etegtamjau asa sacerdote etamkajui Apú takajin atinme tusa. Jutii pegkegchaunum batsatjin Apajuí jii gmajui. Dutijamau asamtai, Apajuinu dekas chicham pegkeg shiig anentaimtująish tumainchauwa nuna etsejuinak pujustinme tibau ainaji. ¹⁰ Atumek duwikik Apajuí aentsji aajakchawaitjume, tujash yamaik Apajuí aentsji waigkugme. Tuja duwikik Apajuí wait anenjachbau aajakuitjume, tujash yamaik atumnash Apajuí wait anenjamjaje.

Apajuí nemajin asá pegkegnum iwainmamain

¹¹ Aneetaig yatsug aidauh, ubag aidauh, jutii ju nugka juwiyachu ainaji. Nunin ainag duwi tajime: Wait aneasjum iina iyashí pegkegchau wakegamua duka takaa batsamtigpajum. Iyash pegkegchaun wakega nunak, iina wakanig dakitawai. ¹² Aents Apajuí nemajuinatsu nujai shiig kuitamamsajum pujustajum. Atumnak

* 2:5 Jega Apajuí ememattain jegamainakug tikich aidauk kayan ekenag jegamin ainawai, numamtinun jutii Apajuí nemajin aidautin tujamui. Tujash jutii kayajai jegamchau asá, kaya pachisaik tatsuji. Juka shiig anentaimsajum ausatajum. † 2:6 “Sión” tawa duka diistá Ro. 9.33.

yamaik aents pegkegchauwa iman chichagtamainawai, tujash tsawan jegatna nunú tsawantin atum pegkeg takasuitjum nuna diisag Apajuinak emematiagtinaí.

¹³ Apajuí nemaju asajum nugkanmaya apu aina nuna apujin sumimkatajum, Apajuin pegkegchaun chichagkainum. ¹⁴ Aikasjumek apú atuwe aina dushakam antugkatajum. Wagki ditak aents pegkegchaun takaina nuna suwimkan suwak, pegkejan ayamjukti tusa adaikamu ainawai. ¹⁵ Apajuik wakegawai pegkejan takastinme tusa, nuna wainainak aents anentainkachu aidaush atumin pegkegchau chichagtamaina dusha itatkatnume tau asa.

¹⁶ Aents chicham umiktá tibauwa nui agkanmitkamush wajuku amainaita nunisjumek pujustajum. Nunú chicham umiktá tibauwa nuwig agkantaitjai tusam pegkegchau takastasa wakeetsuk. Dekasken-mash Apajuí nemagnush wajuku amainaita nunisjumek shiig pujustajum. ¹⁷ Ashí aents aidauk ajantusjum diyakjum, Jisukristun nemagkaju yatsut aina dushakam aneetajum, Apajuishkam ajantusa diyakjum, ju nugkanmaya apu aina nuna apujishkam ajantusa diistajum.

Kristu waittsauwa nunisaik waitmain

¹⁸ Inak aidautigmesh atumi apujum shiig ajantusjum diyakjum umigkatajum. Apu pegkeg aina imá duke umigkatasa wakeetsuk, tikich apu pegkegchau aidaushkam umigkatajum. ¹⁹ Atum pegkegchau takasbauk atsugtamaig waitkagmainakuish, Apajuí nemajin asajum katsunjatajum. Duka Apajuinak shiig awagmawai. ²⁰ ¿Wají pegkejaita ii pegkegchau takasbaunum suwimak juwayatku katsuntajai tabaush? Pegkeg amainai, ii pegkegchau takaschamunmag suwimak juwaku, kajetsuk emamkesa katsuntamua duka Apajuin shiig awagbau asantai. ²¹ Kristuk jutii waittsatnun iwaintugmak waittsauwai. Nuniku asantai Apajuí jutiinak etegtamjauwai, ditash Kristu waittsauwa nunisag waittsatnume tusa. ²² Kristuk makichkish tudaunak takaschauwai, waitjut-nakesh waitjuachui. ²³ Pegkegchau chichagmashkam nigka dutiksag iikag tichauwai. Waitkamshakam iikmakchauwai, Apajuin idaitusui ni dekas dutikati tusa. ²⁴ Kristu numinum achinag jakauwa duwi jutii tudaujinak akikmatjamkauwai. Nuniku asa nigka wakegawai, tudau takatnak idayinak shiig batsamsag pegkeja nunak takastinme tusa. Niina iyashí asutiam tsupinjauwa duwi pegkeja duke takamainaitji, pegkeg pujustasa. ²⁵ Atumek duwikik uwig kuitamkachbau wainak yujama numamtuk yujajakuitjume. Tujash yamaik Jisukristua nuuwai atumin kuitamjamak ayamjutpa duka.

3

Nuwentin aidau nuwejai umigdaimain

¹ Atum nuwatkamú aidautigmek atumí aishuminig sumimkatajum, Apajuí chichame etsegbaun aishum dekaskeapi tuinachushkam, atum shiig pujamun waipainak, nuniktajum tachamaitak dekaskeapi titinme, ² dekaskenum Apajuí umigkujum imagnisa pujau asagmin. ³ Atumek jaanch pegkeg iwajamu aina ibau nugkugjum iwagmamjatasagmek wakemaitisugme. Intashmesh tikich pegkeg diigsatnume tusagmek iwagmaitisugme, nuigtú oro aina imanjai iwagmamjatasagmesh wakemaitisugme. ⁴ Dekas iwagmamta duka pujut pegkeja nuuwai, nunin asantai atumek nuwa kakagchauch tutitjachu

amainaitjume, nuna Apajuik wakegas diiyawai. ⁵ Nuwa pegkeg duwik batsamajakajua dushakam, Apajuiyaig kajinas anentaimaidau asag, imá aishinig sumimajakú ainawai. ⁶ Sarashkam nunisag Abragnak umijak mina apug tujakuí, emematus anentau asa. Atumshakam pegkeg takaakjumek, Sara nawanjiya numamtin ainagme, nunin asajum makichkish puyatkas pujumainaitjume.

⁷ Aishmag aidautigmeshkam nuwemjaig shiig antugdaikajum pujustajum, nuwak kakaakchau asamtai. Apajuishkam nuwanash wait anentau asa pujut nagkanchaun susauwai. Atum nuwemjai shiig pujushtaik, Apajuishkam ni augmash antugtambachagtatui.

Kristu nemajuidau nunimain aidau

⁸ Aatsa nuniakjum ashí betek nuninuk anentaimkau, puyatjus anentaimtunin, yatsut anendayas aneenin, wait anenkagtin, nuigtush ememachu atajum.

⁹ Pegkegchau awajtamainakuish dutiksagmekek iikaigpajum, pegkegchau chichagtamainakuish dutiksagmek chichagtsuk pegkegnum ausatajum. Jutiinak Apajuí pegkegnum yaimpaktatus etegtamjau asamtai, tikich aidaush pegkegnumag yaimainaitji.

¹⁰ "Ni shiig aneas dakujus pujustatus wakegawk, pegkegchau chichatnak,

waitjutnashkam idaimainai.

¹¹ Pegkegchau takat aina duka idaisatajum,

nuniakjum pegkeg aina duke takastajum.

Nuniakjum shiig agkan anentaimsa pujustasajum wakeetajum.

¹² Apu Apajuik pegkejan takaina nuna kuitamak

dita augmash antujui,

untsu aents pegkegchaun takaina nunak dakitawai."

¹³ Atum imá pegkeja duke takaagminig, makichkish pegkegchau etamainuk atsawai. ¹⁴ Tujash atum pegkeg takaakjum waitiakjumek shiig aneastajum. Tuja pegkegchau awajtamainakuish ishamkaigpa.

¹⁵ Apu Kristuwa nu puyatjusjum ememattajum, nuniakjum tikich aents: ¿Wagka Kristush nemagjume? tujamkuish atum Kristui kajintsá anentaimkujum dakainajum nu ujamainush shiig umintsau atajum.

¹⁶ Tujash niishkam ajantusjum diyakjum, kagkagchauch shiig chichatajum. Atumek pegkeg takat dekajum duke takau atajum, nuniagmin tikich Kristu nemajuinachu pegkegchaun chichagtamaina nu datsajagtatui.

¹⁷ Dekas pegkejai, Apajuí atumin pegkejan takainak waittsati, pegkegchau takaaku waitmaina nuna tusa wakejutpakuig waitmainaitjum duka.

Jisukristu iina iwaintugmak waittsamu

¹⁸ Kristushkam makichkia jakauwai ajumaish jakashtinun iina tudaujin tsagkugtamjatatus. Nigka machikish pegkegchau ni waitmainjig atsugmaitak, Apajuijai igkumtijamkata tau asa pegkegchau aidaunum waittsauwai. Iyashinig dekas jakauwai, tujash niina wakaninig jakachui.

¹⁹ Nunik jakashkam aents jinaw wakaní tuke achikbaujai betek batsatbaunum weuwai, chichaman etsegkatatus. ²⁰ Apajuí Noen tiuwai: Arca najanata. Tusa tima arcan najana ayatak ocho aents uwemkajui.

Nunikmatai tikich aents chichaman umikchaju aidauk ashí jakekajui. Jujú jakekú aajakaju aina nuna wakanin

Jisusak wejiuwai ujaktatus. ²¹ Nunú yumia duka Noejai batsatunak ajekjachajui, numamtuk Jisukristu aneantua nujai ijutkau pujamunum uwemjau ainaji. Jutii yamiimainag duwi Jisukristujai ijutkau pujamua nu iwainmamainaji. Yamimamua duka iyash pegkeg emá uwemjata-saik yamimantsui. Jutiik Jisukristu mantamdauwa nui dekaskeapi tabaunum uwemkau asaja, Apajuí emtinig bakumamainchau ainaji. ²² Yamaik nigka nayaimpinum waka, ashí nayaimpinmaya aents aidaun Apuji wajas, nuigtú wakan senchigtin nayaimpinmaya aina nunash Apuji wajasá, Apajuí inamtaijin untsujin eketui.

4

Jisukristu pujusua nunisaik pujumain

¹ Kristu juwi pujusá niina iyashin waittsauwa nunisjumelek atumshakam waitmainaitjume. Wagki iyashnum waitiamua duka, tudau taká takaakua wetanmag dakitmitkagbau asamtai. ² Wajupa tsawanta ju nugka juwi pujuttaji duwik, pegkegchau takatak anen-taimtú batsamtsuk, Apajuí wakegamua duke takamainaitji. ³ Maake yamaik, yaunchuk Apajuí nemagchau asagmek, atum pegkegchau wakegamu wakejusjum takaakjum, tsanijimta duke tunamatjajum batsamtakjum, umutchakam imanik nampektasajum umakjum, nam-pekjumesh jiyá jiyanitjai yu wajakuitjume, nuniakjum Apajuí daki-tamua nunú apajimat batsamtujakuitjum duka idaisatajum. ⁴ Nunú nuniajumina aents atumjai pegkegchaun takajakú aidauk, atum ditajai ijunja pegkegchau takat dakitamun waipainak: ¿Wagkag yamaish jutiijaish ijuntsua? tusag pegkegchau chichagtamainawai. ⁵ Tujash Jisukristu, aents jakau aidau, iwaaku aidaujai dekgagbau atina duwi, dita takashaujinak diisá titinai. ⁶ Nuadui Apajuí chichameg aents jakaja dushakam ujakbau ainawai. Aents iwaaku pujusá dekaskeapi tiu jakau aina duka, wakaninig Apajuí tuke pujuwa nunisag pujustin ainawai.

⁷ Tsawantak jegawai ashí waji aina nunú nagkankatnuk. Nuadui atumek emetmamajum aneaku pujusjum, Apajuí aujú batsamtajum. ⁸ Tuja juna nagkaesauwa nuuwai puyatjunisa pempeentuniki aneenita duka, aneenita nujaiyai kuashat pegkegchau aidauh pempeentuniki tsagkugdaimaina dushakam. ⁹ Atumi jeemin ayam-satatus minakuishkam, shiig anentsajum awayatajum pegkegchau chichagdaitsuk. ¹⁰ Makí makichik ii yupichu dutikatnun Apajuí anenjauch amasajua nujai, tikich aidauh yaigtajum. Atumnak Apajuí wait anenjamu asa, ashí ni amasbauwa nunú shiig kuitamsajum takamain ainagme. ¹¹ Apajuí chichame etsegkugmesh, niina chichame tawa dutiksagmek etsegkatajum. Tikich yayakjumesh, Apajuí atum yupichu dutikatnun amaa nujai yaigtajum. Nunú aajajum dutikakjum Jisukristu yaimpasmatai, Apajuí ajumaish tuke imanuk senchigtin, imá nigki atina nunú ememattajum. Aatus atí.

Kristu nemajin asá waitmain

¹² Mina aneetaig yatsug aidauh, ubag aidauh, atum Apajuiyai kajintsá anentaimjum nuna, dekaskeash nuninait tusa dekapjabaunum waitiamu ajutjamainakuish, tikima waji nagkaechataiya imanuk anen-taimtú pujuigajum. ¹³ Ayatak shiig aneastajum Kristu waittsamua

nunisjumek waituidau asajum, ni imanjjai wantinkatna duwi imá shiig anejasum dakunkut pujustin asajum. ¹⁴ Atum Kristu nemajin asagmin, pegkegchau chichagtamainakuish, shiig anejasum pujustajum. Wakani Pegkeji dekas imana nunú atuminig pujau asantai.

¹⁵ Nunin asantai makichkitigmekesh magkagtin, kasa, pegkegchau takau, tikichin pegkegchaujin yujajuinak waitú yujau aina nunin aigpajum. ¹⁶ Atumek Jisukristu nemajuidau asajum waitiakjumesh datsaamtsuk, Apajuishkam shiig anejasum emematmainaitjume nu waitiamua duwi.

¹⁷ Apajuí aentsji aidauti waittsatnuk yamaik nagkamnae, aatus nu jutiiní waitiamu nagkamna aniaish, Apajuí chichamen uminatsu dusha, ¿wajuk nagkankatnukita? Ditak shiig senchi waittsatin ainawai. ¹⁸ Jisusa nemajuinak uwemkau pegkejan takaidaukesh waituina nuniaish, jaents Apajuin dakitin pegkegchau takau aidaush wajukatnus aina! ¹⁹ Nunin asantai, atum Apajuí waittsati tusa wakejupamunum waitiakjumesh, ayatak pegkeja duke takatajum. Nuniakjum Apajuí iina najapauwa nu, ni tibaujinak imatiksag umina nu, atumi wakanmishkam idaitustajum.

5

Jisusa nemajuidaun diin aidau, datsauch aidaujai chichagbau

¹ Yamai atum Kristu nemajuidaun diin aidautigmin, wishakam Kristu nemajuidaun diin asan tajime. Kristu waitkasa maamunash wi dekas mina jijuí shiig wainkauwaitjai, nuniku asan dakajai, ni juwi taakui dekas pujut pegkeg iman atina nu jukitnaitag nuna. ² Jisukristu nemajin aidau shiig kuitamkatajum, uwijá kuitamin aidau uwigjin kuitamin aina imatiksajum. Tikich inapakui kuichik jukitasa takamainaitam nunitsuk, shiig wakejusjum Apajuí wakega dutiksagmek takastajum. ³ Atum wagagsajum chichagkatasagmek wakeyigpa, nunitsuk atumin pujutjum pegkeg iwaintuktajum. ⁴ Atum nu betek dutiksagmek umiakjumek, Kristu dekaskenum uwijá kuitamna nunú minakui, waji shiig pegkeg tuke atina nu jukitnaitjume.

⁵ Antsagmek datsauch aidautigmeshkam, Jisusa nemajuidaun diin aina nui sumitkau atajum. Ashí atum aidautigmek emematsuk, tikich aidaujaish pentunisjumek sumimdaimain ainagme, wagki: "Apajuik aents ememachu aidau wait anentug yayaak, emebau aidau nak yaitsuk idayu asantai."

⁶ Apajuí dekas senchigtina nuna emtinig imanchauch anenmamtajum, ni tsawan jegatai iman etamtin asantai. ⁷ Ashí atum uyumamugmik Apajuí idaitustajum, ni atumnak kuitamjamu asantai.

⁸ Aneaku niimkau atajum, atumi shiwajum iwanchia duka pegkegchaun takamtijamsatatus, ikamyawa kajeak shinuwama imatak teentugmawai. ⁹ Nuniakuishkam atum Apajuyai kajintsá anentaibaunum iwanch waitkagmainakuish katsunjatajum. Nuniakjum adeagtajum, ashí tikich nugkanmaya atumi yatsum aidaush, wijai betekap waituinawa tusajum. ¹⁰ Tujash atum ju nugka juwi pujusjum wajumak tsawantai waittsagminchakam, Apajuí shiig pegkeg etabiagtatui, waittsamujin diisag junik dekapjainum tusa. Dutijama nigka wait anenkagtina ibau asa, Jisukristujai pujustinme tusa niina senchijin amas, kakajus niiní tsujamainchau etami ajumaish wajukashtina

nui awaintamawagtinai. ¹¹ Niiyai Apuk, iman asa tuke Apuk atinai. Aatus atí.

Inagnaku kumpamkagtamu

¹² Jujú papiinak Silvano yaintsamtai agajan ni minakui awemajai. Nigka yatsut dekas shiig Kristu umignai. Tuja wi papiin agatjim junak, atum Kristui kajintsá anentaimjum duka, nuní nagkaemasjum anentaimtakjum, Apajuí dekaskenum atumnak anempaina dusha dekaatajum tusan agatjime. Ashí wi tajim nuwig emetmamjajum pujustajum.

¹³ Jisukristu nemagkaju Babilonia pujuina nunashkam Apajuik eteg-jauwai, ni atumin etegtamjauwa dutiksag. Nunú aidaushkam atumnak kumpamjamainawai, Marcos mina uchijua imana dushakam aikasag kumpamjamainawai. ¹⁴ Makí makichik atum aidautigmeshkam aneenisjum ashí tikich aidaujaishkam kumpamdayatajum, dutik-dayakjum atum ditajai aneeniamushkam iwaintuniktajum.

Ashí atum Kristunu aidautigminak shiig agkan anentaimsa pujutan amastinme.

Aatus atí.

PEDRO AWENTSAIK PAPI AGAGBAU

Pedro kumpamkagtamu

¹ Witjai Simón Pedroitjai, Jisukristu inake asan chicham etsegkata tusa awemamuitjai. Jutii Apajuiyai kajintsá anentaimainag nuninuk atumesh asajum, iina Apajuiji, uwemtijamin Jisukristu dekas pegkejan takauwa nui kajintsá anentaimaidau asagmin agatjime. ² Iina Apají Apajuí, iina Apuji Jisusjai wait anenjamag shiig agkan anentaimsa pujutan amastinme. Atumek ni pachisjumek shiig dekau asagmin.

Jisusan nemagkaju aidau pujumain

³ Ashí iina pujutjin atsumamu, Apajuí umigku pujumaina nunash, Apajuí niina senchijinig sujamsauwai. Jisukristu etegtamag, niina imanjinak, ashí ni takatji pegkeg aina nujai dekamtijamauwai. ⁴ Nunú senchik ni ashí pegkeg tikichin nagkaesau aidau anagtamauwa nuna sujamsauwai. Nuigtushkam: Ashí pegkegchau katsek ju nugka juwi pegkegchau anentaimat aina nuwiyan wi agkanmitkatjame, dutikakun witag imajuk ematjame, tusa anagtamauwai. ⁵ Nuaduí atumshakam Apajuiyai kajintsá anentaibau aan kuashat ajutjiti tusa kakanmamkujum shiig pujustajum, shiig pujakjum Apajuish dekasken-mash yaita, tuja wajina dutikauwaita, wajina dutikati tusaya wake-jutpawa dushakam shiig dekaatajum. ⁶ Nunú shiig dekau asajum kuitamamka pujakjum, atum pegkegchau wakegamuk depetkajum idaisatajum, aaja kuitamamka pujakjum, ashí Apajuin shiig awagma duke emamkesa takastasajum kakanmamsatajum, nuniakjum pujutjum Apajuiyai idaisatajum. ⁷ Aaja pujakjum Jisukristu nemagkau aidaujaish yatsut anendaisajum aneeniakjum, ashí tikich aidaujaish dutiksagmek aneenitajum.

⁸ Ju aina ju imatiksagmek shiig takaakjumek, atumi pujutjuminish, ii Apuji Jisukristu pachisa dekatnumash wainkagmek juwakchattagme. ⁹ Juna betek umiinachuk aents wainmachujai betekai, nuniachkush atushat wainmachua nuninai, ashí niina tudaujin Apajuí tsagkujamua nuna kajimatu asa. ¹⁰ Yatsug aidauh, ubag aidauh, aan nagkaemasa nunimainaitjum duka, atum Apajuí etegjamu asajum wajuk pujumainaitjume nunisjumek pujustasajum kakanmamainaitjume. Aaja nuniakjumek kakajus pegkegchauk takaschattagme. ¹¹ Nuniagmin Apajuí shiig anenjamag, iina Apuji uwemtikagtin Jisukristuwa nuna inamtaiji tuke atina nui awaintamatnai.

¹² Nuaduí wika junak ashí dekagminkish tuke aneemtiksanké atajime yamaya juwikish, dekaskea nuna jintinjamawajua nuwig emetmamjajum batsatu asagmin. ¹³ Wi iwaaku pujag duwik, tuke aneemtiksanké amainaitjim duka pegkejai. ¹⁴ Wika junak tajime, wi dukap pujutsuk jakatnun iina Apuji Jisukristu dekamtijauu asamtai. ¹⁵ Tujash ashí wi dutikmainnak dutiksan dekapsatjai, wi jakamtaish, wi jintinkagtuamuk adeagminjum, tau asan.

Jisukristu imanjin wainkaju aidau

¹⁶ Jisukristu ju nugka juwi pujusá, ni senchijiin aents dutikmainchaun dutikauwa nuna pachisan atumin jintinkun, nuigtushkam

Jisukristu ataktú tatnujijai pachisan jintintuabijame. Nunak wainka nagkami augmattsamun tichabijame, shiig dekaskea nuna tibaijime. Jutii iina dekas jiin wainkabijai, ii Apuji Jisukristu yapajina niina tsaaptinjin egkemak tsawan wajas wajau. ¹⁷ Apajuí Jisusa Apajiya nu niina imanjin tsaaptin awajus eme anentus chichajak: “Ametme mina uchig aneetaigmek, duwi aminí shiig aneajai”, tusa ¹⁸ tabau antukbajii Jisusjai mujanum pujusaja, nui Apajuí pujau asa pegkeg awajsamunum.

¹⁹ Nuaduí wika Apajuí etsegtin aidau Apajuí chichame uminkatnun agajajua nunak dekaske tajai. Nunú chichama duka, lámpara ekemakam suwen tsaaptin emama numamtinai. Atumesh dita agagbauwa duka shiig emamkesjum dekamain ainagme, nu shiig dekamtijamattagme atum wajuk pujumainaitjume nunak. Jisukristu ataktú juwi minakug, yaya tsawak tsaaptin wajas aama numamtuk anentaimin yapagtgumawagtinai. ²⁰ Chicham uminkatin nuniktinai tusa agagbauwa nunú, dekatkauk shiig dekaatajum aents nagkami tichamuapita tusajum. ²¹ Nu uminkatin tibauwa duka, makichkish aents wakegak tibau ainatsui, duka aents pegkejam Apajuinu aajakú aina nuna, Wakaní Pegkejiya nu ujaam tiaju ainawai.

2

Waitá jintinkagtin aidau

¹ Tujash yaunchkesh Israel aents aina nuwish Apajuí tujutne tusag wainak etsejukú ainawai, yamaya juwish atuminish waitá jintinkagtinush agtina nunisag, dekaskekaitai tumainun dita dewakbauji pegkegchauwa nuna jintiawagtinai, nuninak Apu Jisukristu iina uwemtijamjauwa nunash wainkayai tiagtinai, tu yujaidau asag anenjas batsatai dita suwimak jukitnuji ishamain jegajiagtinai. ² Nunú aents aidau pegkegchau unumatjamujai takaamujiya nuna kuashat aents aintus wejuinak, Jisukristu chichame dekaskea nuna pegkegchau chichajiagtinai. ³ Ditak kuichkin senchi wakejuidau asag waitan jintinkagtiagtinai, tujash nunú aidaunak Apajuí duwik nagkamas suwimkan jukiagtin atinme, tiuwa nunak uwemtugchagtin ainawai.

⁴ Nagkamtinish Apajuik nayaimpinmaya aents tunamakaju aidau-nash tsagkugtsuk, dita pujusá waittsatnunum ajapawajui, dutikak suwenum batsasuí jiju ikagmawai jigkajá batsamaina numamtuk, tsawan jegatai suwimkan susamig tau asa. ⁵ Nuigtush Apajuik aents yaunchuk batsamajakajua nunakesh tsagkujachui, dutikak yumin yutumtikjauwai, dutikamu asa abaujak ashí nugkan amuak ijinauwai, tujash Noé pegkejan chichagkagtujakua nunak, nuigtú siete aents aidaujai uwemtijauwai. ⁶ Dutiksag yaakat Sodomash, Gomorranashkam apek yuku awajsauwai, ashí aents pegkegchau aidau atak batsamtin aina dushakam juna dekainak ishamkatnume, pegkegchau aidau suwimak suwamun tusa. ⁷ Dutikakush Lotnak apeachui nigka aents pegkeg asamtai, tikich aidau tikima tsuumainun takaagtai, anentaimak waitú pujú asamtai. ⁸ Lotak nu aents aina nujai ijunag pujau asa, kashí kashinig waitú pujau pegkegchau takaagtai, shiig pujumainchau dekapeau asa.

⁹ Aatus Apajuik niina aentsji aidaunak ishamainnum jegataish nigki yayawai, dutikak aents pegkegchau takaidaunak ayatak di-yawai tsawan jegatai suwimkan susamig tusa. ¹⁰ Ditak pegkegchau takastasa wakegainamujin taká batsatu asag, Apajuí tabau umitnash dakituidau asagmatai, Apajuí ditanak suwimkan susagtinaí. Nunú waitan jintinkagtin aina duka emebau, kakajus antumtikmainchau asag, Apajuí aentsji nayaimpinmaya senchigtin aina nu pegkegchau chichagtanash ishamainatsui. ¹¹ Tujash Apajuí aentsji nayaimpinmaya senchigtin aina dukesh, ditá pachisajag Apajuí emtinig pegkegchaunak chichajuinatsui.

¹² Ditak shiig dekainachiatok pegkegchaun chichainawai, kuntin achiká maam atinjin dekatsuk akiina numamtuk akiinau asag, ditashkam ditá pegkegchaujin nunisag suwimkan jukiagtinaí. ¹³ Tikichin waitkasu aina nunisag ditash waittsagtin ainawai. Ditak pegkegchaun wakejus ashí wainainamunum takainakush, shiig aneasa pujustina iman dekapmmainawai. Ditak atum shiig aneasjum ijunja yuwina-munum wayawag, atumin idastamainun pegkegchaun takainakush, pegkegchaunap aniaja tusagkesh anentaimainatsui.

¹⁴ Nunú aents aidauk nuwanak iyashnum tsanigtasa anentaim-tutskek diimain dekapenatsui, imanidau asag tudau takatnash yawe-tuinatsui, nuigtush tsanuinawai Jisukristun imagnis anentaimtuinatsu nunak, nuninak ayatak wiyakchameata tabaunak anentaimtus yujau ainawai, nunin asag tikima aents pegkegchau ainawai. ¹⁵ Ditak Apajuinu pegkeg takatan idaisag, Balaam Beor aajakua nuna uchijí pegkegchau takaamujin kuichkin jukitatus wakekauwa numamtuk waja yujainawai. ¹⁶ Tujash Apajuí etsegtin Balaam aajakua nu pegkegchau dutikatasa wejamujinak, burro ni entsamsá wegamu-jiya duke aentstí chichamen chichachuitak, aentstí tumaina imatika jiyakuí. Dutikam ni anentaimtusa wejamunak idaisauwai.

¹⁷ Nu jintinkagtin aidauk, yumigmat taimunum yumi pimutsuk buku wajas aama numamtin ainawai, nuigtushkam yujagmin dase umpuí juwama numamtin ainawai, tikichnak pegkegnum yayachu asag. Apajuí nunú aidaunak shiig suwenum batsamsatin atinme tusa idaisamu ainawai. ¹⁸ Wagki ditak chicham dekaskechu aig pegkeja imanun chichainak, aents duwik pegkegchaujin idaisau aidaunash tsanujag, pegkegchau takatnum wakemitkakag awagkiag pegkegchaun takamtikaidau asagmatai. ¹⁹ Ditak, atum wakegamu takamainnumak agkantaitjume tuinawai, ditakesh pegkegchau takatnumak agkan ainachiatok. Nuniau asag tudau takatan idayinatsu duwi tuke achikbaujai betek pujuinawai. ²⁰ Apu Jisukristu uwemtikagtina nuna nemajuinak ashí pegkegchau ju nugkanmaya takatan idaisauwaitak, nunú aidau tsanujam ataktú pegkegchau takaakug, yaunchuk aajak-baun nagkaesau pegkegchau wegawai.

²¹ Ditak dekas Apajuí wajuk pujustinme tusaya wakegawa nunak dekamainchau dekapin ainawai, nuna shiig dekaawaju ainayatak chicham pegkeg Apajuinu umiktina nuna idayinak ataktú pegkegchau waketjuidau asag. ²² Awai chicham yaunchuk tibau: “Yawá ni iyakbaujinak pempeentuki yuwame, nunisag kuchishkam yamá imai akupkam pempeenak kuchan tadaetuwame”, tawa numamtuk wajawai aents pegkegchau takaajakbaujin waketjuki takaakug.

3

Jisukristu minitnuji

¹ Aneetaig yatsug aidauh, ubag aidauh, junak ataktú patasnuk agajan awetajime. Nagkamchakun papiin agajan awetimjim duwish nuní pujustajum timajim dutiksanuk, yamaish nunak awentsanuk takun, itugsag pegkeg aina nunak anentaimtusanum tusan wakejajime. ² Yaunchuk Apajuí etsegtin pegkejam aidau chicham tibaauwa nunú aneaku atajum. Nuigtú Apu Jisukristu iina uwemtijamin chicham umiktajum tibaun, Jisus chicham etsegtugkatajum tusa ishiakbau aidau jintinjamawajua dushakam aneaku atajum.

³ Dekas dekatkauk ju dekamain ainagme. Tsawan nagkantina duwik, aents dita pegkegchau takastasa wakegamujinak batsamtuidau asag, chicham pegkeg jintinkagtamun pachisag dushikis chichajuidaush agtinai. ⁴ Nunidau asag: “¿Kristu ataktú taatnaitjai tiuwa dusha wajuakaeki? iina muunji aidau jinawagmataish, nagkamsa najankamua duka yamaikish nunisag ainajama”, tiagtin ainawai.

⁵ Ditak yaunchuk nagkamas, Apajuí nayaimpin najana niina chichamenig nugkan yuminmayan akankauwa nu dekatnak dakituinawai. ⁶ Yaunchuk Apajuí niina chichamen yumin yutumtikag ashí nugkan amugmatai, aents nui batsamajakua duka jinawajui. ⁷ Nayaim, nugka yamai awa jushakam niina chichamenig esaktinai. Duka Apajuí aents pegkegchau takaidau suwimkan susatna duwi nuniktinai.

⁸ Aneetaig yatsug aidauh, ubag aidauh, jusha dekachu wajukmaina nunikaigpajum, Apajuí diismak makichik tsawanta duka mil mijana nujai betekai, tuja mil mijana dushakam makichik tsawanta nuninai. ⁹ Apajuik ni tibauijiya nunak umitskek idaisashtatui. Tujash atumek, Apajuí ni tibaunak umikchatna nuninun tikich anentaimaina nuninuk anentaimaitsugme. Junak ashí Jisukristu dekawag, pujutjin yapajiwag, waittanum wetsuk, uwemjatnume tusa dakagmak aniawai.

Yamajam nayaim, yamajam nugka

¹⁰ Tujash Apu minamuk kasa pachiachmau kashi miniyama numamtuk atinai. Nu nuniamunum nayaimpinum ayaa duka shiig ishamain wajakag megkaejatnai, aantsag nugkashkam, tuja ashí nugkanum ayaa nujai esakag megkaejatin ainawai.

¹¹ Atumek ju imanik esaká utsankatin asamtai, pegkeg aina duke takaakjum, imá Apajuik umigkujum pujumainaitjume. ¹² Nuniakjum ashí aents takasbaujin diijus Apajuí titina nu, itugsag tsawan waamak jegaa tusajum wakejusjum dakastajum, nunú tsawantinig nayaimpinum ayaa duka esaká, ashí nugkanum ayaa nujai yumimeak megkaejatnai. ¹³ Tujash jutiik ni anagtamamu, yamajam nayaim, yamajam nugka atina nu dakainaji, nuanuig ayatak pegkejak agtinai.

Anemtikdaibau

¹⁴ Aneetaig aidauh, nunú aatus nagkaemaktin asamtai, ni dakainakjum pujakjum shiig kuitamamsa pujuta nui kakanmamsatajum, ni taakushkam pegkegchau takaamugmish, atsugtamu shiig agkan pujamugmin waipaktinme. ¹⁵ Jushakam dekaatajum, iina Apuji waamak minatsu nunak, jutii aidautin uwemjatnume tujamu asa dakamak aniawai. Juna pachis iina aneetaiji yatsug Pabloshkam, Apajuí dekat susamu asa niishkam agajui. ¹⁶ Pablo ashí papiin agajua

nuwig nuna pachis agajui, nunú aina nuwiya shiig antumainchaush ainawai. Nuaduí aents dekachu aidauk, nuigtú Jisusai imatikas kajinas anentaimainatsu duka, antumainchau dekapenak yajupiwag wainak etsejuinawai. Dutiksag Apajuí chichamen tikich agajajua nunash, yajupia etsejuidau asag dita suwimak jukitnunak umigmamainawai.

¹⁷ Nuaduí aneetaig yatsug aidauh, atumek nunú wají nuniktin emtika dekau asajum kuitamamkatajum, aents pegkegchau tsanugmajagmatai atum dekaskeapi tajum nu sakapajaijum. ¹⁸ Duka nunit-suk dekas iina Apuji Jisukristu Uwemtikagtina nuna shiig awagma nunisjumek pujakjum, ni wait anenjabaunum aan senchi yaim-painakui, niishkam nuní senchi shiig dekaatajum. Nigki yamaish, atakea duwishkam, tuke ememattai atin atí.

Aatus atí.

JUAN NAGKAMCHAKU PAPI AGAGBAU

Chicham pujutan sukagtina duka Kristui

¹ Kristu duwik nagkamas nughash najannatsaig pujujakuwa nunú chichaamu antuku asá, ni iwainaja takaamushkam puyatjusa iina jiin wainkaju asá, ii uwejinish achiká dekapsauwaitji, chicham pujuta sukagtin Kristuwa nunú. ² Nunú pujut tuke atinun sukagtina nu Aentsmaga waintintugmakui. Nunú wainkau asaja pujut tuke atinun sukagtina nu pachisa etsegtaji, nigka yaunchkek ni Apajijai pujuwaitak wantintugmakui. ³ Nunin asamtai jutiik ii wainkamu aidau, ii antukbau aina nu etsejuinaji, jutii Apajuijai ijutkau ni Uchiji Jisukristujaish ijutkau pujuinag nunisjumek, atumshakam jutiijai ijutkau atajum tusa. ⁴ Ju dekaajum atumesh shiig aneakjumin, jutiishkam shiig aneasagmi tusan agatjime.

Apajuik makichkish pegkegchaunak takachui

⁵ Jisukristu jintinjamkui antukuitag nuna ujajime, Apajuik makichkish pegkegchaunak takachui, iman asamtai niinig makichkish pegkegchawk shiig atsuuwai. ⁶ Jutii Jisukristujai ijutkau pujajai tay-atku, pegkegchau takata duke wekaetakuik, waitjaku tu wekaemainai, dekaskea duke takaachiatku tau asá. ⁷ Tujash Apajuí makichkish pegkegchaun takatsuk pujuwa nunisaik, jutiishkam pegkegchau takatsuk pujaku, tikich aidaujaish ijutkau pujajinig, Apajuí niina Uchiji Jisukristu jutii tudaujin mantamdauwa nuna numpeen, ashí iina tudaujinash nijatjamag esakatjamui.

⁸ Tujash minak tudauk atsugtawai tumamkuik, iik pempeentumaki tsanuumaku tu wekaemainaitji, dekaskea nu tachau asá. ⁹ Dekas tu wekaetsuk, wika tudauwaitjai tusa Apajuí ujajinig, tsagkugtamag bakumamainchau etamtatji, nigka pegkeja ibau asa, ni tibaujinash betek umina duwi. ¹⁰ Tuja wika tudaujak takachujai tumamkuik, Apajuí waita nunin emaku taji, niina chichamega nu aatus tujamtsaig tau asá.

2

Kristui iina ayamjutpauk

¹ Mina uchuchig aidauwah, jujú aidaunak tudau takasainum tusan agatjime. Tujash makichkitigmekesh yajá aneasjum tudau takaakjumesh dekaatajum, Apajuí emtin iina ayamjutpauk Jisukristu pegkegma nu pujugtamui. ² Niiyai iina tudaujin tsagkugtamjatas jakauwa duka, tujash imá jutii tudaujinkik nunikchawwai, ashí nughkanum aents batsata nuna tudauji tsagkujata tabaunum jakauwai.

Chicham umiamua duka pempentunisaik aneeniamua nuuwai

³ Nuaduí niina chichame betek umiakuik, Apajuish yaita dusha shiig dekamainaitji. ⁴ Tuja aents: “Apajuik mina kumpajui” tayatak, chichaman umigchawk waitjak tu wekaewai, wagki dekaskenum tachau asa. ⁵ Tujash aents Apajuí chichame umiak puja nu dekaskenmag iwainawai Apajuí aneamujiya nunak. Nuniau asagmatai

dekamainaitji Apajuijaimpap ijutkau ainawa tusa. ⁶ Aents Apajuijai ijutkau pujajai tauk, Jisukristu pujujakua nunisag pujumainai. ⁷ Yatsug aidauh, ubag aidauh, junak yamajam chicham umiktinag agattsujime. Kristu chichagtamak: Pempentunisjume aneenitajum, tujabiuwa nuna agatjime. Tujash nunú chichamak yaunchuk nagkamsajum antujakuitjume. ⁸ Ju chichamak duwik tibauwa nuninaitak, yamagma nunin wega nuna pachis, Jisukristu umiktajum tujabiuwa nuna agatjime. Nuna umiinak dekas pegkeja nuna takainak, yaunchuk pegkegchau takaajakbauwa nunak idaisatnume tusan.

⁹ Aents Apajuí umigjai tayatak yachin kajejakug, pegkegchaun takaak nuniawai. ¹⁰ Tuja ni yachin anea duka pegkejan takaawai. Nuniau asa pegkegchaunak takagmait sui. ¹¹ Untsu yachin kajeja duka pegkegchaun takaak nuniawai. Pegkegchaunak takau asa, aents wainmachu wajukmaina numamtuk wajainawai.

Pegkegchau takat aidau tupanbau

¹² Uchuchig aidauh, atumnak Jisukristu mantamnamunum Apajuí tudaugminak tsagkugtamjaju asagmatai agatjime. ¹³ Uchigtin aidautigminash agatjime, yaunchuk nagkamas nugkash najannatsaig tuke pujujakua nunú shiig dekau asagmin. Datsauch aidauh, atumnashkam agatjime, iwanch depetkau asagmin. Uchuchig aidauh, atumek iina Apají Apajuiya nu dekau asagmin agatjime.

¹⁴ Uchigtin aidautigminak agatjime, yaunchuk nagkamas nugkash najannatsaig tuke pujujakua nu dekau asagmin. Atum datsauch aidautigminashkam agatjime, atumek senchi asajum, Apajuí chichamega nu umiakjum, iwanch depetkau asagmin.

¹⁵ Pegkegchau takat ju nugkanmaya aidaun, Apajuí nemagchau takaina duka takasaigpa. Aents ju nugka juwiya pegkegchau takat aina nuna imá wakegak, juwiya takatnak takaa pujuidauk Apajuinak aneatsui. ¹⁶ Ashí nugkanum ayaa duka wainku wakejunui, tuja kuashat wajigtin asá, iik eme anentaimtumamua dushakam Apajuinumiachu ainawai. Nunak aents Apajuí nemajuinachu ju nugka juwi batsamas nuninawai. ¹⁷ Ju nugka juka, ashí wakejumain ayaa nujai megkaejattawai, tujash Apajuí wakegamun takaina nu tuke pujutin ainawai.

Waitá etsejin aidaujai kuitamamkatajum tibau

¹⁸ Uchuchig aidauh, yamaik tsawan nagkanbaunum batsatji, atum antukuitjume makichik aents Kristun shiwagbau atinai tabau. Yamaik kuashat aents nunin aidau wantinainawai. Nunidau asagmatai dekainaji tsawan nagkanbaunmap jeganji tusaja. ¹⁹ Duka jutii ainag juwiyag jiiinjaje, tujash dekaskenmag jutiinumiachu asag aaninawai, jutii ainag juninuk ainakug, jutiijaig ijutkau batsaamain ainawai.

²⁰ Tujash atumnak Jisukristu Wakaní Pegkejiya nuna sujamas, aents Apajuí nemagchau aina nujag akantamkaju asamtai, dekaskea duka dekagme. ²¹ Junak atumnak dekaskea nu dekachu asagmin agattsujime, atumek juka shiig dekagme, makichkish waita nuwiyag dekaskek jiiinmainchauwa duka. ²² ¿Yaita waitash? ¿Jisusnak Apajuik Apu atí tusag etejachui tuina duchaukaih? Dekas nu ainawai Apajuin Uchijijai shiwagmagaina duka. Tuja Apajuinashkam niina Uchijin shiwagma dutiksag dakitainawai. ²³ Ashí aents Jisusan pachis Apajuí Uchijichui

tuina duka, Apajuijaig ijutkauk ainatsui. Untsu Jisusak Apajuí Uchijiyai tusag dekaskenum etsegtuina nuuwai Apajuijai ijutkau aidauk.

²⁴ Yama nagkamchakjum antukuitjum nujaig pujakjumek, nu antukuitjum nunú imanisag ajutjamkuig, atumshakam nunisjumek Apajuijaish, niina Uchijiya nujaish ijutkau atatjume. ²⁵ Duka Jisus pujut tuke atinun anagtamauwa nuuwai.

²⁶ Junak agatjime tsanugmagta tuidau aidau asagmatai. ²⁷ Tujash atumek Wakaní Pegkeji Kristu sujamsamua nu ajutjamu asamtai: Yaki Apajuin pachis jintinjuawa, tusagmek atsumaitsugme. Wakaní Pegkeji waitan jintinkagtutsuk, dekaskea nunak jintinjamaina nunisjumek pujakjum, Jisukristujaig ijutkau pujustajum.

Apajuí uchijí aidau

²⁸ Yamai uchuchig aidauh tajime: Imá Kristujaig ijuntsajum batsamsatajum, ni minakuish kajintsá datsamtsuk puyatkas igkugkagmi. ²⁹ Atumek Kristu pegkeja duka dekagme, nunin asajum ashí aents Apajuí pegkeg wakegamua nuna takau wainkugmek, dekas Apajuí uchijimpap ainawa tusajum dekaatajum.

3

¹ Anentaimsa diistajum wajupa iina Apajuí anempatsua, imatijamu asa mina uchig atajum tujamatai, yamaik niina uchijí waigji. Nuaduí aents Apajuin nemajuinatsu duka, Apajuish yaita nunak dekaachaju asag, jutiinashkam nunisag Apajuí uchijimpap ainawa tusajag dekagmainatsui. ² Aneetaig aidauh, yamaik Apajuí uchijí ainaji, ii wajuku atinaitji duka yamaikik waintsuji, tujash dekainaji Jisukristu wantintugmaktina duwi, iishkam niya imanuk agtinaitji, nunikaja wainkatnaitji shiig ni wajukuita imatiksaik. ³ Nuaduí aents niina dakaidauk, pegkegchaun takatsuk batsamas dakamainai, Kristu makichkish pegkegchaun takaschauwa nunisag.

⁴ Untsu aents pegkegchaun takaina duka, Apajuí takasaigpajum tibauwa nuna umiinachu asag nuninawai. Pegkegchau takata duka chicham umiachbaunum nuninui. ⁵ Atumek shiig dekagme, Jisukristu machikish pegkegchaunak takachu asa, jutii pegkegchaujin bakumamaina nuna agkanmitkagmatatus ju nugka juwi tajutjabauwa duka. ⁶ Nuaduí ashí aents Jisukristujai ijutkau pujuidauk, tudau takaajakbaujiya nunisagkek takaak pujumaitsui. Untsu aents tudaun takaina duka, Kristujaig ijutkauk ainatsui, nuigtushkam yaita Kristush nunash shiig dekainachu asag nuninawai. ⁷ Uchuchig aidauh, kuitamamkatajum makichik aentskesh tsanugmajainum. Aents pegkeg aina nuna takauk, pegkeg asa nuniawai. Nunú aents aidauk Apajuí emtinish pegkeg ainawai, Jisukristu pegkeja ibauk. ⁸ Tujash pegkegchaunak takaa wekaga duka, iwanchdau asa nuniawai, iwanch nugka yama najanetnum nagkamas pegkegchau takasua nujai betek takaidau asag. Nuaduí Apajuí Uchijiya nu, iwanchi takatjin emegkagtatus tauwai.

⁹ Apajuí uchijí aidauk pegkegchau takatnakek wejumain ainatsui, Apajuí pujutjiya nunú ajamu asag, tudaunak takaak pujumaitsui, Apajuí uchijí asag. ¹⁰ Duwi shiig dekanui ya ainawa Apajuí uchijí aidaush, tuja ya ainawa iwanchi uchijí aidaush. Iwanchi uchijí aina duka, pegkeg takatnak dakitin ainawai, nuigtushkam tikich aidaunash aneasash diichu ainawai.

Tikich aidaujaish iikdaisa aneenit

¹¹ Atum yama nagkamsajum chicham etsegbau antuku ainajum duka, tikich aidaujaish iikdaisa aneediagmi tawa juuwai. ¹² Jutiik Caín iwanch wakejamun umiau asa, yachin mauwa nuninuk amaitsuji. ¿Wagka mauwaita? Caín ni takaamua duka pegkegchau asamtai, ni yachi imá pegkejan takatai kajejak mauwai.

¹³ Mina yatsug aidauh, ubag aidauh, aents Apajuí nemagchau aidau kajegtamainakuish, kajegtuinawapi tusagmek anentaimtú bat-samigpajum. ¹⁴ Jutiishkam eke Apajuijai ijutkachu aajakuitag duwik, Apajuiyai kanakú asá megkaekaujai betek aajakuitji. Tujash yamaik iina yachi aneau asaja, Apajuiyai ijutkau ainag duwi, tuke niijaig pujutnaitag nu dekeinaji. Aents tikichin aneenatsu duka, eke Apajuijai kanakú ainawai. ¹⁵ Ashí aents yachin kajejuina duka aents magkagtinjai betekai. Atumek shiig dekagme, magkagtin aidauk atakesh pujut tuke atina nunak jukishtin ainawai. ¹⁶ Jutiik Jisukristu iini mantamdauwa duwi anenkak dekauwaitji. Ni jutiini mantamnak waittsau asamtai, jutiishkam nunisaik nunimainaitji tikich Jisukristun nemajuina nui. ¹⁷ Aents Apajuí nemajin kuashat waji ajamaitak, tikich yachi atsugbau asa waitiaun wainiatak yayaatsu duka, Apajuí jutiin anempa nunú anenkak atsugbau asa nuniawai.

¹⁸ Mina uchuchig aidauh, jutiik imá chichamaikik anejatnuk amaitsuji, dekaskenum aneeniamua duka, ii yainiamunum iwainmainaitji. ¹⁹ Dekaskenum pempeentuniki aneeniamua duwi, Apajuin-uap ainaji tusaik dekeinaji. Nunin asaja Apajuí aujkuishkam, juti bakumamainuk atsugtamjiapi tuinaji. ²⁰ Juti pegkegchau takasbauji anentaimtują dekadaku, wake besemag dekapeajinchakam, Apajuí juti anentaimtajin nagkaesaun shiig dekauwa iman asa, ni imá shiig dekagtamji. ²¹ Mina aneetaig aidauwah, ii nu aaja anentaimchamu atsakuig, juti bakumamainuk Apajuí emtinig atsugtamjiapi tumainaitji. ²² Nuniaku ii atsumamuji aina nu segamak amastatji, niina chichamesh umigku, ashí waji niina shiig awagma duke takau asajin. ²³ Ni chicham umiktajum tujabauwa duka: Niina Uchijí Jisukristui dekaskeapi takujum, ni tibauwa dutiksaik tikichjaish aneenitajum tawa nuuwai. ²⁴ Aents Apajuí chichamen antujuk betek umijuk niijai ijutkawai. Nuniau asamtai Apajuishkam ditajai pujawai. Jutiik ni Wakaní Pegkejin sujamsauwa nu dekamtijamu asamtai, ni iini pujamushkam shiig dekeinaji.

4

Wakaní Pegkeji ajamu tuja wakan Kristu shiwagmau ajamu dekamain

¹ Aneetaig aidauh: Apajuí dekamtijuae, tusa etsejuinakuish dekaskeapi tiigpajum. Dekas Wakaní Pegkeji ichachiamash tawa, atsa wainak tu wekaetsuash tusajum dekatkauk antugtá antugkatajum. Wagki kuashat waitan jintiidau ju nugka juwi yujaidau asagmatai. ² Dutik dekamainaitjume aents dekas Wakaní Pegkeji chichamtikam chichaidauk. Ashí aents: Jisukristuk dekas Aentsmaga Akiinawai, tuina nuuwai Wakaní Pegkeji ajamu aidauk. ³ Ashí aents: Jisukristuk aentsmaga akiinachui, tuina duka Wakaní Pegkejiya duka atsujui. Duka wakan Kristun shiwagbauwa nu ajamu asa tuinawai, atum

yaunchuk nunin wantintinai tibau antukuitjum duka yamaik ju nugka juwig wantinui.

⁴ Uchuchig aidauh, atumek Apajuinu asajum, nu waitan etsejuina duka depetkaugme, Wakaní Pegkejiya nu pujugmau asajum. Dekas atumiin pujugtamtum nuuwai imá senchigtinuk, iwanch aents Apajuin shiwagbau aidaunum inama nuna nagkaesau. ⁵ Ditak ju nugkanmaya asag juwiya wajinak chichaagtai, tikich aents Apajuin dekainatsu duke antujuinawai. ⁶ Tujash jutiik Apajuinu ainaji. Nunin asajin, Apajuin shiig dekaina duke jutiinak antugtamainai. Untsu Apajuinuchu aidauk antugtamtusji. Nuninakui dekainaji yaita Wakaní Pegkeji dekaskea nu dekamtikamu aidaush, tuja yaita dekaskechua nuna chichaina dushakam.

Apajuik anenkai

⁷ Aneetaig aidauh, Apajuí aneenitan sujabauwa duwi, pempeen-tuniki aneediagmi. Ashí aents dekaskenum anejatuina duka Apajuí uchijí ainawai, nunidau asag shiig niinash dekainawai. ⁸ Untsu anejatuinatsu duka Apajuinak shiig dekainatsui. Apajuí ashí dutika nunak anejatbaujin aikawai. ⁹ Nuniau asa Apajuik, niina Uchijí makichkiuchia nuna awetugmauwa duwi dekamtijamauwai, ni jutii anempamujinak: Mina Uchig ditan uwemtikak pujut tuke atina nunashkam susatnume, tujamu asa. ¹⁰ Jutiichuitji dekatkau Apajuí aneejakutik, niiyai jutii aidautin anempajua duka. Nuniau asa jutii suwimak jumaina nunak, niina Uchijin jutii tudaujin mantamnati tusa akuptugmakui.

¹¹ Aneetaig yatsug, ubag aidauh, Apajuí jutiiin aatus anempaju asamtai, jutiiishkam tikich aidaujaish pempeentuniki aneenimainaitji. ¹² Makichik aentskesh Apajuinak wainchau ainawai. Nunin aigkish jutii tikichjai aneeninakuik niijai ijutkau ainaji. Nuniau asajin ni anejattaijiya nunú jutiiinashkam pegkegnum aputamji. ¹³ Jutii Apajuijai ijutkau asajin, Apajuishkam jutiijai ijutka duka, Apajuí Wakaní Pegkejin sujamsauwa duwi dekainaji. ¹⁴ Dekas jutii Jisusjai ijunsa yujasú aidauti shiig wainkaju asaja, Apajuik niina Uchijin ju nugka juwiya aents aidautin uwemtijamjatnun awetugmauwai tusa etsejuinaji. ¹⁵ Ashí aents Jisusak Apajuí Uchijiyai tuina nujai Apajuik ijutkawai. Aantsag nu tuina dushakam Apajuijai ijutkau ainawai.

¹⁶ Aaja dekainaku dekaskeap Apajuik anejatua tuinaji. Apajuik anenkai. Aents tikichin anea nunuwai Apajuijai ijutkau aidauk, tuja Apajuishkam nu aentsjai ijutkawai. ¹⁷ Apajuik yaimpaji ni wakega dutiksaik tikich aents aidau aneetnum. Tuja Apajuí ashí aents takasbaujin diijus titina nunú tsawan jegatna duka ishamatsji, wagki ju nugka juwi pujakuish, Kristu Apajuijaig ijutkau pujujakua nunisaik pujuidau asaja. ¹⁸ Anejatut abaumag ishamamuk atsuuwai. Anejatbauwa nu ishamamunak emegkainai. Apajuí anejata nuna dekaidauk Apajuinak ishamainatsui. Apajuí ni wakega dutiksag tikich aidaunash aneetnume tusa yaimpaina duwi, jutii Apajuí ishamainuk makichkish atsugtamji. Aents Apajuin ishamaina duka, Apajuí wakega dutiksaik tikich aneashbaunmap, suwimkanak sujustatua tusa ishamainawai.

¹⁹ Jutiik ni Apajuí nagkamchak anempaju asamtai, iishkam aneaji. ²⁰ Makichik aentskesh: "Wika Apajuin anejai", tayatak yachin kajejakug, waitjak tawai. Yachin ni wainbaunakesh aneatsu aniaush,

çutugsaya Apajuí waintsu nuniaush aneemainaita? ²¹ Jutiinak ju chicham umiktajum tujabiuwai. Apajuin anea duka yachinash dutik-sag aneeti tibauwa nunuwai.

5

Apajuiyai kajintsá anentaibaunum depetmat

¹ Ashí aents Jisusan pachisag, Apajuí Jisusnak Apu atí tusa etegkauwai tuina duka Apajuí uchijí ainawai. Apajuí aneakuik ni uchijí aidaushkam aneaku dutiknawai. ² Apajuí aneaku ni ina chichamesh betek umiakuik dekanuí, tikich Apajuin nemajuina nunash aneajapita tusaja. ³ Apajuí aneamuk ni chicham umiktajum timawa nu imatiksaik umiamua nuuwai. Ni chicham umiktajum tujamawa duka kakajus umikchamna nuninchauwai. ⁴ Wagki Apajuí uchijí aina nuuwai pegkegchau aidaunmash depetmawk, nunú depetmamua duka jutii Apajuiyai kajintsá anentaimainag duwi depetmainaji. ⁵ Kristuk Apajuin Uchijiyai tusa dekaskeapi tuina nuuwai pegkegchaunmash depetmaina duka, nunú aidauk Apajuí nemagchau wajukena nuninatsui.

⁶ Jisukristu Apajuí Uchijiya duka, Juan yamijua duwi Apajuí chichaak: “Ametme mina uchig aneetaigmek” tiuwa duwi dekanauwai. Nuigtushkam ni jaak numpen ukajua duwi kuashat wají nagkaemajua duwishkam dekanauwai. Nunisag Wakaní Pegkeji dekasken chichauwa dushakam: “Jisukristuk Apajuí Uchijiyai” tusa etsegtawai. ⁷ Jujú kempatuma juuwai dekaske tusa etsegtuina duka: ⁸ Wakaní Pegkejish: “Juka Apajuí Uchijiyai” tawai, aikasag Apajuishkam Jisus yamimagmatai chichaak: “Mina Uchijui” tiuwai, Jisus ni mantamnak numpeen ukajua duwishkam iwainmamkauwai Apajuí Uchijiya nuna. Ju kempatuma juka ashí Jisusnak “Apajuí Uchijiyai” tuinawai. ⁹ Aents aidau etsejuinakuishkam antuinaji, tujash Apajuí: “Mina Uchijui” tiuwa nu imá shiig antugmainaitji. ¹⁰ Apajuí Uchijiya nui kajintsá anentaimaidautik, Apajuiyai dekaskeapi tuinaji. Untsu Apajuin dekaskeapi tachauk, Apajuin waita nunin emak nuniawai. Ni Kristun pachis: “Mina Uchijui” tiuwa nuna dekaskeapi tuinachu asag. ¹¹ Apajuí chichagtamak: “Wi pujut tuke atinun amastinaitjime”, tiuwai. Nunú pujuta nunak niina Uchijí Jisukristua nu sukagtawai. ¹² Apajuí Uchijijai ijutkau pujuidautik, pujut tuke atina nu ajutjamainaji. Untsu Apajuí Uchijijai ijutkau pujuinachuk, nunú pujut tuke atina duka atsujuinawai.

Apajuí segaku kajinmamsa pujamua nu

¹³ Jujú aina junak Apajuí Uchijiya nu dekaskeapi tuidau asajum, pujut nagkanchau jukiwaitjum nunú aidautigmin dekaatnume tusan agatjime.

¹⁴ Jutiik Apajuí wakegamua dutiksaik segamak antugkagtinapita tu- idau asá, shiig kajintsá anentaimainaji. ¹⁵ Ii segamunash antugtawapi tusa dekainag nunisaik, ii sumamushkam dekas jukittajapi tumainaitji.

¹⁶ Aents Jisukristun nemajiatak tudau tsagkugnashtaya nuna takaachu wainkugmek Apajuí segatmainaitjume, dutikam ni pujutan sumainai. Awai tudau tsagkugnashtaya nu, wika nuna takaidau Apajuí

segattajum tusanuk tatsujime. ¹⁷ Ashí pegkegchau takaamu aina duka tudau ainawai, tujash tudau Apajuiyai tuke datumtamainush awai.

¹⁸ Ashí aents Apajuí uchijí wajasú aidauk, duwik tudau takaajak-baujiya nunakek takaa pujumainchau aina duka dekainaji. Ditanak Apajuí Uchijí kuitamu asantai, iwanchik pegkegchauwa nunak takastí tusag inamait sui. ¹⁹ Jutiik Apajuinu ainag duka dekainaji, untsu ashí aents Apajuí nemagchau aina duka iwanchi inatai ainawai. ²⁰ Dekainaji Apajuí uchijí ju nugka juwi tajutjama, Apajuí dekas tuke pujuwa nunash shiig dekamtijabauwa nu. Jutiik Jisukristujai ijunsa pujuinaji, niyai dekaskenmag Apajuik, nigki pujut tuke atinun sukagtina dushakam. ²¹ Uchuchig aidauh, wainka apajimtai aina duka ememattsuk, dekas Apajuiya nu ememattajum.

Aatus atí.

JUAN AWENTSAIK PAPI' AGAGBAU

Juan kumpamkagtau

¹ Wi Jisukristu nemagkau aidaun diin asan, juna papiin ashí atum Apajuí etegjamu ainajum nuutigmin agatjime. Wika atumnak dekas aneajime, tuja imá wikik aneatsjime, Apajuí chichame dekaskea nuna tikich dekaawaju aina dushakam anempainawai. ² Aaja pempeentunikiaja aneeninaji, chicham dekaskenum jintinkagtuamua duka, iina anentain tuke juwatjamkau asamtai. ³ Apajuí iina Apajiya nu, Apu Jisukristu Apajuí Uchijiya nujai jutijai ijutkau asa wait anenjamag, ni chichame dekaskea nu umitnum yaimpamunum pempeentunikiaja aneeniamunum, shiig agkan anentaimsa pujutan amastinme.

Pempeentunikjum aneenitajum tibau.

⁴ Kuashat shiig aneasmajai atum Apajuí nemajin ainajum nuwiya, Apajuí chicham umiktajum tujabiuwa nuna imatiksag umiinak, Apajuíjaish shiig imagnis yujainamun wainkan. ⁵ Aneetaig yatsug aidauh, ubag aidauh yamai segajime, pempeentunisaik aneeniagmi tusan. Junak yamajam chicham umiktinnak agattsujime. Kristu chichagtamak: "Pempeentunisjumek aneenitajum", tujabiuwa nuna agatjime. ⁶ Dekaskenum anejatbauwa duka, Apajuí chicham umiktajum tibau betek umiamua nuuwai. Chicham umiktina duka yama nagkamchaku aneenisjum pujustajum tabau antukuitag nuuwai.

⁷ Kuashat tsanumin aidaun ashí nugkanum yujas: Jisukristuk aentsmagag akiinachui, tuinawai. Nuna aatus tuina nuuwai tsanumin aidaun, nuigtush Jisukristun shiwagbau aina nunú. ⁸ Nuaduí atumek kuitamamkatajum, atum Apajuí takagjum nunú megkaetsuk ni akigmamuk ashí imatiksagmek jukimnujukum.

⁹ Makichik aentskesh Kristu jintinkagtuamua nunak jintinkagtutsuk ewagak jintinkagtutaik, Apajuik nu aentsjaig ijutkau atsuí. Untsu Kristu jintinkagtuamua dutiksag jintinkagtuina nujai Apajuik, niina Uchijijai ijutkau awai. ¹⁰ Makichik aentskesh: Atumin ijagsatasan minajai, tusa tajutjama jintinjamatatus wakegayatak, Kristu jintinkagtuauwa dutiksag tachakuig, atum ijunbaunmag awayawaigpajum, kumpamash kumpamawaigpajum. ¹¹ Nunú aentsua nuna shiig anentus juwauk, ni pegkegchau jintinkagta nuninuk wegau asamtai.

Akatmabau

¹² Kuashat pachisa atum agatmainuk ajutui, tujash papinumag agatjashtajime. Dekas atumiin anuí taan, atumjai igkunan chichastasan wakegajai, nuniamunum betek shiig aneamu ajutjamti tusan.

¹³ Wi yamai Apajuí nemajin aidaun ijunja pujag juka, anuiyatijum Apajuí nemagkujum ijunjum nujai betekai, wi pujag juwiya Apajuí nemajin aidaun kumpamjamainawai.

JUAN KAMPATUMÁ PAPÍ AGAGBAU

Juan kumpamkagtau

¹ Aneetaiju Gayoh, wi Jisukristu nemajin aidaun diinun, dekaskenum aminak aneau asan kumpamjame. ² Aneetaiju Apajuin segatjame, ame wakanmin shiig pujam aantsag ashí takaamugminish pegkeg ajutjamti, nuniakum jamamtuchu pujustá tusan. ³ Kuashat shiig aneasmajai, ame pujam nuwiya yatsut aidaun kaunawag, ame Apajuí chichame dekauwaitam nunismek dekas shiig pujamugmin ujatuinakui. ⁴ Wi chicham etsegekamunum dekaskeapi tiu aidaun, mina uchijua iman aina nunú shiig pujuidaun antaknuk shiig aneasan pujajai.

Kristun shiig nemajin nuigtú Kristun shiig nemagchau

⁵ Aneetaiju yatsujuh, amek Kristu chicham umiktá tibauwa duka betek umikam wegame, nuniau asam Kristu nemajuidau atsumaid- aush yayame, imá senchi amina wainchataijum aidaun Kristun pachis chichagkagtak yujaidau amina jeemin kaunaina nunú. ⁶ Nunú aidaun ashí Jisusa nemajin aidaun ijunjamunum etsejuinawai, ame anejattsam yaimam nuna pachipas. Apajuin shiig awagma dutiksamek tuke yaita aents jintá wegak atsumainjinish. ⁷ Ditak Jisukristu aneamunum niina pachis etsegekagtatus jijnjaje, nunú aidauk Apajuí nemagchau aina nunú yaigbau atasag dakituinawai. ⁸ Nuaduí jutii yaimainaitji chicham dekaskea nuna tikich aidaunash ujaktí tusaik.

Diótfefes nuigtú Demetrio pachisa tibau

⁹ Wi Jisusa nemajin aidautigmin papiin agatjabiajim nuna Diótfefes dakitau tabaun antajai, nigka imá mina chichamjunak antugtuktinme tusa wakegau asa. ¹⁰ Nuniau asamtai wi anuí taan ijunjamunum niina titatjai, jutiin adaitamas pegkegchaun, wait ainawai tusa chichagtama nuna pachisan. Nuniau asa nigka yatsut aidaun ni jeen awaitanash dakitawai. Tuja nunú yatsut aidaun ni jeen jukita taunash, aikawaipa tawai. Nuniak nu yatsutjai ijunjajunak: Amek juwig ijunbaunmag wayawaipa, tusa jiikí idaiwai.

¹¹ Aneetaijuh, aents pegkegchaun takaa duka dakumkaipa, dekas pegkeja nunú takastá. Aents pegkejan takaa nuuwai Apajuinuk, tujash aents pegkegchaun takaa duka Apajuinak wainchau asa nuniawai.

¹² Ashí Demetrio pujutjin pachisajag pegkejan etsejuinawai, Apajuin chichame tawa imatiksag umiau asamtai. Jutiishkam duka dekainaji, tuja atumek jutii dekaskea duke etsejuinag duka dekagme.

Inagnaku akatmabau

¹³ Kuashat chicham pachisa ame agatmainuk ajutui, tujash nunak juwi agakun tutanak dakitajai. ¹⁴ Wi amina waamak wainkattajam nuanuí igkunisa chichasmi. ¹⁵ Shiig agkan anentaimesam pujustá. Kumpag juwi batsatina jujú kumpamjamainawai. Ameshkam jutii kumpají anuí batsatina nu makí makichik kumpamjutuata.

Aatus atí.

JUDAS PAPI' AGAGBAU

Judas kumpamkagtau

¹ Witjai Judasaitjai Jisukristu inake Santiago yachiyaitjai, atum Apajuí iina Apají anejatna nu etegkamutijum, Jisukristu kuitamsam batsatutigmin kumpamjime. ² Atumnash Apajuí wait anenkagtau, shiig agkan anentaimesa pujuta nunú, aneenita dushakam ajutjamtinme.

Waitan jintinkagtin aidau

³ Aneetaig yatsug aidauh, ubag aidauh, shiig senchi wakemajai jutii uwemat jukimua nuna pachisan agatjatasan. Tujash yamai dekas atsumamua nuna pachisan tajime: Kristu nemajin aidau imá niinig kajinas anentaimeina duka, Apajuí etejamu asag niina aentsji aina nunú shiig kuitamkatajum. ⁴ Tujash yamaik waitá jintinkagtin pegkegchau aina nu atum ijunbaunum wayawaje tsanugmajagtatus. Nunú aidau jintinkagtuinak: Pegkegchau aina dusha takamainai, Apajuik pegkegma ibau asa, ii nuniajinish tsagkugkagtumainai, tuinawai. Nunin Apajuí makichkia nuna, iina Apuji Jisukristua nunash dakituinawai. Nunin asantai dita suwimak jukitnun pachis, yaunchuk nagkamas Apajuí chichamen agaju ainawai.

Apajuí suwimak sukagtustinji pachisa etsegkamu

⁵ Juka atumek dekagminig aneemtikjime, Apu Apajuí Israel aents aidau Egipto nugkanum batsatun jiijuí, dutikauwaitak ni chichamen umiinachunak suwimkan suwak ijinauwai. ⁶ Tuja nayaimpinmaya aents aidau ditá imanjin kuitamtsuk, ditá batsamtaijinash ukukijaju aidaunak, Apajuí suwenum batsasuí, atak Jisukristu tsawan jegatai aents takasbaujin dijus titina duwi suwimkan susatatus. ⁷ Dita wajukawajua numamtuk yaakat Sodomamaya, Gomorranmayajai, nuigtú tikich yaakat nui tikiju aidaunmayash betekmas shiig pegkegchau aina nuna takainak, mai aishmagkuk pempeentunikiag dutiknaya batsamiagtai, Apajuí jii ajumaish kajinkashtina nunú jiiyai apek utsagkui. Nunú yaakat apekbauwa duwi dekamainai, aents tudaun takaidau suwimkan juwak tuke waitú pujutnujig awapita tusa.

⁸ Tujash jujú nunikaju aigkishkam nunú aents tsanumin aidauk, dita kajamjamujiya nuna aintus wejuinak, dita pegkegchau wakegamujiya nuna takainak, ditá iyashinak pegkegchau emainawai. Nunin Apajuí tabaunash dakituinak, nayaimpinmaya dekas senchigtin aina nunash pegkegchau chichajuinawai. ⁹ Tuja nayaimpinmaya aents aidaun apuji Miguel, Moisesa iyashin jukitatus takamá iwanchjai igkunik jiyanutu-inakush pegkegchaunak chichagtsuk ayatak: "Apu Apajuí suwimkan amasti", tiuwai. ¹⁰ Tujash nunú aents aidauk, dita wainchamujinak pegkegchaun chichajuinawai. Ditak kuntin anentaimeinachu asag dita wakegamunum pujuina numamtuk, dita pegkegchau wakegamujiya nunak wejuinak, iyashin pegkegchau weenawai.

¹¹ ¡Wait anentuinajai ditanak! Caín wajukauwa nunina duwi, tuja Balaam wajukauwa nunisag kuichik jukita tabauwai pegkegchau takaina duwishkam, aantsag Coré ni chicham intimtinig jakauwa

nuniktin asagmatai. ¹² Atum tikichjai aneeniamu iwaintuniktasajum jistamjumin, waitá jintinkagtin aidau wayawag, yuwinak umutnash umuinak, tikichnash ajantus diitsuk datsanmain wajainawai. Ditak imá ditanunak uyumainawai, nunidau asag yumi yutugchatnaitak yujagkim bukusea wajasun dase umpui yajá ajapama numamtuk wajainawai. Nuigtush yujag nejet aig, ajak nejetsuk wajama nunin ainawai, nunin aidauk tegai ajapam ajumaish tsapaishtinun megkae-maina nuniktin ainawai. ¹³ Ditak nayants senchi tsukatak ayatak saunak jiiyama numamtuk wajainawai, dita waji datsanmain takainamunum. Ditak yaya keeká wegau megkagama numamtuk wajakagtinai, suwenum batsamas ayamjashstinun tuke waitú batsamtina nuwi.

¹⁴ Adán uchi akiiamu aina nuna uchijí aidau, akii akiimainakua sieteya imania yujaká wegamunum, Enoc pujujukua nu juna pachis chichaak: “Apu, niina aentsji nayaimpinmaya aidaujai dekapamainchau wajas minaun wainjai, ¹⁵ ashí aents takasbaujin diijus titatus. Nuniak pegkegchau takasú aidau, tuja Apajuinash pegkegchau chichagkau aidanash suwimkan susatatus”, tiuwai. ¹⁶ Ditak chichaman yujajin, tsanumin aidau, dita wakejuinamunak takasag shiig aneastatus wakejin, niinunak pachimasag: Jutiiyaitji dekas iman aidautik, tumamin aidau. Tikich aentsnash igkuawag, imanchau aigkish, nunú aentsnumian jujukigtatus: Amek dekas pegkejaitme, tusag wainak tu yujajin ainawai.

Emetmamjajum pujustajum tusa chichagkagtamú

¹⁷ Tujash atumek aneetaig aidauwah, iina Apuji Jisukristu chicham etsegtugkatajum tusa ishiakbau aidau, ¹⁸ yaunchuk chichainak: “Tswan nagkankattak wajataik, aents aidauk, ashí pegkeg aina nuna dushikis chichajuinak shiig aneediagtinaí, nuninak dita pegkegchau wakegamujinak taká batsabiagtinaí”, tijua nu adeagtajum. ¹⁹ Nunú aidau atum Jisukristu nemagkau aidautigmin, dita jintinjamaínak datumtamak akaantamjatin ainawai. Nunú aents aidauk dita wakegamujinak takainawai. Nunin asagmatai Wakaní Pegkejishkam ditajaig ijutkatsui.

Akatmabau

²⁰ Tujash atumek aneetaig aidauwah, Jisukristuig kajintsá anentaimjum nuwig emetmamjajum pujakjum, Wakaní Pegkeji yaimpasmatai Apajuish aukjum pujustajum. ²¹ Nuniakjum Apajuí atumin anempaina duke anentaimtakjum, ii Apuji Jisukristu ni wait anenjabaujiya nuna iwaintugmaktatus wantinkatna nu dakastajum. Nuwi nagkamsaik ajumaish nijai kanakchatin tuke pujutnaitji. ²² Tuja makichik aentskesh: “Wisha uwemjatnashitag” tinujai, tusa utujimas anentaimaidau ainakuish, anenkai shiig ujaktajum. ²³ Tuja pegkegchaun takau akuish, jinum esawai tusa japikí emenaumaina numamtuk, yaigtajum uwemjatnume. Tuja tikich pegkegchaun takasushkam ainawai, dushakam wait anenjajum yaigtajum. Tujash senchi kuitamamkatajum, atumshakam dita pegkegchau takasbau utumkajum, nunú pegkegchau takasajum.

²⁴ Apajuí senchigtina nuuwai atumnak pegkegchau takasainum tusa kuitamajainuk. Niina emtin ni ijupagtina nunú tsawantinig, atumek shiig aneastinaitjume, atumin bakugmamainuk makichkish atsutin

asantai. ²⁵ Tuja Apajuik Jisukristu mantamdauwa duwi jutiinak uwentijamjauwai. Niiyai dekas wagaakuk, iman asa ni senchigtina nunak tuke atinai, imanisag atinai.

Aatus ati.

IWAINAKBAU

¹ Junak Apajuí Jisukristun iwaintukui, waji waamak uminjatta nuna Jisukristu ni inake aidaun ujakti tusa. Dutikam Jisukristushkam ni aentsji nayaimpinmayan awemam mina iwaintugkauwai. ² Dutijuau asantai, wi Jisukristunun wainkag nuna, tuja wi antukbaujua nunashkam, Jisukristu Apajuí chichamen pachis tujutbauwa nuna ashí ujaktatjime. ³ Shiig aneasagtinaí ju agagbaun ausag, atak uminjatin tibauwa juna shiig dekaawag betek umiidauk. Wagki ju uminkatnuk tsawantak ashí jegau asantai.

⁴ Witjai Juagkaitjai, atum Jisusa nemajin aidautigum siete yaakat Asia nugkanum awa nui batsatutigmin kumpamjime. Apajuí tuke pujuwa nu, ajumaish tuke pujutin, juwi taatna nunú, nuigtú Apajuí ekeemtaiji emtin Wakaní Pegkeji sieteya imajin niimtinai senchijin iwainauwa nujai, wait anenjamjag shiig agkan anentaimsa pujutan amastinme. ⁵ Nunisag Jisukristu dekaskea nuna betek etsegna nudaushkam ajut-jamtinme. Nigka aents jaká nantashtain nagkamak ni nantakiu asa, ashí ju nugka juwiya apu aidaun nagkaesau senchigtinaí. Kristuk jutii anempau asa ni numpe ukajauwa nuaduí ii tudaujin suwimak jumaina nuna agkanmitkagmauwai. ⁶ Dutijabau asa jutiinash apu etamak, Apajuí niina Apajiya nuna takajin atinme tusa sacerdote etamkajui. Nuaduí imá nigki senchigtin asantai, ajumaish nigki ememattai atí. Aatus atí. ⁷ ¡Kristuk yujagminum minitnai! Nunitai ashí aents aidaun, nuigtú Jisusan mau aidaushkam wainkagtinaí. Dutika wainainak ashí aents nugkanmaya aidaun buutiagtinaí. Duka dekaske, aatus atí. ⁸ Apajuí tuke puju, ajumaish tuke pujutin, juwi taatin ashí senchigtina nu chichaak: “Witjai nagkamsan ashí waji aidaun najankaunuk, tuja wikitjai nu waji aidaun nagkanjati titinaitag nunashkam”, tawai.

Juan ajuntai Patmos tutainum pujusá Aentsmaga Akiinawuwa nu wainkamu

⁹ Witjai Juagkaitjai, atumi yatsumitjai. Jisusa nemaju asan waiti-aknush emamkesan katsunjau asan, atumjai betek Apajuí inamtaijin pujustinaitjai. Wika Apajuí chichamen Jisukristun pachis tawa nuna etsejai, ajuntai Patmos tutainum ajapjuawagmatai pujubiajai. ¹⁰ Nunikan tumig tsawagmatai pujai, Wakaní Pegkejiya nunú mina tajutiu asa, mina ukujui trompeta umpuam shinuwama imatun antumtujukmayi. ¹¹ Nu chichaamun antai: “Witjai nagkamsan ashí waji aidaun najankaunuk, tuja wikitjai nu waji aidaun nagkanjati titinaitag nunashkam. Ame wainam nu, Jisusa nemajin aidaun siete yaakat Asia nugkanum: Efeso, Esmirna, Pérgamo, Tiatira, Sardis, Filadelfia, Laodicea aina nu papiinum agajam ishitekata”, tujutmayi. ¹² Tujutkui: Yaki aujtawa tusan ayampam diikman, siete candelero ayatak orok aidaun wainkabiajai. ¹³ Nuna ejapeen Apajuí Uchijiyaitak Aentsmaga Akiinawuwa aajakua numamtin, esagman nugkuaju dawea aatus nuntumag, akachumtai oro najanamun detsepega aatus akachumau wajattaman wainkabiajai. ¹⁴ Intashishkam shiig puju, uwig pujun ujegama imanuyi, nieve tutaya iman. Jiishkam jii kegak wajuakea

imanibi. ¹⁵ Tuja naweg jiju jinum jiyamu dewa wegama imanun etsanmayi, chichameshkam tuna dujaji uutama imatmayi. ¹⁶ Niina uwejé untsujin siete yayan takakuyi, weninia makichik espada mai yantamejai etsakamua iman jiinmayi. Yapig etsa shiig senchi etsantak etsantama imanik etsanmayi. ¹⁷ Imanun wainkan, ni wajamunum ayaumsan tuke jakaujai betek iyaagbajai, nuniai ni uwejé untsujin antintak: “Sapigmakaipa. Witjai tuke pujunuk, wikitjai ashí wajiin najankaunuk, nunin asan wikitjai nagkanjati titinnuk. ¹⁸ Wika tuke pujuwaitjai, nunin asan mantuawagmataish ataktú nantakin yamaikish tuke pujajai, aatus atí. Wikitjai aents jinau aidaunash: Nantagtajum tumainnuk. ¹⁹ Agagta ame waji wainkaum nunú, yamai awa nu, jujú nagkaemagmatai atak atina dushakam. ²⁰ Mina uwejuí untsuja nui siete yaya wainkaum nu, tuja siete candelero ayatak orok wainkaum duka juuwai: Siete yaya duka, siete aents Jisukristu nemajuidaun diin aidau siete yaaktanunum batsata nuna iwainawai. Tuja siete candelero wainkaum dushakam, siete yaaktanunum mina nemagtuidau batsata nuna iwainawai.

2

Efesonmaya chicham agatjamu

¹ “Agatjata Efesonum Jisusa nemajuidaun diin puja nunú, dukturakum:

Uwejé untsujin siete yayan takaku, candelero ayatak orok najanamunum ejapena wekaga nunú chichaak aatus tawai: ² Wika atum takaajum nunak wainjai, atumek senchi takaakjum utugchat igkuakjumesh emamkesjum inagkeagme. Atumek pegkegchau aina duka dakitajume, nuigtush dekagjime ‘Jisukristu awemamuitjai’ tuidaush dekapsajum waitjamu dekagjum nunashkam. ³ Mina anentu asajum waitiakjumesh, kuashat utugchat igkuakjumesh, emamkesjum mijamtsuk takasugme.

⁴ Tujash makichik waji idaisajum duwi junik diyajime, atum yama nagkamchakjum anentujakbaujum imanisjumek anentsujum duwi. ⁵ Adeagta dusha wajuakeakmea nunikume nunú, nunikam pujutjum yapajiam ataktú nagkamata, nagkamchakjum anentiujum nunisjumek. Nuniachkugminig wamkesan tajuan, wi candelero amasuitjim nuna jujuktatjime, yapajintsuk nunisjumek pujakjuminig. ⁶ Tujash ju pegkeg ajutjamui, wi Nicolaíta aidau takatjin dakitajum nunisjumek atumshakam dakitajum nunú.

⁷ Ni antutajai ajamuk, Wakaní Pegkeji mina nemagtin aidaun: Apajuyai kajintsá anentaibaunum pegkegchaun depetkau aidaunak, yujag pujutan sukagtin nayaimpinum Apajuí pujutain ejapeen waja nuna ayujatnaitjai tawa nuna antukti.

Esmirnanmaya chicham agatjamu

⁸ “Agatjata Esmirnanum Jisusa nemajuidaun diin puja nunú, dukturakum:

Tuke puju ashí wajiin najankauwa nu, nigki nagkanjati titina nunú, nuigtú maamash ataktú nantakí puja nu chichaak aatus tawai: ⁹ Wika atum takaajum nunak wainjai, tuja atum uju-nauch asajum waitiajum nunash wainjime, tujash atumek dekas shiig pegkeja nu jukitnaitjume. Tuja: Jutiik judío asaja Apajuí

aentsji ainaji, tumamaidau pegkegchau chichagtamaina nunashkam wainjai, nunú aina duka iwanchdau ainawai. ¹⁰ Atumek waittsattajume, tujash ishamkaigpajum. Atumnak iwanch wakejamun takau aidau achigmakag egkepattajume. Dutik iwanchik waitk-agmastatjume dekaskenmash Kristuig kajinas anentaimaina tusa dekapjamak. Dutijamawagmatai wajumak tsawantai waittsattagme. Mantamainakuish minai kajintsá anentaimtak mijakaigpa. Jakag-minchakam wi pujut tuke atina nuna amastinaitjime.

¹¹ Dita antutaiji ajamuk, Wakaní Pegkeji Jisusa nemajin aidaun chichajak: Apajuiyai kajintsá anentaibaunum pegkegchaun depetkau aidauk, jinum pujusajag waittsashtin ainawai tawa nuna antuktinme.

Pergamonmaya chicham agatjamu

¹² "Agatjata Pergamonum Jisusa nemajuidaun diin puja nunú, dutikakum:

Espadaji mai yantamejai etsakamu ajá nu chichaak aatus tawai: ¹³ Wika atum takaajum nunak wainjai, iwanch inama nui pujam nunash wainjime, tujash minak nemagtuinagme. Antipas mina chichamjun etsegtujin asamtai, anuí iwanch inama anuig maawagmataish, minai kajintsá anentaimtak idaisachugme.

¹⁴ Tujash pegkegchau takaajum nu tumain ajutui: Balaam Balakan chichajak: Israel aents aidauk tunamamain ainawai, apajimtai anagkuamu aina nuna yuwinak, nuwanash tsanijimainak tusa tiuwa nuna, atum ainajum anuiya wajumak nuna idayinachush ainawai. ¹⁵ Nuigtú wi Nicolaíta aidaun dakitag nu jintinkagtuamun idayinachush ainawai. ¹⁶ Nuaduú pujutjum yapajiatajum, nu nuni-achkugminig, wi mina wenujuiya espada mai yantamejai etsakamu jiina duwi ditajai maaniattajai.

¹⁷ Ni antutaiji ajamuk, Wakaní Pegkeji Jisusa nemajin aidaun chichajak: Apajuiyai kajintsá anentaibaunum pegkegchaun depetkau aidaunak, yutai maná tutai nayaimpinum uukbau awa nuna ayujatnaitjai, dutikakun kayauch pujunum yamajam dita daaji agagbaun susatnaitjai. Nunak makichkish dekamainchau ainawai, imá nuna juwa duke dekaatnai, tawa nuna antuktinme.

Tiatiranmaya chicham agatjamu

¹⁸ "Agatjata Tiatiranum Jisusa nemajuidaun diin puja nunú, dutikakum:

Apajuú uchijí, jii kegak wajukeya imanun jiiimkauwa nu, nawesh jiju jinum jiyamu dewa wegama imanun nawemkawa nunú chichaak aatus tawai: ¹⁹ Wika atum takaajum nunak wainjai: Mina anenjum nuna, kajintsá anentaimjutjum nunash, yaimainajum nunashkam, emamkesjum pujamugminash. Atum takaajum duka nagkamchaku takajakuitjum nu inagkeasjum yamaik takaagme.

²⁰ Tujash pegkegchau takaajum nu tumain ajutui: Atumiin nuwa Jezabel daagtin puja nu, Apajuú etsegtinaitjai tusa, mina inakeg aidaun tsanuak, apajimtai yutai anagkuamush yumainai, tuja nuwash tsanijimainai tusa jintinkagtuakuish idaijume. ²¹ Nuniakuish tsawantan susajai pujutjin yapajiati tusan. Tujash tsanijimat idaitanak dakitawai. ²² Nuniau asamtai niina pegajinig jatan susan aepsattajai, dutikakun niina tsanijimau aidaunash dita shiig senchi

waittsagtinun awetittajai. ²³ Dutikakun ditá pujutjin yapajitsuk nunisag batsatkuig, nu nuwa jintinkagtamujiya nuna wejuidaunak ijinattajai. Nuna dutikai ashí mina nemagtin aidauk dekawagtatui, wi aentsú anentain, nuigtú anentaimejtajinash shiig dekauwaitag nuna. Nunin asan maki makichkitigmin atum takasbau diisan amastatjime. ²⁴ Tuja atum Tiatira batsatutijum, nu nuwa jintinkagtamu umigtsuk, iwanchdau duwikish dekaachbau jintinkagtuinaji tuina dusha dekachutigminak, tikich atum umimainnak tichattajime. ²⁵ Tujash dekaskea nu dekauwaitjum duke kuitamkatajum, nuniagmin taatjai.

²⁶ Apajuiyai kajintsá anentaibaunum pegkegchaun depetkau aidaunak, nuigtú wi wakegamua nunak takai takainakua nagkanbaunum jegaidaunak, wi ashí aentsú apuji emaktatjai, ²⁷ mina Apag Apu etiuwa dutiksanuk. Dutikamu asag, ichinak duwe najanamu jiju jukí awatam tsainak utsanmaina numamtuk, aents pegkegchau aidaunak awajagtinai. ²⁸ Dutikakun yaya tuke tsawampauwa nuna susatnaitjai. ²⁹ Ni antutaji ajamuk, Wakaní Pegkeji Jisusa nemajin aidaun tawa nuna antukti.

3

Sardisnumia chicham agatjamu

¹ “Agatjata Sardisnum Jisusa nemajuidaun diin puja nunú, dutikakum:

Wakaní Pegkeji sieteya imajin niimtinai senchijin iwainauwa nu ajamua nu, siete yayan takaka nunú aatus tawai: Wika atum takaajum nunak wainjai. Atumek: Apajuí takajin ainawai, tama naatjume, tujash atumek Wakaní Pegkejiya nu takamtijamainakui nuniatsjume. ² Atum takaajum duka Apajuinak shiig awagmatsui. Kanajujai betek ainagme. shintaagtajum, nunikjum kakanmamsatajum pegkeg takastasajum. Wakaní Pegkeji takaamua nu tikima emegkautsuk. ³ Adeagtajum pegkeg jintinkagtamu antukuitjum nunú. Duke umiakjum pujutjum yapajiatajum. Nuniachkugminig wi kasajai betek minittatjime, nu tsawantiniap taattawa tusa anentaimejtashbaunum.

⁴ Tujash Sardisnum pujautijum tikich pegkegchau takainakuish, atum pegkegchau takaschau aidautigmek, aents jaanchjin tsuwapachujai betekak ainagme. Nu aidauk jaanch pujun nugkujag wijai yujasagtinai, Apajuí wakegamun takasaju asag. ⁵ Apajuiyai kajintsá anentaibaunum pegkegchaun depetkau aidauk, jaanch puju anugkuam agtinai. Pujutan jukiaju aidau daaji agatkamua nui, ditá daaji agagbauwa nunash tuke esakagchatnaitjai, ayatak mina Apajun ashí ni aentsji nayaimpinum batsata nuna emtin: ‘Juka midau ainawai’, titinaitjai. ⁶ Ni antutaji ajamuk, Wakaní Pegkeji Jisusa nemajuidaun chichaja nuna antuktinme.”

Filadelfianmaya chicham agatjamu

⁷ “Agatjata Filadelfianum Jisusa nemajuidaun diin puja nunú, dutikakum:

‘Pegkejam’ ‘Dekaskenak chichauwa’ nunú, David inamajakua imana nunú, ni ajumaish tuke inamtina nui pujusagtinun, ya aidauna wayaati titatua, nunak makichkish yajuptumainchau aina

nu, tuja ya aidauna wayaashti titatua, nunashkam makichkish yajuptumainchau aina nunú chichaak aatus tawai: ⁸ Atumek machikiuch ainayatkugmesh mina chichamjuk intimjutsuk betek umikú asagmin, atum mina pachittsajum tikich aents aidau ujat-tajum nuna, jintan epetjainuk makichkish atsawai. ⁹ Anuí Filadelfianum judío ijuntaijin: Wishakam judío aentsuitjai, tusag ijunaina duka iwanchdau ainawai, duka midau ainatsui. Nunú aina nuna atumi emtimin tikishmitkaktatjai, wi atumin aneajim nuna iwaintukan ditan idatsaktasan. ¹⁰ Ashí aents eke nugká batsabiagtata duwik utugchat ajiagtinai, nunisag waitiamushkam ajiagtinai. Nunú nuniamunum dekaattajai, ya aidauwa minaish kajintsash anentaimainawa, tuja ya nuninatsua nuna. Tujash aminak kuitamkattajame, wagki amek, wi minaig kajintsá anentaimta tiuwaitjam duka imatiksamek umigtuku asamin.

¹¹ Wika waamak minittajai, nuniktin asamtai atum minai kajintsá anentaimainajum nunisjumek anentaimsatajum, nuniagminig Apajúí amasagtina nunak, tikichik makichkish atanjamainchau ainawai. ¹² Apajúiyai kajintsá anentaibaunum pegkegchaun de-petkau aidaunak, jega mina Apag ememattai dekas eme anentsá diitaiya nui apusagtatjai, dutikamu asag nuwig tuke batsamsagtin ainawai. Ditak Apajúí aentsji wajasú asag, mina Apajúiu yaaktaji yamajam Jerusalén nayaimpinmaya akaikitna nui batsamsagtinai, nuniakui wi mina daag yamagman ditan dekamtikattajai. ¹³ Ni antutaiji ajamuk, Wakaní Pegkeji Jisusa nemajin aidaun chichaja nuna antuktinme.

Laodiceanmaya chicham agatjamu

¹⁴ “Agatjata Laodiceanum Jisusa nemajuidaun diin puja nunú, dutikakum:

Apajúí anagkagtuamua nuna betek umina nu, Apajúí dekas tabaujin imatiksag etsegna nu, tuja Apajúiyai ashí najankauwa nunú chichaak aatus tawai: ¹⁵ Wika atum takaajum nunak wainjai: Atumek minak betek umigtutsuk machik umigtajume. Dekaskenmag betek umigtumainaitjume, nuniachkugmesh makichkish umigtu-maitsugme. ¹⁶ Tujash machikiuch umigtau asamin, dakitjan idaisat-tajame. ¹⁷ Amek wiyakchaitjai tumame, tau asam, makichkish atsumamuk atsugtawai tame. Tujash amek, Apajúí diismak wainak wekayin, shiig aneas pujuchu, ujunauch, wainmachu, wisú pujam duka dekaamatsme. ¹⁸ Nunin asamin tajame: Dekas wiyakuch atasam, oro jiiyai apea ayatak orok jukimu sumamainaitam numamtinuk, minai kajintsá anentaibaunum ashí ame atsumamuk ajutjamtata nuuwai. Tuja wisú wegakun datsan wantinkaig tusam, jaanch puju tsuwatchau nugkumaina numamtinuk, pegkejan takamtijusti tusam minai idaimamsattam nuuwai. Tuja aents wainmachu niimti tusa ampi jukí tsuwamaina numamtinuk, mina dekamtijuati tusam segattatam nuuwai.

¹⁹ Wika, wi aneamug aidaunak senchi jiyaajai, dutikachkunush suwimkan suwajai. Nuaduí pegkegchajum aidauk Apajúí idaitakjum pujutjum yapajiatajum. ²⁰ Antuktajum, wi amina jeemin taa wajasan: Pujamek, tusan unsumainaitjam numamtuk wajajai.

Tuja ame wayaata tusa ipatkuminig wayattajai, nunikan amijai chichaakun, amijai jimagkan yujumkan yuwattajai.

²¹ Apajuiyai kajintsá anentaibauwai pegkegchaun depetkau aidauk, wijai betek inamjagtinai. Wi depetmaku asan mina Apagjai inamag nunisajag. ²² Ni antutaiji ajamuk, Wakaní Pegkeji Jisusa nemajin aidaun chichaja nuna antuktinme.”

4

Nayaimpinmaya aents Apajuí emematbau

¹ Juna ashí wainkan niimkaman, nayaimpinmaya makichik waiti ujani atatman wainkabiajai. Nuanuiya, yama nagkamchaku chicham trompeta umpuamu shinuwama imatu antukbauwa nu chichagtak: “Juwí wakata, nunikamin ju nagkaemagmatai atak uminkatna nuna iwaintuktajame”, tujutmayi.

² Nuna taig, Wakaní Pegkeji mina egkemtujumtai diikman, wainkabiajai nayaimpinum Apú ekeemtaiji umikbaunum makichik ekeematman. ³ Nunú eketa nuna niimeg, kaya dekas pegkeg akik diamante tutai, tikich kaya cornalina tutai aina imanuyi. Nunú eketa nuanuí, pagki wajaé tutayama nunin kaya esmeralda tutai pegkeja iman etsantug tentea amayi. ⁴ Nunú ekeemtaiya nunak, veinticuatro ekeemtai aidau tentea amayi, nuanuí veinticuatro apu aidau jaanch dekas pujan nugkuinaju, atsejutai aidaunash ayatak oronak atsejaku pekabiagmayi. ⁵ Nuniamunum ekeemtai ejapeen puja nuwiya jiini-agmayi peem aidau, chaajip aidau, chichaamu aidaushkam. Nunú ekeemtai emtin siete jii ekemagbau amayi, duka Wakaní Pegkeji sieteya imajin niimtinai senchijin iwainauwa nuuwai. ⁶ Nuigtushkam ekeemtai emtin nayantsa numamtin vidrio* saawiya iman wajas amayi.

Nuigtú ekeemtai ejapeen awa nunak cuatro iwaaku aidau, ukuujin tuja emtinish kuashat jii ajamu aidau, nuna tenteawag agmayi. ⁷ Makichkia duka león niimtin ai, tikichik toro niimtinuyi. Nuniai tikichik aents niimtin ai, tikichia duka ukukuí nanamujai betekayi. ⁸ Nunú cuatro iwaaku aina duka, makí makichik seis nanape ajiagmayi. Jiishakam ashí iyashin ajiagmayi. Nunú iman aidau tuke itattsuk tsawaish, kashishkam:

“¡Apajuí ashí senchigtina duka, pegkegmai, pegkegmai, pegkegmai, Apajuí tuke pujú, ajumaish tuke pujutin minitna nunú!”, awajiagmayi.

⁹ Nunú aidau Apajuí tuke pujuwa nu ekeemtainum eketun emematainak, eme anentus see tuinak imatjiagtai, ¹⁰ veinticuatro apu aidau pekajaidaushkam tikishmajag, ekeemtainum eketu tuke pujuwa nuna emematuinak, dita atsejuinakbaun kuwakí jukiag niina emtin aputuinak:

¹¹ “Apuh, ameketme eme anentsá emematam amainmek, senchigtinaitam ibau asam.

Wagki ame ashí wají aidauk najankauwaitme, amek wakejusam najankau asamin, ame wakegamunmag ainawai”, awajiagmayi.

* 4:6 “Vidrio” tawa duka botella saawiyama nuninai.

5

Uwig

¹ Wainkabiajai ekeemtai ejapena pujaunum eketa nunú, uweje úntsujin makichik papí mai yantamejai agagbau, sieteya imania achiamun takus ekeemtatman. ² Nuniai wainkabiajai makichik nayaimpinmaya aents senchigtin senchi untsamak: “¿Yaita dekas imanush, juna kuwajug papiin atimainush?” tusa iniimtatman. ³ Tujash nayaimpinmayagkesh, nugkayagkesh, nugká initkeniagkesh nu papiin ujaká diimainuk atsusmayi. ⁴ Nunú papiin ujaká diis augmainuk atsau asamtai, wika senchi buutbaijai. ⁵ Nuniai apu aidau pekaja nuwiya makichik chichagtak: “Buutipa, David apu we inamajakua imana nu, Judanmaya León tutaya nunú depetmake. Nuniku asa niyai ju papí sieteya imania achighbauwa juna ukuitug ujamainuk”, tujutmayi.

⁶ Takui diikman wainkabiajai, makichik uwig maamu aajakua numamtin, ekeemtai ejapeen cuatro iwaaku aidau, nuigtú apu aidau pekaja nu ejapeam wajattaman. Duka siete kachují, nuigtú siete jii ajibi. Nu jii aina duka iwainawai, Wakaní Pegkeji sieteya imajin niimtinai senchijin iwainauwa nu, ashí nugkanum ishiakbauwa nuna. ⁷ Nu uwija nunú, ekeemtainum papiin uweje úntsujin takus eketa nuna jegantun jujukmayi. ⁸ Nuna papiin jukimtai, cuatro iwaaku aina nunú, veinticuatro apu aina nujai Uwijá emtin tikishmajagmayi. Nunú aidauk awattai arpan, copa ayatak orok najanamunum incienso aimjamun ashí takuinaku agmayi. Nu inciensowa duka, Jisusa nemajuidau Apajuí augbauwa nuna iwainabi. ⁹ Nuninak yamajam kantamainak: “Ameketme aanú papí jukim, achighbau aina nu ukuitmainmek. Wagki amek maamu aajakú asam, amina numpem ukajuitam duwi, ashí aents nugkanmaya shuwin, puju, yagkú, jegkemtin aidauti, tikich chicham chichaaku aidauti ayamkagtukuitme Apajuinu atinme tusam,

¹⁰ nuigtushkam apu ekagtim,

Apajuin takagsatnume tusam sacerdote ekagtuku asamin, nugkanum inamjattaji”, wajagmayi.

¹¹ Nuna takui diikman, nayaimpinmaya aents dekapatash dekapamainchau, ekeemtai ejapeen awa nuna cuatro iwaaku aidau, apu aidaujai ashí tenteawag pampainak, ¹² senchi jiiakg kantamainak:

“¡Uwig maamu aajakua,

nuuwai dekas wagaaku senchigtinuk, wiyakuch, yacha,

eme anentsá diitai, ememattai, tuke kantamjutai atinuk!” wajagmayi.

¹³ Nuigtú ashí najankamu nayaimpinmaya, nugkanmaya, nugká initkenia, nayantsanmaya, nuigtú ashí waji núi ayaa dushakam kantamainak:

“¡Ekeemtainum eketa nu, Uwigjai senchigtina ibau asamtai,

eme anentsá kantamjuinaku,

tuke ajumaish ememattai atin atí!”, awajuidaun antukbaijai.

¹⁴ Aatus imatjiagtai cuatro iwaaku niimtin aina nu aiinak: “Aatus atí”, tiagmayi. Tiagtai veinticuatro apu aina nu tikishmag batsamsag, emematiagmayi ajumaish tuke pujutna nuna.

6

Uwig sieteya imania papí achigbaun ukuitung ujakbau

¹ Nuniai papí achigbauwa nuwiyan makichik Uwig ukuinkabi, dutiktai cuatro iwaaku aina nuwiya makichik ipamat wajukeyama imatuk: “¡Tantá diistá!”, tujutmayi. ² Takui diikman makichik caballo puju, tuja aents nui entsatkauk makichik nagkin takus ekeematman wainkabiajai. Duka makichik atsejutai susamuyi, dutikamu asa ni depetmakuyi, nuigtushkam nigki depetmaktinuyi.

³ Nu nunikmatai jimaja ju achiamun Uwig ukuinkabi. Dutiktai cuatro iwaaku aina nuwiya jimaja nu chichagtak: “¡Tantá diistá!”, tujutmayi. ⁴ Tujutkui jegantan diikman caballo kapantun wainkabiajai. Nui entsatka nuna espada esagman susabi, ashí aents aidaun maanimitkati, dutikainam pempé pempeentunikiag maanidau asagmatai nugkanum agkan batsatbauk atsutí tau asa.

⁵ Nuigtushkam kempatuma nu achiamun Uwig ukuinkabi. Dutiktai cuatro iwaaku aina nuwiya kempatuma ju untsujuk: “¡Juwi tantá diistá!”, tujutmayi. Tujutkui jegantan diikman caballo bukusean wainkabiajai. Nui entsatkauk kijin dekapatain takakuyi. ⁶ Nuniamunum nu cuatro iwaaku aidau ijuna nuna ejapenia chichaak: “Makichik tsawan takasbauwai makichik kilo trigon jukiagtinaí, tuja makichik tsawan takasbauwai kempatum kilo cebada suwam agtinaí. Nu dutikakmesh aceite, umutai vino aina duka emeskaipa”, timayi.

⁷ Nuna timatai cuatro achiamua nuna Uwig ukuinkabi. Dutiktai cuatro iwaaku aina nuwiya cuatrowa nu untsujuk: “¡Juwi tantá diistá!”, tujutmayi. ⁸ Nuna tujutkui jegantan diikman caballo yampia wajas wajaun wainkamiajai. Nui entsatkauk Jatai daagtinuyi. Nuna pataetakuyi jakau wakaní batsamtaiya nu. Caballonum entsatka nunak, ashí aents nugkanmaya aina nuna jimaitukjiya nuna jimaitukjin maanimitkik, nujantai ijinak, jatá susa ijinak, kuntin kajen nungká batsata nuna ayujak ijinati tibaui.

⁹ Juna dutika idayak, cinco achiamua nuna ukuinkabi. Dutikakui diikman wainkabiajai, altar tutaya nuna nugkaan, Apajuí chichamen etsegtin maamu aidau wakaní ijunas, ¹⁰ senchi untsukag: “Apuh pegkegmah, dekaskenum chichauwah, ¿wajupa asamea iina mantamawajua dusha suwimkash susattame?” awajiagmayi. ¹¹ Nuna imatuidaun jaanch puju aidaun tinamak chichajak: “Ayamkujum machik tsawan dakastajum, tikich aidaunash atumin mantamawajua dutiksag mai mainakua, ashí maawagtina duka jegatsui”, timayi.

¹² Nuna tusa idayak, seis achiamua nuna Uwig ukuinkabi. Dutikakui diikman senchi uujun wainkabiajai. Imaniamunum etsag shiig bukusea kayushkijai betek wajasmayi, nantushkam kapantu numpajai betek wajasmayi. ¹³ Yaya punkau aidaushkam nugkanum kakeyagmayi, yujagké nejeen dase senchi dasentak pegam kakegama numamtuk. ¹⁴ Nayaimpishkam megkaekabi, papí ninuja jutayama numamtuk. Ashí muja aidauk, ajuntai aidaujai pachimdagak patamsabi. ¹⁵ Imanitai nugkanmaya apu aidauk waanum waigkag, nuigtú mujanum kaya muun ayaunum uumkag, aents eme anentsá diitai aidau, wiyakuch aidau, suntuajan apuji aidau, kuashat aentsnum inamin aidau, inaku waitkatai aidau, agkan batsamin aina nujai ijunjag batsamsag ¹⁶ mujan, kaya aidaun chichajuinak: “Waamak yutujatuam

uujatkakia, Apajuí nayaimpinum eketa au waipakai, Uwig suwimkan sujamsai, ¹⁷ yamaik ni kajeká suwimkan sukagtustina duka tsawantak jegae, makichkish yamaik suwimkanak uwemtumain ainatsui”, wajagmayi.

7

Israel aents aidau uchijí wegantu aidaunmaya nijayin agatkamu

¹ Nuigtú cuatro nayaimpinmaya aents aidau, makí makichik kanajag nugka najatamu aina nui ijuntatman wainkabiajai, dase nugkan, nayantsan, makichik numinakesh umpugkái tusag kuitamainak.

² Nuigtushkam wainkabiajai tikich nayaimpinmaya aents etsá jiiintainia minak, sello Apajuí tuke pujuwa nudaun takusá minis, cuatro nayaimpinmaya aents aidau nugka, nayantsajai emeskata tusa senchi susamu ijuna nuna, senchi untsuká: ³ “Yamaikik nugkak, nayantsak, numi aina dushakam emeskaigpajum. Iina Apajuiji inake aina nuna nijayin eke sellowai ijuasjinkik”, timayi.

⁴ Tusa tabaunum: “Ashí Israela uchijí wegantu aidau dekapamak, ciento cuarenta y cuatro mil aidau nijayin selló awakamu ainawai”, tabaun antukbaijai. ⁵ Dutikamu aidauk:

Judá wegantunmaya doce mil,

Rubén wegantunmaya doce mil,

Gad wegantunmaya doce mil,

⁶ Aser wegantunmaya doce mil,

Neftalí wegantunmaya doce mil,

Manasés wegantunmaya doce mil,

⁷ Simeón wegantunmaya doce mil,

Leví wegantunmaya doce mil,

Isacar wegantunmaya doce mil,

⁸ Zabulón wegantunmaya doce mil,

José wegantunmaya doce mil,

Benjamín wegantunmaya doce mil aina nunú agmayi.

Pujun nugkuinaju aidau kuashat tuwakagbau

⁹ Juna ashí wainkan niimkaman, Apajuí ekeemtai pujamunum Uwigshakam nui ayaumas waja nuna emtin, kuashat aents dekapatash dekapamainchau, ashí nugkanmaya aents aidau, ditash chichaaku aidau jegkemtin, shuwin, puju, yagkú aidau jaanch pujun nugkuaju aidau dukan takuinasua ijunaidaun wainkabiajai. ¹⁰ Nunidau, ashí pampaajag senchi untsumkag:

“¡Jutii Apajuiji ni ekeemtaijin eketa au,

Uwigjai jutiinak uwemtijamjaje!”, wajagmayi.

¹¹ Nuniai nayaimpinmaya aents aidau ekeemtaiya nuna tentea wajaidaushkam, apu aidaush, cuatro iwaaku aina nujai, ekeemtai emtin ashí tikishmajag tsunsumawag, nijayin nugkan antig pujusag Apajuin emematuinak:

¹² “¡Dekaske aatus atí!

Iina Apajuijiya duka tuke pegkegnum chichagtai,

ememattai, yacha, see tutai, eme anentsá diitai,

senchigtin, senchia ibauk atin atí.

¡Aatus atí!”, wajagmayi.

¹³ Nuna tiagmatai, apu pekaja nuwiya makichik chichagtak: “Pujun nugkuaju aina aush ζya ainawa, tuwiya kaunkaje?” tusa inintsabi. ¹⁴ Tujutkui: “Apuh, ame dekam jama” tibaijai. Tai ni chichagtak: “Juka shiig senchi waitkasbau aina nunú, Uwijá numpeen jaanchjin nijakag ibau puju emakaje.

¹⁵ Nuniku asag Apajuí ekeemtaijiya nuna emtin ijunas, jega Apajuí ememattaiya nui

kashi tsawaijai takajuinawai.

Nuniau asagmatai, ekeemas inama nu ditanak kuitamkattawai.

¹⁶ Dutikamu asag nujantaish, kitakaish, etsa sukuinam seemakugkesh waittsashtin ainawai.

¹⁷ Apajuí ekeemtaiji ejapeen puja nui, Uwig waja nunú, aents uwijá kuitamin uwigjin kuitamama numamtuk, yumi pujutan sukagtina nuna amitnai.

Tuja Apajuí ditá negaikijinak ujuktinai”, tujutmayi.

8

Siete achiamua nuna Uwig ukuikamu

¹ Nu nunikmatai, siete achiamua nuna Uwig ukuinkabi, dutikamtai nayaimpinmag bitat wajas asabi jimaituk hora tumain. ² Nuniamunum wainkabiajai siete nayaimpinmaya aents aidau, Apajuí eketbaunum ayaumas wajaidaun, nuna siete trompetan tinamkagmayi. ³ Nuniai tikich nayaimpinmaya aents, yukunta nunin ayatak orok najanamun takus, altar ayatak orok najanamunum jegan wajasmayi. Nunikmatai kuashat incienso nui chimpijuabi, nunú incienso Apajuí aentsji aidau Apajuí augbaujiya nujai pachimag apeati tusa. ⁴ Dutikamtai nayaimpinmaya aents takakbauwa nui, incienso, nuigtú Apajuí aentsji aidau Apajuí augbaujai auk, ijumnag bukuiti Apajuí eketbaunum wamayi. ⁵ Nuniamunum nayaimpinmaya aents, nunú apeamu keettaman incienso jutainum aimak juki, nagkimá nugká ajapabi. Dutikamu nugkanum iyautai ipamat, chaagpijai tuutainai nugkashkam ugmayi. ⁶ Imatiagtai siete nayaimpinmaya aents aidau, siete trompetan takus ijunushkam uminiagmayi umpuajagtatus.

⁷ Nagkamchak makichik trompetan umpuagmayi, dutikamtai bichan, jii numpajai pachimjamun nugká nagkimá ajuabi. Dutikamtai nugkanak jimaituk amaisattak ashí numi aidaun, dupa samekbau aidaujai apekmayi.

⁸ Nunikmatai jimaja ju trompetan umpuagmayi, dutikamtai makichik muja muunta iman kegaun nayantsanum nagkimá ajugmayi. Dutikamtai nayantsan jimaitukjin amaisattak numpa wajasmayi. ⁹ Nuniku asamtai namak nayants batsamin aidauk jinawagmayi, lancha nui ayauk ashí esakagmayi.

¹⁰ Kampatuma nu trompetan umputai, nayaimpinmaya makichik yaya muun keeká japiinak, namak aidau, yumi pukuni jiinin aina nuna jimaituken amaisattak iyagmayi. ¹¹ Nunú yayak Yapau daagtinuyi, nunin asa yumi aina nuna jimaitukjin amaisattak yapau awajsabi. Nuniku asamtai kuashat aents nuna uwajajuk jinawagmayi.

¹² Nunikmatai cuatrowa nu trompetan umpuagmayi, nunikmatai etsa, nantu, yaya aina duka jimaitukjin amaisagtatak besekagmayi,

besekaja nunisag suwe wajasagmayi. Nunik kampakum hora kashi tsawaishkam etsanchagmayi.

¹³ Nu nuniku ai wainkabiajai nuniakun antukbaijai, makichik ukukuí* nayaimpi ejapeen nanaak minis, senchi untsumak: “Ae, ae, ae, shiig ishamain atatuí nugká batsatina nudauk, kampakum eke trompetajin umpuinatsu nunú umputai” wajattaman.

9

Cinco ju trompeta umpuagbau

¹ Cinco nu trompetajin umpuagmatai, nayaimpinmaya makichik yaya nugká iyaittaman wainkabiajai. Nuna susabi yawin, waa muun ishamain akagu epenbaun ujaiti tusa. ² Dutikam waa muun ishamain akagu epenbaun ujaimtai, aja tsajutkau apeam bukuituwama imanik bukuiti jiniimayi, imaniak etsanak suwe awajsabi, daseshkam nunú bukuita ibauk wajasmayi. ³ Nunú bukuita nuwiya manchi jiniimayi, duka titig ijujatbau najamama iman senchimitikamu agmayi. ⁴ Tujash nugkanum numi, dupa samekbau aidau ayaa duka ijinawaigpajum, ayatak aents Apajuinuchu aidau nijayin selló awajkashbau aina nu ijutajum. ⁵ Aents ijuakmesh mautak maawaigpa, ayatak ijuta, dutikam cinco nantui najaimá pujuagtinme, timayi. Tibau asag aentsun ijubi, dutikawajam titig ijujatbau najaimatia imanik najaimagmayi.

⁶ Imanik waituinak dita jamainun egainakush igkugchagtinuyi.

⁷ Nunú manchi aidauk caballo maanitnum wegagtatak uminas ijunama imanik amayi, ditá buuken atsejutai oroa iman ajiagmayi. Yapig aentsú yapijai betekmamtinuyi. ⁸ Intashishkam nuwan intashijai betekmamtinuyi, untsu nai leogka naiya iman agmayi. ⁹ Iyashig jijua iman anugjamuyi. Nanamkushkam kuashat carro caballo tupikaku japitai maaniamunum shimak tutugtuwama imatmayi. ¹⁰ Ujukeg, ijujattajishkam titigdaujai betekmamtinuyi, duwi aentsun iju cinco nantui waitkasti tusa senchimitikamuyi. ¹¹ Ditá apujig nayaimpinmaya aents waa muun ishamain akagaunum puja nuuyi. Nuna daajig hebreo chichamnumag “Abadón” tutai, untsu griego chichamnum “Apolión” tutaiyai.

¹² Aatus nagkaemakmayi ukukuí nagkamak “ae” tibauwa duka. Tujash eke juwakmayi ukukuí jimaja juna ishamain nagkaemaktatui tusa “ae” tibauwa nu uminkatin.

Seisa ju trompeta umpuagbau

¹³ Seisa nu trompetajin umpuagmayi, nuniamunum Apajuí emtin altar ayatak orok najanamu, cuatro uwaetukbauji aja nuwiya chicham jininun antukbaijai. ¹⁴ Nuniak nayaimpinmaya aents trompetan umpuaja nuna chichajak: “Namak Eufrates tutainum nayaimpinmaya aents cuatro jigkajam ijuna au atiata”, timayi. ¹⁵ Nuna tutai cuatro jigkajam ijuntatman atiabi, ditanu hora, tsawan, nantu, mijan umintai nunikti tibau jegau asamtai, duka jimaituk ejesattak aents nugká batsata nuna ijinati tibauwayi. ¹⁶ Maaniatatus suntag caballonum shimauk doscientos millones awai tabaun antukbaijai.

¹⁷ Juna tikima paan wainkabiajai, caballonum entsatkau aidauk, maaniaku nugkutai detsepeen jiiya iman kapaaku, zafrowa nunin

* **8:13** “Ukukuí” tawa nunak tikich agagbaunmag “nayaimpinmaya aents” tawai.

wigka, tuja azufreya nunin yagkú ajiagmayi. Caballo buuké aidauk ikamyawa buukega nunin agmayi, tuja weninia jiniagmayi jii, bukuitamu, azufre aatus. ¹⁸ Jujú jii, bukuitamu, azufre nuna weniinia jinaina duwi, aents aidauk jimaitukea nuna amasattak jinawagmayi. ¹⁹ Caballo aidau senchijig wenin, ujukenish ajiagmayi. Ujukeg dapí buukega nunin asagmatai duwi aentsnak kajeebi.

²⁰ Tujash tikich aents nu caballo weniinia jiina duwi jinachu aidauk, ditá pujutji pegkegchaunak yapajitsuk, wakan pegkegchau aidau ememattanash idaitsuk, dita dakumká najanamu oro, jiju plata, bronce, kaya, numi aina nuna emematiagmayi. Tujash duka wainmatnakesh wainmachu, antutnash antuchu, wekaetanash wekaemainchau aina nunin aig. ²¹ Nunidau asag magkagtutnash, wawejattanash, tsanijimtanash, kasamtanash idaichagmayi.

10

Nayaimpinmaya aents papí piipich ujaká takakbau

¹ Tikich nayaimpinmaya aents senchigtin yujagkim ijiam, buukenig pagki wajae tutayama iman tenteamu, yapishkam etsajai betek etsantu, kagkajig jii kegag tuputuwama imanik akaetatman waink- abiajai. ² Takakuyi papí piipichin ujaká, nawe untsujiya nunak nayantsanum najama, menajiya nunak nugká najama wajabi. ³ Nunik senchi untsamak chichaamujig, león shinak wajukeyama imatmayi. Nu untsamak nagkanaig sieteya imania ipamat wajukeya imatuk nunú untsamakmunak imatiksag betek dakumkagmayi. ⁴ Nunú siete ipamat nuna dakumkag itatkagmatai, agagtasana uminai, nayaimpinmaya chichagtak: “Siete ipamat tiaja duka agatsuk imá amek aneaku atá”, tujutmayi.

⁵ Tuja nayaimpinmaya aents nayantsanum najami, nugkanmash najama wajaun wainkag nu, uweje untsujiya nuna nayaimpinmanini takuibi. ⁶ Nunik, Apajuí tuke puju nayaimpin, nugkan, nayantsan, ashí nui ayaa nunash najankauwa nuna adayas: “Yamaik tsawantak jegau asantai, ni Apajuí dutikatjai tibauwa nu jegatí, tusa dakamuk atsuttawai, ⁷ sieteya nu trompetan umputai, Apajuí ni dutikatnuijin ii dekaachbaun, niina etsegtin aidaunum tiuwa duka uminkattawai.”

⁸ Nayaimpinmaya chichaamun antukag duke ataktú awentsag auj- tak: “Nayaimpinmaya aents nayantsanum najama, nugká najama papí piipich ujakbaun takus waja nu jegantam papí jujuktá”, tujutmayi. ⁹ Tujutkui jegantan: “Papí sujústá”, tusan segai ni chichagtak: “Jukita, nunikam yuwata. Weniminig dapá yumiji yumintsak wajapakna iman dekapjattame, tujash wakeminig yapau egkeattame”, tujutmayi.

¹⁰ Tujutkui, nayaimpinmaya aents papí piipich takakbaun jukin yukaman, dapá yumiji yumintsak wajaknama imanun yuwabiajai, tujash yuwá ai wakejuí yapau awajutsmayí. ¹¹ Nuniai ni chichagtak: “Ataktú awentsamek etsegekata, Apajuí ashí nugkanmaya aents ditash chichaaku aidaun, jegkemtín, shuwin, puju, yagkú aidaun, nuigtú ashí apu aidaunash tawa nu”, tujutmayi.

11

Mil doscientos sesenta tsawantai, Apajuí chichamen jimag aents etsekgagtinaí tibau

¹ Nuna tujuti, makichik tagkan dekapatia nuninun sujusá: “Wetá, nunikam jega Apajuí emematku ijuntaiya nu, altar puja wujai dekapata. Dutikakum dekapagta wajupa aentsua nui utsanawajash Apajuinash emematuinawa nu. ² Tujash jega Apajuí ememattaiya nuna agaajig dekapatsuk idaisata, duka judiuchu aents aina nu idaitusbauwai. Dutikamu asamtai yaakat pegkegma nunak cuarenta y dos nantui batsamtusag, najakag tsái batsamtiagtatui. ³ Nuniakui wi jimag aentsun awemattajai, jaanch wake besemag pujaku nugkutain nugkug yujasag, mil doscientos sesenta tsawantai mina pachitus etsekatnume tusan.”

⁴ Nunú jimag mina etsegtujiagtata duka, jimag numi olivo tutai, nuigtú jimag candelero tutai nugká Apujiya nuna emtin ijuna nuuwai. ⁵ Duka makichik aentskesh emesjata tamak, ditá weninia, jii jiinak ashí shiwaji aidaunak apeká ijinmayi. Nunisag jinawagtatui tikich nuna emesjatatus wakegaushkam. ⁶ Ditak senchijí ajiagmayi nayaim epenmainnum, Apajuí chichame chichagkagtuinak yujasag yumi yutujai tusag kumpatum mijan jimaituk epenmainnumash, yumi numpa emainnumshakam, nuigtú aents aidaun wajupa imania jatan susa waitkastasya wakegawa, nu dutikmainnumash senchijig ajiagmayi.

⁷ Nunik dita chichagkagtamujin ashimkagmatai, waa muun ishamain akagaunmaya kuntin muun jiina nunú ditajai maaniatnuyi, nunik ditanak depetek mai maawagtinuyi. ⁸ Nuna iyashí aidauk yaakat dekas eme anentsá diitaiya nuna ejapeen tepeagtinuyi, iina Apuji Jisukristun achijag maawajua nui. Nunú yaaktak “Sodoma”, nuigtú “Egipto” tutayai ditá pegkegchauji pachisa. ⁹ Ashí nugkanmaya aents ditash chichaaku, jegkemin, shuwin, puju, yagkú aidau kaunkag, iyashinak ukutsuk, kumpatum tsawan jimaituk dii batsamtiagtinuyi. ¹⁰ Nuninak ashí nugkanmaya aents aidauk shiig aneas dakujuinak, pempeentunikiag anenjauch wajichin sudayagtinuyi. Wagki nu jimag Apajuí etsegtin aina nunú chichagkagtiagtai, tutitag dekapejakú asag.

¹¹ Tujash kumpatum tsawan nuigtú jimaituk nagkaemai, Apajuí mayai susam ataktú nantakiagmayi, nunikagmatai nuna wainkaju aidauk shiig senchi ishamiagmayi. ¹² Imaninai nayaimpinmaya senchi untsuká: “Juwi wakatajum”, timayi. Tima mai yujagminum pachiinak ashí ditá shiwajish wainainaig wakagmayi. ¹³ Nunik dita yakí wegagtai nugka senchi ugkabi, imaniak kuashat jegan yumpuagmayi, imatikau asamtai siete mil aents jinawagmayi. Tikich aents eke jakachaju aidauk senchi ishankag, Apajuí nayaimpinum pujuwa nuna emematiagmayi.

¹⁴ Ukuku jimaja juna ishamain nagkaemaktin asamtai “ae” timawa duka aatus nagkaemakmayi. Nuniai kumpatuma nu ishamain nagkaemaktin asamtai ukukú “ae” timawa nu waamak jegantinuyi.

Sieteya nu trompetajin umpuagbau

¹⁵ Sieteya nu trompetajin umpuagmatai, nayaimpinmaya senchi pampajag:

“Ashí nugkanmaya inamaina duka

yamaik iina Apajuijiniu, niina uchijí Kristua nudau wajasé.

Nuniku asamtai nigki tuke inamtinai ajumaiya duwish”, wajagmayi.

¹⁶ Imatiagtai veinticuatro apu aidau Apajuí emtin pekajuidaushkam, tikishmajag tsuntsumawag nijayin nugkan antig pujusag Apajuin emematuinak:

¹⁷ “Apu Apajuí ashí senchigtinuh, ametme tuke pujumek, yamaishkam pujau, atakea duwishkam tuke pujutnumek, duwi see tuinaji.

Wagki ame dekas senchigtinaitam duka iwainmamkam, yamaik amek inamjatasam nagkamaume.

¹⁸ Nuniau asamin ashí nugkanmaya aidauk kajejaje, tujash ame jakau aidau inanjam dita nugká pujusag magkagtuinak, nuigtú pegkegchau takasbauji aidau diigsam kajekam suwimak susatnaitam duka, yamaik tsawantak jegae.

Nuigtú amina inakem chichamjumin etsejajakú aidau, ashí amina nemagtamin aidau, aminash ajantus diigbau aidau, eme anenchatai, tuja eme anentai aidaush akiktinaitam dushakam jegae”, wajagmayi.

¹⁹ Tuja jega Apajuí ememattai nayaimpinum awa nunú ujanmayi. Nunikmatai kajun arca tutai chicham apakbau aajakua nu, jega Apajuí ememattain auk paan wainnabi. Nuniamunum amayi peem aidau, chaajip, ipamat aidau, ugbau, senchi bicha kakegainamujai.

12

Kuntin muun kajen nuwan wantintukbau

¹ Nayaimpinmaya wainchatai wantintatman wainkabiajai: Makichik nuwa, etsa etsantama imanun nugkuaju, doce yaya batsakbaun atsejaku, nantunum najama wajattaman. ² Ejamtin asa, uchigmaktakamá najaimak senchi buutmayi.

Kuntin muun kajen kapantu

³ Nuniai tikitchakam nayaimpinum wainchatai wantinkabi: Kuntin muun kajen kapantu wajakin, dapi niimtin, siete buuktin, diez kachuji ajamu, makí makichik buuké aina nuwig atsejutaiji ajiagmayi, ⁴ ujuken nayaimpinmaya yaya aidaun jimaitukjin amaisattak amainun tajak juki nugká akakekmayi. Nunik nuwa uchigmaktatus puja nuna emtin wajanmayi, uchi yamá akiinunak yuwatatus. ⁵ Nuniai nuwak aishmagkun uchigmakmayi, ashí nugkanum niina senchijijai inamtina nuna. Tujash uchijinak jukiag Apajuí eketbaunum iwakagmayi. ⁶ Dutijuam nuwak, Apajuí mil doscientos sesenta tsawantai pujusá yumainun uwegshunum umigkauwa nui tupikakmayi.

⁷ Nu nuniku ai nayaimpinum Apajuí pujutain, nayaimpinmaya aentsú apuji aina nuwiya Miguel daagtin ashí niina suntajijai maaniabi, kuntin kajen ashí ni suntaji aina nujai. ⁸ Nunika maaniamunum Miguel ni suntajijai kuntin kajen ashí ni suntaji aina nunak depetuk, nayaimpinum pujusai tusag jiijá utsagmayi. ⁹ Dutikak nunú kuntin kajen yaunchuk dapi tujakbauwa nu, iwanch tuuta awagmatai, ashí nugkanum tsanumá wekaena nunak, ashí niina suntajijai nugká ajapawagmayi.

¹⁰ Nuna dutikamtai nayaimpinmaya senchi untsamak:

“Yamaik tsawan uminkae, ni Apajuí niina senchijinig inamak aentsnak uwentikatna nu,

Kristu inamjatna dushakam.

Wagki ii yachi aidaunak tsawaish kashishkam jutii Apajuiji emtin tsanumjú wekaenuwe duka jiiki ajapamu asamtai.

¹¹ Ditak uwig mantamnak numpeen ukajua duwi, dita tudaujin bakumamainnak agkanmagawaju asag,

tuja uwig takasbauwa nuna etsegtuinak depetmamkaje.

Ditak sapigmakchaje chicham etsegku mantamnatnash, maamash jakagtatus uminas yujaidau asag.

¹² ¡Nuaduí ashí nayaimpinum batsatutigmek shiig aneastajum!

Tujash ¡Wait anentajime nugkanum, nayantsanum batsatainajum nunak!

Wagki iwanch tsawanji wajumak juwatka nuna dekau asa, senchi kajejú atum pujamunum akaetugmakiu asamtai”, timayi.

Kuntin muun kajen nuwa ainjamu

¹³ Kuntin muun kajen nugkanum ajapamu asa, nuwa uchin uchig-makua nuna ainmayi. ¹⁴ Dutiktai Apajui nuna nuwan, jimag ukukuí nanape dekas muunta imanun susabi, dutikam nanaak uwegshunum wegak kuntin muun kajena nuna ukuktí tusa, nui kumpatum mijan nuigtú jimaituk pujusmatai kuitamnaktinjin. ¹⁵ Nunikmatai kuntin muun kajena nu nuwan amaimainchau dekapeak, weninian yumin jiiki namak muuntan najanabi, nuwan tajak jukiti tusa. ¹⁶ Tujash nuwanak nugka ayamjukmayi, nugka ujani kuntin muun kajen yumi awemamunak uwag emegkakmayi. ¹⁷ Nuna dutikamtai kuntin kajenuk nuwan senchi kajejúk, nuwá patayí wegantu aidau Apajui chicham umiktajum tibaun umiinak, Jisukristu pachis etsegtuina nujai maaniatatus wejibi. ¹⁸ Nunik kuntin muun kajena duka nayants uwetus wajanmayi.

13

Kuntin nayantsanmaya jiinkimu

¹ Wainkabiajai kuntin muun siete buuktin, diez kachují ajamu nayantsanmaya jiintatman. Makí makichik kachujinig atsejutai ajigmayi. Untsu ashí buukenig Apajui pegkegchau chichagbau agatkamuyi. ² Nu kuntin wi wainkag duka, ikamyawajai betekmamtinuyi, naweg chayú nawega nuninuyi, untsu wenig leogka weniya imanuyi. Nu imana nuna tikich kuntin muun kajena nu, niina senchijin, ni inamtaijjai susabi apumea takastí tusa. ³ Dutikamua nuna makichik buuké jakati tusa awatbauwa nuninun wainkabiajai. Tujash nigki esama tsagagmatai, ashí aents nugkanmaya aidauk puyatjukag niina nemajiagmayi. ⁴ Nuninak, kuntin muun kajena nunú tikich kuntinun senchintikau asamtai emematuinak, nu kuttinnashkam emematuinak: “Juna depetmainuk makichkish atsawai”, awajiagmayi. ⁵ Nu kuttinnak Apajui idaisabi cuarenta y dos nantuí inamak, ememas chicham shiig pegkegchau aidaunash chichaak, Apajuinash pegkegchaun chichagti tusa.

⁶ Tibau asa, Apajuin pegkegchau chichajak, Apajui pujutaijin, ashí nayaimpinum batsamin aina nuna pachisash pegkegchau chichagmayi. ⁷ Aantsag Apajui nemajuidaujaish maaniati nuniak depetkati tibauyi. Nuniak ashí aents nugkanmaya ditash chichaaku,

jegkemtin, shuwin, puju, yagkú aina nuwish inamjati tusa idaitusbauyi. ⁸ Dutikamu asamtai ashí nugkanum batsataidauk nuna emematiagtinuyi. Uwig maamu aajakua nuna papiijin, pujutan jukitnume tusa, nugka yama najanamua duwi nagkamas daaji agatkashbau aina nunú aidau.

⁹ Ni antutaiji ajamuk antuktinme:

¹⁰ “Dita achiká juwam amainuk, achiká jukimu agtatui.

Tuja dita espadayai maam amainuk, espadayai maam agtatui.”

Jujú nuniamunum Apajuí aentsji aidauk, waitiamu katsuntan unuimamain ainawai, nuninak emamkemas pujuinak, Apajuiyai kajinas anentaimain ainawai.

Kuntin nugkanmaya jiinkimu

¹¹ Nu nuniku ai, tikich kuntin muun nugkanmaya jiinun wainkabi-ajai. Duka jimag kachují uwigdaujai betekak ajibi, tujash chichaakug kuntin muun kajena nujai betek chichabi. ¹² Duka tikich nayantsanmaya kuntin buuken awatbau tsagajua nuna senchijí susamuyi, dutikamu asa nugkanum aents batsamin aidaunak: “Nayantsanmaya kuntin jiinkiuwa nu ememattajum”, timayi. ¹³ Tusa kuashat wainchatain iwainabi, dutikak ashí aents wainainamunum nayaimpinmayan jiin nugká ajuibi. ¹⁴ Nuna dutika tikich kuntina nuna emtin iwainag takau asa, nugká batsamin aidaunak tsanubi. Nuniau asa kuntin espadayai tsupikbau aajakú iwaaka nu dakumkajum najanatajum, tusa nugkanmaya aents aidaun inagmayi. ¹⁵ Tiajam nuna dakumak najanawagmatai, tikich kuntin nugkanmaya jiinkiuwa nunú, niina senchijin susa mayain egketuk chichamtikabi. Dutikam nu chichaak: “Ashí aents mina emematjuinachuk kajeam agtatui, ¹⁶ nuigtushkam ashí aents eme anentsá diishtai, eme anentai aidau, wiyakuch aidau, ujunauch aidau, inaku waitkashtai, inatai aidaushkam nijayin, nuniachkush uweje utsujin agatkamu agtinme, ¹⁷ tuja agatjashbau aidauk, nuniachkush kuntinu daajiya nunakesh takakchawk, tuja kuntinu daajiya nunú numerowai agagbaukesh atsugbauk, sujutnash sujumainchau, tuja sumatnash sumamainchau agtinme”, timayi.

¹⁸ Juwig kuashat unuimat atsumnawai. Ni dekat ajamuk dekapagti kuntinu numerojiya nuna. Duka makichik aentsua nuna numerojiyai. Nunú numerok seiscientos sesenta y seis tawa juuwai.

14

Ciento cuarenta y cuatro mil aents aidau kantamawagbau

¹ Nunikmatai ciento cuarenta y cuatro mil aents, nijainum Uwijan daaji, tuja Uwijá Apajiya nuna daaji agatkamu, Uwigjai muja Sión tutainum ijunag wajattaman wainkabiajai. ² Nuniamunum nayaimpinmayan antukbaijai, tuna dujaji uutama imatak, senchi chaajip patak wajukeyama imatuinak, awattai arpa awatin aidau ijunag awatbau wajukeya imatun. ³ Imatuinak apu aidau, cuatro iwaaku aina nujai tenteam, Apajuí ejapeen eketa nuna emtin wajantag, yamajam kantamtain kantabiagmayi. Nunú kantamtai yamagma nunak makichikish tikichik unuimamaichagmayi, imá ciento cuarenta y cuatro mil aents nugkanmaya uwentikamua duke degagmayi. ⁴ Nunú aidauk makichikish Apajuijaig kanachagmayi, imá Apajuinak eme anentus

diinak, tuwí Uwig wegawa nunitaish niijaig wekayagmayi. Ditak ashí aents nugkanmaya aina nuwiya nagkamku uwentikjamu ainawai, Apajuijai tuja Uwigaishkam ijutkau pujustinme tusa. ⁵ Nuigtushkam ditak pegkegchaujish atsugbau, waitjuamujish atsugbau asag, Apajuí emtin ijudiagmayi.

Kampatum nayaimpinmaya aents aidau etsejuinamu

⁶ Wainkabiajai tikich nayaimpinmaya aents, nayaimpi ejapeen nanamun, nunú ashí nugkanmaya ditash chichaaku aidau, jegkementin, shuwin, puju, yagkú aina nuna ujaktinuyi, yamajam chicham tuke atina nuna. ⁷ Nunik senchi untsamak: “Apajuí ishamsajum ememattajum, ni aents pegkegchou aidaun suwimkan susatna duka hora jegau asantai. Ememattajum Apajuí nayaimpin, nugkan, nayantsan, yumi pukuni jiinaidaunash ashí najankauwa nunú”, timayi.

⁸ Tai nuna ukujin patatkau tikich nanaak minis: “¡Yaakat Babilonia muunta nunak tsaikaje, tsaikaje! ¡Ashí nugkanmaya aidaunak ni pegkegchou takaamujiya nuna takamtikak, apajimtai aina nu umigkatajum tusashkam jintinkagtuau asantai!” wajabi.

⁹ Nuniai kampfatum dushakam nanaak minis senchi untsamak: “Kuntin muunta nuna emematuk, nuniachkush dakumkamua nunakesh emematak nijayinkish, uwejinkesh agatkamu aina nunak, ¹⁰ Apajuí senchi kajeká suwimkan suwak, niina aentsji nayaimpinmaya aidaush ijunas dii ijunaig, Uwijash wajaig jii azufrejai pachimjamua nui utsaatnai. ¹¹ Dita nui waitiaku batsatbauk, jii senchi kegaku bukuitamuk tuke kajinkashtinai. Imannum batsamsagtinai kuntin muunta nuna emematiaju aidau, nuniachkush kuntinun daajiya nuna nijayin, uwejinkish agatmamkau aidauk, kashi tsawaish makichkish ayamtsuk tuke waitú batsamtinai.” ¹² ¡Apajuí aentsji aidauk, ichichmamag pujusag utugchat waitiamu ataish katsuntan unuimamain ainawai! ¡Nuninak Apajuí chicham umiktajum tibauwa nunash imatiksag umiinak, Jisusaish kajinas anentaimain ainawai!

¹³ Antukbaijai nayaimpinmaya untsujuk: “Agagta: Shiig aneasagtatui Apu Jisusan umijus jakau aidauk, tuja yamaya juwi nagkamas jakau aidaushkam.” Nuna tutai, Wakaní Pegkeji chichaak:

“Dekaske, dita takaak waituina nunak ayamsagtatui, nuninak shiig aneasagtatui dita takasbaujin akiinam.”

Nugkanmaya juwaamu

¹⁴ Niimkaman wainkabiajai yujagkim pujunum, Apajuí Uchijiyaitak Aentsmaga Akiinaw aajakua numamtin, atsejutai oro najanamun atsejaku, ajak juutai hoz tutain shiig etsa etsaké awajsamun takus ekeemtatman. ¹⁵ Nuniai jega Apajuí ememattainmaya makichik nayaimpinmaya aents jiinki, nunú yujagminum eketa nuna senchi untsuká: “Pai, yamaik tsawantak jegae, nugkanmaya ajak aidau uminag tsamakaja au juuktá”, timayi. ¹⁶ Tama yujagminum eketa nunú nugkanum jegaa, hozjijai tsupig ajaknak juukmayi. ¹⁷ Dutikamtai jega Apajuí ememattai nayaimpinum awa nuwiya, tikich nayaimpinmaya aents dushakam hoz shiig etsa etsaké awajsamun takus jiinkibi. ¹⁸ Nuniai tikich nayaimpinmaya aents, jii ekemamainnum senchiji ajamu altarnumia jiinkibi. Nunik hoz etsakamun takaka nuna senchi untsuká: “¡Hoz etsakamu takakam duwi uva tsamakaja aanú

tsupijam juuktá!”, timayi. ¹⁹ Tima nayaimpinmaya aents hozan takusá wajaushkam, nugká uva tsamakun tsupig yajuak, uva dajaja ijutainum chimpiabi ijunjati tusa, duka Apajuí suwimkaji ishamaina nuna iwainabi. ²⁰ Uvanak yaaktan ukumtikiag ijujagmayi, tuja uva ijutainmaya numpa betsak caballo weniya aatus amugmayi. Nuniak trescientos kilómetros tumain nugkan ukatkabi.

15

Sieteya imajin suwimak sukagtustin aidau

¹ Wainkabiajai nayaimpinum tikich wainchatai anentai jegagcham-nun: Siete nayaimpinmaya aents aidau, Apajuí suwimak ishamain sukagtustin aimjamun makí makichik takuinakun. Nunú suwimak aina nujai, Apajuik ni kajekbaujinak inagnaktinuyi. ² Wainkabiajai, vidrio saawi nayantsa imannum jii keegama numamtin atatman. Nui ijudiagmayi Apajuí arpa susamun takuinaku, kuntin muun dakumkamu emematchaju aidau, kuntinu daaji numerowai agatjata tamash dakitjaju aina nunú. ³ Nunú aidau kantabiagmayi Moisés Apajuí inake aajakú kantamamua nuna, nuigtú Uwijá kantamtaijiya nujai, nuninak:

“Apu Apajuí ashí senchigtinuh,
ashí ame takasbau aina duka shiig muuntai, anentai jegagmaitsui.
Ame dutikam duka pegkejai, dekaskenum aikame.
Amek ashí nugkanmaya aina nuna Apujiyaitme.

⁴ Apuh, ashí aents aidauk aminak eme anenjasmas emematjupainawai, wagki imá amek pegkejam asamin.
Iman asamin ashí nugkanmaya aidauk kautjamak emematjabiagtatui,
wagki ame dekas pegkeg dutikam nunak ashí dekagmaidau asag”,
wajaagmayi.

⁵ Juna tusa inagnakagmatai niimkaman, nayaimpinum jega Apajuí ememattainum tesamu shiig pegkejam tutaiya nu ujankui, chicham umiktin kayanum agagbau aun wainkabiajai. ⁶ Nunik ujanmatai siete nayaimpinmaya aents, suwimak sukagtustinun makí makichik takuinaku aidau jijnjagmayi, duka jaanch puju dekas pegkeg tsuwatichau winchamtin wajaknun nugkuaju aidau, akachumtai oro najanamun detsepega aatus akachumau agmayi. ⁷ Iman aina nuna, cuatro iwaaku aina nuwiya makichkia nu, siete aents nayaimpinmaya aina nuna, makí makichik copa ayatak orok najanamunum, Apajuí tuke pujuwa nu suwimak ishamain sukagtustinji aimjamun tinamkabi. ⁸ Jega Apajuí ememattaiya nunak, bukuiti akijuabi. Nu bukuitamua duka Apajuí imanjiya nuna, nuigtú Apajuí senchijiya nuna iwainabi. Imaaniku asamtaí siete nayaimpinmaya aents aidau, makí makichik suwimak sukagtustin aimjamun takuinaka nuna ashimtsaigkik, makichkish waimainchau agmayi.

16

Suwimak sukagtustin copanum aimjamua nu ukagtajum tibau

¹ Antukbaijai jega Apajuí ememattainmaya senchi untsamak, siete nayaimpinmaya aents aina nuna chichajak: “Wetajum nunikjum siete copanum Apajuí suwimak sukagtustinji aimjamua nu nugká ukagtajum”, tabaun.

² Timatai dekatkauwa nu we, copanum aimkamua nuna nugká ukagmayi. Dutikamtai ashí aents kuntuu daajiya nu agatjamu aidau, nuigtú kuntuu dakumká najanamun emematiaju aina duka, kuchapjukag najaimainak senchi waitiagmayi.

³ Tuja nayaimpinmaya aents jimaja ju copanum aimkamua nuna, nayantsanum ukagmayi. Dutikamtai nayantsak numpa wajasmayi, aents maamu numpega iman. Imanikmatai ashí nayantsanum batsamin aidauk jinawagmayi.

⁴ Nuniai nayaimpinmaya aents kampakuma ju copanum aimkamua nuna, namak aidaunum, yumí pukuni jiantaiji aidaunum ukagmayi, dutikam numpa wajasagmayi. ⁵ Nu yumin ukatjauwa nu chichaamun antukbaijai:

“Apuh, amek pegkeg takauwaitme, iman asam juka jutikaume.

Apajuiyah pegkegmah, amek tuke pujuwaitme,

⁶ wagki ditak amina aentsjum aidaun, nuigtú chichamjumin etsejin aidaunash mainak numpen ukajaju asagmatai, ameshkam dutiksamek numpa amame. ¡Dekaskenum ditak aikam amain ainawai!”

⁷ Nuigtush altar puja nuwiya: “Apu Apajuí ashí senchigtinuh, ame jutikam juka pegkejai, dekas jutikame”, tabaun antukbaijai.

⁸ Nu dutikamtai cuatro nayaimpinmaya aentsua nu, copanum aimkamua nuna etsan ukatjabi. Dutikam senchi etsantak, jii kegama imaniak aents aidaun apeati tusa. ⁹ Dutikamtai aents aidauk shiig ishainun esagmayi. Imaninakush pegkegchaujin idaisag Apajuin ememattsuk, Apajuí senchigtin asa nuna imatikaunash ayatak pegkegchaunak chichajiagmayi.

¹⁰ Nuniai cinco nayaimpinmaya aentsua nu, copanum aimkamua nuna kuntuu ekeemsa inamtaijin ukagmayi. Dutikamtai niina inamtaijig suwe wajasmayi. Aents aidauk iyashin najaimainak inayin esagmayi, ¹¹ imaninakush pegkegchau takainamujin idayas pujutjin yapajitsuk, ayatak pegkegchaunak Apajuinak chichajiagmayi, kuchapjin najaimainak, nuigtú etsa apeam esamujinash senchi najaimaidau asag.

¹² Nuigtú seis nayaimpinmaya aentsua nu, copanum aimkamua nuna namak Eufrates muunta nui ukagmayi. Dutikamtai namakak kuyua buku wajasmayi, apu etsá minitainia aidau niina suntajijai katiagtinme tusa.

¹³ Nu nunikbaunum wainkabiagai kuntuu muun kajena nuna weninia, nuigtú tikich kuntuu nuna weninia, waitá etsegna nuna weniniashkam, kampakum wakan pegkegchau kuwauwa nuní niimtin aidau jinaidaun. ¹⁴ Duka wakan iwanchdau wainchatain iwainag takainak, Apajuí ashí senchigtina nu, pegkegchau aidaun suwimkan susatna nu tsawan jegatai maaniantnujin, ashí nugkanmaya apun ijumjatatus wekaetitna nu agmayi.

¹⁵⁻¹⁶ Dutika apu aidaunak ijumjabi hebreo chichamnum nugka Armagedón* tutaya nui. “Adeagtajum Jisus chichaak: Wika kasajai betekmamtuk pachiaichmau minittajai. Shiig aneasagtina aents mina

* **16:15-16** “Armagedogkak” Palestina nugkanum awai, nuanuí Apajuí ashí senchigtina nunú inagamunum iwanch suntajin ijumjamtai maaniantnai, tawai Apajuí chichame.

dakajuinak pegkegchaun takatsuk batsatina nunú aidauk. Ditak wi minitaish datsanjugchagtin ainawai”, tiuwa nu.

¹⁷ Siete nayaimpinmaya aentsua nu copanum aimkamua nuna dasenum ukagmayi. Dutikamtai jega Apajuí ememattai nayaim awa nuwiya, Apajuí ekeemtaijinia senchi untsumak: Yamaik suwimkak junik ashimnake, timayi. ¹⁸ Nuna timatai ipamat, chaajip, peem aidaujai senchi pampaidiagmayi. Imatbaunum nugkak yama nagkamak aents batsamsauwa duwi nagkamsash imanika ugchatain senchi ugmayi. ¹⁹ Imaniau asamtai Babilonia yaakat dekas muunta duka, kempatuma imajin puunag kanagmayi. Nunisag ashí yaakat nugkanmaya aidauk yumpunawagmayi. Apajuí yaakat Babilonia pegkegchajinak kajimatjukchau asa, suwimkan suwak kajejuk imatikabi. ²⁰ Ashí ajuntaik muja aidaujai megkaejagmayi. ²¹ Nuigtushkam bicha muun cuarenta kilo tumainun nagkaesau aentsnak kaketiagmayi. Nu suwimak imá ishamain asamtai, Apajuin pegkegchaun chichajiagmayi.

17

Muun yaakat Babilonia suwimak jukitnuji pachisa etsegkamu

¹ Siete nayaimpinmaya aents siete suwimak aimjamun ukajú aina nuwiya, makichik mina tajuntujun chichagtak: “Wegajai, nuwa dekas iman akiká takatai kuashat namak aidaunum eketa nu suwimak susatnun iwaintuktajame. ² Nunú nuwa nujai nugkanmaya apuk ijun-jaje, apajimtai aina nuna emematiagtatus, aantsag ashí nugkanmaya aidaushkam nujai pegkegchaun takainak nampejaje”, tujutmayi.

³ Nuna Wakaní Pegkeji iwaintugkamtai, nayaimpinmaya aents uwegshunum jujukmayi. Nui wainkabiajai kuntin muun kapantu, siete buuktin, diez kachují ajamu, ashí iyashin Apajuí pegkegchau chichagbau agatkamunum makichik nuwa ekeemtatman. ⁴ Nunú nuwak jaanch yamakaitkau kapantujai pachimjugbaun pegauwayi. Tuja nigka ayatak oroik, kaya pegkejuch akik aina duwi, kayauch perla tutai aina nujai iwagmamjauyi. Takakuyi makichik copa ayatak orok najanamun, nuanuig piyakuyi ashí pegkegchau dakitmain aidau, wainka apajimtai ememattai aina nujai. ⁵ Tuja nijayinig chicham dekamainchau: “Yaakat muun Babiloniaya juka, nuwa akiká takatai aina nuna dukují, nuigtú ashí pegkegchau dakitmain nugkanmaya aina nunash dukujiyai”, tusa agatjamuyi. ⁶ Nu dutikamuitkui diikman, nu nuwak, aents Apajuinu aina nuna numpen, duwik Jisukristu chichamen pachis etsejuidau asagmatai maawagmawa nuna numpenash uwag nampeká ekeemayi.

Nuna wainkan puyatkabiajai. ⁷ Nuniai nayaimpinmaya aents chichagtak: “¿Wagka imanikmesh puyatame?” tujutmayi. “Ju nuwash wajukatnuna aniawa, nunak wi shiig ujaktajame, kuntin siete buuktin, siete kachují ajamunum nuwa entsatka nuna pachisan. ⁸ Kuntin muun kapantu wainkaum duka duwik pujujakuí, tujash jakau asa yamaik atsawai. Nuninaitak ataktú nantaki jinkittawai, waa muun ishamain akaga nuwiya, nunik ni suwimak jukitnujin jegatatus. Ashí nugkanum batsata nu, yama nugka najannaig pujutan jukitin atí tusa daaji agatkashbau aidauk, nuna wainkag senchi puyatkagtin ainawai.

⁹ “Juajuí dekanattawai yaki yachaita, yaki shiijash antawa nunú: Siete buukega duka, siete mujanum nuwa eketa nuna iwainawai,

duka siete apu ainawai. ¹⁰ Cinco apua duka megkaejaje. Nunikmatai makichik apuk inamui tuja makichik eke inamtsui, tujash nu inamkug dukap pujus inamjashtatui. ¹¹ Nunú kuntin muun kapantu duwik pujujakú jakau asa atsa nunuke, ataktú apu we inamak ocho apu atatui, duka siete apu aajakua nuwiyagke, nigka suwimak tuke atina nui wetata nunú.

¹² “Diez kachují aidau wainkaum duka, diez apu eke dita inabaujin nagkamainatsu nuna iwainawai. Tujash nunú aidauk kuntin muun kapantua nujai ijunag makichik horayaik inamjagtinaí. ¹³ Ditak makichkia nunak dutikawagtatus anentaimtuidau asag, ashí ditá inamtaijiya nunak, nunú kuntin muun kapantua nu inamjati tusag idaitusagtinuyi. ¹⁴ Dutikawag Uwigjai maadiawagtatui. Tujash Uwig ditanak depetkagtatui, Apajuí untsuká etegjamu imá ni tabaunak betek umijin aidau Uwigjai ijuna nujai; wagki nigka apu aidau Apuji, nuigtú ashí apu nugkanum inamin aina nuna Apujiya ibau asa.”

¹⁵ Junashkam nayaimpinmaya aentsua duke: “Ame namak aidaunum nuwa akiká takatai eketu wainkamum duka, ashí aents ashí nugkanmaya, ditash chichaaku aidau, nugka muunnumia aidau, ashí yaaktanmaya aina nuna iwainawai. ¹⁶ Nunú diez kachují ajamu wainkaum duka, diez apu aina nuuwai. Nunú apu aidau kuntin muun kapantua nujai, aents nu yaaktanum batsatunak kajekgag, yaaktan tsainak ashí wajijinak yajutkag wainak ukukiagtinaí. Nunú yaaktanmaya aidauk, apajimtai aina nu ememattajum tusa jintinkagtujakajui. ¹⁷ Nu nunikaja nunak, Apajuí dita anentaimtuina nunak umiktinme tusa anentaimtanak susajui. Dutikamu asag ditá inamtaijiya nunak, kuntin muun kapantua nuna idaitusag pujuinaí, Apajuí tibujiya nunú uminkati tusa. ¹⁸ Ame nuwa wainkaum duka yaakat muunta nuuwai, ashí apu aidaun ina nunú”, tujutmayi.

18

Yaakat Babilonia tsaikbau

¹ Juna wainkan, tikich nayaimpinmaya aents dekas senchigtin, niina tsaaptinjinig nugkanak tsawan awajus akagun wainkabiajai. ² Nuniak shiig senchi untsamak:

“¡Yaakat Babilonia muunta nunak tsaikaje, tsaikaje!
¡Yamaik ashí wakan pegkegchau aina nuna batsamtai,
nuigtú chigki tsumain dakittsá diitai aidau batsamtai wajasé!

³ Nunú nuwa pegkegchau takaamua dutiksag,
ashí nugkanmaya aidauk nujai pegkegchaun takainak,
ditá apajimtaiji aidaun emematuinak nampejaje.
Nunisag nugkanmaya apu aidaushkam niijai pegkegchaun takasaje.
Wají sujin aidaushkam nunú nuwa senchi wakejamujiya nuna
suwinak wiyakchameawaje”, timayi.

⁴ Tikich nayaimpinmaya chichaak:
“Mina aentsug aidautigmek, aanú yaaktanum pujutsuk jijnatajum,
anuí pujusjum anuiya pegkegchau takaakjum,
dita suwimak juwamush jukijum,

⁵ aanú yaaktanmaya aidau tudaujig nayaimpinak antiastatak wajasú
asamtai,
Apajuí ditanak suwinkan susagtatui,

6 aanú nuwa tikichin pegkegchau awajkauwa dutiksagmek,
niishkam pegkegchau awajkatajum.

Ni tikichin waitkasua nuna nagkaesau nigka waitkastajum.

Ni pegkegchau awajkagtak waitkagmajakua nuna nagkaesau
pegkegchau awajkujum waitkastajum.

7 Dutikakjum ni ememas shiig aneas pujusua dutiksagmek,

ni senchi waitiak buuttinjiya dushakam susatajum, ni anentaimsag:

Wika juwig apujai betek wajasan eketjai,

wajenash wajechuitjai, nunin asan tuke waittsashtinaitjai tumamá
wajakua duwi,

8 makichik tsawanta duwik ashí ni waitiamujig ajittawai:

Jaamuji, buutbauji, yapajamuji, inagnamunum jinum apeam atata
nunú.

Apu Apajuí ashí senchigtina nu

ni suwimak jukitnujin dutikattawai.”

9 Nugkanmaya apu aidau nunú nuwajai wakeesag pegkegchaun
takasú aidauk, nuwa kegak bukuitamun wainkag buutiagtinaí, ¹⁰ nu
imanik suwimkan juwak waittai, wainkag ikaag ijunas:

“¡Wait anentajame ame dekas Babilonia yaakat muun senchigtin
aajakuitkum,

pachiachmau suwimak juwakum waitiam duwi!”, awajiagmayi.

¹¹ Wají sujin aidaushkam buutiagtinaí nu yaaktan anentaimtusag,
nuigtuk ditá wajiiin sumagmainuk atsustin asamtai. ¹² Ditá wajiií oro,
jiju plata tutai, kaya pegkeg akik aidau, perla aidau, jaanch puju dekas
pegkeg, jaanch yamakaitkau, seda, ashí numi kugkuin aidau, ashí wají
elefante najai najanamun, ashí wají numi pegkeg aidaujai najankamu,
cobre, jiju katsujam, kaya mármol tutai, ¹³ nuigtú canela, kugkuin
aidau, incienso, mirra, puwag aidau, vino, aceite, harina dekas pegkeg
aidau, trigo, kuntin takamtiktai aidau, uwig aidau, carro tutai caballo
japitai aidau, aents inak agtin aidaunashkam ashí sumajakuí. ¹⁴ Nunin
asamtai yaaktan chichajuinak:

“¡Ame wají dekas pegkeg aidau imá wakejuyum duka,
yamaik atsugtamsae!

Ashí amina wajiijum shiig pegkeg aidau ajutjama duka
tuke igkugchatnaitme”, awajiagmayi.

¹⁵ Nunú wajiiin sujin aidauk, nuna suwinak wiyakuch waigkú aina
nunú, yaakat suwimak suwamu ishamain wajatai, ikaa wajantag
anentain idajuk buutuinaik:

¹⁶ “¡Wait anentajai yaakat muunta nuna!

jaanch dekas pegkeg najanamun,

jaanch yamakaitkau kapantujai pachimjugbaun nugkug,

oro, perla, kaya pegkeg aidaujai nuwa iwagmamaina ibauwe nunak,

¹⁷ ¡pachiachmau imanika wiyakchameamujiya duka esagkae!” tiagti-
nai.

Nuigtushkam ashí lanchá anuntin aidau, nui chimpimag yujau
aidau, nui takau aidaush, ashí aents nayantsanum takau aina nujai
ikaag ijunas, ¹⁸ yaakat esaak bukuitamujin diisag: “Tikich yaakat jujú
yaakat muunta ibagjai betekmantin tumainuk atsawapita”, wajagti-
nai. ¹⁹ Tusag wake besemag dekapenak nugka yukuukuntun jukiag,
buuken yukuajag senchi untsamak buutuinaik:

“¡Wait anentajai, wait anentajai yaakat muunta nuna!
Ashí lanchagtin aidautinak nigki wiyakuch etabiajuitak pachiachmau
imanik esaké”, wajamayi.

²⁰ “Nayaim batsatutijum pegkejam aidautigum,
Jisus chicham etsegtugkatajum tusa ishiakbau aidautigmesh,
Apajuí etsegtin aidautigmeshkam ju imania jujú diisjum dakujustajum.
Wagki Apajuí atumin iikmatjamak niinak imatikau asamtai”, timayi.

²¹ Nuna timatai, nayaimpinmaya aents dekas senchigtin, kaya
muuntan juki nayantsanum ajapeak:

“Jujai betekak yaakat Babilonia muunta aushkam ajapeam atalui,
nunikmataig ajumaish wainkashtin ainawai.

²² Dutikamu asamtai nuwi arpa awatbau,
pigkuí umpuamu, trompeta umpuamu, aents nui pujus takau,
yutain dekedaukesh tuke antuekashtinai.

²³ Nuigtú jii ekemamukesh,
nuwediagtai jistamainak pampainamukesh tuke antuekashtinai.

Amina wajiigmin sujutjamajakajua duka,
nugkanmag dita imá senchigtin aajakú asamtai,
ame tunchigminig ashí nugkanmaya aents aidauk tsanujú asam.

²⁴ Wagki jujú yaaktanum maawaju ainawai

Apajuí etsegtin aidaun,
aents pegkejam aidaunash,
nuigtú ashí aents Apajuí umijin aidaunashkam”, timayi.

19

¹ Nunú nagkaemakmatai aents kuashat ijunag senchi untsumkag:

“¡Yajautsui!

Apajuí jutiin uwemtijamja duka, nigka ashí senchigtina ibau asamtai
emematiagmi,

² wagki Apajuik, dekaskenum pegkeja nunak dutikin asa,
nuwa akiká takataiya nunú ashí aents aidaun,
apajimtai ememattajum tusa jintintuau asamtai suwimkan susae.

Nigka Apajuí inake aidaun kajegkú asamtai,
Apajuí iikmak niinak suwimkan suwak aikae”, wajaidaun antukbajiai.

³ Nunikag ataktushkam awentsag:

“¡Yajautsui!

Nuwa akika takaaku tuwagtai esaak bukuita duka ajumaish tuke
megkaekashtinai.”

⁴ Timatai veinticuatro apu aidaun cuatro iwaaku aidaujui, Apajuí
niina ekeemtaijin eketun tikishmatjag tsuntsumawag nijayin nugkan
antig pujusag emematuinak: “¡Yajautsui! Aatus ati”, tiagmayi.

⁵ Nuna tiagtai nunú ekeemtaiya nuwiya chichaak:

“¡Ashí niina inake aidautigmesh, eme anentsá diitai, eme anentsá
diishtai aidautigmesh,

iina Apajuijiya duke ememattajum!” tabaun antukbajiai.

Uwig nuwenak jistamatnuji

⁶ Nuigtushkam antukbajiai kuashat aents ijunag chichainak wajuk-
maina imatak, tuna dujaji utama imatak, ipamat pampamu wajukea
imatuinak:

“¡Yajautsui!

Iina Apuji Apajuí ashí senchigtina nu inabaun nagkamu asamtai,

⁷ shiig aneasaja dakujuinaku nigki emematiagmi,

wagki Uwig nuwenbau tsawan jegau asamtai,

niina nuweg yamaik uminkae,

⁸ nuniku asamtai jaanch dekas pegkeg najanamu tsuwatchau winchamtinun apegae,

duka Apajuinu pegkedajau aidau pegkeg takasbauji aina nuna iwainawai”, wajaidaun.

⁹ Tutai nayaimpinmaya aents chichagtak: “Agagta: Shiig aneasagatui Uwig nuwenku yuwamunum ipaamu aidauk.” Nuigtushkam chichagtak: “Juka chichamak Apajuinu dekaskea nuuwai”, tujutmayi.

¹⁰ Tujutkui ni wajamunum tikishmagbaijai niina ememattasan, nuniai: “Ankaipa wika Apajuí inakegaitjai. Ame, amina yatsum aidaujai Jisus chichakbau betek umijin ainajum wisha annuketjai. Dekas Apajuí emematta.”

Jisus chicham jintinkagtuamua nunuwai aents aidau, ditash dutik-sag etsekatnume tusa wakemitka duka tujutmayi.

Caballo pujunum aents entsatkau wainkamu

¹¹ Nunikan wainkabajai nayaim ujanmatai, caballo pujunum “Betek Umin” “Dekaskenak Chichau” daagtin entsatkau ekeematman. Nigka suwimkan jukitnume takush dekas dutikmaina nuna dutiknuyi, tuja shiwajijai maaniakush dekas nunimainun maaninuyi. ¹² Nuna jii aidauk, jii kegak wajukeyama imanibi. Untsu ni buuken kuashat atsejutaiji ajibi. Tikich daaji agatjamush ajibi, tujash nunak imá nigki dekabi. ¹³ Tuja jaanch nugkuagbaujig numpai numpeagbauyi, duka: “Apajuí Chichame” daagtinuyi. ¹⁴ Nayaimpinmaya suntag aidauk jaanch dekas pegkeg puju tsuwatchau aidau nugkuinasua, caballo puju aidauun entsatkau midiagmayi. ¹⁵ Tuja Apajuí Chichame daagtina nuna weninia espada empek wajakin jijnmayi. Nunú espadaya duwi ashí nugkanmaya aents aidauak depetuk, niina senchijijai inamjatnuyi. Apajuí ashí senchigtina nu, ni suwimkaji ishamaina nuna aents aidau suwakug, uva yumiji jukitasa neje najatia numamtuk awajkatnuyi. ¹⁶ Ni jaanch nugkuagbaujin, niina bakuin: “Apu nugkanum inamin aina nuna apuji”, tabau agatkamuyi.

Kuntin muun depetkamu

¹⁷ Nuigtú wainkabajai makichik nayaimpinmaya aents etsanum wajas, ashí chigki agkajunum nanaak yujau aidau senchi untsuak: “Minitajum, nunikjum juwi ijunajum, Apajuí yutain kuashat umiká ju yuwatajum, ¹⁸ nugkanmaya apu aidau neje, suntajá apuji neje, aents kakagman neje, caballo neje, nui entsamin aidau neje, ashí aents inascham agkan batsamin, inaku waitkatai, eme anenchatai, eme anentai aina juna neje aidau amuktajum”, timayi.

¹⁹ Juna timatai niinkaman wainkabajai kuntin muun, nugkanmaya apu aina nuna suntaji aidaujai tuwakag ijuntatman. Nunik caballo pujunum entsatkau ashí ni suntaji aina nujai maaniatatus. ²⁰ Nunittaman kuntin muunta nunak achikmayi. Dutikak tikich waitá etsegna nunashkam achikmayi. Duka kuntin muunta nuna emtin wainchatain iwainak, aents kuntin muunta nuna daajin nijayin agatmamkag nu dakumkamunashkam emematuidaun tsanujua nuna. Nunak kuntin

muunta nujai apatuk iwaakun kucha jii azufrejai pachimjamu kee abaunum ajuabi. ²¹ Tuja nuna suntaji aidaunak, caballo pujunum entsatka nuna weninia espada jiina duwi ijinabi. Dutikantai ashí nanamtin aidau nunú nejen yuwawag ejemakagmayi.

20

Mil mijan

¹ Wainkabiajai nayaimpinmaya aents waa muun ishamaina nuna yawijin takus, cadena muunjai takaku nayaimpinmaya akaetatman. ² Nunik akaiki kuntin muun kajan yaunchuk “dapi” tujakbauwa nu, iwanch tuuta awagmataiya nuna achiká jigkagmayi mil mijadai pujustí tusa. ³ Dutika waa muun ishamain akaga duwi egkea shiig epeni ukukmayi, juwig pujus mil mijanan ejeti, jiinki ashí aents aina nuna tsanujai tusa. Nuna mil mijanan ejematai wajumchik tsawanchik atia akupkatnuyi.

⁴ Nuigtú wainkabiajai ekeemtai aidaun, nui pekabiagmayi inamjat- nume tusa senchi susamu aidau. Nuigtushkam wainkabiajai Jisusan pachis, nuigtú Apajuí chichamen etsejagtai buuké tsupigka maamu aidau wakanin. Ditak kuntin muunta nunak, nu dakumkamunakesh emematchaju, kuntinu daajigkesh nijayin uwejinkesh agatkashbau aajakú aidau, ataktú nantajag Kristujai mil mijan inamjagtatus nuni- agmayi. ⁵ Nunuwai deatkau nantamu atina nunú, tujash tikich aidauk mil mijan jegamtai nantajagtinuyi. ⁶ Shiig aneasagtin ainawai Apajuí aentsji aidau deatkau nantajagtin aina duwi nantakiu aidauk. Nunú aidauk Apajuijaig tuke kanakchagtinai, ayatak Apajuí Jisukristu sacerdoteji waigkag, Kristujai mil mijadai inamjagtin ainawai.

Iwanch depetkamu atina nu

⁷ Nunú mil mijan jegamtai, iwanch achikam pujaushkam akupnaktinai. ⁸ Dutikam jiinki ashí nugkanmaya Gog Magog aina nuwiyin tsanugtinai, nuniak ashí ni suntaji aidaujai nayantsa kaamatkaji deka- pamainchauwa iman wajas ijunjagtinai maaniaawagtatus. ⁹ Nunikag ashí nugkan jamajag mininak, yaakat Jerusalén Apajuí aneetaijiya nuwi pegkejam aidau batsataidaun tenteawag apakagmayi. Nuniag- tatman Apajuí nayaimpinmaya jiin ajuntug ashí apekmayi. ¹⁰ Tuja iwanch ditan tsanujakua nunak kucha jii azufrejai pachimjamua nui ajuabi, kuntin muun tikich kuntin waitá etsegna nujai egketainamunum. Ditak kashi tsawajai tuke waitú chimpibiagtinai.

Ekeemtai muun puju aunum Apajuí ekeemas aents etegjatnuji

¹¹ Wainkabiajai ekeemtai muun pujunum Apajuí ekeemtatman. Nugkak, nayaimpijai Apajuí nui ekeemsamtaí shiig atsusagmayi. Nuniku asamtaí awenaik wainnakchabi. ¹² Wainkabiajai aents jakau aidau, eme anentsá diitai, eme anentsá diishtai aidaujai Apajuí emtin ijuntatman. Nunikmatai Apajuí: “Papí ujaktajum aents iwaaku pujusá takasbauji agatkamua nunú, tuja tikich papí tuke batsamsatin aidaun daaji agatkamua dushakam ujaktajum” tusa, Apajuik, nunú papinumian diis dita takasbaujin waituk, duti dutiksag suwimkanak suwagmayi. ¹³ Nayantsanum jakékú aidaush, nugkanum jakau aidaujai ashí nantajagmayi. Dita nugká iwaaku pujusá takasbaujiya nuna Apajuí tujutti tus. Nunikagmatai, makí makichik ditá takatjin

diijus, akanmayi. ¹⁴ Dutika jata nunak, jakau wakaní batsamtaijiya nujai kucha jii kegak wajukea imania nui ajugmayi. Nuuwai Apajuijai tuke kanaaku kanaamu atina nu. ¹⁵ Aents pujutan jukitin agattaiya nui papiinum daaji agatjashbau aidaunak nui utsaawagmayi.

21

Yamajam Jerusalén

¹ Wainkabiajai nayaim yamagman, nugka yamagmajai. Tuja nayaim, nugka, nayants aina juka megkaejagmayi. ² Wi dekas wainkabiajai yaakat pegkejam yamajam Jerusalegka nu Apajui eketbaunmaya akaetatman. Yaakat yamagma duka nuwa aishinu shiig iwagmamjauwama imanuyi. ³ Nuniemunum nayaimpinmaya senchi untsamak: “Yamaik Apajui aents aidaujui ijunag pujustatui. Ditak niina aentsji atinai, tuja ni ditá Apajuiji atinai. ⁴ Nuniau asa ashí ditá negaikinak emegkatjatnai. Atsutnai jaamu, buutbau, waitiaku untsubau, najaimamu aidaushkam. Wagki duwik aajakua duka ashimnaku asamtai”, timayi.

⁵ Apajui niina ekeemtaijin eketu chichaak: “Witjai ashí waji aidaun yamajam emaunuk”, timayi. Nuna ti: “Agagta, ju chicham aina juka, dekaskea duke asa betek uminkatin ainawai”, tujutmayi. ⁶ Nuigtú chichaak: “Yamaik ashimnake. Witjai nagkamsan ashí waji aidaun najankaunuk, tuja wikitjai nu waji aidauk nagkanjati titinaitag nunashkam, aents kitabaunak yumi pujutá sukagtin pukuni jiina nuwiyen wainkauch agtatjai. ⁷ Depetmakaju aidaunak ashí wajiin susatnaitjai. Wi ditá Apajuiji atatjai, tuja dita mina uchig agtatui. ⁸ Tujash sapig aidau, dekaskeapi tuchau, kajekagtin, magkagtin, tsanijimtanak yujajin, wawejatin, apajimtain emematin, ashí wait aidaujui kucha jii azufrejai pachimjamu kee awa nui chimpimawagtinai. Nuuwai Apajuijai tuke kanaaku kanaamu atina nu”, timayi.

⁹ Juna tujutmatai, siete nayaimpinmaya aents suwimak aimjamun ukajajua nuwiya inagnak ukajua nu tajuntujun: “Wegajai, wi Uwig nuwatkatna nuna iwaintuktajame”, tujutmayi. ¹⁰ Nuna tusa Wakaní Pegkeji iwaintugkamtai, nayaimpinmaya aents muja muun yakí jiiitkaunum jujukí iwagkabi. Dutika nayaimpinmaya yaakat Jerusalén pegkejam dekas Apajui eketbaunmaya akagun iwaintugkabi. ¹¹ Yaaktak Apajui etsantajinig etsanmayi, nunú etsanbaujiya duka kaya dekas pegkeg jasje, diamante, vidrio saawiya imanuyi. ¹² Yaakat peegmagbauk muun yakí jiiikbauyi, nuanuí doce waiti ajibi. Nunú waiti aina nuwig makí makichik nayaimpinmaya aents wajagmayi. Nu waiti aina nuwig Israelan uchiji doce aajakajua nuna daaji agatkamuyi. ¹³ Makí makichik yaakta yantame aina nuwig, kampá kauptum waiti ajiagmayi. ¹⁴ Yaaktak doce kaya batsatua nui ekeni peegjamuyi, nunú kaya aina nuwig Uwig chicham etsegtugkata tusa ishiakbau doce aajakajua nuna daaji agatkamuyi.

¹⁵ Nunú mina aujta duka dekaapatai tagkana nuninun ayatak orok najanamun takakuyi, yaakat peegmagbaujiya nuna ashí waitiji aina nujai dekaapatnun. ¹⁶ Yaakta duka ashí yantameg nuní nuninuk agmayi, esantig wegkantijai betekayi. Nuna nayaimpinmaya aents ni tagkan takakbauwa duwi dekaapabi, dutikam dosmil doscientos

kilómetros* ajibi. Esantí, yakintí, wegkantí aina duka ashí nuní nuninuk agmayi. ¹⁷ Nuigtú yaakat peegjamua nuna dupantinak sesenta y cinco metros dekaapabi, aentstí dekaapau ainag dutiksag.

¹⁸ Nunú peegkak kaya jaspe tutaya duwi peegmagbauyi. Untsu yaaktak ayatak orok najanamuyi, iman asa vidrio saawi tsuwatchauwa imanuyi. ¹⁹ Yaakat peegmaku doce kaya batsatuamua duka, makí makichik kaya dekas pegkeg aina duwi iwajamuyi: Nagkamchak kaya nu diamante tutayai iwajamuyi, jimaja ju zafirowai, kempatuma ju kaya ágata tutaiyai, cuatroa ju esmeraldayai, ²⁰ cincoa ju kaya óniceyai, seisa ju cornalinayai, sieteya ju crisolitowai, ochoa ju kaya berilowai, nueveya ju topaciowai, dieza ju crisoprasuwai, onceya ju kaya jacintowai, doceya ju amatistayai, ju aina jujai iwagkamuyi.

²¹ Doce waiti aina duka kaya perla tutaiya nu agmayi, nunin asa makí makichik waiti aina duka kaya perla tutaiya duke najanamuyi. Untsu yaakta jintiya duka ayatak orokeyi, iman asa vidrio saawiya imanuyi.

²² Nunú yaakta nuwig jega Apajuí ememattainak wainkachbajjai, wagki Apu Apajuí ashí senchigtina nuna Uwigjai emematuidau asagmatai. ²³ Nuanuig etsaakesh, nantukesh etsantak yaaktan tsaaptin emati tusaik atsumnachmayi. Apajuí etsanbauwa nu Uwig etsanbauwa nujai yaaktanak tsaaptin ebau asamtai. ²⁴ Ashí aents uwemkajuk nunú tsaaptina nui yujasagtin ainawai. Tuja ju nugka juwiya apu aidauk ditanu wají shiig pegkejuch aidaun jukiag, niina eme anentsag itajagtinaí. ²⁵ Yaakta waitiji aidaushkam tsawai tuke epentsacham atinai, kiyamush atsau asamtai. ²⁶ Ashí nugkanmaya aidaushkam ditanu dekas wají pegkeg aidaun etegkawag suwagtinai. ²⁷ Nunú yaaktanmag aents pegkegchau dakitmain aina nuna takau aidauk, wait aina dushakam wayachagtinai. Imá Uwijá papijin pujutan jukitin aidaú daaji agatkamu aina duke wayawagtinai.

22

¹ Nuna wainka ai, nayaimpinmaya aents iwaintugkabi makichik namak tsuwatchau pujutan sukagtin, vidrio saawiya iman, Apajuí Uwigjai eketbaunmaya jiiintatman. ² Jintak yaakta ejapeen nagkaemakuyi, tuja namaká yantamen makichik ajak pujutan sukagtin wajai, atú amainish makichik wajabi. Nunú ajak aidauk makichik mijantin doceya imania nejebi, nantú nantutin nejeau asa; tuja nu ajaka dukega duka aents aidau etsagaktasa takataiyayi. ³ Awig Apajuí dakitmainuk makichkish atsutnai. Apajuí ekeemtaijig Uwigdauwa nujai nui au asamtai, niina inake aidauk niinak emematiagtinai. ⁴ Nunidau asag ni yapiinash wainiagtinai, tuja ditá nijayinig Apajuí daaji agatkamu agtinai. ⁵ Nunú yaaktanmag kashik atsutnai. Atsumchagtinai ekemataijinak, aantsag etsashkam atsumnashtinai, Apu Apajuiya nu tsaaptin emamunum batsamas tuke inamá batsamtinai.

Kristu taatnuk namput wajaschae

⁶ Nayaimpinmaya aents chichagtak: “Jujú chichama juka dekas asamtai dekaskeapi tumain ainagme. Apu Apajuí niina etsegtin aidaun, Wakaní Pegkeji awetim dekamtikajakua nunú, niina aentsji

* **21:16** “Dos mil doscientos kilómetros” tawa duka, versión Lenguaje actual tawa nuwiya jukimui, paan antumain atí tusa. Tuja versión Reina-Valera, tikich versión popular aina duka “doce mil estadios” tuinawai.

nayaimpinmayan awemae, waji aidau waamak uminkagtina nuna ni inake aidaun iwaintukta tau asa", tujutmayi.

⁷ Jisus chichaak: "iWaamak minittajai! Shiig aneasagtinaí jujú papiinum chicham uminkatin agagbauwa juna umiidauk", tawai.

⁸ Witjai Juagkaitjai, jujú waji aina nuna wainkaunuk antutnash antukunuk. Juna antukan tuja wainká wajakan, nunú nayaimpinmaya aents mina juna iwaintugkaun tikishmatjabiajai ememattasan.

⁹ Nuniai ni chichagtak: "Minak aikajuawaipa, wishakam Apajuí inake asan, ame amina yatsum Apajuí etsegtin aidau, nuigtú ashí tikich Apajuí chichame agagbauwa nuna umiina nujai betekaitjai. Dekas Apajuí emematta", tujutmayi. ¹⁰ Nuigtú chichagtak: "Chicham uminkatin jujú papiinum agagbauwa juka uukmek idaisaipa. Ju uminkatnuk tsawantak ashí jegau asamtai.

¹¹ "Dita pegkegchaun takaidauk nunisag pegkegchaunak takaagtinaí. Pujutjin pegkegchau emaidauk nunak wejiagtinaí. Tuja pegkejan takaidauk, pegkegnak takaagtinaí. Apajuí umijuidaushkam, nunisag Apajuinak umijiagtinaí."

¹² Jisus chichaak: "Dekas waamak minittajai, nuniakun makí makichik aents takasbaun diigsan akiktinnashkam takuktatjai. ¹³ Witjai tuke pujunuk, ajumaish tuke pujutnununuk", timayi.

¹⁴ Shiig aneasagtatui ashí aents jaanchjin dijajag puju awasaja duka. Nunú ainawai Kristu jaak numpen ukajua nui kajinas anentaimaidau asag, ditá tudaujinish tsagkugnaju aina nu. Nuniku asag yujag pujutan sukagtina nunash yuwawagtatui, nuninak yaakta waitijinish wayawagtatui. ¹⁵ Tujash aents besekú aidau, wawejatin, tsanijimta yujajin, magkagtin, apajimtain emematin aidau, ashí wait aina duka waitsuk agaa batsamtinaí.

¹⁶ Jisus ataktú chichaak: "Wika Jisusaitjai, wi mina aentsug nayaimpinmayan atum mina nemagtin aidautigmin ujakpakti tusan awetimjime. Wika, David wegantunum akiinawaitjai, nuigtushkam yaya tsawak etsantama numamtinaitjai", timayi.

¹⁷ Jisus juna timatai, Wakaní Pegkeji, Uwijá nuwega nujai: "Minitá", tiagmayi. Ju papiinum agagbauwa juna antaushkam jutiksag: "Minitá", titinme. Kitamauk, tantatnume. Ni wakegauk yumi pujutan sukagtina nuna anenjauch uwagtinme.

¹⁸ Ashí aents chicham uminkatin aidau jujú papiinum agagbaun antuina nuna tajai: Makichik aentskesh, jujú papiinum waji pachisa agagbauwaina nu ai, tikichin ekek agaunak, Apajuishkam suwimak ju papiinum pachisa agagbauwa dutiksag susatnai. ¹⁹ Nuigtú makichik aentskesh jujú papiinum waji nagkaemagtin agagbauwa juwian emegkatunak, Apajuishkam yujag pujutan sukagtina nuna ayujashtinaí. Tuja yaakat yamajam jujú papiinum pachisa agagbauwa nuwishkam awayashtinaí. ²⁰ Ju dekas uminkatnun tawa nu chichaak: "Wika dekas waamak minittajai", tawai. Aatus atí. Takui wishakam: "Apu Jisusah, dekas waamak minitá", tibaijai. ²¹ Iina Apuji Jisukristu ashí atumnash wait anenjamjatnume.

Aatus atí.

Salmos LIBRO I

1

(Salmos 1—41)

Dekaskenum shiig aneasa pujamu

- ¹ Aents pegkegchau aidau
chichainamun antujus umiju wekaechauk
shiig aneas pujustinai.
Tudau aidau takatan
wakejus taka wekaechauk,
tuja Apajuín pegkegchau chichajuidaujai ijunag,
ditajai betek chichá wekaechauk
shiig aneas pujustinai.
- ² Wagki niig nuna wekaetutsuk,
Apajuí chichame umikta
timauwa nuna umiak,
kashish, tsawaish tuke nuwig
anentaimas pujau asa.
- ³ Nuadui nunú aentsuk makichik numi
yuminum ijusa ajaamu,
pegkeg, senchi nejen,
dukesk kaketsama imanai.
¡Iman asa ashí nii takamuji aidauk
shiig pegkeg ainawai!

⁴ Untsu aents pegkegchau aina duka
nunú aentsjaig betekchau ainawai,
nuadui ditak ajusa wampujin dase umpui ajapama numamtin ainawai.

⁵ Aents pegkegchau aidaunak
Apajuí dita takasbaujin
diijus suwimkan susatnai.
Tuja aents pegkejan takau aidau
Apajuí pujutain ijunjagtina
nuwig ditak wayachagtina.

⁶ Tuke Pujuuk aents
pegkeg aidaun kuitamui.
Untsu aents pegkegchau aidauk
dita pegkegchaujinig waittsagtina.

2

Ametme mina uchigmek

- ¹ ¿Wagka aents pegkegchau aidaush
Tuke Pujuujai shiwagmagainakush
ijunjash pampandayinawa?
¿Wagka chicham jegamainchaunash
wainkash tuu yujawa?
- ² Nugkanmaya apu aidau
yaakta apuji aidaujai ijunag

Apajuín kajejuinak, nii etegka
 apu adaikauwa nunashkam
 shiwagmainak wakenmataik
 chichaman umijuinawai.

³ Nuninak senchi untsumkag:
 “¡Achikbaujai betek batsatag
 duka ankanmagawagmi!
 ¡Tuja jigkaja emetuamujai betek
 batsatag dushakam
 agkanmagawagmi!” wajainawai.

⁴ Imatiagtai Apajuík niina pujusa inamtaijin
 nayaimpinum pujus dushikiawai.

⁵ Dutikak kajejuk uwakeawai,
 untsu nuni senchi kajejuk chichajak:

⁶ “Wi etegkan apu emamugnak
 muja etegkamua nuwi Jerusalén
 pujus inamjati tusan
 wi apusajai”, tawai.

⁷ Tuja Tuke Pujuu mina tujutma
 nuna etsegkatjai.

Tuke Pujuu chichagtak:
 “Ametme mina uchigmek,
 amek wi akiinati tima akiinawaitme.

⁸ Ame wakegamu segatta,
 Wi nunak imatiksasuk ashí nugkanmaya
 aents aidaun amastatjame aminu atinun.

⁹ Ichinak najanamu shigki basegbauwai
 awati tsaimaina numamtuk,
 apu pegkegchau aina duka
 ame tsaika utsagatme”, tujutmae.

¹⁰ ¡Apu nugkanum inamin aidauwah,
 shiig antuktajum, nunikjum
 juju chicham shiig unuimagtajum!

¹¹ Nuniakjum Apajuí
 eme anentsajum umigkujum
 shiig aneasjum ememattajum.

¹² Apajuí eme anentsajum ememattajum
 kajegtamkainum, nii kajegtamkamtaig
 jinumain ainagme, wagki nii kajeamujig
 makichkish imijtumaitsui.

Aents Apajuíyai kajinas anentaimaidauk
 nii kuitamsam pujuidau asag,
 shiig aneas pujusagtinai.

8

Apajuí imanjiya nunú aentsu pujutijjai
 David kantamamu

¹ Tuke Pujuuwah, ametme iina apuji,

ashí tikich aidau nagkaesau muunmek.
 ¡Amina daagmek
 ashí nugkanum antunawai!
 ¡Amina imanjumek nayaim
 múunta nuna nagkaesauwai!
² Amina shiwaajum kajegtamainak
 mantamatag tinu aina duka,
 uchi tsakat aidau,
 uchi muntsu muntsuaku aidaujai
 shiig pegkegchin kantamaina duwi
 amina senchijum iwaintukam itatmikajume.

³ Ame nayaim najanamua
 nuna diisan, tuja nantu,
 yaya aidaujai ame najankamu aidau
 nayaimpinum ayá nunashkam wainkun
⁴ anentaimsan:
 ¡Aents aidautik pegkegmakesh ainatsji!
 ¡Tikima wainkauch ainaji!
 Nunin ajinish ¿wagka tujash
 puyatkagtusmesh kuitamkagtame?
⁵ Aentsuk ángelchawashit tumain najanauwaitme.
 Nuadui apu kuitamaina
 imatksam kuitamam duka dutikame.
⁶ Tuja ashí ame najankamu aina duka
 ashí nii idaitusuitme, dutikakum
 tikich ame najankamu aina
 nuna nagkaesau emam apusauwaitme.
⁷ Dutikam uwig aidau
 buey aidau, kuntin ikamia aidau,
⁸ chigki yakí nanamin aidau,
 namak nayantsanmaya aidau,
 tuja tikich kuntin aidau
 nayantsanum ayá duka
 ashí nii idaitusuitme.

⁹ Tuke Pujuuwah, ametme iina apujimek,
 ametme ashí tikich aidaun
 nagkaesau dekas muunmek.
 ¡Amina daagminak
 ashí nugkanum dekainawai!

14

Aents pegkegchau aidaun pujutji

David kantamamu

¹ Aents anentainkachu aidauk:
 “Apajuik atsawai”, tuinawai.

Nuadui dita anentainig
 ima pegkegchau aina nunú takatak ajuinawai,
 nuadui dita takamuji aina duka shiig dakitmainai.
 Tiki makichkiuchikesh
 pegkejan takauk shiig atsawai.

² Apajuik aents aidaunak
 nayaimpinum pujusag
 diyawai, makichkikesh
 shiig anentaimkau Apajuí
 umigmain atsuash tusa wainkatatus.

³ Tujash aents aidauk
 pegkegchau takatan yujajui,
 nunidau asag ashí betek tunamakaje.
 ¡Tiki makichkikesh pegkejan
 takauk shiig atsawai!

⁴ Pegkegchaun takau aina
 duka anentaimainatsui.
 Pag yuwa wamak amutiamo numamtuk
 mina aentsug aidaun amuinawai.

Nunú aents aidauk
 Apajuí yainkati tusagkesh makichkish
 Tuke Pujuunak segachu ainawai.

⁵ Nunú aents pegkegchaun takaina duka
 sapigmainak kujaidiagtatui.
 Tuja Apajuik aents ima niina chichamen
 umin aidaunum pujawai.

⁶ Atum pegkegchau aidautijum
 aents ujudauch ememachu aina nunú
 atsaneakjum dushikiagme,
 tujash Tuke Pujuu ditanak kuitamui.

⁷ ¡Israel aents aidaun uwemtijatin utusag
 Siógka mujajinia taawa! tusan wakegajai.
 Tuke Pujuu niina aentsji aina nuna
 pujutjin iwagtugmataig,
 Jacob Israel daagtina nuna
 uchiji aidauk ashí shiig aneasagtinai.

15

Apajuí jee pegkegmanum aents aidau pujumain

David kantamamu

¹ Tuke Pjuuwah,
 ¿aentsush wajuku aidauwa
 amina jem pegkegma
 nuwish pujumainaita?
 Tuja ¿wajuku aidauwa muja ame etegkamua
 nuwish pujumainaita?

² Nuwi pujusagtina duka
 aents pegkeg bakumamainji
 atsubau, pegkejan takau,
 waitjutsuk dekaskea nuna chichau;

³ tikichnash pegkegchaun chichagchau,
 niina kumpajinash pegkegchau awagmachu,
 tuja nii ijutkamu aidaunash inatsauchu;

⁴ aents Apajuín dakitaujaig
makichkish ijunchau,
untsu Tuke Pujuun eme anentaunak
niishkam eme anentus diin,
tuja waitiakush
nii anagkagtuamunak betek umin.

⁵ Kuichkin tsagkatkagtukash
ewaekam akigkata tusa waitkagkagtuchu,
tuja aents takamsachu aig,
tsanumjugta akiktagme tamash dakitin.
Nunú aents imanis puja duka shiig aneas tajimat pujustinai.

16

Apajuí mina sujusua nuna nagkaesau pegkejak atsawai

David agagbau

¹ Chah, Tuke Pujuuwah, kuitamjukta,
wika aminí ejabatnak egajai.

² Wi amina chichagkun:
“Ametme mina apug
pegkegnum yainnumek,
tikich amea ibauk atsawai.”

³ Ame chichagtakum:
“Mina aentsug nugka batsata nunú
minak umigtuidau asag
shiig awajtuinawai.

⁴ Untsu tikich aents aidau apajuíchun apajuímainak niina umijuina
duka
senchi waittsagtinai”, tame.

Nuadui wika nunak
tuké etsagjashtinaitjai.

Tuja nunú apajuímtai aina
nunak makichkish emematchattajai.
Nuna daajinakesh makichkish adaikashtinaitjai.

⁵ Tuke Pujuuwah,
ametme mina ashí sujinmek.
Ame sujame kuashat pegkeg aidau,
mina pujutjua duka aminí awai.

⁶ Nugka shiig pegkeg aidau
makichkish wi anentaimtujakchamu ajutui,
Apajuí anagtuamu wi jukitin ajuta duka
dekas shiig pegkejai.

⁷ Tuke Pujuunak shiig pegkegnum chichagtinaitjai,
nii minak pegkegnum jintinjau asamtai.
Dekas mina iyashjunash jintinjutui,
dutijak kashishkam esetawai.

⁸ Tuke Pujuu mina Apajuíjua duka
tuke wijai ijutkau pujawai.

Wika niini emetaman wajau asamtai, makichkish ajunjashtin ainawai.

⁹ Wika shiig aneasan dakunkut pujajai,
ima nayaig kajintsa anentaimsan pujuttajai.

¹⁰ Apajuíjuh, amek minak
 jakati tusamek idaituschattame,
 tuja ¡pegkegmaitak ukumatainum ukusam
 kaugti tusamesh idaituschattame!

¹¹ Jinta pujutnum ekagtina nunú
 ame iwaintugkattame.
 Ame pujamugmia nuwig
 shiig dakujamu awai.
 Aminí awai dakujut tuke atina nunú.

19

Apajuí imanjiya duka nii najankamu aina duwi dekanui

David kantamamu

¹ Apajuí imanjiya nunak
 nayaimpia nunú ujabatui,
 nayaim wigkaya nunú wainku,
 dekas Apajuíyap najanauwaita taji.

² Tsawaiya nunú, kashia nujai,
 Apajuí imanjinak tuke etsejuinawai.

³ Chichainachiatk,
 makichik chichamnakesh tuinachiatk,
 tuja chichamujigkesh antugchatayaitk,

⁴ ashí nugka nagkatkamunum
 dita chichainamuk antugainawai.
 Tuja nayaimpinum etsa ekemsatnunak
 Apajuí umikui.

⁵ Etsag nuwi eketu makichik aents
 yama nuwan nuwatuk
 nii kanutaijin pujau
 jiinama numamtuk kashikmas jiinui.

Nunik jiinki aents
 tupikain uminas shiig aneas
 wemaina numamtuk weawai.

⁶ Nunik nayaim tikich yantamnumia etsa jiinki,
 tentea wea weakua,
 yaja tikich yantamnum jegaa kintamui.
 Nuadui etsa etsantun uwemtumainuk makichkish atsawai.

⁷ Tuke Pujuun chichamega duka
 yamajam pujutan sukagtau asa, shiig pegkejai.

Tuke Pujuun chichamega duka
 waitchauwai, shiig dekaske,
 wagki nunú aents
 kakagchauchin unuidau asa.

⁸ Tuke Pujuun chichame
 umiktina duka pegkejai,
 anentainum dakujutan sukagtau asa.
 Tuke Pujuun chichame umiktina duka
 dekas shiig pegkeg tsaaptinun anentaimtikagtinaí.

⁹ Tuke Pujuu puyatjusa
 umigbauwa duka shiig pegkejai,

tuja nii chichamega dusha
tuke megkaekashtinai.

Tuke Pujuun chichame umiktina duka waitchauwai,
dekaskenum ashí pegkejai.

¹⁰ ¡Nunú chichamak oro tsuwatjinchau
shiig pegkeg akika nuna nagkaesauwai,
tuja dapa yumiji yumimitu pegkejama
nuna nagkaesau shiig pegkejai!

¹¹ Wika amina inakmetag duwi pegkegchaun takasai tujutu asa,
amina chichamjumea nunú jintinjawai.
Nunú chichaman umiauk shiig pujustinai.

¹² Makichik aentsuk niina tudaujinak
nigki anentaimsag dekagmamait sui.
Nuadui, Tuke Pujuuwah,
¡wi pegkegchaun takamsatjai tusan
wakegachiatkun takamsamug aidaush tsagkugtugta!

¹³ Tuja mina ememataijush emegkatjukta.
Mina emematug wagagtuki, idaitusaipa.
Aatsan wisha ibau tudau ajuta
nuna agkanmagatjai.

¹⁴ Tuke Pujuuwah, mina chichamjush
mina anentaimtagjai,
ame diismash pegkeg, wakemain ati.
Chah, Tuke Pujuuwah,
ametme mina ayamjutmam uwemtijinmek.

22

Waitiamunum pujusa Apajuí emematku kantabau

David kantamamu

¹ ¡Apajújuh, Apajújuh!

¿Wagka minash idaitusume?

¿Wagka taamesh uwemtijatsme?

¿Wagka wi imanikan amina segaakun
buutaish pachittsume?

² Mina Apajújuh, tsawaish,
kashish untsuajame,
imatjamash aigtsume.
¡Wi ayabaujuk atsugtawai!

³ Tujash ametme pegkegmamek,
ametme apumek, iman asamin
Israel wegantu aidau emematjamainawai.

⁴ Iina apachji aajaku aina duka
aminí kajinmamsag
anentaimajaku ainawai;
aminí kajinmamsag
anentaimaidau asamtai,
agkanmitkauwaitme.

⁵ Yainkata tusa segapainakuish,
ame agkanmitkauwaitme,
tuja amini kajitmamsag
anentaimaidau asagmatai,
tsanugmek idaisachuitme.

⁶ Tuja wika aents tamak amaitsujai,
wika bagajai betekaitjai.
¡Wika aents aidaun dushiktaiyaitjai!

⁷ Mina waituidauk dushijuinawai,
nuninak buuken pegainawai.

⁸ Nuninak: “¡Tuke Pujuuwai
kajinmamas anentaima pujuuwe
nuadui, nii taa uwemtikjati!
¡Matika aneau asa, nii uwemtijati!” tuinawai.

⁹ Tuu yujatnume:
Ame minak akiinati tujutiu asamin,
mina dukuju waken
egkemkan akiinawaitjai.
Tuja ame minak mina dukuju kuntujin
patattsam kuitamjukmayume.

¹⁰ Duwik nagkamsam wi akiintsaig,
ame minak kuitamjukuitme.
Tuja mina dukuju wakeen pujubiag
duwi nagkamsamek
mina Apajuig aayume.

¹¹ Ima minakek idaitusaipa,
wika waittanum jegantan pujajai.
Tuja mina yainmainuk atsugtawai.

¹² Mina shiwag aidauk,
basánumia toro kajen aina
iman tententuawaje.

¹³ Dutijuawag ikamyawa kajen
shinuwama imatujinak
esattatus tsekenjuinawai.

¹⁴ Tuja wika yumi ukagag
megkagama numamtinaitjai;
mina ukunchig aidauk
akaejaujai betek wajase.

Tuja mina anentaijuk
wiya yumimeaujai betek wajase.

¹⁵ Mina wenujuk ichinak yama inajuamu
bukuama nunin wajase.
Mina idaijush kayakmataijui nujamjutkae.
¡Jakaujai betek minak
nugka yukukuntunum aepjukiume!

¹⁶ Aents pegkegchaun takau aidau
yawajai betek tuwagtukaje;
tuja mina dawegnak,

mina uwejujai ichinujaje.

¹⁷ Mina ukunchig aidaunash
pan wainmain dekafejai;
tuja mina shiwag aidauk
ayatak diiju batsatui.

¹⁸ Mina jáanchjun jujuktiag, yana daajig jiinkiti,
nunú jukiti tusag,
nunú dutika dekatain
wasugkamainawai.

¹⁹ Tujash Tuke Pujuwah,
ametme mina senchimtijnmek.
¡Tupanjutsuk, wamak taam yainkata!

²⁰ Puyajai ijutiag mantuawainum
minash agkanmitkajuata.
Yawajai betek aina nunú
maatnume tusamek idaitusaipa.

²¹ Leónjai betek kajen aina nunú mantuawainum ayamjuktata.
¡Toro kajen kachujin
magkagtina iman aina nunú
mantuawainum ayamjuktata!

²² Ame ayamjuktamin, wi amina pachisan
mina yatsug aidaun ujaktajai;
dutikan ditajai ijunjan
amina emematkun kantamatjai.

²³ ¡Atum Israel aents aidautijum,
Tuke Pujuu eme anentin aidautigmek,
Niina senchiji anentaimtusjum ememattajum!

²⁴ Apajuik ujudauch aidau waitiamun
wainiatkug waittsatnume tusag
pachitskek idaitsui.
Tuja uumjutnakesh uumjuchui.
Yainkata tusa segamak antujui,
nunik betek yayawai.

²⁵ Apajuíjuh,
ima aminak ememattagme,
amina aentsjum eme anenjamin aidau
kuashat tuwakbaunum nunak umiktatjai.

²⁶ Ujunauch aidautigmek
yutai yuwajum shiig ejemagtajum.
Tuja Apajuí wainkatasa
egautigmek nii ememattajum,
nuniakjum kuashat mijan pujustajum.

²⁷ Ashí aents tikich nugkanmaya
ditash niimtin aidau,
chichamnash tikich
chichaman chichaaku aidauwah,
Tuke Pujuu kajimatgipajum.
Niiyai jeganjum,

¡tikishmaja pujusjum ememattajum!

²⁸ Tuke Pujuuwai apua duka,
iman asa ashí nugkanum inamui.

²⁹ Shiig atsumkas pujautigmesh,
tuja ashí jaka pujautigmeshkam,
ima Apajuíya duke tsuntsumjuajum etsagjatajum,
wagki ima atumkek
pujutak jukichu asajum.

³⁰ Wi wegantu aidauk
Tuke Pujuun emematuinak,
tuké niina pachisag etsejiagtin ainawai.

³¹ Nuninak atakea duwi
akiinawagtina nunashkam
Apajuín takatji pegkeja nuna,
kuashat wainchatai aidaun
iwainajua nujai pachisag ujakagtinai.

23

Apajuí minak

aents uwija kuitamnujai betek

kuitamjawai

David kantamamu

¹ Aents uwigjin puyatjus

kuitamna numamtuk
mina kuitamjauk Tuke Pujuuwai,
nuadui wi atsumamuk atsugtawai.

² Aents niina uwigjin chijichi pegkejan
ayu ayugkawa pimpiagtai,
yajuak bikintunum ayamtikama numamtuk,
Tuke Pujuu minak ayamtijawai.

Tuja kitamamun uwagti tusashkam
entsa pegkeg wiyakunum ejetawai.

³ Niig tuke anenka ibau asa,
wi pimpitaishkam ichichtawai,
dutijua pujut pegkegnum etawai.

⁴ Nugka ségaju ishamain
suwenum nagkaemaknush,
ame wijai wekagu asamin, ishamkashtatjai.
Uwija kuitamin uwigjin ayamjuktatus
ushujutaijin takus wekagama numamtuk,
amek mina ayamjutkatasam wekaeme.
Nuadui jamainnum jegaknush ishamkashtatjai.

⁵ Mina shiwag kajegtin aidaun emtin,
ame minak yutai pegkeg aidau umigtame.
Aents ipaamujin shiig anentus juwak
buuken kugkuinai nijau aina imatiksam
minak shiig awajtukume.
Umutai umikbau pinignum aun

aents wainak shiig anegama numamtuk,
minashkam shiig anemtijusume.

⁶ Amina anenkagmia nunú,
wait anenkagtutaigmijai
ashí tsawantai tuke uyuuntawai.
Tuke Pujuwah, wika
ame pujam nuwi tuke pujustinaitjai.

24

Ashí najankamu aina nuna apuji

David kantamamu

¹ Nugkak ashí Tuke Pujunui,
nunú nugkanum ashí ayá duka,
nuwi batsamin aidaujai
ashí niinu ainawai.
² Wagki nugka tujig asatnunak nii umikui,
dutika nayantsanum,
namak aidaunum aatus
emetug idaisauwai.

³ Tuke Pujuu mujaji etegkamua nuwish
¿yaki wakainta?

Apajuí jee pegkegma imannummash
¿yaki wayash pujusainta?

⁴ Nunak aents pegkegchaun takachu,
anentai pegkeg,
dakumka najanamun emematchau,
umikchatnaitak tsanumak
Apajuí daajin adayas
dekas umiktatjai tuu wekaechau,
nuwig wayawagtinaí.

⁵ Nunú aentsnak
niina apuji Apajuíya nunú uwemtijatnai.
Tuja niinak Tuke Pujuu
pegkegnum yumigkig,
ayamjuk shiig pujutan susatnai.

⁶ Tuke Pujuu, Jacopa Apajuíjiyah,
aents amina egapaidauk,
dutika yayaam agtinai.
Tuja amina segapaina nuna uchiji aidaushkam
dutiksaik yayaam agtinai.

⁷ ¡Jerusalégka waitijiya nunú ujaitajum!

¡Yaunchuk waitai aajakua

nunú ujai idaisatajum!

¡Apu pegkejam niina imanjin nayaimpinum,
nugkanmash inamna nunú wayattawai!

⁸ Apu pegkejam niina imanjin nayaimpinum,
nugkanmash inamna dusha ¿yaita?

Duka dekas iina apuji

Tuke Pujuu niina shiwaajinash ishamchau,

wajiuwa nunuwai.

⁹ ¡Jerusalégka waitijiya nunú ujaitajum!

¡Yaunchuk waitai aajakua

duka ujai idaisatajum!

¡Apu pegkejam niina imanjin nayaimpinum,

nugkanmash inamna nunú wayattawai!

¹⁰ ¿Yaita nayaimpinum,

nugkanum inamna dusha?

¡Duka Israel aents aidaun Apujiyai!

¡Duka Tuke Pujuu ashí senchigtina nunuwai!

¡Niiyai dekas apu pegkejam,

niina imanjin nayaimpin, nugkan apujiya nunú!

27

Apajúyai mina tsaaptinjuk, mina uwemtaijuk

David kantamamu

¹ Tuke Pujuuwai mina tsaaptinjuk,

Tuke Pujuuwai mina uwemtaijuk,

Tuke Pujuuwai mina pujutjun kuitamjutuk,

nunin aish ¿yanak wisha ishamkainja?

² Aents pegkegchau

mina shiwag aina nunú,

ijunainawai mina mantuawagtatus,

tujash ditak tukumak iyajag jinuinawai.

³ Kuashat suntag mina tententuinakuish,

wika ishamkashtatjai,

tuja mina jetetkagtatus uminainakuish,

wika puyattsuk pujuttajai.

⁴ Ima makichkia nunak

Tuke Pujuun segabiajai,

tuja wika ima makichkia nunak wakegajai:

Wika iwaku pujag duikik

kashi kashinig Tuke Pujuun emematkun

niina jee pegkegma nuwi

pujustatajai, niina pegkegmajiya

nuna wainkatasan.

⁵ Tsawan utugchat ajuttaish,

Apajuí niina jee pegkegma nuwi uugkattawai,

Tuja kaya muunnum waka

uwemaina numamtuk uwemtijugtatui.

⁶ Nuadui mina shiwag aidau

tententuinakuish, ishamkashtatjai

Apajuí depetmikaju asamtai.

Nuadui kuntu maan

Apajuí jee pegkegma nuwi

apeakun niina ememattatjai;

shiig aneasan senchi kantamkun

Tuke Pujuun ememattatjai.

⁷ ¡Tuke Pujuuwah,

amina segajame, antugtukta!
 ¡Minash wait anenjujam, aigkata!
 8 Mina anentaig chichagtak:
 “Apajuí egakta”, tujutui.
 Nuadui amina wainkatasan egagme.
 9 ¡Wait aneam uumjutkaipa!
 ¡Kajegtukam aigtsuk idaitusaipa!
 ¡Ima ameketme mina yainnumek!
 Nuadui mina ayamjutmain atsugtaigkik,
 ima minakek idaitusaipa,
 wagki ametme mina Apajuíg uwemtijin.
 10 Mina apag mina dukugjai
 ima minak idaituinakuish,
 Tuke Pujuwah,
 ame minak jujukim kuitamjuktinaitme.

11 Mina shiwag aidau egatuinawai,
 nuadui Tuke Pujuwah,
 amina jintim pegkeja nunú iwaintugkata,
 tuja wisha wajuk pujumainaitja nunú tujutta.
 12 Mina shiwag aidau dita wakegamujin uminak,
 maatnume tusamek tsagkamjukaipa,
 mina shiwag tsanumin aidau nantagtujaje.
 13 Tujash wika eke jatsuk
 iwaku juju nugka juwig pujusan,
 amina pegkegmagma nuna
 wainkatnunak shiig dekajai.

14 ¡Tuke Pujuwai
 kajinmamsam anentaimsata!
 ¡Ishamkagtutsuk, ichichmamjata!
 ¡Ehe, dekas ima Tuke Pujuuwaig
 kajinmamsam anentaimsata!

32

Tudau etsegtumaka tsagkugnamu

David kantamamu
 1 Tudauji ashí tsagkujamua duka
 shiig aneastinai.
 2 Aents pegkegchau takatan
 anentaimtus wekaetuchuk shiig aneastinai.
 Tuja tudauji ashí tsagkujamushkam shiig aneastinai.
 3 Wika mina tudaujun etsegtumachkunuk,
 wake besemag pujau asan ayatak jamaijai.
 4 Nuadui ame dekapjau asamin,
 tsawaish tuja kashish
 senchi waitmajai.
 Yagkug etsa sukuam kagama
 numamtuk dekapmamkun,
 kakaumainchau dekapmajai.

⁵ Nuniakun mina pegkegchaugnak,
makichkish uutsuk etsegtumaktajai
tusan amina ashí ujakmaijame,
nuadui ame mina tudaujuk
ashí tsagkugtugmayume.

⁶ Nuadui amina umigtamin aidauk,
waituinakush amina segapainawai.
Nuadui nujag dujajak
nugka punag weakush,
ditanak amaigkashtinai.

⁷ Ametme mina ejamataigmek,
ishamainnumash ame kuitamjame;
nuadui ame agkanmitkajuamun anentaimtusan
shiig aneakun, kantamjagme.

⁸ Apajuí chichaak:
“Wi aminak diyakjame,
nuadui amina unuinagtasan jintintuattagme,
tuja wiki jintan inaktusan kuitamkattagme.

⁹ Nuadui caballo, burrojai anentaimchau
asamtai, jagken jijui jinka emetua
mai japia, mai japia,
awajam wegama numamtinuk, amek aipa”,
tujamui Apajuí.

¹⁰ Aents pegkegchaun takau aina duka
kuashat waituinawai.
Untsu ima Tuke Pujuuwaig
kajinas anentaimaina nunak,
niina anenke múnta duwi
tuke ijik kuitamui.

¹¹ Aents pegkeg,
tuja takatjish pegkeg aidautigmek,
Tuke Pujuuwai shiig dakujustajum,
¡Nuniakjum nii emematkujum shiig aneasjum senchi kantamjuata-
jum!

33

Shiig aneasa Apajuí emematku kantamjamu

¹ Aents pegkeg aidauwah, shiig aneasjum
Tuke Pujuu emematkujum kantamatajum.
Aents pegkeg aidau kantabauk yajautsui.

² Arpa awatku kantamtai kantamkujum
Tuke Pujuu see titajum.

³ ¡Kantamtai pegkeg aina nunú
kantamkujum nii ememattajum!
Tuja yamajam kantamtai
kantamkujum nii eme anentsajum
shiig aneakjum unsumtajum.

⁴ Tuke Pujuum chichamega duka

waitchauwai, shiig dekaske,
nuadui nii tibauwa duka ashí betek uminui.

⁵ Tuke Pujuuk pegkeg takata nuna
dekaskea nujai aneawai.

¡Nuadui niina anenkega duka
ashí nugkan jamag awai!

⁶ Tuke Pujuuk ima niina chichamenig
nayaim aidaun, nantu, etsa, yaya aidaun
aatus ashí najankauwai.

⁷ Apajuíyai kucha múun aidaunmayan
yumi yajuak makichkinmak ijumjauwa duka.

⁸ ¡Aents ashí nugkanmaya aidautigum
Tuke Pujuu eme anentsajum umigkatajum!

⁹ Wagki nii niina chichamenig
ashí najankauwai.

Tuja nii nunikti timauwa duka imanisag
makichkish wajukachmin wajas asauwai.

¹⁰ Tuke Pujuuk aents pegkegchau
tikich nugkanmaya aidaun
pegkegchaun dutikatag tusa
anentaigtugbaujin betek umikti
tusag ayatkek idaitsui.

¹¹ Untsu Tuke Pujuu nuna dutikatjai tibauwa duka
makichkish yapajinchauwai.

¹² Aents aidaun Tuke Pujuuwai dekas iina
Apajuíjig tuina duka
shiig aneasag pujusagtinai,
wagki midau ati tusa etegkamu asag.

¹³ Tuke Pujuuk nayaimpinum pujusag
ashí aents aidaunak diyakui.

¹⁴ Nii puja nuwi pujusag
aents nugkanmaya aidaun
wajukenawa nunak ashí wainui.

¹⁵ Apajuíyai iina anentain najadauk,
nuadui ashí ii takamunak diigtamkawai.

¹⁶ Makichik apua duka
niina suntaji aina nujaig
ayamjumakag uwemaitsui,
tuja aents aidaushkam
niina senchijinigkik ayamjumamaitsui.

¹⁷ Tuja caballo aina duka
senchigtin ainayatkush,
aentsu ayamjukag uwemtikmaitsui.

¹⁸ Untsu Tuke Pujuun eme anentus,
ima niyaig kajinmamas anentaimaina
nunak nii tuké kuitamui.

¹⁹ Tuja nujan tepeamtaish,

nujantai jakati tusag idaitsui.

²⁰ Ii aidautik Tuke Pujuuwai kajinmamsa anentaimji,
nuniajin ¡nii kuitamjamak yaimpaji!

²¹ Iina anentain Apajuí anentaimtusa shiig aneaji.
Nuniaku niina daaji pegkegma nuwi
kajinmamsa anentaimji.

²² ¡Tuke Pujuuwah,
aminí anentaimsa pujau asajin,
amina anenkagmia nunú uyunkagtusti!

34

Apajuí wait anenkagtamu anentaimtusa kantabau

David Abimelec maataq tama mantuawai tusa tsanumak imaanjaujai
betek wajatai, jiiki awemam pujus agagbau

¹ Wika Tuke Pujunak kashi kashinig
pegkegnum chichagkun,
tuke ememattinaitjai.

² Wika Tuke Pujuuwai eme anenmamjai;
nunú antukjum ememachu aidautigmek,
shiig aneastajum.

³ Tuke Pujuu daaji múunta nunú
ashí ijuntusaja emematiagmi.

⁴ Wika Tuke Pujun segabiajai yainkati tusan,
dutika ai sapigmamujun agkanmitkajuabi.

⁵ Tuke Pujuuwai anentaimas pujuidauk,
shiig aneasag pujuinawai,
nuadui datsan ipatmak achagtinai.

⁶ Wika wainkauchitjai,
nuniau asan Tuke Pujun segabiajai.
Tusa segai nii antugtuk,
wi waitiamujun agkanmitkajuabi.

⁷ Aents Apajuín eme anentus umijin aidaunak
Tuke Pujuu aentsji ángel awemamua nunú
kuitamui.

⁸ Tuja Tuke Pujuuush dekas pegkejashit tusajum
dekaatasa wakegakjumek dekapsatajum:
¡Aents Apajuíyai kajinmamas anentaimaidauk,
shiig aneas pujusagtinai!

⁹ Tuke Pujunu atajai tumamiu aidautigmek,
nii eme anentsajum ememattajum;
wagki niina umijuidauk makichkish atsumchagtinai.

¹⁰ Wiakuch aina duka ujudauch wajasag
nujantai waituinawai.
Untsu aents Tuke Pujun egau aina duka
tuke waittsachagtinai.

¹¹ Mina uchig aidauwah,
minai minitajum, nunikjum antugtuktajum,

Tuke Pujuu umigtan wi jintituatjime.

¹² ¿Kuashat tsawan pujustasamesh wakegamek?

Iwaku pujusam shiig takakum
dakujustasamesh ¿wakegamek?

¹³ Nuniakmek,
pegkegchau chichamak chichatsuk pujusta,
tuja wait aina duka makichkish chichakaipa.

¹⁴ Pegkegchau takat aina duka idaisata,
nunikam pegkeja duke takasta;
nuniakum kakanmamsata maak agkan pujutnum.

¹⁵ Tuke Pujuuk aents niina shiig umijin aina nuna kuitamui,
dutikak nii sumamunash antujuk yayawai.

¹⁶ Untsu tudaun takau aidaunak
Tuke Pujuu kajejawai,
dutikak ijina atakesh adeagchatnun
emegkagtatui.

¹⁷ Tuke Pujuuk niina umijin aidau
sumamun betek antujui;
dutikak nii waitiamujinash agkanmitkawai.

¹⁸ Aents wika uwemjashtinapitja tusa
anentaimak waitiaun uwemtijatatus
Tuke Pujuuk tikijuch pujawai.

¹⁹ Tuke Pujuun umigna duka
kuashat utugchatan igkuawai,
tujash niinak Apajuí depetmatnak suwawai.

²⁰ Tuja niina ukunchi aidaunashkam
nii kuitamjawai;
nuadui makichik ukunchinakesh kupigkachagtinai.

²¹ Aents pegkegchau aina duka
ditá tudau takamsamujin waituinawai,
tuja Apajuí umijin aidau kajejuina dushakam
suwimkan jukiagtinai.

²² Tujash Tuke Pujuuk niina inake aidau uwemtikawai.
Nuadui ¡Tuke Pujuuwai kajinmamas anentaimaidauk
suwimak suwamak achagtinai!

37

Apajuíyaig kajitmamsa anentaimat

David kantamamu

¹ Aents pegkegchaun pujutji diigsam kajekaipa,
tuja aents pegkegchau aidau
atsumkas pujuinakui, nunú diisam kajegkagtukaipa.

² Wagki nunú aents aina duka
dupa tsupikam wamak kagaja megkagama
numamtin ainawai.

³ Tuke Pujuuwaig kajinmamsam anentaimsata,
nuniakum ima pegkeja duke takasta.
Nuniamin Apajuí yaimpasmatai,

juju nugkanum pujusa takakum
shiig yuwa pujusminum.

⁴ Tuke Pujuu shiig anentsam aneeta,
nii umiktatui ame senchi wakegamunak.

⁵ Amina pujutjumek Tuke Pujuu idaitusta,
dutikakum niyai kajinmamsam pujusta,
nuniamin nii yaimpaktatui.

⁶ Ame shiig pujamugmea nunú,
tuja amina takatjum pegkeja dushakam
etsa tajimak shiig etsantama iman atinai.

⁷ Tuke Pujuu emtin wainka chichá wekaetsuk
takamtak pujusta;
nuniakum dakasta nii yaimpakti.
Tuja aents pegkegchau aidau
shiig atsumkas pujuinakui,
nunú diisam kajegkagtukaipa.

⁸ Tuja kajeta duka idaisata,
kajeka jiyanita dushakam ukukta,
kajekaipa, wagki kajeamua duka utugchatan itawai.

⁹ Aents pegkegchau aina duka ijina utsaam agtinai.
Untsu aents aidau Apajuín umijuinak
niinig anentaimas kajinas batsata nunú
Tuke Pujuu nugkan anagkagtuawa nuna jukiagtinai.

¹⁰ Aents pegkegchaun takau aidauk,
dukup atsuk megkaejattawai;
nunikagmatai wainkatasa egaakmesh
makichkish wainkashtinaitme.

¹¹ Untsu aents ememachu aina nunú nugka pegkegnum wayawag,
tutit chicham atsamunum shiig pujusagtinai.

¹² Untsu aents pegkegchauwa duka
aents pegkejan kajajak
pegkegchau awajkatatus egatui.

¹³ Tujash Apajuík nunú aents aidaunak dushikiawai,
wagki dita megkaejatnuk tsawan jegau asamtai.

¹⁴ Aents pegkegchau aina duka
ujudauch aidaun, ememachu aidaun,
pujutji pegkeg aidaun aatus maawagtatus
puyagjin akentaijjai uminawai.

¹⁵ Tujash ditak, dita puyagjinig maam agtatui,
untsu akentaiji aina duka
kupija utsantam agtatui.

¹⁶ Aents pegkegma duka
wajiji kuashat achataish,
aents wiakuch pegkegchaun
nagkaesau shiig pujawai.

¹⁷ Wagki Tuke Pujuu
aents pegkegchau aidaun ijinak,

aents pegkeg aidaun kuitamkattawai.

¹⁸ Apajuík aents tudaugtuchu aidaun kuitamui,
tuja ditak ajumaish tuke atina nuna jukiagtinai.

¹⁹ Tsawan waitiamu jegataish,
ditak waittsachagtinai,
tuja nujan tepeamtaish,
dita yuwatnuk kuashat ajiagtinai.

²⁰ Aents pegkegchau aina duka
dupa kagakujai betek keekagtinai.
Tuja Apajuín shiwaaji aidaushkam
jii bukuiti megkagama numamtuk
megkaejatin ainawai.

²¹ Aents pegkegchauwa duka
tsagkatjukta takui tsagkatkamash akikmachui;
untsu aents pegkeja duka
tsagkatkamak nuni ewagas akikmawai.

²² Apajuí pegkegnum yumigsamu aina nunú
nugka pegkegnum pujusagtinai;
untsu nii pegkegchaunum
yumigjamu aina duka, ijina utsam agtinai.

²³ Tuke Pujuuk aentsu pujutjin diijus
nii wakegamujai betek pegkeg ataik,
shiig pujusti tusa yayawai.

²⁴ Tuja nunú aentsuk
pegkegchaunum iyakush,
nunisagkek megkaekashtinai,
wagki nigka Tuke Pujuu achiakbau asa.

²⁵ Wi datsa asan pujuyag duwikish,
tuja yamai múuntuch wajasan pujag duwish,
makichkish waintsujai aents pegkeg aidau
Apajuí kajimatki idaisamu asag waituidaunak,
tuja dita uchiji aidaukesh
yumain atsujam waituinak
sumá yujaunak makichkish waintsujai.

²⁶ Aents pegkeg aina duka
ashí tsawantai wait anenkagtinai,
nuniaua asa tsagkatkagtinai;
tuja niina uchiji aidaushkam
pegkegnum chichajam agtinai.

²⁷ Pegkegchau takata duka tupanjata,
nunikam pegkeja duke takasta,
nuniakum ame pujustinun Apajuí anagtabauwa
nuwi tuke pujustinaitme.

²⁸ Wagki Tuke Pujuuk
shiig takamua nuna wakegawai;

nuadui niina umijuidaunak kajimatkgid idaitsui;
untsu pegkegchau aidaunak
dita uchiji aidaujai ashí ijinui.

²⁹ Nugkan Apajuí anagkagtuawa nuwig
aents niina umijin aidau tuke pujusagtinai.

³⁰ Aents pegkejak shiig anentaimas chichawai;
nuniak tuke pegkeja nunak chichawai.

³¹ Nuniau asa niina anentainishkam
Apajuí jintintuamua nunak tuke anekui;
;nuadui niig makichkish pegkegchaunmak
iyaumaitsui!

³² Aents pegkegchauwa duka
aents pegkejan tsanumjug,
maatnume tusa sujuktatus wekaetawai.

³³ Tujash Tuke Pujuuk aents pegkegchauwa nunú
maati tusag idaisashtatui;
tuja nuigtushkam tsanumjujagmatai,
achikag waitkastinme tusagkesh idaisashtatui.

³⁴ Tuja amek Tuke Pujuuwai kajinmamsam pujusta,
nuniakum niina chichame umigkata;
wagki nii aminak tikich aidaun nagkaesau etamtatui,
dutijama nugkan anagtabauwa nuna amastinai.
;Nuwi pujusam aents pegkegchau aidau
jinuidau wainkatnaitme!

³⁵ Aents pegkegchauwa nunú
numi múun wajaama numamtuk
ememas wajaun wainkabiajai.

³⁶ Tujash wajukayawas, megkaekabi,
wainkatasan egaknush wainkachmaijai.

³⁷ Aents shiig anentaimkauwa nunú diista,
nunú aentsuk tutit chicham atsaunum agkan pujustinai.

³⁸ Untsu aents antumtikmainchau
intimkiu aina duka
ashí ijina utsaam agtinai;
nuadui ditak jinatnujin dakainawai.

³⁹ Tuke Pujuuk aents pegkeg aidaun
yaigka uwemtiknai,
tuja tsawan waitiamu jegataish,
nii ejaka kuitamui.

⁴⁰ Tuja ditanak Tuke Pujuu ayamjuk agkanmitkawai,
wagki niyai kajinmamas
anentaimaidau asagmatai.

40

Apajuíjuh, ame wakegamun umiktasan wakegajai
(Sal. 70)

David kantamamu

¹ Wika Tuke Pujuu yainkati tusan
niiyai kajitmansa pujusan segabiajai;
tusa segai nii antugtukmayi.

² Tuja wi jamainnum jeganta pujaish,
nii uwemtijugmayi.

Tuja kuchanum tepea
jamaina numamtuk ashí jaka pujai,
Apajuí uwemtijugmayi.

Dutijua kaya múun
makichkish buchitmainchaunum wajasa iyaumaitsu iman etibi.
Nuadui wi wekaesatnunak nii umigtuke.

³ Dutijak yamajam kantamtain
Apajuí kantamjutain kantamati tusa jintinjuabi;
nuna wi kantabau kuashat aents aidau
anentain antinkabi,
dutikam Tuke Pujuuwaig kajinas anentaibiagmayi.

⁴ ¡Aents ememachu
tuja wainka apajuímtai aidaunash emematchau,
ima Tuke Pujuuwaig kajinmamas anentaimaina duka
shiig aneas pujustinai!

⁵ Tuke Pujuu mina Apajuíjuh,
amek jutii wait anenkagtakum,
kuashat ishamain wainchatai aidau iwainajuitme.
¡Makichkish amejai betekak atsawai!
Nuna pachisan etsegkatag takunush,
ashí etsegmainchau dekafejai.

⁶ Apajuí tsagkugtugti tusag
kuntinu maawag nuna nejen ashí apeatnume,
dutikainak ajak aidaunashkam anentag sujustinme tusamek
sumatsme.
Untsu Apajuín chichamen antukti tujutiume.

⁷ Nuadui, papiinum agagbau
mina pachitus tawa nujai betek,
chichaakun: Juwi pujajai, timajai.

⁸ Apajuíjuh, ame wakegamu takata nunú minak shiig awajtaiwai.
¡Ame jintinjuamua nunú mina anentaijui ajutui!

⁹ Amina aentsjum aidau
kuashat tuwaka ijunbaunum
amina takatjum pegkegma nuna iwainakmajai.
¡Tuke Pujuuwah, wi aminun pachisa etsegtsuk
uuka pujatsug duka amek shiig dekame!

¹⁰ Tuja aents aidau wait anentakum,
dita tudaujish tsagkugnaitam nunú pachisa
etsegtnamak itattsachmajai.
Tuja ame anagkagtuamuk betek uminaitam nuna

ame uwentikagtamujai pachisan chichagkagtukmajai.
 Nuigtush amina aentsjum kuashat aina
 nuna emtinig amina anenkagminak
 dekaskegmijaig, makichkish uukchamjai.

11 Nuadui Tuke Pujuuwah, amesh minash wait aneasam
 amina anenkagmea duka atushat etugtipa.

¡Amina anenkagmin
 pegkegmagma nujai yainkata!

12 Untsu ame kuitamjachkuminig wika jamainaitjai,

wagki wi waitiamua duka
 dekapakuish makichkish ejemait sui.

Mina tudaujuk mina intashjun nagkaesau
 shiig kuashat ajutui.

Iman asamtai, datsaamakun shiig niimsachmin,
 nuigtush shiig pujuschamin jakamin dekapeajai.

13 Tuke Pujuuwah, ¡wait aneasam,
 minash agkanmitkajuata,
 dutijakum wamak yainkata!

14 Aents aidau mina mantuawagtatus
 wakejutuina duka ame inatsakta;
 dutikamu asag,

mina pegkegchau awajuktatus
 anentaimaina duka
 datsantin pisagtinme.

15 Tuja mina dushijuina duka
 datsagkag pisagtinme.

16 Untsu amina egapaina duka shiig aneastinme;
 tuja ame uwentikagtinaitam

nuna wakejuina duka:

“¡Apajuíyai dekas múunta duka!” tusag
 tuke emematjamtin atinme.

17 Tuja wi shiig senchi waitiakun

wake besemag pujag nunú,
 minash wait aneasam Tuke Pujuuwah, kajimatjukipa.

Ametme mina yainkam uwentijinmek;
 nuadui Apajuíjuh, minash wamak yainkata.

LIBRO II

42

(Salmos 42—72)

Wi jinta niimjamua duka Apajuíyai

Coré uchiji aidau kantamawagbau

¹ Japa senchi kitamak uwagtatus yumin egama numamtuk
 wika Apajuíjuh, amina egajame.

² Apajuí pujuta sukagtina nuna wainkatasan,
 aents kitakai waitiak yumin egamaina
 numamtuk egajai.

¿Wajutik wisha ataktush
Apajuí jee pegkegma nuwish wayatja? tusan
anentaima pujajai.

³ Nuadui tsawaish,
tuja kashish buutu pujajai,
nunia aents aidau inintuinak:
“¿Amina Apajuígmasha?” tujutuinawai.

⁴ Nuwi anentaimkunuk
wake besemag dekafejai.
Wi yaunchuk aents aidau yajuakan
Apajuí jee pegkegma nuwi emai,
shiig aneasag Apajuín emematuinak
untsumki shimuyanum nuna anentaimjai.
¡Yajauwajah ijunja Apajuí emematbau!

⁵ Iman aish ¿wagkanuk wisha mijaktaja?
Wi puyatjumainuk atsawai.
Apajuí uwemtikagtina nuwig
kajintsan anentaimtatjai,
nuniakun ima niinak ememattatjai.

⁶ Shiig aneasa pujuschamin
wake besemag dekafejai,
nuniakun muja Hermón
tuja muja Misar tutainum
namak Jordágka nujinchi jinagbaunum
pujusan aminí senchi anentaimjai.

⁷ Tuja ame najankamu aidau
mujanum wajasa antam,
namaka nujinchi chichijam
tuna detau aidau senchi uutak,
ishamain wajama imanik
wi waitiamua duka minitjawai.

⁸ Tujash kashi kashinig
Tuke Pujuu niina anenkega duwi minak yaintui;
nuadui wishakam
Apajuí mina pujutan suja nuna emematkun
kashi kantamtanak mijattsujai,
nuniakun segatnashkam segatskek idaitsujai.

⁹ Apajuí mina ayamjutna nuna chichagkun:
“¿Wagka minash kajimatjukiume?
¿Wagkanuk wisha mina shiwag aintuinakuish,
wake besemjash wekaetaja?” tajai.

¹⁰ Mina shiwag aidau dushiktuinak:
“¿Amina Apajuígmasha?”
tusa aju ajumag inintuinawai.
Imatjutiagtai mina ukunchig najautuinawai.

¹¹ Tuja ¿wagkanuk wisha mijaktaja?
Wi puyatjumainuk atsawai.

Apajuí uwemtikagtina nuwig
 kajintsan anentaimtatjai,
 nuniakun ima niinak ememattatjai.
 ¡Niyai mina Apajuíg uwemtijinuk!

43

¹ Apajuíyah, wi pegkegchau takamsamu
 atsugta duka ame dekame,
 nuniau asam ¡aents pegkegchau aina nunú
 maawai tusam ayamjutkata!
 ¡Aents pegkegchau waitjin aidaunum agkanmitkajuata,
² wagki ametme mina Apajuíg kuitamjinmek!
 ¿Wagka minash idaitusume?
 ¿Wagkanuk wisha mina shiwag aintuinakuish
 wake besemjash wekaetaja? tajai.
³ Amina tsaaptinjum
 dekaskegmijai sujasta, nunú jintinjuati.
 Muja ame etegkamunum pujam nuwi
 wakatag tusaish wajuk wemainaita nuna.
⁴ Nuwi wakan amina altarjumin jegantan,
 arpa awatkun amina ememattajame;
 wagki shiig aneasa pujuta nunú ame sujau asamin.

⁵ Tuja ¿wagkanuk wisha mijaktaja?
 Wi puyatjumainuk atsawai.
 Apajuí uwemtikagtina nuwig kajintsan anentaimtatjai,
 nuniakun ima niinak ememattatjai.
 ¡Niyai mina Apajuíg uwemtijinuk!

46

Apajuík jutijai pujawai

Coré uchiji aidau agajagbau
 Juka jaka ukumamunum kantamajakbauwai

¹ Apajuíyai iina kuitamjamin,
 iina senchintijamin,
 tuja utugchat ataish tuke yaijatin.

² Nuadui nugka buchittai,
 muja aidau yumpunainak,
 nayantsanum kakegu
 wainkuish ishamaitsuji.

³ Nayants senchi tsukatbau,
 kedegtak muja aidaun senchi umuchiak
 ishamain wajuish ishamaitsuji.

⁴ Namakak nii tsegkeakbaujijai
 Apajuí yaaktajin aents batsatun shiig anemtikui,
 nunú yaaktak dekas tikich yaakat aidaun nagkaesau
 shiig pegkegmai, Apajuí pujutai asa.

⁵ Apajuík nunú yaakta ejapeen pujawai,
 nuadui makichkish tsaimainchau ainawai.

Tuja Apajuí aentsji aidau,
nunú yaaktanum batsatunak kashikiuch nagkamas yayawai.

⁶ Aents nugka muunnumia aidauk,
nugka múun aidaun apuji aidaujai
Apajuí chichamun antukag
ishamainak senchi pampainawai.
Tuja nugkashkam Apajuí chichatai,
yumpuna tsainak megkaewai.

⁷ ¡Tuke Pujuu ashí senchigtina duka jutijai pujawai!
¡Jacopan Apajuíjiya nunuwai iina kuitamjamin!

⁸ Tuke Pujuu ishamain wainchatai aidaun
juju nugkanum iwainajua nunú
taajum diistajum.

⁹ Maanitik ashí nugkanum atsuti tusa tine.
Nuadui maaniaku flecha akentai aidaunak
nagki aidaujai kupigmayi,
dutikak carro maaniaku jutai aidaunashkam
apeka utsagmayi.

¹⁰ ¡Anuig nagkankatajum!
¡Witjai Apajuínuk, nunú dekatajum!
Ashí nugkanmaya aidauk mina umigtukagtatui.

¹¹ ¡Tuke Pujuu ashí senchigtina duka jutijai pujawai!
¡Jacopa Apajuíjiya nunuwai iina kuitamjamnuk!

47

Apajuíyai ashí nugka apujig

Coré uchiji aidau kantamawagbau

¹ Ashí aents aidautijum Apajuí uwejum awatitajum.

Tuja nii emematkujum
shiig aneasjum senchi kantamatajum.

² Wagki Tuke Pujuuwai ishantai múun, ashí nugka apujiya duka.

³ Aents tikich nugkanmaya aidaun Apajuí depetuk,
atum inagtajum tusa iina idaitugmasui.

⁴ Apajuí Jacopan aneau asa,
nii wegantu aidautin etegtamjauwai,
dutihama nugka pegkejan
nii anagtabauwa nuna sujamsajui.
Nunú nugka duwi ii eme anenmamji.

⁵ Tuke Pujuu Apajuik niina aentsji aidau
shiig aneasag senchi kantamainak,
nuigtu uwija kachujin umpuinak
pampainamunum niina pujusa inamtaijin
waya ekemsae.

⁶ ¡Kantamtai Apajuí kantamjuatajum!
¡Kantamtai iina apuji kantamjuawagmi!

⁷ Apajuíyai ashí nugkanmaya aidaun apuji,

nuadui shiig anejasjum kantamjuatajum.

⁸ Apajuik nii pujusa inamtaiji
pegkegma nuwi pujusag,
ashí aents nugkanmaya aidaun inawai.

⁹ Tuja ashí tikich nugkanmaya
apu eme anentsa diitai aidauk,
Abrahama Apajuíjin ememattatus
nii wegantu aidaujai ijunainawai.

¹⁰ Ashí aents nugkanmaya aina duka Apajuínu ainawai.
Nuadui nii ashí inawai.

51

Apawa wait aneamam mina tudaujush tsagkugtugta

David Betsabén nuwatkamtai* profeta Natán jiyakam pujusa juna
aatus agajui

¹ Apajuyah, amina anenkagmin wait anenjugta;
tuja amina wait anenkagtutaigmin
mina tudaujush tsagkugtugta.

² ¡Mina anentaijui pegkegchau ayá nunú nijatjugta!
Tuja mina tudaujush jaipja utsanjukta.

³ Mina pegkegchaugnak wika shiig dekagmamjai.
Tuja wi pegkegchau takamsamua duka
mina anentaijuig sakamtsui.

⁴ Ame dakitamun amina emtimin
pegkegchaun takamsan
ikajeakun waitkagme.

Nuadui minak dekaskenum
suwimkak sujustatme.

Wika pegkegmaitjai tusanuk tumaitsujai.

⁵ Wika dekas wi akiinawaitag
duwi nagkamsanuk tudauwaitjai;
tuja mina dukuju muntsujin muntsuaku asanuk tudau ayajai.

⁶ Amek dekas aents ememachu
dekaskenum chichauwa nunú aneam;e;
nuadui shiig anentaimja pujut sujusume.

⁷ Wi pegkegchau takamsamu
mina anentaijui ajuta nunú hisopowai† jaipja ajapjutuata,
dutijuawamin pegkeg wajastajai;
ashí minak nijatjata, dutijuawamin
yujagkim pujuama nuna nagkaesau wajastajai.

⁸ Suwimak sujakum waitkagsau akumesh,
yamaik minash shiig aneasa pujut sujusta.

⁹ Mina tudaug aina duka kajimatkita,
nuniakum mina pegkegchaug aina nunú
ashí esaktujata.

¹⁰ Apajuíyah, mina anentaijush tudaugtuchu yamajam etugtita,

* 51: Nunú pachisa ausata 2 Sam 12.1-12. † 51:7 "Hisopo" tawa duka makichik ajak ajakui.
Nuna duke juki jaipmaina numamtuk jaipjugti tusa David tiuwai.

dutikakum pegkeg anentaimat
 ima aminak umigtamain sujusta.

¹¹ Tikima ajapjutak ajapjuawaipa,
 tuja amina Wakanim Pegkegma dusha jujutkipa.

¹² Tuja ame uwemtikagtujamin shiig aneamu
 ajutkagtuwama nunú ataktu sujusta,
 nuniakum amina Wakanim wait anenkagtina nujai
 kuitamjukta.

¹³ Dutijuawamin aents amina chichamjumin umitan
 dakitin aina nuna jintintuatjai,
 amina nemagtamkatnume tusan.

Dutika ai aents tudau aidaush dita tudaujin idaisag
 ima aminak umigtamkatnume.

¹⁴ Apajuíyah, ametme mina uwemtijinmek,
 tuja wi pegkegchaun takamsauwaitag duwi
 maatnume tusamek idaitusaipa.

Wisha ame wait anenkagtutaigmea nuna
 pachisan etsegkun shiig aneasan
 kantamtain senchi kantamjuatjame.

¹⁵ Apuh, minash kantamati tujutta,
 wisha kantamtain amina kantamjuatjame.

¹⁶ Tuja uwija maan nuna nejen ashí apeakun,
 nuigtu anentag aidaun amaakun
 amina ememattag takunush
 dutikmainchau dekapeajai,

wagki duka aminak shiig awajtamchau asamtai.

¹⁷ Apajuíyah, amek aents wika tudauwapitja tusa
 anentaimak waitia nunú shiig anentame.

Tuja aents wika tudauwapitja tusa
 awake anentaimag tsagkugtugta tusa
 segapakuig, yaitskek idaichauwaitme.

¹⁸ Apuh, wait aneasam
 Isarael aents aina nunú
 wait anenjam kuitamkata.

Dutikakum Jerusalén peejamu tsaikbauwa nuna
 ataktu peejatnume tusam yaigta.

¹⁹ Dutikawamin kuntu maawag
 nuna nejen ashí apeawagtata
 nunú shiig awajtamkattawai.

Nuadui amina emematjamainak
 toro tsakat aidaun maawag apeawagtinai.

63

Apajuí anenkeg

pujutan nagkaesauwai

David Judá wegantu aidau nugken uwegshunum pujusa agagbau

¹ Apajuíjuh,

ametme mina Apajuígmek,

Yama tsawamuik kashikmasan
wakejusan segajame,
wika amina wainkatasan wakegakun
kitamaku wajuktayama imaniajai.
Tuja yumi yutushtai nugka buku wajas,
yumin atsumak wajukchawash imaniawai,
mina iyashjuk amina atsumjamak.

² Amina jem pegkegma nuwi wayan,
amina imanjumea nuna
senchigmijai wainkatasan wakegajai,

³ wagki amina anenkagmea duka
pujutan nagkaesauwai,
nuadui kantamkun ememattatjame.

⁴ Wika aminak tuke ememattinaitjame,
nuniakun mina uwejun takuin
amina aujttatjame.

⁵ Aents yutai pegkejan yuwa
shiig aneas pujuuwa numamtuk wika shiig aneasan pujuttajai,
nuadui shiig aneasan
kantamkun ememattatjame.

⁶ Kashi kanaku tepesnush
aminí anentaimsanuk tepajai.

⁷ Ametme mina yaintumek;
nuadui aminí yunumsan
ame kuitamjusamin shiig aneasan pujujai.

⁸ Ashí mina pujutjua nunak
amina amaajai, wagki ame minak
amina senchigmin kuitamjame.

⁹ Mina mantuawagtatus
wakejutuina duka ijinata,
dutikam initak yutuam emegkagta.

¹⁰ ¡Ditak nagki iju maam agtinai,
dutikamun ikamia yawá yukagtin aidau
ditá iyashinak yuwawagtinai!

¹¹ ¡Untsu apuk, Apajuíyai shiig aneastinai!
¡Tuja ashí aents Apajuín daajin chichau aidaushkam
shiig anentsag kantamjuawagtinai!
Untsu waitjin aina nuna weninak
Apajuí ashí epetjatnai.

65

Ima Apajuíke ememattaig

David kantamamu

¹ Apajuíyah, muja Siógnum pujuuwah,
¡ametme eme anentsa
kantamjam amainmek!

Amina takagsatjame tusa anagtabau aidauk
betek umigtamain ainawai.

² Amek ii segamash antugkagtame;

tuja ashí nugkanmaya aidauk aminí mininawai.

³ Iina tudauji aidau wagagkagakuish,
ame tsagkugkagame.

⁴ Ame aents aidau etegjam,
ame jem pegkegma nuwi amejai pujustinme
tiuwaitam duka shiig aneasagtinai.

¡Tuja ame jem pegkegma nuwi pujusa
amina pegkegmagma nunú wainkau asaja shiig aneastatji!

⁵ Apajuíyah, ametme jutiin uwemtikagtinmek,
nuadui aents pegkegchau aidau suwimak suwakum
amina umigtamaidauk shiig anennaitme.

Nuadui ashí nugkanum pujuidauk
tuja nayantsa amain atushat batsamin aidaushkam
ima aminig kajinmamas anentaimainawai.

⁶ Muja aidauk amina senchigmijai najanauwaitme,
dutikam buchittsuk asatnume tusam kuitame.

⁷ Amek nayants tsukatbaujish imignaitme,
tuja aents aidau pampaidauk,
bitat asatajum tusam itatmitkauwaitme.

⁸ Tuja atushat batsamin aidaushkam ame amina senchigmin
wainchatai aidau iwainamun wainkag kujainawai.

Tuja ashí nugkanum batsamin aidaush
aminí shiig aneenak untsuainawai.

⁹ Ametme nugka kuitamnumek;
tuja yumishkam yutumtikame,
dutikam ajak aidaush tsapapitkame.
Ame yumi yutumtikjamu betsaka akagak
nugkan uchupjamtai, trigo aidaush
shiig tsapainiag nejenawai.

¹⁰ Ajak ajakmatasa nugka taimu aidaush
yumi yutumtikjam uchupiamé,
wagki ajak aidau tsapainiag senchi nejektinme tusam.

¹¹ Ajak aidau mijadai kuashat nejektinme
tusamesh nejemtiknaitme.

Tuja yumi kuashat yutau asamtai,
yumi atsumakuish waitnatsui.

¹² Nuadui uwegshunmash
dupa tsapaka samekbau pegkeg wajas awai.

Tuja muja aidaushkam
samekbau pegkejan iwagmamainawai.

¹³ Tuja nugka nain pegkeg aidaunmak,
tagku aidau piyake,

tuja nugka paka aidaunmak
kuashat trigo ayawai.

¡Ashí nunú aidau shiig anenawai!

66

Apawa amina takatjumek shiig pegkejai
Kantamtai agagbau

¹ Ashí nugkanmaya aidaütijum
shiig aneasjum Apajuí kantamjuatajum.

² Apajuí daaji pegkegma nunú pachisjum
kantamtai kantamatajum.

Tuja niina imanjiya nunú pachisjumshakam
kantamtai kantamatajum.

³ Apajuí chichagkujum:

“Amina takatjumek shiig pegkeg ainawai.

Ame ima senchigtin asamin,

amina shiwaajum aidauk

ishamjamainak aminí yunumainawai.

⁴ Nuninak ashí amina etsagtamainawai,

nuninak amina daagmin pachisag

kantamtain kantamainawai”, titajum.

⁵ Apajuí aents aidaütin ayamjutpak
ishamain wainchatai aidaun iwainajua
nunú anentaimtustajum.

⁶ Nigki nayantsanash ukuya buku emauwai,
dutikamtai ii muunji aajaku aidau bukunum katiyajui.

Nuadui ¡ina Apajuíyaig shiig aneasagmi!

⁷ Apajuí niina senchijiya duwi

aents aidaunak tuke inawai;

untsu niina umigtan dakitin aidaunak

nijai shiwagmagawainum tusa tuke diyakui.

⁸ ¡Ashí aents aidaütijum,

iina Apajuíjiya nunú

pegkegnum chichagtajum!

¡Dutikakjum kantamtai kantamjuatajum!

⁹ Wagki nii iinak kuitamjamui.

Pegkegchaun takastinme tusag idaikagtatsui.

¹⁰ Iina Apajuíjijyah,

amek ima aminigkiash

kajinas anentaime tusam

dekapkagtusuitme,

nuadui plata jinum jiyamu

pegkejama iman ekagtiuwaitme.

¹¹ Tuja kuntin achiktinun

dakamtikak, kuntinun achiyajama numamtuk,

shiwaaji achiktinme tusam

tsagkamkagtukume.

Nuigtush shiig kuashat waitkagkagtusume.

¹² Nuadui aents pegkegchau aidau

waitkastinme tusam

agkan idaisabiume,

tuja jutiik yuminmash tuja

jünmashkam nagkaemakmai.

Dutika ashí dekapkagtusam,

juju nugka pegkeja imagnum

pujustinme tusam apujkagtusmayume.

13-14 Nuadui wi yaunchuk
 ishamainnum pujusan amina chichagkun:
 Ame yaintsamin juna nagkaikinuk,
 amina emematkun anentag amastinaitjame
 tiuwaitjam, nuna imatiksasuk amina jem
 pegkegma nuwi wayan kuntu maan,
 nuna nejen ashí apeakun ememattatjame.
 15 Tuja kuntu duwejam aidaun
 uwija wiyaji aidaui
 amina eme anentsan ashí apeattajai.
 Nuigtushkam toro aidaun, chivo aidaun,
 amina emematkun apeattajai.

16 ¡Ashí atum Apajuí umijin
 aidautigmek minitajum!
 Nunikjum antuktajum
 Apajuí mina yainka nuna pachisan ujaktajime.
 17 Apajuín untsukmajai,
 dutikan niina emematkun kantamjuamiajai.
 18 Wi ayatak pegkegchaunmak
 anentaimesan pujutaik,
 Apajuík antugtukchatnuyi.
 19 Tujash minak antugtuku asa,
 wi segamunash yainkabi.
 20 ¡Apajuík wi segamunak dakitjachmayi,
 tuja niina anenkenash sujitjukchabi,
 nuadui tuke ememattai atin ati!

69

Waitiaku pujusa Apajuí segamu

David kantamamu

¹ Apajuíjuh, kuashat waitiakun
 atsanmainchau dekapeajai,
 wait aneam yainkata.
² Kucha amutnunum tepeajai,
 wajai emetumainkesh atsugtawai.
 Dekas namaka kunajin akaejai,
 namak chichijam asa ajektawai.
³ Untsu untsukawan sagagjai;
 mina suweg dajautawai.
 ¡Apajuín daka dakakuan jiijuish yawegjai!
⁴ Mina shiwaajuk intash kuashta
 nuna nagkaesau ainawai,
 utugchat atsugtaig kajegtuinak,
 mantuatag tuinawai.
 Tuja makichkish kasamkachu aig,
 kasamkamujum awagkita tusa imatjutuinaui.
⁵ Apajuíjuh, ame dekame wika pegkegchau ayajai;
 nuadui mina tudaugnak ugmaitsugme.

6 Tuke Pujuu Apajuí ashí senchigtinuh,
 ¡aminí kajinmamas anentaimin aina nunú,
 wainak mina pegkegchaujui
 datsaama yujainum idaisaipa!
 Israel aents aidaun Apajuíjyah,
 aents amina egapau aina nunú
 mina pegkegchaujui datsaama
 yujainum kuitamkata.

7 Amina umiju asan
 kajegtuinakuish katsuntajai.
 Datsanjui mina yapijuk nimpawai.

8 ¡Mina yatsuchig aidaush,
 tikich aents itugmaina dutiujinawai!

9 Amina jemin akasmatkun senchi waitiajai.
 Tuja amina pegkegchaun chichagtamainakuí,
 nuna antakun kajeajai.

10 Buutkun yujumkan yutsuk
 ijagmaan pujai, dushiktuinakuish katsuntajai.

11 Jakamunum nugkutin
 nugkuai, dushiktuinakuish katsuntajai.

12 Ashí aents aidauk
 pegkegchaun chichagtuinawai.
 Tuja nampen aidaushkam
 tuke aneas dushiktuinak kantamjutuinaawai.

13 Tujash Tuke Pujuuwah,
 wika amina segajame,
 ¡wait aneasam yainkata!
 Amek anenkaitme, tuke kuitamkagtinaitme,
 iman asam minash uwemtijugta.

14 Tsakusnum tepean tepag nunú
 eke jatsaig jügkita,
 tuja mina kajegtuina dusha agkanmitkajuata.
 Tuja namak chichijam ajapjuattak
 awajta nunú uwemtijugta.

15 ¡Namak chichijam
 ajekjati tusamek idaitusaipa!
 Tuja wainchi ishamaina nunú
 yutua emegkakti tusamesh idaitusaipa.

16 ¡Tuke Pujuuwah,
 amek pegkeg, anentak wajasuitme,
 iman asam minash aigkata!
 Amek wait anenkagtinaitam
 iman asam minash antugtukta.

17 ¡Juju amina inakem
 segapa nunú antugtsuk idaisaipa!
 ¡Utugchat ishamain ajutui, wamak yainkata!

18 ¡Juwi taam, shiwag aidau
 waitkajuina nunú ayamjutkata!

19 Amek mina dushiktuinak
inastuina duka shiig dekame.

Tuja mina shiwaajush ya ainawa
dushakam amek dekame.

20 Ima imatjutuinakua ipimtukiaje,
nuadui shiig aneasa pujumainchau
kakaagchamin dekafejai.

Yaki wait anenjug
anentaijun ichichtujainta tusan,
egaknush wainkachmajai.

21 Yapajaish, yutainum jatain egketjiagmayi,
tuja kitamaish chujuinun sujiagmayi.

22 Nuadui dita jüstamaina nunú
yutaiji aina nunú aatus ditan pempeentuki
utugchatan apujtusti.

23 ¡Tuja wainmachu,
kakaumainchau emakta!

24 Dutikakum ame kajekbauwai
makichkish idaitsuk ashí ijinata.

25 Dutikawamin dita jee aina duka
agkan juwajagtatui,
tuja nunú jega aidaunmak
makichkish pujuschatnume.

26 Wagki ame mina suwimak sujusamin
waitiaish, ditak minak diigtsuk
ayá dushiktuinak, nuni senchi waitkajuinawai.

27 Nuadui ameshkam
pegkegchaunmak ikata.
¡Tuja makichkish dita tudaujig tsagkujaipa!

28 ¡Aents take pujusagtin aina nuna daaji
papiinum agatkamua nuwi, dita daaji ayá
duka ashí esakatjata!

Tuja aents amina umigtamin aidaun
daaji agatkamua nuwig,
dita daajig makichkish agatjaipa.

29 Apajuiyah, wi jakun wake besemag
dushikiam pujag nunú minash
wait aneamam yainkam uwentijugta.

30 ¡Apajuín see tusan kantamtain kantamkun,
shiig aneasan ashí iwainakan
niina daajin ememattatjai!

31 Nunú dekas, kuntin aidau
maa apeamun nagkaesau
Tuke Pujuunak shiig awagmaktatui.

32 Tuja aents Apajuín segau aidau
wake besemag batsatuk,
nuna wainkag shiig aneasagtatui;
nuninak ichichmamjagtatui.

33 Wagki Tuke Pujuuk aents waitiak

wake besemag pujus sumaunak antujui;
tuja niina aentsji aidau achikam batsamas
waitiagtaish, dakitjag idaitsui.

³⁴ Nugka, nayaim, nayants aidautigmesh
Apajuí ememattajum,
tuja ashí nuwi batsamin aidautigmeshkam
Apajuí ememattajum.

³⁵ Apajuí Jerusalégnak kuitamkattawai,
dutikak Judá wegantu aidaun
yaaktaji aidau tsaikbau aina nunak
ataktu iwagkattawai.
Dutikamtai niina aentsji aidau
nuwi batsamsagtinai.

³⁶ Nunú nugkak niina aentsji aidaun
uchiji wegantu aidaunu atinai.
Tuja nunú nugkanmak Apajuín aneen aidau
shiig batsamsagtinai.

72

Apu eme anentsa Apajuí segatbau
Salomón kantamjuamu

¹ Apajuíjuh,
juju apu amina takatjum pegkeja nuna
niishkam shiig takasti tusam yaigta.
Tuja tikich apu atina dushakam
dutiksag shiig takastin atinme.

² Aatus amina aentsjum aidaun,
tuja nuigtu waitkam batsatu aidaun apuji wajas,
inamak shiig takastin ati.

³ Tuja muja aina nuwiya jiinjag,
agkan maanitsuk pujutan,
pegkeg takatjai aents aidaun jintintuati.

⁴ ¡Ujudauch aidaun ayamjukti!
¡Tuja aents waituina nuna
uchiji aidaunashkam ayamjukti!
¡Tuja untsu tsanumag kasamin aina nunak waitkasti!

⁵ ¡Nii tuké iina apuji atin ati,
Tuja etsa, nantu megkaekashtinun tuke auwa
nujai betek pujustin ati!

⁶ ¡Yumi yutak nugkan uchupig, ajakan shiig tsapapama iman ati!

⁷ ¡Nii apu wajas inamtata duik shiig agkan pujusa takamu ati!
¡Tuja nii inabaujig nantu tuke auwa
nujai betek atin ati!

⁸ ¡Nunú apua duka
etsa jiiintaya imanui nagkamas,
etsa akaetaiya aatus
ashí nugkanum inamjatin ati!

⁹ ¡Tuja niina shiwaaji aidau

uwegshunum batsata duka

nii tabaun umiktinme!

¹⁰ ¡Nuninak Tarsis nugkan apuji aidau,
ajuntai aidaunum batsamnun apuji aidau,
Sabá nugkan apuji aidau,
nuigtu Sebá nugkan apuji aidau aatus
waji aidaun ikautiagtinai!

¹¹ ¡Ashí apu aidauk

ima niinak tikishmatjagtatui!

¡Tikich nugkanmaya aidaushkam

ima niinak umigkagtatui!

¹² Ujudauch aidau atsumainak

sumainamunak nii yaigtatui,

tuja waitiak wake besemag

pujaunashkam nii ayamjuktatui.

¹³ Ujudauch aidaun wait anenjattawai,

dutikak wake besemag pujaunash

yaigka uwemtijattawai.

¹⁴ Ujudauch aidaun waitkainak maaniagtaish,

nii ayamjuk uwemtijattawai.

Wagki dita pujutji aina duka

nii diismak akik ainawai.

¹⁵ ¡Niig tuke iina apuji atin ati!

¡Sabánmaya oronak ashí susatnume!

¡Nii pachisa tuke Apajuí segattai ati!

¡Tuke pegkegnum chichagtai ati!

¹⁶ ¡Tuja ashí juju nugkanmak

trigo shiig kuashat aittawai,

imaniak muja titijinak ijia emegkaktatui!

Imaniau asa muja Líbano tutainum

trigo aijakua iman wajasti,

nuniak nuna yagkuji aidauk

dupa yagkujuwama imanik yagkujuk asattawai.

¹⁷ ¡Apu daajig etsa tuke ekemna iman

tuke pegkegnum chichagtai ati!

¡Aents ashí nugkanmaya aidauk

niina daajin pegkegnum yumigkiam agtinai!

Ashí nugkanmaya aidauk niina

pegkegnum chichajiagtinai.

¹⁸ Tuke Pujuu, Israel aents aidaun Apajuíjiya duka

tuke pegkegnum chichagtai ati,

wagki ima nigki wainchatai aidaunash iwaidau asamtai.

¹⁹ Apajuí daaji pegkegma duka

tuke pegkegnum chichagtai ati.

¡Niina imanjiya nunú ashí nugkan jamagti!

¡Aatus ati!

²⁰ Jesé uchiji David aajakua nunú kantamamuk juwi amuewai.

LIBRO III**73***(Salmos 73—89)**Apajuí wait anenkagtamu*

Asaf kantamamu

¹ Israel aents aidau anentaimtaji pegkeg aidaunak

Apajuí shiig kuitamui.

² Namput wajaschabiajai iyautnak,

jukea akunuk iyagtinuyajai.

³ Aents Apajuín umigchau aidau wiakchamenakui,

nuna diisan kajebiajai.

⁴ Ditak jamamtuchu batsatu asag
jakachainjash tusagkesh puyatuinatsui.⁵ Dita utugchatjig atsujuinawai,
nuadui tikich aidau waituina imanikag
waituinatsui.⁶ Nuadui ditak nugkutai pegkeg najanamu
nugkumaina numamtuk,

dita emematin nugkuaju ainawai.

Tuja ditak magkagutaijinak,
jáanchjai betek nugkuaju ainawai.⁷ Duwegmatnak duwejam ainawai,
tujash dita yapinig wainnawai
anentai shiig pegkegchau aina duka.⁸ Ememainak tikich aents aidaunash
dushikinawai, nuninak
makichkish datsaamtsuk,ii wakegakuik pegkegchau takamsattaji
tusag awanmainawai.⁹ Nuninak Apajuínash pegkegchaun chichajuinawai,
tuja aents aidaunash dutiksag pegkegchaun chichajuinawai.¹⁰ Nuna aents yujajus iniinakyajau chichainatsui tusag
shiig antuju yujaush ainawai.¹¹ Nuninak: “¿Apajuísh wajuk dekatki iina pujutjinash?Tuja Apajuí nayaimpinum puja aniaush
aents takainamunash

¿wajuk dekamainaita?” tuinawai.

¹² ¡Diisjua aents pegkegchau aina nunú!Ditak utugchatji atsau,
shiig pujusag wiakuch wenawai.¹³ ¡Wi pegkegchau takatan
ashí idaisauwaitag duka minak
makichkish pegkegnumak yaintsui!¹⁴ Minak wa wamak utugchatan itagtuinawai,
tuja kashi kashikmasan suwimkanak igkuajai.¹⁵ Tuja wisha dita anentaimaina nujai betek anentaimkunuk,

amina aentsjum aina nunak kajimatki idaikunus,
wi wakegamun takasu aintagtai.

16 Tuja ibau tudaugtin aidaush,
¿wajukag wiakchash wenawa? tusa
anentaïmsan ejetakamanush
ejemainchau dekapjabiajai.

17 Nuni pujaun Apajuí jee pegkegma nuwi
niijai chichastasan waya ai,
aents pegkegchau aidaush
wajukatnuk ainawa
nuna Apajuí dekamtijuabi.

18 Nunú aents aidauk ishamainnum batsasume,
dutikamu asag dita megkaejatnunum shimawai.

19 ¡Nunú aidauk pachiaichbau
shiig wamak ijina utsam agtatui!
¡Ditak sapijai jinawagtinai!

20 Tuke Pujuuwah, aents kanag tepau nantak
nii kajamjamujin kajimatama numamtuk,
ame nantakum aents pegkegchau aidau
ditash ima pegkeg ainawa tumain aina duka
emegkagtatme.

21 Wi senchi kajekan pujubiajai,
nuniaï mina anentaig dajautibi.

22 Wika aents pegkegchau aina nuna
pujutjin dekajuatasan wakegakun,
kuntin jintiag anentaïmchau asa
wajukmaina numamtuk wajabiajai.

23 Nuniyatkun amejaig tuke pujubiajai,
nuniaï asamtai tudaunum iyawai tusam
egkegsam awekatmayume.

24 Umigtukti tujutu asam
ame chichagtukmayume,
nuadui wi jakamtaish,
eme anenjusak jujuktinaitme.

25 ¿Amina nagkaetamsaush tikichish
nayaimpinmash ya pujawa? Duka atsawai,
ima ameketme.
Amejai pujaknuk juju nugkanmaya aidaunak
makichkish wakejumaittujai.

26 Mina pujutjua duka nagkankattawai,
tujash Apajuíya nunú
pujut tuke atinun sujustatui,
tuja nii mina anentaïjuish ichichtawai.

27 Aents amina nemagtamtan dakitauk, jinawagtinai;
tuja ima aminig kajinas
anentaïmainachushkam ijinatnaitme.

28 Untsu wika ima Apajuíyaig
anentaïmsan pujustinaitjai,
nunú minak shiig awajatawai.

Ametme Tuke Pujuu Apajuí, mina ayamjutkatnumek.
Nuadui ashí ame dutikamu aina nunak etsegkattajai.

80

Tuke Pujuuwah, wait anenkagtugta

Asaf kantamamu

¹ Apajuí, Israel aents aidaun kuitamnuh,
jame José wegantu aina duka
aents uwigin kuitamas awekauwama numamtuk
kuitamsa awekame!
jAme querubin aidauk iname!
jIman asam Efraín wegantu aidau,
² Benjamín wegantu aidau,
Manasés wegantu aidau wait anenjata!
Dutikakum amina senchigmijai uwemtikagtugta.
³ Tuke Pujuuwah, jina pujutji yapagkagtuam
yaunchuk ayag iman ekagtita!
Dutikagtuawaminig jutiishkam uwemjagtatji.

⁴ Tuke Pujuu ashí senchigtinuh,
amina aentsjum aidau
segapainakuí dakitam dusha
¿wajupa kuashta aikash pujugatme?

⁵ Yutai sukagtumaina nunú
waitut sukagtusmayume,
tuja umutai umumaina nunú
waitiaku buutbau sukagtusmayume.

⁶ Iina nugkega nuna yantamen batsamin aina
nunú atsaneaku dushiktai ekagtiume.

⁷ Apajuí ashí senchigtinuh,
jina pujutji yapajiam
yaunchuk ayag iman ekagtita!
Dutikagtuawaminig jutiishkam uwemjagtatji.

⁸ Uva numiji* egiptunmaya jukim
juwi itaam, aents pegkegchau aidau
jiija utsaakum juju nugkanum ajabiume.

⁹ Dutikam shiig tsapaiti tusam nugka iwajabiume,
dutikawamin nuwi tsapaka
ashí nugkan jamagmayi.

¹⁰ Imaniku asa nunú tsakaak
muja aidaunak bikintu awajsabi;
dutikak numi múun aidaunash
nagkagag niina kanawen yutua asabi.

¹¹ Imaniau asa kanawe aidauk
nayantsanum jegabi.
Tuja nuwi yama tsapaidaushkam
namak Eufratesa imanui jegabi.

* **80:8** "Uva numiji" tawa nunak Israel aents aidau Egipto nugkanum batsatun Apajuí jiija yajuak Canaán nugkanum ikaunma, nuwi aents aidaun jiija utsaak nunú nugkanum batsasua nuna taku tawai.

12 Uva ajakbau peejamua dusha
 ¿wagka yumpuntuamesh agkantash awajtusume,
 aents aidau nagkaemainak
 akajag yajumtinme tusamesh?

13 Paki utsantua tegaja ijinui.
 ¡Kuntin ikamia aidau amuinawai!

14 Amek Apajuí ashí senchigtinaitme,
 iman asam wait aneamam
 nayaimpinum pujusam

juju uva ajakbauwa nunú kuitamkata.

15 Juju uva ayá duka ame ajakbau ainawai,
 nuadui kuitamkata.

16 Tuja uva numijin tsupig apea ijinuk,
 ameshkam dutiksamkam ijinata.

17 Untsu apu ati tusa ame etegkamua duka
 kuitamkata, dutikakum yaigta.

18 Tuja yamai nagkamsaik
 makichkish aminig tsujakchattaji.

¡Pujut sukagtusta ima aminig
 kajitmamsa batsamsagmi!

19 Chah, Tuke Pujuuwah, ametme

Apajuí ashí senchigtinmek,
 nuadui ¡iina pujutji yapajiam
 yaunchuk ayag iman ekagtita!

¡Dutikagtuawaminig jutiishkam uwemjagtatji!

84

Apajuí jee pegkegma nuwi pujustasan ima senchi wakegajai

Coré uchiji aidau kantamawagbau

1 ¡Tuke Pujuu, ashí senchigtinuh,
 amina jemea duka shiig pegkejai!

2 ¡Wika Tuke Pujuu jee pegkegma nuwi pujustasan
 shiig senchi wakegajai!

¡Nuniakun Apajuí pujuta sukagtina nuna
 shiig anentsan senchi kantamajai!

3 Tuke Pujuuwah, ametme ashí senchigtinum.

Mina apug, Apajuíjuh,
 tiki pishakchikesh amina jemin waya,
 pasugmak uchijin muumpitkamainuk
 agkantak ayawai.

4 ¡Amina jem pegkegma nuwi pujuidauk
 shiig aneamam batsatainawai,
 nunidau asag amina emematjamtanak
 makichkish mijamainatsui!

5 Tuja aents aidau aminian
 senchimetan juwina duka shiig aneamamtatui,
 tuja amina jemin minitag tusa
 wakeyin aina dushakam shiig aneamamtatui.

⁶ Nugka paka buutbau tutai
yumi atsaunum weakush,
yumi pukuni jiinaidaun waintinai;
tuja yumigmat taimunmaya yumi
kuyua megkaetaish, yumi yutak
ashí nugka waa aidaunmak pimasua waigtinai.

⁷ Apajuíyah, amina senchigmejai
ditak tuké senchimeawagtinai.
Tuja Siógnnum jegawag
Apajuí senchigtina nuna wainkagtinai.

⁸ Tuke Pujuu, ashí senchigtin,
Jacopan Apajuíjiyah,
jwi sumamush antugtukta!

⁹ Apajuíyah, jutii ejamaktin
ame etegkam apu emauwaitam
nunú shiig anentsam kuitamkata.

¹⁰ Amina jem pegkegma nuwi waya,
makichik tsawan pujamua duka,
mil tsawan agá pujumaina
nuna nagkaesau ima pegkejai.
Wika aents pegkegchau aina nujai
ijunja pujutnak idaikun,
dekas amina jem pegkegman waitijiya nuna
kuitamin atajai tusan wakegajai.

¹¹ Wagki Tuke Pujuu Apajuí iinak ejapak kuitamjamui;
tuja aents tudau takatsuk batsata nunak,
nii wait anentak eme anentus kuitamui,
dutikak waji pegkeg aidaunak sujitatsui.

¹² Tuke Pujuu, ashí senchigtinuh,
jaminí kajinmamas anentaimaidauk
shiig aneasagtinai!

87

Jerusalén pachisa kantamamu

Coré uchiji aidau kantamawagbau

¹ Yaakat Jerusaléggak muja pegkejam
Apajuínu tutaiya nuwi yaaktamamui.

² Tuke Pujuu Israel aents aidaun yaaktaji,
tikich aina nuna nagkagas,
Jerusaléggkan ima senchi aneawai.

³ Apajuín yaaktajiya nuna
Jerusaléggkan pachisag,
shiig pegkejan augmatuinawai.

⁴ Apajuí chichaak:

“Aents aidau mina emematjuina duka
Egipto nugkanum, Babilonia nugkanum,
Tironum, Etiopía nugkanum, Filisteo nugkanum aatus batsatui.
Nunú nugkanmaya aents aidau chichainak:

‘Apajuinak Jerusalégnum wainkabajai’ tiagtatui”, tiuwai.

⁵ Tuja Siógnunia aidaun chichajuinak:
 “¿Wagkag ditash ibau pegkegnumash batsamsajabi?
 Dita batsamsatnunak dekas Apajuíyap
 umigkauwaita”, tiagtinai.

⁶ Aents aidaun daaji agattainum
 Tuke Pujuu dita daajinak:
 “Juka Siógnun akiinuwai”, tuu agatjatnai.

⁷ Nuadui nuwiya aents aidauk nantsemki,
 kantamkabaikia chichainak:
 “Mina pujutajuk Jerusalégkai”, tiagtinai.

89

Apajuí Davitjai chicham umikbau

Esrhita aents Etán aajakua nunú kantamamu

¹ Tuke Pujuuwah, wi kantamkunuk,
 amek tuke wait anenkagtinaitme titatjame,
 tusan aju ajumag kantamjittagme.

² Nuniakun amina anenkem tuke auwa nuna,
 tuja ame anagkagtuamuk
 nayaim yapajinchauwa imana nuna etsekkattajai.

³ Amek Davidjai chichamak umikuitme;
 dutikau asam nii anagkuakum:

⁴ “Ame jakaminig,
 ame wegantunmaya apu wajasa
 ame pujusa inamtaigmin pujus inamjatnai”,
 tiuwaitme.

⁵⁻⁷ Chah, Tuke Pujuuwah,
 nayaim aidauk amina takatjum pegkeja
 nuna diisag emematjamainawai,
 tuja ashí ángel aidauk
 amina anenkagmin pachisag chichainawai;
 ima aminak eme anenjamainawai.
 Tuke Pujuuwah, ametme
 tikich aents aidaun apajuíji aina
 nuna nagkaesau ishamtai dekas muunmek.

⁸ Tuke Pujuu ashí senchigtinuh,
 ame senchigtinum chichakbaugmek
 betek uminaitam imanuk tikichik
 makichkish atsawai.

⁹ Ame nayantsak inau asam,
 tsukatak ishamain wajakuish,
 mijaakta tusam imijiamé.

¹⁰ Nayantsanmaya kuntin múun depetkam,
 amina senchigmin shiwaajum aidau
 uwaakam ipisjabiume.

¹¹ Nayaim, nugka aina duka aminu ainawai,

ame nuggak, tuja ashí nugkanum
ayá nujai najankauwaitme.

¹² Tsumujinish, nujinchinish
ame ashí nuggak najanauwaitme.

Tuja muja Tabor, muja Hermógjai
amina daagmin pachisag kantamainawai.

¹³ Amina kuntugmek senchigtinai,
tuja amina uwejum untsuja dushakam
senchigtin depetbauwai.

¹⁴ Amek pegkegnum anenkajai inaame,
tujash nuna nagkaesau dekas
amina anenkagmin
tuke kuitamkagtame.

¹⁵⁻¹⁶ Chah, Tuke Pjuuwah,
aents amina emematjamin,
amina tsaaptinjamin wekayin,
tuja amina takatjum pegkegma nuna diis
tuke shiig anea duka
amek eme anentame,
dutikakum pegkegnum yumigkiame.

¹⁷ Wagki dita imanji aina duka,
tuja senchiji aina nujai ame susauwaitme.
Nuadui jutii aidaulik aan nagkaemasam
senchigtin ekagtame.

¹⁸ Israel aents aidaun Apajuíji, Tuke Pjuuwah,
ametme iina apuji pegkegmamek,
tuja ametme ejajatkam kuitamkagtaumek.

¹⁹⁻²⁰ Amina chichamjamin etsejin
yaunchuk kajanum chichagkum:

“Mina aentsug aina nuwiyán
makichik wajiun etegkajai,
duka mina inakeg Davitai,
wi niinak yaigkan, chichame antugtai emajai.
Dutikan ¡Israel aents aidaun apuji adaikajai!

²¹ Niinak yaitskek idaisashtinaitjai.
Mina senchigjai senchimtikatnaitjai.

²² Niina shiwaaji aidaush jetekchagtín ainawai,
tuja aents pegkegchau aidaushkam
depetkachagtín ainawai.

²³ Niina shiwaaji aidaunak
niish wainaig ijinatnaitjai,
tuja niina kajejuidaunash ijinatnaitjai.

²⁴ Wi niina aneamua duka tuke atinai,
wi kuitamsam kuashat kaweg
senchigtin wajastinai.

²⁵ Tuja niig nayants Mediterraneo tutaya
nuwi nagkamas namak
Eufratesa aatus inamjatnai.

²⁶ Tuja nii chichagtak:

'Ametme mina apag kuitamjaumek;
tuja ametme mina Apajuíg uwemtijnmek', tujuttinai.

²⁷ Tuja wi niinak mina uchig iwai,
ashí tikich apu aidaunash
nagkaesau apu emattajai.

²⁸ Wika niinak tuke anetnaitjai,
tuja wi nijai chichaman umikuitag
dushakam tuke atinai.

²⁹ Nayaim awa nunisag aigkik,
niina uchiji wegantu aidaunmayag
tuke apu wegagtin ainawai.

³⁰ Untsu dita chicham umiktinun
wi jintintuau ainag nuna
kajimatkiag batsamas,

³¹ nunú chichaman uminachkuig,
³² dita pegkegchaujin

suwimak ishainun susatnaitjai.

³³ Untsu Davidnak tuke anetnaitjai,
tuja wi niina anagkuawaitag nunashkam
umitskek idaisashtinaitjai.

³⁴ Wi nijai chichaman umikuitag nunak
tuke idaisashtinaitjai,
nunak tuke umiktinaitjai.

³⁵ Makichik tsawantai
wi Davitan anagkuawaitag nunak
dekas umiktatjai tusan tumamjai.

³⁶ Etsa eketa nunisag eketaigkik,
niina uchiji wegantu aidauk
tuke apu wegagtin ainawai.

³⁷ ¡Nii wegantu aidauk,

nantu tuke ekemna iman atinai!

¡Nii pujusa inamtaijishkam nayaim tuke auwa iman atinai!"
tiuwaitme.

³⁸ Tusa tiuwaitkum ame apu etegkamu aig,
kajegkam dakitja idaisaume.

³⁹ Dutikau asam nijai chicham umikuitam duka
umitsuk, David kajimatkim idaisaume.

⁴⁰ Tuja yaakat Jerusalén peejamua dushakam
yumpua tsaikam ayamjumamainchau
emam idaisaume.

⁴¹ Ashí aents nuni nagkaemaidauk
wayawag dita wakegamun kasamainawai,
tuja aents dita nugkega nuna yantamen
batsamin aidau dushikinawai.

⁴² Nuadui Davita shiwaaji aidauk shiig anenawai,
wagki dita ima senchijinawaju asag.

⁴³ Niina maanitaiji puyagshakam atankiume;
dutikau asam maaniakuish yaigchaume.

⁴⁴ Eme anentai aajakua duka
wainkauch idaisaume;

dutikakum apu wajasa inamtaijishkam
tikima wainkauch awajtusume.

⁴⁵ Tuja nuigtush kuashat mijan
pujuschati tusam atankiume,
dutikakum datsa datsantak awajsaume.

⁴⁶ Chah, Tuke Pujuuwah,
¿uumjutcamek pujuttam?
¿Kajegtukbaukek pujuttam?

⁴⁷ Apuh, mina pujutug piipichia nunú adeagta;
ame aents najanamua duka
ujumak tsawantak pujus jauwai.

⁴⁸ ¡Makichik aentsuk jatsukek iwakuk pujumaitsui!
¡Tuja jakashtajai tusa,
jata uwentumainchakam makichkish atsawai!

⁴⁹ Apuh, ¿ame yama nagkamchakum:
Davita tuke anetnaitjame tusam
tiuwaitam dusha wajukame?

⁵⁰ Apuh, iinak kuashat dushiktamainawai,
imatika dushiktamainakuish atsaneaji.

⁵¹ Tuke Pujuuwah, amina shiwaajum aidau
¡aatus iina pegkegchaun chichagtamainawai!
¡Aatus ame apu etegkamua nuna
aju ajumag pegkegchaun chichajuinawai!

⁵² ¡Tuke Pujuuk, tuke pegkegnum chichagtai atin ati!
Maake, aatus ati.

LIBRO IV

90

(Salmos 90—106)

Aentsuk Apajuí tuke pujuuwa nuninchauwai

Moisés Apajuí etegkamua aajakua nunú Apajuín ausamu

¹ Apuh, amek yaunchuk nagkamsam
jutiik tuké yaijatnaitme.

² Tuja muja aidaush najaneatsaig, nugkashkam najaneatsaig,
yaunchuk nagkamsam,
yamaya juish, tuja atakea duishkam
ameketme Apajuímek.

³ Amina chichamjuminig
aents aidauk jakag nugka najanenawai.

⁴ Ame diismak mil mijana duka
makichik tsawan nagkaema nuninai;
tuja mil mijana duka
kiyag tsawak megkagama
numamtuk nagkaemawai.

⁵ Amek namak chichigmajai betek
aents aidauk utsame,
tuja iina pujutjig kajanum kajanja
shintaku ukutiama nujai betekai.

⁶ Aents aidauk dupajai betek ainawai,

dupa kashikmas yagkujuk,
etsa akagai kagaka
jinuwama numamtuk wajaji.

⁷ Ame kajekbaugmin amujatme,
tuja ame kajekamin ishamka
imaanjaujai betek pujaji.

⁸ Iina tudauji pegkegchauwa duka
ame shiig dekame.

⁹ ¡Ame kajegkagtukaminig
ii iwaku batsatag duka,
mayai mayati ajaptayama
numamtuk jaka megkaemainaitji!

¹⁰ Iik ayatak setenta mijan pujusa jainaji,
tuja nuni wajiú aidau ochenta mijan jagainawai;
tujash imaan mijan pujakuish,
ima waitiamua duke utugchatjai igkunui.
¡Mijanak jutii pujutjijai betek
wamak nagkaemawai!

¹¹ Ame senchi kajeamugminash
¿ya dekamainaita?
Ame kajekbaujum ishamaina nunash
¿yaki dekamainaita?

¹² ¡Iik tuke jakatnapitji tusa,
shiig dekau ata nunú jintinkagtuata!
¡Nunú dekau asaja,
pegkegnum pujuta nunú puyatjukagmi!

¹³ ¡Tuke Pujuuwah, ataktu yaijatkata!
¿Wajupa asamea yaijatkattame?
¡Juju amina inakem aina nunú wait anenjata!

¹⁴ Kashikmasa nagkamsam
amina anenkagmea nunú sukagtusta,
dutikagtuawaminig ashí tsawantai,
shiig aneasa tuké kantamtinaitji.

¹⁵ Kuashat mijanai waitujakuitag
imatiksamek shiig aneasa pujut sukagtusta.

¹⁶ ¡Juju amina inakem aina nunú
dita wegantu aidaujai amina imanjumin
senchigmejai wainkatnume tusam iwaintukta!

¹⁷ ¡Iina Apajuíji Tuke Pujuuwa
nuna wait anenkagtutaijig jutinii asati!
¡Apajuíjuh, iina takatjish pegkegnum yumigsata!
¡Ehe, dekas iina takatjig pegkegnum yumigsata!

91

Apajuíyai iina kuitamjamnuk

¹ Apajuí múun, ashí senchigtina nunú
kuitamsam pujauk,

² Tuke Pujuun chichajak: “Ametme mina ejamataijuk, wi uumka ayamjumataig. ¡Ametme mina Apajuíg, ima aminig kajintsan anentaimjai!” tawai.

³ Wakan pegkegchau utugchatan apujtugmataish, tuja jata aidaunmashkam ima nigki ayamjotpamainai.

⁴ Wagki niig atash niina nanapen uchuchiji aidaun dukuka kuitamama numamtuk kuitamjamnai, nuadui amek puyattsuk shiig aneamam pujustinitme.

¡Niina anenkega duwi aminak tantag ejamatia numamtuk ejapak kuitamjamkattawai!

⁵ Nuadui kashi ishamainnum pujakmesh, tuja tsawai wekaekumesh, mantuachagtimpash tusamek ishamkaipa.

⁶ Tuja jata kashi magkagtin, tsawai magkagtinkesh iyanjugmatai, jakashtajash tusamek ishamkaipa.

⁷ Amina menagmea nuni mil aents jinitnai, tuja untsugmea nunishkam diez mil aents jinitnai, tujash amek makichkish wajukashtinitme.

⁸ Untsu aents pegkegchau aidaun Apajuí suwimak susam jinuidau waintinitme,

⁹ wagki aminak Tuke Pujuu múun, ashí senchigtina nunú ejapak kuitamjamu asamtai.

¹⁰ Aminak makichik pegkegchaukesh waitkagmaschatnai, tuja jatashkam amina jeminig utugmashtinai.

¹¹ Wagki Apajuí ángel aidaun ishiaktatui ame tuwi wekaetatme nuwi kuitamjamkatnun.

¹² Nunú ángel aidau achigmaku agtatui, kaya tukumak iyajai tusa.

¹³ Nuadui, ikamyawa yukagtin aidau, tuja tikich kuntin ishamain ayaunum wekaekumesh, uyumat aneakas wekaetatme.

¹⁴ Apajuí chichaak:

“Juju aentsuk mina waitui, anentanash anentui, nuniau asamtai wi niinak ayamjukan uwemtikjattajai.

¹⁵ Tuja yainkati tusa mina segatkuishkam, aiktinaitjai, dutikakun ¡niijaig pujutnaitjai! ¡Tuja waitakuishkam agkanmitkatnaitjai!

¡Dutikakun eme anentsa diitai awajsatnaitjai!
 16 Tuja kuashat mijan
 shiig pujustin ati titinaitjai.
 ¡Dutikakun pujut nagkanchau tuke atina nuwi pujus
 dakujusti tusan jukitnaitjai!” tawai Apajuí.

93

Apajuíyai dekas apuk

1 ¡Tuke Pujuuwai dekas apua duka!
 Tuke Pujuuw etsantug tsaaptin wajas eketui,
 niyai ashí senchigtina duka,
 tuja nugka buchitkai tusashkam kuitamui.
 2 Amek yaunchuk nagkamsam apuitme,
 ¡Amek tuke pujuuwaitme!
 3 Chah, Tuke Pujuuwah,
 namak senchi tsukatak uutui.
 4 Tujash apujuh, amek nayaimpinum pujusmek,
 namak tsukatak uutaina nuna nagkaesau,
 tuja nayants uutbaun nagkaesau
 senchigtinaitme.

5 Chah, Tuke Pujuuwah,
 amina chichamjum umiktina duka
 yapajinchau tuke auwai.
 ¡Amina pegkegmagma duka
 makichik jeganum yagkug
 nenaja iwajamuama imanik,
 amina jem pegkegma nuwi tuke awai!

95

Apajuí shiig anentsa kantamjuawagmi

1 Kaunatajum,
 Tuke Pujuu, iina kuitamjamak
 uwemtijamna nunú
 shiig aneasa kantamjuawagmi.
 2 Nii pujamunum wayawaja
 nii emematku kantantai kantamjuawagmi.
 3 Wagki Tuke Pujuuwai dekas múun senchigtin,
 ashí tikich apajuímtai aina nunashkam Apujiyai.
 4 Nugkak initken nagkamas
 ashí Apajuí emetuum awai,
 tuja muja tsakaju aidaushkam niinu ainawai.
 5 Tuja nayantsashkam
 nii najanamu asa ima niinuke.
 ¡Nugkanashkam nigki najanauwai!

6 Minitajum,
 Tuke Pujuu, iina najapauwa nunú
 tikishmatja emematiagmi.

7 Niyai iina Apajuíjig,

tuja iik niina aentsji ainaji,
nuadui uwija kuitamin
niina uwigiin kuitamama numamtuk
iinash kuitamjamui.

Apajuí yamai atumin tujama
nunú antuktajum.

⁸ “Yaunchuk Meribánum,
tuja uwejush Masánmashkam
Apajuí chichamen intimjukiú aina
numamtuk wajakaigpajum.

⁹ Atumin muunjum aajaku aina duka
kuashat wainchatai aidaun
wi iwainamun wainainayatak,
dekaskechua nunin diisu ainawai.

¹⁰ Nuadui nunú aents aidaun
dakitjan cuarenta mijan pujubijai,
nuniakun: ‘Juju aents aidauk
shiig wainak yujawai; núnidau asag
mina chichamjunak umigtuinatsui’.

¹¹ Nuadui kajekan,
chicham yapajiashtinun chichaakun:
‘Dita shiig batsamsatnun nugka pegkejan
wi ditan anagkuawaitag
nuwig ditak jegashtin atinme’ tiabijai”,
tiuwai Apajuí.

96

Yamajam kantamtai ii apuji kantamjamu

¹ Ashí nugkanmaya aents aidautijum
yamajam kantamtai

Tuke Pujuu kantamjuatajum.

² Tuke Pujuu kantamjakjum,
niina daaji pegkegnum chichagtajum.

Tuja Apajuíyai uwemtikagtinuk tusajum
kashi kashinig etsegtajum.

³ Apajuí imanjiya nunú,
niina pegkegmajijai pachisjum
ashí nugka múun aidaunum etsegkatajum.

⁴ Wagki Tuke Pujuuwai dekas múuntak,
ima nigki eme anentsa kantamjam amainuk.
Niyai tikich apajuímtai aina
nuna nagkaesau ishamain.

⁵ Tikich aents aidaun apajuímtaiji aina duka
wainak ainawai;
tuja Tuke Pujuuwai nayaimpin najanauk.

⁶ ¡Apajuín tsaaptinjiya duka jiin utsumakui!
¡Nii pujamujiya nuwig niina senchiji,
pegkegmajiya nujai awai!

⁷ Ashí nugkanmaya aidautijum:
“Ameketme senchigtinum,

ameketme pegkegmamek”,
 tusajum Tuke Pujuu ememattajum.
⁸ Tuke Pujuu anentag susatin jukijum,
 nii jega nuna agájin ikaunmajum,
 tikishmaja pujusjum Apajuí etsagjatajum.
⁹ Apajuí jee pegkegma nuwi
 wayajum etsagjatajum.
 ¡Ashí nugkanmaya aidauk
 amina ishamjamainak kujaitnume!
¹⁰ Ashí aents nugkanmaya aidau chichagkujum:
 “¡Tuke Pujuuwai iina apujiya duka!
 Nugkanak jasa buchittsuk asatnun nii najanauwai,
 tuja ashí aents aidaunak
 nii inak betek diyakui.
¹¹ ¡Nayaim aidaush, tuja nugkashkam
 shiig aneastinme!
 ¡Tuja nayantsashkam,
 tikich namak múun aidaujai
 shiig aneenak uuttinme!
¹² ¡Tuja nugkashkam,
 nunú nugkanum batsamin aidaujai
 shiig aneastinme!
 ¡Tuja numi ikam ayaushkam shiig aneenak,
¹³ juju nugka juwi inamjatin
 mina nuna emtin pampaitnume!
 ¡Tuke Pujuu dekas
 iina nugken inamjatatus taattawai!
 Nunik taa aents aidau takasbaujin
 diijus etegjattawai.”

100

Apajuí iina najapauwa duwi niinu ainaji

See taku kantamtai
¹ Ashí nugkanmaya aidautijum
 shiig aneasjum Apajuí kantamjuatajum.
² Shiig aneasjum
 Tuke Pujuu etsagjatajum.
 ¡Shiig aneasa untsumkujum
 Apajuí jee pegkegma nuwi minitajum!
³ ¡Tuke Pujuuwapi dekas apuk titajum!
 Inak nii najapauwai, nuadui iik niinu ainaji.
 ¡Niina aentsji ainag duwi,
 aents uwigjin kuitamama numamtuk
 kuitamjamui!
⁴ Nuadui Apajuí jee pegkegma
 nuna waitijin kaunajum,
 Apajuí see takujum niina daaji pachisjum
 kantamtai kantamkujum ememattajum.
⁵ Wagki Tuke Pujuu dekas pegkejai,
 tuja niina anenkajishkam tuke auwai,

antsag nii anagkagtuamujig
makichkish yapajinchauwai.

103

Ashí mina senchigjai Apajuínak ememattajai

David kantamamu

¹ Ashí mina anentaigjai

Tuke Pujuun emematkun
pegkegnum chichagtinaitjai;
niina daaji pegkegma nuna
pachisan ashí mina senchigjai
pegkegnum chichagtinaitjai.

² Ashí mina wakanjujai

Tuke Pujuun emematkun
pegkegnum chichagtinaitjai;
tuja nii mina yainkauwa nunak
makichkish kajimatkishtinaitjai.

³ Niyai mina tudaujun tsagkugtau;
nigki wi jaaku pujaish etsaentinuk.

⁴ Tuja jamainnum jeganta aish,
niyai mina uwentijinuk.

Tuja nigki niina anejattaijiya nuna
mina anentaijui suja duka.

⁵ Niig ashí pegkeg aina nuna sujawai.

Tuja wi múuntuch wajasan pujaish,
nii minak ataktu senchimtijua
ukukui yakí nanamama iman etawai.

⁶ Tuke Pujuuk, pegkegma iman asa,
aents waituidaunash yaigka
agkanmitkawai.

⁷ Moisés Israel aents aidaujai
dutikatnun, tuja dita umikagtinun
aatus Apajuí jintintuauwai.

⁸ Tuke Pujuuk kakagchauch
wait anenkagtinai;

wamak kaje chui,
tuja anentak wajasui.

⁹ Apajuík jiyajatu pujuchui;
tuja kajegkagtukbaujish tukek achauwai.

¹⁰ Ii pegkegchau takamtaijin
shiig kuashat suwimak jumain ajinig,
imatikagkesh amaschauwai.

¹¹ Niina umijin aidaunak Apajuík
nayaim múun nagkatkachua nuni
nagkaemas aneawai.

¹² Etsa jiintaijiya nuna
etsa akaetai jiya nujai
atushat akankauwa numamtuk,
iina tudaujinak atushat datupajui.

¹³ Tuke Pujuuk niina umijuina nunak,

makichik múun uchijin shiig anentus
kuitamama imatikas kuitamui.

¹⁴ Wagki iish wajiyai najanamuitji
nunak nii dekawai;
iik nugka yukukuntujai najanamuitji,
nuna nii shiig dekawai.

¹⁵ Aentsu pujutjiya duka
dupajai betekmantinai;
dupa tsapai yagkujuwama numamtuk wajawai.
¹⁶ Tuja yagkugnak dase dasentak umpui utsauwame,
dutikamu asamtai, ataktu awagkik wainchataiyai.
¹⁷ Untsu Tuke Pujuu anenkega duka
niina umijin aidaunmak
megkaekashtinun tuke atinai.
Nuadui, nuna uchiji wegantu aidaunash,
¹⁸ tuja ditajai chicham umikbauwa nuna
betek umidaun, nuigtu diez chicham umiktin
agagbaun kajimattsuk umidaun
aatus tuke yaigtinai.
¹⁹ Tuke Pujuun pujusa inamtaijiya duka
nayaimpinum awai;
nuwi ekemas ashí nugkanum inamui.

²⁰ ¡Nayaimpinmaya aents ángel senchigtin,
Apajuí chichame umijin,
tuja nii inapakui umiktasajum
batsamin aidautigum
Tuke Pujuu ememattajum!
²¹ ¡Atum niina suntaji aidautigum nii takajin,
tuja nii inapamu betek umijin aidautigum
Tuke Pujuu ememattajum!
²² ¡Tuja Apajuí najankamu
ashí nugkanum batsamin aidautigum
Tuke Pujuu ememattajum!
Tuja wishakam ashí mina wakanujai
Tuke Pujuun ememattajai.

104

Apajuí emematbau

¹ Ashí mina wakanujai Tuke Pujuun
emematkun pegkegnun chichagtinaitjai.
¡Tuke Pujuu mina Apajuíjuh,
amek dekas múuntaitme!
Tuja amek amina imanjumea nunú ijiam,
etsanjam pujame.
² Amek dekas tsaaptin ijimakume.
¡Ame nayaimpia duka
jáanchjai betek ejauwaitme!
³ Dutikam yaki nayaimpinum

ame pujustinjum umikuitme.
 Amina carrogmin yujagminum
 egkemkam wekaeme.
 ¡Amina nanapjumin
 dasenum nanaakam wekaeme!
⁴ Dase aina duka ame iname,
 ame nunikti tama jiishkam kegawai.
⁵ Apajuik nugkanak nigki
 buchitmainchaun najanauwai;
 nuadui makichkish umuchmainchau atinai.

⁶ Ame nayants pimuntikjam
 nugka yutuabiume,
 dutikakum ashí muja
 múun tsakaku aidaush yutuabiume.
⁷ Imanikmataish,
 kuyua buku wajasti timayume,
 tusa tabaugmin amina chichamjumin
 ipamtajai betek antuk wamak kuyuabi.
⁸ Nuadui, yumi piyag
 muja aidaun amuja auk,
 wake aidaunum akaiki,
 ame nuwi ijumnagti tibaunak imanisag
 nuwi ijumnajui.

⁹ Nunikmatai ataktu pimak
 nugkan utujai tusam,
 juwig nagkankati, nuwi nagkama
 pima pimakuag wechatu tiuwaitme.
¹⁰ Untsu yumi mujanum pukuni jiinki,
 entsa najanea pakajin jegak,
 namak múun wajasti tusam idaime.
¹¹ Nunú yumin kuntin ikamia aidau
 burro ikamia aidaujai kitamainak
 umin ainawai.
¹² Nunú namaka yantamen numi ayaunum,
 nuna kanawen chigki aidau pasugmak petsainak,
 shinuinamu antunawai.

¹³ Tuke Pujuuwah, amek
 nayaimpinum pujusam yumi yutumtijam,
 ikam ukatkam pegkeg emame;
 tuja amina anenkagmea nunú
 nugkanak shiig anemtikui.

¹⁴ Apajuí dupanak tsapapitkawai,
 kuntin nuna yuu aidau
 yuwatnume tusa,
 tuja ajak aidaunashkam
 tsapapitkawai, nunú nejekmatai
 aents aidau yuwatnume tusa.

¹⁵ Tuja pagkan yuwa ichichmamtain,
 tuja vino uwaja shiig aneastinun,
 nuigtu aceite kugkuin yapinum

nijamtain aatus ashí umikui.

¹⁶ Tuke Pujuu numi najankamua duka
yumi uchupiam shiig ijunui,
tuja Libanonmaya setug aidaun
nii tsapapitkakua dushakam,
yumi yutak nugkan uchupiau asamtai
shiig ijunui.

¹⁷ Nuna kanawe aidaunum
chigki aidau pasugmak petsainawai;
nuwi pishak cigueñashkam pujawai.

¹⁸ Tuja muja tsakaku aina duka
cabra ikamia aidau batsamtai ainawai;
untsu kaya múun aina duka
wapujushan uumka batsamtai ainawai.

¹⁹ Apajuí nantunak najanauwai,
wajupa nantuk weawa tusa dekatnun;
tuja tsawan dekapa dekatain etsan najanauwai.

²⁰ Etsa akaetaik kiyawai,
nunikmatai kashi kuntin
ikamia aidau jiinag yujawai.

²¹ Tuja león aidaushkam kashi jiinag,
dita yumainji atsutai shinuinawai,
Apajuín segainak.

²² Untsu tsawak etsa jiintai,
dita waajin akuumag megkagainawai.

²³ Tsawan tsawagmatai,
aents aidau takatjin jiintukiag,
takai takainakua agkutai ukuinawai.

²⁴ ¡Tuke Pujuuwah,
amek shiig kuashat najankauwaitme!
Tuja ashí duka
amina yachagmijai umikuitme.
¡Nugka ame najanamua
nuwig ashí ame najankamu aina nunú batsatui!

²⁵ Diisia ame najanamu
nayants shiig múun,
nuwig kuntin múun aidau,
kuntin piipich aidau shiig kuashat
makichkish dekapamainchau ayawai.

²⁶ Nuwi yujawai lancha múun aidau;
tuja nuwi semagkau múun
najanawaitam nunú
shiig aneak wasugkamui.

²⁷ Nunú aidauk ashí
amina dakagmainawai,
wajutik yutainash amasat tusag.

²⁸ Nuadui ame dita yuwatnuk suwame,
dutikam jukiag shiig yuwinawai.

²⁹ Untsu ame uumjukmak,
senchi ishamainawai;

tuja ame mayatut jujamshakam jawai,
nunik iyashig yukukuntu najaneawai.

³⁰ Tujash ame Wakanim suwamak
ashí nugkanmaya aents aidauk
yamajam pujutan juwinawai.

³¹ ¡Tuke Pujuu imanjiya duka tuke auwai!
¡Tuke Pujuuk nii najankamujin diisa shiig aneawai!

³² Tuja Apajuí diyamak nugkak kujawai,
untsu muja aidauk
Apajuí antiamak bukuituinawai.

³³ Wi eke iwaku pujuttag nuaduik
Tuke Pujuun, mina Apajuíjun emematkun
kantamtain kantamjuattajai.

³⁴ Tuja Tuke Pujuu wi anentaibaujua
nuna shiig aneas diigtusti,
wagki minak niyai shiig aneamujuk ajutui.

³⁵ ¡Aents pegkegchaun takau aidau
Apajuí ememattan dakituidauk
ashí jinawag megkaejatnume!

¡Ashí mina wakanjujai Tuke Pujuun emematkun
pegkegnum chichagtinaitjai!
¡Yajauwajah! Tuke Pujuun daaji ememattai ati.

105

Apajuí Israel aents aidaun yaigbau

¹ ¡Tuke Pujuu see titajum!
¡Niina daaji pachisjum
aents aidau ujaktajum!
Dutikakjum nii takatji
tikich nugkanmaya aidaush ujaktajum.

² Apajuí wainchatai aidaun
iwainajua nunú anentaimtusjum,
kantamtai kantamjuatajum.

³ Niina daaji pegkegma nunú
anentaimtusjum eme anenmamtajum.
¡Tuke Pujuun umijin aidautigmek,
shiig aneastajum!

⁴ Ashí tsawantai Tuke Pujuu egaktajum,
nuniakjum niina senchijiya nunú segatajum.
¡Tuké Apajuí egaktajum!

⁵⁻⁶ Apajuí ii aidautin, tuja niina inake Abraham, Jacob aajaku aina
nunú wegantu aidaun etegjauwa nuna,
ayamjak wainchatai ishamain aidaun
iwainajua nunú anentaimtustajum.
Tuja chicham umiktin agagbauwa
dushakam adeagtajum.

⁷ Niyai Tuke Pujuu, iina Apajuíjiya nunú;
niyai ashí aents aina nuna apujig.

- 8 Kuashat mijan nagkaemataish,
nuna dutikatjai tusa anagkagtuamujinak
Apajuik tuke kajimatkishtinai.
- 9 Nunak Abrahamjai umikua nuna,
Isaakjaishkam ataktu umikui.
- 10 Nuna Jacobjaishkam umikui,
tuja nunú tuke asatin
Israel aents aidaunum juwakui.
- 11 Nuadui Apajuí niina chichajak:
“Wi nugka Canaágnak amastajai,
aminu tuke atina nuna”, tiuwai.
- 12 Israel wegantu aidauk
ujumchik aajaku aina duwik
nugkenchau asag,
Canaán nugkanmak ijagjai betek
wainak yujajaku ainawai.
- 13 Nunidau asag,
tikich nugkanum shiyakag,
nuwi batsamas, nuna ukuinak
tikich apu aidau batsatbaunum jegawag,
nuwi ujumchik tsawan pujusag,
waja yujayanume.
- 14 Tujash Apajuik
waitkastinme tusag idaisachmayi,
nuadui ditan ayamjak
apu aidaun suwimkan susabi.
- 15 Nuadui apu aidaun chichajak:
“Mina aentsug wi etegjamu aina duka,
tuja mina chichamjun etsejin aidaushkam
makichkish waitkasaigpajum”, tiuwai.
- 16 Tuja Canaán nugkanum
Apajuí ajak aidaun ashí ijinabi,
dutikamu asa nujan tepeabi.
- 17 Tujash eke nujan tepeatsaig,
Apajuí Joséntika Egipto nugkanum
awemauwai, dita yachi aidau
wainka inataijai betek sujukajua nuna.
- 18 Dutikam Egipto nugkanum jegamtai,
Joséntak jijui dawenum jigkajag
jukiag aents achika egketainum
egkeawagmayi.
- 19 Tuja Joséntakjamuji uminkati tusa,
Tuke Pujuu niina dekapeak
kuashat tsawan waitkastinme tiuwai.
- 20 Nunik waitu pujaun,
Egipto nugkan apuji Joséntakjam tusa
inamjamtai jiikiagmayi,
dutika agkanmitkabi.
- 21 Dutika jiiki niina jeen apuji ema,

nuigtu niinu aidau Egipto nugkanum ayaunak ashí diisti tusa niina idaitusui.

²² Tuja nuigtushkam apu atuwe aidaun, tuja tikich apu aidaunashkam nigki jintintua unuinakti tusa idaitusui.

²³ Nunikbaunum Jacob Israel daagtin aajakua nunú Egipto nugkanum jegauwai. Nunik jegaa tikich nugkanmayayaitak Cam nugkanum pujusui.

²⁴ Nunik pujusmatai, Apajuí nii aentsji aidaun kuashat uyujkauwai, dutika niina shiwaaji aidaun nagkaesau senchigtin emauwai.

²⁵ Tujash egiptunmaya aidau Israel aents aidaun kajejiagti, dutikainak tsanujagtinme tusa Apajuí tsagkamkauwai.

²⁶ Tuja kuashat waitkagtai, Apajuí niina inake etegkamujin Moisésan Aaróggjai Egipto nugkanum awemauwai.

²⁷ Nuadui Apajuí senchijin wainchatai ishamain aidaun Egipto nugkanum, Cam nugkanum iwainakajui.

²⁸ Tuja Egipto nungkak ashí suwe wajasti tusa Apajuí suwe emabi. Nuna wainainayatak egiptunmaya aents aidauk, Apajuí chichamenak antugkachaju ainawai.

²⁹ Tuja yumi aidaunak ashí numpa awajtusui; imanikmatai, namak aidaushkam jinawajui.

³⁰ Takash aidaunashkam, ashí yaaktanum piyakti, nuniak apu pegajinish tuja nii ekemtaijinish utsaniag waitkasti tusa ishitkabi.

³¹ Apajuí nunikti timatai, anchi teteejai pachimnag, yujagkim wajukama imanik Egipto nugkanak akijuawabi.

³² Tuja yumin yutumtiktsuk, bicha kaya iman najaneaku jijjai pachimag nayaimpinmayan Egipto nugkanum yutumtikjabi.

³³ Nunú yutak uva ajakbau aidaun, higo aidaunash ijinabi. Dutikak numi kanawe aidaunashkam ashí kupijabi.

³⁴ Tuja Apajuí ataktushkam nunikti tusa timatai, manchi aidau shiig kuashat kaketukmayi.

¡Shiig kuashat asa dekapatash dekapamaichabi!

³⁵ ¡Imaniau asa ajak ajanum ayaunak,
tuja dupa aidaunak ashí amukagmayi!

³⁶ ¡Dutiksag egiptunmaya aents aidaun
uchiji iwai aidaunashkam ijituabi!

³⁷ Dutika nuadui,
iina muunji aidaunak Apajuí
oro aidaun, tuja plata aidaun
aatus uyumitkak jiigmayi.

Nunik shimakush Israel aents aidauk
makichik kayanakesh tukumkachagmayi.

³⁸ Nunik shimiagtai, egiptunmaya aidauk
ishamkagtu batsatu asag,
shiig aneasaju ainawai.

³⁹ Dutika jiija yujagmin awetiuwai,
niina aentsji aidaun ejakti tusa;
tuja dutiksag kashi diisag
shiyaktinnashkam jii kegaun awetiuwai.

⁴⁰ Tuja yumainji atsujam yapajuinak sumagtaish,
codornisan ishitkabi;
tuja nayaimpinmaya yutai susam
nuna yuwawag ejemajag
shiig aneasagmayi.

⁴¹ Tuja Moisés kayan awatmatai,
kayanmaya yumi jiinkibi,
nunik entsajai betek wajas
uwegshunum akaikibi.

⁴² Apajuí yaunchuk Abrahaman
anagkuamunak betek umikmayi.

⁴³ Aatus Apajuí niina aentsji aidau
Egipto nugkanum batsatun jiigmayi.
Dutikam aents aidauk
shiig aneenak untsumiagmayi.

⁴⁴ Dutika yajuak nugka
tikich aents aidau batsamtain susabi,
dutikak ajak tikich aents aidau
ajakbau aidaunashkam susabi.

⁴⁵ Nunak Apajuí dutikauwai,
juwi batsamas chicham umiktin agagbauwa nuna umiktinme tau asa.
¡Yajauwajah! Apajuí emematiagmi.

LIBRO V

107

(Salmos 107—150)

Apajuíyai pimpiki wake besemag pujajinish yaijatnuk

¹ Tuke Pujuu see titajum,
wagki niyai pegkejak,
niina anenkajig tuke auwai.

² Iina shiwaaji aidau inaku
waitkatai batsatutin Tuke Pujuu

niina senchijjai jiigmag
agkanmitkagmabi titajum.

³ Dutijama etsa jiintai, etsa akaetai,
nujinum, tsumunum batsamin
aidautin yajupak ijupagmayi.

⁴ Tuja iina muunji aajakajua duka,
wainak megkagag uwegshunum yujajakui,
yaakat dita batsamainun
wainainachu asag.

⁵ Nuninak nujantai, kitakai
ashí jinawag yujagmayi.

⁶ Nunik waituinak Tuke Pujuun
yaijatkata tusag segagmayi,
nuna nii antujuk, dita
waitiamujin yaigka agkanmitkabi.

⁷ Dutika jintintua dita
shiig batsamsatnunum ejegawagmayi.

⁸ Nuadui Tuke Pujuu emematiagmi,
niina anenkajin iina ayamjutpak
ishamain wainchatai aidaun iwainajua,
nunú pachisaja.

⁹ Wagki Apajuíyai aents kitakai jaunash,
tuja nujantai jaunashkam suwa duka.

¹⁰ Tuja iina apachji aajakajua duka,
inaku waitkainam pimpikiag
wake besemag pujuagmayi.

¹¹ Nunak Tuke Pujuun shiwagmainak,
chicham umiktinun susauwa nunash
uminachu asag nunikajui.

¹² Nuadui Apajuí suwimak susam
shiig senchi waitujakajui,
dita yaimainuk makichkish
atsugsamu asa.

¹³ Nunik waituinak Tuke Pujuun
yaijatkata tusa segagmayi,
nuna Apajuí antujuk, dita
waitiamujin yaigka agkanmitkabi.

¹⁴ Dutika senchi inainaku waitkam batsatun
agkanmitkabi.

¹⁵ ¡Tuke Pujuu anenkega nunú see titajum,
wagki nii jutiin ayamjutpak
kuashat wainchatai ishamain
aidaun iwainajua nuadui!

¹⁶ ¡Waiti bronce najanamunash,
tuja jiju awajamu aidaujai,
Apajuí ashí tsaikui!

¹⁷ Tuja iina apachji aidauk anentainkachu asag,
dita pegkegchaujin jata achikam
senchi waitiagmayi.

¹⁸ Nunik jinuinak yujumkan tsumainak

yutsuk, nujantai ashí jinaa batsabi.

¹⁹ Nunik waituinak Tuke Pujuun

yaijatkata tusa segagmayi,

nuna Apajuí antujuk,

dita waitiamujin yaigka agkanmitkabi.

²⁰ Ashí niina chichamenig etsagakmayi.

¡Aatus ashí jinaa batsatun uwemtikjabi!

²¹ Tuke Pujuun anenkega nunú see titajum,

wagki nii jutiin ayamjutpak,

kuashat wainchatai ishamain aidaun

iwainajua nuadi.

²² Apajuí yaimpakua nunú anentaimtusjum,

see takujum kuntin maa apeatajum,

dutikakjum nii dutikamuji pachisjum

shiig anejasjum senchi

untsumkajum etsegkatajum.

²³ Iina apachji aajaku aina nunú

lanchanum nayants shiyaku aidauk,

nayantsa amain tikich nugkanum

wajiin sujak yujau ainawai.

²⁴ Ibau nayants muunnum yujasag,

junak dekas Tuke Pujuuwap najanauwaita

tusa dekawajui.

²⁵ Apajuí chichakmatai,

dase ishamain iyagmayi,

imaniak nayantsan shiig senchi

tsukatmitkabi.

²⁶ Imatikak lanchanak

yaki ema ema ajuibi.

¡Imaniau asantai,

ayamjumamainchau dekapiagmayi!

²⁷ Nuninak nampekujai betek

winchainag tukumak iyainiagmayi.

Imaaninak lanchanum

yujatan yacha ainayatak

dutikmainchau dekapiagmayi.

²⁸ Imanitai ishamainak

Tuke Pujuun segagmayi,

tusa segam antujuk yaigka uwemtijabi.

²⁹ Dutikak dase ishamain wajak

nayantsan tsukatmitkaunak imijakmayi.

³⁰ Nunik mijakmatai, shiig anejasgmayi,

tuja Apajuí ditanak yajuak

dita jegatag tibaunum ejegauwai.

³¹ ¡Tuke Pujuu anenkega nunú see titajum!

Wagki nii jutiin ayamjutpak,

kuashat wainchatai ishamain aidaun

iwainajua nuadi.

³² ¡Ashí aents aidautijum ijunajum

Apajuí ememattajum!

Tuja Israel aents aidaun apuji

múun aidautigmesh ijunjajum
Apajuí ememattajum.

³³ Apajuík namak múun aidaunash
ukuya uwejush emawai,
tuja yumi pukuni jiinunash
ukuya buku emawai.

³⁴ Tuja nugka ajak shiig tsapaunash,
nuwiya aents aidau tudaujin
ajak tsapachu emawai.

³⁵ Uwejush yumi atsaunash
kucha ain emawai,
dutikak nugka buku ataish,
yumi pukuni jiinin emawai.

³⁶ Tuja aents nujantai waituidaunak
yajuak nuwi batsawai,
dutikam nuwi dita batsamsatnun
yaaktan najanainawai.

³⁷ Nuwi batsamas uva ajakag
kuashat nejekun juuka yuwinawai.

³⁸ Apajuí ditanak yayawai,
tuja dita tagkuji aidaunashkam
kuashat ikauntawai.

³⁹ Untsu tikich aidauk
kuashat waitkainamu asag,
ujudauch ainawai.

⁴⁰ Tuja Apajuík aents pegkegchau
waitkagkagtin aina nunak kajejawai.
Nuadui ditanak uwegshunum wainak yujas
jinaati tusa idaisauwai.

⁴¹ Tuja aents ujudauch
wake besemag pujaunash
nii agkanmitkawai.

Dutika nii uchijinak
tagkujai betek kuashat uyujtawai.

⁴² Nuna aents Apajuí umijin aidau
diisag shiig anenawai.
Untsu aents pegkegchau aidauk
datsaamainak ataktuk tumainchau
dekapenawai.

⁴³ Aents shiig anentaimkauk juna anentaimas diisti.
Nuniak Tuke Pujun anenkega nuna dekattawai.

110

Apajuí apunak senchimtiknai

David kantamamu

¹ Tuke Pujun mina apujun chichajak:
“Mina untsujui ekemsata, nunikamin
wi amina shiwaajum aidaunak depetkan
aminí ikaunmakmatai,
ame inagminum”, tiuwai.

2 Jerusalégnum pujusa inamjati tusa
Tuke Pujuu amina umigtamkae.
Tuja amina shiwaajum aidaunak nii depeteawai.

3 Ame apu wajasamin,
amina aentsjum aidau shiig aneas kaunawag,
ame tabau umikni tusa tujabiagtin ainawai.
Tuja amek kashikmas
jegashjuk tsawauwama numamtuk,
kashi kashinig yamajam senchi jutatme.

4 Tuke Pujuu nii umiktinjin
yapajinashtinun chichaak:
“Ametme sacerdote Melquisedec aajakua
nujai betek tuke sacerdote atinmek”, tiuwai.

5 Apajuik amejaig pujawai amina yaimpaktatus.
Makichik tsawantai nii kajeka
apu aidaunak ijinattawai.

6 Aents aidaun suwimkan susa ijinatnai,
dutikam ashí nugkanmak
aents jinauk tuwasua weaku atinai.

¡Nugka múun aidaun
apuji aidaunash ashí ijinatnai!

7 Depetmak jintá minis
yumi entsanmayan uwagtinai;
nunik ataktu ichichmamjatnai.

115

Iina Apajuíjig nayaimpinum pujawai

1 Tuke Pujuuwah, jutiik eme anenkagtusaipa,
dekas ima amek eme anenmamta,
amina anenkagmin,
tuja dekaskegmijai eme anenmamta.

2 Wagkag aents pegkegchau aidaush
jutiin chichagtamainakush ¿tuwi pujawa
atumi Apajuígmesh, tusash tujamijainta?

3 Iina Apajuíjig nayaimpinum pujawai,
tuja nii wakegamu aidaun ashí najankauwai.

4 Aents pegkegchau aidau
apajuímtaijig oro, plata ainawai.
Tuja duka aents najankamu ainawai.

5 Dita apajuímtaijig weni ajamaitak
chichachu ainawai;
jiishkam ajamaitak wainmachu ainawai.

6 Kuwishish ajuidau, tujash antuchu;
nujintin, tujash mayatchau;

7 uwegtin aidau, tujash achimchau;
nawentin aidau, tujash wekaechau;
¡makichik chichamujigkesh
antugchatai ainawai!

8 Nuniau asantai aents nuna najanin,

tuja nunú dakumka najanamua
nuna emematin aina duka
dita apajuimtaijijai betek ainawai.

⁹ ¡Israel aents aidautigmek,
Tuke Pujuuwaig kajinmamsa anentaimsatajum!
Wagki nii jutiinak yaimpawai,
tuja nigki kuitamjamui.

¹⁰ Sacerdote aidautigmesh
ima Tuke Pujuuwaig kajinmamsa
anentaimtajum.

Wagki nii jutiinak yaimpawai,
tuja nigki kuitamjamui.

¹¹ Ashí aents Tuke Pujuu umijin aidautigmek,
¡Tuke Pujuuwaig kajinmamsa anentaimsatajum!
Wagki nii jutiinak yaimpawai,
tuja nigki kuitamjamui.

¹² ¡Tuke Pujuu iinak kajimatjamtsuk
pegkegnum yumigtamjatnai!

¡Israel aents aidaunashkam
pegkegnum yumigtamjatnai!

¡Sacerdote aidaunashkam
pegkegnum yumigtamjatnai!

¹³ Aents Tuke Pujuu eme anentus
umijin aidaun:

aents eme anentsa diishtai,
eme anentsa diitai aidaujai

Apajuí ashí ditanak pegkegnum yumigtamjatnai.

¹⁴ Tuke Pujuu atumi uchijum aidaunash,
tuja nuna uchiji aidaunash uyujtugmaktinai.

¹⁵ ¡Tuke Pujuu nayaimpin, nugkajai najanauwa nunú
aminak pegkegnum yumigtamsattawai!

¹⁶ Nayaimpia auk Tuke Pujuuunui,
tuja nugka nuna aents aidaun susauwai.

¹⁷ Jakau aidauk chichamainchau asag,
Tuke Pujuuunak emematmainchau ainawai.

¹⁸ Untsu ii iwaku aidautik
tuke ememattinaitji.

¡Yajauwajah!

Iina Apajuí ememattai ati.

116

Apajuí see tabau

¹ Wika Tuke Pujuuunak anejai,
wagki wi segamun antugtuku asamtai.

² Wagki wi segamun antugtuku asamtai,
wi iwaku pujaknuk,
niina tuke segatnaitjai.

³ Jata achigkamtampap

jakattaja tusan ishamkabiajai,
nuniakun wake besemag pujubiajai.

⁴ Nuniakun Tuke Pujuun segabiajai
uwemtijugta tusan.

⁵ Tuke Pujuuk pegkejam, wait anenkagtinaí,
iina Apajuíjiya duka
kakagchauch anejatin wajasui.

⁶ Tuke Pujuuk aents kakakchau
aidaunash kuitamui.

Wi kakaumainchau wajasan pujaishkam,
nii minak uwemtijugmayi.

⁷ ¡Yamaik shiig aneasan pujumainaitjai,
Tuke Pujuu pegkeg etiu asamtai!

⁸ Wagki Apajuí jamainun uwemtijug
wi wake besemag buutku

pujamugnash yaintuk uwemtijuja nuadui.

⁹ Tuja iwaku juju nugka juwi pujag nuadui,
Tuke Pujuunak tuke umigkatnaitjai.

¹⁰ Wika senchi waitiaknushkam, Apajuínak dekaskeapi tibaijai.

¹¹ Tuja wi waugtukan chichaakun:
“Ashí aents aidauk waitjin ainawai”,
tibaijai.

¹² ¿Tuke Pujuu mina pegkegnum
yainkamunmash,
wisha wajuk akimainaitja?

¹³ Tuja nii mina uwemtijugbaunum
vinon anentag Tuke Pujuun suwakun,
niina daajin pachisan ememattajai.

¹⁴ Wi umiktajai tusan
Tuke Pujuun tiuwaitag nunak,
yamai ashí niina aentsji aidau
wainainamunum umiktatjai.

¹⁵ Tuke Pujuuk niina umijin aina
nunú jakamtaig,
wake besemag dekaapeawai.

¹⁶ ¡Tuke Pujuuwah, wika amina inakmetjai!

¡Wika nuwa amina inakmea
nuna uchijiyaitjai!

¡Ame minak achikbaujai betek
ashí jakan pujai uwemtijugmayume!

¹⁷ Tuke Pujuuwah, ame uwemtijugbaunum
see takun uwija maan apeakun ememattatjame,
dutikakun daagmin pachisan segattajame.

¹⁸ Wi umiktajai tusan
Tuke Pujuun tiuwaitag nunak,
yamai ashí niina aentsji aidau
wainainamunum umiktatjai.

¹⁹ Yaakat Jerusalégkan ejapeen,
Tuke Pujuu jee pegkegma

nuna waitijin jegantatak agkaju
 ayatak shugkuk ajigmauwa nuwi nunak dutikattajai.
 ¡Yajauwajah!
 Apajuí daaji ememattai ati.

118

Tuke Pujuu uwemtikagtugbaunum see tabau

¹ Tuke Pujuu see titajum,
 wagki niyai pegkejak;
 niina anenkajig tuke auwai.

² Israel aents aidauk yamaikiuch:
 “Apajuí anenkeg tuke auwai”, titinme.

³ Sacerdote aidaushkam:
 “Apajuí anenkeg tuke auwai”, titinme.

⁴ Tuke Pujun eme anentus diin aidaushkam:
 “Apajuí anenkeg tuke auwai”, titinme.

⁵ Waittanum pujusan
 Tuke Pujun untsukbaijai,
 dutika ai, aijuk uwemtijugmayi.

⁶ Tuke Pujuu wijaig pujawai;
 nuadui wika ishamkagtatsjai;
 minak makichkish pegkegchauk
 awajtumain ainatsui.

⁷ Tuke Pujuu wijaig pujawai;
 nuniau asa minak nii yaintui.
 ¡Nuadui mina shiwag aidau
 mina kajegtuina nuna nii ijinamun wainkattajai!

⁸ Aentsnum kajintsa anentaima wekaetsuk,
 dekas Tuke Pujuuwaig kajintsa anentaimainaitji.

⁹ Apu aidanum kajintsa anentaima wekaetsuk,
 dekas Tuke Pujuuwaig kajintsa anentaimainaitji.

¹⁰ Tikich nugkanmaya aents aidau
 tuwagtukagmayi;
 tujash Tuke Pujuu daajin depetkamiajai.

¹¹ Ashí tententuawagmayi;
 tujash Tuke Pujuu daajin depetkabiajai.

¹² Etejai betek tuwagtukagmayi;
 tujash jagki ijumjamun jii apea
 emegkauwama imatikan ajapabiajai;
 ¡Tuke Pujuu daajin depetkabiajai!

¹³ Ajua maami tusag shitatkiagmayi;
 tujash minak Tuke Pujuu ayamjutkabi.

¹⁴ Wika Tuke Pujuu mina senchimtija
 nuna kantamjajai.
 ¡Niiyai mina uwemtijinuk!

¹⁵ Aents Apajuín umijin aina nuna jenig
 shiig aneas untsuainak:
 “Tuke Pujun senchijiya nunú depetmake”,

titinme.

¹⁶ ¡Tuke Pujuun senchijiya duka
augmatkuish, makichkish ejemait sui!
¡Tuke Pujuun senchijiya nunú depetmakui!

¹⁷ ¡Jakashtatjai, iwaku pujuttajai,
wagki Tuke Pujuu iina ayamjutpak
dutikauwa nuna etsegkatasan!

¹⁸ Tuke Pujuu minak shiig senchi
suwimkan sujusmayi;
tujash jakati tusag idaituschabi.

¹⁹ ¡Apajuí jee pegkegma nuna
waitiji ujatjitajum;
nuwi wayan Tuke Pujuun see titag tajai!

²⁰ Juju waitiya duka
Tuke Pujuu pujamunum waitaiyai;
aents Apajuín nemajin aidauk
nunú waitiya nuni wayawagtinai.

²¹ Tuke Pjuuwah, see tajame
wagki ame antugtukam uwemtijuju asamin.

²² Kaya ekenag jegamin aidau
kaya pegkegchauwai tusag,
dakitjajua nunú yamai
dekas kaya ima pegkeg atsumtai wajase.

²³ Nunak Tuke Pujuu dutikae,
duka yamaik puyattsa diimainai.

²⁴ Juju tsawanta juwai,
Tuke Pujuu iina ayamjutpakua nunú;
nuadui ¡yamai shiig anenaku jüstamawagmi!

²⁵ Tuke Pjuuwah, ¡wait aneam uwemtikagtugta!
Tuke Pjuuwah, ¡wait aneam yaijatkata,
shiig batsamsagmi!

²⁶ ¡Tuke Pjuu awemamu mina nunú
dekas ememattai ati!
¡Tuja Tuke Pjuu jee pegkegma nuwi pujusan atumin pegkegnum
yumigkiajime!

²⁷ Tuke Pjuuk Apajuíyai.
¡Apajuíyai tsaptinun sujamsauk!
Yagkug aidau yajuaka altarnum
ejegawagmi, dutikawaja Apajuí
aentsji aidau nuwi batsata nunú uyuntsagmi.

²⁸ Amek mina Apajuíg asamin see tajame,
nuniakun amina imanjumin emematjai.

²⁹ Tuke Pjuu see titajum,
wagki niyai pegkejak;
niina anenkajig tuke auwai.

119

97 ꞑAmina chichamjum umiktin sukagtusuitam nuna shiig senchi aneau asan, kashi kashinig nuwig anentaimjai!

98 Nunú chicham umiktin agagbau umiktajum tusa sukagtusuitam nunú mina shiwag aidaun nagkaesau yachamtijawai, wagki nunú jintinjau asamtai.

99 Wika nuna ausa dekau asan, mina jintinjin aidaun nagkaesau chicham umiktin agagbauwa nuwi anentaimjai.

100 Tuja amina chichamjum umiktin sukagtusuitam nuna umiau asan, múun amina chichamjumin etsejin aidaun nagkaesau amina chichamjumnak dekajai.

101 Amina chichamjumin umiktag tau asan, pegkegchau aina nunak idaisabiajai.

102 Tuja ame minak jintinjau asamin, aminu chicham umiktina nunak idaisachmajai.

103 Ame umiktin anagkagtuawaitam nunak mina kayakmataijug shiig yumintsak dekapeajai, tuja mina wenujui dapa yumijin nagkaesau yumintsak dekapeajai.

104 Amina chichamjum umiktin sukagtusuitam nuwiya unuimaju asan, waitjut aina nunak kajejajai.

105 Amina chichamjum agagbauwa nunú jii ekemakbaujai betek, wi weamunum tsaaptin emawai, tukumak iyajai tusa.

106 Wi yaunchuk chichaakun, umiktajai tiuwaitag nunak, ataktushkam tajai: "Amina chichamem pegkegma nunak dekas umiktatjai."

107 ꞑTuke Pujuuwah, shiig pimpikin wake besemag pujajai! ꞑAtaktu ichichtugta, ame chichamjum wajintu chichawa dutiksamek!

108 Tuke Pujuuwah, wi amina emematjam nunú shiig aneam jujutkita, nuniakum amina chichamjumia nunú jintinjuata.

109 Wika tuké jamainnum pujajai, tujash ame jintinjuamua nunak kajimattsujai.

110 Aents pegkegchau aidau, utugchatan apujtjuinawai, tujash amina chichamjum umiktin sukagtusuitam nunak kajimatkinuk idaitsujai.

111 Amina chichamjum umiktina nunú
minak tuké shiig aneasa pujutan sujawai.
112 Wika amina chichamjum umiktin
sukagtusuitam nunak wakejusan,
atakea duwish tuke umiktin atajai,
tusan tumamjai.

129 Amina chichamjum umiktina
duka shiig pegkejai;
nuadui wika betek umiajai.

130 Amina chichamjum etsegbauwa duka
tsaaptinjai betekai;
nuniau asa aents kakagchauchinak
shiig dekamtikawai.

131 Amina chichamjum umiktin sukagtusuitam
nuna dekatasan wakegajai,
nuniakun itugkanuk shiig dekawag
tusa anentaimkun waitiajai.

132 Tuke Pujuuwah, amina anempau aidau
wait anentam dutiksamek,
minash diigsam wait anenjugta.

133 Amina chichamjum wajintua dutiksamek awekattsata;
pegkegchau wagagkiti tusamek idaitusaipa.

134 Aents pegkegchau aidau
mantuawainum ayamjutkata,
wika amina chichamjum umiktin
sukagtusuitam nuna umiktasan wakegajai.

135 Wi amina inakmetag dusha
shiig aneasam diigsata,
nuniakum nunú chichamem jintinjuata.

136 Amina chichamjumin
eme anentus uminachu asamtai,
shiig senchi buuttjai.

137 Tuke Pujuuwah, amek pegkegmaitme;
tuja ame suwimak sukagtam
dushakam pegkegnum jintinkagtawai.

138 Chicham umiktin ame sukagtusuitam
duka waitchauwai, betek uminnai.

139 Mina shiwag aidau
amina chichamjumin uminachkui,
kajeakun shiig senchi waitiajai.

140 Amina chichamjumik
ashí dekapsamu dekas pegkegmai,
nuadui wika amina
inakminuk nuna wakegajai.

141 Wika dushiktai, wainkauchitjai,
tujash amina chichamjum umiktin
sukagtusuitam nunak kajimattsujai.

142 Amina takatjum pegkeja duka
tuké imanisag auwai,
tuja amina chichamjum umiktin

agagbauwa duka dekas shiig pegkegmai.

¹⁴³ Waitiakun wake besemag pujubiajai;
tujash amina chichamjum umiktin sukagtusuitam
nunak minak shiig anemtijusmayi.

¹⁴⁴ Ame chicham umikuitam
duka makichkish yapajinchauwai.

¡Yainkata wisha nuna shiig antukan umiktajai!

121

Tuke Pujuuwai amina kuitamjamnuk

Atushat wekaeku Apajuíyai anentaimsa kantabau

¹ Muja aidaun pagkain diyakun:

¿Tuwiya taag minash ayamjuktainta? tajai.

² Minak Tuke Pujuu nayaimpin nugkajai najanauwa nunú yainkat-
tawai.

³ ¡Apajuík waitkastinme tusag

makichkish idaituschattawai!

¡Amina kuitamjamna duka makichkish kanatsui!

⁴ Nigka makichkish kanuchui;

Israel aents aidaun kuitamna duka
makichkish kanuchui.

⁵ Tuke Pujuu aminak kuitamjamui;

Tuke Pujuu aminak ejaka kuitamjamui.

Niig amina yaimpaktatus amejai ijutkawai.

⁶ Tuja tsawaishkam etsag senchi sukupakug

waitkagmaschattawai,

antsag nantushkam waitkagmaschattawai.

⁷ Ishamain ataish,

Tuke Pujuu ejapak kuitamjamui;

tuja nii amina pujutjumnash kuitamjutpawai.

⁸ Tuke Pujuuk yamaya juwish, tuja ajumaish

ame tuwi wetatme nuniaminish,

tuja wakitki minaminish,

nigki tuké kuitamjamkatnai.

122

Jerusalén kantamjuamu

David Jerusalén wakatatus wesa shiig aneak kantamamu

¹ Tuke Pujuu jee pegkegma nuwi wemi

tujutuinakui, wika shiig anebiajai.

² Jerusalégkah, yamai juwi waitinum kaunaji.

³ Jerusalén yaaktamamua nuwi

ashí tikich yaakat aidaushkam ijutkau ainawai.

⁴ Ashí Israel aents Tuke Pujun aentsji aidauk

Jerusalén tuwainawai, Apajuín emematuinak,

wagki nuwi Apajuí ememattajum

tibau asag, nuna umiinak.

⁵ Nuwi awai chicham inagnatai,

tuja Davitan pujusa inamtaijishkam.

⁶ Nuadui: “Jerusalégkah,
aminak utugchatak atsugtamti;
tuja amina anempaina dushakam
agkan pujustinme.

⁷ Yaakat peeja apakbauwa nuna initken
aents batsata dushakam agkan,
tuja jega apu pujusa inamtaijiya
dushakam waitkaschamu ati”, titajum.

⁸ Tuja mina yatsug aidaun
kumpag aidaujai chichagkun:
“Atumnash utugchatak atsugtamtinme”, tajai.

⁹ Untsu Jerusalégkah,
aminig pujut pegkeg ati tusa wakegajai,
wagki Tuke Pujuu amina Apajuígmí
jee pegkegma nunú au asamtai.

124

Apajuík tuke yaijatui

David Jerusalén wakatatus wesa shiig aneak kantamamu

¹ Ashí Israel aents aidautigmek,
Tuke Pujuu iina yaimpakchau akuish,
wajukauk ainji, tumamtajum.

² Tuke Pujuu iina yaimpakchau ataik,
aents aidau jetepagmaya nuaduik,

³ ashí ijipamain awajtamkajui,
senchi kajegtamkaju asag.

⁴ Dutijamawagmatai namak dujajak tajaka
ajapama numamtuk ajapeam amain wajakuitji.

⁵ Namak chichijam tajaka ajapama
numamtuk ajapjamain awajtamkajui.

⁶ ¡Tuke Pujuu tuke pegkegnum chichagtai ati,
wagki shiwaaji ijinatnume
tusa idaitamsachu asamtai!

⁷ Aents chigkin achiktatus detuamunum
chigki nemak tsujimak wegama numamtuk,
iishkam shiwag achigmak
mantamatag tujamainakui, pisaja uwemjabiaji.

⁸ Tuke Pujuu nayaimpin nugkajai
najanauwa nunuwai ayamkagtinuk.

126

Achija yajuakbau waketjagbau

Jerusalén wakatatus wesag shiig aneenak kantamawagbau

¹ Achija yajupakagmatai, waitu batsatutin
Tuke Pujuu awagtamag Jerusalén ikaupamtai,
kajanmatskait dekapin ayaji.

² Nuniaku senchi dushimiaji,

imaniaku shiig aneasa senchi kantamaiji.
 Nuniajin tikich nugkanmaya aents
 pegkegchau aidau chichainak:
 “¡Tuke Pujuu ditanak
 shiig pegkegnum yaigke!” tuyanume.
³ Duka dekaske, ¡Tuke Pujuu
 iinak yaimpak agkanmitkagmabi!
 ¡Nuadui iishkam shiig anebiaji!
⁴ ¡Tuke Pujuuwah, yumi uwegshunum yututai,
 entsa najanea akagama numamtuk,
 ataktu awagkim Jerusalén itajatuata!
⁵ Aents buu buuttajai ajakmaku aidauk,
 atakea duwi shiig aneas juukagtinai.
⁶ Tuja aents aidau ajak pegkejan juki
 ajakmatatus buutkabaikia shiyakaju aidauk,
 dita ajakmamunmayan juukag,
 shiig aneas kantamkiag
 dita jeen wakitkiagtinai.

127

Ashí Tuke Pujunmaya junawai

Salomón Jerusalén wakatatus wesa shiig aneak kantamamu

¹ Tuke Pujuu jegan jegamchataik,
 jegá jegamin aidauk wainak takak waituinawai;
 tuja Tuke Pujuu yaakta kuitamchataik,
 yaaktan kuitamin aidauk
 wainak kuitamak waituinawai.

² Ajakma yuwatatus takak,
 kashikmas nantaki tuke etsan akapakush,
 kuashat juuka yuwatnunig
 wainak imanik waituinawai.
 Nuninai Apajuik niina kumpajinak kanak tepetaish,
 nii yuwatnujinak ashí suwawai.

³ Iina uchiji aina duka,
 Tuke Pujuu anentag pegkejuch amasbau ainawai.

⁴ Ii datsa ajin iina uchiji akiinaina duka,
 aents maanitan yacha nuna
 flechajijai betek ainawai.

⁵ Nuadui aents kuashat uchigtina duka
 shiig aneasagtin ainawai.
 Tuja niina shiwaaji aidaujai igkuniakush dushikiam achatnai,
 niina uchiji kuashat asa, apajin ayamjukagtinai.

130

Tuke Pujuuwai kajintsa anentaibau

Jerusalén wakatatus wesag shiig anenaku kantamawagbau

¹ Tuke Pujuuwah, waanum inidak
 egkema pujusan amina untsuagme.

² ¡Apuh, wi untsuajam nunú antugtukta!
 ¡Wi amina egakun untsuamag

nunú antugtukam yainkata!

³ Tuke Pujuuwah,
ame tsagkugkagtugchawaitkuminig,
iwakuk batsamaitsuji.

⁴ Tujash ame tsagkugkagtau asam,
eme anentsa umijam atatme.

⁵ Wika Tuke Pujuuwai ashí mina anentaigjai,
kajintsan pujajai.
Tuja nii anagkagtuawa nunashkam
dekaskeapi tajai.

⁶ Wika yaakta kuitamin
wajupa asag tsawajat tusa,
tsawantan dakajama numamtuk
mina Apajuíjun dakajai.

⁷ Israel aents aidautigmek
Tuke Pujuu taatnuji dakastajum;
wagki niyai awai anentak, tuja ashí agkanmaetashkam.

⁸ Apajuí Israel aents aidaun tudaujinak
ashí tsagkujuk agkanmitkattawai.

137

Achija Babilonia nugkanum yajuakbau

¹ Babilonia namak aidaunum
uwet pekaamsaja,
Jerusalén anentaimtusa buutiaji.

² Nuwi numi ayaunum nuna kanawen
iina arpaji aidau nenayaji.

³ Nunika nuwi batsatjin
suntag iina achipag yajupaku aidau
chichagtamainak:

“¡Shiig anejasum kantamatajum,
tuja atumi nugkem Sión pachisjumshakam
kantamatajum!” tusa waitkagmayanume.

⁴ Iik makichkish iina Apajuíji kantamjutaig
tikich nugkanmak kantamaitsuji, tuyaji.

⁵ ¡Jerusalégkah,
wi amina kajimatkin idaitaik,
mina uweg untsujua duka makichkish achika
takamainchau wajasti!

⁶ ¡Tuja wi amina eme anentsuk,
kajimatkin idaikun shiig aneasan pujutaik,
mina idaijuk kayakmataijui nujamak asati.

⁷ Tuke Pujuuwah,
babilonianmaya aents aidau
Jerusalégkan tsaikajua duwi,
Edom aents aidau chichainak:
“¡Ashí tsaiaktajum!” tusa imatianum

nunú kajimatki idaisaipa!

⁸ ¡Babiloniah, ameshkam tsayam atatme!

¡Ame jutii aidauti waitkagkagtam
nuna iiktamainak tsaipaidauk
shiig aneasagtin atinme!

⁹ ¡Amina uchijum aidaun achika yajuakag
kayanum anugkag tsupig ijinawagtina nunak
Apajuí pegkegnum yumigjatin ati!

139

Apajuík ashí wainui

David kantamamu

¹ Tuke Pujuuwah, ame minak shiig dekamge.

² Ame wi dutikamu aina duka ashí dekame,
amek atushat pujusmesh,
wi wajuk anentaimja dushakam dekame.

³ Wi wajuk wekaeja duka amek ashí dekame,
¡wi wajina takaja dushakam ashí dekame!

⁴ Wika eke chichatsaig,
wi wajina titag taja duka amek
emtikam dekame.

⁵ Ame minak ashí tententuum,
amina uwegmin achigsam pujame.

⁶ Wika amina yachajum imana nunak
kakajus dekamainchau dekaapejai.

Mina dekatjuk nuwig makichkish jegatsui.

⁷ Amina Wakanmin ukuknush ¿tuki wetaja?

Ame ashí nugkanum dekam nuniaish,
¿wisha itug tupikaknuk uumjuktagme?

⁸ Wi nayaimpinum wakamtaish,
amek nuwi pujuttame,
tuja wi nugka initken akaikimtaish,
amek nuwishkam pujuttame.

⁹⁻¹⁰ Wi nanaakan etsa minitaiya nuni wemataish,
ame minak achigkau atatme,
tuja etsa akaetaiya nuni nayantsa amain wenu
pujusmataishkam, ame minak yainkattame.

¹¹ Wi suwenum uumkatjai tumainaitjai,
tuja nuniachkush tsawaiya nunú suwe wajasmataish,

¹² suwea duka minak aminig ugmatsui;
ame diismak kashia duka tsaaptinai.

¡Ame diismak suwea duka tsaaptinjai betekai!

¹³ Ame mina iyashjuk najatjuawaitme,
ame minak, mina dukuju wakeen najatuawaitme.

¹⁴ Wika ame imatiksa najanamu asan see tajame,
ame najanamu aina duka ashí pegkejai.

¡Wika nunak shiig dekaikai!

15-16 Wi initak wainkachbau
 mina dukuju wakeen najaneauwaitag duka ame waitmayume,
 eke najaneag wajupa tsawan pujustinaitja duka
 ame umigtukuitme.

¡Nunú amina papiigmin agagbauwai!

17 Chah Apajuíjuh,
 amina anentaimtagmia nunak
 shiig anentaimja ejeyin
 dekamainchau dekafejajai.
 ¡Untsu nuna pachisan augmattsatag takun
 ima utugchat dekapmainaitjai!

18 Nuna dekapagtajai takunush,
 kamatak kuashta iman asamtai,
 kakajus dekapamaittujai.
 ¡Tuja kanaja shintaish amek wijaig pujame!

19 Apajuíyah, aents pegkegchau aina duka ijinata,
 dutikakum magkagtin aidaushkam datupatjukta.

20 Nunú aents aidauk amina daagmin pachisag
 pegkegchaun chichainawai.

Nuninak amijai wainak shiwagmagainawai.

21 Tuke Pujuuwah,
 amina kajegtamaidaunak wishakam kajejajai,
 tuja amina dakitjamaidaunashkam
 dutiksanuk dakitajai.

22 ¡Nunú aents aidaunak shiig senchi kajejajai!
 Amina shiwaajum aina duka
 mina shiwag ainawai.

23 Chah Apajuíyah,
 mina anentaijush shiig diigtusta,
 dutikam mina anentaimtajush shiig dekapjuttsata.

24 Tudau jintan aintsujash nunú diigtusta,
 nuniakum jinta pujut nagkankashtinum
 ekagtina nuni etita.

145

Ashí aents aidauk Apajuín ememattinme

David kantamamu

1 Mina apug Apajuíyah,
 amina daajum ajumaish tuke atina
 nuna pachisan etsegkatjai.

Tuja amina daagminak tuké pegkegnum
 chichagtinaitjai.

2 Ashí tsawantai aminak pegkegnum chichagtatjame,
 nuniakun amina daagmin tuke ememattinaitjai.

3 Tuke Pujuuk dekas múuntai,
 iman asa ima nigki emematam amainai,
 iman asamtai anentaimsaish, kakajus dekamaitsui.

4 Uchi akiinak wegagtina duka

ame pegkeg iwainajuitam nuna emematiagtinaí.
 Tuja amina senchigmejai
 wainchatai ishamain aidau
 iwainajuitam nunú etsegnaktinaí.

⁵ Amina imanjumin tsaaptinjumjai pachisag
 etsejiagtinaí.

Nuninakuí wishakam
 ame iwainajuitam nuna pachisan chichattajai.

⁶ Amina senchigmin shiwaajum aidau
 depetnaitam nuna pachisag chichagtinaí.
 Nuninakuí wishakam ame múuntaitam
 nuna pachisan chichattajai.

⁷ Amina wait anenkagtutaigmin
 pachisag etsejiagtinaí;
 nuninak shiig aneas kantamainak:
 ¡Apajuíyai pegkegmak! tujamiagtinaí.

⁸ Tuke Pujuuk kakagchauch, wait anenkagtin;
 wamak kajecheu anentak wajasuí.

⁹ Tuke Pujuuk ashí aents aidaun kuitamui;
 tuja tikich nii najankamu aina nunashkam puyatjus kuitamui.

¹⁰ ¡Tuke Pjuuwah,
 ashí ame najankamu aidau emematjamtinme!
 ¡Tuja amina umigtamin aidaushkam
 pegkegnum chichagtamtinme!

¹¹ ¡Amina inamtaijum pegkegma nuna
 pachisag chichatnume!

¡Tuja amina senchigmejai
 wainchatai ishamain aidau
 iwainajuitam nuna pachisag chichagtatui!

¹² ¡Tuja amina senchigmea nuna,
 ame inamtaijum pegkegma nujai
 ashí aents aidau dekaatnume!

¹³ Amina inamtaigmea duka
 ajumaish tuke atinai,
 nuadui ajumaish amek tuke inamtinaitme.

¹⁴ Tuke Pjuu aents wake besemag pujaunash yayawai,
 tuja kakakchau wajas pujaunash senchimtikawai.

¹⁵ Apujuh, ashí aents aidauk
 amina dakagmainawai, yutain sujamsati tusa.

¹⁶ Nuninakuí ame shiig aneasam suwame,
 nuna ashí iwaku aidauk
 yuwawag ejemakag shiig anenawai.

¹⁷ Tuke Pjuu ashí
 nii anagkagtuamunak betek uminai,
 tuja nii najankamu aina nunak
 shiig anentawai.

¹⁸ Tuke Pjuu aents niina dekaskenum
 segau aina nujai ijutkawai.

19 Tuja niina eme anentus umijin aina nunú
segamak antujuk yaigka uwemtikui.
20 Tuke Pujuuk niina aneen aidaun kuitamui;
untsu aents pegkegchau aidaunak ijina utsawai.
21 ¡Wika kantamkun Tuke Pujuun ememattatjai!
¡Ashí aents nugkanum batsamin aidauk
Apajuí daaji pegkegma nuna pachisag
tuké ajumaish ememattin atinme!

148

Apajuí najankamu aidautigmek nii ememattajum

1 ¡Iina Apajuí emematiagmi!
¡Nayaim aidautijum Tuke Pujuu ememattajum!
¡Yakí agkajunum Apajuí ememattajum!
2 ¡Atum Apajuí aentsji ángel aidautijum
Apajuí ememattajum!
¡Nayaimpinmaya suntag aidauwah,
Apajuí ememattajum!
3 ¡Etsa, nantu aidauwah,
Apajuí ememattajum!
¡Yaya aidautigmesh Apajuí ememattajum!
4 ¡Yumi yakiya aidautigmesh
Apajuí ememattajum!
¡Nayaim shiig múunta
dushakam Apajuín emematti!
5 Tuke Pujuu daaji ememattajum,
wagki nii chichakmatai,
ashí najaneakua nuadui.
6 Nii ashí umikui tuke asatnun;
dutika chichaman umikui atakesh yapajinashtinun.
7 ¡Nugkaya aidautigmesh,
tuja nayantsanum batsamin
kuntin múun aidautigmesh,
nayantsa initken batsamin aidaujai
Tuke Pujuu ememattajum!
8 ¡Chaaajip, bicha, nieve, yujagkim aidautigmesh,
tuja dase Apajuí dasenkati tima
ishamain dasentin aidautigmesh,
9 muja aidautigmesh, nain aidautigmesh,
tuja ashí setug aidautigmesh,
numi neje yujutai aidautigmesh
Apajuí ememattajum!
10 ¡Kuntin tagkumtai, kuntin tagkumchatai,
chigki aidau, kuntin japiinas yujau aidautigmesh,
11 tuja ashí nugka múun aidaun
apuji aidautigmesh, atumi aentsjum aidaujai,
apu ashí nugkanmaya aidautigmesh,
12 aishmag, nuwa,

datsa, múuntuch aidautigmesh,
 13 ashí Tuke Pujuun daaji ememattajum,
 wagki ima niina daajiya duke múuntak!
 ¡Niina imanjiya duka nayaimpin
 nugkajai nagkaesau múuntai!

14 ¡Apajuí niina aentsji aidaunak senchintikawai!
 Nuadui niina aentsji Israel wegantu aidaulik
 nii emematuinaji.
 ¡Yajauwajah!
 Apajuí ememattai ati.

150

Ashí aentstijum Apajuí kantamjuatajum

1 ¡Yajauwajah!
 ¡Apajuí niina jee pegkegma nuwi ememattajum!
 ¡Apajuí nayaim wigkaya nuna
 niina senchijijai najanauwa nuwi ememattajum!
 2 ¡Niina senchijin wainchatai aidaun iwainajua
 duwi ememattajum!
 ¡Niina imanjig nagkatkachua
 duwi ememattajum!
 3 ¡Uwija kachuji aidau umpuakjum ememattajum,
 arpa, salterio aatsa awatkujum ememattajum!
 4 ¡Pandero aidau awatkujum
 nantsemkijum ememattajum!
 ¡Pigkui umpuakjum,
 guitarra awatkujum ememattajum!
 5 ¡Platillo awatkujum ememattajum!
 ¡Platillo senchi shinin aina nunú
 awatkujum ememattajum!
 6 ¡Ashí pujutji ajamu aidauk
 Tuke Pujuun ememattinme!

¡Yajauwajah!